

Meupiya ne
panugtulen: Bibliya
ne Matigsalug



NT in Manobo, Matigsalug

Meupiya ne panugtulen: Bibliya ne Matigsalug NT in Manobo, Matigsalug

copyright © 2010 Wycliffe Bible Translators, Inc.

Language: Manobo, Matigsalug

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Manobo, Matigsalug

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

ab5069ba-a7e6-5f52-a27b-d031ad525738

Contents

Matiyu	1
Markus	85
Lukas	138
Huhan	224
Me Himu	288
Ruma	367
1 Kurintu	401
2 Kurintu	435
Galasya	457
Ipisu	470
Pilipus	482
Kulusas	491
1 Tisalunika	500
2 Tisalunika	508
1 Timutiyu	513
2 Timutiyu	523
Titu	530
Pilimun	535
Hibruwanen	538
Santiyagu	566
1 Pidru	575
2 Pidru	586
1 Huwan	593
2 Huwan	602
3 Huwan	604
Hudas	606
Impakita	610

Ka Meupiya ne Panugtulen Sumale ki Matiyu

Igpewun-a

Ka migsulat te seini ne baseen iyan si Matiyu ne enggaranan ded ki Libi. Sabeka sikandin te sapulu wey daruwa (12) ne hibateen ni Hisus, wey egngaranan ki Alpiyu ka amey rin. Matig-Galiliya sikandin piru diye migtrabahu te Kapirnaum isip talagsukut te buhis te ware pad neyimu ne hibateen ni Hisus. Ne kema buwa iya ke si Hisus e ka migbalew-balew te ngaran din ne Libi te neyimu e sikandin ne hibateen, wey migngaranan e sikandin ki Matiyu ne iyan igpasabut te Hibruwanen ne linalahan 'ka dasag te Manama.'

Ka guhuren ni Matiyu, diye migbunsud te itulan te kaap-apuan ni Hisus, te peg-keetew rin, pegbewutismu wey te pegtintal kandin, te pegwali wey te pegpanulu din, wey te pegpamawi din te egmanderalu diye te Galiliya. Pegkapenga kayi, nahuhud e man-e ni Matiyu ka meyitenged te peggendiye ni Hisus te Hirusalim, wey ka nangimu rin te diyad sikandin. Nahuhud din man-e ka neyitabu te katammanan ne simana ni Hisus diye te Hirusalim, ka

peglansang kandin te krus, wey ka pegkeuyag din.

Nahuhud kayi te seini ne baseen ne si Hisus iyan ka Kristu ne insaad te Manama ne egluwas te me Hudiyu, wey te langun ne kene ne me Hudiyu ne egpalintutuu wey egsalig kandin. Ne pinaahi kandin, natuman te Manama ka insaad din diye te keet-etawan din sumale diye te Tapey ne Kasabutan.

Seini se Meupiya ne Panugtulen, migpeila ne si Hisus ka mabantug ne Talagpanulu, ne due katenged din te pegpasabut te Balaud te Manama. Kayi te seini ne baseen, due lalimma ne malayat ne pegpanulu ni Hisus ne insulat ni Matiyu, wey naan pa iya ka pegpanulu ni Hisus meyitenged te Peghari te Manama: (1) Ka pegwali diye te bubungan meyitenged te pegbebatasan te me etew, ka me katungdanan wey ka egkengarawat dan, wey ka egtamanan te me etew ne nasakup te Migharian te Manama (Kapitulu 5-7); (2) ka pegpaney-paney te sapulu wey daruwa (12) ne apustulis meyitenged te me himu ran (Kapitulu 10); (3) ka me panunggilingan meyitenged te Peghari te Manama (Kapitulu 13); (4) ka pegpanulu meyitenged te kaluwasan te egkeyimu ne hibateen (Kapitulu 18); wey (5) ka pegpanulu meyitenged te katammanan te seini ne timpu wey ka meyitenged te eggingsuma ne Peghari te

Manama. (Kapitulu 24–25).
Ka nasulat te seini ne baseen

Ka kaap-apuan wey ka pegkeetew ni Hisu Kristu
 1:1-2:23

Ka himu ni Huwan ne Talagbewutismu 3:1-12

Ka pegbewutismu wey ka pegtintal ki Hisus 3:13-4:11

Ka himu wey pegpanulu ni Hisus diye te Galiliya 4:12-18:35

Ka peggipanew ni Hisus puun te Galiliya peendiye te Hirusalim 19:1-20:34

Ka katammanan ne simana ni Hisus diye te Hirusalim 21:1-27:66

Ka pegkeuyag wey pegpakita te Magbebaye 28:1-20

Ka kaligkatan ni Hisu Kristu
(Luk. 3:23-38)

¹ Seini ka kaap-apuan ni Hisu Kristu ne kabuhalan ni Dabid, ne kabuhalan ni Abraham.

² Si Abraham ka amey ni Isaak, si Isaak ka amey ni Hakub, ne si Hakub ka amey ni Huda wey te me suled din.

³ Ne nakaasawa si Huda ki Tamar wey due daruwa ne anak dan ne si Piris wey si Sira. Si Piris ka amey ni Hisrun, wey si Hisrun ka amey ni Aram. ⁴ Ne si Aram ka amey ni Aminadab, si Aminadab ka amey ni Nasun, wey si Nasun ka amey ni Salmun. ⁵ Ne nakaasawa si Salmun ki Rahab ne iyan dan anak si Buas,

ne nakaasawa si Buas ki Rut ne iyan dan anak si Ubid, ne si Ubid ka amey ni Hisi,⁶ ne si Hisi ka amey ni Hari Dabid.

Ne si Hari Dabid ka amey ni Sulumun, wey iyan din iney ka asawa dengan ni Uriyas.⁷ Si Sulumun ka amey ni Rihubaam, si Rihubaam ka amey ni Abyas, si Abyas ka amey ni Asa,⁸ ne si Asa ka amey ni Husapat, si Husapat ka amey ni Huram, si Huram ka amey ni Usiyas.⁹ Si Usiyas ka amey ni Hutam, si Hutam ka amey ni Ahas, si Ahas ka amey ni Isikiyas.¹⁰ Si Isikiyas ka amey ni Manasis, si Manasis ka amey ni Amun, ne si Amun ka amey ni Husiyas.¹¹ Ne si Husiyas ka amey ni Hikuniyas wey te me suled din. Te seeye ne timpu, in-uyan ka matig-Israil diye te Babilunya eyew eg-uripenen.

¹² Pegkapenga uyana te matig-Babilunya ka matig-Israil, nakaanak si Hikuniyas ki Salatiil, ne si Salatiil ka amey ni Surubabil,¹³ si Surubabil ka amey ni Abyud, si Abyud ka amey ni Ilyakim, si Ilyakim ka amey ni Asur,¹⁴ si Asur ka amey ni Saduk, ne si Saduk ka amey ni Akim, si Akim ka amey ni Ilyud.¹⁵ Si Ilyud ka amey ni Ilisar, si Ilisar ka amey ni Matan, si Matan ka amey ni Hakub.¹⁶ Si Hakub ka amey ni Husi, ne asawa ni Mariya ne iney ni Hisus ne egngaranan te Kristu.

¹⁷ Purisu due sapulu wey hep-at (14) ne kabuhalan puun ki Abraham taman ki Dabid, wey sapulu wey hep-at (14) degma ne kabuhalan puun ki Dabid taman te timpu ne neuyan e ka matig-Israil diye te Babilunya, wey duen pad man-e sapulu wey hep-at (14) ne kabuhalan puun te neuyan ka matig-Israil taman te neetew e ka Kristu.*

*Ka pegkeetew ni Hisus
(Luk. 2:1-7)*

¹⁸ Seini ka guhuren meyitenged te pegkeetew ni Hisu Kristu. Ka iney rin ne si Mariya, napamalayan e ni Husi, piru te ware pad sikandin migpewulirey, naberes e si Mariya pinaahi te Panisingan te Manama.

¹⁹ Na, si Husi se egpangasawa kandin, matareng ne etew wey kene sikandin egkeupian ne egpeylawan din si Mariya. Ne puun dutu, nakasuman-suman sikandin ne egpasuwayey sikandan te heles de. ²⁰ Piru te migsusuman-suman pad sikandin dutu, due panalihan te Magbebeye ne Manama ne migpakita kandin pinaahi te taheinep ne migkahi, "Husi, kabuhalan ni Dabid, kene ka egkaaldek ne egpangasawa ki Mariya su naberes sikandin pinaahi te Panisingan te Manama.

²¹ Eg-anak sikandin te lukes wey ngarani nu ki

Hisus tenged su sikandin ka egluwas te keet-etawan din puun te me sale dan."

²² Neyitabu seini se langun eyew egkatuman ka ingkahi te Magbebeye ne Manama pinaahi te prupita: ²³ "Egkaberis ka mengebay ne ware pad neyilabeti, wey lukes ka ig-anak din wey egngaranan sikandin te Imanyuwil" (Iyan kaluwasan te Imanyuwil, "Duma ta ka Manama.")

²⁴ Purisu te peggimata ni Husi, intuman din e ka insuhu te panalihan te Magbebeye ne Manama, wey inasawa rin e si Mariya. ²⁵ Piru ware din hilabeti si Mariya te ware pad mig-anak. Te inlesutan e si Mariya, lukes iya ka anak din wey ingngaranan e ni Husi ka bate ki Hisus.

2

Ka me etew ne egkateu ne egpamituen

¹ Diye miglesut si Hisus te lungsud te Bitlihim ne sakup te prubinsya te Hudiya, ne si Hirudis pad ka Hari te seeye ne timpu. Ne due me etew ne egkateu ne egpamituen ne diye ne mahinged te dapit te igsile ne nanginguma diye te Hirusalim ne mig-inse, ² "Hendei ka bate ne neetew ne iyan egkeyimu ne Hari te me Hudiyu? Nakita ney ka bituen ne diye dapit te igsile ne iyan palinneu te peglesut din, purisu miggendini key eyew te pegasimbaw kandin."

* **1:17** Ka igpasabut te Kristu, Insaad ne Manluluwas. **1:18** Luk 1:27. **1:21** Luk 1:31. **1:23** Isa 7:14 (LXX). **1:25** Luk 2:21.

³ Te pegkarineg dutu ni Hari Hirudis, nabantalan sikandin duma te langun ne etew te Hirusalim. ⁴ Purisu impalibulung din ka langun ne me pangulu te me talagpanubad wey ka me talagpanulu te Balaud te Manama wey mig-insaan din ke hendei eglesut ka Kristu.

⁵ Ne migtabak sikandan, "Diye eglesut sikandin te lungsud te Bitlihim ne sakup te prubinsya te Hudiya, su seini ka nasulat te prupita te Manama:

⁶ 'Ka Bitlihim ne nasakup te Hudiya,
ka mabantug te langun
ne lungsud due te Hudiya,
su diye egnuun ka egpangulu
ne égtanggu
te keet-etawan ku ne me kabuhalan ni Israil.'

⁷ Te pegkarineg dutu ni Hirudis, impeumew rin e te heles de ka me etew ne egkateu ne egpamituen, wey mignengnengan din ke kenu mglepew ka bituen ne nakita ran. ⁸ Nataman, impeendiye din e sikandan te Bitlihim te migkahi, "Hendiye kew e wey ay-ayari niyu te egpammitew ka bate. Ne emun ke egkakita niyud e sikandin, nangeni e re nikaniyu eyew egpekeendiye a degma ka egsimba kandin."

⁹ Pegkapenga te Hari te miglalag, nangipanew e sikandan. Te sasangan pad sikandan ne eggipanew, duen e man-e ka bituen ne nakita ran diye dapit te

igsile. Ne seeye naa ka inikul ran taman te migsanggel diye te neugpaan te bate. ¹⁰ Amana sikandan nahale-gale te pegkakita ran te bituen! ¹¹ Te pegseled dan te baley, nakita ran ka bate duma te iney rin ne si Mariya. Ne migpanimbuel sikandan wey insimba ran ka bate. Nataman, migbukalasan dan e ka me mahal ne inuyanan dan wey imbehey ran e diye te bate ka me dasag dan ne bulawan, insinsu wey mira.

¹² Piru te peg-uli dan e, diyad e sikandan migbaye te lein ne dalan tenged su migpanpanayan sikandan te Manama pinaahi te taheinep ne kenad e egpaliberen diye te ki Hirudis.

Ka pegpallahuy diye te Ihiptu

¹³ Te nangipanew e ka egkateu ne egmamituen, due panalihan te Magbebaye ne Manama ne migpakita ki Husi pinaahi te taheinep din ne migkahi, "Enew ka. Uyana nu ka manggianak, wey pallahuy kew diye te Ihiptu. Ne diye kew naan pa ugpe taman te egpaaween kud sikaniyu, su egpamitawen ni Hirudis ka bate eyew eggimatayan."

¹⁴ Purisu mig-enew e si Husi wey in-uyan din e ka talaanak, wey te sikan de ne karusileman migpallahuy e sikandan peendiye te Ihiptu. ¹⁵ Ne diye pad mig-ugpe

sikandan taman te migpatey e si Hirudis.

Neyitabu ka iling kayi eyew egkatuman ka ingkahi te Magbebaye ne Manama pinaahi te prupita ne miggenendue, "Mig-umew ku ka Anak ku puun te Ihiptu."

Ka peggimatey te me bate

¹⁶ Ne migpangebel-ebel e ka langet ni Hirudis te pegkannengnengi rin ne in-akalan de sikandin te me etew ne egkateu ne egpamituen. Purisu migsuhu sikandin ne egpeyimatayan ka langun ne me bate ne lukes diye te Bitlihim wey te marani dutu ne me bariyu puun te iyam pad miglesut peendiye te daruwa ne leg-un ne me bate. Su nakanengneng sikandin ne migdaruwe e ne leg-un ka kariyuan puun te nakita ka bituen te seeye se egkengateu ne egpamituen.

¹⁷ Pinaahi te sika ne neyitabu, natuman e ka ingkahi ni prupita Hirimiyas ne miggenendue:

¹⁸ "Due laheng ne egkarineg diye te Rama,
ne egsinehew wey egpalumbibigtew,
egpandalawit si Rakil tenged te me anak din;
ne kene iya sikandin egkeim-imuan,
uya su nenammatey e ka me anak din."

Ka peg-uli diye te Nasarit

¹⁹ Ne hengkayi te migpatey e si Hirudis, migpakita ka

panalihan te Magbebaye ne Manama ki Husi pinaahi te taheinep te diye pad sikan-dan te Ihiptu. ²⁰ Migkahi ka panalihan, "Enew ka. Dumaa nu ka manggianak, wey uli kad e diye te Israil, tenged su migpatey e ka etew ne egkeupian ne eggimatey te bate." ²¹ Ne mig-enew si Husi wey migduma rin e ka manggianak te mig-uli diye te Israil.

²² Piru te pegkarineg din ne si Arkilaw e ka Hari te Hudiya ne inliwan te amey rin, naaldek e sikandin ne eggendiye. Nataman, impanpanayan e man-e sikandin te Manama pinaahi te taheinep din ne egpeendiyeen te prubinsya te Galiliya. ²³ Ne diyad e sikandan migugpe te lungsud te Nasarit. Purisu natuman e ka ingkahi te me prupita meytenged te Kristu ne miggenendue, "Enggaranan sikandin te matig-Nasarit."

3

Ka pegwali ni Huwan ne Talagbewutismu

(Mar. 1:1-8; Luk. 3:1-18; Huw. 1:19-28)

¹ Te seeye ne timpu, due etew ne enggaranan ki Huwan ne Talagbewutismu ne migwali diye te mammara ne inged ne kene egkeugpaan diye te Hudiya. ² Migkahi sikandin, "Inniyuhi niyu ka me sale niyu, su mahaan e ka Peghari te Manama!" ³

^{2:18} Hir 31:15. ^{2:23} Mar 1:24; Luk 2:39; Huw 1:45. ^{3:2} Mat 4:17; Mar 1:15.

^{3:3} Isa 40:3 (LXX).

Si Huwan ka egkahiyen ni prupita Isayas ne eggenen-due,

“Due egpanguleyi diye te mammara ne inged ne kene egkeugpaan ne egkahi:

‘Andama niyu ka dalan te Magbebaye.

Tul-ira niyu ka egbayaan din!”

⁴ Ka kumbale ni Huwan innimu ligkat te bulbul te kamilyu, ne ka sinturun din innimu ligkat te laplap te ayam. Ne iyan din de egkeenen ka talangas wey ka teneb. ⁵ Nangendiye te kandin ka me etew ne diye egpuun te Hirusalim, wey diye te langun ne lungsud te Hudiya, wey te langun ne me inged ne marani te weyig ne Hurdan. ⁶ Ne nekegsendit e sikandan wey impangguhud dan e ka me sale dan, wey imbewutismuhan e sikandan ni Huwan diye te weyig ne Hurdan.

⁷ Te pegkakita ni Huwan ne masulug ka me Parisiyu wey me Sadusiyu ne migparani kandin eyew egpabewutismu, migkahiyan din e sikandan, “Sikaniyu se egpekeiling te me mammiley, hentew-a ka miglalag kaniyu ne egpakaalihi kew te egginguma ne legpad te Manama? ⁸ Ipakita niyu pinaahi te himu niyu ne miginniyuhan niyud e ka me sale niyu. ⁹ Ne kene kew kahi, ‘Me kabuhalan key e ni Abraham.’ Su egnangen-

ku sikaniyu te egkaayun ne egpabaluyen te Manama ne me etew ka seini se me batu eyew eggimuwen ne kabuhalan ni Abraham. ¹⁰ Ne kuntee, andam e ka perekul ne igpekpek te me kayu; ne egpeleren ka tagse kayu ne kene egbebehas te meupiya, wey igdegpak diye te hapuy. ¹¹ Egbewutismu a kaniyu pinaahi te weyig te pegpeila ne mig-inniyuhan niyud e ka me sale niyu. Piru due egpakinundul keddi ne subla pad ne maresen keddiey, ne kena a ne likes minsan te peg-uyan naan de te sandal din. Sikandin ka egbewutismu kaniyu te Panisingan te Manama wey te hapuy. ¹² Egpekeiling sikandin te etew ne egpalayap te paley, iglein din ka tipasi diye te ukaba. Ne seeye se tipasi diye din igtahu te lelapeng, piru ka ukaba egsilaban din te hapuy ne kene egkeebukan.”

*Ka pegbewutismu ki Hisus
(Mar. 1:9-11; Luk. 3:21-22)*

¹³ Nataman, miggendiye si Hisus te Hurdan ligkat te Galiliya ka egpabewutismu ki Huwan. ¹⁴ Piru kene perem egkeupian si Huwan ne egbewutismu ki Hisus, su migkahi si Huwan, “Sikeddiey ka keilangan ne egbewutismuhan nu, ne mania te miggendini ka keddiey?”

¹⁵ Piru migtabak si Hisus, “Keilangan iya ne eggimuwen ta seini eyew

te pegtuman te langun ne igkeupii te Manama.” Ne mig-uyun e si Huwan ki Hisus.

¹⁶ Te nabewutismuwan e si Hisus wey nakahakap e, sauhune ne nalukatan ka langit wey nakita rin ka Panisingan te Manama ne miglene ne egpekeiling te seleppati ne miglatun diye te kandin. ¹⁷ Ne due laheng ne egpuun te langit ne migkahi, “Seini ka pinalangge ku ne Anak. Amana a nahale kandin.”

4

Ka pegtintal ki Hisus

(Mar. 1:12-13; Luk. 4:1-13)

¹ Nataman, in-uyan e te Panisingan te Manama si Hisus diye te mammara ne inged ne kene egkeugpaan eyew egtintalen ni Meibulan. ² Ne dutu, migpuasa sikandin seled te hep-at ne pulu (40) ne aldew wey marusilem, ne nataman, miggutasan e sikandin. ³ Ne miggendiye te kandin si Meibulan ne migkahi, “Ke Anak ke ma te Manama, pabaluya nu ne paan seini se me batu.”

⁴ Piru migtabak si Hisus, “Nasulat e diye te Kasulatan ne miggendenue, ‘Kene egkeuyag ka etew te keenen de, ke kene, te tagse lalag ne iglalag te Manama.’”

⁵ Nataman, in-uyan e te ahalen te me busew si Hisus diye te Hirusalim, ka Matulus ne Siudad, wey diye itahu

sikandin te kinaribabawan te timplu,⁶ wey migkahiyan sikandin, “Ke Anak ke ma te Manama, tinugpu ka seeye te diralem. Su nasulat e diye te Kasulatan,

‘Egsuhu ka Manama te me panalihan din te peg-bantey keykew, wey egtapayeen ka nikan-dan, eyew kene egpakabar as te batu ka paa nu.’”

⁷ Piru migkahiyan sikandin ni Hisus, “Nasulat e degma diye te Kasulatan ne miggendenue, ‘Kene nu tintala ka Magbebabe ne Manama nu.’”

⁸ Nataman, in-uyan e man-e te ahalen te me busew si Hisus diye te titikangi ne bubungan, wey impapitew kandin ka katelesan te langun ne inged kayi te ampew te tane. ⁹ Ne migkahiyan sikandin ni Meibulan, “Igbe-hey ku seini se langun diye te keykew ke egpanimbuel ka wey egsimba keddi.”

¹⁰ Ne migkahiyan ni Hisus sikandin, “Awe ka Meibulan! Su nasulat e diye te Kasulatan, ‘Simbaa niyu ka Magbebabe ne Manama niyu wey sikandin de pamakaya niyu!’”

¹¹ Nataman, mig-engkeran e sikandin te ahalen te me busew, ne dutu, nangingume e ka me panalihan te Manama eyew egtanggu kandin.

Ka pegbunsud ni Hisus te himu rin
(Mar. 1:14-15; Luk. 4:14-15)

¹² Ne nakarineg si Hisus te narakep e si Huwan ne Tagalbewutismu, sikan naa ka miglibed e sikandin diye te Galiliya. ¹³ Ne ware sikandin naluhay diye te Nasarit, wey miggalin e mig-ugpe diye te Kapirnaum ne marani te lanew ne sakup te Sabulun wey Naptali. ¹⁴ Neyitabu sika eyew egkatuman ka ingkahi ni prupita Isayas:

¹⁵ “Ka inged te Sabulun wey ka inged te Naptali,
bayaanan peendiye te dahat, ne deyipag te
weyig ne Hurdan,
ne sakup te Galiliya ne
egngaranan te inged te
kene ne me Hudiyu.

¹⁶ Minsan nangugpe due te marusilem ka me etew te sika ne me inged, piru egpakakita red sikandan te dakel ne kalayag.

Ne ka nangugpe due te marusilem ne egkaaldek ne egkengam-matey, egkalayahon ded.”

¹⁷ Puun te seeye ne timpu, migbunsud e migwali si Hisus ne migkahi, “Inniyuhi niyu ka me sale niyu, su mahaan e ka Peghari te Manama.”

Ka peg-umew ni Hisus te an-anayan ne me hibateen din
(Mar. 1:16-20; Luk. 5:1-11)

¹⁸ Taheed te miggiphapanew si Hisus diye te ilis te Lanew te Galiliya, nakakita sikandin te talaari ne egpamiyale ne si Simun ne eg-immuan ki Pidru wey ka suled din ne si Andris. Mangngengalap sikandan se daruwa. ¹⁹ Ne migkahiyan ni Hisus sikandan, “Ikul kew keddiey wey eggimuwen ku sikaniyu ne mangngengalap te me etew.” ²⁰ Due-rue ne mig-engkeran dan ka me biyale dan wey mig-ikul e kandin.

²¹ Te migpabulus e si Hisus ka miggipanew, due nakita rin ne lein ne talaari ne si Santiyagu wey si Huwan ne me anak ni Sibidiyu. Diye sikandan te balangey ran duma te amey ran ne egpanupak te me biyale dan. Ne dutu, in-umew e sikandan ni Hisus, ²² ne due-rue ne engkeran dan e ka balangey ran wey ka amey ran wey mig-ikul e sikandan ki Hisus.

Migpanulu wey migpanawi si Hisus
(Luk. 6:17-19)

²³ Nataman, in-empet ni Hisus te egleug-leug ka intiru ne prubinsya te Galiliya, wey migpanulu sikandin diye te me simbaan te me Hudiyu. Inwaliyan din sikandan te Meupiya ne Panugtulen meyitenged te Peghari te Manama, wey imbawian din ka langun ne eggeramen wey dalu te me etew. ²⁴ Nekeempet te

intiru ne Sirya ka guhuren meyitenged kandin, purisu impanguyan te me etew diye te kandin ka langun ne egmanderalu te nalein-lein ne me dalu, ka seeye se egkababayaran te masakit, ka egpanerepan te busew, ka egbabuyen, wey ka migpatey e se me lawa. Ne imbawian sikandan ni Hisus.²⁵ Amana ne susuluhi ka me etew ne migsinundul ki Hisus ne diye egpuun te Galiliya, Dikapulis, Hirusalim, Hudiya, wey diye te deyipag te Hurdan.

5

Ka pegwali ni Hisus diye te bubungan

(Luk. 6:20-23)

¹ Te pegkakita ni Hisus te seeye se masulug ne me etew, migtakereg e sikandin diye te bubungan wey diyad e sikandin migpinnuu. Ne migparani e kandin ka me hibateen din² wey migbunsud e sikandin ka migpanulu kandan ne migkahi:

³ “Keupianan te seeye se me etew ne mig-ila ne egkeilangan sikandan te Manama, su egkasakup sikandan te Migharian te Manama.

⁴ “Keupianan te seeye se me etew ne eglungku, su egbahayan sikandan te Manama te kahale.

⁵ “Keupianan te seeye se me etew ne mapariralemen, su egkaangken dan ka intiru ne kalibutan.

5:4 Isa 61:2. **5:5** Sal 37:11. **5:6** Isa 55:1-2. **5:8** Sal 24:3. **5:10** 1Pid 3:14. **5:11** 1Pid 4:14. **5:12** 2Kru 36:16; Him 7:52. **5:13** Mar 9:50; Luk 14:34-35.

⁶ “Keupianan te seeye se me etew ne egpakanekal ne egtuman te igkeupii te Manama, su egbulihan sikandan te Manama te pegtuman due.

⁷ “Keupianan te seeye se me etew ne hiid-uwen te duma, su igkeyid-u degma sikandan te Manama.

⁸ “Keupianan te seeye se me etew ne nasabeka ka suman-suman diye te Manama, su egpakakita sikandan kandin.

⁹ “Keupianan te seeye se me etew ne tigpataliware ke due samuk, su eg-angkenen sikandan te Manama ne me anak din.

¹⁰ “Keupianan te seeye se me etew ne egbaybaran tenged te pegtuman te igkeupii te Manama, su egkasakup sikandan te Migharian te Manama.

¹¹ “Keupianan niyu ke eglemetan kew, ke egbaybaran kew, wey ke egpangawangan kew egpandakeseli te langun ne mareet tenged keddiey.

¹² Ne iling ded degma kayi ka natamanan te me prupita ne nekewun-a kaniyu. Purisu gale-gale kew su dakel ka dasag ne intahahe kaniyu diye te langit.

Ka asin wey ka kalayag

(Mar. 9:50; Luk. 14:34-35)

¹³ “Sikaniyu ka asin kayi te ampew te tane. Piru ke egkaawaan e te nanam ka asin, egmenuwen pad te pegpalibed te nanam din?

Warad e karuan due, purisu igdegpak e sika wey egdi-diekan e te me etew.

14 “Sikaniyu ka kalayag kayi te ampew te tane. Ka sabeka ne siyudad ne diye te bubungan, kene egkeeles. **15** Iling naa degma due, ware egmarekket te sulu ne egsu-uban te gantangan, ke kene, igpatawan-tawan iya igtahu eyew egkalayahan ka langun ne diye te seled te baley. **16** Purisu ipalayag niyu ka sulu niyu diye te tangkaan te me etew eyew egkakita ran ka meupiya ne me himu niyu wey eyew egkasaye dan ka Amey niyu ne diye te langit.

Ka pegpanulu meyitenged te Balaud

17 “Kene niyu sumsumana ne iyan ku innendini ka pegdereet te Balaud te Manama wey te sinulat te me prupita. Kene ne pegdereet ka innendini ku, ke kene, ka pegtuman kayi. **18** Egnangenan ku sikaniyu te malehet: taheed te duen pad ka langit wey ka tane, kene iya egkaawaan ka Balaud te minsan deisek ne baad wey tulduk taman te egkatuman e ka langun. **19** Purisu ka minsan hentew ne kene egtuman te minsan deisek ne baad te Balaud, wey egpanulu te duma te pepsupak kayi, sikandin ka kene ne impurtanti diye te Migharian te Manama. Piru ka minsan hentew ne egtuman wey egpanulu te duma

te pegtuman due, sikandin ka labew diye te Migharian te Manama. **20** Sikan naa, egnangenan ku sikaniyu te wey kew re egpakaseled te Migharian te Manama ke subla pad ka pegtuman niyu te igkeupii te Manama du te pegtuman te me talagpanulu te Balaud te Manama wey te me Parisiyu.

Ka pegpanulu meyitenged te pegkabelu

21 “Nakarineg kew e te migkahiyan ka me keet-etawan dengan, ‘Kene kew himatey. Ka minsan hentew ne eggimatey, eg-uyanan diye te hukumanan.’ **22** Piru egnangenan ku sikaniyu te minsan hentew ne egkabelu te duma rin, eg-uyanan degma diye te hukumanan. Ne minsan hentew ne egkahi diye te duma rin, ‘Ware utek nu,’ eg-uyanan sikandin diye te me Talaggukum te me Hudiyu. Ne minsan hentew ne egkahi diye te duma rin, ‘Egkeungel ka!’ eglegparan sikandin diye te linew ne hapuy. **23** Purisu minsan ke diye kad e migsasindeg te altar ne mig-uyan te igpanubad nu diye te Manama, ne due-rue ne nakasuman-suman ka te due suled nu ne neenendue-nan keykew, **24** engkeri nu pa ka igpanubad nu diye te lenged te altar. Ne hendiyei nu pa ka suled nu wey peululiey kew pa te meupiya ne geyinawa. Pegkapenga

due, henduen pad ne ibehey nu ka igpanubad nu diye te Manama.

²⁵ “Ke due egbayung keykew wey igsumbung kad nikandin, dagdahawi nu husaya te sasangan kew e ne egpeendiye te hukumanan, su kema ke igpeendiye kad e nikandin te huwis, ne igpeendiye kad e man-e te pulis, ne egkataman ne igparisu kad e. ²⁶ Egnanganan ku sikeykew te malehet: kene ka iya epakalihawang ke kene nu egkaamin te egbayad ka multa nu.

Ka pegpanulu meyitenged te pegpanlibug

²⁷ “Nakarineg kew e te ingkahi dengan ne, ‘Kene kew panlibug.’ ²⁸ Piru kuntee, egnanganan ku sikaniyu te minsan hentew ne egtengteng te malitan wey egkeupian ne eggilabet kandin, nakapanlibug e sikandin diye te suman-suman din. ²⁹ Ne emun ke iyan egpuunan ka kawanan ne mata nu ne epakasale ka, lekata nu sika wey iregpak nu. Meupiya pad ke egkaawaan ka te sabeka ne baad te lawa nu du te igdegpak diye te linew ne hapuy ka intiru ne lawa nu. ³⁰ Ne emun ke iyan egpuunan ka kawanan ne belad nu ne epakasale ka, tempuha nu sika wey iregpak nu. Meupiya pad

ke egkaawaan ka te sabeka ne baad te lawa nu du te igdegpak diye te linew ne hapuy ka intiru ne lawa nu.

Ka pegpanulu meyitenged te egpeengkerey

(Mat. 19:9; Mar. 10:11-12; Luk. 16:18)

³¹ “Nakahie degma dengan ne, ‘Ka lukes ne eg-engked te asawa rin, keilangan ne egbehey te asawa rin te kasulatan te epakig-engked.’ ³² Piru kuntee, egnanganan ku sikaniyu te emun ke eg-engkeran te lukes ka asawa rin ne ware nasalei, sikandin e ka egpuunan ne epakapanlibug ka asawa rin ne malitan ke eg-abey sikandin eg-asawa. Ne ka epangasawa kandin, epakapanlibug e degma.

Ka pegpanulu meyitenged te pegpahunlibet

³³ “Nakarineg kew e degma te migkahiyan ka me keet-etawan dengan, ‘Kene egkaayun ne kene nu egtumanen ka insaad nu, su keilangan ne egtumanen nu ka impahunlibet nu te Magbebaye ne Manama.’ ³⁴ Piru kuntee, egnanganan ku sikaniyu te kene kew iya pahunlibet. Kene kew kahi, ‘Mengeyibet te langit’ su ka langit pinnuuwan te Manama te egmandu. ³⁵ Ne kene kew kahi, ‘Mengeyibet te kalibutan’ su ka kalibutan diekanan te Manama. Ne

5:27 Iks 20:14; Diy 5:18. **5:29** Mat 18:9; Mar 9:47. **5:30** Mat 18:8; Mar 9:43.

5:31 Diy 24:1-4; Mat 19:7; Mar 10:4. **5:32** Mat 19:9; Mar 10:11-12; Luk 16:18;

1Kur 7:10-11. **5:33** Lib 19:12; Num 30:2; Diy 23:21. **5:34** San 5:12; Isa 66:1;

Mat 23:22. **5:35** Isa 66:1; Sal 48:2.

kene kew man-e pahunlibet te Hirusalim su sika ka siyudad te mabantug ne Hari. ³⁶ Kene kew man-e pahunlibet te me ulu niyu su kene kew egpakapamaangkag wey egpakapameitem minsan te sabeka re ne timman ne bulbul niyu. ³⁷ Kahi kew re te 'Uya' ke eg-uya kew. Ne kahi kew re te 'Kene' ke kene kew, su emun ke epahunlibet kew pad, diyad egpuun sika ki Meibulan.

Ka pegpanulu meyitenged te pegsuli

(Luk. 6:29-30)

³⁸ "Nakarineg kew e te ingkahi dengan ne, 'Ka mata egbayaran ded te mata, ka ngipen egbayaran ded degma te ngipen.' ³⁹ Piru kuntee, egnanganan ku sikaniyu te kene kew suli te miggimu kaniyu te mareet. Ke due egtagpi te beneng nu, ipatagpi nu degma ka limang. ⁴⁰ Ke due egsumbung keykew ne egkuen din e ka kumbale nu, ibehay nud e sika wey ilagkes nud e degma ka dyakit nu. ⁴¹ Ne emun ke due egpehes keykew ne egpatiang te inuyanan din te sabeka ne kilumitru, tianga nu te daruwa ne kilumitru. ⁴² Ke due egbuyu keykew, behayi nu, wey ke due egsambey keykew, pasambaya nu.

Ka peggeyinawa te me kuntere
(Luk. 6:27-28, 32-36)

⁴³ "Nakarineg kew e te ingkahi dengan ne, 'Geyinawei nu ka alukuy nu, wey dumuti nu ka kuntere nu.' ⁴⁴ Piru kuntee, egnanganan ku sikaniyu te geyinawei niyu ka me kuntere niyu wey ampu niyu ka egbayabayad kaniyu. ⁴⁵ Emun ke eggimuwen niyu kailing due, egkeyimu kew ne me anak te Amey niyu ne diye te langit. Su kene de ne ka me meupiya se batasan ka impasilaan din te aldew, ke kene, minsan degma ka me maddeet se batasan. Ne kene de ne ka me matareng ka imbehayan din te uran, ke kene, minsan degma ka me makasesale. ⁴⁶ Kene kew pallateng ne due egkarawat niyu ne dasag ne egpuun te Manama ke iyan niyu re eggeyinawaan ka eggeyinawa degma kaniyu. Su minsan ka me talagsukut te buhis, eggeyinawa te seeye se eggeyinawa degma kandan. ⁴⁷ Ne emun ke iyan niyu re eg-el-eliten ka me suled niyu, nekey ma ka neyimu niyu ne labew te neyimu te duma? Minsan ka kene egmalintutuu te Manama, eg-elit-elit ma te me suled dan. ⁴⁸ Purisu, keilangan ne ware igkarew-ey kaniyu, iling te Amey niyu ne diye te langit ne ware iya igkarew-ey.

6

Ka pegpanulu meyitenged te pegbehey te egkaayu-ayu

¹ "Bantey kew! Kene kew himu te meupiya diye te tangkaan te me etew eyew eparayan-dayan kandan. Ke iling ma rue, ware egkarawat niyu ne dasag ne egpuun te Amey niyu ne diye te langit.

² "Purisu ke egbehey ka diye te subla ne egkaayu-ayu, kene nu seini iwangal-wangal te langun ne etew iling te eggimuwen te egmapitew-pitew re diye te simbaan te me Hudiyu wey diye te me deralanen su eyew egdayanen sikandan te me etew. Egkahiyan ku sikaniyu te malehet: nakarawat e sikandan te dasag dan. ³ Piru ke egbehey ka diye te subla ne egkaayu-ayu, kene nu iwangal-wangal minsan diye te amana ne alukuy nu* ⁴ eyew egkeelles de ka pegbehey nu. Ne ka Amey nu ne iyan nakakita te innimu nu te heles de ka egdasag keykew.

*Ka pegpanulu meyitenged te peg-ampu
(Luk. 11:2-4)*

⁵ "Ne emun ke eg-ampu kew, kene kew iling te me etew ne egmapitew-pitew re su egkeupian sikandan ne eggsasindeg ne eg-ampu diye te me simbaan te Hudiyu wey diye te me bebalakan eyew egkiteen sikandan te me etew. Egkahiyan ku sikaniyu te malehet: narawat dan e ka dasag dan. ⁶ Piru ke eg-ampu

ka, seled ka diye te sinabeng nu wey lelekeb ka, ne ampu ka diye te Amey nu ne kene egkakita. Ne egdasahan ka te Amey nu ne iyan nakakita te innimu nu te heles de.

⁷ "Emun ke eg-ampu ka, kene nu pangawangi iling te eggimuwen te me etew ne egsimba te me diyus-diyus, su egkahiyan dan ne egkarineg sikandan ke malayat ka peg-ampu dan. ⁸ Purisu kene kew iling kandan, su tapey e nakataha ka Amey niyu ke nekey ka keilangan niyu te ware kew pad migbuyu kandin. ⁹ Sikan naa, henduena niyu kayi te eg-ampu:

'Amey ney ne diye te langit, egdayanen ka matulus ne ngaran nu.'

¹⁰ Eghari ka kayi te kanami, Egkatuman ka igkeupii nu kayi te ampew te tane iling degma te katumanan diye te langit.

¹¹ Ibehey nu kanami ka egkeilanganen ney kuntee ne egkeenen

¹² wey pasayluwa key te me sale ney, iling degma te pegpasaylu ney te nakasale kanami.

¹³ Ne kene key ipabaye nikeykew diye te pegtintal, ke kene, luwasa key nikeykew puun ki Meibulan.'

¹⁴ "Su emun ke egpasayluwen niyu ka me etew ne

* **6:3** Te Grigu: kene nu patahaa ka gibang ne belad nu te eggimuwen te kawanan ne belad nu. **6:5** Luk 18:10-14. **6:14** Mar 11:25-26.

nakasale kaniyu, egpasayluwen kew degma te Amey niyu ne diye te langit. ¹⁵ Piru ke kene niyu egpasayluwen sikandan, kene kew degma egpasayluwen te Amey niyu.

Ka pegpanulu meyitenged te pegpuasa

¹⁶ “Ne emun ke egpuasa kew, kene kew palelaggew iling te eggimuwen te me etew ne egmapitew-pitew re. Egguhusen dan ka me ulaula ran eyew egkakita te me etew ne migpuasa sikandan. Egkahiyan ku sikaniyu te malehet: narawat dan e ka dasag dan. ¹⁷ Piru ke egpuasa kew, panugkad wey pandep-ug kew, ¹⁸ eyew ware egpekeila te migpuasa kew, gawas te Amey niyu ne kene egkakita. Ne egdasahan kew te Amey niyu ne nakakita te innimu niyu te heles de.

Ka karatuan diye te langit

(Luk. 12:33-34)

¹⁹ “Kene kew lilimud te me karatuan kayi te ampew te tane para kaniyu, su egketketen de sika te me uled-uled wey egtaangen de, wey egpanakawen de degma. ²⁰ Piru lilimud kew te me karatuan diye te langit, su warad e me uled-uled ne egketket wey warad taang ne egdereet kayi, wey warad e me takawen ne egpanakew. ²¹ Su ke hendei ka karatuan niyu, diye degma ka geyinawa niyu.

Ka mata sulu te lawa

(Luk. 11:34-36)

²² “Ka mata iyan sulu te lawa. Emun ke mating-ew ka mata nu, egmalayag ka pusung nu. ²³ Piru ke kene ne mating-ew ka mata nu, [†] marusilem degma ka pusung nu. Purisu ke marusilem ka pusung nu, durusilemi naa iya ka keugpe nu.

Ka Manama wey ka karatuan

(Luk. 16:13; 12:22-31)

²⁴ “Ware etew ne egkeyimu ne uripen te daruwa ne ahalen, su egdumutan din ka sabeka ne ka dangeb eggeynawaan din. Egdapihan din ka sabeka wey ka dangeb eglemetan din. Ne iling naan ded due, kene egkaayun ne egpeuripen kew te daruwa, te Manama wey te seleppi.

²⁵ “Purisu egnanganan ku sikaniyu te kene kew kalaggew meyitenged te umul niyu. Kene kew kalaggew meyitenged te lawa niyu ke nekey ka egkakeen wey egkeinum niyu, wey ke nekey ka igsaluub niyu. Su ka umul impurtanti pad du te egkakeen, ne ka lawa impurtanti pad du te igsaluub. ²⁶ Tengtengi niyu ma ka me manuk-manuk, ware me pinamula ran wey egganiyen dan wey ware inlimud dan diye te lelapeng, piru impakeen sikandan te Amey niyu ne diye te langit. Ne sikaniyu, labew kew pad iya te me manuk-manuk. ²⁷ Na, hentew ma kaniyu ka egpakapamalayat te umul

6:19 San 5:2-3. [†] **6:23** Diye te me Hudiyu, leheren ka igapasabut te etew ne kene ne mating-ew ka mata.

rin pinaahi te pegkalaggew
rin? Ware iya!

²⁸ “Ne mania te egkalaggew kew meyitenged te igsaluub niyu? Sumsumana niyu ka me bulak diye te mabbenes ke immenu ran te egdakel. Ware sikandan miggimu wey migpaneyi te igsaluub dan. ²⁹ Piru egnanganan ku sikaniyu te minsan si Sulumun, ka amane e ne meyaman wey mabantug, ware ma kumbale din ne iling kateles te seeye ne me bulak. ³⁰ Ke impamatelesan te Manama ka me bulak ne neuyag pad kuntee, ne egsilaban ded te seup ne aldew, iyan kew naan pa kene pakumbalei nikandin! Amana ne deisek ka pegpal-intutuu niyu.

³¹ “Purisu kene kew kalaggew ke nekey ka egka-keen niyu wey ke egkeinum niyu wey ke nekey ka igsaluub niyu. ³² Su sika ka igkalaggew te me etew ne ware pegpalintutuu wey pegaslig te Manama. Piru nakanengneng e ka Amey niyu ne diye te langit te egkeilanganen niyu seeye. ³³ Sikan naa, hun-a niyu paharia ka Manama diye te gey-inawa niyu wey tumana niyu ka igkeupii rin, wey igbehey rin ka langun ne ingkeilangan niyu. ³⁴ Purisu kene kew kalaggew meyitenged te seup ne aldew, su tagse aldew due igkalaggew niyu. Eleg e ka igkalaggew niyu te kuntee ne aldew.

7

Ka pegpanulu meyitenged te peggukum

(Luk. 6:37-38, 41-42)

¹ “Kene kew hukum te duma, eyew kene kew degma eggukuman te Manama.

² Su ke immenu niyu te eggukum ka duma, iling ded degma ka peggukum kaniyu te Manama. Ke nekey ka inggamit niyu ne seked, sikan ded degma ka seked ne eggamiten te Manama diye te kaniyu. ³ Mania te egtengteng ka te buleg te suled nu, ne ware nu sahipaa ka buleg nu ne hendue karakel te terusu?

⁴ Egmenuwen nu te egkahdiye te suled nu, ‘Eg-aween ku ka buleg nu,’ ke due degma buleg due te mata nu ne hendue karakel te terusu? ⁵ Egpapitew-pitew re! Huneyi nu pa te eg-awe ka buleg nu ne hendue karakel te terusu, eyew egpakameleq-meleg ka ne eg-awe te buleg te suled nu.

⁶ “Kene niyu ibehey ke nekey ka matulus diye te me asu su kema ke egkahaten kew re nikandan, wey kene niyu iregpak ka me mahal ne me balieg diye te me babuy su kema ke egdi-diekan de nikandan.

Ka pegbuuyu, pegpam-mitew wey pegpanektek

(Luk. 11:9-13)

⁷ “Buyu kew ne egbehayan kew; pammitew kew ne egpakkita kew; panektek kew ne eglukatan

kew. ⁸ Su seeye se egbuyu, egbehayan; wey seeye se epammitew, egpakakita; wey seeye se egpanektek, eglukatan. ⁹ Sikaniyu se me amey, ke egbuyu ka anak niyu te egeen, egbehayan niyu naa sikandin te batu? ¹⁰ Ne ke egbuyu sikandin te ngalap, egbehayan niyu naa sikandin te uled? ¹¹ Ne sikaniyu, minsan makasesale kew, egkateu kew red ne egbehey te meupiya diye te me anak niyu. Ne ka Amey niyu ne diye te langit, subla pad ne egbehey te meupiya diye te egbuyu kandin!

¹² “Purisu ke nekey ka igkeupii nu ne eggimuwen te me etew diye te keykew, sika degma himuwa nu diye te kandan. Su sika ka kaluwasan te Balaud te Manama wey te sinulat te me prupita.

*Ka malig-et ne gumawan
(Luk. 13:24)*

¹³ “Seled kew diye te maliget ne gumawan; su maluag ka gumawan te dalan peendiye te karereetan wey malemu re ne egbayaan. Ne masulug ka me etew ne egseled te sika ne gumawan. ¹⁴ Piru maliget ka gumawan wey malised ne egbayaan ka egpeendiye te umul ne ware egtamanan. Ne deisek de ka nakatulitu te sika ne dalan.

*Egkeilaan ka kayu pinaahi te behas din
(Luk. 6:43-44)*

¹⁵ “Bantey kew te kene ne malehet ne me prupita. Eggendue sikandan te kaniyu ne ubag kun iling te me karniru, kunaleg te egpekeiling bes sikandan te mabbulut ne me singgalung. ¹⁶ Egkeilaan niyu sikandan pinaahi te me himu ran, iling te pegkeila niyu te kayu pinaahi te behas din. Su ka buleynen, kene egbebehas te kapayas, ne ka sapinit, kene egbebehas te beyabas. ¹⁷ Ne iling naan ded due, ka meupiya ne kayu egbebehas te meupiya. Piru ka mareet ne kayu egbebehas te mareet. ¹⁸ Ka meupiya ne kayu kene egbebehas te mareet, ne ka mareet ne kayu kene egbebehas te meupiya. ¹⁹ Ka minsan nekey ne kayu ne kene egbebehas te meupiya, egtempuhun wey igdegpak diye te hapuy. ²⁰ Purisu egkeilaan niyu ka kene ne malehet ne me prupita pinaahi te me himu ran.

*Wara a nekeila kaniyu
(Luk. 13:25-27)*

²¹ “Kene ne langun ne etew ne eg-umew keddi, ‘Magbebaye, Magbebaye’ ne egpakased te Migharian te Manama, ke kene, seeye de se egtuman te igkeupii te Amey ku ne diye te langit. ²² Te aldew te peggukum masulug ka egkahi keddi, ‘Magbebaye, Magbebaye, migpangguhud key te lalag te Manama pinaahi te ngaran nu, wey migpangalew key te

me busew pinaahi te ngaran nu, wey masulug ka me kein-inuwan ne neyimu ney pinaahi te ngaran nu!' ²³ Piru egnanganan ku sikandan, 'Wara a nekeila kaniyu. Pariyu kew keddi, sikaniyu se mareet ne me etew!'

Ka daruwa ne etew ne migbebaley

(Luk. 6:47-49)

²⁴ "Purisu ka minsan hentew ne egpakarineg te keddi ne lalag wey egtuman kayi, egpekeiling sikandin te matagseb ne etew ne migbebaley ne batu se pabunsuran. ²⁵ Ne miglugsu ka uran, ne migbaggiyu ka weyig, wey migpangalamag. Ne insuru-suru te kalamag ka sika ne baley piru ware seeye napeled tenged su nakapabunsud te batu.

²⁶ "Piru ka etew ne egpakarineg te keddi ne lalag wey kene egtuman kayi, egpekeiling sikandin te etew ne egkeungel-ungel ne migbebaley ne diye ipes-ek te pantad. ²⁷ Ne miglugsu ka uran, ne migbaggiyu ka weyig, ne migpangalamag. Ne insuru-suru te kalamag ka sika ne baley wey napeled e wey natamtamanan nahuhus."

Ka katenged ni Hisus

²⁸ Te pegkapenga ni Hisus te miglalag, neinu-inu ka masulug ne me etew te kandin ne pegpanulu ²⁹ su due geem te pegpanulu din, wey kene

ne iling te me talagpanulu te Balaud te Manama.

8

Ka ibungen ne imbawian ni Hisus
(Mar. 1:40-45; Luk. 5:12-16)

¹ Te pegtupang e ni Hisus puun te bubungan, susuluhi ka me etew ne migsinundul kandin. ² Ne due sabeka ne etew ne ibungen ne migparani kandin wey migpanimbuel ne migkahi, "Magbebaye, ke egkeupian ka, egkabawian* a nikeykew!"

³ Ne insamsam sikandin ni Hisus te migkahi, "Uya, igkeupii ku. Egkeulian kad!" Ne sahuhune ne neulian sikandin. ⁴ Ne migkahiyan sikandin ni Hisus, "Kene nu ipangguhud seini te minsan hentew. Ke kene, hendiye ka te talagpanubad wey papitew ka kandin, wey panubad ka sumale te insuhu ni Muwisis eyew te pegpamalehet te me etew ne neulian kad e."

Ka pegbawi ni Hisus te suluhanen te kepitan
(Luk. 7:1-10)

⁵ Pegginguma ni Hisus diye te Kapirnaum, due migtemu kandin ne kepitan te me sundalu te Ruma ne migpeyidu-hid-u diye te kandin ne miggenendue, ⁶ "Magbebaye, nekeyibat de ka suluhanen ku diye te baley ku ne kene

7:23 Sal 6:8. **7:28** Mar 1:22; Luk 4:32. * **8:2** Te Grigu: eglinisan. (Diye te tuluuwen te me Hudiyu, ka etew ne ibungen in-isip ne malindit.) **8:4** Lib 14:1-32.

egkaweil se lawa wey amana sikandin mig-antus."

⁷ Ne migkahiyan ni Hisus sikandin, "Eggendiya a ka eg-bawi kandin."

⁸ Ne migtabak ka kepitany, "Magbebaye, kena a ne likes ne egpepanumbaley keykew diye te baley ku. Piru ilalag nu re ne egkeulian iya ka suluhuanen ku.

⁹ Nakanengneng a kayi, uya su minsan degma sikeddi, due labew keddiey ne me upisyal wey due degma me sakup ku ne me sundalu. Ke egnanganan ku ka sabeka, 'Hendiye ka,' eggendiye iya sikandin. Ne emun ke egnanganan ku ka dangeb, 'Hendini ka,' eggendini iya sikandin. Ne emun ke egnanganan ku ka uripen ku, 'Himuwa nu seini,' eggiwuwen din iya seeye."

¹⁰ Te pegkarineg ni Hisus te ingkahi rin, neinu-inu sikandin wey migkahi diye te me etew ne migsinundul kandin, "Egnanganan ku sikaniyu te malehet: ware e pad nakakita te iling kayi karakel ne pegpalintutuu te etew, minsan te me Hudiyu!

¹¹ Egnanganan ku sikaniyu te due masulug ne etew ne diye egpuun te igsile wey diye te iglineb ne eglagpu egkeen engki Abraham, Isaak, wey ki Hakub diye te Migharian te Manama.

¹² Piru ka me Hudiyu ne iyan perem egkasakup te Peghari te Manama, iyan nasi igdegpak

diye te lihawangan ne amana ne durusilemi. Ne diye, egmandalawit sikandan wey egmakihet te ngipen dan."

¹³ Ne migkahiyan ni Hisus ka kepitany, "Uli kad e, egkatuman ka impalintutuuwan nu."

Ne neulian e ka suluhuanen te kepitany te seeye de ne uras.

Ka pegpamawi ni Hisus te me etew
(Mar. 1:29-34; Luk. 4:38-41)

¹⁴ Ne migpanumbaley si Hisus diye ki Pidru. Ne dutu nakita rin ka anuhang ni Pidru ne malitan ne miggibat su miglusungan.

¹⁵ Ne miggen-genan ni Hisus ka belad te malitan, ne due-rue ne neulian sikandin. Ne migenew sikandin wey intanggu rin e ensi Hisus.

¹⁶ Ne hengkayi te egkasagkup e, impanguyan te me etew diye ki Hisus ka masulug ne migpanerepan te me busew. Ne impangalew rin ka me busew pinaahi re te lalag din wey impamawian din ka langun ne egmanderalu.

¹⁷ Neyitabu sika eyew egkatuman ka ingkahi ni prupita Isayas, "Sikandin ka egpamawi te egmanggeramen ta wey te me dalu ta."

Ka me etew ne eg-ikul perem ki Hisus

(Luk. 9:57-62)

¹⁸ Te pegkakita ni Hisus ne masulug ka me etew ne miglingkus kandin,

migkahiyan din e ka me hibateen din, "Eglapas ki diye te deyipag te lanew." ¹⁹ Ne due talagpanulu te Balaud te Manama ne migparani diye te kandin ne migkahi, "Talagpanulu, eg-ikul a keykew minsan hendei ka eggendiye."

²⁰ Ne migtabak si Hisus kandin, "Due eggelesan te me laku wey due salag te me manuk-manuk te awawangan, pиру ka Anak te Etew ware mule egkeyimme-layan."

²¹ Ne due lein ne hibateen ni Hisus ne migkahi, "Ahalen, eg-uli e pad su eglebeng e pad te amey ku."

²² Piru migtabak si Hisus kandin, "Ikul ka keddi! Iyan e balahad ne eglebeng te me minatey seeye se ware umul ne ware egtamanan."

Insaparan ni Hisus ka kalamag wey bunlud
(Mar. 4:35-41; Luk. 8:22-25)

²³ Nataman, mig-untud e te balangey si Hisus duma te me hibateen din. ²⁴ Te sasan-gan e sikandan ne eglapas, sahuhune ne migpangalama-g te makeseg, ne dutu, natimpaan e ka balangey te me bunlud. Piru newulep mule si Hisus. ²⁵ Seeye naa, impupukew e si Hisus te me hibateen din te migkahi, "Magbebaye, luwasa key! Egkalened kid e!"

²⁶ Ne migkahiyan ni Hisus sikandan, "Mania te egkaaldek kew? Deisek ka

pegsalig niyu!" Ne mig-enew sikandin wey insaparan din ka kalamag wey ka me bunlud. Ne due-rue ne migmalinawen e.

²⁷ Amana neinu-inu ka me duma rin wey migkahi, "Nekey-a etawa seini se minsan ka kalamag wey me bunlud, egpalintutuu kandin?"

Imbawian ni Hisus ka migserapan te busew
(Mar. 5:1-20; Luk. 8:26-39)

²⁸ Te nakatuhun e sikandin diye te deyipag te lanew, diye te inged ne Gadara, due migsinug-ung ki Hisus ne daruwa ne etew ne migserapan te busew. Ka seeye ne me etew, diye migpuun te sulung ne sabalan-an wey amana sikandan ne mabbulut, sikan naa, egkaaldek e ka me etew ne egbaye te seeye ne dalan.

²⁹ Te pegkakita ran ki Hisus, migpanguleyi sikandan ne migkahi, "Anak te Manama, kene key nikeykew banggawa[†]! Iyan nu naa innendini ka eglegpad kanami minsan kene pad ne eleg ne timpu?"

³⁰ Ne diye te bayew madmariyu, due masulug ne me babuy ne egmanuwal. ³¹ Ne migpeyid-u-hid-u ka me busew ki Hisus ne migkahi, "Emun ke eg-alawen key nikeykew, duen key re paserepa te me babuy."

³² Ne migkahiyan ni Hisus sikandan, "Uya, hendiye kew e!" Purisu nanligwang e

[†] 8:29 Te Grigu: nekey ka tuyu nu kanami.

sikandan dutu te daruwa ne etew wey nanerep e diye te me babuy. Nataman, namallahuy e patupang ka me babuy diye te dalama peendiye te lanew wey nallened e.

³³ Ne namallahuy e diye te siyudad ka me talagtameng te me babuy wey impang-guhud dan e ka langun ne neyitabu, wey ka neyitabu te me etew ne migserapan te me busew. ³⁴ Seeye naa, nangendiye te ki Hisus ka langun ne etew diye te siyudad wey migpeyid-u-hid-u sikan-dan ne eg-awe si Hisus te inged dan.

9

Imbawian ni Hisus ka paralitiku

(Mar. 2:1-12; Luk. 5:17-26)

¹ Nataman, mig-untud e si Hisus te balangey ne miglapas te lanew wey miggendiyad e te lungsud din.* ² Ne due nanginguma diye te kandin ne migyayung te etew ne kene egkaweil se lawa. Te pegkakita ni Hisus ne dakel ka pegpalintutuu ran, migkahiyan din e ka kene egkaweil se lawa, “Tatu, pakannekal ka su impasaylu e ka me sale nu.”

³ Ne due degma me talagpanulu te Balaud te Manama ne migkahi diye te suman-suman dan, “Egbaley-baley te Manama ka seini ne etew!”

⁴ Piru puun su natahaan ni Hisus ka insuman-suman

dan, migkahiyan din sikan-dan, “Mania te egsuman-suman kew te mareet? ⁵ Hendei bes ka malemu ne egkahiyan, ka egkahi, ‘Impasaylu e ka me sale nu,’ wey ke egkahi, ‘Enew ka wey hipanew kad?’ ⁶ Piru igpapitew ku kaniyu ne due katenged te Anak te Etew kayi te ampew te tane te pegpasaylu te me sale.” Ne migkahiyan din e ka etew ne kene egkaweil se lawa, “Enew ka, wey uyana nu ka miggibatan nu, wey uli kad e diye te kaniyu!”

⁷ Ne mig-enew ka etew wey mig-uli e. ⁸ Te pegpakakita dutu te masulug ne me etew, nenaaldek sikandan wey indayan dan ka Manama tenged te pegbehey rin te iling due ne katenged diye te me etew.

Ka peg-umew ki Matiyu
(Mar. 2:13-17; Luk. 5:27-32)

⁹ Nataman, mig-awe e si Hisus dutu, wey te sasangan e sikandin ne eggipanew, due nakita rin ne egngararan ki Matiyu ne migpinnuu diye te upisina rin ne bayaranan te buhis. Ne migkahiyan din si Matiyu, “Ikul ka keddiey.” Ne migsasindeg si Matiyu wey mig-ikul e ki Hisus.

¹⁰ Nataman, migkeen si Hisus diye te baley ni Matiyu. Ne due nanginguma ne masulug ne me talagsukut te buhis wey me makasesale ne miglagpu kandin te migkeen duma te me hibateen din.

* **9:1** Iyan lungsud din ka Kapirnaum.

11 Te pegkakita dutu te me Parisiyu, mig-insaan dan e ka me hibateen din ne migkahi, “Mania te miglagpu migkeen ka talagpanulu niyu te me tlagsukut te buhis wey te me makasesale?”

12 Piru te pegkarineg dutu ni Hisus, migkahi e sikandin, “Ka me etew ne ware dalu, kene egkeilangan te talagbawi, ke kene, seeye de se egmandleralu. 13 Na, nengnengi niyu ke nekey ka kaluwasan te nasulat diye te Kasulatan ne miggenendue, ‘Kene ne iyan ku igkeupii ka igpanubad niyu ne me ayam, ke kene, ka hid-u niyu te duma.’ Wara a miggendini eyew te peg-umew te me matareng, ke kene, te me makasesale.”

Ka inse meyitenged te peg-puasa

(Mar. 2:18-22; Luk. 5:33-39)

14 Nataman, miggendiye te ki Hisus ka me hibateen ni Huwan ne Talagbewutismu wey mig-inse kandin, “Mania te malasi key egpuasa wey ka Parisiyu, piru ware mule ka me hibateen nu?”

15 Ne migtabak si Hisus, “Egkalange naa ka me mahaliyug te egpangasawa ke duma ran pad sikandin? Kene iya! Piru eggingsuma ka timpu ne eg-angayen e diye te kandan ka egpangasawa ne henduen pad sikandan egpuasa.

16 “Ne ware etew ne egtupak te iyam ne manggad diye te tapey ne kumbale, su

egkenseng ka intupak wey egkakatkat e ka inteyian wey nasi e egmaluag ka gisi. 17 Ne ware degma etew ne egtahu te iyam ne binu diye te tapey ne tahuanan ne laplap te mananap, su ke eggimuwen din sika, egbetu ka tahuanan wey egkeitis e ka binu ne egkareetan e degma ka tahuanan. Ka iyam ne binu keilangan ne diye igtahu te iyam ne tahuanan ne laplap eyew kene egkareetan ka binu wey ka tahuanan.”

Ka anak te pangulu wey ka eglangeseen

(Mar. 5:21-43; Luk. 8:40-56)

18 Te sasangan pad ne eglalag si Hisus, due miggingga ne sabeka ne pangulu te me Hudiyu. Migpanimbuel sikandin diye te tangkaan ni Hisus ne migkahi, “Iyam e nabigtawi ka anak ku ne malitan, piru ke eggendiyaan nu sikandin wey egtel-eban nu te belad nu, egkeuyag pad sikandin.”

19 Ne migsasindeg si Hisus wey migdume e kandin wey ka me hibateen din degma.

20 Ne due malitan ne nababaybaran ka eglangeseen seled te sapulu wey daruwa (12) ne leg-un. Migpatalisek sikandin te masulug ne me etew ka migparani diye te peka ni Hisus wey insamsam din ka sidsid te kumbale ni Hisus 21 su migsumansuman sikandin, “Emun ke egpakashamsam a minsan te

kumbale din de, egkeulian a iya."

²² Ne miglilingey si Hisus wey nakita rin e ka malitan, ne migkahiyan din e, "Beyi, pakannekal ka, ka pegpalintutuu nu ka nekeuli keykew." Te sikan de, neulian e ka malitan.

²³ Te pegginguma ni Hisus diye te baley te pangulu, nakakita sikandin te egmamulendag wey te maggulub ne me etew. ²⁴ Ne migkahiyan din sikandan, "Awe kew rue! Ware namatey ka beyi-beyi su nakalipereng de sikandin." Piru migdali-dian de te me etew si Hisus. ²⁵ Te impalihawang e ka me etew, migseled e degma si Hisus diye te sinabeng te beyi-beyi wey miggen-genan din ka belad. Ne dutu, migene new e ka beyi-beyi. ²⁶ Ne nekeempet e te langun ne lungsud te seeye ne inged ka guhuren meytenged kayi.

Ka me butud ne imbawian ni Hisus

²⁷ Te peg-awe e ni Hisus dutu, due daruwa ne butud ne migsinundul kandin ne migpanguleyi, "Kabuhalan ni Dabid, ikeyid-u key nikeykew!"

²⁸ Nataman, migseled e si Hisus diye te baley ne migugpaan din wey migparani diye te kandin ka daruwa ne butud. Ne mig-insaan din e sikandan te migkahi, "Migpalintutuu kew naa ne egkabawian ku sikaniyu?"

Ne migtabak sikandan, "Uya, ahalen."

²⁹ Ne dutu, insamsam e ni Hisus ka mata ran te migkahi, "Egkeulian kew sumale te pegpalintutuu niyu." ³⁰ Ne due-rue ne nakakita sikandan. Ne migpegehetan e sikandan panpanayi ni Hisus ne kene egpepangguhuren te minsan hentew.

³¹ Piru nangipanew sikandan wey nasi dan mule iwangal-wangal si Hisus diye te langun ne lungsud te seeye ne inged.

Imbawian ni Hisus ka ummew

³² Ne hengkayi te nangipanew e ka daruwa ne etew, due in-uuyan diye te ki Hisus ne migserapan te busew ne neummew e. ³³ Te naalew e ni Hisus ka busew, nakalalag e ka ummew. Ne neinuinu ka masulug ne me etew diye wey nakakahi sikandan, "Ware de due neyitabu kayi te Israil ne iling due!" ³⁴ Piru migkahi ka me Parisiyu, "Ka pangulu te me busew ka migbehey kandin te geem te pegpangalew te me busew."

Neyid-u si Hisus te me etew

³⁵ Ne miggendiye si Hisus te langun ne me siyudad wey me bariyu wey migpanulu sikandin diye te me simbaan te me Hudiyu. Ne migpangguhud sikandin te Meupiya ne Panugtulen meytenged te Peghari te Manama wey migpamawian din ka langun ne egmanderalu wey ka

due egmanggeramen. ³⁶ Te pegkakita ni Hisus te masulug ne me etew, neyidu sikandin kandan tenged su nalasey e sikandan wey ware egpakabulig kandan. Iyan egkeilingan nikandan ka me karniru ne ware talagtameng. ³⁷ Ne migkahiyan din e ka me hibateen din, “Dakel ka egganiyen, piru deisek de ka talaggaani. ³⁸ Purisu ampu kew diye te Kamuney te egganiyen ne egpeuyan sikandin te me talaggaani diye te egganiyen.”

10

*Ka pegpeyipanew ni Hisus te 12 ne hibateen din
(Mar. 3:13-19; Luk. 6:12-16)*

¹ Ne impeumew ni Hisus ka sapulu wey daruwa (12) ne hibateen din wey impamehayan din sikandan te katenged te pegpangalew te me busew wey te pegpamawi te langun ne me dalu wey egmanggeramen te me etew. ² Seini ka me ngaran te seeye se sapulu wey daruwa (12) ne apustulis:^{*} ka an-anayan si Simun ne eg-immuan ki Pidru wey si Andris ne suled din, ka daruwa ne anak ni Sibidiyu ne si Santiyagu wey si Huwan, ³ si Pilipi wey si Bartulumi, si Tumas wey Matiyu ne talagsukut te buhis, si Santiyagu ne anak ni Alpiyu wey si Tadiyu,

⁴ si Simun ne ribildi wey si Hudas Iskaryuti ne mig-eakal ki Hisus.

*Ka igpeyimu te sapulu wey daruwa (12) ne hibateen
(Mar. 6:7-13; Luk. 9:1-6)*

⁵ Ne impeyipanew e ni Hisus ka sapulu wey daruwa (12) ne hibateen wey impanagtahaan te migkahi, “Kene kew hendije te kene ne me Hudiyu wey diye te me lungsud te Samarya, ⁶ ke kene, hendije niyu ka me kabuhalan ni Israel ne nekeiling e te me karniru ne natarin. ⁷ Taheed te diye kew, iwali niyu ne mahaan e ka Peghari te Manama. ⁸ Ne bawii niyu ka egmanderalu, uyaha niyu ka me minatey, bawii niyu ka egmangibungen, wey pangalawa niyu ka me busew. Nakarawat kew puun te Manama te ware bayad, purisu pamehey kew degma te ware bayad. ⁹ Kene kew tetahu te seleppi ne bulawan, pelata, wey minsan keddeku diye te puntil niyu, ¹⁰ wey kabil, eg-ilisan niyu ne kumbale, sandal, wey tuked. Su seeye se eggimu, eleg ne egbehayan te egkakeen din.

¹¹ Emun ke eggingga kew te sabeka ne lungsud wey ke bariyu naa, pammitew kew te etew ne likes ne egtuenan niyu, wey diye kew pa ugpe taman te egawe kew e te seeye ne inged. ¹² Ke egseled kew te

9:36 Num 27:17; 1Har 22:17; 2Kru 18:16; Isi 34:5; Mar 6:34. **9:37** Luk 10:2.

* **10:2** Apustulis—Ka etew ne in-alam wey impeuyan te Manama eyew egpamakey kandin, iling te sapulu wey daruwa (12) ne hibateen ni Hisus wey si Pablu. **10:10** 1Kur 9:14; 1Tim 5:18.

baley, panalangini niyu ka mahinged. ¹³ Ne emun ke egdawaten kew te mahinged, ihaat niyu ka panalangin diye te kandan, piru ke kene, hawia niyu ka panalangin diye te kandan. ¹⁴ Ke due baley wey ke lungsud ne kene egdawat kaniyu wey kene egpammineg kaniyu, engkeri niyu sika wey pelpela niyu ka alinepung diye te paa niyu.[†] ¹⁵ Egnanganan ku sikaniyu te malehet: te aldew te peggukum subla pad ne masumpit ka legpad te Manama te sika ne lungsud du te matig-Suduma wey Gumura.

Ka eggingga ne me pegbayad-babayad

(Mar. 13:9-13; Luk. 21:12-17)

¹⁶ “Pammineg kew! Igpeendiye ku sikaniyu ne egpekeiling te me karniru diye te me etew ne egpekeiling te mabbulut ne me singgalung. Purisu keilangan ne iling kew katagseb te uled wey iling kaamuk te seleppati. ¹⁷ Ne bantey kew te me etew su eguyanan kew nikandan diye te hukumanan wey egpanlampesan kew nikandan diye te me simbaan dan. ¹⁸ Eguyanan kew nikandan diye te tangkaan te me gubirnadur wey diye man-e te me

10:14 Him 13:51. [†] **10:14** Te seeye ne timpu, ka pegpelpel te etew te alinepung diye te paa rin te eg-awe e te sabeka ne inged iyan palinneu te ware ikahale te Manama ka nangugpe dutu. **10:15** Mat 11:24; Hin 19:24-28. **10:15** Luk 10:4-12. **10:16** Luk 10:3. **10:17** Mar 13:9-11; Luk 12:11-12; 21:12-15. **10:21** Mar 13:12; Luk 21:16. **10:22** Mat 24:9; Mar 13:13; Luk 21:17; Mat 24:13; Mar 13:13. **10:24** Luk 6:40; Huw 13:16; 15:20. **10:25** Mat 9:34; 12:24; Mar 3:22; Luk 11:15.

Hari tenged keddiey eyew egpakapangguhud kew te Meupiya ne Panugtulen diye te kandan wey diye te kene ne me Hudiyu. ¹⁹ Emun ke egdakepen kew e, kene kew kalaggew ke nekey ka iglalag niyu wey ke egmenuwen niyu te eglalag, su igpanulu e kaniyu te Manama ke nekey ka eglalahen niyu te sika ne timpu. ²⁰ Su kenad e ne sikaniyu pad ka eglalag, ke kene, ka Panisingan e te Amey niyu ne Manama ka eglalag pinaahi kaniyu.

²¹ “Due me etew ne iyan mismu egpeyimatey te me suled dan. Ne due me amey ne egpeyimatey te me anak dan, ne due degma me anak ne egkuntere te me amey wey iney ran wey egpeyimatey kandan. ²²

Egdumutan kew te langun ne etew tenged keddiey. Piru seeye se egpabulus eg-ikul keddiey taman te katamanan iyan egkaluwas. ²³ Emun ke egbaybayaran kew diye te sabeka ne lungsud, aput kew diye te lein ne lungsud. Egnanganan ku sikaniyu te malehet: te kene niyu pad egkalingut ka langun ne me lungsud te Israil, eglibed e ka Anak te Etew.

²⁴ “Ware hibateen ne labew te kandin ne talagpanulu, wey ware uripen ne

labew te kandin ne ahalen.²⁵ Eleg de iya ne egpekeiling ka hibateen te talagpanulu din. Ne ka uripen, eleg de iya ne egpekeiling degma sikandin te ahalen din. Ke egngararan ma ki Meibulan[‡] ka pangulu te sabeka ne pamilya, iyan naan pa iya ka me sakup din.

*Ka eleg ne igkaaldek
(Luk. 12:2-7)*

²⁶ “Purisu kene kew kaaldek te seeye ne me etew. Su ke nekey ka imbunbunan, egkalekisan, wey ka langun ne inneles, egkanengnengan. ²⁷ Ke nekey ka ingguhud ku kaniyu diye te marusilem, ipangguhud niyu diye te malayag. Ne ke due narineg niyu ne innaas-naas de, iwangal-wangal niyu diye te langun.[§] ²⁸ Kene kew kaaldek te me etew ne egpekeyimatey te lawa piru kene egpekeyimatey te gimukud, ke kene, iyan niyu ikaaldek ka Manama ne egpakadereet te lawa wey gimukud diye te linew ne hapuy. ²⁹ Ka daruwa ne maya egkabeli re te baratu, piru ware sabeka kandan ne egkeulug diye te tane gawas ke pegbuut te Amey niyu ne egkeulug sikandan. ³⁰ Ne sikaniyu, naseel rin ma langun minsan ka me bulbul te ulu niyu. ³¹ Purisu kene kew kaaldek, su subla kew pad ne labew du te me maya.

[‡] **10:25** Te Grigu: Biilsibul. **10:26** Mar 4:22; Luk 8:17. **10:27** Te Grigu: iwangal-wangal diye te me atep. **10:33** 2Tim 2:12. *** 10:34** Te Grigu: kampilan **10:35** Mik 7:6. **10:38** Mat 16:24; Mar 8:34; Luk 9:23.

*Ka peg-angken ki Kristu
(Luk. 12:8-9)*

³² “Sikan naa, ka minsan hentew ne eg-angken keddiey diye te tangkaan te me etew, eg-angkenen ku degma sikandin diye te tangkaan te Amey ku ne diye te langit. ³³ Piru minsan hentew ne egpahunware meyitenged keddiey diye te tangkaan te me etew, igaahunware ku degma sikandin diye te tangkaan te Amey ku ne diye te langit.

*Kene ne keupianan su samuk
(Luk. 12:51-53; 14:26-27)*

³⁴ “Kene kew suman-suman ne iyan ku innendini ka eg-uyan te keupianan kayi te ampew te tane. Kene ne iyan ku innendini ka eg-uyan te keupianan, ke kene, te kasamuk.* ³⁵ Su iyan ku innendini ka egpegkuntere te me anak ne lukes te amey ran, ka egpegkuntere te me anak ne malitan te iney ran, wey ka egpegkuntere te me ambey te anuhang dan ne malitan. ³⁶ Ne iyan ded egkakuntere te etew ka diye mismu te baley rin.

³⁷ “Ka minsan hentew ne eggeyinawa te amey wey iney rin labew te peggeyinawa rin keddiey, kene ne likes ne egkeyimu ne hibateen ku. Ne ka eggeyinawa te me anak din labew te peggeyinawa rin keddiey, kene ne likes ne egkeyimu ne

[§] **10:27** Te Grigu: Biilsibul. **10:33** 2Tim 2:12. *** 10:34** Te Grigu: kampilan **10:35** Mik 7:6. **10:38** Mat 16:24; Mar 8:34; Luk 9:23.

hibateen ku.³⁸ Ka minsan hentew ne kene egtiang te kandin ne krus wey kene egikul keddiey, kene ne likes ne egkeyimu ne hibateen ku.³⁹ Seeye se egkeupian ne egluwas te kandin ne umul, nasi egkawaraan kayi, piru seeye se egkawaraan te kandin ne umul tenged keddiey, epakarawat te umul ne ware egtamanan.

*Ka me dasag
(Mar. 9:41)*

⁴⁰ “Ka minsan hentew ne egdawat kaniyu, egdawat degma keddiey. Ne ka minsan hentew ne egdawat keddiey, egdawat degma te migpeuyan keddiey.⁴¹ Ka minsan hentew ne egdawat te prupita tenged su prupita sikandin, epakarawat te dasag iling te dasag ne egkarawat te prupita. Ne ka minsan hentew ne egdawat te matareng ne etew tenged su matareng sikandin, epakarawat te dasag iling te dasag ne egkarawat te matareng ne etew.⁴² Egnanganan ku sikaniyu te malehet: ka minsan hentew ne egpeinum te minsan senge ubab de ne maagsil ne weyig diye te hibateen ku minsan kene ne impurtanti tenged su hibateen ku sikandin, epakarawat iya sikandin te dasag.”

11

*Si Hisus wey si Huwan ne Talagbewutismu
(Luk. 7:18-35)*

¹ Hengkayi te nakapenge e si Hisus ka migpanulu te sapulu wey daruwa (12) ne hibateen din, miggendiyad e sikandin te marani ne me lungsud eyew te pegpanulu wey te pegwali.

² Ne si Huwan ne Talagbewutismu diye pad te prisawan, wey nakarineg sikandin te neneyimu te Kristu. Seeye naa ka impeendiye din ki Hisus ka duma ne me hibateen din eyew egpepanginginseen.

³ Ne mig-inse sikandan, “Sikeykew iya ka egginguma ne insaad te Manama wey ke egtetahad key pad te duma?”

⁴ Ne migtabak si Hisus diye te kandan, “Libed kew diye te ki Huwan wey guhuri niyu sikandin ke nekey ka nakita niyu wey narineg niyu.⁵ Guhuri niyu sikandin te ka me butud egmakakite e, ka me pungku egmekeyipanew e, ka me ibungen neneulian e, ka me bengel egmakarineg e, wey ka me minatey neneuyag e wey ka egkengaayu-ayu, napangguhuran e te Meupiya ne Panugtulen.⁶ Keupianan te seeye se ware migduwaruwa meytenged keddiey.”

⁷ Te nekeyipanew e seeye se sinuhu ni Huwan, miginsaan e ni Hisus ka masulug ne me etew meytenged

ki Huwan, "Te peggendiye niyu te ki Huwan diye te mammara ne inged ne kene egkeugpaan, nekey-a ka in-iman-iman niyu ne egtengtengan? Etew naa ne egpekeiling te tibehew ne hendei re iya tapid egbanlaya te kalamag? ⁸ Ke kene, nekey naa ka in-iman-iman niyu ne egtengtengan te peggendiye niyu te ki Huwan? Etew naa ne migsaluub te mahal ne kumbale? Kene, su ka me etew ne egkukumbale te mahal, diye nangugpe te me palasyu te me Hari. ⁹ Na, nekey naa iya ka in-iman-iman niyu ne egtengtengan te peggendiye niyu? Prupita naa? Uya, piru egnanganan ku sikaniyu te subla pad si Huwan te prupita, ¹⁰ su sikandin ka nasulat te Kasulatan ne miggenendue, 'Igpewun-a ku keykew ka suluhuanen ku ne iyan eg-andam te dalan ne egbayaan nu.' ¹¹ Egnanganan ku sikaniyu te malehet: ware de due neetew kayi te ampew te tane ne subla pad ki Huwan ne Talagbewutismu; piru minsan hentew ne kene ne impurtanti diye te Migharian te Manama, subla pad iya ki Huwan. ¹² Puun te pegwali ni Huwan ne Talagbewutismu taman kuntee, due me etew ne migpakannekal migwali te Peghari te Manama, wey due degma me etew ne migpanaman-taman migpe-

hes ne egkasakup sikan-dan kayi. ¹³ Su nahuhud e ka Peghari te Manama te langun ne me prupita wey te Balaud te Manama taman te miggungume e si Huwan. ¹⁴ Ne emun ke egpalintutuu kew te inlalag dan, si Huwan iya si Ilyas, ka egkahiyen ne eggunguma. ¹⁵ Purisu, ke egkeupian kew ne egpakasabut, sumsumana niyu ay-ayari ke nekey ka narineg niyu!**"

¹⁶ Migpabulus si Hisus ka migkahi, "Nekey buwa ka egpeilingan ku te me etew te kuntee ne timpu? Egpekeiling sikandan te me bate ne naminnuu diye te palingkiyan ne egpangumew te duma ran ¹⁷ ne egkahi, 'Migpamulendahan ney e sikaniyu piru ware kew migsesayew, mig-ulahingan ney e sikaniyu te peglungku piru ware kew migmanine-hew.' ¹⁸ Te peggendini ni Huwan, ware sikandin migkeen wey mig-inum te binu, ne migkahi sikandan te migserepan e sikandin te busew. ¹⁹ Ne miggunguma degma ka Anak te Etew ne migkeen wey mig-inum te binu, ne migkahi degma sikandan, 'Pitawa niyu seini ne etew, bel-is wey taleinum, wey alukuy te me talagsukut te buhis wey te me makasseale.' Piru minsan ke iling due, ka kaalam te Manama

11:10 Mal 3:1. **11:12** Luk 16:16. **11:14** Mal 4:5; Mat 17:10-13; Mar 9:11-13.

* **11:15** Te Grigu: Pammineg ka ke due talinga nu. † **11:19** Te Grigu: Piru ka kaalam egkapamalehetan pinaahi te me himu rin.

egkakita diye te etew ne migpamakey kandin.”[†]

*Ka me etew ne ware mig-inniyug te sale dan
(Luk. 10:13-15)*

²⁰ Nataman, indew-ey ni Hisus ka me matig-siyudad ne innimuwan din te me kein-inuwan tenged su ware dan inniyuhi ka me sale dan. ²¹ Migkahi sikandin, “Mekeyid-u-hid-u kew ka me matig-Kurasin! Mekeyid-u-hid-u kew ka me matig-Bitsayda, su emun ke diye pa perem te Tiru wey te Sidun himuwa ka me kein-inuwan ne innimu diye te kaniyu, naluhey ran de perem inniyuhi ka me sale dan ne migsaluub te saku wey migbubukbuk te abu diye te ulu ran. ²² Piru egnanganan ku sikaniyu, maagkap pad ka iglegpad te Manama te matig-Tiru wey matig-Sidun du te iglegpad kaniyu te aldew te peggukum.

²³ Ne sikaniyu se matig-Kapirnaum, kahiyen niyu buwa ne egpakaparibabew kew taman diye te langit? Kene, nasi kew igdegpak diye te inged te me gimukud ne enggaranan te Hadis! Su emun ke diye pa perem te Suduma himuwa ka me kein-inuwan ne innimu diye te kaniyu, duen pad perem kuntee ka Suduma. ²⁴ Piru egnanganan ku sikaniyu, maagkap pad ka iglegpad te

Manama te matig-Suduma du te iglegpad kaniyu te aldew te peggukum!”

*Si Hisus ka himelayanan te gimukud
(Luk. 10:21-22)*

²⁵ Te seeye ne timpu, migampu si Hisus ne migkahi, “Ame, Manama te langit wey tane. Egpasalamatan ku sikeykew, su inneles nu seini puun te matagseb wey te utekan ne me etew wey impakita nu seini diye te me etew ne ware katuenan.[‡] ²⁶ Uya Ame, su sika ka egpakapahale keykew.

²⁷ “Imbehey te Amey ku ka langun kayi te keddiey. Ne ware sabeka ne nekeila te Anak gawas te Amey, wey ware degma sabeka ne nekeila te Amey gawas te Anak wey te seeye se igkeupii te Anak ne igpeila diye te Amey rin.

²⁸ “Parani kew keddiey ka langun ne nabeley wey nabehatan su egpeyimelaren ku sikaniyu. ²⁹ Isangen niyu ka yuggu ku wey pepanulu kew keddiey su mapari-ralemen wey maayad-ayada, wey egpekeyimeley ka me gimukud niyu. ³⁰ Su malemu re ka yuggu ne igsangen ku kaniyu wey maagkap de ne egtiangen.”

11:21 Isa 23:1-18; Isi 26:1-28:26; Huwil 3:4-8; Amu 1:9-10; Sak 9:2-4. **11:23** Isa 14:13-15; Hin 19:24-28. **11:24** Mat 10:15; Luk 10:12. [†] **11:25** Te Grigu: diye te me bate. **11:27** Huw 3:35; Huw 1:18; 10:15. **11:29** Hir 6:16.

12

Ka inse meyitenged te Aldew te Peggimeley

(Mar. 2:23-28; Luk. 6:1-5)

¹ Te sabeka ne Aldew te Peggimeley, nangipanew ensi Hisus ne diye migbaya te impamulaan te trigu. Ne seeye se me hibateen din nanggutasan, purisu nangetu sikandan te me trigu eyew egkeenen dan. ² Piru te pegkakita dutu te me Parisiyu, migkahiyani dan e si Hisus, "Pitawa nu! Miggimu ka me hibateen nu te supak te Balaud te Aldew te Peggimeley."

³ Piru migtabak si Hisus, "Ware kew bes nakasabut te imbasu niyu meyitenged te innimu ni Dabid te miggutasan sikandan te me duma rin? ⁴ Migseled sikandin diye te baley te Manama wey migkeen te paan ne inhalad e diye te Manama. Ne sumale te kanta ne Balaud, kene egpakakeen dutu si Dabid wey ka me duma rin su ka me talagpanubad de ka intuhutan ne egpakakeen dutu. ⁵ Ne ware kew bes nakasabut te imbasu niyu diye te Balaud te Manama ne nakasupak te Aldew te Peggimeley ka me talagpanubad diye te timplu? Piru ware sikandan nakasale. ⁶ Piru egnanganan ku sikaniyu te due labew pad te timplu ne kayi kuntee. ⁷ Emun ke nasabut niyu perem ka kaluwasan te seini se

nakahi ne, 'Kene ne iyan ku igkeupii ka igpanubad niyu ne me ayam, ke kene, ka hidu niyu te duma.' Sikan naa, kene niyud e perem senditi ka ware nakasale. ⁸ Su ka Anak te Etew iyan ahalen te Aldew te Peggimeley."

Ka etew ne nakengkeng se belad

(Mar. 3:1-6; Luk. 6:6-11)

⁹ Nataman, mig-awe e si Hisus wey miggendiyad e te simbaan te me Hudiyu. ¹⁰ Ne diye, due etew ne nakengkeng se belad wey due degma me Parisiyu ne egpammitew te eleg ne katarengan ne igkasumbung dan si Hisus. Ne mig-insaan dan si Hisus ne migkahi, "Intuhut naan ded te Balaud ka pegpamawi te Aldew te Peggimeley?"

¹¹ Ne migtabak si Hisus, "Ke due karniru niyu ne neulug diye te lungag te Aldew te Peggimeley, kene niyu naa seeye egkuen? Egkuen iya!

¹² Piru subla pad ne labew ka etew du te karniru. Purisu kene ne supak te Balaud ka eggimu te meupiya te Aldew te Peggimeley." ¹³ Nataman, migkahiyani e ni Hisus ka etew ne nakengkeng se belad, "Ketenga nu ka belad nu."

Ne ingketeng te etew ka belad din wey neulian e, iling te limang ne belad din.

¹⁴ Ne nanlihawang ka me Parisiyu wey migplanu ke

egmenuwen dan te eggi-matey si Hisus.

Si Hisus ka in-alam te Manama

¹⁵ Pegkanengnengi ni Hisus te planu ran, mig-awe e sikandin dutu. Ne masulug ne etew ka migsinundul kandin wey impamawian din ka langun ne egmanderalu, ¹⁶ wey inteesan din sikandan te kene eg-pepangguhuren meyitenged kandin ¹⁷ eyew egkatuman ka ingkahi ni prupita Isayas ne miggendue:

¹⁸ “Seini ka in-alam ku ne suluhuanen ku.

Inggeyinawaan ku sikandin wey ingkahale ku.

Igpeuyan ku diye te kandin ka Panisingan ku, wey igpangguhud din diye te langun ne nasud ka matareng ne peggukum ku.

¹⁹ Kene sikandin egpakig-apul wey ke egbal-balukan
wey kene eggulub-gulub diye te me kelesadda.

²⁰ Kene din eggepuen ka nabegkul ne luvey,
wey kene din eg-ebukan ka sulu ne egpangalap-halap naan de se leg-leg.

Egpabulus sikandin te eggimuwen din taman te egkatuman e ka matareng ne igkeupii te Manama.

²¹ Ne iyan egpallatengen te langun ne etew ka ngaran din.”

Imbayungan si Hisus ne migserapan te busew
(Mar. 3:20-30; Luk. 11:14-23)

²² Nataman, due in-uayan diye te ki Hisus ne etew ne nabutud wey neummew puun su migserapan te busew. Ne imbawian ni Hisus ka etew, ne dutu nakakite e wey nakalalag e sikandin. ²³ Nawangalan ka langun ne etew, wey migkahi sikandin, “Seini buwa iya ka kabuhalan ni Dabid?”

²⁴ Piru te pegkarineg dutu te me Parisiyu, migkahi sikandan, “Si Meibulan* ne pangulu te me busew ka migbehey kandin te geem te peggangalew te me busew.”

²⁵ Piru natahaan ni Hisus ka me suman-suman dan, purisu migkahiyan din sikandan, “Ka sabeka ne inged ne egmeun-unayey egmeeg-ehetey ka me etew, egkahuhus iya ka sika ne inged. Ne ka lungsud wey taltalaanak ne egmeun-unayey egmeeg-ehetey, kene iya sika egpakasasindeg.

²⁶ Ne emun ke eg-unayen ni Meibulan te egpangalew ka me duma rin, egmekieg-uney-uney red sikandan egmekieg-ehet. Na, egmenuwen dan naan e te egpasasindeg ka inged dan? ²⁷ Ne emun ke iyan ku pa inggamit ka geem ni Meibulan te

pegpangalew te me busew, hentew naa ka migbehey te geem te me hibateen niyu ne egpangalew degma te me busew? Purisu ka me hibateen niyu ka mismu ne migpamalehet ne seyyup kew iya.²⁸ Piru migpangalew a te me busew pinaahi te Panisingan te Manama, sikan naa migpeila seini ne miggungume e diye te kaniyu ka Peghari te Manama.

²⁹ “Ware egpakaseled diye te baley te manekal ne etew wey egpakaahew te me kasangkapan din te kene din pad eggunaan te egbaku ka kamuney. Ke egkabaku din e ka kamuney henduen din pad egkaahew ka me kasangkapan.

³⁰ “Ka kene egpalapig keddiey, egkuntere keddiey; ka kene egbulig keddiey te pegpalibulung, egpegsuwey naa. ³¹ Purisu egnanganan ku sikaniyu te egkapasaylu pad ka me sale te me etew wey ka pegbaley-baley ran te Manama, piru ka egbaley-baley te Panisingan te Manama kene iya egkapasaylu. ³² Minsan hentew ne eglemet te Anak te Etew, egkapasaylu red, piru ka minsan hentew ne eglemet te Panisingan te Manama, kene iya egkapasaylu te ware egtamanan.

Egkeila ka kayu pinaahi te behas
(Luk. 6:43-45)

12:30 Mar 9:40. **12:32** Luk 12:10. **3:7; 23:33; Luk 3:7; Mat 15:18; Luk 6:45.**

12:39 Mat 16:4; Mar 8:12. [†] **12:39** Te Grigu: Ka me etew te kuntee ne timpu, amana ne mareet wey talaglibug.

³³ “Egbebehas te meupiya ka kayu ne meupiya, ne egbebehas degma te mareet ka kayu ne mareet, su egkeila ka kayu pinaahi te behas din. ³⁴ Sikaniyu se me uled! Egmenuwen niyu te eglalag te meupiya, te maddeet kew ma? Su ke nekey ka diye te pusung te etew, sika ka iglalag din. ³⁵ Ka meupiya ne etew, eglalag te meupiya ligkat te meupiya ne pusung din. Piru ka mareet ne etew, eglalag te mareet ligkat te mareet ne pusung din.

³⁶ “Egnanganan ku sikaniyu te ka tagse lalag ne ware karuan ne eglalahen te me etew, egpanabaken dan sika te Aldew te Peggukum. ³⁷ Su eggukuman kew sumale te impanlalag niyu, ke eleg kew naa ne eglegparan wey se kene.”

Ka me etew ne egbuyu ki Hisus te kein-inuwan
(Mar. 8:11-12; Luk. 11:29-32)

³⁸ Nataman, due me talagpanulu te Balaud te Manama wey me Parisiyu ne migkahi diye te kandin, “Talagpanulu, keupian key ne egkita keykew ne eggimu te kein-inuwan puun te Manama.”

³⁹ Ne migtabak si Hisus, “Ka me etew te kuntee ne timpu, amana ne mareet wey kenad ne maparumarama te Manama.† Migbuyu sikandan te kein-inuwan

12:33 Mat 7:20; Luk 6:44. **12:34** Mat 12:38 Mat 16:1; Mar 8:11; Luk 11:16.

[†] **12:39** Te Grigu: Ka me etew te kuntee ne timpu, amana ne mareet wey talaglibug.

piru ware igpakita kandan gawas te kein-inuwan ne neyitabu ki Hunas ne sabeka ne prupita.⁴⁰ Iling ki Hunas te miggingsumaan te tatelu ne aldew wey karusileman diye te getek te dakel ne ngalap te dahat, ne iling ded degma ka egkeyitabu te Anak te Etew. Su eggingumaan sikandin te tatelu ne aldew wey tatelu ne karusileman diye te diralem te tane.⁴¹ Te Aldew te Peggukum, egsasindeg ka matig-Ninibi duma kaniyu wey egsenditan kew nikandan su mig-inniyuhan dan ka me sale dan te pegkarineg dan te wali ni Hunas. Ne kuntee, kayid e ka labew pad ki Hunas.⁴² Te Aldew te Peggukum, egsasindeg duma kaniyu ka Rayna puun te Igkakawanan ne Balabahan dapit te Igsile wey egsenditan kew nikandin, su amana ne mariyu ka impuunan din te miggipanew eyew te pegpammineg te maralem ne kaalam ni Hari Sulumun. Ne kuntee, kayid e ka labew pad ki Sulumun.

*Ka peglibed te busew
(Luk. 11:24-26)*

⁴³ “Ne emun ke eg-awe e ka busew diye te etew, egleug-leug sikandin diye te mammara ne me inged eyew egpammitew te egkey-imelayan din. Ke ware egkakita rin,⁴⁴ egkahih e sikandin, ‘Eglibed e red diye te tapey ne migserapan ku.’ Ne emun ke egkakita rin

te peglibed din ne ware mig-ugpe dutu ne migmalinis e wey naay-ayaran e nateil,⁴⁵ eglihawang e man-e sikandin wey egpanguyan e te lein ne pitu ne busew ne subla pad ne mareet kandin. Ne egseled sikandan diye wey diyad e eg-ugpe; ne ka peg-ugpe te sika ne etew subla pad ne mareet du te an-anayan. Purisu iling ded due ka egkeyitabu kaniyu te mareet ne me etew.”

*Ka iney wey me suled ni Hisus
(Mar. 3:31-35; Luk. 8:19-21)*

⁴⁶ Te sasangan pad ne eglalag si Hisus te me etew, migtetahad e diye te lihawangan ka iney rin wey me suled din su egkeupian ne egpakiglag kandin.⁴⁷ Ne due etew ne mignangen ki Hisus ne migkahi, “Due te lihawangan ka iney wey me suled nu su egkeupian ne egpakiglag keykew.”

⁴⁸ Piru migkahi si Hisus, “Nakataha ke naa ke hentew ka iney wey me suled ku?”⁴⁹ Ne dutu, impaninuru din e ka me hibateen din te migkahi, “Seini ka iney ku wey me suled ku!”⁵⁰ Su ka minsan hentew ne eggimu te igkeupii te Amey ku ne diye te langit, iyan sika ka iney ku, ka suled ku, wey ka atebey ku.”

13

*Ka panunggilingan
meyitenged te pegpamula
(Mar. 4:1-9; Luk. 8:4-8)*

¹ Te seeye ded ne aldew, miglihawang si Hisus diye te baley wey migpinnuu diye te ilis te lanew. ² Ne due susuluhi ne etew ne miglibulung diye te kandin, ne seeye naa, mig-untud e sikandin te balangey wey diyad e migpinnuu. Ne diye nanasindeg ka me etew te ilis te lanew. ³ Masulug ka impanulu ni Hisus diye te me etew ne impabaye din te me panunggilingan.

Migkahi sikandin, “Due sabeka ne etew ne miggendiye te kamet eyew egpamula. ⁴ Te pegpanawed din e te beni, due nakasawed diye te dalan, ne miggingga ka me manuk-manuk wey impanuktuk e seeye. ⁵ Ne ka duma ne beni, diye nakasawed te batuwen ne ware amana tane. Ne mahaan de seeye migtubu su manipis ka tane. ⁶ Piru te naaldawan e, nahangu e seeye su ware nakareralid. ⁷ Due degma beni ne diye nakasawed te duhiyen. Ne nanubu ka me duhi wey naselung e ka me pinamula. ⁸ Ka duma ne beni, diye nakasawed te meupiya ne tane. Intubu seeye wey migbebehas, ne due duma ne beni ne migbebehas te sabeka ne gatus (100), due duma ne me keen-eman ne

pulu (60), wey due degma migbebehas te me tatelu ne pulu (30). ⁹ Purisu, ke egkeupian ka ne egpakashabut, sumsumana nu ay-ayari ke nekey ka narineg nu!**

Ka peggamit ni Hisus te me panunggilingan

(Mar. 4:10-12; Luk. 8:9-10)

¹⁰ Ne migparani diye te ki Hisus ka me hibateen din wey mig-inse kandin, “Mania te eggamit ka te me panunggilingan ke egpanulu ka te me etew?”

¹¹ Ne migtabak si Hisus, “Impatahe e diye te kaniyu ka inggeles meyitenged te Peghari te Manama, piru ware sika ipataha diye te duma. ¹² Su seeye se due katuenan, egtimulan pad eyew egdakel ka katuenan; piru seeye se deisek de se katuenan, eg-angayen pad iya minsan ka deisek ne kandin. ¹³ Sikan naa ka miggamit a te panunggilingan te pegpanulu ku kandan, su eyew ke egtengteng sikandan, kene egpakkita, wey ke egpammineg sikandan, kene egpakarineg wey egpakashabut. ¹⁴ Ne natuman e diye te kandan ka ingkahi te Manama pinaahi ki prupita Isayas ne eggenendue, ‘Minsan egmenuwen niyu te egpammineg, kene kew iya egpakashabut.

Minsan egmenuwen niyu te egtengteng,

^{13:2} Luk 5:1-3. * ^{13:9} Te Grigu: Sikan naa, pammineg kew ke due talinga niyu! ^{13:12} Mat 25:29; Mar 4:25; Luk 8:18; 19:26. ^{13:14} Isa 6:9-10 (LXX).

kene kew iya egpakkita.
 15 Su memakehal ka ulu te
 seini ne me etew,
 insagpengan dan ka talinga
 ran,
 wey impileng dan ka mata
 ran.
 Su kema ke egpakkita sikan-
 dan,
 wey egpakarineg,
 wey egpaksabut,
 wey eglibed kayi te keddi,
 ne egbawian ku sikandan.'

16 Piru keupianan niyu su
 egpakkita ka mata niyu wey
 egpakarineg ka talinga niyu.
 17 Egnangenan ku sikaniyu
 te malehet: masulug ka
 me prupita wey matareng
 ne me etew ne egkeupian
 perem ne egkita te nakita
 niyu, piru ware sikandan
 nakakita. Egkeupian degma
 sikandan ne egdineg te
 narineg niyu, piru ware
 sikandan nakarineg.

*Ka kaluwasan te panung-
 gilingan meyitenged te pegpa-
 mula*

(Mar. 4:13-20; Luk. 8:11-
 15)

18 "Sikan naa, pamineha
 niyu ke nekey ka kaluwasan
 te panunggilingan meyitenged
 te pegpamula. 19 Ka
 beni ne nakasawed diye
 te dalan, iyan seeye se
 etew ne nakarineg te lalag
 meyitenged te Peghari te
 Manama piru ware sikandin
 nakasabut. Te pegginguma
 ni Meibulan in-ahew e
 ka lalag te Manama ne
 nakapamula diye te pusung
 din. 20 Ne ka beni ne diye

nakasawed te batuwen,
 egpekeiling te seeye se etew
 ne nakarineg te lalag te Man-
 ama ne due-rue ne migdawat
 kayi ne nahale. 21 Piru ware
 seini nakareralid diye te
 pusung din, purisu ware de
 naluhay ka pegpalintutuu
 rin. Pegginguma te keyira-
 pan wey pegbayad-bayah
 tenged te pegdawat din te
 lalag te Manama, due-rue
 ne mig-engked sikandin te
 pegpalintutuu rin. 22 Ne
 ka beni ne nakasawed diye
 te duhiyen, iyan seeye
 se etew ne nakarineg te
 lalag te Manama, piru ka
 pegkalaggew rin meyitenged
 te peg-ugpe din, wey ka
 peggeyinawa te me karatuan
 din iyan nekeumes te lalag te
 Manama, wey ware sikandin
 nakabebebas. 23 Piru ka
 beni ne nakasawed diye
 te meupiya ne tane, iyan
 seeye se etew ne nakarineg
 te lalag te Manama wey
 nakasabut kayi. Ne migbebe-
 has sikandin: due behas din
 ne sabeka ne gatus (100), ka
 duma hen-em ne pulu (60),
 wey ka duma tatelu ne pulu
 (30)."

*Ka panunggilingan
 meyitenged te hilamunen*

24 Mig-abey e man-e
 migpanulu si Hisus te me
 etew pinaahi te panunggilingan
 ne migkahi, "Ka Peghari
 te Manama egpekeiling te
 pangguhuren meyitenged
 te etew ne migsawed te
 meupiya ne beni diye te

kamet din. ²⁵ Piru te newulep e ka me etew, miggungume e ka kuntere din wey insewuhan e saweri te behas te hilamunen ka beni ne insawed diye te kamet wey pegkapenga, mig-awe e sikandin. ²⁶ Hengkayi te migtubu e ka me pinamula wey te migbebehas e, human pad neileyi ka me hilamunen. ²⁷ Ne nangendiye te kamuney te kamet ka me uripen din wey migkahи, ‘Ahalen, hendei egpuun ka me hilamunen ne nanubu diye te kamet te meupiya ma ka me beni ne insawed nu?’ ²⁸ Migtabak ka ahalen diye te kandan, ‘Hinimuwan sika te kuntere ku.’ Ne mig-inse ka me uripen din, ‘Na, egkeupian ke naa ne eggendiye key eyew egpamarut te me hilamunen?’ ²⁹ Ne migtabak sikandin, ‘Kene kew, su kema ke igaikalagkes niyu te egbarut ka me pinamula. ³⁰ Balahara niyu re due taman te tinggaani e su igpewun-a ku re igaabarut te me talaggaani ka me hilamunen, wey igpabagkes kandan eyew egsilaban. Pegkapenga, igaalimud ku diye te lelapeng ku ka egka-haani ran.’

*Ka panunggilingan
meyitenged te behas ne mallilintek*
(Mar. 4:30-32; Luk. 13:18-19)

³¹ Nataman, migpanulu e man-e si Hisus te me etew te lein ne panunggilingan ne miggenendue, “Ka Peghari

te Manama egpekeiling te pangguhuren meyitenged te beni te mustasa ne impamula te etew diye te kamet din. ³² Ka beni te mustasa ka mallilintek te langun ne me beni, piru egkeyimu ne pinakarakel te me pinamula diye te kamet ke egdakel e seini. Ne egkataman, egpekeiling e te kayu wey egesesalahan e te me manuk-manuk ka me sugpang din.”

*Ka panunggilingan
meyitenged te igpatulin te paan*
(Luk. 13:20-21)

³³ Ne mig-abey e man-e si Hisus migpanulu kandan te panunggilingan ne miggenendue, “Ka Peghari te Manama egpekeiling te igpatulin te paan ne in-angey te sabeka ne malitan wey insewug din te harina ne egliware te saku, taman te migtulin ka langun ne innimu rin.”

*Ka egpuunan te miggamit
si Hisus te me panunggilingan*
(Mar. 4:33-34)

³⁴ Impabayen ni Hisus te me panunggilingan seeye se langun ne impanulu din te masulug ne me etew. Ne ware inlalag din diye te kandan ne ware din ipabayen te panunggilingan. ³⁵ Neyitabu seini eyew egkatuman ka ingkahi te Manama pinaahi te prupita ne miggenendue, “Eggamit a te me panunggilingan ke eglalag a,

igguhud ku ka ware pad
nanengnengi puun te
peggimu te kalibutan."

Inluwas ni Hisus ka panunggilingan meyitenged te hilamunen

³⁶ Nataman, mig-engkeran e ni Hisus ka masulug ne me etew wey migseled sikandin diye te baley. Ne migparani diye te kandin ka me hibateen din wey migkahi, "Ne la, ipasabut nu kanami ke nekey ka kaluwasan te panunggilingan meyitenged te hilamunen diye te kamet."

³⁷ Ne migtabak si Hisus, "Ka etew ne migsawed te meupiya ne beni, iyan sika ka Anak te Etew. ³⁸ Ne ka kamet, iyan sika ka kalibutan, ne ka meupiya ne beni iyan ka me etew ne sakup te Peghari te Manama. Piru ka me hilamunen, iyan ka me sakup te ahalen te me busew, ³⁹ ka kuntere ne iyan migsawed te me hilamunen. Ka tinggaani, iyan sika ka katammanan te timpu, ne ka talaggaani, iyan ka me panalihan te Manama. ⁴⁰ Ne egbaruten wey egslaban ka hilamunen, iling naan ded due ka egkeyitabu te katammanan te timpu. ⁴¹ Egpeuyan ka Anak te Etew te me panalihan din eyew igmaawe diye te Migharian din ka langun ne iyan egpunan ne egpakesale ka duma wey ka langun ne eggimu te mareet. ⁴² Ne igdegpak dan sikandan diye te hapuy ne egkanlabkanlab. Ne diye,

egmandalawit sikandan wey egmegkihet te ngipen dan. ⁴³ Ne seeye se me matareng, eglayag iling te aldew diye te Migharian te Amey ran. Purisu, ke egkeupian ka ne egpakesabut, sumsumana nu ay-ayari ka egkarineg nu![†]

Ka panunggilingan meyitenged te inneles ne karatuan

⁴⁴ "Ka Peghari te Manama egpekeiling degma te pangguhuren meyitenged te karatuan ne inggeles diye te kamet ne nakita te sabeka ne etew. Migweil-weil ka etew, imbulungan din ded man-e seeye. Ne puun te kahale din, mig-ayun e sikandin ka migbelegye te langun ne diye te kandin wey imbeli rin e seeye se kamet.

Ka panunggilingan meyitenged te mahal ne balieg

⁴⁵ "Ka Peghari te Manama egpekeiling man-e te pangguhuren meyitenged te sabeka ne nigosyanti ne egpammitew te mateles wey mahal ne balieg ne egngaranan te pirlas. ⁴⁶ Te nakakite e sikandin te amana ne mahal ne pirlas, imbelegye din e ka langun ne diye te kandin wey imbeli rin e seeye se pirlas.

Ka panunggilingan meyitenged te biyale

⁴⁷ "Ka Peghari te Manama egpekeiling degma te pangguhuren meyitenged te pukut ne in-antug diye

[†] 13:43 Te Grigu: Sikan naa, pammineg kew ke due talinga niyu!

te lanew ne migsaharan te nalein-lein ne me ngalap. ⁴⁸ Ne emun ke egkapenu e te ngalap ka biyale, egganuyen e sika te mangngengalap diye te ilis. Egkataman, epaminnuu e sikandan eyew te pegpangalam te me ngalap. Ne igtahu dan diye te selaan ka meupiya ne me ngalap, piru igaipandegpak dan muleka maddeet. ⁴⁹ Iling naan ded degma kayi ka egkeyitabu te katammanan te timpu. Eggendini ka me panalihan te Manama wey igpasuwewy ran ka me maddeet ne me etew puun te me matareng. ⁵⁰ Ne seeye se me etew ne maddeet, igdegpak diye te hapuy ne egkanlabkanlab. Ne diye, egmandalawit sikandan wey egmegkihat te ngipen dan.”

⁵¹ Ne mig-insaan ni Hisus sikandan, “Nasabut niyu red ka langun ne impangguhud ku?”

Migtabak sikandan, “Uya.”

⁵² Migkahiyan ni Hisus sikandan, “Purisu ka langun ne me talagpanulu te Balaud te Manama ne due katuenan meyitenged te Peghari te Manama, egpekeiling te kamuney te baley ne migangey te iyam wey tapey ne me kasangkapan din ne mahal.”

Ka peggubabe ki Hisus te matig-Nasarit

(Mar. 6:1-6; Luk. 4:16-30)

⁵³ Te pegkapenga ni Hisus te pegpangguhud te sika ne

me panunggilingan, migawe e sikandin te seeye ne inged, ⁵⁴ wey mig-uli e diye te lungsud ne intulinan din. Ne migpanulu sikandin diye te simbaan te me Hudiyu, wey neinuinu ka nakarineg kandin wey migkahi, “Hendei buwa nakakuwa sikandin te katuenan wey geem te peggimu te kein-inuwan? ⁵⁵ Kene naa ne anak te talagbebaley sika? Kene naa ne si Mariya ka iney rin, wey kene naa ne ensi Santiyagu, si Husi, si Simun wey si Hudas ka me suled din? ⁵⁶ Kayi ma mule nangugpe ka me atebey rin? Purisu hendei rin naa nakuwa ka langun?” ⁵⁷ Sikan naa natameneng e sikandan kandin.

Piru migkahiyan sikandan ni Hisus, “Egtahuren ka sabeka ne prupita te minsan hendei gawas te inged ne intulinan din wey te pamilya rin.” ⁵⁸ Purisu kene ne masulug ka me kein-inuwan ne innimu ni Hisus te seeye ne inged tenged su ware sikandan migpalintutuu kandin.

14

Ka kamatayen ni Huwan ne Talagbewutismu
(Mar. 6:14-29; Luk. 9:7-9)

¹ Te seeye ne timpu, si Hirudis ka migmandu te Galiliya. Te pegkarineg din te guhuren meyitenged ki Hisus, ² migkahiyan din e ka me suluhuanen din,

“Sikandin iya si Huwan ne Talagbewutismu, neuyag ded sikandin! Sika ka egpuunan ne due geem din te peggimu te me kein-inuwan.”

³⁻⁴ Su si Hirudis ka migparakep wey migpaprisu ki Huwan. Innimu ni Hirudis seeye su insaparan sikandin ni Huwan te peg-ahew ki Hirudiyas ne asawa te suled din ne si Pilipi. Miggendue si Huwan, “Supak te Balaud ni Muwisis ne egaahawen nu ka ipag nu.”

⁵ Egkeupian perem si Hirudis ne eggimatayan si Huwan, piru naaldek sikandin te me Hudiyu su in-ila ran ne sabeka ne prupita si Huwan.

⁶ Piru te aldew te neetawan ni Hirudis, migsayew ka beyi ne anak ni Hirudiyas diye te tangkaan te me mahaliyug, wey nahale si Hirudis kandin. ⁷ Seeye naa, migpahunlibet sikandin ne migsaad diye te beyi ne igbehey rin ka minsan nekey ne egbuyuen din.

⁸ Ne dutu, impanulu e ni Hirudiyas ka anak din te egkahi diye te ki Hirudis, “Ibehey nu keddi kuntee ka ulu ni Huwan ne Talagbewutismu ne diye igtahu te maluag ne pinggan.”

⁹ Amana ne nalaggew si Hirudis dutu. Piru tenged su nakapahunlibet e sikandin wey narineg seeye te me mahaliyug din, migsuhu e sikandin ne igbehey te beyi ka imbuyu din. ¹⁰ Purisu impatemuhan din e si Huwan

te ulu diye te prisuwatan. ¹¹ Nataman, in-uyan e diye te beyi ka ulu ni Huwan ne diye itahu te maluag ne pinggan wey imbehey rin e degma diye te iney rin. ¹² Ne nangingume e ka me hibateen ni Huwan wey in-angey ran e ka lawa rin wey inlelebeng dan e. Pegkapenga dutu, innendiyaan dan e si Hisus wey impangguhuran dan e te neyitabu.

*Impakeen ni Hisus ka 5,000 ne etew
(Mar. 6:30-44; Luk. 9:10-17; Huw. 6:1-14)*

¹³ Te pegkarineg ni Hisus te neyitabu, mig-awe e sikandin dutu wey miguntud e te balangey ne migsabsabeka peendiye te mammara ne inged ne kene egkeugpaan. Te pegkarineg degma te masulug ne me etew te mig-awe e si Hisus, mig-engkeran dan e ka me lungsud dan wey miglurug e sikandan te lanew ka egsundul kandin. ¹⁴ Te peglegsad ni Hisus te balangey, nakita rin ka masulug ne etew. Ne dutu, neyid-u e sikandin kandan wey impamawian din e ka migmanderalu.

¹⁵ Ne hengkayi te egkasagkup e, migparani kandin ka me hibateen din ne migkahi, “Kema, peendiyyaa nu pa ka masulug ne me etew te me bariyu su egpabeliyan te egkakeen dan su egkasagkup man e seini ne kayi ki mem pa te

mammara ne inged ne kene egkeugpaan."

¹⁶ Piru migkahi si Hisus, "Kene ne keilangan ne egyptipanawen pad sikandan. Sikaniyu ka egbehey kandan te egkakeen."

¹⁷ Ne migtabak sikandan, "Nekegmenu naan de iya ka kayi te kanami ne lallalimma ne paan wey daddaruwa ne ngalap te weyig."

¹⁸ Ne migkahi si Hisus, "Uyana niyu kayi." ¹⁹ Nataman, impapinnuu rin e ka masulug ne me etew diye te me hilamunen. Ne ingkuwa rin e seeye se lalimma ne malisen ne paan wey ka daruwa ne ngalap, ne migleng-ag sikandin diye te langit ne migpasalamat te Manama. Nataman, impanepik-tepik din e ka me paan wey impamehey rin e diye te me hibateen din, ne sikandan e ka migpamehey diye te me etew. ²⁰ Ne nangeen sikan dan langun wey nenabulung bulung, wey nakalimud pad sikandan te sapulu wey daruwa (12) ne liyang ne napenu te same dan. ²¹ Ne se eye se nangeen, miggingsuma te lalimma ne libu (5,000) ne etew ne ware pad labet te me malitan wey me bate.

Miggipanew si Hisus diye te kulit te weyig

(Mar. 6:45-52; Huw. 6:15-21)

²² Pegkapenga dutu, impeuntud e ni Hisus ka me hibateen din te balangey wey impewun-a rin e ipalapas

diye te deyipag te lanew, taheed te impeuli din pad ka masulug ne me etew. ²³ Ne hengkayi te impakapeuli din e sikandan, migtakereg e degma sikandin diye te bubungan ne migsabsabeka eyew te peg-ampu. Ne narusileman e sikandin diye se sabsabeka. ²⁴ Te seeye ne timpu, nekeelat-elat e te lanew ka balangey ne inunturan te me hibateen din wey amana ne masumpit ka me bunlud su egkasinug-ung dan ka kalamag.

²⁵ Hengkayi te egpamatpalat pad, innendiyaan e sikandan ni Hisus ne miggipanew diye te kulit te weyig. ²⁶ Piru te pegkakita te me hibateen din kandin ne miggipanew diye te weyig, naalatan sikandan ne migkahi, "Keyyey, due sapig!" Ne migmanguleyi e sikandan te kaaldek dan.

²⁷ Ne due-rue ne migkahi si Hisus, "Pakannekal kew! Kene kew kaaldek su siked-diey seini!"

²⁸ Ne migtabak si Pidru kandin, "Magbebaye, ke sikeykew ma sika, peyipanawa a te weyig peendie te keykew."

²⁹ Ne migkahi si Hisus, "Na, hendini ka!" Purisu miglegsad si Pidru diye te balangey wey miggipanew diye te weyig peendiye te ki Hisus. ³⁰ Piru te pegkasahinda rin te make-seg ne kalamag, naaldek e sikandin wey egkabun-suran e egkatanled. Ne migbalbalukan sikandin

ka migkahi, "Magbebaye, luwasa a nikeykew!"

³¹ Sahuhune ne inggen-
genan sikandin ni Hisus wey
ingganuy wey migkahiyan,
"Deisek ka pegpalintutuu nu
keddi, mania te migduwa-
ruwa ka?"

³² Te nekeuntud e sikandan
se daruwa diye te balangey,
mig-engked e ka kalamag.
³³ Ne insimba sikandin te me
hibateen ne diye te balangey
ne miggenendue, "Malehet
iya ne sikeykew ka Anak te
Manama."

*Imbawian ni Hisus ka
egmandleralu diye te Ginisarit
(Mar. 6:53-56)*

³⁴ Te nakalapas e sikandan,
diye sikandan nakatuhun
te inged ne egngaranan te
Ginisarit. ³⁵ Ne hengkayi
te nekeile e ki Hisus ka me
mahinged dutu, impataha
ran e ka sumbaley ran ne me
inged te due sikandin. Ne
dutu, impanguyan e te me
etew diye te kandin ka lan-
gun ne egmandleralu ³⁶ wey
migpeyid-u-hid-u sikandan
ki Hisus ne egpasamsamen
sikandan minsan te sidsid
de te kumbale din. Ne
ka langun ne nakasamsam
dutu, neulian iya.

15

*Ka Balaud te Manama wey
ka tuluuwen te kabuybuyahan
(Mar. 7:1-13)*

¹ Nataman, due me
Parisiyu wey me talagpanulu
te Balaud te Manama ne
diye egpuun te Hirusalim

ne miggendiye te ki Hisus
wey mig-inse, ² "Mania te
insupak te me hibateen nu
ka tuluuwen te me kaap-
apuan ta? Su ware sikandan
mig-ayad-ayad migpanlu-lu
te belad dan te ware pad
migkeen."

³ Ne migtabak si Hisus,
"Ne mania degma te insupak
niyu ka me suhu te Manama
tenged te peg-ikul niyu te
kaniyu ne tuluuwen?" ⁴
Su migsuhu ka Manama ne
migkahi, 'Tahura nu ka amey
wey iney nu,' wey 'Ka minsan
hentew ne egtampele te
amey wey iney rin, keilan-
gan ne eggimatayan iya
sikandin.' ⁵ Piru migpanulu
kew ne ka minsan hentew
ne egkahi diye te amey wey
iney rin, 'Imbehey ku diye
te Manama ka igkabulig ku
perem kaniyu,' ⁶ ne kenad
e ne keilangan ne egtahud
pad sikandin kandan. Puun
due innimu niyu ne ware
karuan te lalag te Manama,
pinaahi te peg-ikul niyu te
tuluuwen niyu. ⁷ Sikaniyu se
egpapitew-pitew re! Male-
het ka intagne ni prupita
Isayas meytenged kaniyu ne
miggenendue,

⁸ 'Diye de egpuun te me be-be
te seini ne me etew ka
pegtahud dan keddi,
piru mariyu ka pusung
dan keddiey.'

⁹ Ware karuan te pgsimba
ran keddiey,
su iyan dan igpanulu ka
me balaud ne innimu

re te me etew isip kun
Balaud ku.’”

*Ka egpakamalindit te etew
(Mar. 7:14-23)*

¹⁰ Ne impeumew ni Hisus ka me etew wey migkahiyan, “Pammineg kew wey sabuta niyu ka iglalag ku. ¹¹ Kene ne iyan egpakamalindit te etew ka egseled diye te be-be din, ke kene, iyan seeye se eglihawang diye te be-be din.”

¹² Nataman, migparani diye te kandin ka me hibateen din wey migkahi, “Naknengneng ka ne natameneng ka me Parisiyu te pegkarineg dan te inlalag nu?”

¹³ Piru migtabak si Hisus, “Ka langun ne pinamula ne ware ipamula te Amey ku ne diye te langit, egbaruten. ¹⁴ Balahara niyu re due sikandan se me butud ne egkitkit te me butud. Ne emun ke egkitkiten te sabeka ne butud kalein ne butud, egkengeulug iya sikandan diye te lungag.”

¹⁵ Ne migkahiyan sikandin ni Pidru, “Pangguhuri key ke nekey ka kaluwasan te sika ne panunggilingan.”

¹⁶ Ne migkahi si Hisus, “Ware kew bes pad degma nakasabut? ¹⁷ Ware kew bes nakataha te ka minsan nekey ne egkaabeleng te etew, egleus diye te getek din ne egkataman, eglihawang ded diye te lawa rin? ¹⁸ Piru ka minsan nekey ne eglihawang diye te be-be te etew, diye seeye egpuun te pusung din, ne sika ka egpakamalindit

kandin. ¹⁹ Su diye egpuun te pusung te etew ka mareet ne suman-suman, ka peggimatey, ka pegpanlibug, ka pegpeylabetey ne kene ne alunggun, ka pegpanakew, ka peg-ubat, wey ka pegiran-iran te duma. ²⁰ Sika ka egpakamalindit te etew. Piru kene egpakamalindit te etew ka egkeen ne kene eg-ayad-ayad egpanlu-lu te belad.”

*Ka pegpalintutuu te malitan ne matig-Kanaan
(Mar. 7:24-30)*

²¹ Nataman, mig-awe e si Hisus te seeye ne inged wey miggendiyad e te me inged ne sakup te Tiru wey Sidun. ²² Ne due malitan ne matig-Kanaan ne mig-ugpe te seeye ne inged. Ne migparani sikandin ki Hisus ne migbalbalukan ne migkahi, “Magbebabe, kabuhalan ni Dabid, ikeyid-u a nikeykew! Amana ne masumpit ka egkeula-ula kuntee te anak ku ne malitan ne migserepan te busew.”

²³ Piru warad en iya migtabak si Hisus. Ne migparani diye te kandin ka me hibateen din wey mighangyu kandin ne migkahi, “Paawaa nu sika se malitan, su egbalbalukan sikandin ka egsinsinundul kanta!”

²⁴ Ne migtabak si Hisus, “Diye e re ipeuyan te kabuhalan ni Israil ne nekeiling te me karniru ne nallaag.”

²⁵ Piru migparani ka malitan wey migpanimbuel

diye te tangkaan ni Hisus ne migkahi, "Bulih a nikeykew, Magbebaye!"

²⁶ Piru migkahi si Hisus, "Kene ne meupiya ne egkuen ka keenen te me bate wey igsunggud diye te me asu."

²⁷ Ne migtabak ka malitan, "Malehet sika Magbebaye, piru minsan ka me asu epakakeen ma degma te me mummu ne egkengatahak puun te lamisa te me ahalen dan."

²⁸ Ne migtabak si Hisus kandin, "Mengeatebey, amana ne dakel ka pegpalintutuu nu! Purisu egkarawat nu ka egbuyuen nu." Ne neulian eka anak din te seeye de ne uras.

Imbawian ni Hisus ka masulug ne etew

²⁹ Ne mig-awe si Hisus dutu wey miggendiyad e te ilis te Lanew te Galiliya. Nataman, migtakereg e sikandin diye te bubungan wey diye migpinpinnuu.

³⁰ Ne due amana ne susuluhi ne etew ne migparani kandin ne nanguyan te me pungku, me butud, me nababalangan se lawa, me ummew, wey masulug pad ka duma ne migmanderalu. Ne diye dan seeye ipanahu te katangkaan ni Hisus, wey impamawian din sikandan langun.

³¹ Ne dutu neinuinu ka me etew te pegkakita ran ne egmakalalag e ka me ummew, neneulian e ka me nababalangan se me lawa, nenekeyipanew e ka me pungku, wey egmakakite

e ka me butud. Ne insaye dan e ka Manama te Israil.

Ka pegpakeen ni Hisus te 4,000 ne etew (Mar. 8:1-10)

³² Ne in-umew ni Hisus ka me hibateen din wey migkahiyen, "Neyid-u a te me etew su natateluwan e sikandan ka egduma-ruma keddi ne warad e egmangeenen. Kena a egkeupian ne igpeuli ku sikandan ne egmanggutasan su kema ke egkengalepu sikandan diye te deralanen."

³³ Ne migkahi ka me hibateen din, "Etuwey, kayi ki pe ma te mammara ne inged ne kene egkeugpaan! Hendei ki naan de iya egkuwa te egkakeen ne igaapeen te seini se susuluhi ne etew?"

³⁴ Ne mig-inse si Hisus diye te kandan, "Pilaa ne timman ka paan ne due te kaniyu?"

Ne migtabak sikandan, "Pitu ne timman, wey due pila-pila re ne ngalap te weyig."

³⁵ Ne impapinnuu e ni Hisus ka me etew diye te tane. ³⁶ Ne ingkuwa rin ka pitu ne paan wey ka me ngalap wey migpasalamat diye te Manama. Pegkapenga dutu, impanepik-tepik din e seini wey impamehey rin e diye te me hibateen din. Ne impangatul e degma impamehey te me hibateen din diye te me etew. ³⁷ Ne nangeen sikandan langun wey nenabbulung-bulung. Pegkapenga rue, duen pad nalimud te me hibateen

din ne pitu ne liyang ne napenu te nasame ne keenen.³⁸ Miggunguma te hep-at ne libu (4,000) ka me lukes ne nangeen ne ware pad labet te me malitan wey te me bate.

³⁹ Pegkapenga dutu, impeuli e ni Hisus ka me etew wey mig-untud e sikandin te balangey ne miggendiye te inged ne Magadan.

16

Ka me pangulu ne egbuyu te kein-inuwan
(Mar. 8:11-13; Luk. 12:54-56)

¹ Due me Parisiyu wey me Sadusiyu ne migparani ki Hisus. Migbuyu sikandan ne egpapitawen te kein-inuwan ne egpuun te langit eyew te peg-eleg-eleg kandin.
² Migkahiyan ni Hisus sikan-dan, “Emun ke egkasagkup e, egkahi kew e, ‘Meupiya ne aldew kaaselem su malalab ka langit.’³ Te pegkamaselem e, egkahi kew e man-e, ‘Egur-an naa kuntee su malalab ka langit wey egpaddusilem.’ Egpakasabut kew te palinneu diye te langit, piru kene kew egpakasabut te me palinneu te Manama kuntee!
⁴ Ka me etew te kuntee ne timpu, amana ne mareet wey kenad ne maparumaruma te Manama.* Migbuyu sikandan te kein-inuwan piru ware igpakita kandan angin e te kein-inuwan ne neyitabu ki Hunas ne sabeka

ne prupita.” Nataman, mig-awe e si Hisus.

Ka iga patulin te paan te Parisiyu wey te Sadusiyu
(Mar. 8:14-21)

⁵ Nakatuhun e ka me hibateen ni Hisus diye te deyi-pag te lanew, piru nalingew sikandan ne eg-uyan te paan.
⁶ Migkahiyan ni Hisus sikan-dan, “Tanud-tanud kew wey bantey kew te iga patulin te paan te me Parisiyu wey te me Sadusiyu.”

⁷ Piru migpalalahey ka me hibateen din ne migkahi, “Nalalag din sika su ware ki nekeuyan te paan.”

⁸ Piru nanengnengan ni Hisus ke nekey ka igkewengete dan, purisu migkahiyan din sikan-dan, “Sikaniyu se deisek se pegpalintutuu! Mania te egkasasew kew te pegkalingew niyu te egka-keen?⁹ Ware kew bes pad nakasabut? Ware niyu nasuman-suman ka lalimma ne timman ne paan ne impakeen ku te lalimma ne libu (5,000) ne etew ne nakalimud kew pad te sapulu wey daruwa (12) ne liyang te nenasame?¹⁰ Ware niyud e man-e nasuman-suman seeye se pitu ne timman ne paan ne impakeen ku te hep-at ne libu (4,000) ne etew ne nakalimud kew pad te pitu ne liyang te nenasame?¹¹ Ware kew bes nakasabut te kene ne paan ka igpasabut

16:1 Mat 12:38; Luk 11:16. **16:4** Mat 12:39; Luk 11:29. * **16:4** Te Grigu: Ka me etew te kuntee ne timpu, amana ne mareet wey talaglibug. **16:6** Luk 12:1.

16:9 Mat 14:17-21. **16:10** Mat 15:34-38.

te ingkahi ku ne, ‘Tanudtanud kew te igpatulin te paan te me Parisiyu wey te me Sadusiyu?’”

¹² Ne henduen pad nakasabut sikandan ne kene bes ne patulin te paan ka epgatantanuran kandan, ke kene, ka pegpanulu bes te me Parisiyu wey te me Sadusiyu.

*Ka pegpataha ni Pidru
meyitenged ki Hisus*

(Mar. 8:27-30; Luk. 9:18-21)

¹³ Nataman, te diyad e si Hisus te inged te Sisarya Pilipus, mig-insaan din ka me hibateen din ne migkahi, “Hentew kun naa ka Anak te Etew sumale te me etew?”

¹⁴ Ne migtabak sikandan, “Ka duma migkahi ne si Huwan kun ne Talagbewutismu. Ne due duma ne migkahi ne si Ilyas kun. Ne ka duma degma migkahi ne si Hirimiyas kun, wey ke sabeka naa sikandin te me prupita.”

¹⁵ Mig-inse si Hisus kandan, “Piru ke sikaniyu ka epgalalahen, hentew e naa iya?”

¹⁶ Ne migtabak si Pidru, “Sikeykew iya ka Kristu, ka Anak te manekal ne Manama.”

¹⁷ Ne migkahiyan sikandin ni Hisus, “Keupianan nu Simun ne anak ni Hunas, su kene ne etew ka migpataha keykew kayi, ke kene, ka Amey ku ne diye te langit.

¹⁸ Sikan naa, egnanganan ku sikeykew Pidru te iling

ka te batu. Te sika ne batu, duen ku igpasasindeg ka punduk te migmalintuu keddi wey minsan ka geem te kamatayen kene egpakadereet. ¹⁹ Ne igbehey ku keykew ka me yabi diye te Migharian te Manama, ne ka minsan nekey ne ingkene nu kayi te ampew te tane, ingkene degma diye te langit. Ne ka minsan nekey ne intuhut nu kayi te ampew te tane, intuhut degma diye te langit.”

²⁰ Nataman, impegpehetan e panpanayi ni Hisus ka me hibateen din ne kene egpepanugtulen te minsan hentew ne sikandin ka Kristu.

*Impangguhud ni Hisus ka
peg-antus wey ka kapatayan
din*

(Mar. 8:31-9:1; Luk. 9:22-27)

²¹ Puun te seeye ne timpu, impasabut e ni Hisus ka me hibateen din ne keilangan ne eggendiye sikandin te Hirusalim wey eg-antus te igmeulaula kandin te me igbuyag te me Hudiyu, te me pangulu te me talagpanubad, wey te me talagpanulu te Balaud te Manama. Eggimatayan sikandin wey egkeuyag te igkatelu ne aldew.

²² Ne migweil-weil si Pidru, impasuwey rin e si Hisus wey insaparan din te migkahi, “Suwang-suwang! Magbebabe, kene egkaayun

ne egkeyitabu sika due te keykew!"

²³ Piru migbalikid si Hisus wey migkahiyan si Pidru, "Awe ka rue Meibulan! Egpakabalabag ka keddiey; su kene ne Manama ka indapihan nu, ke kene, ka me etew!"

²⁴ Nataman, migkahiyan e ni Hisus ka me hibateen din, "Ke hentew seeye se egikul keddii, keilangan ne engked te kandin ne igkeupii wey egtiang te kandin ne krus wey eg-ikul keddiey.

²⁵ Su seeye se egkeupian ne egluwas te kandin ne umul, nasi egkawaraan kayi, piru seeye se egkawaraan te kandin ne umul tenged keddiey, egpakarawat te umul ne ware egtamanan. ²⁶ Nekey ma ka egkakuwa te etew ke egkaangken din ka langun ne tahu kayi te ampew te tane piru egkaware ka umul rin? Ware iya! Su ware igkabehey rin eyew egkaawi din ka kandin ne umul. ²⁷ Su eggingsuma ka Anak te Etew ne egdumaan te katelesan te Amey rin, ne iyan din duma ka me panalihan din. Ne egkataman eg-unahan din e ka tagse sabeka ne etew sumale te himu rin. ²⁸ Egnangenan ku sikaniyu te malehet: due me etew ne kayi kuntee ne kene pad egpatey taman te kene dan pad egkakita ka Anak te Etew ne eggingsuma isip Hari."

17

Ka ulaula ni Hisus ne nababalawan

(Mar. 9:2-13; Luk. 9:28-36)

¹ Peglihad te hen-em ne aldew, induma ni Hisus si Pidru wey ka talaari ne si Santiyagu wey si Huwan te migmatakereg diye te matikang ne bubungan ne sikandan de. ² Ne dutu, nababalawan ka ulaula ni Hisus wey migsicha ka ulaula rin iling te aldew, wey miglayag te kaangkag ka kumbale din. ³ Ne sahuhune ne migpakita diye te kandan ensi Muwisis wey Ilyas wey migpakiglalag kandin. ⁴ Ne migkahiyan ni Pidru si Hisus, "Magbebaye, meupiya te kayi key* kuntee. Ke igkeupii nu eggimu a kayi te tatelu ne leeb, sabeka ka keykew, sabeka ka ki Muwisis wey sabeka ka ki Ilyas."

⁵ Te sasangan pad sikandin ne eglalag, due malayag ne gapun ne migdalung kandan wey due laheng ne egpuun dutu te gapun ne migkahi, "Seini ka pinalangge ku ne Anak ne ingkahale ku. Pamineha niyu sikandin!"

⁶ Te pegkarineg dutu te me hibateen din, naaldek e sikandan wey miglangkeb e diye te tane. ⁷ Piru migparani si Hisus wey miggen-genan din sikandan te migkahi, "Sasindeg kew wey kene kew kaaldek." ⁸ Pegtenggak dan,

16:24 Mat 10:38; Luk 14:27.

16:25 Mat 10:39; Luk 17:33; Huw 12:25.

16:27

Mat 25:31; Sal 62:12; Rum 2:6.

Isa 42:1; Mat 3:17; 12:18; Mar 1:11; Luk 3:22; Diy 18:15.

* **17:4** key: wey ke ki.

17:5 Hin 22:2; Sal 2:7;

17:5 2Pid 1:17-18.

si Hisus naan de ka nakita ran.

⁹ Taheed te egmatupang e sikandan te bubungan, inteesan e sikandan ni Hisus te migkahi, "Kene niyu ipang-guhud te minsan hentew ke nekey ka nakita niyu taman te egkeuyag e ka Anak te Etew."

¹⁰ Ne mig-inse ki Hisus ka me hibateen din, "Mania te migkahi ka me talagpanulu te Balaud te Manama ne keilangan ne iyan eggun-a ki Kristu eggendini si Ilyas?"

¹¹ Migtabak si Hisus, "Uya iya, eggun-a eggendini si Ilyas eyew te peg-ayad-ayad te langun. ¹² Piru egnanganan ku sikaniyu te miggendinid e si Ilyas, piru ware nekeila ka me etew kandin wey nasi dan himuwa diye te kandin ka minsan nekey ne igkeupii ran. Ne iling naan ded degma rue, egbaybayaran dan ded degma ka Anak te Etew."

¹³ Ne henduen pad nasabut te me hibateen ni Hisus te si Huwan bes ne Talagbewutismu ka egkahiyen din.

Imbawian ni Hisus ka bate ne inserepan te busew

(Mar. 9:14-29; Luk. 9:37-43a)

¹⁴ Te pegginguma ran diye te susuluhi ne etew, due lukes ne migparani ki Hisus wey migpanimbuel diye te tangkaan din

¹⁵ ne migkahi, "Magbebeye, ikeyid-u nu ka anak ku ne lukes su egbabuyen sikandin wey amana egkabaybayari. Malasi sikandin egpakesub-buk diye te hapuy wey diye te weyig. ¹⁶ In-uyan kud e sikandin diye te me hibateen nu, piru ware sikandan nakabawi kandin."

¹⁷ Ne migkahi si Hisus, "Sikaniyu se me etew te kuntee ne timpu, ware peg-palintutuu niyu wey mareet ka suman-suman niyu wey ka hinimuwan niyu! Hendei bes taman ka pegdumara-ruma ku kaniyu? Hendei bes taman ka peg-antus ku kaniyu? Uyana niyu ka bate kayi te keddi!" ¹⁸ Ne dutu inalew e ni Hisus ka busew ne migseret te bate wey te sikan de, neulian e ka bate.

¹⁹ Ne dutu, migparani ki Hisus ka me hibateen din te sikandan de wey mig-inse, "Mania te ware key nakaalew te busew?"

²⁰⁻²¹ Ne migtabak si Hisus diye te kandan, "Iyan igkeen-duena su deisek ka pegpal-intutuu niyu. Egnanganan ku sikaniyu te malehet: ke due pegpalintutuu niyu minsan iling kareisek te behas te mustasa, egpakesuhu kew te seini ne bubungan, 'Halin ka diye!' wey eggalin iya seini wey ware minsan nekey ne kene niyu egkeyimu!"[†]

17:10 Mal 4:5.

17:12 Mat 11:14.

17:20-21 Mat 21:21; Mar 11:23; 1Kur 13:2.

[†] **17:20-21** Due me Kasulatan ne miglagkes te birsikulu 21 piru ware seini diye te malehet ne migpuunan. Intimul naan de seini ne miggendue: Piru seini ne klasi ne busew kene niyu egkaalew ke kene kew eg-ampu wey egpuasa.

*Ka peglag e man-e ni
Hisus te kamatayen din
(Mar. 9:30-32; Luk. 9:43b-45)*

22 Due timpu ne nanlibulung ka me hibateen ni Hisus diye te Galiliya. Ne dutu, migkahiyan e man-e sikandan ni Hisus, "Mahaan e eg-akali ka Anak te Etew wey igbehey diye te me etew²³ ne eggimatey kandin, piru egkeuyag sikandin te igkatedu ne aldew." Ne puun dutu, nalaggew e amana ka me hibateen din.

Ka pegbayad te buhis para te timplu

24 Te pegginguma enni Hisus diye te Kapirnaum, migparani diye te ki Pidru ka me talagsukut te buhis para te timplu wey mig-inse kandin, "Egbayad naan ded te buhis para te timplu ka talagpanulu niyu?"

25 Migtabak si Pidru, "Ew red."

Te pegseled ni Pidru diye te baley, migpewun-a mig-inse si Hisus kandin ne migkahi, "Simun, nekey-a te keykew ne suman-suman, hentew-a ka egpabayaren te me Hari kayi te inged te buhis wey te duma pad ne bayaranan? Ka me mahinged naa wey ke me lapu?"

26 Ne migtabak si Pidru, "Ka me lapu."

Migkahiyan ni Hisus sikandin, "Ke iling ma rue, kene ne keilangan ne egpabayaren ka me mahinged.

27 Piru ke kene ki egbayad, kema ke egkatameneng sikandan kanta. Purisu hendiye ka te lanew wey pamunuwit ka. Bekaa nu naa ka be-be te an-anayan ne ngalap ne egkeutel nu wey egkakita nu diye ka seleppi ne eleg ne ighbayad te buhis ta te daruwa. Kua nu naa seeye wey ibayad nud e."

18

*Hentew ka amana ne labew
(Mar. 9:33-37; Luk. 9:46-48; Luk. 17:1-2)*

1 Te seeye ne timpu migparani diye te ki Hisus ka me hibateen din wey mig-inse, "Hentew-a ka labew diye te Migharian te Manama?"

2 Ne mig-umew si Hisus te bate wey impasasindeg din diye te taliware dan³ te migkahi, "Egnanganan ku sikaniyu te malehet: kene kew egpakaseled te Migharian te Manama ke kene kew egbalew-balew wey ke kene kew egpekeiling te me bate. ⁴ Purisu ka minsan hentew ne egpariralem eyew egpekeiling te seini ne bate, sikandin ka labew diye te Migharian te Manama. ⁵ Ne ka minsan hentew ne egdawat te iling kayi ne bate tenged su mig-ikul rin keddi, egdawat degma keddiey.

6 "Ka minsan hentew ne egpuunan ne egpakasale ka sabeka te seini ne me bate ne migpalintutuu wey

migsalig keddi, meupiya pad ke eggiketan ka lieg din te dakel ne batu ne galingan wey igdegpak diye te pused te dahat.⁷ Mekeyid-u-hid-u ka me etew kayi te ampew te tane su layun de eggingumei te me pegtintal. Duen iya me pegtintal ne egginguma, piru mekeyid-u-hid-u ka etew ne iyan egpuunan te pegtintal.

⁸ “Emun ke iyan egpuunan ka belad nu wey ke paa nu naa ne egpakashale ka, tempuha nu sika wey iregpak nu. Meupiya pad ke egsaled ka diye te langit ne napungku wey ke nababalanang ka lawa nu du te due me belad nu wey me paa nu ne igdegpak diye te hapuy ne kene egkeebukan.⁹ Ne emun ke iyan egpuunan ka mata nu ne egpakashale ka, lekata nu sika wey iregpak nu. Meupiya pad ke egsaled ka diye te langit ne sabeka re ka mata du te daruwa ka mata nu ne igdegpak de diye te linew ne hapuy.

*Ka panunggilingan
meyitenged te natarin ne
karniru*

(Luk. 15:3-7)

10-11 “Tanud-tanud kew ne kene kew egpakadeeg-deeg te minsan sabeka re te seini ne me bate. Su egnangan ku sikaniyu te ka me panalihan dan diye layun te tangkaan te Amey ku ne diye te langit.*

18:8 Mat 5:30. **18:9** Mat 5:29. *

18:10-11 Due me sinulat ne inlagkes ka birsikulu 11 piru ware seini diye te malehet ne migpuunan. Intimul naan de seini ne miggendendue: Su miggendini ka Anak te etew eyew te pegluwas te seeye se nenatarin. **18:15** Luk 17:3. **18:16** Diy 19:15.

¹² “Nekey-a te suman-suman niyu ke due etew ne due mahatus (100) ne karniru rin ne natarinan te sabeka? Kene din naa engkeran diye te bubungan ka siyam ne pulu wey siyam (99) eyew te pegpammitew te seeye se natarin? Engkeran din iya.¹³ Ne emun ke egkakita rin e seeye, egnanganan ku sikaniyu te malehet: egkahale iya sikandin. Amana rin pad igkahale sika du te seeye se siyam ne pulu wey siyam (99) ne ware natarin.¹⁴ Ne iling naan ded degma rue, ka Amey niyu ne diye te langit kene egkeupian ne egkatari-nan te minsan sabeka re te seini ne me bate.

*Ka suled nu ne nakasale
keykew*

¹⁵ “Emun ke egpakashale keykew ka suled nu, hendiyei nu sikandin wey nangeni nu te sale din. Piru himuwa nu sika te sikaniyu re sedaruwa. Ne emun ke egpammineg sikandin keykew, egpekeg-uli ded ka meupiya ne geyinawa niyu.¹⁶ Piru ke kene sikandin egpammineg keykew, duruma ka te sabeka wey ke daruwa naa ne etew su eyew ka langun ne eglalahen nu egkapamale-hetan te daruwa wey ke tatelu ne etew.¹⁷ Piru ke kene iya sikandin egpammineg kandan, ipangguhud nud

e sika diye te punduk te migmalintutuu. Ne emun ke kene pad iya man-e sikandin epgammineg kandan, isipa nu naan de sikandin ne sabeka ne etew ne ware migpalintutuu te Manama wey ke talagsukut naa te buhis.

Ka ingkene wey ka intuhut

¹⁸ “Egnanganan ku sikaniyu te malehet: ka minsan nekey ne ingkene niyu kayi te ampew te tane, ingkene degma diye te langit. Ne ka minsan nekey ne intuhut niyu kayi te ampew te tane, intuhut degma diye te langit.

¹⁹ “Egnanganan ku man-e sikaniyu te malehet: emun ke due daruwa kaniyu kayi te ampew te tane ne egpekeguyun ne egbuyu te minsan nekey, eggimuwen iya sika te Amey ku ne diye te langit. ²⁰ Su emun ke hendei ka daruwa wey ke tatelu ne eglibulung tenged keddiey, [†] diya a degma te taliware dan.”

*Ka panunggilingan
meyitenged te suluhuanen ne
ware migpasaylu*

²¹ Nataman, migparani si Pidru diye te ki Hisus wey mig-inse, “Magbebeye, ke layun de epgakasale kayi te keddiey ka suled ku, kapapila ku naa sikandin epgasayluwa? Kapapitu?”

²² Ne migtabak si Hisus, “Kene ne kapapitu re, ke

kene, pitu ne pulu wey pitu (77) ne lupi.

²³ “Sikan naa, ka Peghari te Manama egpekeiling te pangguhuren meyitenged te Hari ne egkeupian ne eggusey te me suluhuanen din ne due me utang. ²⁴ Te migbunsud e sikandin ka eggusey, due etew ne in-uyan diye te kandin ne nekeutang te minilyun ne seleppi. ²⁵ Tenged te kene sikandin egpakabayad, migsuhu ka Hari ne igbelegye e ka etew duma te asawa rin wey me anak din wey ka langun ne diye te kandin eyew egpakabayad sikandin te utang din. ²⁶ Ne dutu, migpanimbuel e ka suluhuanen diye te tangkaan te Hari wey migpeyid-u-hid-u ne migkahi, ‘Hari, kene e re ubag nikeykew dalaseka su egbayaran ku re sikeykew te langun!’ ²⁷ Neyid-u ka Hari te seeye ne suluhuanen, purisu imbalahad din e ka utang din wey impeyipanew e.

²⁸ “Piru te peggipanew e te sika ne suluhuanen, nasinugung din ka duma rin ne suluhuanen ne nekeutang kandin te pila re ne libu. Inggansing din seeye se etew wey impeleng din te migkahi, ‘Bayari ad e nikeykew te utang nu!’ ²⁹ Migpanimbuel ka duma rin ne suluhuanen wey migpeyid-u-hid-u kandin ne migkahi, ‘Kena a ubag nikeykew dalaseka su egbayaran ke re!’ ³⁰ Piru ware sikandin nabennali

wey miggipanew e. Ne nasi din ipaprisu ka etew taman te egkabayaran ka utang din.
 31 Te pegkakita dutu te duma ne me suluhuanen, amana sikandan nalaggew. Seeye naa, nangendiye sikandan te Hari ka migsumbung kandin te neyitabu.
 32 Purisu impeumew te Hari seeye se suluhuanen wey migkahiyan, ‘Amana ka ne mareet ne suluhuanen! Imbalahad kud e ka langun ne utang nu tenged su migpeyid-u-hid-u ka keddiey.
 33 Ne mania te ware ka neyid-u te duma nu ne nekeutang keykew iling te pegkeyid-u ku keykew?’
 34 Amana nabelu ka Hari kandin, seeye naa impaprisu rin e ka suluhuanen eyew egbaybayaran taman te egkabayaran din degma ka langun ne utang din.’

35 Ne migkahi si Hisus, ‘Iling naan ded degma ka eggimuwen diye te kaniyu te Amey ku ne diye te langit ke kene niyu egpasayluwen ne epuuun te me pusung niyu ka me duma niyu.’

19

Ka pegpanulu meyitenged te pegpeengkerey te alunggun (Mar. 10:1-12)

1 Pegkapenga ni Hisus te miglalag te seeye ne me panunggilingan, mig-awe e sikandin diye te Galiliya wey miggendiyad e te inged ne sakup te Hudiya ne deyipag te Hurdan.

2 Ne amana

ne susuluhi ka me etew ne migsinundul kandin, wey impamawian din sikandan diye.

3 Due nangendiye te ki Hisus ne me Parisiyu eyew te peg-eleg-eleg kandin ne mig-inse, “Intuhut naan ded te Balaud ta ne egpakig-engked ka lukes te asawa rin te minsan nekey ne egpuunan?”

4 Ne migtabak si Hisus, “Ware kew bes nakasabut te imbasu niyu diye te Kasulatan ne puun pad te an-anayan innimu e sikandan te Manama ne lukes wey malitan? 5 Ne migkahi pad man-e ka Manama, ‘Sika ka egpuunan ne eg-engked e ka lukes te amey wey iney rin wey egsabeke e diye te asawa rin. Ne sikandan se daruwa, egkeyimu e ne sabeka.’ 6 Sikan naa, kenad e ne daruwa sikandan, ke kene, sabeka naan de. Purisu kene egkaayun ne egpeg-engkeren te etew ka insabeke e te Manama.”

7 Mig-inse e man-e ka me Parisiyu, “Piru mania te migsuhu si Muwisis ne egpabehayen ka lukes diye te asawa rin te sulat te pegpakig-engked, ne eyew egpekeengked e sikandin?”

8 Ne intabak ni Hisus sikandan, “Intuhutan kew ni Muwisis ne egpakig-engked te me asawa niyu tenged su makehal ka me ulu niyu. Piru kene ne iling due puun pad te an-anayan.

⁹ Egnanganan ku sikaniyu, ne ka minsan hentew ne egpakig-engked te asawa rin ne malitan ne ware nakasale kandin, egpakanilibug e sikandin ke egbalew-balew eg-asawa.”*

¹⁰ Ne migkahi ka me hibateen din diye te kandin, “Ke iling ma due ka egkeula-ula te alunggun, meupiya pad ke kenad e eg-asawa.”

¹¹ Piru migkahiyan ni Hisus sikandan, “Kene ne langun ne etew ne egpakarawat te seini ne lalahan, ke kene, seeye de se me etew ne imbulihan te Manama kayi. ¹² Masulug ka egpuunan ne due me lukes ne kene eg-asawa: ka duma, kene eg-asawa puun su neetew sikandan ne kene iya egpakaanak; ka duma, kene eg-asawa puun su migpakepun sikandan; ne ka duma, egkeupian ne kene eg-asawa su eyew egkasabeka ka sumansuman dan meyitenged te Peghari te Manama. Seeye se egpakarawat kayi, egparawaten.”

Ka pegpanalangin ni Hisus te me bate
(Mar. 10:13-16; Luk. 18:15-17)

¹³ Nataman, due me bate ne in-uuyan diye te ki Hisus eyew egpatel-eban te belad din wey eyew egpaampuan kandin. Piru insaparan

sikandan te me hibateen ni Hisus. ¹⁴ Ne migkahi si Hisus, “Balahara niyu re due ka me bate ne egparani keddi wey kene niyu sikandan sapari, su nasakup te Migharian te Manama ka me bate ne iling kayi.”

¹⁵ Pegkapenga ni Hisus te pegtel-eb kandan te belad din, mig-awe e sikandin.

Ka meyaman ne etew
(Mar. 10:17-31; Luk. 18:30)

¹⁶ Due kanakan ne migparani ki Hisus wey mig-inse, “Talagpanulu, nekey-a ka meupiya ne eggimuwen ku eyew egkarawat ku ka umul ne ware egtamanan?”

¹⁷ Ne migtabak si Hisus, “Mania te mig-inse ka keddi ke nekey ka meupiya? Sabeka re ka meupiya, ka Manama re. Piru ke egkeupian ka ne egpakarawat te umul ne ware egtamanan, keilangan ne egtumanen nu ka me suhu te Manama.”

¹⁸ Mig-inse ka kanakan, “Hendei rutu?”

Ne migtabak si Hisus, “Kene ka himatey, kene ka panlibug, kene ka panakew, wey kene ka pamalehet te ubat. ¹⁹ Tahura nu ka amey wey iney nu, wey geyinawei nu ka duma nu iling te peggeyinawa nu te pegkeetew nu.”

* **19:9** Due duma ne me sinulat ne miglagkes kayi piru ware seini diye te malehet ne migpuunan. Intimul naan de seini ne miggendue: ka lukes ne eg-asawa te malitan ne in-engkeran e, egpakanilibug e. **19:18** Iks 20:13; Diy 5:17; Iks 20:14; Diy 5:18; Iks 20:15; Diy 5:19; Iks 20:16; Diy 5:20. **19:19** Iks 20:12; Diy 5:16; Lib 19:18.

²⁰ Migtabak ka kanakan, "Intantanuran kud sika langun. Na, nekey naan pad ka duma ne eggimuwen ku?"

²¹ Ne migkahiyan ni Hisus sikandin, "Emun ke egkeupian ka iya ne likes diye te tangkaan te Manama, ibele-gye nu ka me karatuan nu, ne ka halin ipamehey nu diye te ekgengaayu-ayu, eyew due karatuan nu diye te langit. Ne egkataman, libed ka kayi wey ikul ka keddi."

²² Te pegkarineg dutu te kanakan, miggipanew e sikandin ne miglungku tenged su dakel ka karatuan din.

²³ Sikan naa, migkahiyan ni Hisus ka me hibateen din, "Egnanganan ku sikaniyu te malehet: malised te meyaman ka pegseled diye te Migharian te Manama!

²⁴ Egnanganan ku man-e sikaniyu te malemu pad ka pegserep te ayam ne kamilyu diye te lungag te simat du te pegseled te meyaman diye te Migharian te Manama."

²⁵ Te pegkarineg te me hibateen dutu, amana sikan dan neinu-inu wey mig-inse, "Ke iling ma rue, hentew bes naan de ka egkaluwas?"

²⁶ Ne migtengteng si Hisus diye te kandan wey migkahi, "Kene egkeyimu seini te etew, piru egkeyimu te Manama ka langun."

²⁷ Ne migkahi si Pidru, "Na, sikanami seini, mengkeran ney e ka langun eyew te peg-ikul keykew.

Nekey naa ka egkakuwa ney rue?"

²⁸ Migkahiyan ni Hisus sikandin, "Egnanganan ku sikaniyu te malehet: ke egkabalbalawan e seini se kalibutan, egpinnuu ka Anak te Etew diye te amana ne mateles ne trunu rin. Ne sikaniyu se mig-ikul keddi, epakapinnuu degma diye te sapulu wey daruwa (12) ne trunu eyew te peggukum te sapulu wey daruwa (12) ne tribute Israil. ²⁹ Ne ka minsan hentew ne eg-engked te baley rin, me suled din, me atebey, amey wey iney rin, me anak din wey katantanaan din tenged te peg-ikul rin keddiey, epakarawat te mahatus (100) ne lupi te se-eye se neengkeran din, wey egbehayan pad sikandin te umul ne ware egtamanan. ³⁰ Piru masulug ka mabantug ne kenad egmabantug, wey masulug ka kene ne mabantug ne egmabantug e."

20

*Ka panunggilingan
meyitenged te me talagbasuk
te parasan*

¹ Migkahiyan ni Hisus sikandin, "Ka Peghari te Manama egpekeiling te pangguhuren meyitenged te kamuney te parasan ne migselem-selem migpam-mitew te egpatrabahuwen din diye te kamet din. ² Due pila ne me etew ne nakita rin wey migpasabutey sikandan ne egbayaran din ka tagse

sabeka te sabeka ne dinaryu.* Pegkapenga, insuhu din e sikandan diye te kamet din eyew egpatrabahuwen e.³ Hengkayi te me alas nuwibe te maselem,[†] miggendiyad e man-e sikandin te palingki wey due me etew ne nakita rin diye ne egmanasindeg de ne ware eggimuwen,⁴ wey migkahiyan din sikandan, ‘Sikaniyu degma, hendiye kew te kamet ku wey egbayanar ku sikaniyu te eleg ne bayad.’⁵ Ne nangendiyad e ka me etew. Nataman, miggipanew e man-e sikandin te me meudtu ka egpammitew te me etew wey iling ded ka innimu rin te me alas tris e te maapun.[‡]⁶ Te me alas singku e te maapun, § miggipanew e man-e sikandin wey due me etew ne nakita rin ne migmanasindeg de. Ne migkahiyan din sikandan, ‘Mania te iyan niyu re egpulungan ka egmanasindeg ne ware eggimuwen te egkaapanan?’⁷ Ne migtabak sikandan, ‘Uya su ware ma egpatrabahu kanami.’ Ne migkahiyan din sikandan, ‘Hendiye kew degma te kamet ku wey trabahu kew diye.’

⁸ “Hengkayi te egkasagkup e, migkahiyan e te kamuney te parasan ka sinalihan din, ‘Umawa nud ka me

trabahanti wey pamayari nud e. Hun-eyi nu seeye se namewuri wey mewuriya nud seeye se nekewun-a.’⁹ Ne seeye se me etew ne alas singku e te maapun* nakatrabahu, impamayaran ded sikandan te tigsabeka ne dinaryu.¹⁰ Hengkayi se egbayaran e degma seeye se nekewun-a ne migtrabahu, isip dan ne dakel-rakel ka egkarawat dan, kunaleg te tigsabeka red degma ne dinaryu ka tagse sabeka kandan.¹¹ Te pegdawat dan dutu, migsagsahukul sikandan diye te kamuney¹² ne migkahi, ‘Senge uras de ka pegtrabahu te seini se namewuri ne me etew, ne impeiling nu ka bayad dan kanami te miglarey te aldew wey napangkag te meinit ka migbasuk!’¹³ Piru intabak te kamuney ka sabeka kandan ne migkahi, ‘Suled, ware ku limbungi sikeykew; migpasabutey ki ne egpabayad ka te sabeka ne dinaryu.¹⁴ Dawata nu ka bayad nu wey uli kad. Su keddiey ne igkeupii ne egbayaran ku ka namewuri te iling te imbayad ku keykew.¹⁵ Ware naa katenged ku ke nekey ka igkeupii ku ne eggimuwen te seleppi ku? Wey ke neimma ke re su matumpis a nahud?”

* **20:2** Ka sabeka ne dinaryu, eleg ne igbayad te senge kaaldew ne pegbasuk te etew. (Egkakita degma diye te 20:9-10,13.) † **20:3** Te Grigu: igkatelu ne uras.

‡ **20:5** Te Grigu: meudtu, igkeen-em ne uras; alas tris te maapun, igkasiyam ne uras. § **20:6** Te Grigu: igkasapulu wey sabeka (11) ne uras. **20:8** Lib 19:13;

Diy 24:15. * **20:9** Te Grigu: igkasapulu wey sabeka (11) ne uras. **20:16** Mat 19:30; Mar 10:31; Luk 13:30.

¹⁶ Ne migkahi si Hisus, "Purisu ka egkamewuri nasi egpekewun-a, wey ka egpekewun-a nasi egkamewuri."

Igkatelu e ne timpu ne in-lalag ni Hisus ka kamatayen din

(Mar. 10:32-34; Luk. 18:31-34)

¹⁷ Peggendiye enni Hisus te Hirusalim, impasuwey rin ka sapulu wey daruwa (12) ne hibateen din puun te me etew. Ne migkahiyan din sikandan te diyad e te deralanen, ¹⁸ "Pammineg kew! Diye ki kuntee eg-pabulus te Hirusalim, ne ka Anak te Etew igbehey e diye te me pangulu te me talagpanubad wey te me talagpanulu te Balaud te Manama wey eggukuman dan e sikandin te kamatayen. ¹⁹ Ne igpeendiye dan e mane sikandin te kene ne me Hudiyu eyew eglemetan, eglampesan, wey iglansang te krus. Piru egkeuyag sikandin te igkatelu ne aldew."

Ka egbuyuen te sabeka ne iney

(Mar. 10:35-45)

²⁰ Nataman, miggendiye te ki Hisus ka asawa ni Sibidiyu duma te me anak din ne me lukes. Migpanimbuel sikandin su due egbuyuen diye te ki Hisus.

²¹ Ne mig-inse si Hisus diye te kandin, "Nekey-a ka igke-upii nu?"

Migkahi ka malitan, "Emun ke egharikad e, tuhuti nu ubag ne epakapinnuu ka sabeka ne anak ku diye te igkakawanant nu wey ka sabeka diye te igkahibang nu."

²² Piru migtabak si Hisus, "Ware kew nakanengneng ke nekey ka egbuyuen niyu. Eg-pekeinum kew naan ded te ubab te peg-antus ne mahaan kud e eg-inuma?

Ne migtabak sikandan, "Uya, egpekeinum key red."

²³ Migkahiyan sikandan ni Hisus, "Uya, malehet ne egpekeinum kew red te ubab ku te peg-antus, piru ka meytenged te egpapinnuuwen diye te igkakawanant ku wey diye te igkahibang ku, ware katenged ku due, su duen e intahahe te Amey ku ne egpapinnuuwen due."

²⁴ Te pegkarineg dutu te sapulu ne me hibateen, nabelu e sikandan te duma ran ne talaari. ²⁵ Purisu im-peparani sikandan ni Hisus wey migkahiyan, "Nakanengneng kew e te ka me pangulu te me etew ne kene ne me Hudiyu, impeuteng dan iya ka geem dan te pegmandu diye te me sakup dan. Ne seeye degma se dakel se katungdanan, iga-pitew ran iya ka katenged dan diye te kandan. ²⁶ Piru kene niyu

[†] **20:21** Sumale te tuluuwen te me Hudiyu, ka talahuren de ne etew ka egpapinnuu diye te igkakawanant te mabantug ne etew. **20:25** Luk 22:25-26. **20:26** Mat 23:11; Mar 9:35; Luk 22:26.

sika himuwa. Su ka minsan hentew due te kaniyu ne egkeupian ne egmabantug, keilangan ne egpeyimu sikandin ne suluhuanen niyu.²⁷ Ne ka minsan hentew ne egkeupian ne egkeyimu ne labew kaniyu, keilangan ne egpeuripen kaniyu.²⁸ Ne iling naan ded degma ka Anak te Etew; ware miggendini sikandin eyew egpamakayen, ke kene, eyew egpamakey wey egpeyimaye eyew te pglekat te masulug ne etew puun te me sale dan.”

Imbawian ni Hisus ka daruwa ne butud
(Mar. 10:46-52; Luk. 18:35-43)

²⁹ Ne hengkayi te eglihawang e sikandan diye te Hiriku, due susuluhi ne etew ne migsinundul kandin.
³⁰ Ne due daruwa ne etew ne butud ne naminpinnuu diye te ilis te dalan. Te pegkarineg dan ne eglihad si Hisus, migpanguleyi sikandan ne migkahi, “Magbebkiye, kabuhalan ni Dabid, ikeyid-u key nikeykew!”

³¹ Piru insaparan sikandan te me etew ne egpeen-enengen e, piru nanasnasian de iya sikandan ka migbal-balukan ne migkahi, “Magbebkiye, kabuhalan ni Dabid, ikeyid-u key nikeykew!”

³² Ne migsanggel si Hisus wey in-umew rin sikandan te migkahi, “Nekey-a ka igkeupii niyu ne eggimuwen ku kaniyu?”

³³ Ne migtabak sikandan, “Magbebkiye, egkeupian key ne egpakkita!”

³⁴ Neyid-u si Hisus kandan purisu insamsam din ka mata ran, wey due-rue ne egpakkite e sikandan. Nata-man, migsinundul e sikandan ki Hisus.

21

Ka meupiya ne pegginguma ni Hisus diye te Hirusalim

(Mar. 11:1-11; Luk. 19:28-40; Huw. 12:12-19)

¹ Te egpakkari-rani e sikandan te Hirusalim, eg-palinggumaan e sikandan te Bitpahi ne diye te Bubungan te Ulibu. Ne dutu, impewune e ni Hisus ka daruwa te me hibateen din² wey migpanagtahaan te migkahi, “Hendiye kew seeye te kewun-aan ne bariyu, ne due-rue ne due egkakita niyu ne talanati ne asnu ne inniket diye. Hekari niyu naa seeye wey uyana niyu kayi te keddi.³ Ne emun ke due eg-inse kaniyu, kahii niyu re, ‘Ingkeilangan seini te Magbebkiye,’ ne due-rue ne igpeuyan din sika kaniyu.”

⁴ Neyitabu seini eyew egkatuman ka ingkahi te prupita ne miggendue,

⁵ “Pangguhuri niyu ka matig-Hirusalim,*

‘Eggendue te kaniyu ka Hari niyu.

Mapariralemen sikandin ne eg-untud te asnu, minsan nati te asnu.’”

⁶ Nataman, nangipanew e ka me hibateen din wey intuman dan ka insuhu ni Hisus.
⁷ Ne in-uyan dan e ka talanati ne asnu diye te ki Hisus, wey innagpiyan dan te me kumbale dan, wey mig-untud e si Hisus. ⁸ Ne due masulug ne etew ne nambebelat te me kumbale dan diye te dalan, wey ka duma nanempug te me sugpang te kayu wey intalagtag dan diye te dalan.
⁹ Ne migmanguleyi seeye se masulug ne me etew ne nangun-a wey naninundul ki Hisus ne migkahi, “Egdayanen ka kabuhalan ni Dabid! Egpanalanganan sikandin se impeendini te Magbebaye ne Manama kanta! Egdayanen ka Manama ne diye te dibabew te langit!”

¹⁰ Te pegseled ni Hisus diye te siyudad te Hirusalim, newukag ka langun ne etew diye wey migkahi, “Hentew-a seini?”

¹¹ Ne migkahi sikandan, “Sikandin iya si Hisus, ka prupita ne matig-Nasarit ne sakup te Galiliya.”

Miggendiye si Hisus te timplu

(Mar. 11:15-19; Luk. 19:45-48; Huw. 2:13-22)

¹² Nataman, migseled e si Hisus diye te timplu wey indeldel rin ka langun ne egmanitinda wey ka egmambebeli diye te timplu. Ne impamalintuad din ka me lamisa te egmanaliyu te

seleppi, wey ka me pinnuwian te egmameligye te me seleppati. ¹³ Ne migkahiyan ni Hisus sikandan, “Nasulat e diye te Kasulatan, ‘Ka baley ku egngararan te baley ne ampuanan’; piru innimu niyud e seini ne helesanan te me takawen!”

¹⁴ Nataman, due butud wey pungku ne migparani kandin diye te timplu wey impamawian din sikandan. ¹⁵ Piru nabelu ka me pangulu te me talagpanubad wey ka me talagpanulu te Balaud te Manama te pegkakita ran te kein-inuwan ne innimu ni Hisus, wey te pegkarineg dan te me bate diye te timplu ne egmanguleyi ne eggendue, “Egdayanen ka kabuhalan ni Dabid!” ¹⁶ Ne migkahiyan dan si Hisus, “Narineg nu ke nekey ka ingkahi ran?”

Ne migtabak si Hisus, “Uya, narineg ku. Ware kew bes nakasabut te imbasu niyu diye te Kasulatan ne miggenendue, ‘Impanulu nu te pegsaye keykew ka me bate wey ka egsusu pad ne me bate’?”

¹⁷ Nataman, mig-engkeran e sikandan ni Hisus wey miglihawang e te siyudad ne migpeendiyad e sikandin te Bitanya wey diyad e miggirehe.

Indilus ni Hisus ka kayu ne iggira

(Mar. 11:12-14, 20-24)

¹⁸ Pegkapawe, te miglibed e si Hisus diye te Hirusalim,

miggutasan e sikandin.¹⁹ Ne due nakita rin ne kayu ne ig-gira diye te ilis te dalan. Indugpu din seeye piru ware nakita rin ne behas su neelin de ne dewun. Ne migkahiyan din ka kayu, "Kene kad e eg-pakabebehas pad." Te sikan de, nahangu e ka kayu.

²⁰ Te pegkakita dutu te me hibateen din, neinu-inu sikandan wey mig-inse, "Mania te due-rue ne nahangu ka kayu?"

²¹ Ne migtabak si Hisus kandan, "Egnangenan ku sikaniyu te malehet: emun ke due pegpalintutuu niyu wey kene kew egduwa-ruwa, egpekeyimu kew iling te innimu ku te sika ne kayu. Ne kene ne sikan de, ke kene, egpaka-suhu kew degma te seini ne bubungan, 'Keenat ka wey pakaregpak ka diye te dahat', wey egkeyitabu iya seini. ²² Egkarawat niyu ka minsan nekey ne egbuyuen niyu te Manama ke due pegpalintutuu niyu."

*Ka peggubabe te katenged ni Hisus
(Mar. 11:27-33; Luk. 20:1-8)*

²³ Nataman, miglibed e man-e si Hisus migseled diye te timplu. Te sasangan pad sikandin ka migpanulu, due migparani kandin ne me pangulu te me talag-panubad wey ka me ighbuyag te me Hudiyu wey mig-inse, "Nekey ka katenged nu te peggimu kayi? Hentew-a ka

migbehey keykew te sika ne katenged?"

²⁴ Ne migtabak si Hisus, "Due degma inse ku kaniyu, ne emun ke egkatabak niyu seini, egnangenan ku degma sikaniyu ke nekey ka katenged ku te peggimu kayi. ²⁵ Hendei migpuun ka katenged ni Huwan te pegpame-wutismu? Diye naa te Manama wey ke diye te me etew?"

Ne migpalalahey sikandan ne migkahi, "Emun ke egkahi ki, 'Diye migpuun te Manama,' kema ke egkahiyan ki nikandin, 'Na, mania te ware kew migpalintutuu ki Huwan?' ²⁶ Piru ke egkahi ki, 'Diye migpuun te me etew,' egkaaldek ki te me etew kema ke nekey ka eggimuwen kanta su migpalintutuu sikandan ne prupita si Huwan." ²⁷ Purisu migtabak sikandan, "Ware key nakanengneng."

Ne migkahiyan degma sikandan ni Hisus, "Ke iling ma rue, kene ku degma egnangenan sikaniyu ke nekey ka katenged ku te peggimu kayi."

*Ka panunggilingan
meyitenged te tahasuled*

²⁸ Ne migkahi e man-e si Hisus, "Nekey-a te suman-suman niyu? Due etew ne daruwa se anak ne me lukes. Miggendiyaan din ka panganey ne anak din wey migkahiyan, 'Tatu, trabahu ke pa kuntee diye

te parasan.' ²⁹ Ne migtabak sikandin, 'Kena a egtrabahu!' Piru ware de nalingen-
ngen, nabalbalawan e ka suman-suman din wey miggendiyad e sikandin te kamet. ³⁰ Nataman,
miggendiyaan e degma te amey ka hari ne anak din wey iling ded ka ingkahi
rin. Ne migtabak ka anak, 'Uya ame, eggendiya a,' piru ware sikandin miggendiye.
³¹ Na, hendei kayi te daruwa ka migtuman te igkeupii te amey ran?"

Ne migtabak sikandan,
"Seeye se panganey."

Migkahiyan ni Hisus sikandan, "Egnanganan ku sikaniyu te malehet:
egpekewun-a pad kaniyu epakaseled te Migharian te Manama ka me talagsukut te buhis wey ka me malitan ne
egpamelegye te me lawa ran. ³² Su miggendini te kaniyu si Huwan ne Talagbewutismu wey
migpanulu kaniyu te matareng ne peg-ugpe, ne ware kew migpalintutuu kandin. Piru migpalintutuu mule kandin ka me talagsukut te buhis wey ka me malitan ne egpamelegye te me lawa ran. Ne minsan
nakakita kew e dutu, ware kew en iya mig-inniyug te me sale niyu wey migpalintutuu kandin."

*Ka panunggilingan
meyitenged te me talagtanggu
te parasan*

(Mar. 12:1-12; Luk. 20:9-19)

³³ Migkahi si Hisus, "Pamineha niyu seini se panunggilingan. Due sabeka ne etew ne due tane ne impamulaan din te me prutas ne egngaranan te paras wey inlingut din te alad. Ne miglulungag man-e sikandin eyew egluyangan te behas te paras wey migbebaley man-e sikandin te matikang ne bakalag ne eg-ugpaan te talagtameng. Pegkapenga dutu, impatanggu rin e te me talagbasuk ka parasan wey miglapu e sikandin diye te mariyu ne inged.

³⁴ Te timpu e te pegpamupu te behas, impeendiye din ka me uripen din diye te me talagtanggu eyew egpakuen te kandin ne baad. ³⁵ Piru impandakep te me talagtanggu ka me uripen din. Ka sabeka ne uripen, inlelampesan dan, ka dangeb inderegpak dan te batu, wey ka igkatelu innimatayan dan. ³⁶ Ne migsuhu e man-e ka kamuney te lein ne me uripen din, ne masulug pad du te nekewun-a. Piru iling ded ka innimu te me talagtanggu diye te kandan. ³⁷ Te katammanan, impeendiye din e ka anak din ne lukes te migkahi, 'Egtahuren dan iya sikandin.' ³⁸ Piru te pegkakita te me talagtanggu te anak te kamuney, migpalalahey e sikandan, 'Sikan e ka anak te kamuney te parasan ne iyan egpakakamuney kayi. Kuwa kid e su eggimatayan ta sikandin eyew sikante e

ka egpakakamuney kayi.'
 39 Purisu indakep dan e sikandin wey inggehanuy ran e diye te lihawangan te parasan wey innimatayan dan e."

40 Ne mig-inse si Hisus kandan, "Nekey-a ka eggimuwen te kamuney te parasan diye te me talagtanggu ke eglibed sikandin?"

41 Migtabak sikandan kandin, "Egguleen din iya te egpangimatey seeye se mareet ne me talagtanggu wey egkataman, egpatamengan din e man-e te lein ne egpakabehey kandin te baad te tagse tigpamupu te behas."

42 Ne migkahiyani ni Hisus sikandan, "Ware kew bes nakasabut te imbasaniyu diye te Kasulatan ne egenendue,

'Ka batu ne insamsamilian te me talagbebaley,
 nasi neyimu ne batu ne pabunsuran.

Himu seini te Magbebaye ne Manama,
 wey igkeinu-inu ta seini?"

43 Ne migkahi pad man-e si Hisus, "Purisu egnanganan ku sikaniyu te kene kew e egkasakup te Migharian te Manama, wey iyan e egkasakup seeye se me etew ne egbebehas te meupiya.
 44 Ne ka minsan hentew ne egkeulug ne egdeeg te seeye ne batu, egkallepuan, piru ka egkeuluhan te seeye ne batu, egkallupet iya.[†]"

21:42 Sal 118:22-23. [†] **21:44** Kene ne klaru seini ne birsikulu ke nalagkes naa iya diye te malehet ne migpuunan.

45 Te pegkarineg te me pangulu te me talagpanubad wey te me Parisiyu te panunggilingan ni Hisus, nasabut dan e ne sikandan ka igpasabut din. 46 Egdakepen e perem si Hisus te me pangulu te me Hudiyu, piru naaldek sikandan te me etew su inila ran si Hisus ne sabeka ne prupita.

22

*Ka panunggilingan
 meyitenged te sahaeken te
 kasal*

(Luk. 14:15-24)

1 Nataman, mig-abey e man-e migpangguhud si Hisus diye te me etew pinaahi te me panunggilingan ne migkahi,² "Ka Peghari te Manama egekeiling te pangguhuren meyitenged te Hari ne mig-andam te sahaeken para te kasal te anak din ne lukes. ³ Ne impeyipanew e nikandin ka me suluhuanen din eyew egpaangayen te seeye se impanginggat din te sahaeken te kasal, piru migbalibad ka me etew.

4 Nataman, migpeyipanew e man-e sikandin te lein ne me suluhuanen din wey migkahiyani, 'Nangeni niyu seeye se impanginggat ku te naandam e ka egkakeen su neyimatayan kud e ka me baka wey ka me nati ne impalambeg ku, wey naandam e ka langun, sikan naa peendiniya niyud e sikandan!' ⁵ Piru ware

sikandan miglinga-linga wey nasi de iya nangipanew. Ka sabeka miggendiye te kamet din, ne ka dangeb miggendiye te egpanelepi-anan din.⁶ Ne ka duma, impandakep dan ka me suluhuanen, impeyilawan wey impangimatayan dan.

⁷ “Purisu nabelu ka Hari wey impeendiye din e ka me sundalu rin eyew eg-peyimatayan seeye se me mangngimatey wey egpasilaban ka me siyudad dan.⁸ Ne migkahiyan din ka me suluhuanen din, ‘Naandam e ka sahakeen te kasal, piru kene ne likes ne eggendini seeye se impangtinggat ku.⁹ Purisu hendiye kew te me bebalakan te me dalan wey hinggata niyu te sahakeen te kasal ka minsan hentew ne egkakita niyu diye.’¹⁰ Ne nangendiyad e seeye se me suluhuanen diye te me deralanen wey impangtinggat dan ka langun ne nakita ran, meupiya ma wey se kene. Purisu napenu te me etew seeye se migsahakeenanan.

¹¹ “Piru te pegseled te Hari eyew egtengteng te me mahaliyug, due nakita rin diye ne etew ne ware migsaluub te igpangasal ne kumbale.¹² Ne migkahiyan din seeye se etew, ‘Suled, immenu nu te egseled kayi te ware ke ma nakasaluub te igpangasal ne kumbale?’ Piru ware nakatabak ka etew.¹³ Nataman, migkahiyan e te Hari ka me suluhuanen din,

‘Bakua niyu ka belad din wey paa rin wey iregpak niyu diye te liyawangan ne marusilem. Ne diye, egmandalawit sikandan wey egmakihet te ngipen dan.’”

¹⁴ Ne in-epus ni Hisus ka panunggilingan te migkahi, “Masulug ka ingginggat, piru deisek de ka in-alam.”

Ka inse meyitenged te pegbayad te buhis

(Mar. 12:13-17; Luk. 20:26)

¹⁵ Ne miglibulung ka me Parisiyu eyew egpammitew te paahi ne egkasahilut dan si Hisus pinaahi te peglag-lalag din.¹⁶ Seeye naa, impeendiye dan te ki Hisus ka me hibateen dan duma te me sakup ni Hirudis. Ne migkahi sikandan, “Talagpanulu, nakanengneng key ne malehet ka inlalag nu, wey impanulu nu ka kamalehetan meyitenged te igkeupii te Manama; wey imbalahad nu ke nekey ka suman-suman te me etew meyitenged te inlalag nu, tenged su ware nu tengtengi ka keugpe dan.¹⁷ Purisu nangeni key ke nekey ka suman-suman nu. Supak naa te Balaud ta ka pegbayad te buhis diye ki Sisar ne Impiradur, wey se kene?”

¹⁸ Piru natahaan ni Hisus ne mareet ka tuyu dan, purisu migkahi sikandin, “Sikaniyu se egmapitew-pitew re! Mania te eg-el-elehan a nikaniyu?¹⁹ Papitawa a nikaniyu

te seleppi ne igbayad te buhis!" Ne intaruwayan dan e sikandin te seleppi.
 20 Ne mig-insaan sikandan ni Hisus, "Hentew ne alung wey ngaran ka nakatahu kayi?"

²¹ Migtabak sikandan, "Ki Sisar ne Impiradur."

Ne migkahiyan sikandan ni Hisus, "Ke iling due, ibehey niyu diye te Impiradur ka kandin, wey ibehey niyu degma diye te Manama ka kandin."

²² Neinu-inu sikandan te pegkarineg dan dutu; ne migengkeran dan e sikandin wey naangawe e.

Ka inse meytenged te pegkeuyag

(Mar. 12:18-27; Luk. 20:27-40)

²³ Te seeye ded ne aldew, due me Sadusiyu ne migparani ki Hisus. Sikandan ka migkahi ne kenad egkeuyag ka me minatey.
²⁴ Ne mig-insaan dan si Hisus, "Talagpanulu, migkahi si Muwisis, 'Emun ke egpatey ka etew ne ware pad nakaanak, keilangan ne egpamaluwen te hari rin ka ipag din eyew duen ded anak te kakey rin ne migpatey e.'

²⁵ Na, due pitu ne taltalaari ne neelin ne lukes ne migugpe dengan kayi te kanta. Nakaasawa ka panganey wey migpatey ne ware nakaanak. Purisu impamalu e te hari rin ka asawa rin.
²⁶ Ne iling ded degma due ka neyitabu te igkarangeb ne hari wey te igkatedu

peendiye te igkalitan.
²⁷ Te katammanan, migpatey e degma ka malitan.
²⁸ Na, ke eggingume e ka aldew ne eg-uyahen e ka me minatey, hentew naa ka egkaasawa rin su sikandan ma langun ka nakaasawa kandin?"

²⁹ Piru migtabak si Hisus kandan, "Naseyyup kew, tenged su ware kew nakasabut te Kasulatan wey te geem te Manama.
³⁰ Te aldew ne eg-uyahen e ka me minatey, kenad egmaas-asawey ka me etew tenged su egpekeiling e sikandan te me panalihan diye te langit.
³¹ Na, meytenged te pegkeuyag te me minatey, ware kew bes nakasabut te imbasu niyu ne ingkahi te Manama due te kaniyu ne miggenendue,
³² 'Sikeddiey ka Manama ni Abraham, ka Manama ni Isaak, wey ka Manama ni Hakub?' Iyan igapasabut kayi ne kene ne Manama sikandin te me minatey, ke kene, Manama te neneuyag."

³³ Te pegkarineg dutu te masulug ne etew, neinu-inu sikandan te pegpanulu din.

Kasuhu ne labew te langun
 (Mar. 12:28-34; Luk. 10:25-28)

³⁴ Piru te pegkarineg dutu te me Parisiyu ne natalu ni Hisus te katarengan ka me Sadusiyu, migmarumeey e sikandan peendiye ki Hisus.
³⁵ Due sabeka diye te kandan

ne ebugadu ne mig-eleg-eleg ki Hisus pinaahi te peg-inse.³⁶ “Talagpanulu, hendei ka labew ne suhu due te Balaud?”

³⁷ Ne migtabak si Hisus, “Keilangan ne eggeyinawaan nu ka Magbebabe ne Manama nu ne egpuun te pusung nu, egpuun te gimukud nu, wey egpuun te suman-suman nu.”³⁸ Sika ka ananayan wey amana ne labew ne suhu.³⁹ Ne ka igkarangeb ne suhu egpekeiling ded te nekewun-a: ‘Geyinawei nu ka duma nu iling te peggeyinawa nu te pegkeetew nu.’⁴⁰ Ka intiru ne Balaud te Manama wey ka insulat te me prupita nalagkes e kayi te daruwa ne suhu.”

Ka inse meyitenged te Kristu
(Mar. 12:35-37; Luk. 20:41-44)

⁴¹ Te nalibulung pad ka me Parisiyu, mig-insaan sikandan ni Hisus,⁴² “Nekey-a ka suman-suman niyu meyitenged te Kristu? Hentew ne kabuhalan sikandin?”

Ne migtabak sikandan, “Kabuhalan ni Dabid.”

⁴³ Ne migkahiyan ni Hisus sikandan, “Ke iling ma rue, mania te mig-umew si Dabid kandin te ‘Magbebabe’ pinaahi te bulig te Panisangan te Manama? Su migkahi si Dabid,

⁴⁴ ‘Ka Manama migkahi diye te Magbebabe ku:

Pinnuu ka kayi te igkakawanan*
ku,
taman te eggimuwen ku ne
diekanan nu ka me
kuntere nu.’

⁴⁵ Purisu ke ingngaranan ni Dabid sikandin ne ‘Magbebabe’, egmenuwen naa te Kristu ne egkeyimu ne kabuhalan ni Dabid?”

⁴⁶ Ne ware sabeka ne nakatabak ki Hisus, ne puun te seeye ne aldew, warad e egpaalag-alag ne eg-inse-inse kandin.

23

Ka pegpaney-paney ni Hisus meyitenged te me pangulu te me Hudiyu
(Mar. 12:38-39; Luk. 11:43, 46; 20:45-46)

¹ Nataman, migkahiyan ni Hisus ka masulug ne etew wey ka me hibateen din,² “Ka me talagpanulu te Balaud te Manama wey ka me Parisiyu ka imbehayan te katenged ne talagluwas te Balaud te Manama ne impabayte ki Muwisis.”³ Sikan naa, keilangan ne egtumanen niyu wey eggimuwen ka langun ne igpanulu dan kaniyu. Piru kene niyu himuwa ka eggimuwen dan su kene dan eggimuwen ke nekey ka impanulu dan.⁴ Migbebakes sikandan te mabbehat ne dinulan wey impatiang dan te me etew, piru sikandan mismu egkamataan de wey kenad iya

22:37 Duy 6:5. 22:39 Lib 19:18.

22:40 Luk 10:25-28. 22:44 Sal

110:1. * 22:44 Sumale te tuluuwen te me Hudiyu, ka talahuren de ne etew ka egpakapinnuu diye te igkakawanan te mabantug ne etew. 23:5 Mat 6:1; Duy 6:8; Num 15:38.

egbulig ne egtiang te dinulan.
 5 Innimu ran ka langun eyew egparayan-dayan te me etew. Imparakelan dan ka me tahuunan dan te me sinulat ne me birsikulu ne imbagkes dan te me buked wey me belad dan, wey impamalayat dan ka me sidsid te me kumbale dan.
 6 Egkeupian sikandan ne egpinnuu diye te pinnuwan te me talahuren ne diye te sahakeenan wey diye te mateles ne me pinnuwan diye te me simbaan te me Hudiyu.
 7 Ne egkeupian sikandan ne egtahuren te me etew diye te me palingkiyan wey egngararan te 'Talagpanulu.'
 8 Piru kene kew pangaran te 'Talagpanulu,' su sabeka re ka talagpanulu niyu wey tagtahasuled kew re langun.
 9 Ne kene kew ngaran te minsan hentew kayi te ampew te tane te 'Amey,' su sabeka re ka Amey niyu ne iyan ka diye te langit.
 10 Ne kene kew man-e pangaran te 'Ahalen,' su sabeka re ka ahalen niyu ne iyan sika ka Kristu.
 11 Ka iyan mabantug diye te kaniyu, keilangan ne egkeyimu ne suluhuanen te duma.
 12 Ka minsan hentew ne egparibabew te pegkeetew rin, igpariralem, piru minsan

hentew ne egpariralem te pegkeetew rin, igparibabew.

Indew-ey ni Hisus ka egmapitew-pitew
(Mar. 12:40; Luk. 11:39-42, 52; 20:47)

13-14 "Mekeyid-u-hid-u kew se me talagpanulu te Balaud te Manama wey sikaniyu se me Parisiyu! Sikaniyu se egmapitew-pitew re! Ware niyu paselera ka me etew diye te Migharian te Manama. Ne sikaniyu mismu kene egseled wey imbalahan niyu seeye se eg-eleg-eleg ne egseled.*

15 "Mekeyid-u-hid-u kew se me talagpanulu te Balaud te Manama wey sikaniyu se me Parisiyu! Sikaniyu se egmapitew-pitew re! Su inlapas niyu ka karag-dahatan wey inleug-leug niyu ka katantanaan eyew egpammitew te minsan sabeka re ne eggimuwen niyu ne hibateen. Ne emun ke egkeyimu e sikandin ne hibateen niyu, eggimuwen niyu sikandin ne subla pad kaniyu ne eleg egpekeendiye te linew ne hapuy.

16 "Mekeyid-u-hid-u kew se butud ne me talagkitkit ne migkahi, 'Ka minsan hentew ne egpahunlibet te timplu, ware karuan dutu.

23:11 Mat 20:26-27; Mar 9:35; 10:43-44; Luk 22:26.

23:12 Luk 14:11;

18:14. * **23:13-14** Due me sinulat ne miglagkes te birsikulu 14 piru ware seini diye te malehet ne migpuunan. Intimul naan de seini ne miggendue: Mekeyid-hid-u kew se me talagpanulu te Balaud te Manama wey me Parisiyu, sikaniyu se egmapitew-pitew re! Inlupihan niyu ka me balu wey impangahew niyu ka me kasangkapan dan minsan ka me baley ran, wey mallayat kew ne eg-ampu ka egpapitew-pitew re. Sikan naa ka subla pad ne masumpit ka legpad ne egkeumaan dan!

Piru ka minsan hentew ne epahunlibet te bulawan ne diye te timplu, keilangan ne egtumanen din seeye.¹⁷ Sikaniyu se egkengeungel ne me butud! Hendei ka labew, ka bulawan naa wey ke timplu ne iyan nakamatulus te bulawan?¹⁸ Migpanulu kew man-e te ka minsan hentew ne epahunlibet te altar, ware karuan dutu. Piru ka minsan hentew ne epahunlibet te dasag ne diye te altar, keilangan ne egtumanen din seeye.¹⁹ Sikaniyu se me butud! Hendei bes ka labew, ka dasag naa wey ke altar ne iyan nakamatulus te dasag?²⁰ Purisu seeye se epahunlibet te altar, iyan din epahunlibetan ka altar wey ka langun ne nakatahu dutu.²¹ Ne seeye se epahunlibet te timplu, iyan din degma epahunlibetan ka timplu wey ka Manama ne mig-ugpe dutu.²² Ne seeye se epahunlibet te langit, iyan din man-e epahunlibetan ka trunu te Manama wey ka migpinnuu dutu.

²³ “Mekeyid-u-hid-u kew se me talagpanulu te Balaud te Manama wey sikaniyu se me Parisiyu! Sikaniyu se egmapitew-pitew re! Migbehey kew te igkasapulu ne baad diye te Manama te me leggu niyu iling te hirbabuwina, anis, wey kaningag, piru ware niyu tumana ka amana ne impurtanti ne me panulu due

te Balaud. Su kene kew ne matareng, kene kew ne hiid-uwen diye te duma, wey kene kew egkasalihan. Keilangan ne egbehey kew te igkasapulu ne baad, piru kene niyu balahara ka duma ne panulu.²⁴ Sikaniyu se me butud ne talagkitkit, egsesala kew te ketiketi diye teeginumen niyu piru eg-abeleng kew te hendue karakel te kamilyu ne mananap!

²⁵ “Mekeyid-u-hid-u kew se me talagpanulu te Balaud te Manama wey sikaniyu se me Parisiyu! Sikaniyu se egmapitew-pitew re! Miglinisan niyu ka lawa te pakawan wey pinggan, piru malindit ka diye te seled. Iling kew naa degma rue su napenu te halamlam wey pegtuhes-tuhes.²⁶ Sikaniyu se me butud ne me Parisiyu! Hun-eyi niyu pa te eglinis ka seled te pakawan wey te pinggan niyu, eyew malinis degma ka diye te ligwang.

²⁷ “Mekeyid-u-hid-u kew se me talagpanulu te Balaud te Manama wey sikaniyu se me Parisiyu! Sikaniyu se egmapitew-pitew re! Eg-pekeiling kew te lebenganan ne imbatekan te maangkag wey meupiya ne egtengtenggan ka lihawangan. Piru ka diye te seled napenu bes te tul-an te me minatey wey te langun ne mallindit.²⁸ Ne sikan naa degma ka egkeilingan niyu su matareng ne egtengtenggan te me etew ka

ligwang niyu piru napenu te pegpapitew-pitew wey sale ka seled niyu.

Intagne ni Hisus ka iglegpad kandan

(Luk. 11:47-51)

²⁹ “Mekeyid-u-hid-u kew se me talagpanulu te Balaud te Manama wey sikaniyu se me Parisiyu! Sikaniyu se egmapitew-pitew re! In/ayayaran niyu te migpangimu ka sabalanan te me prupita wey indayrayanan niyu ka me limuanan te matareng ne me etew. ³⁰ Ne migkahi kew man-e, ‘Emun ke duen kid e perem te timpu te me kaap-apuan ta, ware ki red perem nakaamung-amung kandan te migpangimatey te me prupita.’ ³¹ Sikan naa, sikaniyu mismu ka migpamalehet ne sikaniyu iya ka me kabuhalan te seeye se migpangimatey te me prupita. ³² Na, impusi niyu ka imbunsuran e te me kaap-apuan niyu! ³³ Me uled, sikaniyu se me kabuhalan te me mammiley! Egmenuwen niyu te eghanalliya ka legpad diye te linew ne hapuy? ³⁴ Ne puun due, egpeuyanan ku sikaniyu te me prupita, me matagseb ne me etew, wey me talagpanulu te Balaud te Manama. Ne ka duma kandan egpangimatayan niyu wey iglansang te krus, ne ka duma egpanlampesan niyu diye te simbaan wey

egpanlupuhen niyu sikan-dan diye te nalein-lein ne me inged. ³⁵ Sikan naa ka egkarakeselan kew te legpad tenged te peggimatey te langun ne matareng ne me etew, puun pad ki Abil peendiye te anak ni Barakiyas ne si Sakariyas, ne innimatayan niyu diye te elat-elat te timplu wey te altar. ³⁶ Egnanganan ku sikaniyu te malehet: ka langun ne iglegpad due, egkaneem-neem iya te me etew te kuntee ne timpu.

Ka geyinawa ni Hisus te Hirusalim

(Luk. 13:34-35)

³⁷ “E sikaniyu se matig-Hirusalim ne migpangimatey te me prupita wey migpandepak te seeye se impeendue te kaniyu. Kamasalig ad e perem eglibulung kaniyu, iling te sabeka ne inayan ne migpangalup-kup te me piyak din, piru ware kew neupii. ³⁸ Na, eg-engkeran e eglahetengi ka siyudad[†] niyu. ³⁹ Su egnanganan ku sikaniyu, kene kew e egpakkita keddiey man-e taman te egkahi kew e, ‘Egdayanen sikandin se impeendini te Magbebaye ne Manama[‡] kanta.’”

24

Intagne ni Hisus ka pegkahuhus te timplu

(Mar. 13:1-2; Luk. 21:5-6)

^{23:33} Mat 3:7; 12:34; Luk 3:7. ^{23:35} Hin 4:8; 2Kru 24:20-21. ^{23:38} Hir 22:5.
[†] ^{23:38} Te Grigu: baley. ^{23:39} Sal 118:26. [‡] ^{23:39} Te Grigu: sikandin se eggendini te ngaran te Magbebaye ne Manama.

¹ Ne miglihawang e si Hisus te timplu wey te peggipanew rin e, migparani kandin ka me hibateen din wey impapitew ran kandin ka timplu. ² Piru migkahiyan ni Hisus sikandan, "Nakita niyu ma iya sika, menu ma? Piru egnangenanku sikaniyu te malehet: ware minsan sabeka ne batu keureme ne egkasame diye te neunturan din, egkahebe iya ka langun."

Ka me samuk wey me kalasayan

(Mar. 13:3-13; Luk. 21:7-19)

³ Taheed te migpinpinnuu si Hisus diye te Bubungan te Ulibu, migparani kandin ka me hibateen din ne sikandan de wey migkahi, "Nangeni key ke ken-u egkeyitabu seini, wey nekey-a ka palinneu te peglived nu wey te katammanan te timpu?"

⁴ Ne migtabak si Hisus, "Bantey kew ne kene kew egkeuyan te kene ne malehet ne talagpanulu. ⁵ Su masulug ka eggendini ne egpeila ne sikandan kun ka Kristu, wey masalig ka egkeuyan.

⁶ Egpakarineg kew te egmabunbunuey due te marani niyu, wey me guhuren meyitenged te egmabunbunuey diye te mariyu, piru kene kew kaaldek su keilangan ne egkeyitabu sika. Piru kene pad ne sika ka katammanan. ⁷ Egpakigkuntere ka sabeka ne nasud te lein ne nasud

wey egpakigkuntere ka sabeka ne tribu te lein ne tribu. Eggingga ka me bitil wey me linug diye te minsan hendei ne inged, ⁸ piru sika langun, bunsuranan pad te kasakitan iling te eglesutan ne egbaletikan.

⁹ "Ne egpandakepen kew eyew egbaybayaran wey eggimatayan. Egdu-mutan kew te langun ne me nasud tenged keddiey.

¹⁰ Egkataman, masalig ka egpaka-suwey, wey egmaak-akaley sikandan wey egmarum dumutey.

¹¹ Ne masulug ka eggingga ne kene ne malehet ne me prupita wey masalig ka egkalaag nikandan. ¹² Ne tenged su egsuble e ka kareet te me etew, kenad e egpaheyinaweeey ka masulug ne me etew. ¹³ Piru seeye se egpabulus eg-ikul keddiey taman te katammanan iyan egkaluwas.

¹⁴ Ne ka Meupiya ne Panugtulen meyitenged te Peghari te Manama, igwali te intiru ne kalibutan isip pegpamalehet diye te langun ne me nasud, ne egkataman, eggingga e ka katammanan.

Ka makaalat-halat ne talagderee

(Mar. 13:14-23; Luk. 21:20-24)

¹⁵ "Ke egkiteen niyud ka makaalat-halat ne 'talagderee' ne lilinditi diye te tangkaan te Manama' ne egkahiyan ni prupita Danyil ne diye egsasindeg te

matulus ne timplu (keilangan ne egsabuten sika te talagbasa),¹⁶ seeye se me etew ne diye te Hudiya, keilangan ne eg-aput diye te me bubungan.¹⁷ Ne seeye se etew ne diye te atep te baley rin, * keilangan ne kenad e egpamanueg eyew egkuwa te me kasangkapan din diye te seled.¹⁸ Ne seeye se diye te kamet, keilangan ne kenad e eg-uli eyew egkuwa te kumbale din.¹⁹ Mekeyid-uhid-u te seeye ne me timpu ka egkengaberes wey ka egmasusu pad te me anak dan.²⁰ Ne ampu kew ne kene ne tingmaagsil wey kene ne Aldew te Peggimeley ka pegpallahuy niyu.²¹ Su due eggingga ne makabayad-bayad ne peg-antus ne ware pad neyitabu puun te peg-gimu te kalibutan taman kuntee, wey kenad e seini egkeyitabu pad man-e.²² Ne emun ke ware pad hilepeti te Manama ka seeye ne timpu, egkahule iya egpamatey ka me etew. Piru tenged te me etew ne in-alam din, innilepetan din ka seeye ne timpu.

²³ “Ne emun ke due egkahi kaniyu, ‘Pitew kew, kayi ka Kristu!’ wey ke ‘Diye sikandin!’ kene kew en iya palintutuu.²⁴ Su eglepew ka kene ne malehet ne me Kristu wey ka kene ne malehet ne me prupita. Eggimu

sikandan te me derakel ne me palinneu wey me kein-inuwan eyew egkeuyan ka me etew, ke egkaayun, minsan seeye se in-alam te Manama.²⁵ Bantey kew su tapey kud e sikaniyu panpanayi.

²⁶ “Purisu, ke egkahiyan kew nikandan, ‘Pitawa niyu, diye sikandin te mammara ne inged ne kene egkeug-paan,’ kene kew hendiye. Ne emun ke egkahiyan kew nikandan, ‘Pitawa niyu, miggeles sikandin diye te sin-abeng,’ kene kew palintutuu kandan.²⁷ Su ka peglived te Anak te Etew egpekeiling te kilat ne miggeteb puun te igsile peendiye te iglineb.

²⁸ “Ke hendei ka lawa ne napatey, diye degma eglibulung ka me banug.

*Ka pegginguma te Anak te Etew
(Mar. 13:24-27; Luk. 21:25-28)*

²⁹ “Pegkapenga te me peg-antus te seeye ne me timpu, egmarusilem e ka aldew wey kenad e eglayag ka bulan, wey egkengeulug e ka me bituen puun te langit wey egkawelwel ka me tahu diye te langit.³⁰ Egkataman, eglepew e diye te langit ka palinneu te Anak te Etew, wey ka langun ne tribu te kalibutan egmanlungku. Ne egkakita ran e ka Anak te

24:17 Luk 17:31. * **24:17** Mapatag ka atep te me Hudiyu. **24:21** Dan 12:1; Imp 7:14. **24:26** Luk 17:23-24. **24:28** Luk 17:37. **24:29** Isa 13:10; Huwil 2:10,31; 3:15; Imp 6:12; Isa 13:10; Isi 32:7; Huwil 2:10; 3:15; Isa 34:4; Imp 6:13. **24:30** Dan 7:13; Sak 12:10-14; Imp 1:7.

Etew ne eglepew diye te gapun duma te geem din wey te dakel ne katelesan.³¹ Ne due dakel ne trumpita ne igparahing, ne igpeendiye din e ka me panalihan din diye te langun ne inged kayi te ampew te tane eyew te peglibulung te keet-etawan ne inalam din.

Ka katahaan puun te kayu ne iggira

(Mar. 13:28-31; Luk. 21:29-33)

³²“Na, sumsumana niyu ka kayu ne iggira wey himuwa niyu ne panunggilingan. Emun ke egtunasan e ka me sugpang din, sika ka palinneu ne mahaan e ka tingmeinit.³³ Iling naan ded degma due, emun ke egkiteen niyud e sika se langun ne ingkahi ku, egkatahaan niyud ne marani e sikandin, epalinggumaan e.³⁴ Egnanganan ku sikaniyu te malehet: egkatuman e sika langun[†] te kene pad egkengamatey ka me etew te kuntee ne timpu.³⁵ Egkaawe ka langit wey ka tane, piru ka keddi ne lalag, kene iya egkaawe.

Ware nataheyi ka aldew te peglibed din

(Mar. 13:32-37; Luk. 17:26-30, 34-36)

³⁶ “Piru ware minsan sabeka ne nakataha te aldew wey te uras ke ken-u seeye egkeyitabu, minsan ka me

panalihan diye te langit wey ka Anak, [‡] su iyan de nakataha ka Amey.³⁷ Su ka peglibed te Anak te Etew egpekeiling te neyitabu te timpu ni Nuwi.³⁸ Su te ware pad migsipuk ka weyig, migpabulus ka me etew ne nangekeen, nangiinum, wey migmaas-asaweey, taman te aldew te migseled e si Nuwi diye te arka.³⁹ Ware sikandan nakataha ke nekey ka egkeyitabu taman te migsipuk e ka weyig ne mig-anlas kandan langun. Ne iling naan ded degma kayi ka egkeyitabu te peglibed te Anak te Etew.⁴⁰ Emun ke due daruwa ne etew ne diye te kamet; eg-angayen ka sabeka wey eggaaaten ka dangeb.⁴¹ Emun ke due daruwa ne malitan ne eggehaling; eg-angayen ka sabeka wey eggaaaten ka dangeb.⁴² Purisu bantey kew, su ware kew nakaneng-neng ke ken-u eggingsuma ka Magbebaye niyu.⁴³ Ne tantanuri niyu seini: emun ke nakanengneng ka kamuney te baley ke nekey ne uras te marusilem eglepew ka takawen, egbantey iya sikandin eyew kene eg-pakaseled ka takawen te baley rin.⁴⁴ Purisu keilangan ne eg-andam kew degma, su eggingsuma ka Anak te Etew te timpu ne ware niyu pallatenga.

[†] 24:34 Iyan buwa igpasabut ni Hisus te ingkahi rin ne “sika langun” ka pegkahuhus te timplu (24:2-3a). [‡] 24:36 Kene ne langun ne me sinulat ne inlagkes ka Anak. 24:37 Hin 6:5-8. 24:39 Hin 7:6-24. 24:43 Luk 12:39-40.

Ka egkasalihan ne suluhanen wey ka kene egkasalihan

(Luk. 12:41-48)

⁴⁵ "Hentew-a ka suluhuanen ne egkasalihan wey matagseb? Panunggilingan, ke imbehayan ka suluhuanen te ahalen din te katenged te pegmandu te me dumarin ne me suluhuanen, eyew epakeen kandan te eleg ne timpu, ⁴⁶ meupiya sikandin ke nasapenan ne miggimu te peg-uli te ahalen din. ⁴⁷ Egnangenan ku sikaniyu te malehet: sikandin e ka egpeuyanan te ahalen din te langun ne karatuan din. ⁴⁸ Piru ke mareet ka suluhuanen, egsumansuman sikandin ne mananey pad eg-uli ka ahalen din ⁴⁹ wey dutu egbunsud e sikandin ka egpanlampes te me dumarin ne me suluhuanen, wey egpanaman-taman egkeen wey eg-iinum dumia te me talewubug. ⁵⁰ Ne eg-uli ka ahalen din te sabeka ne aldew ne ware din pallatenga, wey te uras ne ware din nanengnengi ⁵¹ wey egdusaan§ sikandin te ahalen din wey igpalemung diye te me etew ne egmapitew-pitew re. Ne diye egmandalawit ka me etew wey egmegkihat te ngipendan.

25

Ka panunggilingan meyitenged te sapulu ne mengebay

§ 24:51 Te Grigu: egtadtaren. 25:1 Luk 12:35.

¹ "Ka Peghari te Manama egpekeiling te pangguhuren meyitenged te sapulu ne mengebay ne mig-uyan te me sulu wey nangipanew ka egsinug-ung te egpangasawa. ² Egkengeungel ka lalimma ne mengebay wey me matagseb kalein ne lalimma ne mengebay. ³ Su ka egkengeungel, nanguyan te me sulu dan piru ware migtahahe te igtubil dan. ⁴ Piru ka me matagseb, nanguyan mule te me sulu wey te igtubil ran diye te tahuinan. ⁵ Ne puun su naangge ka egpangasawa, egtuytuyungen e sikandan wey nenakalipereng e.

⁶ "Hengkayi te egliware e te karusileman, due migbal-balukan ne migkah, 'Duen e ka egpangasawa. Apas kew wey temuwa niyu sikandin!' ⁷ Te sikan de, nangimate e ka me mengebay wey in-andam dan e ka me sulu dan. ⁸ Ne migkah seeye se egkengeungel diye te me matagseb ne me mengebay, 'Behayi key ubag nikaniyu te igtubil su egmangalap-halap naande ka me sulu ney.' ⁹ Piru migtabak ka me matagseb, 'Kema ke kenad e egkeelleg seini kanta. Hendiye kew pa te tindaan wey beli kew e te igtubil niyu.' ¹⁰ Taheed te nangipanew e ka egmambebeli, miggungume e ka egpangasawa. Ne seeye se nenakaandam, migdume e kandin diye te

sahakeenanan, ne inlekeban e ka gumawan.

¹¹ “Te ware de nalingen-
gen, nangingume e degma
ka duma ne me menge-
bay wey migbalbalukan
sikandin ka migkahi,
'Ahalen! Ahalen! Lukati key
nikeykew!' ¹² Piru migtabak
sikandin, 'Egnanganan ku
sikaniyu te malehet: wara a
nekeila kaniyu.'

¹³ “Purisu bantey kew su
ware niyu nataheyi ka aldew
wey ka uras te pgleibed ku.

*Ka panunggilingan
meyitenged te tatelu ne su-
luhanen*

(Luk. 19:11-27)

¹⁴ “Ka Peghari te Manama
egpekeiling man-e te pang-
guhuren meyitenged te etew
ne eggipanew te mariyu ne
inged. In-umew rin ka me
suluhuanen din wey insalig
din diye te kandan ka me
karatuan din. ¹⁵ Imbehayan
din ka tagse sabeka sumale
te katuenan dan. Ka sabeka
imbehayan dinte lalimma ne
libu (5,000) ne seleppi ne bu-
lawan, ka dangeb imbehayan
din te daruwa ne libu (2,000)
ne seleppi ne bulawan, ka
igkatedu imbehayan din te
senge libu (1,000) ne seleppi
ne bulawan. Nataman,
miggipanew e sikandin. ¹⁶ Ka
suluhuanen ne nakarawat te
lalimma ne libu (5,000) ne
seleppi ne bulawan, due-rue
ne migbunsud sikandin ka
egpaanak te seleppi din, wey
mig-anak seeye te lalimma
ne libu (5,000). ¹⁷ Ne iling

ded degma ka dangeb ne
nakarawat te daruwa ne
libu (2,000) ne seleppi ne bu-
lawan, mig-anak ka seleppi
din te daruwa ne libu (2,000).

¹⁸ Piru ka nakarawat te
senge libu (1,000) ne seleppi
ne bulawan, miggipanew
sikandin wey migkekali te
tane ne inlebengan din te
seleppi te ahalen din.

¹⁹ “Te naluhay e ne timpu,
mig-uli e ka ahalen eyew
egbalansian ka me suluhuan-
nen din. ²⁰ Ne migparani
seeye se suluhuanen ne
insalihan te lalimma ne
libu (5,000) ne seleppi ne
bulawan wey mig-uyan pad
sikandin te lein ne lalimma
ne libu wey migkahi, 'Ahalen,
imbehayan a nikeykew te
lalimma ne libu ne seleppi
ne bulawan. Na, tengtengi
nu, seini red ka anak ne
lalimma ne libu.' ²¹ Ne
migkahiyan sikandin te
ahalen din, 'Meupiya ka
innimu nu. Meupiya ka
wey egkasalihan ka; tenged
su egkasalihan ka te deisek
ne seleppi, egsalihan ku
sikeykew te dakel pad. Seled
ka wey sawit ka te kahale te
ahalen nu!' ²² Ne migparani
degma seeye se suluhuanen
ne insalihan te daruwa ne
libu (2,000) ne seleppi ne bu-
lawan wey migkahi, 'Ahalen,
imbehayan a nikeykew te
daruwa ne libu ne seleppi ne
bulawan. Na, tengtengi nu,
seini red ka anak ne daruwa
ne libu.' ²³ Migkahiyan
sikandin te ahalen din,
'Meupiya ka innimu nu.

Meupiya ka wey egkasalihan ka; tenged su egkasalihan ka te deisek ne seleppi, egsalihan ku sikeykew te dakel pad. Seled ka wey sawit ka te kahale te ahalen nu! ²⁴ Nataman, migparani e degma ka suluhuanen ne insalihan te senge libu (1,000) ne seleppi ne bulawan wey migkahi, ‘Ahalen, nakanengneng a ne mabulut ka, egganni ka te ware nu ibubul wey egpanlimud ka te ware nu isawed. ²⁵ Purisu naaldek a wey inlebeng ku te tane ka seleppi nu. Na, tengtengi nu, seini red ka seleppi nu.’ ²⁶ Piru migkahi ka ahalen din, ‘Sikeykew se mareet wey pehulen ne suluhuanen! Nakanengneng ke bes te egganni a te ware ku ibubul wey egpanlimud a te ware ku isawed; ²⁷ ne mania te ware nu itahu diye te bangku ka seleppi ku eyew te peg-uli ku egkaangey ku red seini duma te anak kayi? ²⁸ Na, kua niyu ka seleppi due te kandin wey ibehey niyu diye te nakaseleppi te sapulu ne libu (10,000) ne seleppi ne bulawan. ²⁹ Su seeye se due kandin, egtimulan pad eyew egmasalig ka kandin. Piru seeye se ware kandin, eg-angayen minsan ka deisek ubag ne in-isip din ne kandin perem. ³⁰ Ne seini se ware gulehud ne suluhuanen, iregpak niyu diye te lihawangan ne marusilem. Ne diye, egpandalawit sikandin wey

egpegkihet te ngipen din.’

Ka katammanan ne peggukum

³¹ “Emun ke eggingsume e ka Anak te Etew duma te geem wey katelesan din wey egdumaan te langun ne me panalihan, egpinnuu e sikandin diye te amana ne mateles ne trunu rin. ³² Ne eglibulungen diye te tangkaan din ka me etew te langun ne me nasud. Egkataman, egbaaren din sikandan te daruwa ne baad, iling te eggimuwen te talagtameng ne egpegsuwey te karniru wey te kambing. ³³ Ne diye din igtahu te igkakawanan din ka me karniru, piru ka me kambing diye din igtahu te igkahibang din. ³⁴ Egkataman, sikeddi se Hari, egkahiyan ku ka diye te igkakawanan, ‘Hendini kew sikaniyu se impanalanginan te Amey ku wey ugpe kew te Migharian ne intahahe kaniyu puun pad te peggimu te kalibutan. ³⁵ Su timpu ne miggutasan a, impakeen a nikaniyu, te timpu ne nammaraan a, impeinum a nikaniyu, te timpu ne miglapu a, insagsahipa a nikaniyu. ³⁶ Te timpu ne ware kukumbaleen ku, impakumbalaan a nikaniyu, te timpu ne migderalu a, intanggu a nikaniyu, te timpu ne naprisu a, inleuy a nikaniyu.’ ³⁷ Ne eg-inse

seeye se me matareng, ‘Magbebabe, ken-u ney-a nakita sikeykew ne miggutasan wey impakeen ney, ne nammaraan ka ne impeinum ney? ³⁸ Ken-u ney-a nakita sikeykew ne miglapu wey insagsahipe ney sikeykew, wey ware kukumbaleen nu ne impakumbalaan ney sikeykew? ³⁹ Ken-u ney-a nakita sikeykew ne migderalu wey ke naprisu ne inleuy ney?’ ⁴⁰ Ne egtabak a se Hari, ‘Egnangenan ku sikaniyu te malehet: ka minsan nekey ne innimu niyu diye te kene ne impurtanti ne me suled ku, innimu niyud e sika kayi te keddiey.’

⁴¹ “Ne egkataman, egkahiyian kud e seeye se me etew ne diye te igkahibang, ‘Awe kew rue, sikaniyu se indilus te Manama wey diye kew te hapuy ne ware egtamanan ne in-andam din te ahalen te me busew duma te me panalihan din. ⁴² Su timpu ne miggutasan a, wara a nikaniyu pakeena; te timpu ne nammaraan a, wara a nikaniyu peinuma. ⁴³ Te timpu ne miglapu a, wara a nikaniyu palasura te baley niyu, te timpu ne ware kukumbaleen ku, wara a nikaniyu pakumbalei, te timpu ne migderalu a wey naprisu, wara a nikaniyu leuya.’ ⁴⁴ Ne eg-inse degma sikandan, ‘Magbebabe, ken-u ney-a nakita sikeykew ne miggutasan wey ke nam-

maraan, wey miglapu, wey ware kukumbaleen, wey migderalu, wey naprisu, ne ware ney bulihi sikeykew?’ ⁴⁵ Ne egtabak sikandin, ‘Egnangenan ku sikaniyu te malehet: ka minsan nekey ne ware niyu himuwa diye te kene ne impurtanti ne me suled ku, ware niyu himuwa sika kayi te keddiey.’ ⁴⁶ Egkataman, igpeendiyad e sikandan te dusaanan ne ware egtamanan, piru ka me matareng egbehayan te umul ne ware egtamanan.”

26

Ka planu te peggimatey ki Hisus

(Mar. 14:1-2; Luk. 22:1-2; Huw. 11:45-53)

¹ Te nakapenge e si Hisus ka miglag te langun ne eglalahan din, migkahiydin e ka me hibateen din,

² “Nakanengneng kew e ne ikaruwa naan de ka katumanan te Sahakeen te Peglihad te Panalihan, ne ka Anak te Etew igbehey e diye te me etew eyew iglansang te krus.”

³ Nataman, miglibulung e ka me pangulu te me talagpanubad wey ka me igbuyag te me Hudiyu diye te palasyu ni Kaypas ne Labew ne Talagpanubad,

⁴ wey migplanu sikandan ke egmenuwen ne egkarakep dan si Hisus te heles de eyew egkeyimatayan. ⁵ Piru migkahi sikandan, “Kene ta eggimuwen seini te timpu

te Sahakeen, su kema ke egkasamuk ka me etew."

Mig-itisan si Hisus te peemut

(Mar. 14:3-9; Huw. 12:1-8)

⁶ Te seeye ne timpu, diye ensi Hisus te Bitanya te baley ni Simun ne ibungen.

⁷ Te sasangan ne egkeen si Hisus, due malitan ne migparani kandin ne miguyan te mahal ne peemut ne diye itahu te alabastru, wey mig-itisan din ka ulu ni Hisus. ⁸ Te pegkakita dutu te me hibateen din, nabelu sikandan wey migkahi, "Mania te migde-deetan sika? ⁹ Igbelegye perem sika se peemut te dakel ne kentiddad wey igpamehey diye te egkengaayu-ayu ka halin!"

¹⁰ Piru nanengnengan seeye ni Hisus wey migkahiyan din e sikandan, "Mania te egbanggawen niyu sikandin? Amana ne meupiya ka innimu rin kayi te keddiey. ¹¹ Su ka egkengaayu-ayu, layun niyu mule egkaruma, piru sikeddi, kena a nikaniyu layun egkaruma. ¹² In-itisan din te peemut ka lawa ku eyew te peg-andam te pegasbal keddiey. ¹³ Egnangenan ku sikaniyu te malehet: minsan hendei igwali ka Meupiya ne Panugtulen kayi te intiru ne kalibutan, egkahuhud degma ka innimu rin kayi te keddiey eyew egkasuman-suman sikandin."

*Ka pegpakigsabut ni Hudas te peg-akal ki Hisus
(Mar. 14:10-11; Luk. 22:3-6)*

¹⁴ Nataman, miggendiye te me pangulu te me talagpanubad si Hudas Iskaryuti ne sabeka te sapulu wey daruwa (12) ne hibateen ¹⁵ wey migkahi, "Pila ka igbayad niyu keddi ke igbehey ku si Hisus kaniyu?" Ne migbehayan dan e si Hudas te seleppi ne tatelu ne pulu (30) ne timman. ¹⁶ Ne puun dutu, migpammitew e sikandin te meupiya ne timpu ne igkabehey rin si Hisus diye te kandan.

*Ka peg-andam te me hibateen ni Hisus te iglabung
(Mar. 14:12-21; Luk. 22:7-13, 21-23; Huw. 13:21-30)*

¹⁷ Te an-anayan ne aldew te Sahakeen te Paan ne Ware Patulin, migparani ki Hisus ka me hibateen din wey miginse, "Hendei nu igkeupii ne eg-andamen ney ka egkeenen ta te Peglihad te Panalihan?"

¹⁸ Ne migtabak sikandin, "Hendiye kew te siyudad, diye te sabeka ne etew wey kahii niyu sikandin, 'Migkahi ka Talagpanulu te mahaan e ka timpu ku, ne duen a te keykew egsahakeen duma te me hibateen ku te Peglihad te Panalihan.' "

¹⁹ Ne innimu te me hibateen ni Hisus ka insuhu din kandan wey in-andam dan

e ka egkeenen para te Sahakeen te Peglihad te Panalihan.

²⁰ Hengkayi te nasagkup e, migpinnuu e si Hisus duma te sapulu wey daruwa (12) ne hibateen din eyew egkeen e. ²¹ Te sasangan e sikandan ne egmangekeen, migkahi si Hisus, "Egnanganan ku sikaniyu te malehet: due sabeka kaniyu ne eg-akal keddiey."

²² Ne amana sikandan nalaggew wey migpasubsubaley re ka mig-inse, "Magbebkiye, kema ke sikeddi ka egkahiyan nu?"

²³ Ne migtabak si Hisus, "Sabeka kaniyu te migsamul keddidi migdallut te paan te seini ne yahung ka eg-akal keddiey. ²⁴ Egpatey ka Anak te Etew sumale te nasulat te Kasulatan, piru mekeyidu-hid-u ka etew ne eg-akal kandin. Meupiya pad ke ware sikandin neetew."

²⁵ Ne mig-inse si Hudas ka eg-eakal kandin, "Talagpanulu, kema ke sikeddi ka egkahiyan nu?"

Migtabak si Hisus, "Inlalag nud en iya."

Ka peglabung enni Hisus

(Mar. 14:22-26; Luk. 22:14-20; 1 Kur. 11:23-25)

²⁶ Te sasangan pad sikan dan ne egmangekeen, migkuwa si Hisus te paan wey impasalamatan din ka Manama, wey impanepik-tepik din seini wey impamehey rin diye te me hibatee

din te migkahi, "Kuwa kew kayi wey keena niyu. Seini ka lawa ku."

²⁷ Nataman, migkuwe e man-e sikandin te senge ubab ne binu, ne impasalamatan din ka Manama wey intaruwey rin diye te kandan te migkahi, "Inum kew langun kayi,²⁸ su seini ka langesa ku ne igpatihis eyew egkapasaylu ka sale te masulug ne me etew. Seini ka egpamalehet te kasabutan te Manama diye te keetetawan din. ²⁹ Egnanganan ku sikaniyu, kena ad e egabey eg-inum te seini ne inumen ne egpuun te paras taman te aldew ne eg-inum ad e te iyam ne inumen duma kaniyu diye te Migharian te Amey ku."

³⁰ Nataman, nangulahing e sikandan te pegdayan te Manama wey nangendiyad e te Bubungan te Ulibu.

Ka pegtagne ni Hisus ne igpahunware din ni Pidru

(Mar. 14:27-31; Luk. 22:31-34; Huw. 13:36-38)

³¹ Nataman, migkahi e si Hisus diye te kandan, "Te seini ne karusileman, engkedi kew e langun keddiey su nasulat diye te Kasulatan, 'Eggimatayan ku ka talagtameng te me karniru, wey egmemekgsuwey-suwey e ka me karniru.'³² Piru te pegkapenga te peg-uyag kedi, egguna-a ad e kaniyu diye te Galiliya."

³³ Ne migkahiyan ni Pidru si Hisus, "Minsan pad ke engkeran ka te langun, kena ad iya eg-engked keykew."

³⁴ Ne migkahiyan ni Hisus si Pidru, "Egnanganan ku sikeykew te malehet: te kene pad eg-ukale ka manuk te seini ne karusileman, katatelu ad nikeykew ig-pahunware."

³⁵ Ne migkahiyan ni Pidru sikandin, "Minsan pad eggi-matayan a duma keykew, kene ku iya igpahunware sikeykew." Ne iling ded degma ka ingkahi te langun ne me hibateen.

Mig-ampu si Hisus diye te Gitsimani
(Mar. 14:32-42; Luk. 22:39-46)

³⁶ Nataman, nangendiyad e ensi Hisus te inged ne egngararanan te Gitsimani wey migkahiyan din ka me hibateen din, "Kayi kew pa paminnuu taheed te eg-ampu e pad seeye te kewunaan." ³⁷ Ne induma rin si Pidru wey ka talaari ne anak ni Sibidiyu, ne dutu nakaheram sikandin te subla ne pegkalaggew wey migmemasakit se geyinawa rin. ³⁸ Ne migkahiyan ni Hisus sikandan, "Amana ne sesakiti ka geyinawa ku ne hendue te egkapatey ad e. Kayi kew naan pa wey kene ki eglichereng."

³⁹ Ne migpabulus si Hisus diye te kewun-aan wey mig-usengul diye te tane wey mig-ampu ne migkahi, "Ame, ke

egkaayun diye te keykew, angaya nu seini se ubab te pegantus kayi te keddiey, piru kene ne iyan egkatuman ka keddiey ne pegbuut, ke kene, ka keykew ne pegbuut."

⁴⁰ Nataman, miglibed e si Hisus diye te me hibateen din wey neumaan din sikandan ne nenewulep e. Ne migkahiyan din e si Pidru, "Etuwey, kene kew egpakaantus ne kene eglichereng duma keddi minsan senge uras de?

⁴¹ Kene kew lipereng wey ampu kew eyew kene kew egkatintal. Egkeupian perem ka panisingan piru mahuye ka lawa niyu."

⁴² Ne mig-abey e man-e miggendiye te kewun-aan si Hisus wey mig-ampu ne migkahi, "Ame, emun ke keilangan iya ne eg-inumen ku ka seini ne ubab te pegantus, egkatuman iya ka igkeupii nu." ⁴³ Te peglibed man-e ni Hisus, neumaan din ded man-e sikandan ne nenewulep su egmemakaliplichereng en iya sikandan.

⁴⁴ Purisu, mig-engkeran din e man-e sikandan wey mig-ampu. Igkatatelu rin e seini te peg-ampu wey iling ded ka in-ampu din.

⁴⁵ Nataman, miglibed e man-e sikandin diye te me hibateen din wey migkahi, "Ew, nenewulep kew bes pad wey nangimeley? Pitawa niyu! Seinid e ka timpu ne igbehey e ka Anak te Etew diye te me makasesale." ⁴⁶ Bukal-bukal kew e su egmangipanew kid.

Pitawa niyu, sikan e ka egakal keddiey!"

*Ka pegdakep ki Hisus
(Mar. 14:43-50; Luk. 22:47-
53; Huw. 18:3-12)*

⁴⁷ Te sasangan pad ne eglalag si Hisus, miggungume e si Hudas ka sabeka te sapulu wey daruwa (12) ne hibateen din. Due susuluhi ne etew ka migduma kandin ne nanguyan te me kampilan wey me lampes. Insuhu sikandan te me pangulu te me talagpanubad wey ighbuyag te me Hudiyu. ⁴⁸ Ne seeye se talag-eakal migbehey kandan te palinneu ne migkahi, "Ka etew ne eggarekan ku, sikan naa dakepa niyu."

⁴⁹ Te pegginguma ni Hudas, migleus e sikandin diye te ki Hisus wey migkahi, "Talagpanulu, meupiya red." Ne miggarekan din e sikandin.

⁵⁰ Ne migkahiyan sikandin ni Hisus, "Ne alukuy, himuwa nu ke nekey ka innendini nu."

Nataman, migparani e ka me etew diye te ki Hisus wey inderakep dan e sikandin wey impakamkamelan dan te eggen-gen. ⁵¹ Ne due sabeka ne duma ni Hisus ne miggulabut te kampilan din wey intibbas din ka uripen te Labew ne Talagpanubad, ne natamped e ka talinga te uripen. ⁵² Piru migkahiyan ni Hisus ka hibateen din, "Ilipi nu ka kampilan nu su ka langun ne egtangkayang te kampilan, egkamatey red

degma pinaahi te kampilan. ⁵³ Ware ke bes nakanengneng ne egkaayun ne egpepangabang a te Amey ku wey due-rue ne egpeuyanan a nikandin te libu-libu ne luyuran te me panalihan? ⁵⁴ Piru ke eggimuwen ku sika, kenad e egkatuman ka nasulat diye te Kasulatan ne keilangan ne egkeyitabu."

⁵⁵ Ne dutu, migkahiyan din ka masulug ne me etew, "Takawen a? Mania te nanguyan kew te me kampilan wey me lampes ka egdakep keddiey? Tagse aldew ne egpinnuu a diye te timplu ka egpanulu kaniyu, ne wara a derakepa nikaniyu. ⁵⁶ Piru neyitabu seini se langun eyew egkatuman ka insulat te me prupita diye te Kasulatan." Ne in-engkeran e sikandin te me hibateen din wey namallahuy e sikandan langun.

*Ka peg-inse-inse ki Hisus te
me Talaggukum te me Hudiyu
(Mar. 14:53-65; Luk. 22:54-
55, 63-71; Huw. 18:13-14, 19-
24)*

⁵⁷ Nataman, in-uyan e si Hisus te me etew ne migdakep kandin diye ki Kaypas, ka Labew ne Talagpanubad. Diye nanlibulung ka me talagpanulu te Balaud te Manama wey ka me ighbuyag te me Hudiyu. ⁵⁸ Ne migsinundul si Pidru kandin ne migpadpariyu de, taman te lama te Labew ne Talagpanubad. Nataman, migseled e sikandin diye wey

migpinnuu duma te me talagbantey su eyew egtengteng ke nekey ka egpangkusan.
 59 Ne migpammitew te ubat ne me guhuren meyitenged ki Hisus seeye se me pangulu te me talagpanubad wey ka sakup te me Talaggukum te me Hudiyu eyew epeyimatayan dan sikandin.
 60 Piru ware nakita ran, minsan masulug ka miguubat ne me talagpamalehet. Te katammanan, due daruwa ne etew ne migpamalehet
 61 ne migkahi, "Narineg ney ka seini ne etew ne migkahi, 'Egguhusen ku ka timplu te Manama wey igbalew-balew ku seini igapasasindeg seled te tatelu re ne aldew.'"

62 Ne migsasindeg ka Labew ne Talagpanubad wey mig-inse ki Hisus, "Na, ware igkatabak nu te me sumbung meyitenged keykew?"
 63 Piru migpeeneng-eneng de iya si Hisus. Ne migkahi e man-e ka Labew ne Talagpanubad diye te kandin, "Egpepahunlibeten ku sikeykew te ngaran te manekal ne Manama ne egnanganan key nikeykew ke sikeykew iya ka Kristu, ka Anak te Manama."

64 Ne migtabak si Hisus, "Inlalag nud en iya. Piru egnanganan ku sikaniyu te puun kuntee egkiteen niyu ka Anak te Etew ne egpinnuu diye te igkakawanan* te Maresen ne Manama. Ne egginguma sikandin ne egdu-

maan te me gapun diye te langit."

65 Te sikan de, inggisi e te Labew ne Talagpanubad ka kumbale din te migkahi, "Imbaley-baley rin e ka Manama! Ne mania te egkeilangan ki pad ne egkuwa te me talagpamalehet te narinieg niyud ma ka pegbaley-baley rin? 66 Na, nekey te suman-suman niyu?"

Ne migtabak sikandan, "Eleg sikandin ne eggimatayan!"

67 Nataman, in-iileban dan e ka ulaula rin, wey impandabi ran e wey impanagpi sikandin te duma
 68 te migkahi, "Ne la Kristu, antuki nu ke hentew-a ka migpasakit keykew!"

Ka peggahunware ni Pidru meyitenged ki Hisus

(Mar. 14:66-72; Luk. 22:56-62; Huw. 18:15-18, 25-27)

69 Nekey naa te diye migpinnuu si Pidru te lama. Ne due malitan ne suluhuanen te Labew te Talagpanubad ne migparani kandin wey migkahi, "Hey, hendue mule te duma ka ni Hisus ne matig-Galiliya?"

70 Piru migpahunware si Pidru diye te tangkaan te langun ne etew ne migkahi, "Wara a nakataha ke nekey ka impanlalag nu."

71 Nataman, miggendiyad e sikandin te kasunguwan te alad wey duen e man-e lein ne suluhuanen ne malitan

* 26:61 Huw 2:19. 26:64 Dan 7:13. ka talahuren de ne etew ka egpakinnuu diye te igkakawanan te mabantug ne etew.

26:64 Sumale te tuluuwen te me Hudiyu, ka talahuren de ne etew ka egpakinnuu diye te igkakawanan te mabantug ne etew.

26:65 Lib 24:16. 26:67 Isa 50:6.

ne nakakita kandin, wey migkahi diye te me etew, "Hey, ka seini ne etew duma ni Hisus ne matig-Nasarit."

⁷² Ne migpahunware ded man-e si Pidru ne migkahi, "Hibet iya, wara a nekeila te sika ne etew!"

⁷³ Te ware de naluhey, migparani diye te ki Pidru seeye se nanasindeg diye wey migkahi, "Malehet iya ne duma ka nikandan su egkeilaan ka iya minsan te peglalag-lalag nu."

⁷⁴ Ne dutu, migpahunlibet en iya si Pidru ne migkahi, "Mengeyibet iya te pegkeetew ku, wara a iya nekeila te sika ne etew minsan pad egpatey a!" Ne due-rue ne mig-ukale ka manuk ⁷⁵ wey nasuman-suman ni Pidru ka inlalag ni Hisus kandin, "Te kene pad eg-ukale ka manuk, katatelu ad nikeykew igpahunware." Ne miglihawang e si Pidru wey migpanaman-taman migsinehew.

27

*Ka peg-uyan ki Hisus diye te ki Pilatu
(Mar. 15:1; Luk. 23:1-2;
Huw. 18:28-32)*

¹ Te pegkapawe e, migplanu e ka me pangulu te me talagpanubad wey ka me igbuyag te me Hudiyu ke egmenuwen dan ne egkeyimatayan si Hisus. ² Ne imbebaku dan e si Hisus wey in-uyan dan e diye te

ki Gubirnadur Pilatu, wey imbehey ran e kandin.

*Ka pegpatey ni Hudas
(Him. 1:18-19)*

³ Te pegkakita ni Hudas ne talag-eakal ne innukuman dan e ne egpeyimatayan si Hisus, nekegsendit e sikandin wey in-uli din e ka seleppi ne tatelu ne pulu (30) ne timman diye te me pangulu te me talagpanubad wey diye te me igbuyag te me Hudiyu. ⁴ Migkahi sikandin, "Nakasala a te peg-akal ku te etew ne ware sale."

Ne migtabak sikandan, "Nekey naa ka labet ney due? Prublima nud e sika!"

⁵ Ne insabulak e ni Hudas ka seleppi diye te timplu wey mig-awe sikandin. Nataman, miggipanew e ka mig-ehet-ehet ne migbibitin.

⁶ Impamurut te me pangulu te me talagpanubad ka seleppi te migkahi, "Ka seini ne seleppi, bayad te umul te etew, wey supak te balaud ta ke igtahu ta seini te tahuinan te seleppi kayi te timplu."

⁷ Purisu nekegsabut sikandan ne igbeli ran ka seleppi te kamet te talaggimu te kuren eyew eggimuwen ne lebenganan te me mahaliyug. ⁸ Sikan naa, minsan kuntee migngaranan e seeye te, "Ka Tane ne Imbayaran te Langesa."

⁹ Purisu natuman e ka inkahni prupita Hirimiyas, "Ingkuwa ran e ka seleppi ne

tatelu ne pulu (30) ne timman, ka kentiddad ne neuyunan te me kabuhalan ni Israil^{*} ne igbayad kandin.¹⁰ Ne inggamit dan e ka seleppi wey imbeli ran te kamet te tlaggimu te kuren, sumale te insuhu te Manama keddiey."

Ka peg-inse-inse ni Pilatu ki Hisus

(Mar. 15:2-5; Luk. 23:3-5; Huw. 18:33-38)

¹¹ Ne si Hisus diyat e te tangkaan ni Gubirnadur Pilatu, wey mig-insaan e sikandin ni Pilatu te migkahi, "Sikeykew iya ka Hari te me Hudiyu?"

Migtabak si Hisus, "Ingkahi nud en iya."¹² Piru ware din tabaka ka imbebayung kandin te me pangulu te me talagpanubad wey te me igbuyag te me Hudiyu.

¹³ Purisu migkahiyan sikandin ni Pilatu, "Ware nu narineg ka masalig ne imbebayung dan keykew?"

¹⁴ Piru warad iya minsan sabeka te imbebayung dan ne intabak ni Hisus, purisu amana ne neinu-inu ka Gubirnadur.

Ka peg-uuyun te kamatayen ni Hisus

(Mar. 15:6-15; Luk. 23:13-25; Huw. 18:39-19:16)

¹⁵ Nabatasan e ni Pilatu ne tagse Sahakeen te Peglihad te Panalihan, due eglekaan din ne pinirisu ne igkeupii te keet-etawan.¹⁶ Te seeye ne timpu, due sabeka ne mabantug ne

pinirisu ne egngaranan ki Barabas.[†] ¹⁷ Te nalibulung e ka masulug ne me etew, mig-insaan e sikandan ni Pilatu, "Hentew-a ka igkeupii niyu ne eglekaan ku? Si Barabas naa wey ke si Hisus ne egngaranan te Kristu?"

¹⁸ Su nakanengneng si Pilatu ne neimma re sikandan ki Hisus, sikan naa indakep dan e si Hisus wey imbehey e diye te kandin.

¹⁹ Taheed te migpinnuu si Pilatu diye te pinuuwan te eggukum, migpeuyanan sikandin te asawa rin te lalag ne migkahi, "Kene nu hilabeti sika se matareng ne etew, su amana a nabantali te taheinep ku gabii meyitenged kandin."

²⁰ Piru intipu te me pangulu te me talagpanubad wey te me igbuyag te me Hudiyu ka me etew ne si Barabas ka eghangyuen dan ne eglekaan, ne si Hisus ka egpeyimatayan. ²¹ Ne mig-abey e man-e mig-inse si Pilatu diye te me etew, "Hentew-a kayi te daruwa ka igkeupii niyu ne eglekaan ku?"

Migtabak sikandan, "Si Barabas!"

²² Ne mig-inse si Pilatu kandan, "Ke iling due, nekey-a ka eggimuwen ku ki Hisus ne egngaranan te Kristu?"

Migtabak sikandan langun ne migkahi, "Ilansang nu sikandin te krus!"

[†] 27:16 "Hisus Barabas" diye te duma ne Kasulatan.

²³ Ne mig-insaan sikandan ni Pilatu, "Mania, nekey bes ka neyimu rin ne mareet?"

Piru nanasnasian de iya sikandan ka migbalbalukan ne migkahi, "Ilansang nu sikandin te krus!"

²⁴ Te pegkakita ni Pilatu ne warad e egkeyimu rin piru nasi e mule egkasamuk ka me etew, migkuwe e sikandin te weyig wey migpanlu-lu sikandin diye te tangkaan te me etew ne migkahi, "Ware labet ku te kamatayen te seini ne etew! Balahad kew e rue!"

²⁵ Ne migtabak ka langun ne etew, "Sikanami ka egpanabak duma te me anak ney te kamatayen din."

²⁶ Nataman, impalekaan e ni Pilatu si Barabas, wey impalampesan din si Hisus wey imbehey rin diye te me sundalu eyew iglansang te krus.

Ka pegbaley-baley te me sundalu ki Hisus

(Mar. 15:16-20; Huw. 19:2-3)

²⁷ Nataman, in-uuyan e si Hisus te me sundalu diye te palasyu te gubirnadur, wey impalibulung dan e ka langun ne duma ran ne me sundalu. ²⁸ Inluungan dan sikandin wey insaluubar dan te kumbale ne malalab-lalab. ²⁹ Ne miggimu sikan-dan te kuruna ne duhi wey impakuruna ran e ki Hisus. Ne impatutuked dan e sikandin ne iyan impahengen ka kawanan ne belad din wey migpanimbuel sikandan

diye te tangkaan din ka egbaley-baley ne egkahi, "Egmabantug ka Hari te me Hudiyu!" ³⁰ Nataman, migileban dan e si Hisus wey ingkuwa ran ka tuked wey inlelampesan dan ka ulu rin. ³¹ Pegkapenga ran te egbaley-baley kandin, inluung dan e ka impasaluub dan wey inlibed dan ded ipasaluub ka tapey ne kumbale din. Nataman, in-uyan dan e sikandin diye te lihawangan eyew iglansang te krus.

Ka peglansang ki Hisus te krus

(Mar. 15:21-32; Luk. 23:26-43; Huw. 19:17-27)

³² Te peglihawang dan e, due nasinug-ung dan ne matig-Sirini ne egngaranan ki Simun, ne impepehes dan sikandin patianga te krus ni Hisus. ³³ Nataman, miggigunge e sikandan diye te inged ne egngaranan te Gulguta (Inged te Angkal ka igapasabut kayi), ³⁴ wey imbebehayan dan e si Hisus te eg-inumen ne binu ne insewuhan te mapeit, piru te naheraman din e seeye, ware din e inuma.

³⁵ Nataman, inlansang dan e si Hisus diye te krus, wey imbaad-baad dan e ka me kumbale din pinaahi te pegpintut-pintut. ³⁶ Pegkapenga dutu, naminnuu e sikandan wey intamengan dan e sikandin. ³⁷ Ne due intahu dan diye te ampew te ulu ni Hisus

ne keretula ne insulatan te sumbung meyitenged kandin ne migkahi, "Seini si Hisus ka Hari te me Hudiyu."

³⁸ Due daruwa ne takawen ne inlansang dan duma kandin. Ka sabeka diye te igkakawanan din wey ka dangeb diye te igkahibang din.

³⁹ Ne seeye se egmanlihad dutu, egmanlengey-lengey ka egbaley-baley ki Hisus ⁴⁰ ne egkahi, "Ew, sikeykew bes iya ka egguhus te timplu wey igbalew-balew red igpesek seled te tatelu re ne aldew! Ke sikeykew ka Anak te Manama, luwasa nu ka pegkeetew nu wey pamaneug ka due te krus."

⁴¹ Iling ded degma ka me pangulu te talagpanubad, me talagpanulu te Balaud te Manama, wey me ighbuyag te me Hudiyu ne migdaldi kandin ne miggenendue, ⁴² "Inluwas din ka duma, piru kene sikandin egpakaluwas te pegkeetew rin! Sikandin kun ma ka Hari te Israil! Ke egpakapamaneug sikandin kuntee te krus, egpalintutuu kid e wey egsalig kandin. ⁴³ Migsalig kun sikandin te Manama, ne iyan e balahad ka Manama ne egpangabang kandin ke igkeupii rin, su migkahi sikandin, 'Anak a te Manama.'

⁴⁴ Ne migdali-di ded degma ki Hisus ka me duma rin te inlansang te krus.

27:39 Sal 22:7; 109:25. **27:40** Mat 26:61; Huw 2:19. **27:43** Sal 22:8. [‡] **27:45** Te Grigu: meudtu, igkeen-em ne uras; alas tris te maapun, igkasiyam ne uras.

27:46 Sal 22:1. § **27:46** Te Grigu: igkasiyam (9) ne uras. **27:48** Sal 69:21.

27:51 Iks 26:31-33.

*Ka pegkapatey ni Hisus
(Mar. 15:33-41; Luk. 23:44-49; Huw. 19:28-30)*

⁴⁵ Te meudtu e, migmarusilem e ka intiru ne nasud taman te alas tris te maapun.[‡] ⁴⁶ Te alas tris e te maapun, § migpanguleyi e si Hisus te meemen ne miggenendue, "Ili, Ili, lima sabaktani?" Ke sikanta pa, "Manama, Manama, mania te in-engkeran a nikeykew?"

⁴⁷ Te pegkarineg te duma ne me etew ne nanasindeg dutu, migkahi sikandan, "Impangumew rin si Ilyas!" ⁴⁸ Ne due-rue ne migpallahuy ka sabeka kandan ne migangey te iling te kutsun ne in-eled din te maperes ne binu wey intagkes din diye te geed eyew igpasupsup ki Hisus.

⁴⁹ Piru migkahi ka duma, "Duen ke pa da, egpitawen ta ke eggendini iya si Ilyas ka egluwas kandin."

⁵⁰ Nataman, migpanguleyi e man-e si Hisus te meemen, ne dutu nabigtawan e sikandin.

⁵¹ Te seeye de degma ne timpu, nahisi e ka kurtina diye te timplu puun diye te dibabew peendiye te diralem. Ne miglinug e wey nenaperi e ka me dalama, ⁵² wey nenallukatan ka me lebeng, wey neneuyag e ka nenammatey ne keetetawan te Manama, ⁵³ ne nanlihawang e sikandan te

me lebeng dan. Te neuyag e si Hisus, nangendiyad e sikandan te matulus ne siyudad ne Hirusalim wey migpakita sikandan te masulug ne me etew.

⁵⁴ Ka kepitan te me sundalu wey ka me duma rin ne migtameng ki Hisus, amana ne naaldek te peglilinug e wey te pegkakita ran te me kein-inuwan ne neyitabu te pegpatey ni Hisus wey migkahi sikandan, "Malehet iya ne Anak te Manama ka sika ne etew!"

⁵⁵ Ne due degma masulug ne me malitan ne namipitew diye te bayew madmariyu. Sikandan ka migsinundul wey migtanggu ki Hisus dengan puun pad te Galiliya. ⁵⁶ Ne dutu ensi Mariya Magdalina, si Mariya ne iney ni Santiyagu wey ni Husi, wey ka iney te me anak ni Sibidiyu.

*Ka pegrabalan ki Hisus
(Mar. 15:42-47; Luk. 23:50-56; Huw. 19:38-42)*

⁵⁷ Hengkayi te egkasagkup e, due miggingga ne meyaman ne matig-Arimatiya ne enggaranan ki Husi wey hibateen degma sikandin ni Hisus. ⁵⁸ Miggendiye sikandin te ki Pilatu wey imbuju din ka lawa ni Hisus. Ne migsuhu si Pilatu ne igpabehey e seini diye te kandin. ⁵⁹ Ne in-anjey e ni Husi ka lawa ni Hisus wey imbuksan din seini te malinis ne hinabel, ⁶⁰ wey insabal

rin e diye te dalama ne iyam pad neimpusi te eglulungag. Ne miglilid e sikandin te dakel ne batu eyew iglekeb te gumawan te insabalan, wey nataman, miggipanew e sikandin. ⁶¹ Ne si Mariya Magdalina wey ka sangey rin, diye migpinpinnuu te egkatangkaan te insabalan.

Ka pegrabalan te insabalan

⁶² Te seup ne aldew, Aldew te Peggimeley, miggendiye te ki Pilatu ka me pangulu te me talagpanubad wey ka me Parisiyu ⁶³ wey migkahi, "Ahalen, nasuman-suman ney ka ingkahi te ware pad migpatey seeye se talaglimbung ne egkeuyag kun sikandin te igkatelu ne aldew. ⁶⁴ Purisu patamengi nu ka insabalan taman te igkatelu ne aldew su eyew kene egtakawen te me hibateen din ka lawa rin wey egkataman, igpanggihud dan e diye te me etew ne neuyag e sikandin. Ne seini se mewuri ne peglilimbung, egkeyimu ne subla pad ne mareet du te an-anayan."

⁶⁵ Ne migkahiyan sikandan ni Pilatu, "Kuwa kew te me sundalu wey hendiye kew e. Na, paay-ayari niyu naa patamengi kandan ka insabalan."

⁶⁶ Purisu nangendiyad sikandan wey inniresenan dan ka insabalan pinaahi te pegtahu dan te palinneu diye te batu ne lekeb. Ne

nataman, impatamengan
dan e.

28

*Ka pegkeuyag ni Hisus
(Mar. 16:1-10; Luk. 24:1-12; Huw. 20:1-10)*

¹ Te peglihad e te Aldew te Peggimeley, te maselemselem pad te aldew te Duminggu, migleuy te insabalan si Mariya Magdalina wey ka sangey rin ne si Mariya. ² Ne sauhune ne miglilinug te mangunekune, su due panalihan te Magbebaye ne Manama ne miglene puun te langit. Ne miggendiye sikandin te insabalan wey inlilid din ka batu ne insapgeng dutu, wey impinnuuwan din e. ³ Egpekeiling te layag te kilat ka ulaula rin wey eangkahi ka kumbale din. ⁴ Ne seeye se me talagtameng, nangelkel te kaaldek dan wey nenaawaan te gimukud.

⁵ Ne migkahiyan te panalihan ka me malitan, "Kene kew kaaldek! Nakanengneng a ne egpamitawen niyu si Hisus ne inlansang te krus. ⁶ Warad e sikandin kayi su neuyag e sumale te ingkahi rin. Kema hendini kew, tengtengi niyu ka impaley-asan kandin. ⁷ Ne dagdahawi niyu hendiei ka me hibateen din wey nangeni niyu sikandan te neuyag e sikandin. Miggune e sikandin kaniyu diye te Galiliya wey diye niyud e egkakita sikandin. Kene niyu

ma kalingawi ka inlaglag ku kaniyu."

⁸ Purisu migdagdahew sikandan mig-awe diye te insabalan ne nenaaldek piru nahale-gale degma, wey namallahuy sikandan ka egpangguhud diye te me hibateen din.

⁹ Te diye pad sikandan te deralanen, sauhune ne miglambag si Hisus kandan wey migkah, "Meupiya red." Ne migparani sikandan ki Hisus wey inggen-genan dan ka paa rin wey insimba ran e sikandin. ¹⁰ Nataman, migkahiyan sikandan ni Hisus, "Kene kew kaaldek! Hendie kew e wey nangeni niyu ka me suled ku ne egpeendiyeen te Galiliya wey diya ad egkakita nikandan."

Ka guhuren te me talagtameng

¹¹ Te sasangan e ka me malitan ne egmangipanew, due duma ne talagtameng te insabalan ne nangendiye te siyudad wey impangguhud dan diye te me pangulu te me talagpanubad ka langun ne neyitabu. ¹² Ne miglibulung e ka me pangulu te me talagpanubad duma te me igbuyag, wey nakaplanu e sikandan ne egbehayan te dakel ne seleppi ka me sundalu. ¹³ Migkahiyan dan ka me sundalu, "Pangguhuri niyu ka me etew te nangendiye te marusilem ka me hibateen din wey intakew ran ka lawa rin taheed te nenewulep kew. ¹⁴ Ne emun ke egkarineg

seini te Gubirnadur, iyan key e balahad ka egpasabut kandin ne warad e likes ne igkalaggew niyu."

¹⁵ Purisu indawat dan ka seleppi wey intuman dan ka igpeyimu kandan. Minsan kuntee, sika iya ne guhuren ka in-empet ipangguhud te me Hudiyu.

Ka pegpakita ni Hisus te me hibateen din

(Mar. 16:14-18; Luk. 24:36-49; Huw. 20:19-23; Him. 1:6-8)

¹⁶ Ne seeye se sapulu wey sabeka (11) ne hibateen din, nangendiye te Galiliya diye te bubungan ne ingkahi ni Hisus ne egpeendiyaan kandan. ¹⁷ Te pegkakita ran kandin, insimba ran e sikandin piru migduwaruwa ka duma. ¹⁸ Ne migparani si Hisus diye te kandan wey migkah, "Imbehey kayi te keddiey ka langun ne katenged diye te langit wey kayi te ampew te tane. ¹⁹ Purisu hendiyei niyu ka me etew te langun ne inged wey himuwa niyu sikandan ne me hibateen ku. Bewutismuwi niyu sikandan te ngaran te Amey, te Anak, wey te Panisingan te Manama. ²⁰ Panulua niyu sikandan ne egtuman te langun ne insuhu ku kaniyu. Ne tantanuri niyu ne egdumaan ku iya sikaniyu layun, taman te katammanan te timpu."

Ka Meupiya ne Panugtulen Sumale ki Markus

Igpewun-a

Ka migsulat te seini ne baseen, sabeka ne Hudiyu ne egngaranan ki Markus ne anak ni Mariya (Me Himu 12:12) ne matig-Hirusalim. Kasuluhan te seeye se migbebasbas te Bibliya, migkahi te sikandin din ded si Huwan Markus, ka suled ni Birnabi (Kulusas 4:10) ne migduma engki Pablu te an-anayan ne peggipanew ran eyew te pegwali te Meupiya ne Panugtulen (Me Himu 12:25; 13:13). Nakanengneng ki degma ne si Markus, duma ni apustul Pidru (1 Pidru 5:13), wey masulug degma ka migkahi ne si Pidru ka nakapanulu ki Markus ke nekey ka innimu wey impanulu te Magbebaye ne si Hisus.

Insulat ni Markus ka seini ne baseen para te kene ne me Hudiyu, labew en iya te seeye se migpuun te Ruma. Purisu deisek de ka insulat din meytenged te impanagne diye te tapey ne kasabutan ne indakel mule enni Matiyu wey Lukas te migsulat. Inluwas din degma ka duma ne me lalag wey me batasan te me Hudiyu su eyew egkasabut te kene ne me Hudiyu.

Ka seini se Meupiya ne Panugtulen ne insulat ni

Markus, migpanengneng ne si Hisus ka migpamakey te Manama wey te keet-etawan, wey inggaranan din ka kandin mismu ne pegkeetew te Anak te Etew. Ka pantek ne birsikulu kayi egkakita te 10:45: "Su minsan ka Anak te Etew ware miggendini eyew egpamakayen, ke kene, eyew egpamakey wey egpeyimateg eyew te pglekat te masalig ne me etew puun te me sale dan." Egkeupian si Markus ne ka egbasa te seini ne baseen egpakashabut ne si Hisus layun miggimu te meupiya, purisu iyan din impasabut ay-ayari ka innimu ni Hisus du te impanulu din. Impamalehetan din ka geem wey katenged ni Hisus pinaahi te pegpangguhud te me kein-inuwan ne innimu rin, ka pegpamawi din te migmanderalu, wey pegpan-galew rin te me busew.

Ka katammanan ne baseen (16:9-20) ware diye te malehet ne migpuunan su intimul naan de. Purisu masulug ka migsuman-suman ne kene ne si Markus ka migsulat dutu.

Ka nasulat te seini ne baseen

Ka bunsuranan te Meupiya ne Panugtulen 1:1-13

Ka himu ni Hisus diye te Galiliya 1:14-9:50

Puun te Galiliya peendiye te Hirusalim 10:1-52

Ka katammanan ne simana diye te Hirusalim 11:1-15:47

Ka pegkeuyag ni Hisus 16:1-20

*Ka pegwali ni Huwan ne
Talagbewutismu*

(Mat. 3:1-12; Luk. 3:1-18;
Huw. 1:19-28)

¹ Seini ka Meupiya ne Panugtulen meyitenged ki Hisu Kristu ne anak te Manama, ne migbunsud² sumale te impasulat te Manama ki prupita Isayas,

"Igpewun-a ku keykew ka suluhuanen ku
ne iyan eg-andam te egbayaan nu.

³ Due egpanguleyi diye te mammara ne inged ne kene egkeugpaan ne egkahi:

'Andama niyu ka dalan te Magbebaye.

Tul-ira niyu ka egbayaan din!'

⁴ Ne natuman sika te pegginguma ni Huwan diye te mammara ne inged ne kene egkeugpaan ne migpameuwismu wey migwali ne migkahi, "Inniyuhi niyu ka me sale niyu wey pabewutismu kew eyew egpasayluwen te Manama ka me sale niyu." ⁵ Ne nangendiye te kandin ka masulug ne me etew puun te Hirusalim wey ka me etew puun diye te langun ne lungsud te prubinsya te Hudiya. Ne nekegsendit e sikandan wey impangguhud dan e ka me sale dan, wey imbewutismuwan e sikandan ni Huwan diye te weyig ne Hurdan.

⁶ Ne ka kumbale ni Huwan, innimu ligkat te bulbul te

kamilyu wey ka sinturun din innimu ligkat te laplap te ayam. Ne talangas de wey teneb ka egkeenen din.

⁷ Ne migwali sikandin ne miggenendue, "Due egpakistaninundul keddi ne subla pad ne maresen keddiey. Ne kena a ne likes ne eg-usengul ka eggekad te hiket te sandal din. ⁸ Egbewutismu a kaniyu te weyig, piru sikandin ka egbewutismu kaniyu te Panisingan te Manama."

*Ka pegbewutismu wey ka
pegtintal ki Hisus*

(Mat. 3:13-4:11; Luk. 3:21-22; 4:1-13)

⁹ Te seeye ne timpu, miggendiye te ki Huwan si Hisus ne diye egpuun te Nasarit ne sakup te prubinsya te Galiliya. Ne dutu imbewutismuwan e sikandin ni Huwan diye te weyig ne Hurdan. ¹⁰ Te peggakap e ni Hisus, sahuhune ne nakita rin ka langit ne nalukatan wey miglene ka Panisingan te Manama diye te kandin ne egpekeiling te seleppati. ¹¹ Ne due laheng ne egpuun diye te langit ne migkahi, "Sikeykew ka pinalangge ku ne Anak. Amana a nahale keykew."

¹² Ne due-rue ne impeendiye sikandin te Panisingan te mammara ne inged ne kene egkeugpaan.

¹³ Ne diye sikandin tintala ni Meibulan seled te hep-at ne pulu (40) ne aldew. Due degma me mabbulut

1:2 Mal 3:1. **1:3** Isa 40:3 (LXX). **1:6** 2Har 1:8. **1:11** Hin 22:2; Sal 2:7; Isa 42:1; Mat 3:17; 12:18; Mar 9:7; Luk 3:22.

ne mahintalunan diye piru intanggu sikandin te me panalihan te Manama.

Ka peg-umew ni Hisus te an-anayan ne me hibateen din
(Mat. 4:12-22; Luk. 4:14-15; 5:1-11)

¹⁴ Te naprisu e si Huwan, miggendiye si Hisus te Galiliya ne migwali te Meupiya ne Panugtulen ne egpuun te Manama. ¹⁵ Migkahi sikandin, “Miggingume e ka timpu ne intagne dengan. Mahaan e ka Peghari te Manama. Inniyuhi niyu ka me sale niyu wey palintutuu kew te Meupiya ne Panugtulen!”

¹⁶ Te peglihad ni Hisus diye te ilis te Lanew te Galiliya, nakita rin si Simun wey ka suled din ne si Andris ne migpamiyale, su mangngengalap ma sikan dan. ¹⁷ Ne migkahiyan ni Hisus sikandan, “Ikul kew keddiey wey eggimuwen ku sikaniyu ne mangngengalap te me etew.” ¹⁸ Ne due-rue ne mig-engkeran dan ka me biyale dan wey mig-ikul e kandin.

¹⁹ Te pegpabulus ni Hisus diye te kewun-aan, nakita rin si Santiyagu wey ka suled din ne si Huwan ne me anak ni Sibidiyu. Diye sikandan te balangey ran ka egpanupak te me biyale dan, ²⁰ wey due-rue ne in-umew sikandan ni Hisus. Ne in-engkeran dan e ka amey ran diye te balangey duma te me suluhuanen ne inakat dan te egpamiyale

wey mig-ikul e sikandan kandin.

Ka etew ne inserepan te busew
(Luk. 4:31-37)

²¹ Ne miggendiye ensi Hisus te Kapirnaum. Te pegginguma te Aldew te Peggimeley, migseled si Hisus diye te simbaan te me Hudiyu wey migpanulu te me etew. ²² Ne neinu-inu ka me etew te kandin ne pegpanulu su due geem te pegpanulu din, wey kene ne iling te me talagpanulu te Balaud te Manama.

²³ Due-rue ne miglepew diye te simbaan ka etew ne migserapan te busew ne migbalbalukan ²⁴ ne migkahi, “Hisus ne matig-Nasarit! Nekey-a ka eggimuwen nu kayi te kanami? Iyan nu innendini ka egdereet kanami? Nekeila a keykew; sikeykew ka Matulus ne Impeuyan te Manama!”

²⁵ Piru insaparan sikandin ni Hisus te migkahi, “Peeneng-eneng ka wey awe ka due te kandin!”

²⁶ Ne dutu, in-umaan e te busew ka etew ne egbabuyen e, ne migpanguleyi te meemen wey mig-awe e ka busew diye te kandin. ²⁷ Ne neinu-inu sikandan langun dutu ne migmein-inseey ka tagse sabeka ne miggenden-due, “Nekey buwa seini? Iyam seini ne pegpanulu ne due geem! Minsan ka me

busew egpalintutuu te me suhu din!"

²⁸ Ne puun dutu, mahaan de nekeempet te intiru ne prubinsya te Galiliya ka guhuren meyitenged ki Hisus.

Ka pegbawi ni Hisus te masulug ne me etew

(Mat. 8:14-17; Luk. 4:38-41)

²⁹ Ne dutu, miglihawang e sikandan te simbaan te me Hudiyu wey miggendiyad e te baley enni Simun wey Andris. Migduma degma ensi Santiyagu wey si Huwan. ³⁰ Miggibat-hibat ka malitan ne anuhang ni Simun su miglusungan, wey te sikan de innangenan dan e si Hisus meyitenged kandin. ³¹ Ne indugpu ni Hisus ka malitan wey miggen-genan din ka belad wey impeenew rin e. Ne due-rue ne neulian e ka malitan wey intanggu rin e sikandan.

³² Te seeye ne maapun, te miglineb e ka aldew, impanguyan te me etew diye te ki Hisus ka langun ne migmanderalu wey ka migpanerepan te me busew.

³³ Ne susuluhi ne me etew te seeye ne siyudad ka miglibulung diye te lama te baley. ³⁴ Ne impamawian ni Hisus ka masulug ne egmanderalu te nalein-lein ne egmangeramen dan, wey impangalew rin degma ka masulug ne me busew piru

ware din palalaha tenged su nekeila sikandan kandin.

Ka pegwali ni Hisus diye te Galiliya

(Luk. 4:42-44)

³⁵ Te sikan pad egkasi-si ka kaliwaswasan, mig-enew e si Hisus wey miggendiyad e te inged ne ware etew, ne diye mig-ampu sikandin. ³⁶ Ne impammitewe sikandin enni Simun. ³⁷ Te nakita ran e si Hisus, ingkahiyan dan e, "Eg-pammitawen ka te langun ne etew."

³⁸ Ne ingkahiyan din sikandan, "Na, kuwa kid su eggendiye ki te marani ne me lungsud eyew egpakawali a degma diye, su seini iya ka innendini ku." ³⁹ Ne inempet din te pegwali ka me simbaan te me Hudiyu wey te pegpangalew te me busew ka intiru ne Galiliya.

Ka pegbawi ni Hisus te ibungen

(Mat. 8:1-4; Luk. 5:12-16)

⁴⁰ Ne due ibungen ne migparani ki Hisus ne migpanimbuel wey migpeyid-u-hid-u ne migkahi, "Ke egkeupian ka, egkabawian* a nikeykew."

⁴¹ Neyid-u si Hisus te etew, seeye naa ingketeng din ka belad din wey insamsam din e ka etew te migkahi, "Uya, igkeupii ku. Egkeulian ka!" ⁴² Ne due-rue ne naawe ka ibung din, wey neulian e iya sikandin. ⁴³ Ne impeyipanew e ni Hisus ka

1:39 Mat 4:23; 9:35. * **1:40** Te Grigu: eglinisan. (Diye te tuluuwen te me Hudiyu, ka etew ne ibungen in-isip ne malindit.) **1:44** Lib 14:1-32.

etew wey inteesan pegpeheti
 44 te migkahi, "Kene nu ipangguhud seini te minsan hentew. Ke kene, hendiye ka te talagpanubad wey papitew ka kandin ne warade ka dalu nu, wey panubad ka sumale te insuhu ni Muwisis eyew te pegpamalehet te me etew ne neulian kad e."

45 Piru miggipanew ka etew wey nasi iempet iwangal-wangal ka neyitabu diye te kandin. Sikan naa, kenad e egpahawa-hawa si Hisus ne eggendiye te me lungsud. Ne diye naan de sikandin mig-ugpe te inged ne ware mahinged, piru nasi nangendiye te kandin ka me etew ne migpuun te nalein-lein ne me inged.

2

Ka pegbawi ni Hisus te kene egkaweil se lawa

(Mat. 9:1-8; Luk. 5:17-26)

1 Peglihad te pila ne aldew, miglibed e si Hisus diye te Kapirnaum wey nahuhud e ne diyad e sikandin te baley rin. 2 Ne miglibulung ka masulug ne me etew wey migsekel e sikandan minsan ka diye te gumawan. Ne migpangguhud e sikandin te lalag te Manama diye te kandan. 3 Due hep-at ne etew ne nanginguma ne migyayung te etew ne kene egkaweil se lawa. 4 Ne tenged te kasulug te me etew, ware sikandan nakaparani ki Hisus. Ne migweil-weil

sikandan, inlungahan dan ka atep ne lenged ni Hisus.* Ne hengkayi te nakalulungage sikandan, intuntun dan e ka etew ne kene egkaweil se lawa ne impeyibat diye te hibatanan din.⁵ Te pegkakita ni Hisus ne dakel ka pegpal-intutuu ran, migkahiyan din e ka kene egkaweil se lawa, "Tatu, impasaylu e ka me sale nu."

6 Ne due me talagpanulu te Balaud te Manama ne namin-nuu diye wey nekeinse diye te geyinawa ran,⁷ "Mania te egpakalalag seini ne etew te iling due? Egbaley-baley sikandin te Manama! Ware etew ne egpakapasaylu te me sale, su ka Manama re!"

8 Ne due-rue ne natahaan ni Hisus ka me suman-suman dan wey migkahiyan din sikandan, "Mania te egsuman-suman kew te iling due?⁹ Hendei bes ka malemu, ka egkahi diye te etew ne kene egkaweil se lawa, 'Impasaylu e ka me sale nu,' wey ke egkahi, 'Enew ka, uyana nu ka hibatanan nu wey hipanew kad?'¹⁰ Piru igpapitew ku kaniyu ne due katenged te Anak te Etew kayi te ampew te tane te pegpasaylu te me sale." Ne migkahiyan din ka etew ne kene egkaweil se lawa,¹¹ "Enew ka, wey uyana nu ka hibatanan nu wey uli kad e diye te kaniyu!"

12 Ne due-rue ne migsasind-deg sikandin ne insabilbil rin e ka hibatanan din wey mig-

* 2:4 Mapatag ka atep te me Hudiyu.

awe e ne diye migbaye te tangkaan te langun ne etew. Nawangalan ka langun wey indayan dan ka Manama ne migkahi, "Ware key re due nakakita te iling kayi!"

Ka peg-umew ni Hisus ki Libi

(Mat. 9:9-13; Luk. 5:27-32)

¹³ Nataman, miglibed e man-e si Hisus diye te ilis te Lanew te Galiliya. Ne miglibulungan sikandin te masulug ne me etew, ne dutu impanulu din e sikandan. ¹⁴ Te sasangan e sikandin ka eggipanew, due nakita rin ne egngararan ki Libi ne anak ni Alpiyu ne migpinpinnuu diye te upisina rin ne bayaranan te buhis. Migkahiyan ni Hisus sikandin, "Ikul ka keddiey." Ne migsasindeg sikandin wey mig-ikul e ki Hisus.

¹⁵ Nataman, migkeen si Hisus diye te baley ni Libi. Ne due masulug ne me talagsukut te buhis wey me makasesale ne miglagpu kandin te migkeen duma te me hibateen din tenged su masulug sikandan ka naninundul kandin. ¹⁶ Te pegkakita te me Parisiyu ne me talagpanulu te Balaud te Manama ne miglagpu migkeen si Hisus te me makasesale wey te me talagsukut te buhis, mig-insaan dan e ka me hibateen din te migkahi, "Mania te miglagpu migkeen sikandin te me talagsukut te buhis wey te me makasesale?"

¹⁷ Te pegkarineg dutu ni Hisus, migkahiyan din e sikandan, "Ka me etew ne ware dalu, kene egkeilangan te talagbawi, ke kene, seeye de se egmanderalu. Wara a miggendini eyew te pegumew te me matareng, ke kene, te me makasesale."

Ka inse meytenged te pegpuasa

(Mat. 9:14-17; Luk. 5:33-39)

¹⁸ Due timpu ne migpuasa ka me hibateen ni Huwan wey ka me Parisiyu. Ne due me etew ne migparani ki Hisus wey mig-inse kandin, "Mania te egpuasa ka me hibateen ni Huwan wey ka me hibateen te me Parisiyu, piru ware mule ka me hibateen nu?"

¹⁹ Ne migtabak si Hisus, "Egkaayun naa ne egpuasa ka me mahaliyug te egpangasawa ke duma ran pad sikandin? Kene iya egkaayun ne egpuasa sikandan ke duma ran pad ka egpangasawa! ²⁰ Piru egginguma ka timpu ne eg-angayen e diye te kandan ka egpangasawa, ne egpuase e sikandan te seeye ne aldew.

²¹ "Ne ware etew ne egtutupak te iyam ne manggad diye te tapey ne kumbale, su ke eggimuwen din sika, egkenseng ka intupak wey egkakatkat e ka inteyian wey nasi e egmaluag ka gisi. ²² Ne ware degma etew ne egtahu te iyam ne binu diye te tapey ne tahuanan ne laplap te mananap, su ke eggimuwen

din sika, egbetu ka tahuanan wey egkeitis e ka binu ne egkareetan e degma ka tahuanan. Ke kene, ka iyam ne binu, keilangan ne diye igtahu te iyam ne tahuanan ne laplap te mananap.”

Ka inse meyitenged te Aldew te Peggimeley
(Mat. 12:1-8; Luk. 6:1-5)

²³ Te sabeka ne Aldew te Peggimeley, nangipanew ensi Hisus ne diye migbaye te impamulaan te trigu. Taheed te egmangipanew sikandan, nangetu te me trigu ka me hibateen din. ²⁴ Ne migkahiyan si Hisus te me Parisiyu, “Pitawa nu! Mania te miggimu ka me hibateen nu te supak te Balaud te Aldew te Peggimeley?”

²⁵ Ne migtabak si Hisus diye te kandan, “Ware kew bes nakasabut te imbasniyu meyitenged te innimu ni Dabid te miggutanan sikandan te me duma rin su warad egkeenen dan? ²⁶ Te timpu ne si Abiyatar pad ka Labew ne Talagpanubad, migseled si Dabid diye te baley te Manama wey migkeen te paan ne inhalad e diye te Manama. Ne sumale te kanta ne Balaud, ka me talagpanubad de ka intuhutan ne epakakeen dutu, piru migkeen si Dabid wey impamehayen din pad ka me duma rin. ²⁷ Su innimu ka Aldew te Peggimeley eyew epakabulig te etew,

ne ware himuwa ka etew eyew egtuman te me balaud te Aldew te Peggimeley.[†] ²⁸ Purisu ka Anak te Etew iyan ahalen minsan Aldew te Peggimeley.”

3

Ka etew ne nakengkeng se belad

(Mat. 12:9-14; Luk. 6:6-11)

¹ Te lein e ne timpu, migseled e man-e si Hisus diye te simbaan te me Hudiyu. Due sabeka ne etew dutu ne nakengkeng se belad. ² Ne due me etew ne eg-iipat ki Hisus ke egbawian din te Aldew te Peggimeley seeye se etew su eyew igkasumbung dan sikandin. ³ Ne migkahiyan ni Hisus ka etew ne nakengkeng se belad, “Sasindeg ka kayi te tangkaan.” ⁴ Ne miginse si Hisus diye te kandan, “Nekey bes ka intuhut te kanta ne Balaud ne eleg ne eggimuwen ta te Aldew te Peggimeley? Ka pegbulig naa wey ke pegdereet? Ka pegluwas naa wey ke peggi-matey?” Piru ware sikandan migtabak.

⁵ Ne dutu, nabelu e si Hisus ka migpanil-ap-silap kandan. Migmasakit se geyinawa rin tenged su makehal ka me ulu ran.* Ne migkahiyan din ka etew ne nakengkeng se belad, “Ketenga nu ka belad nu.” Ne ingketeng te etew wey

2:23 Diy 23:25. **2:26** Lib 24:9. **2:26** 1Sam 21:1-6. **† 2:27** Te Grigu: ware himuwa ka etew para te Aldew te Peggimeley. * **3:5** Te Grigu: makehal ka me pusung dan.

neulian e ka belad din.
⁶ Ne nanlihawang e ka me Parisiyu, wey migbunsud e sikandan ka egplanu duma te me sakup ni Hari Hirudis ke egmenuwen dan te eggimatey si Hisus.

Ka susuluhi ne etew ne migsinundul ki Hisus

⁷ Ne migparumeey ensi Hisus te me hibateen din diye te lanew. Naninundul kandin ka amana ne susuluhi ne etew ne diye egpuun te Galiliya wey te Hudiya,⁸ wey ka diye degma egpuun te Hirusalim, te Idumiya wey diye te deyipag te Hurdan wey minsan ka diye te me inged ne marani te Tiru wey te Sidun, su nakarineg sikan dan te langun ne innimu rin.
⁹ Ne puun due, migkahiyan din ka me hibateen din ne egpaandamen te balangey ne eg-unturan din, su eyew kene sikandin egkapinpini te me etew.
¹⁰ Puun su masulug ne etew ka impamawian din, egmekegsegseg e ka egmanderalu ne egparani kandin eyew egsamsam kandin.
¹¹ Ne emun ke egpakakita ki Hisus ka me etew ne nanerepan te me busew, sahuhune ne eg-usengul sikandan diye te tangkaan din wey egmanguleyi ne egkahi, "Sikeykew ka Anak te Manama!"

¹² Ne impegpehetan din sikandan teesi ne kene eg-pepangguhuren meyitenged kandin.

Ka peg-alam ni Hisus te sapulu wey daruwa (12) ne hibateen din

(Mat. 10:1-4; Luk. 6:12-16)

¹³ Nataman, migtakereg e si Hisus diye te bubungan. Ne in-umew rin seeye se ingkeupii rin wey migparani sikandan kandin.
¹⁴ Ne migalam sikandin te sapulu wey daruwa (12) ne apustulis su egdumduemeen din wey eyew egsuhuen te pegwali.
¹⁵ Ne imbehayan din sikandan te katenged te pegpangalew te me busew.

¹⁶ Seini ka sapulu wey daruwa (12) ne in-alam din: si Simun ne mig-immuan din ki Pidru,
¹⁷ ka talaari ne si Santiyagu wey si Huwan ne me anak ni Sibidiyu. Ingngaranan sikandan ni Hisus te Buwanirgis, ka igpasabut "Me anak te Luhung";
¹⁸ si Andris wey si Pilipi, si Bartulomi wey si Matiyu, si Tumas wey si Santiyagu ne anak ni Alpiyu, si Tadiyu wey si Simun ne ribildi,
¹⁹ wey si Hudas Iskaryuti ne mig-akal kandin.

Ka pegbayung ki Hisus ne migserepan te busew

(Mat. 12:22-32; Luk. 11:14-23; 12:10)

²⁰ Te peg-uli e enni Hisus diye te baley, duen e man-e masulug ne me etew ne nanlibulung, ne puun due, kenad e sikandan egpakakeen.
²¹ Te pegkarineg dutu te pamilya ni Hisus, miggendiyad sikandan ka eg-angey kandin su

egkahiyen e te me etew ne egbusawen e sikandin.

²² Ne due me talagpanulu te Balaud te Manama ne miggingga puun te Hirusalim ne migkahi, “Inserepan sikandin ni Meibulan[†] ne pangulu te me busew, wey imbehayan te geem te pegpangalew te me busew.”

²³ Ne impeparani sikan dan ni Hisus wey impangguhuran pinaahi te me panunggilingan te migkahi, “Egmenuwen ni Meibulan te eg-alew te duma rin? ²⁴ Emun ka sabeka ne inged egmeun-unayey egmeeg-ehetey ka me etew, kene iya egpakasasindeg ka sika ne inged. ²⁵ Ne emun ka taltalaanak egmeun-unayey egmeeg-ehetey, kene iya egpakasasindeg ka sika ne taltalaanak. ²⁶ Ne emun ke eg-unayen e ni Meibulan te egkuntere ka me sakup din wey egkabaad-baad e, kene iya sikandin egpakasasindeg, ke kene, egkataman e ka pegmandu din.

²⁷ “Ware egpakaseled diye te baley te manekal ne etew wey egpakaahew te me kasangkapan din ke kene din pad eggunaan te egbaku ka kamuney. Ke egkabaku din e ka kamuney henduen din pad egkaahew ka me kasangkapan.

²⁸ “Egnanganan ku sikaniyu te malehet: egkaayun ne egpasayluwen ka me etew te langun ne

me sale dan wey te minsan nekey ne pegbaley-baley ran te Manama. ²⁹ Piru minsan hentew ne egbaley-baley te Panisingan te Manama, kene iya egpasayluwen, su kene egkapasaylu te ware egtamanan ka seini ne sale.” ³⁰ Nakahi rin sika tenged su migkahi sikandan te migserapan e sikandin te busew.

Ka iney wey ka me suled ni Hisus

(Mat. 12:46-50; Luk. 8:19-21)

³¹ Nataman, nangingume e ka iney ni Hisus wey ka me suled din. Ne diye de sikandan nanasindeg te lihawangan te baley wey migpanaha re ne egpalihawangen sikandin.

³² Amana ne masulug ka me etew ne namminnuu ne nakalingut ki Hisus. Ne migkahi sikandan, “Diye te lihawangan ka iney nu wey ka me suled nu ne egpammitew keykew.”

³³ Ne migkahi si Hisus, “Nakataha kew naa ke hentew ka iney ku wey ka me suled ku?” ³⁴ Ne impanil-ap-sil-ap ni Hisus ka me etew ne namminnuu ne nakalingut kandin te migkahi, “Seini ka iney ku wey ka me suled ku! ³⁵ Ka minsan hentew ne eggimu te igkeupii te Manama, iyan sika ka iney ku, ka suled ku, wey ka atebey ku.”

4

*Ka panunggilingan
meyitenged te pegpamula
(Mat. 13:1-9; Luk. 8:4-8)*

¹ Ne mig-abey e man-e migpanulu si Hisus diye te ilis te lanew. Ne susuluhi ne etew ka miglibulung diye te kandin, ne tenged dutu miguntud e sikandin te balangey ne diye te lanew wey diye migpinnuu. Ne ka langun ne etew diye de te ilis te lanew. ² Masulug ka impanulu ni Hisus kandan ne impabaye din te me panunggilingan. Migkahi sikandin te pegpanulu din:

³ “Pammineg kew! Due sabeka ne etew ne miggendiye te kamet eyew egpamula. ⁴ Te pegpanawed din e te beni, due nakasawed diye te dalan, ne miggingga ka me manuk-manuk wey impanuktuk e seeye. ⁵ Ne ka duma ne beni diye nakasawed te batuwen ne ware amana tane. Ne mahaan de seeye migtubu su manipis ka tane. ⁶ Piru te naaldawan e, nahangu e seeye su ware amana nakareralid. ⁷ Ka duma ne beni nakasawed diye te duhiyen. Ne nanubu ka me duhi wey naselung e ka pinamula, sikan naa ka warad nakabebehas. ⁸ Ka duma ne beni, diye nakasawed te meupiya ne tane wey migtubu e. Ne migdakel e wey migbebehas, ne due duma ne beni ne migbebehas te tatelu ne pulu (30), due duma ne keen-eman

ne pulu (60), wey due degma migbebehas te sabeka ne gatus (100).”

⁹ Ne migkahi si Hisus, “Purisu, ke egkeupian kew ne egpakashabut, sumsumana niyu ay-ayari ke nekey ka narineg niyu!**

*Ka peggamit ni Hisus te panunggilingan
(Mat. 13:10-17; Luk. 8:9-10)*

¹⁰ Te nangawe e ka susuluhi ne etew, miginsaan e sikandin te sapulu wey daruwa (12) ne hibateen din wey te seeye se miglingut kandin meyitenged te kaluwasan te me panunggilingan. ¹¹ Ne migtabak si Hisus, “Impatahe e diye te kaniyu ka inggeles meyitenged te Peghari te Manama; piru diye te duma, impabaye seini langun pinaahi te me panunggilingan, ¹² su eyew, ‘minsan egtengteng sikan dan, kene egpakkakita, wey minsan egpammineg sikan dan, kene egpakashabut.

Su emun ke egpakashabut sikan dan, kema ke egliped sikan dan diye te Manama, wey egpasayluwen sikan dan.’”

*Ka kaluwasan te panunggilingan meyitenged te pegpamula
(Mat. 13:18-23; Luk. 8:11-15)*

4:1 Luk 5:1-3. * **4:9** Te Grigu: Pammineg ka ke due talinga nu. **4:12** Isa 6:9-10 (LXX).

¹³ Ne migkahiyan ni Hisus sikandan, “Ke ware kew nakasabut te kaluwasan te seeye ne panunggilingan, egmenuwen niyu naan pad te egsabut ka duma ne me panunggilingan? ¹⁴ Ka insawed te talagpamula, iyan ka lalag te Manama. ¹⁵ Ne seeye se beni ne nakasawed diye te dalan, iyan seeye se me etew ne nakarineg te lalag te Manama. Piru sahuhune ne miggingga si Meibulan wey in-ahew rin e ka lalag ne nakapamula diye te kandan. ¹⁶ Ne iling ded seeye se beni ne nakasawed diye te batuwen, iyan seeye se me etew ne nakarineg te lalag te Manama ne due-rue ne migdawat kayi ne nahale. ¹⁷ Piru ware seini nakareralid diye te pusung dan, purisu ware de naluhay ka pegpalintutuu ran. Nata-man, te pegginguma te me keyirapan wey me pegbayad-bayad tenged te lalag te Manama, due-rue ne migengked sikandan te pegpal-intutuu ran. ¹⁸ Ne ka duma ne beni ne nakasawed diye te duhiyen, iyan seeye se nakarineg te lalag te Manama, ¹⁹ piru ka pegkalaggew ran meyitenged te peg-ugpe dan, wey ka peggeyinawa te me karatuan dan wey ka pegkeeyami te duma pad ne me kasangkapan, iyan nekeumes te lalag te Man-

ama, wey ware sikandan nakabebehas. ²⁰ Piru ka beni ne nakasawed diye te meupiya ne tane, iyan seeye se me etew ne nakarineg te lalag te Manama ne migdawat wey migbebehas. Ka sabeka nakabebehas te tatelu ne pulu (30), ne ka duma nakabebehas te keen-eman ne pulu (60), ne ka duma nakabebehas te sabeka ne gatus (100).”

*Ka panunggilingan
meyitenged te sulu*
(Luk. 8:16-18)

²¹ Ne migkahiyan din sikandan, “Ware egparekket te sulu ne egsuuban te gantangan wey ke diye igtahu te selib te lantawan. Ke kene, igpatawan-tawan iya igtahu. ²² Su ware iggeles ne kene egkanengnengan; wey ware egbunbunan ne kene egkalekisan. ²³ Purisu, ke egkeupian kew ne eg-pakasabut, sumsumana niyu ay-ayari ke nekey ka narineg niyu!†”

²⁴ Ne migkahiyan pad man-e sikandan ni Hisus, “Sikan naa, tantanuri niyu ke nekey ka egkarineg niyu. Su emun ke eg-ayad-ayad kew egpammineg, egpakasabut kew iya, wey egtimulan pad sika te Manama.‡ ²⁵ Su seeye se due katuenan, egtimulan pad piru seeye se deisek de se katuenan, eg-angayen

^{4:21} Mat 5:15; Luk 11:33. ^{4:22} Mat 10:26; Luk 12:2. † ^{4:23} Te Grigu: Pammineg ka ke due talinga nu. ^{4:24} Mat 7:2; Luk 6:38. ‡ ^{4:24} Te Grigu: ke nekey ne seked ne inggamit niyu, sikan ded degma ka igseked kaniyu, wey igtimul sika kaniyu. ^{4:25} Mat 13:12; 25:29; Luk 19:26.

pad iya minsan ka deisek ne kandin."

*Ka panunggilingan
meyitenged te beni*

²⁶ Ne migkahi pad mane sikandin, "Ka Peghari te Manama egpekeiling te pangguhuren meyitenged te etew ne migsawed te beni diye te kamet din. ²⁷ Taheed te migpabulus sikandin te himu rin te maaldew wey te peglipereng din te marusilem, migtubu ka beni wey migtulin. Piru ware din nataheyi ke immenu te egtulin. ²⁸ Ka tane ka epabehas te me pinamula, egguna-a egtubu ka dewun, ne egbebehas e, ne egkataman egmatesan e. ²⁹ Emun ke egkeyinuhan e ka pinamula, eggalaben e te kamuney tenged su tinggaani e."

*Ka panunggilingan
meyitenged te behas ne mallilintek*

(Mat. 13:31-32, 34; Luk. 13:18-19)

³⁰ Ne mig-inse si Hisus, "Nekey-a ka egpeilingan ta te Peghari te Manama, wey ke nekey ne panunggilingan ka eggamiten ta kayi? ³¹ Egpekeiling seini te beni te mustasa ne mallilintek ne impamula te etew diye te kamet din. Ka sika ne beni iyan kinareisekan kayi te ampew te tane. ³² Piru ke igpakapamule e sika wey ke egtubu e, egkeyimu e sika ne kinarakelan te langun ne me pinamula. Egderakel e ka me sugpang wey egsesalag e

ka me manuk-manuk diye te egdalungan ne me sugpang din."

³³ Ne masulug pad ne me panunggilingan ne iling kayi ka inggamit ni Hisus te pegpanulu din te lalag te Manama diye te me etew ne sumale de te egkasabut dan. ³⁴ Ne ware inlalag din diye te me etew ne ware din ipabaye te panunggilingan. Piru igapasabut din ded ka langun diye te me hibateen din ke sikandan naan de.

Insaparan ni Hisus ka kalamag wey bunlud
(Mat. 8:23-27; Luk. 8:22-25)

³⁵ Te egkasagkup e te sika ne aldew, migkahiyan e ni Hisus ka me hibateen din, "Kuwa kid e su eglapas ki seeye te deyipag te lanew." ³⁶ Ne dutu migengkeran e te me hibateen ka masulug ne me etew wey nanguntud e sikandan te balangey ne in-unturan ni Hisus. Ne due degma me balangey ne miglegse kandan. ³⁷ Ne due miggunguma ne dakel ne kalamag wey imbundul-bundul e te bunlud ka balangey wey hapit e egkapenu te weyig. ³⁸ Piru newulep si Hisus ne miguulunan diye te lebut te balangey. Ne dutu, impupukew e sikandin te me hibateen din wey ingkahiyan, "Talagpanulu, kene ka egkalaggew te hapit kid ma egkalened?"

³⁹ Ne mig-enew si Hisus ne insaparan din ka kalamag wey migkahiyan din ka me bunlud, “Peeneng-eneng kew!” Ne dutu, migsanggel e ka kalamag wey migpeeneng-eneng e ka me bunlud. ⁴⁰ Ne migkahiyan din sikandan, “Mania te nenaaldek kew? Ware bes pegpalintutuu niyu wey pegsalig?”

⁴¹ Ne neinu-inu sikandan wey migmein-inseey ne migkahi, “Hentew buwa etawa seini? Minsan se kalamag wey me bunlud ne egpalintutuu kandin?”

5

Ka pegbawi ni Hisus te inserepan te busew

(Mat. 8:28-34; Luk. 8:26-39)

¹ Ne migpabulus sikandan diye te deyipag te lanew, te inged ne Girasa. ² Te peglegsad e ni Hisus te balangey, sahuhune ne due migsinug-ung kandin ne etew ne inserepan te busew ne diye migpuun te me sulung ne sabalanan. ³ Ka seini ne etew diyad e mig-ugpe te sabalanan wey warad en iya egpakabaku kandin minsan egkeddinaan pad. ⁴ Malasi egbakua te me etew ka belad din wey paa rin te keddina, piru impamigtus din de ka keddina wey ka baku. Ne warad en iya likes ne egpakaleheng kandin. ⁵ Egleug-leug sikandin aldew wey marusilem diye te me

sabalanan wey diye te me bubungan ne egpangpangu-leyi wey egpamalpalian din ka lawa rin te me batu.

⁶ Te pegkakita rin ki Hisus te diye pad te madmariyu, migpallahuy sikandin ka migsinug-ung kandin wey migpanimbuel diye te tangkaan din. ⁷ Ne migpanguleyi sikandin te meemen ne migkahi, “Hisus, Anak te Amana ne Mabantug ne Manama, kena a nikeykew banggawa*! Te ngaran te Manama, egpeyid-u-hid-u a keykew ne kena a legparil!” ⁸ Inlalag din sika tenged su insuhu ni Hisus ka busew ne migkahi, “Busew, awe ka rue te kandin!”

⁹ Ne mig-insaan e ni Hisus sikandin, “Hentew-a ka ngaran nu?”

Ne migtabak sikandin, “Matangen ka ngaran ku, tenged su masulug key.” ¹⁰ Ne amana iya ne migpeyid-u-hid-u ka me busew diye te ki Hisus ne kene egpaaween te seeye ne inged.

¹¹ Ne diye te bayew madmariyu, due masulug ne me babuy ne migpanuwal diye te masandig. ¹² Migpeyid-u-hid-u diye te ki Hisus ka me busew ne migkahi, “Paserepa key ubag nikeykew diye te me babuy.” ¹³ Ne intuhutan e sikandan ni Hisus. Seeye naa, mig-awe e ka me busew diye te etew wey nanerep e diye te me babuy. Ne namallahuy e ka me babuy patupang diye te dalama

* **5:7** Te Grigu: nekey ka tuyu nu keddi?

peendiye te lanew wey nallened e. Me daruwa ne libu (2,000) ka kasuluhan te me babuy.

¹⁴ Ne namallahuy seeye se me talagtameng te babuy diye te siyudad wey diye te me kamet ka migpangguhud. Ne nangendiye ka me etew eyew egnengneng ke nekey ka neyitabu. ¹⁵ Migparani sikandan ki Hisus wey nakita ran ne migpinnuu diye ka etew ne inserepan te masulug ne busew. Migkukumbale e sikandin wey maheteng e ka suman-suman din. Ne tenged due, nenaaldek e sikandan. ¹⁶ Ne sikandan se nakakita te neyitabu te etew ne inserepan te me busew wey te neyitabu te me babuy, migpangguhud e diye te duma.

¹⁷ Ne puun dutu, migpeyid-u-hid-u e ka me etew ki Hisus ne egpaaween dutu te inged dan.

¹⁸ Ne hengkayi te eguntud e si Hisus te balangey, migpeyid-u-hid-u seeye se etew ne migserepan te me busew ne egduma kandin.

¹⁹ Piru ware sikandin parumaa ni Hisus wey migkahiyan, "Uli kad e diye te kaniyu wey pangguhuri nu sikandan te langun ne innimu te Magbebaye due te keykew wey te keyid-u rin keykew."

²⁰ Ne miggipanew e ka etew wey migbunsud e migpangguhud diye te inged

ne egngararanan te Dikapulis[†] meytenged te langun ne innimu ni Hisus diye te kandin, wey neinu-inu ka langun ne etew.

Ka anak te pangulu wey ka eglangeseen

(Mat. 9:18-26; Luk. 8:40-56)

²¹ Nataman, miglapas e man-e si Hisus diye te deyipag te lanew ne miguntud te balangey. Te diyad e sikandin te ilis te lanew, miglibulungan e sikandin te susuluhi ne etew. ²² Ne due miggingga ne sabeka te me pangulu te simbaan te me Hudiyu ne egngararanan ki Hayru. Te pegkakita rin ki Hisus, migpanimbuel sikandin diye te tangkaan din ²³ wey amana migpeyid-u-hid-u ne migkahi, "Egkabigtawan e ka anak ku ne beyi-beyi. Hendiyei nu pa ubag sikandin wey tel-ebi nu te belad nu eyew egkeulian wey egmanekal e."

²⁴ Ne migdume e si Hisus kandin. Ne dutu, amana ne susuluhi ka me etew ne migsinundul kandin ne egmemekgtuku e diye te kandin.

²⁵ Ne due malitan ne eglangeseen seled e te sapulu wey daruwa (12) ne legun, ²⁶ ne amana ne nababayaran ka migpabawi te me talagbawi piru ware sikandin neulii. Ne naamin de due ka langun ne diye te kandin, piru nasi de iya sikandin lahetleti te dalu

[†] 5:20 Ka ipasabut te Dikapulis iyan ka sapulu ne siyudad.

rin. ²⁷ Nakarineg sikandin te guhuren meyitenged ki Hisus, purisu migpatalisek sikandin te masulug ne me etew ka migparani diye te peka ni Hisus wey insamsam din ka kumbale din. ²⁸ Su nekeisip sikandin, “Emun ke epakasamsam a minsan te kumbale din de, egkeulian a iya.”

²⁹ Te pgsamsam te mali- tan te kumbale ni Hisus, due- rue ne migtigpek ka langesa rin wey naheram din te lawa rin ne neulian e sikandin. ³⁰ Ne due-rue ne nakaheram si Hisus ne due geem ne naawe diye te kandin, ne seeye naa ka miglilingey sikandin diye te masulug ne etew ne mig-inse, “Hentew- a ka migsamsam te kumbale ku?”

³¹ Ne migtabak ka me hibateen din, “Pitew ke man de iya te masulug ne me etew seini ne egmasegsehey e due te keykew, ne mania te eginse ke pad ke hentew-a ka migsamsam keykew?”

³² Piru migpalangas-langas si Hisus ka egpammitew ke hentew ka migsamsam kandin. ³³ Ne tenged su nanengnengan te mali- tan ke nekey ka neyitabu kandin, migparani sikandin ki Hisus ne migkelkel te kaaldek wey mig-usengul diye te tangkaan din wey ingguhud din e ka male- het. ³⁴ Ne migkahiyan ni Hisus sikandin, “Beyi, ka pegpalintutuu nu ka nekeuli keykew. Uli ka ne meupiye

e se geyinawa. Kene kad egliberan te dalu nu.”

³⁵ Te sasangan pad ne eglalag si Hisus, due me etew ne migguma ne diye egpuun te baley ni Hayru. Migkahiyan dan si Hayru, “Migpatey e ka anak nu. Kema ke egkabanggew nu re ka talagpanulu.”

³⁶ Piru imbalahad ni Hisus ka ingguhud dan wey migkahiyan din si Hayru, “Kene ka egkalaggew. Palintutuu ke re.” ³⁷ Ne ware migduruma sikandin gawas engki Pidru wey te tahasuled ne ensi Santiyagu wey Huwan. ³⁸ Te peg- ginguma ran diye te baley te pangulu te simbaan te me Hudiyu, nakita ni Hisus ne newukag ka me etew. Ne due egmaninehew wey egman- dalawit.

³⁹ Ne migseled e si Hisus te baley wey migkahiyan din sikandan, “Mania te egkengewukag kew wey egmandalawit? Ware migpatey ka beyi- beyi su nakalipereng de sikandin.”

⁴⁰ Piru migdali-dian dan si Hisus. Ne dutu, impali- hawang e sikandan langun ni Hisus wey induma rin ka amey wey iney te bate wey ka me hibateen din te migseled diye te impaley- asan te bate. ⁴¹ Ne miggengenan din ka belad te bate te migkahi, “Talita kumi!” Ka buut igpasabut, “Beyi-beyi, enew ka!” ⁴² Ne due-rue ne mig-enew ka beyi-beyi wey miggiphapanew e. Ne dutu,

amana sikandan nawanganan. Sapulu wey daruve (12) e sikandin ne leg-un. ⁴³ Migteesan sikandan pegpaheti ni Hisus te keilangan ne ware minsan hentew ne egpakanengneng te neyitabu. Ne impabehayan din ka bate te egkeenen.

6

Ka peggubabe ki Hisus te matig-Nasarit

(Mat. 13:53-58; Luk. 4:16-30)

¹ Ne mig-awe e si Hisus te seeye ne inged wey mig-uli diye te lungsud ne intulinan din, wey migduma kandin ka me hibateen din. ² Te pegginguma te Aldew te Peggimeley, migpanulu si Hisus diye te simbaan te me Hudiyu. Ne masulug ka nakarineg kandin ne neinuinu ne migkahi, "Hendei rin buwa natueni seini langun? Hendei rin buwa nakuwa ka katuenan din? Immenu rin buwa te eggimu te me kein-inuwan? ³ Kene naa ne sikandin ka talagbebaley? Kene naa ne si Mariya ka iney rin, wey kene naa ne ensi Santiyagu, si Husi, si Hudas wey si Simun ka me suled din? Ware naa ne kayi nangugpe ka me atebey rin?" Sikan naa, natameneng e sikandan ki Hisus.

⁴ Ne migkahiyan sikan dan ni Hisus, "Egtahuren ka sabeka ne prupita te minsan

hendei gawas te inged ne intulinan din, te me karumaan din wey te pamilya rin."

⁵ Purisu ware nekeyimu si Hisus te me kein-inuwan te seeye ne inged, gawas te pilapila re ne me etew ne egmanderalu ne intel-eban din te belad din ne neneulian. ⁶ Ne neinu-inu si Hisus te ware migpalintutuu kandin ka me etew.

Ka pegsuhu ni Hisus te me hibateen din

(Mat. 10:5-15; Luk. 9:1-6)

Nataman, miggendiyad e si Hisus te marani ne me bariyu eyew te pegpanulu te me etew. ⁷ Nataman, impeparani rin ka sapulu wey daruwa (12) ne me hibateen din wey impeyipanew rin sikandan te tigdaruwa wey impamehayan din te katenged te pegpangalew te me busew. ⁸ Ne impanatahaan din sikandan ne kene egpeuyanen te minsan nekey gawas te tuked. Kene sikandan egpeuyanen te keenen, kabil, wey te seleppi. ⁹ Egpasesandalen sikandan piru kene egpeuyanen te egilisan. ¹⁰ Migkahiyan pad man-e sikandan ni Hisus, "Emun ke due baley ne egpamaneyikan niyu, diye kew re iya ugpe taman te egawe kew e te sika ne inged. ¹¹ Ke due inged ne kene egdawat kaniyu wey kene egpammineg kaniyu, pelpela niyu ka alinepung diye te paa niyu ke eg-awe kew e isip

palinneu ne ware sikandan ikahale te Manama."

¹² Sikan naa, nangipanew e sikandan wey migwali te keilangan ne eg-inniyug ka me etew te me sale dan. ¹³ Masulug ka impangalew ran ne me busew wey masulug ka egmanderalu ne nangitsan dan te lana ne neneulian.

Ka pegpatey ni Huwan ne Talagbewutismu

(Mat. 14:1-12; Luk. 9:7-9)

¹⁴ Tenged su migmabantug e si Hisus, narineg e ni Hari Hirudis ka guhuren meyitenged kandin. Due duma ne egkahi, "Neuyag ded si Huwan ne Talagbewutismu, sikan naa ka due geem din te peggimu te me kein-inuwan."

¹⁵ Piru egkahi ka duma, "Sikandin si Ilyas."

Ne ka duma egkahi degma, "Prupita sikandin, iling te sabeka te me prupita dengan."

¹⁶ Te pegkarineg dutu ni Hirudis, migkahi e sikandin, "Neuyag bes si Huwan, ka etew ne impatempuhan ku te ulu." ¹⁷⁻¹⁸ Su si Hirudis ka migparakep wey migpaprisu ki Huwan. Innimu ni Hirudis seeye su insaparan sikandin ni Huwan te peg-ahew ki Hirudiyas ne asawa te suled din ne si Pilipi. Miggendue si Huwan, "Supak te Balaud ni Muwisis ne eg-ahawen nu ka ipag nu."

¹⁹ Ne puun dutu, nabelu si Hirudiyas ki Huwan wey igkeupii rin ne eggimatayan

sikandin piru kene din egkeyimu,²⁰ su naaldek si Hirudis ki Huwan. Su nakanengneng sikandin ne matareng wey matulus ne etew si Huwan, purisu ware din tuhuti ne eggimatayan sikandin. Amana sikandin nalibeg te guhuren ni Huwan, piru egkeupian sikandin ne egpammineg.

²¹ Piru miggingga red ka timpu ne egtetaharan ni Hirudiyas. Ne seeye ne aldew ka neetawan ni Hirudis. Migsahakeen si Hirudis wey impanginggat din ka me upisyal din, ka me kepitan te me sundalu, wey ka me pangulu diye te Galiliya. ²² Ne migseled wey migsayew ka anak ni Hirudiyas ne beyi, wey nahale si Hirudis wey ka me mahaliyug din. Ne migkahiyan ni Hirudis ka beyi, "Buyu ka te minsan nekey ne igkeupii nu, su igbehey ku keykew."²³ Ne migpahunlibet sikandin te beyi ne migkahi, "Minsan nekey ne egbuyuen nu, igbehey ku keykew minsan pad ka tengen te karatuuan ku."

²⁴ Miglihawang ka beyi wey mig-inse te iney rin, "Ine, nekey buwa ka egbuyuen ku?"

Ne migtabak ka iney rin, "Iyan nu buyua ka ulu ni Huwan ne Talagbewutismu."

²⁵ Ne migdagdahew miglibed ka beyi diye te Hari wey migkahi, "Egkeupian a ne igbehey nu keddi kuntee

ka ulu ni Huwan ne Talag-bewutismu ne diye igtahu te maluag ne pinggan."

²⁶ Ne amana nalaggew ka Hari dutu. Piru tenged te nakapahunlibet sikandin wey narindeg seeye te me mahaliyug din, kene din igkeupii ne kene egkatuman ka inlalag din diye te beyi.

²⁷ Due-rue ne migsuhu ka Hari te sundalu ne talaggi-lang ne igpeuyan ka ulu ni Huwan. Ne miggendiyad e ka insuhu wey intamperan din e te ulu si Huwan diye te prisuwatan. ²⁸ Diye din itahu te maluag ne pinggan ka ulu ni Huwan wey imbehey rin diye te beyi, wey imbehey e degma te beyi diye te iney rin. ²⁹ Te pegkarineg dutu te me hibateen ni Huwan, nangendiyad e sikandan wey in-angey ran e ka lawa rin wey inlelebeng dan e.

Ka pegpakeen ni Hisus te 5,000 ne etew

(Mat. 14:13-21; Luk. 9:10-17; Huw. 6:1-14)

³⁰ Nataman, nanlibed e diye te ki Hisus ka me hibateen din wey impang-guhuran dan sikandin te langun ne neyimu ran wey te impanulu dan. ³¹ Ne puun su egmekegsabal-subal re ka masulug ne etew, kenad e egpakakeen ensi Hisus. Sikan naa, migkahiyayan din e ka me hibateen din, "Kuwa kid e su eggendiye ki te inged ne ware etew

eyew egpekeyimeley kew te minsan dagdahew re." ³² Ne nanguntud e sikandan te balangey wey nangendiyad e te inged ne ware etew ne sikandan de.

³³ Piru masulug ka me etew ne nekeila kandan te pegligkat dan. Purisu namallahuy ka me etew ne migpuun te nalein-lein ne me lungsud peendiye te eggendiyaan enni Hisus, wey nekewun-a pad sikandan nekeuma kandan. ³⁴ Te peglegsad ni Hisus te balangey, nakita rin ka susuluhi ne etew, wey neyidu sikandin kandan tenged su nekeiling e sikandan te me karniru ne ware talagtameng. Purisu imbunsuran e sikandan panulua ni Hisus wey masulug ka impanulu din kandan. ³⁵ Ne hengkayi te maapun e, migparani diye te ki Hisus ka me hibateen din wey migkahi, "Maapun e seini wey kayi ki pe ma te mammara ne inged ne kene egkeugpaan. ³⁶ Peendiya nu sikandan te marani ne me kamet wey me bariyu eyew egpakabeli te egkakeen dan."

³⁷ Piru migkahiyayan din sikandan, "Sikaniyu ka egbehay kandan te egkeenen."

Ne migkahi sikandan, "Etuwey! Egpeyipanawen key naa nikeykew wey egpabeliyan te paan ne egkentiddad te daruwa ne gatus (200) ne dinaryu* eyew ipakapeen kandan?"

^{6:34} Num 27:17; 1Har 22:17; 2Kru 18:16; Isi 34:5; Mat 9:36. * ^{6:37} Ka sabeka ne dinaryu, eleg ne igbayad te senge kaaldew ne pegbasuk te etew.

³⁸ Ne mig-inse sikandin kandan, "Pilaa ne timman te paan ka due te kaniyu? Na, tengtengi niyu."

Te nakita ran e seeye, migkahiyan dan e si Hisus, "Lalimma ne timman ka paan wey daruwa ka ngalap te weyig."

³⁹ Nataman, impapunduk-punduk e papinnuuwa ni Hisus sikandan langun diye te me hilamunen. ⁴⁰ Purisu naminnuu e sikandan ne migpunduk-punduk te tigmahatus (100) wey te tiglalimma ne pulu (50). ⁴¹ Ne ingkuwa ni Hisus ka lalimma ne malisen ne paan wey ka daruwa ne ngalap te weyig, ne migleng-ag sikandin diye te langit wey migpasalamat te Manama. Nataman, impanepik-tepik din e ka paan wey impamehey rin e diye te me hibateen din eyew igpepamehey diye te me etew. Ne impanalad din ded degma ka me ngalap diye te etew. ⁴² Ne nangeen sikan-dan langun wey nenabulung-bulung, ⁴³ wey nakalimud pad sikandan te sapulu wey daruwa (12) ne liyang ne napenu te same te paan wey te ngalap te weyig. ⁴⁴ Miggigunga te lalimma ne libu (5,000) ka kasuluhan te me lukes de ne nangeen te paan.

*Ka peggipanew ni Hisus
diye te kulit te weyig*
(Mat. 14:22-33; Huw. 6:15-21)

⁴⁵ Ne due-rue ne impeuntud ni Hisus ka me hibateen din te balangey wey impewun-a rin e diye te inged ne Bitsayda ne diye te deyipag te lanew taheed te impeuli din e ka me etew. ⁴⁶ Te nakapanaha-tahe e si Hisus te me etew, migtakereg e sikandin diye te bubungan eyew eg-ampu. ⁴⁷ Te marusilem e, diye de due si Hisus ka migsabsabeka. Ne nekeelat-elat e mule te lanew ka balangey. ⁴⁸ Nakita rin ne neyirapan ka me hibateen din ne epgamegsey, su egkasinug-ung dan ka kalamag. Hengkayi te mahaan e egpamatlapalat, innendiyaan e sikandan ni Hisus ne miggipanew diye te kulit te weyig. Egliharan din de perem sikandan, ⁴⁹ piru te pegkakita ran kandin ne miggipanew diye te weyig, nakasuman-suman sikan-dan ne sapin seeye wey migmanguleyi e sikandan. ⁵⁰ Naalatan sikandan langun te pegkakita ran kandin.

Ne sahuhune ne migkahiyan sikandan ni Hisus, "Pakan-nekal kew! Kene kew kaaldek su sikeddiey seini!" ⁵¹ Nataman, mig-untud e si Hisus te balangey duma kandan wey mig-engked e ka kalamag. Ne dutu, amana sikandan neneinu-inu. ⁵² Su ware sikandañ nakasabut te kaluwasan te innimu rin ne kein-inuwan ne migmasalig ka paan tenged su makehal ka me ulu ran.†

† 6:52 Te Grigu: makehal ka me pusung dan.

Ka pegpamawi ni Hisus te migmanderalu diye te Ginisarit

(Mat. 14:34-36)

⁵³ Te nakalapas e sikandan, diye sikandan nakatuhun te inged ne egngaranan te Ginisarit, ne inniket dan e ka balangey ran diye te ilis te lanew. ⁵⁴ Te peglegsad dan e te balangey, due-rue ne neilaan si Hisus te me etew. ⁵⁵ Namallahuy ka me etew ne nangendiye te me bariyu ne marani dutu wey nanguyan te egmanderalu ne impeyibat te me hibatanan dan diye te inged ne narinehan dan ne diye si Hisus. ⁵⁶ Minsan hendei eggendiye si Hisus, diye te me bariyu, wey ke diye te me siudad, wey ke diye te me sityu, egpanguyanen iya te me etew ka egmanderalu wey diye igmeyibat te me palingkiyan. Ne migpeyidu-hid-u sikandan ki Hisus ne egpasamsamen sikandan minsan te sidsid de te kumbale din. Ne ka langun ne nakasamsam dutu, neulian iya.

7

Ka tuluuwen te me kabuybuyahan

(Mat. 15:1-9)

¹ Due miglibulung diye te ki Hisus ne me Parisiyu wey me talagpanulu te Balaud te Manama ne diye migpuun te Hirusalim. ² Nakakita sikan dan te due me hibateen ni Hisus ne migkeen ne ware mig-ayad-ayad migmanlu-lu

te me belad dan, wey supak seeye te impanulu dan.

³ (Su ka me Parisiyu wey ka langun ne me Hudiyu, kene egkeen ke kene egpakaayad-ayad egpakapanlu-lu te me belad dan sumale te tuluuwen te me kaap-apuan dan. ⁴ Emun ke egpuun sikandan diye te palingki, kene sikandan egkeen te minsan nekey ke kene sikandan egpakaayad-ayad egpakapanlu-lu. Masalig pad ka tuluuwen ne egtumanen dan iling te pegpanlu-lu te me ubab, kuren, wey me kepitira.)

⁵ Ne mig-inse ki Hisus ka me Parisiyu wey ka me talagpanulu te Balaud te Manama ne miggenendue, “Mania te ware tumana te me hibateen nu ka tuluuwen te me kaap-apuan ta? Migkeen de due sikandan ne ware mig-ayad-ayad migmanlu-lu te me belad dan.”

⁶ Ne migtabak si Hisus kandan, “Malehet iya ka impanagne ni prupita Isayas meyitenged kaniyu te egmapitew-pitew re. Sumale te insulat din ne miggenendue,

‘Diye de egpuun te me be-be te seini ne me etew ka pegtahud dan keddi, piru mariyu ka pusung dan keddiey.

⁷ Ware karuan te pegsimba ran keddiey, su iyan dan igpanulu ka me balaud ne innimu re te

me etew isip kun Bal-aud ku.'

⁸ Ne mig-engkeran niyu ka me suhu te Manama, wey iyan niyu intuman ka tuluuwen ne innimu re te etew."

⁹ Ne migkahi pad man-e si Hisus, "Mangateu kew iya ne egksamili te suhu te Manama eyew te peg-ikul te tuluuwen niyu!" ¹⁰ Su sumale ki Muwisis, 'Tahura nu ka amey wey iney nu,' wey 'Ka minsan hentew ne egtampele te amey wey iney rin, keilangan iya ne eggimatayan sikandin.' ¹¹ Piru migpanulu kew mule te ka minsan hentew ne due perem igkabulig diye te amey wey iney rin egkaayun ne egkahi diye te kandan, 'Kurban seini' (ka igapasabut kayi, 'Para seini te Manama'). ¹² Sikan naa, ware niyud e tuhuti sikandin ne egbulig te amey wey iney rin. ¹³ Na, puun due innimu niyu ne ware karuan ka lalag te Manama pinaahi te peg-ikul niyu te tuluuwen niyu. Ne masulug pad ka innimu niyu ne iling kayi."

Ka egpakapamalindit te etew

(Mat. 15:10-20)

¹⁴ Ne impeumew e man-e ni Hisus ka me etew wey migkahiyan, "Pammneg kew langun wey sabuta niyu ka iglalag ku." ¹⁵⁻¹⁶ Ware minsan nekey ne egkaabeleng te etew ne egpakamalindit

kandin, ke kene, iyan ka egligwe puun kandin."*

¹⁷ Te mig-engkeran e ni Hisus ka me etew wey migseled e diye te baley, mig-insaan e sikandin te me hibateen din meyitenged te panunggilingan. ¹⁸ Ne migkahiyan ni Hisus sikandan, "Ew, ware kew bes degma nakasabut? Ware kew bes nakanengneng te minsan nekey ne egkaabeleng te etew, kene egpakamalindit kandin?" ¹⁹ Su ware sika migseled diye te pusung din, ke kene, diye de te getek din wey eglihawang ded man-e te lawa rin." (Pinaahi te inlalag ni Hisus, migpasabut ne malinis ka langun ne keenen.)

²⁰ Ne migkahi e man-e sikandin, "Ke nekey ka eglihawang puun te pusung te etew, iyan sika ka egpakamalindit kandin. ²¹ Su diye egpuun te pusung te etew ka mareet ne suman-suman, ka pegpeylabetey se kene ne alunggun, ka pegpanakew, ka peggimatey, ²² ka pegpanlibug, ka pegkaalamamen, ka peggimu te langun ne mareet, ka pegpanlimbung, ka pegkaagkayen, ka pegkeimma, ka peg-iran-iran te duma, ka pegpeggasal, wey ka keungelan. ²³ Ka seini se langun ne mareet ne diye egpuun te pusung te etew ka egpakamalindit kandin."

7:10 Iks 20:12; Diy 5:16; Iks 21:17; Lib 20:9. * **7:15-16** Due me sinulat ne inlagkes ka birsikulu 16 piru ware seini diye te malehet ne migpuunan. Intimul naan de seini ne miggenendue: Pammneg ka ke due talinga nu.

*Ka pegpalintutuu te malitan ne matig-Kanaan
(Mat. 15:21-28)*

24 Nataman, mig-awe e si Hisus te sika ne inged wey miggendiyad e sikandin te me inged ne sakup te Tiru. Ne diye migpamaneyik si Hisus te sabeka ne baley wey kene egkeupian ne due epakanengneng ne dutu sikandin, piru ware din iya nekeeles. 25 Ne due malitan ne inserepan te busew ka anak din ne beyi-beyi. Te pegkarineg te malitan ne dutu si Hisus, due-rue ne miggendiye sikandin wey mig-usengul diye te tane te egkatangkaan ni Hisus. 26 Ne migpeyid-u-hid-u sikandin ki Hisus ne igpaalew ka busew ne diye te anak din. Ka seeye ne malitan kene ne Hudiyu wey diye neetew te Pinisiya ne sakup te prubinsya te Sirya. 27 Sikan naa ka migkahiyan ni Hisus ka malitan, “Keilangan ne iyan eggun-aan eggibulunga ka me bate su kene ne meupiya ne egkuuen ka keenen dan wey igsunggud te me asu.”

28 Piru migtabak ka malitan, “Malehet sika Magbebaye, piru minsan ka me asu ne diye te selib te lamisa, egpakakeen ma te me mummu ne egkengeulug te me bate.”

29 Ne migkahiyan sikandin ni Hisus, “Tenged te inlalag nu, egkaayun kad e ne eg-uli su mig-awe e ka busew diye te anak nu.”

30 Ne mig-uli e ka malitan wey neyingumaan din ka anak din ne miggibat diye te lantawan, wey mig-awe e ka busew diye te kandin.

Ka pegbawi ni Hisus te kene egdineg wey ngasel

31 Nataman, miglibed e si Hisus diye te Lanew te Galiliya puun te me inged ne sakup te Tiru wey diye sikandin migbaye te Sidun wey me inged ne sakup te Dikapulis.[†] 32 Ne due sabeka ne etew ne kene egdineg wey ngasel ne inuyan te me etew diye te ki Hisus. Migpeyid-u-hid-u sikandan ki Hisus ne egpatel-eban te belad din ka etew. 33 Ne impasuwey sikandin ni Hisus diye te masulug ne etew eyew egpekegdaruwa naan de sikandan. Ne intiyuk din te me kemel rin ka me talinga te etew. Nataman, mig-ileb si Hisus wey impulit din seeye diye te dile te etew. 34 Migleng-ag sikandin diye te langit wey miggeheyinawa te maralem ne migkahi diye te etew, “Ipata,” ka igapasabut, “Egkalukatan ka.”

35 Ne sauhune ne egpakineng e ka etew wey migmewumel e ka dile din ne mateyul e ka peglalag din. 36 Ne impegpehetaan teesi ni Hisus ka me etew ne kene egpepangguhuren te minsan hentew. Piru minsan inleghetan sikandan teesi ni Hisus, nanasnasian de iya sikandan ka migpangguhud

[†] 7:31 Ka igapasabut te Dikapulis iyan ka sapulu ne siyudad.

te neyitabu. ³⁷ Amana iya neinu-inu ka me etew wey migkahi, "Amana ne tetelesi ka langun ne innimu rin! Egkabawian din minsan ka kene egdineg wey ka ummew."

8

Ka pegpakeen ni Hisus te 4,000 ne me etew

(Mat. 15:32-39)

¹ Te seeye ne timpu, miglibulung e man-e ka susuluhi ne etew diye te ki Hisus ne warad e egmangeenen. Ne dutu, in-umew ni Hisus ka me hibateen din wey migkahiyan, ² "Neyid-u a te me etew su natateluwan e sikandan ka egdumarama keddi ne warad e egmangeenen. ³ Ne emun ke egpeulien ku sikandan ne egmanggutasan, egkengalepu sikandan diye te deralanen su mariyu pe ma ka impuunan te duma."

⁴ Ne migkahi ka me hibateen din, "Etuwey, hendei ki naan de iya egkuwa te egka-keen ne igpakeen te seini ne me etew te kayi ki pe ma te mammara ne inged ne kene egkeugpaan?"

⁵ Ne mig-inse si Hisus kandan, "Pilaa ne timman ka paan ne due te kaniyu?"

Ne migtabak sikandan, "Pitu ne timman."

⁶ Ne impapinnuu e ni Hisus ka me etew diye te tane, ne ingkuwa rin ka pitu ne timman ne paan wey impasalamat te Manama.

Nataman, impanepik-tepik din e ka paan wey impamehey rin diye te me hibateen din eyew igpasendad diye te me etew. Ne insendad dan e seeye diye te me etew. ⁷ Ne due degma mallilintek ne ngalap te weyig ne pila-pila re iya wey impasalamatan din seeye. Ne migsuhu si Hisus ne igpepanedad ded degma seeye diye te me etew. ⁸ Nangeen sikandan wey nenabbulung-bulung, wey duen pad nalimud dan ne nasame ne nakapenu te pitu ne liyang. ⁹ Me hep-at ne libu (4,000) ka kasulug te me etew. Nataman, impeuli e ni Hisus ka me etew. ¹⁰ Ne due-rue ne miguntud sikandin te balangey duma te me hibateen din wey miggendiye te inged ne Dalmanuta.

Ka me pangulu ne egbuyu te palinneu

(Mat. 16:1-4)

¹¹ Nataman, due me Parisiyu ne miggingga wey migpakig-apul ki Hisus. Migbuyu sikandan ne egpapitawen te kein-inuwan ne egpuun te langit eyew te peg-eleg-eleg kandin. ¹² Ne miggeheyinawa si Hisus te maralem wey migkahi, "Mania te egbuyu te kein-inuwan ka me etew te kuntee ne timpu? Egnangenan ku sikaniyu te malehet: ware kein-inuwan ne igpaka-pakita kandan!"

13 Ne mig-engkeran e sikandan ni Hisus wey mig-untud e man-e te balangey ne peendiye te deyipag te lanew.

*Ka igpatulin te paan te me
Parisiyu wey ni Hirudis
(Mat. 16:5-12)*

14 Nalingew ka me hibateen ne eg-uyan te keenen gawas te sabeka ne paan ne diye te balangey. **15** Ne impanpanayan sikandan ni Hisus ne migkahi, “Tanud-tanud kew wey bantey kew te igpatulin te paan te me Parisiyu wey ni Hirudis.”

16 Ne migmalalahey e ka me hibateen din ne migkahi, “Nalalag din sika su ware ki ma nakabebewu te paan.”

17 Nanengnengan ni Hisus ke nekey ka igkewengete dan, sikan naa mig-insaan din sikandan, “Mania te egkasasew kew te ware paan niyu? Ware kew bes pad nakasabut? Makehal bes ka me ulu niyu?” **18** Due me mata niyu piru kene kew egpakkita, ne due me talinga niyu piru kene kew egpakkineg. Ware niyu nasuman-suman **19** ka pegpanepik-tepik ku te lalimma ne timman ne paan ne impakeen ku te lalimma ne libu (5,000) ne me etew? Ne pilaa ne liyang ka napenu te nalimud niyu ne egkeenen ne nenasame te me etew?”

Ne migtabak sikandan, “Sapulu wey daruwa (12) ne liyang.”

20 “Ne ka pitu ne paan ne impakeen ku te hep-at ne libu (4,000) ne me etew, pilaa ne liyang ka napenu te nalimud niyu ne egkeenen ne nenasame te me etew?”

Ne migtabak sikandan, “Pitu ne liyang.”

21 Ne migkahiyan sikandan ni Hisus, “Ware kew naan pad man-e nakasabut?”

Ka pegbawi ni Hisus te butud diye te Bitsayda

22 Te pegginguma ran te Bitsayda, due butud ne inuyan te me etew diye te ki Hisus, wey migpeyid-u-hidu sikandan ne egsamsamen din ka etew. **23** Ne ingkitkit ni Hisus ka etew diye te madmariyu e te bariyu. Nata-man, in-ileban din e ka mata te butud wey intel-eban din te belad din, wey mig-insaan din e, “Due nakita nu?”

24 Ne migtenggak ka etew ne migkahi, “Nakakita a te me etew, piru egpekeiling sikandan te me kayu ne egmangipanew.” **25** Ne intel-eban e man-e ni Hisus te belad din ka mata te butud. Ne migmemetmet migpitew ka butud wey egpakkita rin e wey egkamelmehan din e ka langun. **26** Ne impeuli e ni Hisus seeye se etew diye te ugpaan din wey migkahiyan, “Kene kad e baye dutu te bariyu.”

*Ka pegpataha ni Pidru
meyitenged ki Hisus
(Mat. 16:13-20; Luk. 9:18-21)*

8:15 Luk 12:1. * **8:17** Te Grigu: Makehal ka me pusung niyu? 5:21; Isi 12:2; Mar 4:12. **8:18** Hir

²⁷ Ne migpabulus si Hisus duma te me hibateen din diye te me bariyu ne sakup te Sisarya Pilipus. Te sasangan pad sikandin ne egmangipanew, mig-insaan ni Hisus ka me hibateen din, “Hentew e kun naa sumale te me etew?”

²⁸ Ne migtabak sikan dan, “Migkahi ka duma ne sikeykew kun si Huwan ne Talagbewutismu. Ka duma degma migkahi ne sikeykew kun si Ilyas, pиру ka duma migkahi ne sabeka ke kun te me prupita.”

²⁹ Ne mig-inse si Hisus kandan, “Pиру ke sikaniyu ka egpalalahen, hentew e naa iya?”

Ne migtabak si Pidru, “Sikeykew iya ka Kristu.”[†]

³⁰ Ne migteesan sikandan ni Hisus ne kene egpepangguhuren te minsan hentew meyitenged kandin.

Ka pegpangguhud ni Hisus te peg-antus wey kamatayen din

(Mat. 16:21-28; Luk. 9:22-27)

³¹ Nataman, migbunsud e si Hisus ka migpanulu kandan ne ka Anak te Etew keilangan ne eg-antus te igmeulaula kandin, wey egsamsamilian sikandin te igbuyag te me Hudiyu, wey te me pangulu te me talagpanubad wey te me talagpanulu te Balaud te Manama. Eggimatayan dan

sikandin wey egkeuyag ded te igkatelu ne aldew. ³² Ne inlalag ni Hisus seeye diye te me hibateen din te ware pegkehe. Tenged dutu, impasuwey e ni Pidru si Hisus wey insaparan din. ³³ Piru migbalikid si Hisus wey migtengtengan din ka me hibateen din, ne insaparan din e si Pidru te migkahi, “Awe ka rue Meibulan! Su kene ne Manama ka indapihan nu, ke kene, ka me etew!”

³⁴ Ne impeparani ni Hisus ka me etew duma te me hibateen din wey migkahiyan, “Ke hentew seeye se egkeupian ne eg-ikul keddiey, keilangan ne engked te kandin ne igkeupii wey egtiang te kandin ne krus wey eg-ikul keddiey. ³⁵ Su seeye se egkeupian ne egluwas te kandin ne umul, nasi egkawarei kayi, pиру se-eye se egkawaraan te kandin ne umul tenged keddiey wey te Meupiya ne Panugtulen, egpakarawat te umul ne ware egtamanan. ³⁶ Nekey naa ka egkakuwa te etew ke egkaangken din ka langun ne tahu kayi te ampew te tane, pиру egkawaraan te umul rin? Ware iya!

³⁷ Su ware igkabehey te etew eyew egkaawi din ka kandin ne umul. ³⁸ Su emun ke igkeyilew a duma te lalag ku te minsan hentew puun te me etew kuntee ne amana ne makasesale wey kenad

8:28 Mar 6:14-15; Luk 9:7-8.
Kristu, Insaad ne Manluluwas.
Luk 17:33; Huw 12:25.

8:29 Huw 6:68-69. [†] **8:29** Ka igpasabut te
8:34 Mat 10:38; Luk 14:27. **8:35** Mat 10:39;

egpalintutuu te Manama, igkeyilew ku degma sikandin te timpu ne eglibed e ka Anak te Etew duma te katelesan te Amey rin wey te matulus ne me panalihan.”

9

¹ Ne migkahiyan sikandan ni Hisus, “Egnanganan ku sikaniyu te malehet: due me etew ne kayi kuntee ne kene pad egpatey taman te egkakita ran e ka Peghari te Manama ne eggingga duma te geem din.”

*Nabalbalawan si Hisus
(Mat. 17:1-13; Luk. 9:28-36)*

² Peglihad te hen-em ne aldew, induma ni Hisus ensi Pidru, si Santiyagu, wey si Huwan te migtakereg diye te matikang ne bubungan ne sikandan de. Te pegtenteng dan ki Hisus, nababalaowan e sikandin. ³ Ne miglayag te kaangkag ka kumbale din, ne ware minsan hentew kayi te ampew te tane ne epakapamaangkag te iling dutu. ⁴ Nataman, nakita ran ensi Ilyas wey Muwisis ne migpakiglagalag ki Hisus. ⁵ Ne migkahiyan ni Pidru si Hisus, “Talagpanulu, meupiya te kayi key* kuntee. Eggimu key te tatelu ne leeb: sabeka ka keykew, sabeka ki Muwisis, wey sabeka ki Ilyas.” ⁶ Nakahi rin sika su ware sikandin nakanengneng ke nekey ka iglagalag din su nenaaldek ma sikandan.

⁷ Ne due miggingga ne gapun ne migdalung kandan, ne due laheng ne migpuun dutu te gapun ne miggendue, “Seini ka pinalangge ku ne Anak, pamineha niyu sikandin!” ⁸ Ne due-rue ne migmanlangas-langas sikandan, piru ware nakita ran gawas ki Hisus.

⁹ Ne taheed te egmatupang e sikandan te bubungan, migteesan sikandan ni Hisus ne kene egpepangguhuren ke nekey ka nakita ran taman te egkeuyag e ka Anak te Etew.

¹⁰ Sikan naa intuman dan iya ka ingkahi ni Hisus. Piru migmein-inseey sikandan se tatelu ke nekey ka kaluwasan te ingkahi rin ne egkeuyag din e. ¹¹ Ne mig-insaan dan e si Hisus, “Mania te migkahi ka me talagpanulu te Balaud te Manama ne keilangan ne iyan egguna-a ki Kristu eggen-dini si Ilyas?”

¹² Migtabak si Hisus, “Malehet iya ne egguna-a eggendini si Ilyas eyew te peg-ayad-ayad te langun. Piru mania te nasulat te Kasulatan ne keilangan ne egbaybayaran wey egsamsamilian ka Anak te Etew? ¹³ Piru egnanganan ku sikaniyu te miggendinid e si Ilyas, wey innimu ran diye te kandin ka langun ne igkeupii ran ne eggimuwen sumale te nasulat te Kasulatan meyitenged kandin.”

Ka pegbawi ni Hisus te

9:2 2Pid 1:17-18. * **9:5** key: wey ke ki.

9:11 Mal 4:5; Mat 11:14.

9:7 Mat 3:17; Mar 1:11; Luk 3:22.

*bate ne inserepan te busew
(Mat. 17:14-21; Luk. 9:37-43a)*

¹⁴ Te peglibed enni Hisus diye te duma ne me hibateen din, nakita ran ka susuluhi ne etew ne miglingut kandan, wey due me talagpanulu te Balaud te Manama ne migpakig-apul kandan. ¹⁵ Ne neinu-inu ka langun ne etew te pegkakita ran ki Hisus, wey namallahuy e sikandan ka migdugpu wey mig-elit-elit kandin. ¹⁶ Ne mig-insaan sikandan ni Hisus, “Nekey-a ka igmekeg-apul niyu?”

¹⁷ Due sabeka ne etew ne diye te kasuluhan ne migtabak, “Talagpanulu, in-uyan ku kayi te keykew ka anak ku ne lukes ne kene egpikalalag su inserepan te busew. ¹⁸ Ne emun ke egumaan e sikandin te busew, egbalatey sikandin diye te tane. Ne egbubuke e ka be-be din wey egpakihet e te ngipen din, ne egkataman egkeleg e sikandin. Inhangyu ku ka me hibateen nu te peg-alew te busew piru ware sikandan nekeyimu.”

¹⁹ Ne migkahiyan ni Hisus sikandan, “Sikaniyu se me etew te kuntee ne timpu, ware pegpalintutuu niyu. Hendei bes taman ka pegduma-ruma ku kaniyu? Hendei bes taman ka pegantus ku kaniyu? Uyana niyu ka bate kayi te keddi!” ²⁰ Ne in-uyan dan e diye te kandin ka bate. Te pegkakita te busew ki Hisus, sauhune ne in-umaan din e ka bate ne egbabuyen e, wey napeled

diye te tane wey miglilid-lilid ne migbubuke se be-be.

²¹ Ne mig-insaan ni Hisus ka amey te bate, “Kamenu e kaluhey sikandin ka egkeiling due?”

Ne migtabak sikandin, “Puun pad te pegkabate din.

²² Kamasalig e sikandin elehi te busew te eggimatey pinaahi te pegdegpak kandin diye te hapuy wey diye te weyig. Ne emun ke due egkeyimu nu, ikeyid-u key wey bulihi key nikeykew!”

²³ Ne migkahiyan sikandin ni Hisus, “Mania te migkahiyan a nikeykew ke due egkeyimu ku? Egkeyimu te etew ka langun ke due pegpalintutuu rin!”

²⁴ Ne due-rue ne migpan-guleyi ka amey te bate ne migkahi, “Migpalintutuu a, piru bulihi a su deisek de ka pegpalintutuu ku!”

²⁵ Te pegkakita ni Hisus ne egmamallahuy e ka me etew ne egdalapak kandan, in-alew din e ka busew ne miggenendue, “Sikeykew se busew ne egpakteum-mew wey egpaketabengel, egsuhu a keykew ne awe ka rue te bate wey kene kad e libed serep diye te kandin.”

²⁶ Migpanguleyi ka busew wey impakunkunaan din e ne egbabuyen ka bate wey nataman, miglihawang e sikandin. Ne hendue te migpatey e ka bate, purisu nangenen te me etew ne migpatey e sikandin. ²⁷ Piru inggen-genan ni Hisus ka

belad te bate wey impeenew rin, ne migsasindeg e ka bate.

²⁸ Te pegasud enni Hisus te baley, mig-insaan e sikandin tugtuhesi te me hibateen din ne migkahi, “Mania te ware key nakaalew te busew?”

²⁹ Ne migkahiyan sikandan ni Hisus, “Egkaalew ka iling dutu ne busew pinaahi re te peg-ampu.”

Ka peglalag e man-e ni Hisus te kamatayen din

(Mat. 17:22-23; Luk. 9:43b-45)

³⁰ Mig-awe sikandan te seeye ne inged wey diye migbaye te Galiliya. Ne kene igkeupii ni Hisus ne due eg-pakataha ke hendei sikandin, ³¹ su eyew egpakanulu sikandin te me hibateen din. Migkahiyan din sikandan, “Eg-akalan ka Anak te Etew wey igbehey diye te me etew ne eggimatey kandin, piru egkeuyag sikandin te igkatelu ne aldew.”

³² Piru ware sikandan nakasabut te ingkahi rin, wey nenaaldek sikandan ne eg-inse kandin.

Ka amana ne labew

(Mat. 18:1-5; Luk. 9:46-48)

³³ Nataman, miggungume e sikandan diye te Kapirnaum. Ne hengkayi te diyad e sikandan te baley, mig-insaan e sikandan ni Hisus, “Nekey-a ka igmemekeg-apul niyu diye te dalan?”

³⁴ Piru migmeeneng-eneng de sikandan tenged

su iyan dan igmemekeg-apul diye te dalan ke hentew ka labew kandan. ³⁵ Ne migpinnuu si Hisus wey inumew rin ka sapulu wey daruwa (12) ne me hibateen din wey migkahiyan, “Ke hentew seeye se egkeupian ne egkeyimu ne labew, keilangan ne egpariralem sikandin wey egpeyimu ne suluhuanen te langun.”

³⁶ Ne migkuwa sikandin te bate wey impataliware din kandan. Insapipi rin ka bate wey migkahi diye te kandan,

³⁷ “Ka minsan hentew ne egdawat te iling kayi ne bate tenged su mig-ikul rin keddi, egdawat keddiey. Ne ka minsan hentew ne egdawat keddi, kene de ne sikeddiey ka egdawaten din su egdawaten din degma ka migpeuyan keddiey.”

Ka kene egpakig-ehet kanta egpalapig kanta

(Luk. 9:49-50)

³⁸ Ne migkahiyan ni Huwan si Hisus, “Talagpanulu, nakakita key te etew ne migpangalew te me busew pinaahi te ngaran nu, wey insaparan ney sikandin tenged su kene ta ne duma sikandin.”

³⁹ Piru migkahi si Hisus, “Kene niyu sapari sikandin su ware etew ne eggimu te kein-inuwan pinaahi te ngaran ku ne due-rue ne egtampele keddiey. ⁴⁰ Su ka kene egpakig-ehet kanta,

egpalapig kanta. ⁴¹ Su egnanganan ku sikaniyu te malehet: ka minsan hentew ne egbehey kaniyu te senge ubab ne weyig tenged su sakup kew ni Kristu, epakarawat iya sikandin te dasag din.

*Ka egpuunan te sale
(Mat. 18:6-9; Luk. 17:1-2)*

⁴² “Piru ka minsan hentew ne egpuunan ne epakasale ka sabeka te seini se me bate ne migpalintutuu wey migsalig keddi, meupiya pad ke eggiketan ka lieg din te dakel ne galingan ne batu wey igdegpak diye te dahat. ⁴³⁻⁴⁴ Ne emun ke iyan egpuunan ka belad nu ne epakasale ka, tempuha nu sika! Meupiya pad ne egseled ka te langit ne pungku, du te daruwa se belad ne igdegpak diye te linew ne hapuy ne kene egkeebukan.[†] ⁴⁵⁻⁴⁶ Ne emun ke iyan egpuunan ka paa nu ne epakasale ka, tempuha nu sika! Meupiya pad ke egseled te langit ne pungku, du te daruwa se paa ne igdegpak diye te linew ne hapuy.[‡] ⁴⁷ Ne emun ke iyan egpuunan ka mata nu ne epakasale ka, lekata nu sika! Meupiya pad ke egseled ka diye te Migharian te Manama ne sabeka re ka mata, du te daruwa se mata

ne igdegpak diye te linew ne hapuy. ⁴⁸ Ne diye, kene epammatey ka me iyas wey kene egkeebukan ka hapuy.

⁴⁹ “Keilangan ne epakaneem-neem te keyirapan ka langun eyew egmeupiya, iling te ngalap ne eg-asinan eyew egmananam. [§]

⁵⁰ “Meupiya ka asin piru ke egkawaraan e seini te nanam din, egmenuwen pad te pegpalib kayi? Purisu bantey kew ne kene egkalaag ka keupiya niyu iling te asin, wey peup-upianey kew ka tagse sabeka.”

10

*Ka pegpanulu meyitenged te pegpeengkerey te alunggun
(Mat. 19:1-12; Luk. 16:18)*

¹ Nataman, mig-awe e si Hisus te seeye ne inged wey miggendiyad e te prubinsya te Hudiya wey diye te deyipag te Hurdan. Ne miglibulungan e man-e sikandin te masulug ne me etew wey impanulu din e sikandan sumale te nabatasan din.

² Due me Parisiyu ne migparani ki Hisus eyew te peg-eleg-eleg kandin. Ne mig-insaan dan sikandin, “Intuhut naan ded te Balaud ta ne epakig-engked ka lukes te asawa rin?”

9:43-44 Mat 5:30. [†] **9:43-44** Ka duma ne me sinulat inlagkes ka birsikulu 44 piru ware seini diye te malehet ne migpuunan. Intimul naan de seini ne miggendue: ne kene epammatey ka me iyas diye wey kene egkeebukan ka hapuy. [‡] **9:45-46** Ka duma ne me sinulat inlagkes ka birsikulu 46 piru ware seini diye te malehet ne migpuunan. Intimul naan de seini ne miggendue: ne kene epammatey ka me iyas diye wey kene egkeebukan ka hapuy. **9:47** Mat 5:29. [§] **9:49** Te Grigu: ka tagse sabeka eg-asinan te hapuy. **9:50** Mat 5:13; Luk 14:34-35.

³ Migtabak si Hisus, "Nekey-a ka insuhu ni Muwisis kaniyu?"

⁴ Ne migkahi sikandan, "Intuhutan ni Muwisis ne epgapabehayen ka lukes diye te asawa rin te sulat te pegpakig-engked, ne eg-pekeengked e sikandin te asawa rin."

⁵ Piru migkahiyan sikandan ni Hisus, "Nakasulat si Muwisis te sika ne suhu tenged su makehal ka me ulu niyu." ⁶ Piru puun pad te an-anayan te peggimu te kalibutan, 'Innimu e sikandan te Manama ne lukes wey malitan.' ⁷ 'Ne sika ka egpuunan ne engked e ka lukes te amey wey iney rin su egsabeke e te asawa rin.' ⁸ Ne sikandan se daruwa, egkeyimu e ne sabeka.' Sikan naa, kenad e ne daruwa sikandan, ke kene sabeka naan de. ⁹ Purisu, kene egkaayun ne egpeengkeren te etew ka insabeke e te Manama.'

¹⁰ Ne miglibed e sikandan diye te baley wey mig-inse e man-e ki Hisus ka me hibateen din meyitenged dutu. ¹¹ Ne migtabak si Hisus, "Minsan hentew ne lukes ne eg-engked te asawa rin wey egbalew-balew eg-asawa, egpakapanlibug e diye te tapey ne asawa rin. ¹² Ne emun ke eg-engked ka malitan te asawa rin wey egbalew-balew eg-asawa, egpakapanlibug e degma sikandin."

10:4 Diy 24:1-4; Mat 5:31. * **10:5** Te Grigu: makehal ka me pusung niyu. **10:6** Hin 1:27; 5:2. **10:7** Hin 2:24. **10:11** Mat 5:32; 1Kur 7:10-11. **10:15** Mat 18:3.

*Ka pegpanalangin ni Hisus te me bate
(Mat. 19:13-15; Luk. 18:15-17)*

¹³ Ne due me etew ne nanguyan te me anak dan diye te ki Hisus eyew igpasamsam kandin, piru insaparan sikandan te me hibateen.

¹⁴ Piru te pegkakita ni Hisus dutu, nabelu sikandin te me hibateen din wey migkahiyan din sikandan, "Balahara niyu re due ka me bate ne egparani keddiey wey kene niyu sikandan sapari, su nasakup te Migharian te Manama ka me bate ne iling kayi." ¹⁵ Egnanganan ku sikaniyu te malehet: emun ke kene niyu egdawaten ka Peghari te Manama iling te pegdawat te me bate, kene kew iya egpakalagkes dutu." ¹⁶ Nataman, insapipi rin e ka me bate wey intel-eban din e sikandan te belad din te migpanalangin.

*Ka meyaman ne etew
(Mat. 19:16-30; Luk. 18:18-30)*

¹⁷ Te peggipanew e ni Hisus, due etew ne migpalalahuy peendiye te kandin wey migpanimbuel diye te tangkaan din ne mig-inse, "Meupiya ne talagpanulu, nekey-a ka eggimuwen ku eyew egkarawat ku ka umul ne ware egtamanan?"

¹⁸ Ne migtabak si Hisus kandin, "Mania te inggaranan a nikeykew te meupiya? Sabeka re ka

meupiya, ka Manama re.
 19 Nakanengneng kad e te me suhu: ‘Kene ka himatey, kene ka panlibug, kene ka panakew, kene ka pamalehet te ubat, kene ka panlimbung, tahura nu ka amey wey iney nu.’”

20 Ne migtabak ka etew, “Talagpanulu, intantanuran kud sika langun ligkat te pegkabatei ku.”

21 Ne immemetmetan sikandin ni Hisus duma te geyinawa rin kandin wey migkahiyan, “Sabeka naan de ka ware nu pad neyimu. Hipanew kad wey ibelegye nu ka langun ne karatuan nu wey ipamehey nu ka halin diye te egkengaayayu eyew due karatuan nu diye te langit. Ne egkataman, libed ka kayi wey ikul ka keddi.” 22 Mabehat-behat amana ka ulaula te etew te pegkarineg din dutu, wey miggipanew sikandin ne miglungku tenged su dakel ka karatuan din.

23 Ne impanil-ap-sil-ap ni Hisus ka me hibateen din wey migkahiyan, “Amana ne malised te meyaman ka pegseled te Migharian te Manama!”

24 Ne neinu-inu ka me hibateen din te inlalag din. Piru mig-abayan sikandin ni Hisus te egkahi, “Mengeanak, subla iya ne malised ka pegseled diye te Migharian te Manama! 25 Malemu pad ka pegserep te ayam ne kamilyu diye te lungag te simat du te

pegseled te meyaman diye te Migharian te Manama.”

26 Masumpit ne neinu-inu ka me hibateen din ne migmein-inseey ka tagse sabeka, “Hentew bes naan de ka egkaluwas?”

27 Migtengtengan sikandin ni Hisus te migkahi, “Kene egkeyimu seini te etew, piru egkeyimu te Manama, su egkeyimu te Manama ka langun.”

28 Ne migkahiyan sikandin ni Pidru, “Na, sikanami seini, mig-engkeran ney ka langun eyew te peg-ikul keykew.”

29 Ne migkahi si Hisus, “Egnanganan ku sikaniyu te malehet: ka minsan hentew ne eg-engked te baley rin, me suled din, me atebey rin, iney wey amey rin, anak din, wey katantanaan din naa tenged te peg-ikul rin keddiey wey tenged te Meupiya ne Panugtulen, 30 egpakarawat te susuluhi ne baley, suled, atebey, iney, anak wey luluahi ne tane te seini ne timpu. Minsan egkabaybayaran sikandin piru egpakarawat din te umul ne ware egtamanan te eggingsuma ne timpu. 31 Piru masulug ka mabantug ne kenad egmabantug, wey masulug ka kene ne mabantug ne egmabantug e.”

Ka pegguhud ni Hisus te kamatayen din te igkatedu e ne

timpu

(Mat. 20:17-19; Luk. 18:31-34)

³² Nataman, te diyad e ensi Hisus te deralanen peendiye te Hirusalim, migguna si Hisus kandan te eggipanew. Ne natanengan ka me hibateen din wey nenaaldek ka me etew ne migsinundul kandin ke nekey ka egkamatinan din diye. Ne dutu, impasuwey e man-e ni Hisus ka me hibateen wey innanganan din ke nekey ka egkeyitabu kandin. ³³ Migkahi sikandin, "Pammineg kew! Eggendiye kid e te Hirusalim wey igbehey e ka Anak te Etew diye te me pangulu te talagpanubad wey diye te talagpanulu te Balaud te Manama. Eggukuman dan sikandin ne eggimatayan ne egkataman igbehey e sikandin diye te kene ne me Hudiyu. ³⁴ Ne eglementan dan sikandin, eg-ileban, eglampesan wey eggimatayan. Piru egkeuyag ded sikandin te igkatalu ne aldew."

Ka egbuyuen enni Santiyagu wey ni Huwan

(Mat. 20:20-28)

³⁵ Nataman, migparani diye te ki Hisus si Santiyagu wey si Huwan ne me anak ni Sibidiyu wey migkahi, "Talagpanulu, due igkeupii ney ne egbuyuen diye te keykew."

³⁶ Ne mig-inse si Hisus, "Nekey-a ka igkeupii niyu ne egbuyuen kayi te keddi?"

³⁷ Ne migtabak sikandan, "Ke eghari kad e diye te mateles ne migharian nu, papinnuuwa key ubag nikeykew diye te andang nu: ka sabeka diye te igkakawanan nu wey ka dangeb diye te igkahibang nu."

³⁸ Ne migkahi si Hisus, "Ware kew nakataha ke nekey ka egbuyuen niyu. Egpekeinum kew naa te ubab te peg-antus ne eg-inuman ku? Egpakapabewutismu kew naa te bewutismu te peg-antus ne igbewutismu keddi?"

³⁹ Ne migtabak sikandan, "Uya, egpekeyimu key red."

Ne migkahiyan ni Hisus sikandan, "Malehet iya ne egpekeinum kew te ubab te peg-antus ne eg-inuman ku wey egpakapabewutismu te bewutismu te peg-antus ne igbewutismu keddi. ⁴⁰ Piru ka meytenged te egpapinnuuwen diye te igkakawanan ku wey diye te igkahibang ku, ware katenged ku due, su duen e intahahe te Amey ku ne egpapinnuuwen due."

⁴¹ Te pegkarineg dutu te sapulu ne me hibateen, nabelu e sikandan te duma ran ne ensi Santiyagu wey Huwan. ⁴² Sikan naa, impeparani sikandan ni Hisus wey migkahiyan, "Nakanengneng kew e te seeye se in-isip ne me pangulu te kene ne me Hudiyu, impeuteng dan iya ka geem dan te pegmandu diye te me sakup dan. Ne seeye degma se dakel

se katungdanan, igpapitew ran iya ka katenged dan diye te me sakup dan.⁴³ Piru kene niyu sika himuwa. Ka minsan hentew due te kaniyu ne egkeupian ne egmabantug, keilangan ne egpeyimu sikandin ne suluhuanen niyu.⁴⁴ Ka minsan hentew ne egkeupian ne egkeyimu ne labew kaniyu, keilangan ne egpeuripen sikandin te langun.⁴⁵ Su minsan ka Anak te Etew ware miggendini eyew egpamakayen, ke kene, eyew egpamakey wey egpeyimatey eyew te pglekat te masalig ne me etew puun te me sale dan."

*Ka pegbawi ni Hisus te butud ne si Bartimyu
(Mat. 20:29-34; Luk. 18:35-43)*

⁴⁶ Nataman, miggungume e ensi Hisus diye te lungsud te Hiriku. Hengkayi te eg-awe e sikandin wey ka me hibateen din te seeye ne lungsud duma te susuluhi ne me etew, due butud ne migpinpinnuu diye te ilis te dalan ka egpamuyu ne egngaranan ki Bartimyu ne anak ni Timyu.⁴⁷ Te pegkarineg din ne seeye bes iya si Hisus ne matig-Nasarit, migpanguleyi e sikandin ne migkah, "Hisus! Kabuhalan ni Dabid! Ikeyid-u a nikeykew!"

⁴⁸ Ne masulug ka migsapad kandin ne egpeen-enengen e, piru nanasnasian de iya sikandin migpanaman-taman migpanguleyi ne

migkah, "Kabuhalan ni Dabid! Ikeyid-u a nikeykew!"

⁴⁹ Ne migsanggel si Hisus wey migkah, "Umawa niyu sikandin."

Ne in-umew ran e ka butud wey migkahiyan dan, "Nekal-nekal ka! Na, sasindeg kad e su in-umew ka nikandin."

⁵⁰ Ne indegpak e te butud ka ingkukuyumbu din ne migsasindeg e sikandin wey migparani ki Hisus.

⁵¹ Ne mig-insaan sikandin ni Hisus, "Nekey-a ka igkeupii nu ne eggimuwen ku due te keykew?"

Ne migtabak ka butud, "Talagpanulu, egkeupian a perem ne egpakkite e pad."

⁵² Ne migkahiyan sikandin ni Hisus, "Hipanew kad. Iyan nekeuli keykew ka pegpalintutuu nu."

Ne sauhune ne nakakite e sikandin wey migsinundul e ki Hisus te miggipanew.

11

Ka meupiya ne pegginguma ni Hisus diye te Hirusalim

(Mat. 21:1-11; Luk. 19:28-40; Huw. 12:12-19)

¹ Te egpakkari-rani e sikandan te Hirusalim, egpalinggumaan e sikandan te Bitpahi wey Bitanya ne diye te Bubungan te Ulibu. Ne dutu, impewun-e e ni Hisus ka daruwa te me hibateen din² wey migpanagtahaan te migkah, "Hendiye kew seeye te kewun-aan ne bariyu. Te sikan kew pad iya egginguma, due egkakita

niyu ne nati te asnu ne inniket diye ne ware pad neunturi. Hekari niyu naa seeye wey uyana niyu kayi.

³ Ne emun ke due egkahi kaniyu, ‘Mania te egkuuen niyu sika?’ kahii niyu re, ‘Ingkeilangan seini te Magbebaye wey mahaan din de ig-uli.’”

⁴ Sikan naa, nangipanew e ka daruwa ne hibateen wey te pegginguma ran diye te bariyu, nakita ran iya ka nati te asnu diye te dalan ne inniket diye te gumawan te sabeka ne baley. Ne miggekaran dan e seeye. ⁵ Ne due me etew ne nanasindeg diye ne mig-inse kandan, “Hey, mania te eggekaran niyu sika?”

⁶ Ne intabak dan ka me etew sumale te ingkahi ni Hisus, seeye naa imbalahad e sikandan te me etew. ⁷ Nataman, in-uyan dan e diye te ki Hisus ka asnu wey innagpiyan dan te me kumbaledan, wey mig-untud e si Hisus. ⁸ Due masulug ne etew ne nambebelat te me kumbale dan diye te dalan, wey ka duma nanempug te me derewunen diye te me kamet wey intalagtag dan diye te dalan ne egbayaan ni Hisus. ⁹ Ne migmanguleyi ka migguna ki Hisus wey ka migsinundul ne miggenendue, “Egdayanen ka Manama! Eghanalanginan sikandin se impeendini te Manama kanta!

¹⁰ Eghanalanginan

ka egginguma ne egharian te apu ta ne si Dabid! Egdayanen ka Manama ne diye te dibabew te langit!”

¹¹ Pegginguma ni Hisus diye te Hirusalim, migseled sikandin diye te timplu wey intengtengan din ka langun. Nataman, miglihawang e sikandin puun su mahaan e seeye egkasagkup wey miggendiyyad e te Bitanya duma te sapulu wey daruwa (12) ne hibateen din.

Ka pegdilus ni Hisus te kayu ne iggira

(Mat. 21:18-19)

¹² Pegkapawe, migligkat e sikandan puun te Bitanya wey dutu miggutasan e si Hisus. ¹³ Ne due nakita rin diye te madmariyu ne kayu ne malapung se dewun ne egngaranan te iggira. Indugpu din ka kayu eyew egleuyen ke due behas. Te pegginguma rin diye, ware nakita rin ne behas su neelin de ne dewun tenged su kene pad seeye ne timpu te pegpamehas te seeye ne kayu. ¹⁴ Ne migkahiyen ni Hisus ka kayu, “Puun kuntee, warad etew ne egpakakeen pad man-e te behas nu!” Ne narineg seeye te me hibateen din.

Ka peggendiye ni Hisus te timplu

(Mat. 21:12-17; Luk. 19:45-48; Huw. 2:13-22)

¹⁵ Pegginguma ran diye te Hirusalim, migseled si Hisus diye te timplu wey impan-deldel rin ka egmambebeli

wey egmanitinda. Impamalintuad din ka me lamisa te egmanaliyu te seleppi wey ka pinnuuwan te egmameligye te me seleppati. ¹⁶ Ne ware din tuhuti ne egbaye diye te timplu seeye se eg-uyan te minsan nekey. ¹⁷ Ne impanulu din e ka me etew te migkahi, “Nasulat e diye te Kasulatan, ‘Ka baley ku egnaranan te baley ne ampuanan te langun ne nasud’; piru innimu niyud e seini ne helesanan te me takawen!”

¹⁸ Te pegkarineg dutu te pangulu te me talagpanubad wey te me talagpanulu te Balaud te Manama, migpammitew e sikandan te paahi eyew egkeyimatayan dan si Hisus. Piru naaldek sikandan ki Hisus tenged su nanaaayan ka susuluhi ne etew te pegpanulu din.

¹⁹ Ne hengkayi te egsagkup e, mig-awe ensi Hisus diye te siyudad.

Ka panulu puun te pegdilus te kayu ne iggira
(Mat. 21:20-22)

²⁰ Te napawe e, nangipanew e sikandan wey naliharan dan ka kayu ne iggira wey nakita ran ne nahangu e, minsan ka me dalid. ²¹ Nasuman-suman ni Pidru ka neyitabu wey migkahiyan din e si Hisus, “Talagpanulu, pitawa nu ka

kayu ne indilus nu, nahangu e!”

²² Ne migkahiyan sikandan ni Hisus, “Keilangan ne due pegpalintutuu niyu te Manama. ²³ Egnanganan ku sikaniyu te malehet: ka minsan hentew ne egsuhu te sika ne bubungan ‘Keenat ka wey egpakaregpak ka diye te dahat’, ne ware pegduwaruwa diye te pusung din wey migpalintutuu ne egkatuman ka ingkahi rin, egkatuman iya seini. ²⁴ Purisu egnanganan ku sikaniyu te minsan nekey ne egbuyuen niyu te Manama, palintutuuwi niyu ne narawat niyud, wey egkarawat niyu iya. ²⁵⁻²⁶ Ke eg-ampu kew, pasayluwa niyu pa ke due nakasale kaniyu eyew ka Amey niyu ne diye te langit, egpasayluwen kew degma te me sale niyu.”*

Ka peggubabe te katenged ni Hisus
(Mat. 21:23-27; Luk. 20:1-8)

²⁷ Nataman, nanlibed e man-e sikandan diye te Hirusalim. Ne taheed te miggiphianew si Hisus diye te seled te timplu, migparani kandin ka me pangulu te me talagpanubad wey ka me talagpanulu te Balaud te Manama wey ka me igbuyag te me Hudiyu. ²⁸ Ne mig-insaan dan si Hisus,

* **11:17** Isa 56:7; Hir 7:11. **11:23** Mat 17:20; 1Kur 13:2. **11:25-26** Mat 6:14-15.

* **11:25-26** Due me sinulat ne miglagkes te birsikulu 26 piru ware seini diye te malehet ne migpuunan. Intimul naan de seini ne miggenendue: emun ke kene niyu egpasayluwen ka duma, kene degma egpasayluwen te Amey niyu ne diye te langit ka me sale niyu. (Pitawa niyu diye te Matiyu 6:15.)

“Nekey-a ka katenged nu te peggimu kayi? Hentew-a ka migbehey keykew te katenged te peggimu kayi?”

²⁹ Migtabak si Hisus kandan, “Due degma inse ku kaniyu, ne emun ke egkatabak niyu seini, egnanganan ku degma sikaniyu ke nekey ka katenged ku te peggimu kayi. ³⁰ Nangeni a nikaniyu, hendei migpuun ka katenged ni Huwan te pegpamewutismu? Diye naa te Manama wey ke diye te me etew?”

³¹ Ne migpalalahey sikandan ne migkahi, “Emun ke egkahi ki, ‘Diye migpuun te Manama,’ kema ke egkahiyan ki nikandin, ‘Na, mania te ware kew migpalintutuu ki Huwan?’ ³² Piru kene ki egpakakahi, ‘Diye migpuun te me etew.’ ” (Naaldek sikandan te me etew su migpalintutuu sikandan langun ne malehet ne prupita si Huwan.) ³³ Purisu migtabak sikandan ki Hisus, “Ware key nakanengneng!”

Ne migkahiyan sikandan ni Hisus, “Ke iling ma rue, kene ku degma egnanganan sikaniyu ke nekey ka katenged ku te peggimu kayi.”

12

*Ka panunggilingan
meyitenged te me talagtanggu
te parasan*

(Mat. 21:33-46; Luk. 20:9-19)

¹ Nataman, mibunsud e man-e migpanulu si Hisus kandan pinaahi te me panunggilingan: “Due sabeka ne etew ne migpamula te me prutas ne egngaranan te paras wey inlingut din te alad. Miglulungag sikandin te egluyangan te behas wey migbebaley man-e te matikang ne bakalag ne eg-ugpaan te talagtameng. Pegkapenga, impatanggu rin e te me talagbasuk ka parasan wey miglapu e sikandin diye te mariyu ne inged. ² Te pegginguma te timpu te pegpamupu te me behas, migsuhu sikandin te sabeka ne uripen din eyew egpakuun te baad din te prutas diye te me talagtanggu. ³ Piru inderakep dan ka uripen wey inlelampesan, wey impeuli dan ne ware inuyanan. ⁴ Ne migsuhu e man-e ka kamuney te lein ne uripen, piru inlelampesan te me talagtanggu ka ulu te uripen wey impeyilawan dan. ⁵ Migsuhu e man-e ka kamuney te lein ne uripen wey inggimatayan dan ded sikandin. Ne masulug pad ka insuhu din, ne due duma kandan ne inlelampesan wey ka duma innimatayan. ⁶ Nataman, ka anak din naan de ne lukes ne pinalangge din ka nasame ne egkasuhu din. Ne impeendiye din en iya sikandin te migkahi, ‘Egtahuren dan iya ka anak ku.’ ⁷ Piru migpalalahey ka me talagtanggu, ‘Sikan e ka

anak te kamuney te parasan ne iyan egpakkamuney kayi. Kuwa kid e su eggimatanay ta sikandin eyew sikante e ka egpakkamuney kayi.' ⁸ Ne inderakep dan e sikandin wey inggimatayan, wey inggehanuy ran e diye te lihawangan te parasan."

⁹ Mig-inse si Hisus te me etew, "Nekey naa ka eggimuwen te kamuney te parasan? Eggendiyaan din ka me talagtanggu wey egpangimatayan din sikandan, wey egpasubalan din ka parasan te duma. ¹⁰ Ware kew bes nakasabut te imbasu niyu diye te Kasulatan ne eggenendue,

'Ka batu ne insamsamilian te me talagbebaley,
nasi neyimu ne batu ne pabunsuran.

¹¹ Himu seini te Magbebaye ne Manama,
wey igkeinu-inu ta seini!'

¹² Egdakepen e perem si Hisus te me pangulu te me Hudiyu su nasabut dan ne sikandan ka innisuhat te panunggilingan, piru naaldek sikandan te me etew. Purisu in-engkeran dan e si Hisus wey nangipanew e sikandan.

Ka inse meyitenged te pegbayad te buhis

(Mat. 22:15-22; Luk. 20:20-26)

¹³ Ne migsuhu ka me pangulu te me Hudiyu te me Parisiyu wey me sakup ni Hirudis eyew te pegasihilut ki Hisus pinaahi te peglalag din.

¹⁴ Purisu nangendiye sikan-dan te ki Hisus wey mig-inse, "Talagpanulu, nakaneng-neng key ne malehet ka in-lalag nu, wey imbalahad nu ke nekey ka suman-suman te me etew meyitenged te inlalag nu, tenged su ware nu tengtengi ke nekey ka kandan ne keugpe, ke kene, impanulu nu ka kamale-hetan meyitenged te igkeupii te Manama. Na, nangeni key ke supak naa te Balaud ta ka pegbayad te buhis diye ki Sisar ne Impiradur, wey se kene? Keilangan naa ne egbayad key, wey se kene?"

¹⁵ Piru natahaan ni Hisus ne egpapitew-pitew re sikan-dan, sikan naa migkahiyan din sikandan, "Mania te eg-el-elehan a nikaniyu? Uyani a te seleppi su egpitawen ku."

¹⁶ Ne in-uyanan dan e sikandin te sabeka ne se-leppi. Ne mig-inse si Hisus diye te kandan, "Hentew ne alung wey ngaran ka nakatahu kayi?"

Ne migtabak sikandan, "Ki Sisar ne Impiradur."

¹⁷ Ne migkahiyan din e sikandan, "Ke iling due, ibehey niyu diye te Impi-radur ka kandin, wey ibehey niyu degma diye te Manama ka kandin."

Ne dutu, neinu-inu sikan-dan ki Hisus.

Ka inse meyitenged te pegkeuyag

(Mat. 22:23-33; Luk. 20:27-40)

18 Ne due me Sadusiyu ne migparani ki Hisus. Sikandan ka migkahi ne kenad egkeuyag ka me minatey. Ne mig-insaan dan si Hisus,
19 “Talagpanulu, migsulat si Muwisis kanta te balaud ne emun ke due etew ne epatey ka kakey rin ne ware pad nakaanak, keilangan ne epamaluwen din ka ipag din eyew duen ded anak te kakey rin ne migpatey e.”
20 Na, due pitu ne taltalaari ne neelin ne lukes. Nakaasawa ka panganey wey migpatey ne ware nakaanak.
21 Ne impamalu te inggiba ka ipag din, wey migpatey red degma ne ware nakaanak. Ne iling ded ka natamanan te igkatelu ne lukes.
22 Naamin ka pitu ne taltalaari ne ware nakaanak. Te katammanan, migpatey e degma ka malitan.
23 Na, te aldew ne eg-uyahen e ka me minatey, hentew naa ka asawa rin ne malehet su naamin ma ka pitu ne nakaasawa kandin?”

24 Ne migtabak si Hisus kandan, “Naseyyup kew su ware kew nakasabut te Kasulatan wey te geem te Manama.
25 Su emun ke egkeuyag e ka me minatey, kenad egmaas-asawey sikandan su egpekeiling e sikandan te me panalihan diye te langit.
26 Na, meytenged te peg-uyag te me minatey, ware kew bes nakasabut te imbasu niyu ne insulat ni Muwisis meytenged te nalegleg ne sapinit ke hendei

kahii sikandin te Manama, ‘Sikeddiey ka Manama ni Abraham, ka Manama ni Isaak, wey ka Manama ni Hakub?’
27 Iyan igapasabut kayi ne kene ne Manama sikandin te me minatey, ke kene, Manama te neneuyag. Sikan naa ka amana kew iya naseyyup.”

*Ka suhu ne labew te langun
(Mat. 22:34-40; Luk. 10:25-28)*

28 Ne due sabeka ne talagpanulu te Balaud te Manama ne nakarineg engki Hisus te migpaap-apuley te me Sadusiyu. Narineg din ne meupiya ka tabak ni Hisus kandan, purisu mig-insaan din sikandin, “Nekey ka suhu ne labew te langun?”

29 Ne migtabak si Hisus, “Seini ka suhu ne labew te langun: ‘Pammineg kew me kabuhalan ni Israil! Sabsabeka re ka Manama ne Magbebabe ta wey warad duma.
30 Keilangan ne eggeyinawaan nu ka Magbebabe ne Manama nu ne egpuun te pusung nu, egpuun te gimukud nu, egpuun te suman-suman nu wey egpuun te keseg nu.’
31 Seini ka igkarangeb: ‘Geyinawei nu ka duma nu iling te peggeyinawa nu te keykew ne pegkeetew.’ Warad duma pad ne suhu ne labew pad kayi te daruwa.”

32 Ne migkahiyan sikandin te talagpanulu te Balaud te Manama, “Eleg sika Talagpanulu! Malehet ka ingkahi

nu ne sabeka re ka Manama wey warad iya duma su sikandin de iya.³³ Ne keilangan ne eggeyinawaan ta ka Manama ne egpuun te pusung ta, wey egpuun te suman-suman ta, wey egpuun te keseg ta. Ne keilangan ne eggeyinawaan ta ka duma ta iling te peggeyinawa ta te kanta ne pegkeetew. Meupiya pad ka pegtuman te seini ne me suhu du te pegtutung te ayam ne igpanubad wey duma pad ne igpanubad diye te Manama.”

³⁴ Te pegkakita ni Hisus ne natuenan ka tabak te talagpanulu te Balaud te Manama, migkahiyan din e sikandin, “Mahaan kad e egkasakup te Migharian te Manama.”

Ne puun dutu warad e epaalag-alag ne eg-inse-inse kandin.

Ka inse meyitenged te Kristu
(Mat. 22:41-46; Luk. 20:41-44)

³⁵ Taheed te migpanulu si Hisus diye te timplu, mig-inse sikandin, “Mania te migkahi ka talagpanulu te Balaud te Manama ne ka Kristu kabuhalan kun ni Dabid?³⁶ Si Dabid mismu ka migkahi pinaahi te Panisingan te Manama,

‘Ka Manama migkahi diye te Magbebaye ku:
Pinnuu ka kayi te igkakawanan* ku,

taman te eggimuwen ku ne diekanan nu ka me kuntere nu.’

³⁷ Mismu ne si Dabid ka migngaran kandin te Magbebaye, purisu egmenuwen naa te Kristu ne egkeyimu ne kabuhalan ni Dabid?”

Ne nahale ka susuluhi ne etew ne migpammineg ki Hisus te migpanulu.

Ka pegpaney-paney ni Hisus meyitenged te talagpanulu

(Mat. 23:1-36; Luk. 20:45-47)

³⁸ Te pegpanulu ni Hisus, migkahi sikandin, “Bantey kew te me talagpanulu te Balaud te Manama, su egkeupian sikandan ne egleug-leug ne egkukumbale te mallayat. Ne egkeupian sikandan ne egtahuren te me etew diye te me palingkiyan

³⁹ wey eg-alam te me mateles ne pinnuuwan diye te me simbaan te me Hudiyu wey te pinnuuwan te me talahuren diye te sahakeenan.

⁴⁰ Inlupihan dan ka me balu wey impangahew ran ka me kasangkapan dan minsan ka me baley ran, wey mallayat sikandan ne eg-ampu ka egpapitew-pitew re. Sikan naa ka subla pad ne masumpit ka legpad ne egkeumaan dan!”

Ka imbehey te balu diye te Manama
(Luk. 21:1-4)

^{12:33} Hus 6:6. ^{12:34} Luk 10:25-28. ^{12:36} Sal 110:1. * ^{12:36} Sumale te tuluuwen te me Hudiyu, ka talahuren de ne etew ka egpakapinnuu diye te igkakawanan te mabantug ne etew.

⁴¹ Migpinnuu si Hisus diye te egkatangkaan te tahuanan te seleppi diye te timplu wey in-ipat din ka susuluhi ne etew ne nangulug te me seleppi dan. Ne masulug ka me meyaman ne migulug te dakel ne seleppi.
⁴² Nataman, due miggingsuma ne balu ne egkaayu-ayu ne migparani wey mig-ulug te daddaruwa ne keddeku.
⁴³ Ne impeparani ni Hisus ka me hibateen din kandin wey migkahiyan, “Egnanganan ku sikaniyu te malehet: sika se balu ne egkaayu-ayu, subla pad ne dakel ka inulug din du te langun ne mig-ulug diye te tahuanan.
⁴⁴ Su ka duma migbehey te subla naan de te seleppi dan, piru ka balu ne egkaayu-ayu, imbehey rin ka langun ne egkaresdesenan din te keuyahan.”

13

Ka pegtagne ni Hisus te pegkahuhus te timplu

(Mat. 24:1-2; Luk. 21:5-6)

¹ Te peginhawang ni Hisus te timplu, due sabeka ne hibateen din ne migkahi kandin, “Talagpanulu, pitawa nu ma sika se me batu ne amana ne derakel ne inggamit te peggimu te timplu! Amana ne mateles ka pegpasasindeg kayi!”

² Ne migkahiyan ni Hisus sikandin, “Nakita nu seini se dakel ne baley? Piru keureme, ware minsan sabeka ne batu ne egkasame

diye te neunturan din, egkahebe iya ka langun.”

Ka me samuk wey me kalasayan

(Mat. 24:3-14; Luk. 21:7-19)

³ Taheed te migpinnuu si Hisus diye te Bubungan te Ulibu ne egkatangkaan te timplu, migtugtuhesan sikandin insei enni Pidru, Santiyagu, Huwan wey Andris. ⁴ Migkahi sikandan, “Nangeni key ke ken-u egkeyitabu seini, wey nekey-a ka palinneu ne egkatuman e seini se langun?”

⁵ Ne migtabak si Hisus kandan, “Bantey kew ne kene kew egkeuyan te kene ne malehet ne talagpanulu.

⁶ Su masulug ka eggendini ne egpeila ne sikandan kun ka Kristu, wey masulug ka egkeuyan dan. ⁷ Ne kene kew kaaldek ke egpakarineg kew te egmabunbunuey due te marani niyu, wey te me guhuren meyitenged te egmabunbunuey diye te mariyu. Su keilangan iya ne egkeyitabu sika, piru kene pad ne sika ka katammanan.

⁸ Egpakigkuntere ka sabeka ne nasud te lein ne nasud wey egpakigkuntere ka sabeka ne tribu te lein ne tribu. Egginguma ka me linug wey bitil te minsan hendei ne inged. Piru sika langun, bunsuranan pad te kasakitan iling te eglesutan ne egbaletikan.

9 "Purisu bantey kew su eg-uyanen kew nikandan diye te hukumanan wey epanlampesan kew diye te seled te simbaan te me Hudiyu. Egpaaatubangen kew diye te me gubirnadur wey te me Hari tenged keddiey eyew egpaketangguhud kew te Meupiya ne Panugtulen diye te kandan. 10 Keilangan ne iggun-a igwali ka Meupiya ne Panugtulen diye te langun ne me nasud te kene pad egginguma ka katamanan. 11 Ne emun ke eg-uyanen kew e nikandan wey igbehey diye te hukumanan, kene kew kalaggew ke nekey ka eglalahan niyu. Ilalag niyu re ke nekey ka igpanulu kaniyu te Manama te sika ne timpu su kenad e ne sikaniyu pad ka eglalag, su ka Panisingan e te Manama. 12 Due me etew ne iyan mismu egpeyimatey te me suled dan. Ne due me amey ne egpeyimatey te me anak dan, ne due degma me anak ne egkuntere te me amey wey iney ran wey egpeyimatey kandan. 13 Egdomutan kew te langun ne etew tenged keddiey. Piru seeye se egpabulus eg-ikul keddiey taman te katamanan iyan egkaluwas."

Ka makaalat-halat ne talagdereet

(Mat. 24:15-28; Luk. 21:20-24)

14 Ne migpabulus si Hisus ne migkahi, "Ke egkiteen niyud ka makaalat-halat ne

'talagdereet ne lilinditi diye te tangkaan te Manama' ne diye egsasindeg te kene ne eleg kandin, (keilangan ne egsabuten seini te talagbasa), seeye se me etew ne diye te Hudiya, keilangan ne eg-aput diye te me bubungan. 15 Ne seeye se etew ne diye te atep te baley rin, * keilangan ne kenad e egpamaneug eyew egkuwa te me kasangkapan din diye te seled. 16 Ne seeye se diye te kamet, keilangan ne kenad eg-uli eyew egkuwa te kumbale din. 17 Mekeyid-u-hid-u te seeye ne me timpu ka egkengaberes wey ka egmasusu pad te me anak dan. 18 Ampu kew ne kene egkeyitabu sika te tingmaagsil. 19 Su egginguma te seeye ne timpu ka makabayad-bayah ne peg-antus ne ware pad neyitabu puun te peggimu te kalibutan taman kuntee, wey kenad e seini egkeyitabu pad man-e. 20 Emun ke ware pad hilepeti te Manama ka seeye ne timpu, egkahule iya egpamatey ka me etew. Piru tenged te me etew ne in-alam din, innilepetan din ka seeye ne timpu.

21 "Ne emun ke due egkahi kaniyu, 'Pitew kew, kayi ka Kristu!' wey ke 'Pitew kew, diye sikandin!' kene kew en iya palintutuu. 22 Su eglepew ka kene ne malehet ne me Kristu wey kene ne malehet ne me prupita. Eggimu sikan-

13:13 Mat 10:22. 13:14 Dan 9:27; 11:31; 12:11. 13:15 Luk 17:31. * 13:15 Mapatag ka atep te me Hudiyu. 13:19 Dan 12:1; Imp 7:14.

dan te me palinneu wey me kein-inuwan eyew egkeuyan ka me etew, ke egkaayun, minsan seeye se in-alam te Manama. ²³ Purisu bantey kew su tapey kud sikaniyu panpanayi te langun-langun.

Ka pegginguma te Anak te Etew
(Mat. 24:29-31; Luk. 21:25-28)

²⁴ “Emun ke egkapenye e ka me peg-antus te seeye ne timpu, egmarusilem e ka aldew wey kenad e eglayag ka bulan, ²⁵ wey egkengeulug e ka me bituen puun te langit wey egkawelwel ka me tahu diye te langit. ²⁶ Ne egkataman, egkakita ran e ka Anak te Etew ne eglepew diye te gapun duma te dakel ne geem wey katelesan. ²⁷ Ne igpeendiye din ka me panalihan din diye te langun ne inged kayi te ampew te tane eyew te peglibulung te keetetawan ne in-alam din.

Ka katahaan puun te kayu ne iggira

(Mat. 24:32-35; Luk. 21:29-33)

²⁸ “Na, sumsumana niyu ka kayu ne iggira wey himuwa niyu ne panunggilingan. Emun ke egtunasan e ka me sugpang din, sika ka palinneu ne mahaan e ka tingmeinit. ²⁹ Iling naan ded degma due, emun egkakita niyud ne egkeyitabu e seini, egkatahaan niyud ne marani e sikandin, egpalenggumaan

e. ³⁰ Egnangenan ku sikaniyu te malehet: egkatuman e sika langun te kene pad egkengamatey ka me etew te kuntee ne timpu. ³¹ Egkaawe ka langit wey ka tane, piru ka keddi ne lalag kene iya egkaawe.

Ware nataheyi ka aldew te peglibed din

(Mat. 24:36-44)

³² “Piru ware minsan sabeka ne nakataha te aldew wey te uras ke ken-u seeye egkeyitabu, minsan ka me panalihan diye te langit wey ka Anak, su iyan de nakataha ka Amey. ³³ Purisu bantey kew wey tanud-tanud kew su ware kew nakataha ke ken-u sika egkeyitabu. ³⁴ Egpekeiling seini te etew ne eggipanew diye te mariyu ne inged. Te ware pad sikandin miglikat, egpamehayan din te me himu ka tagse uripen din, wey impanagtahaan din ka talagbantey te gumawan te keilangan ne egbantey. ³⁵ Sikan naa, bantey kew su ware kew nakataha ke ken-u eglibed ka kamuney te baley: ke egpangilumkilum naa, wey ke egliware naa te marusilem, wey ke eg-ukale naan e ka manuk, wey ke maselem naan e iya. ³⁶ Kema ke sauhune ne egginguma sikandin wey egkeumaan kew ne nanlipereng. ³⁷ Ka ignangen ku kaniyu, ignangen ku degma diye te langun ne etew: bantey kew!”

13:24 Isa 13:10; Huwil 2:10,31; 3:15; Imp 6:12; Isa 13:10; Isi 32:7. **13:25** Isa 34:4; Imp 6:13; Huwil 2:10. **13:26** Dan 7:13; Imp 1:7. **13:32** Mat 24:36.

13:34 Luk 12:36-38.

14

Ka planu te peggimatey ki Hisus

(Mat. 26:1-5; Luk. 22:1-2;
Huw. 11:45-53)

¹ Ikaruween naan de ne Sahakeen e te Peglihad te Panalihan wey te Paan ne Ware Patulin. Ne ka me pangulu te talagpanubad wey ka me talagpanulu te Balaud te Manama, migpamitew sikandan te paahi ke egmenuwen ne egkarakep dan si Hisus te heles de eyew egkeyimatayan.
² Migkahi sikandan, “Kene ta eggimuwen seini te timpu te Sahakeen, su kema ke egkasamuk ka me etew.”

Ka peg-itis ki Hisus te peemut
(Mat. 26:6-13; Huw. 12:1-8)

³ Te seeye ne timpu, diye ensi Hisus te Bitanya te baley ni Simun ne ibungen. Ne due malitan ne migginggauma ne mig-uyan te mahal ne peemut ne nardu ne diye itahu te alabastru. Te sasangan pad ne egkeen si Hisus, migparani ka malitan kandin wey impese din ka tahanan wey in-itisan din e ka ulu ni Hisus. ⁴ Piru due duma dutu ne nabelu wey migpalalahey sikandan ne migkahi, “Mania te migdeetan sika se peemut?
⁵ Igbelegye din perem sika te subla te tatelu ne gatus (300) ne dinaryu* wey igpamehey diye te egkengaayu-ayu ka

halin.” Ne dutu, inderew-ey ran e ka malitan.

⁶ Piru migkahiyan sikan dan ni Hisus, “Balahara niyu re due sikandin! Mania te egbanggawen niyu sikandin? Amana ne meupiya ka innimu rin kayi te keddi. ⁷ Su ka egkengaayu-ayu, layun niyu mule egkaruma wey egpakabulig kew kandan te minsan ken-u ne igkeupii niyu. Piru sikeddi, kena a nikaniyu layun egkaruma.
⁸ Innimu rin ke nekey ka egkeyimu rin, wey in-itisan din ka lawa ku tahahe te pegrabal keddiey keureme.
⁹ Egnanganan ku sikaniyu te malehet: minsan hendei igwali ka Meupiya ne Panugtulen kayi te intiru ne kalibutan, egkahuhud degma ka innimu rin kayi te keddi eyew egkasuman suman sikandin.”

Ka pegpaksabut ni Hudas te peg-akal ki Hisus

(Mat. 26:14-16; Luk. 22:3-6)

¹⁰ Nataman, miggendiye te me pangulu te me talagpanubad si Hudas Iskaryuti ne sabeka te sapulu wey daruwa (12) ne hibateen ni Hisus eyew eg-akalan din sikandin wey igbehey diye te kandan. ¹¹ Amana sikandan nahale te pegkarineg dan dutu, wey migaaran dan si Hudas ne egbeheyen dan te seleppi. Purisu migpamitew sikandin te meupiya

14:1 Iks 12:1-27. **14:3** Luk 7:37-38.
igsuul te sabeka ne aldew. **14:7** Diy 15:11.

* **14:5** Ka sabeka ne dinaryu eleg ne

ne timpu ne egkaakalan din si Hisus.

Ka peg-andam te me hibateen ni Hisus te iglabung
(Mat. 26:17-19; Luk. 22:7-13)

¹² Ne miggungume e ka ananayan ne aldew te Sahakeen te Paan ne Ware Patulin, ka aldew ne egpanubad te nati ne karniru eyew egkeenen te Sahakeen. Ne dutu miginsaan si Hisus te me hibateen din, “Hendei key epeendiyaa nikeykew eyew te peg-andam te egkeenen ta te Peglihad te Panalihan?”

¹³ Ne insuhu din ka daruwa te me hibateen din te migkahi, “Hendiye kew te siyudad wey due etew ne egkasinug-ung niyu diye ne egtiang te banga ka migpanakeru. Sinundula niyu naa sikandin ¹⁴ ke hendei eglasud wey kahii niyu ka mahinged, ‘Eg-inse ka talagpanulu keykew, Hendei ka sinabeng ne egkeenan ku duma te me hibateen ku te Peglihad te Panalihan?’ ¹⁵ Ne igpakita rin kaniyu ka maluag ne sinabeng diye te dibabew ne kumplitu te me kasangkapan wey naandam e, wey dutun kew naa andam te iglabung ta.”

¹⁶ Nataman, miggipanew e ka daruwa ne hibateen ne miggendiye te siyudad, wey nakita ran ka langun sumale te inlalag ni Hisus kandan. Seeye naa in-andam dan e ka egkeenen para te Sahakeen te Peglihad te Panalihan.

Ka peglabung enni Hisus
(Mat. 26:20-30; Luk. 22:14-23; Huw. 13:21-30; 1 Kur. 11:23-25)

¹⁷ Ne hengkayi te nasagkup e, nangingume e ensi Hisus duma te sapulu wey daruwa (12) ne hibateen din. ¹⁸ Te sasangan e sikandan ka egmangekeen, migkahi si Hisus diye te kandan, “Egnanganan ku sikaniyu te malehet: due sabeka kaniyu kayi kuntee te migkeen ne eg-akal keddi.” ¹⁹ Ne dutu nalaggew e sikandan wey migpasubsubaley mig-inse ki Hisus ne migkahi, “Kema ke sikeddi ka egkahiyan nu?”

²⁰ Migtabak si Hisus, “Sabeka kaniyu te sapulu wey daruwa (12) ne migsammul keddi migdallut te paan diye te yahung. ²¹ Egpatay ka Anak te Etew sumale te nasulat te Kasulatan, piru mekeyid-u-hid-u ka etew ne eg-akal kandin. Meupiya pad ke ware sikandin neetew!”

²² Te sasangan pad sikandan ne egmangekeen, migkuwa si Hisus te paan wey impasalamatan din ka Manama, wey impanepik-tepik din seini wey impamehey rin diye te me hibateen din te migkahi, “Kuwa kew kayi. Seini ka lawa ku.”

²³ Nataman, migkuwe e man-e sikandin te senge ubab ne binu, ne impasalamatan din e ka Manama wey intaruwey rin diye te kandan, wey mig-inum e sikandan langun. ²⁴ Ne

migkahiyan sikandan ni Hisus, "Sika ka langesa ku ne iga patihis para te masulug ne me etew, wey iyan egpamalehet te kasabutan te Manama diye te keet-etawan din.²⁵ Egnanganan ku sikaniyu te malehet: kena ad e eg-abey eg-inum te seini ne inumen ne egpuun te paras taman te aldew ne eg-inum ad te iyam ne inumen diye te Migharian te Manama."

²⁶ Nataman, nangulahing e sikandan te pegdayan te Manama, wey nangendiyad e te Bubungan te Ulibu.

Ka pegtagne ni Hisus ne igpahunware din ni Pidru

(Mat. 26:31-35; Luk. 22:31-34; Huw. 13:36-38)

²⁷ Ne migkahiyan sikan dan ni Hisus, "Eg-engked kew langun keddiey su nasulat diye te Kasulatan, 'Eggimatayan ku ka talag tameng te me karniru, wey egmemekegsuwey-suwey e ka me karniru.'²⁸ Piru te pegkapenga te peg-uyag keddi, egguna-a ad kaniyu diye te Galiliya."

²⁹ Ne migkahiyan ni Pidru si Hisus, "Minsan eg engkeran kad te langun, kena ad iya eg-engked keykew!"

³⁰ Ne migkahiyan sikandin ni Hisus, "Egnanganan ku sikeykew te malehet: te kene pad eg-ukale ka manuk te kararuwa te seini ne karusileman, katatelu ad nikeykew igpahunware."

³¹ Piru mabagget iya ne migpehet-pehet si Pidru ne

migkahi, "Minsan pad eggi matayan a duma keykew, kene ku iya igpahunware sikeykew."

Ne iling ded degma dutu ka ingkahi te duma ne me hibateen.

Ka peg-ampu ni Hisus diye te Gitsimani

(Mat. 26:36-46; Luk. 22:39-46)

³² Nataman, nangendiyad e ensi Hisus te inged ne egngararanan te Gitsimani wey migkahiyan din ka me hibateen din, "Kayi kew pa paminnuu taheed te egampu e pad."³³ Ne induma rin si Pidru, si Santiyagu wey si Huwan, ne dutu naheram din ka subla ne pegkalaggew wey migmemasakit ka geyinawa rin.³⁴ Ne migkahiyan sikandan ni Hisus, "Amana ne sesakiti ka geyinawa ku ne hendue te egkapatey ad e. Kayi kew naan pa wey kene kew eglichereng."

³⁵ Ne migpabulus si Hisus diye te kewun-aan wey migusengul diye te tane. Migampu sikandin ke egkaayun ne kene perem eggingga diye te kandin ka eg-antusen din.

³⁶ Migkahi sikandin, "Ame, egpekeyimu ka te langun. Angaya nu seini se ubab te peg-antus ne kayi te keddiey. Piru kene ne iyan egkatuman ka keddiey ne pegbuut, ke kene, ka keykew ne pegbuut."

³⁷ Nataman, miglibed e si Hisus diye te me hibateen

din wey neumaan din sikan-dan ne nenewulep e. Ne migkahiyan din e si Pidru, "Etuwey Simun, newulep ke bes? Kene kew egpakaantus ne kene eglipereng duma keddi minsan senge uras de? 38 Kene kew lipereng, wey ampu kew eyew kene kew egkatintal. Egkeupian perem ka panisingan piru mahuye ka lawa niyu."

39 Ne mig-awe e man-e si Hisus wey mig-ampu te il-ing ded te in-ampu din te an-anayan. 40 Te peglibed din, neumaan din ded man-e sikandan ne nenewulep su egmemakaliplipereng en iya sikandan. Ne ware sikandan nakanengneng ke nekey ka igtabak dan ki Hisus.

41 Te igkatedlu e ni Hisus te eglibed diye te me hibateen din, migkahiyan din e sikan-dan, "Ew, nenewulep kew bes pad wey nangimmeley? Eleg e sika! Miggingsume e ka timpu ne igbehey e ka Anak te Etew diye te me makasesale. 42 Bukal-bukal kew e su egmangipanew kid. Pitawa niyu, sikan e ka eg-eakal ked-diey!"

Ka pegdakep ki Hisus

(Mat. 26:47-56; Luk. 22:47-53; Huw. 18:3-12)

43 Te sasangan pad ne eglalag si Hisus, miggingsume e si Hudas ka sabeka te sapulu wey daruwa (12) ne hibateen din. Masulug ne me etew ka migduma kandin ne nanguyan te me kampilan wey me lampes. Insuhu

sikandan te me pangulu te me talagpanubad, me talagpanulu te Balaud te Manama wey ighbuyag te me Hudiyu. 44 Ne seeye se talag-akal migbehey kandan te palinneu ne migkahi, "Ka etew ne eggarekan ku, sikan naa dakepa niyu. Uyana niyu sikandin wey ay-ayari niyu te egbantey."

45 Te pegginguma ni Hudas, migureus e sikandin diye ki Hisus wey migkahi, "Talag-panulu!" Ne miggarekan din e sikandin. 46 Ne inderakep dan e si Hisus wey impakamkamalan dan te eggen-gen. 47 Piru due sabeka ne migsasindeg dutu ne miggulabut te kampilan din wey intibbas din ka uripen te Labew ne Talag-panubad, wey natamped e ka talinga. 48 Ne mig-inse si Hisus diye te kandan, "Takawen a? Mania te nanguyan kew te me kampilan wey me lampes ka egdakep keddiey? 49 Tagse aldew duma a nikaniyu diye te timplu ka egpanulu, ne wara a nikaniyu derakepa. Piru keilangan ne egkatuman ka nasulat diye te Kasulatan."

50 Nataman, in-engkeran e sikandin te me hibateen din wey namallahuy e sikandan langun.

51 Ne due kanakan ne migsinsinundul ki Hisus ne ware migkukumbale su migkukuyumbo de te hinabel. Egderakepen dan e perem sikandin 52 piru

iyan dan de nahen-genan ka ingkukuyumbu din, ne nakapallahuy sikandin ne migpalawas naan de.

Ka peg-inse-inse ki Hisus te me Talaggukum

(Mat. 26:57-68; Luk. 22:54-55, 63-71; Huw. 18:13-14, 19-24)

⁵³ Nataman, in-uyan dan e si Hisus diye te baley te Labew ne Talagpanubad. Ne diye nanlibulung ka langun ne pangulu te talagpanubad, ka me igbuyag te me Hudiyu, wey ka me talagpanulu te Balaud te Manama. ⁵⁴ Ne migsinundul degma si Pidru ki Hisus ne migpadpariyu de taman diye te lama te Labew ne Talagpanubad. Ne diye sikandin migpinnuu duma te me talagtameng ka egginarang. ⁵⁵ Ne migpamitew ka me pangulu te me talagpanubad wey ka sakup te me Talaggukum te me Hudiyu te igbayung dan ki Hisus eyew egpeyimatayan dan sikandin, piru ware nakita ran. ⁵⁶ Masulug ne me etew ka migpangguhud te ubat meyitenged ki Hisus piru ware nenekeg-iling ka guhuren dan.

⁵⁷ Ne due duma ne migsasindeg wey migpangguhud te ubat meyitenged ki Hisus ne migkahi, ⁵⁸ “Narineg ney sikandin ne migkahi, ‘Egguhusen ku seini se timplu ne innimu re te etew. Ne igapasasindeg ku

red man-e seini seled te tatelu ne aldew ne kenad ne hinimuwani te etew.’”⁵⁹ Piru minsan pad dutu, ware nenekeg-iling ka guhuren dan.

⁶⁰ Ne migsasindeg ka Labew ne Talagpanubad diye te tangkaan te langun ne etew wey mig-inse ki Hisus, “Na, ware igkatabak nu te me sumbung meyitenged keykew?”

⁶¹ Piru migpeeneng-eneng de si Hisus wey ware migtabak. Ne mig-abayan e man-e sikandin insei te Labew ne Talagpanubad, “Sikeykew naa iya ka Kristu ne Anak te Egdeyrayen ne Manama?”

⁶² Ne migtabak si Hisus, “Sikeddiey iya, wey egkiteen niyu kangkuwa ka Anak te Etew ne egpinnuu diye te igkakawanant te Maresen ne Manama. Ne eggingga sikandin ne egdumaan te gapun diye te langit.”

⁶³ Te pegkarineg dutu te Labew ne Talagpanubad, inggisi din ka kumbale din wey migkahi, “Mania te egkeilangan ki pad ne egkuwa te me talagpamalehet ⁶⁴ te narineg niyud ma ka pegbaley-baley rin te Manama? Na, nekey te suman-suman niyu?”

Ne dutu, mig-uuyunan dan langun ne eleg ne eggimatayan si Hisus.

⁶⁵ Nataman, in-iileban e te duma ne etew si Hisus

14:58 Huw 2:19. **14:62** Dan 7:13. [†] **14:62** Sumale te tuluuwen te me Hudiyu, ka talahuren de ne etew ka egpakinuu diye te igkakawanant te mabantug ne etew. **14:64** Lib 24:16.

wey imbagkesan dan ka mata rin wey impandabi ran e sikandin. Ne migkahi sikandan, “Ne la, antuki nu ke hentew-a ka migpasakit keykew?” Ne in-anneye e si Hisus te me talagbantey wey impanagpi dan sikandin.

Ka pegpahunware ni Pidru meyitenged ki Hisus

(Mat. 26:69-75; Luk. 22:56-62; Huw. 18:15-18, 25-27)

⁶⁶ Ne taheed te diye pad si Pidru te lama, due miglihad ne malitan ne sabeka te me suluhuanen te Labew ne Talagpanubad. ⁶⁷ Te pegkakita rin ki Pidru ne migginarang, immemetmetan din sikandin wey migkahiyan, “Hey, duma ka iya ni Hisus ne matig-Nasarit.”

⁶⁸ Piru migpahunware si Pidru ne migkahi, “Wara a nakataha wey nakasabut ke nekey ka impanlalag nu.” Ne miggendiyad sikandin te kasunguan te alad. Ne dutu, due manuk ne mig-ukale.[‡]

⁶⁹ Te nakite e man-e si Pidru te suluhuanen ne malitan, migkahiyan din e ka me etew ne nanasindeg diye, “Duma ran iya ka sika ne etew.”

⁷⁰ Piru migpahunware ded man-e si Pidru.

Ware de naluhay, migkahiyan e man-e si Pidru te me etew ne nanasindeg dutu, “Malehet iya ne duma ka nikandan su matig-Galiliya ke ma.”

^{‡ 14:68} Ka duma ne me sinulat ware miglagkes kayi su kene ne klaru diye te malehet ne migpuunan. Intimul naan de seini ne miggenendue: ‘ne dutu, due manuk ne mig-ukale’.

⁷¹ Piru migpahunlibet iya si Pidru ne migkahi, “Mengeyibet iya te pegkeetew ku, wara a iya nekeila te sika ne etew ne egkahiyan nu minsan pad egpatey a!”

⁷² Ne due-rue ne migukale e man-e ka manuk wey nasuman-suman ni Pidru ka ingkahi ni Hisus kandin, “Te kene pad eg-ukale ka manuk te kararuwa, katatelu ad nikeykew igpahunware.” Ne dutu, migpanaman-taman e migsinehew si Pidru.

15

Ka peg-uyan ki Hisus diye te ki Pilatu

(Mat. 27:1-2, 11-14; Luk. 23:1-5; Huw. 18:28-38)

¹ Te pegkapawe e, miglibulung wey migmasabsabutey ka me pangulu te me talagpanubad duma te me igbuyag te me Hudiyu, wey me talagpanulu te Balaud te Manama, wey ka langun ne sakup te me Talaggukum te me Hudiyu. Imbebaku dan e si Hisus wey in-uyan dan e diye te ki Gubirnadur Pilatu, wey imbehey ran e kandin. ² Ne mig-insaan sikandin ni Pilatu, “Sikeykew iya ka Hari te me Hudiyu?”

Migtakab si Hisus, “In-gkahi nud en iya.”

³ Ne masulug ka imbebayung kandin te me pangulu te me talagpanubad.

⁴ Purisu mig-insaan e mane sikandin ni Pilatu, “Ware

igkatabak nu te masalig ne imbebayung dan keykew?"

⁵ Piru warad e migtabak si Hisus, sikan naa ka neinu-inu si Pilatu.

Ka peg-uuyun ki Hisus ne eggimatayan

(Mat. 27:15-26; Luk. 23:13-25; Huw. 18:39-19:16)

⁶ Nabatasan e ni Pilatu ne tagse Sahakeen te Peglihad te Panalihan, due eglekaan din ne pinirisu ne igkeupii te me etew. ⁷ Due egngaranan ki Barabas ne naprisu duma te me duma rin su nekeyimatey te timpu te pegriboldi ran te gubirnu. ⁸ Ne amana ne masulug ka me etew ne migparani ki Pilatu wey mighangyu kandin ne eglekaan e ka pinirisu iling te nabatasan din e ne eggimuwen. ⁹ Ne mig-insaan sikandan ni Pilatu, "Egkeupian kew naa ne eglekaan ku ka Hari te me Hudiyu?" ¹⁰ Su nakataha si Pilatu ne neimma re ki Hisus ka me pangulu te talagpanubad, sikan naa ka indakep dan e si Hisus wey imbehey e diye te kandin. ¹¹ Piru intipu te me pangulu te me talagpanubad ka me etew ne si Barabas ka egpalekaan dan ki Pilatu, kene ne si Hisus. ¹² Ne mig-insaan e man-e ni Pilatu ka me etew, "Na, nekey naa ka eggimuwen ku kayi te etew ne egnangenen niyu ne Hari te me Hudiyu?"

¹³ Ne migbalbalukan sikan dan ka migkahi, "Ilansang nu sikandin te krus!"

¹⁴ Ne mig-insaan sikandan ni Pilatu, "Mania, nekey bes ka neyimu rin ne mareet?"

Piru nanasnasian de iya sikandan ka migmanguleyi ne migkahi, "Ilansang nu sikandin te krus!"

¹⁵ Ne tenged su egkeupian si Pilatu ne egpakapahale te me etew, impalekaan din e si Barabas, wey impalampesan din si Hisus wey imbehey rin e diye te me sundalu eyew iglansang te krus.

Ka pegbaley-baley te me sundalu ki Hisus

(Mat. 27:27-31; Huw. 19:2-3)

¹⁶ Nataman, in-uuyan e si Hisus te me sundalu diye te lama te palasyu te gubinnadur, wey impalibulung dan e ka langun ne duma ran ne me sundalu. ¹⁷ Ne insaluuban dan si Hisus te kumbale ne ubi se batek, wey miiggimu sikandan te kuruna ne duhi wey impakuruna ran e kandin. ¹⁸ Nataman, imbaley-baley ran e sikandin te migkahi, "Egmabantug ka Hari te me Hudiyu!" ¹⁹ Ne inlelampesan dan e te tuked ka ulu ni Hisus wey in-iileban dan e sikandin, wey migpanimbuel e sikandan diye te tangkaan din. ²⁰ Pegkapenga ran te egbaley-baley kandin, inluung dan e ka kumbale ne ubi se batek wey inlibed dan ded ipasaluub ka tapey ne kumbale din. Nataman, inuuyan dan e sikandin diye te liyawangan te siyudad eyew iglansang te krus.

Ka peglansang ki Hisus te krus

(Mat. 27:32-44; Luk. 23:26-43; Huw. 19:17-27)

21 Te sasangan e sikandan ne egmangipanew, due nasiug-ung dan ne matig-Sirini ne egngaranan ki Simun, ne amey enni Alihandru wey ni Rupu. Diye sikandin egpuun te sityu wey eggendiye te siyudad, ne impepehes dan sikandin patianga te krus ni Hisus. 22 Ne diye dan uyana si Hisus te inged ne egngaranan te Gulguta (Inged te Angkal ka igpasabut kayi). 23 Ne egbebehayan dan e perem si Hisus te binu ne insewuhan te delemetan ne egngaranan te mira, piru ware migkuwasi Hisus. 24 Nataman, inlansang dan e si Hisus te krus, wey imbaad-baad dan e ka kumbale din. Migpintut-pintut sikandan ke nekey ne baad te kumbale ni Hisus ka egkakuwa ran. 25 Me alas nuwibi seeye te maselem* te peglansang dan ki Hisus. 26 Ne seini ka sumbung ne insulat diye te keretula te krus, "Ka Hari te me Hudiyu." 27-28 Due degma daruwa ne takawen ne inlansang te krus duma ki Hisus. Ka sabeka diye te igkakawan an din wey ka dangeb diye te igkahibang din.[†]

29 Ne ka me etew ne egmanlihad dutu, egmanlengey-lengey ka egbaley-baley ki Hisus ne egkahi, "Ew, sikeykew bes iya ka egguhus te timplu wey igbalew-balew red igpes-ek seled te tatelu re ne aldew! 30 Na, luwasa nu ka pegkeetew nu wey pamaneug ka due te krus!"

31 Ne migdali-di ded degma ki Hisus ka me pangulu te me talagpanubad duma te me talagpanulu te Balaud te Manama ne migkahi, "In-luwashin ka duma, piru kene sikandin egpakaluwas te pegkeetew rin! 32 Egpitawen te naan iya ke egpakkapamaneug te krus ka Kristu ne Hari te Israil, eyew egpakkapalin-tutuu kid e kandin!"

Ne migdali-di ded degma ki Hisus ka me duma rin te inlansang te krus.

Ka pegkapatey ni Hisus

(Mat. 27:45-56; Luk. 23:44-49; Huw. 19:28-30)

33 Ne hengkayi te meudtu e, migmarusilem e ka intiru ne nasud taman te alas tris te maapun.[‡] 34 Te alas tris e te maapun, migpanguleyi si Hisus te meemen ne miggenendue, "Ili, Ili, lima sabaktani?" Ka igpasabut kayi, "Manama, Manama, mania te in-engkeran a nikeykew?"

15:21 Rum 16:13. **15:24** Sal 22:18.

[†] **15:27-28** Ka duma ne me sinulat miglagkes te birsikulu 28 piru ware seini diye te malehet ne migpuunan. Intimul naan de seini ne miggenendue: ne natuman e ka nasulat diye te Kasulatan ne miggenendue, "In-isip sikandin ne sabeka ne mareet ne etew." **15:29** Sal 22:7; 109:25; Mar 14:58; Huw 2:19. [‡] **15:33** Te Grigu: meudtu, igkeen-em ne uras; alas tris, igkasiyam ne uras. **15:34** Sal 22:1.

* **15:25** Te Grigu: igkatalu ne uras.

³⁵ Te pegkarineg te duma ne me etew ne nanasindeg dutu, migkahi sikandan, "Pammineg kew, impangumew rin si Ilyas!" ³⁶ Ne due sabeka kandan ne migpallahuy ne mig-angey te egpekeiling te kutsun[§] wey in-eled din te maperes ne binu wey imbagkes din diye te geed eyew igpasupsup ki Hisus. Ne migkahi sikandin, "Duen kew pa, egpitawen te naan iya ke eggendini si Ilyas ka eg-angey kandin due te krus!"

³⁷ Ne migpanguleyi si Hisus te heemeni, ne dutu, nabigtawan e sikandin.

³⁸ Ne nahisi e ka kurtina diye te timplu puun te dibabew peendiye te dirlalem. ³⁹ Te pegkakita te kepitan te me sundalu ne diye migsasindeg te egkatangkaan ni Hisus ne nabigtawan e sikandin, migkahi e sikandin, "Malehet iya ne Anak te Manama ka seini ne etew!"

⁴⁰ Ne due degma me malitan ne namipitew diye te bayew madmariyu. Dutu ensi Mariya Magdalina, si Mariya ne iney ni Santiyagu ne egkaari-hari wey ni Husi, wey dutu degma si Salumi. ⁴¹ Sikandan seeye se migsinundul wey migtanggu ki Hisus te diye pad sikandin te Galiliya. Ne masulug pad man-e ne me malitan ka migduma kandin peendiye te Hirusalim.

*Ka pegrabal ki Hisus
(Mat. 27:57-61; Luk. 23:50-56; Huw. 19:38-42)*

⁴² Aldew seeye te Pegpangandam te Aldew te Peggimeley. Te egkasagcup e, ⁴³ miggendiye si Husi ne matig-Arimatiya ki Pilatu te ware pegkaaldek wey imbuyu din ka lawa ni Hisus. Si Husi sabeka ne talahuren ne sakup te me Talaggukum te me Hudiyu, wey migtetahad degma sikandin te Peghari te Manama. ⁴⁴ Neinu-inu si Pilatu te pegkarineg din ne migpatey e si Hisus, purisu impeumew rin ka kepitan te me sundalu wey mig-insaan din ke migpatey naan en iya si Hisus. ⁴⁵ Te nanangenane e sikandin te kepitan ne malehet iya seeye, imbehey rin e ka lawa ni Hisus diye te ki Husi. ⁴⁶ Ne migbebeli si Husi te hinabel wey ingkuwa rin ka lawa ni Hisus diye te krus wey imbuksan din e. Ne insabal rin e ka lawa ni Hisus diye te inlungahan ne dalama. Nataman, miglilid e sikandin te dakel ne batu eyew iglekeb te gumawan te insabal. ⁴⁷ Nakakita si Mariya Magdalina wey si Mariya ne iney ni Husi ke hendei isabal si Hisus.

16

*Ka pegkeuyag ni Hisus
(Mat. 28:1-8; Luk. 24:1-12;
Huw. 20:1-10)*

¹ Te miglihad e ka Aldew te Peggimeley, migbebeli te peemut ensi Mariya

Magdalina, si Mariya ne iney ni Santiyagu, wey si Salumi su eggendinyaan dan ka lawa ni Hisus eyew eg-itisan te peemut. ² Te maselem-selem te aldew te Duminggu, te migsile e ka aldew, nangendiyad e sikandan te insabalan. ³ Ne migmein-inseey e sikandan ke hentew-a ka egpakalilid te batu ne in-elet te gumawan te insabalan. ⁴ Pegginguma ran migtenggak sikandan, wey nakita ran ne nalilid e ka bubuyahen ne batu. ⁵ Te pegseled dan e dutu, due nakita ran ne kanakan ne migkukumbale te maangkag ne diye migpinnuu dapit te igkakawanan dan. Ne dutu, natingkemed sikandan.

⁶ Ne migkahiyam sikandan te kanakan, “Kene kew egkangilam! Nakataha a ne egpammitew kew ki Hisus ne matig-Nasarit ne inlansang te krus. Warad e sikandin kayi su neuyag e. Kema, pitawa niyu ka impaley-asan kandin. ⁷ Na, hendiyei niyu ka me hibateen ni Hisus wey guhuri niyu sikandan duma ki Pidru te miggune e sikandin kaniyu diye te Galiliya; ne diye niyu egkakita sikandin sumale te ingkahi rin kaniyu.”

⁸ Sikan naa, nanlihawang e sikandan te insabalan ka namallahuy su amana sikandan neinu-inu wey nangelkel. Ne ware pad sikandan migpangguhud te

minsan hentew tenged te pegkaaldek dan.

Ka pegpakita ni Hisus ki Mariya Magdalina
(Mat. 28:9-10; Huw. 20:11-18)

⁹ [Te pegkeuyag ni Hisus te maselem-selem te Duminggu, diye sikandin ananayan migpakita ki Mariya Magdalina, ka malitan ne in-alawan din te pitu ne busew.* ¹⁰ Ne miggendiyaan e ni Mariya ka me hibateen ni Hisus ne migmanine-hew wey migmanlungku, wey migpangguhuran din e. ¹¹ Piru ware sikandan migpalintutuu te pegkarineg dan ne neuyag e si Hisus wey nakita ni Mariya.

Ka pegpakita ni Hisus te daruwa ne hibateen din
(Luk. 24:13-35)

¹² Pegkapenga dutu, migpakite e man-e si Hisus te daruwa ne hibateen din taheed te egpeendiye sikandan te sityu, piru nababalawan ka ulaula rin dutu. ¹³ Ne nanlibed e sikandan ka migpangguhud te me duma ran, piru ware ded degma sikandan palintutuuwi.

Ka pegpakita ni Hisus te me hibateen din
(Mat. 28:16-20; Luk. 24:36-49; Huw. 20:19-23; Him. 1:6-8)

¹⁴ Pegkapenga dutu, migpakite e man-e si Hisus te sapulu wey sabeka (11) ne hibateen din te sasangan sikandan ne egmangekeen.

16:7 Mat 26:32; Mar 14:28. * **16:9** Ware nakalagkes diye te malehet ne migpuunan ne sinulat ka Markus 16:9-20.

Ware nakalagkes diye te malehet ne

Indew-ey sikandan ni Hisus su ware pegpalintutuu ran wey me makehal ka me ulu ran, † su ware sikandan migpalintutuu te seeye se nakakita kandin te neuyag e. ¹⁵ Nataman, migkahiyani din e sikandan, “Hendiyei niyu ka langun ne inged kayi te kalibutan wey iwali niyu ka Meupiya ne Panugtulen diye te langun ne etew. ¹⁶ Ka egpalintutuu wey egpabewutismu, egkaluwas, piru ka kene egpalintutuu, eglegparan. ¹⁷ Seini ka me palinneu te seeye se migmalintutuu keddi: eg-pakaalew sikandan te me busew pinaahi te ngaran ku, wey egpakalalag sikandan te me linalahan ne ware dan natueni. ¹⁸ Ke egpakahengen sikandan te me uled wey ke egpekeinum te minsan nekey ne eggilu, kene sikandan egkamenu. Ne emun ke igtel-eb dan ka me belad dan te egmanderalu, egkengeulian sikandan.”

Ka pegbatun ki Hisus

(Luk. 24:50-53; Him. 1:9-11)

¹⁹ Pegkapenga te Magbebaye ne si Hisus te miglalag kandan, imbatun e sikandin wey diye migpinnuu te igkakawanant te Manama.

²⁰ Nataman, nangipanew e ka me hibateen din wey migwali sikandan te minsan hendei. Ne migbulihan

sikandan te Magbebaye wey impamalehetan din ka lalag dan pinaahi te me kein-inuwani innimu ran.]

† **16:14** Te Grigu: makehal ka me pusung dan. **16:15** Him 1:8. **16:19** Him 1:9-11. ‡ **16:19** Sumale te tuluuwen te me Hudiyu, ka talahuren de ne etew ka egpakapinnuu diye te igkakawanant te mabantug ne etew.

Ka Meupiya ne Panugtulen Sumale ki Lukas

Igpewun-a

Ka migsulat te seini ne baseen iyan si Lukas ne sabeka te me hibateen dengan ni Hisus. Sabeka sikandin ne talagbawi ne Grigu se linalahan wey migpangguhud sikandin meyitenged te innimu te Magbebkiye ne si Hisus. Amana degma sikandan ne talag-alukuy ki Pablo, wey migparumduumeeey sikandan te peggendiye te lein-lein ne me inged eyew te pegpangguhud te lalag te Manama. Puun due, nakasulat pad man-e sikandin te lein ne baseen ne iyan ka "Ka me himu".

Ka seini ne baseen impeyan ni Lukas diye te ki Tiyupilu ne egkahiyen te duma ne sabeka kun ne talahuren ne etew ne matig-Ruma. Diye migbunsud ka guhuren din te pegtagne te pegkeetew enni Huwan ne Talagbewutismu wey te Magbebkiye ne si Hisus wey taman te imbatun e si Hisus. Ingguhud man-e ni Lukas ne si Hisus iyan ka Kristu ne insaad te Manama ne egluwas te me Hudiyu wey te langun ne kene ne me Hudiyu ne egpalintutuu kandin.

Seini ne baseen insulat ni Lukas, wey impeyan din

diye te ki Tiyupilu, sabeka ne talahuren ne etew diye te tribu te Grigu. Ne si Lukas man-e ka migsulat due te sika se *Me Himu te Me Apustulis*.

Nahuhud man-e kayi te seini ne baseen ka me guhuren meyitenged te hidu ni Hisus te me etew ne egkaleig-leig wey te me makasesale, ka pegpamawi din te egmanderalu wey te impanerepan te me busew, ka peg-uyag din te me minatey, wey ka pegpanulu din. Egkalibed-libed degma kayi ka meyitenged te Panisingan te Manama, peg-ampu, pegpasaylu te me sale, pegbulig te me malitan te himu ni Hisus, wey pegtahahe te migmalintutuu para te peglibed te Magbebkiye.

Ka nasulat te seini ne baseen

Igpewun-a 1:1-4

Ka pegkeetew wey pegkabate ni Huwan ne Talagbewutismu wey ni Hisus 1:5-2:52

Ka himu ni Huwan ne Talagbewutismu 3:1-20

Ka pegpabewutismu wey ka pegtintal ki Hisus 3:21-4:13

Ka himu ni Hisus diye te Galiliya 4:14-9:50

Puun te Galiliya peendiye te Hirusalim 9:51-19:27

Ka katammanan ne simana diye te Hirusalim wey diye te marani te Hirusalim 19:28-23:56

Ka pegkeuyag, pegpakita, wey ka pegbatun te Magbebkiye 24:1-53

Igpewun-a

¹ Talahuren ne Tiyupilu. Masulug ka miggeram migsulat te guhuren ne neyitabu kayi te kanta meyitenged ki Hisu Kristu. ² Ka insulat dan, iyan ka impangguhud kanta te seeye se nakakita kayi puun pad te bunsuranan wey iyan migpangguhud te lalag te Manama. ³ Natantanuran ku degma sika langun minsan ka bunsuranan kayi. Sikan naa ka meupiya buwa degma ne eg-ay-ayaran ku sika te egsulat para keykew talahuren ne Tiyupilu, ⁴ su eyew egkanengnengan nu iya ka kamalehetan te langun ne impanulu keykew.

Ka pegtagne te pegkeetew ni Huwan ne Talagbewutismu

⁵ Te timpu ne si Hirudis ka mighari te Hudiya, due sabeka ne talagpanubad ne enggaranan ki Sakariyas ne puun te kabuhalan ni Abyas ne talagpanubad. Ne due asawa rin ne egngaranan ki Ilisabit ne puun ded degma te kabuhalan te me talagpanubad. ⁶ Sikandan se alunggun, matareng diye te tangkaan te Manama wey mapahetpet ne migtuman te langun ne suhu wey Balaud te Manama. ⁷ Ne ware anak dan su kene egpakaanak si Ilisabit, wey nabuyag e sikandan se alunggun.

⁸ Ne miggingsuma ka aldew ne iyan egpamakey diye te timplu ka punduk

enni Sakariyas te me talagpanubad. ⁹ Ka batasan te me talagpanubad, egpintut-pintut sikandan ke nekey ka eggimuwen dan, wey si Sakariyas ka natinuru ne iyan egseled diye te timplu te Magbebaye ne Manama eyew egtutung te insinsu. ¹⁰ Te uras ne intutung e ka insinsu, mig-ampu ka masulug ne etew diye te lihawangan te timplu. ¹¹ Ne dutu, due panalihan te Magbebaye ne migpakita kandin ne diye migsasindeg te dapit te igkakawanan te altar ne egtutungan te insinsu. ¹² Natingkemed si Sakariyas te pegkakita rin te panalihan, wey naaldek sikandin. ¹³ Piru ingkahiyan sikandin te panalihan, "Kene ka egkaaldek Sakariyas. Indineg te Manama ka pegampu nu, ne kuntee eg-anak te lukes ka asawa nu ne si Ilisabit. Ne ngarani nu sikandin ki Huwan. ¹⁴ Egkahale-gale kew langun ke eglesut e sikandin, ¹⁵ su egkeyimu sikandin ne mabantug diye te tangkaan te Magbebaye ne Manama. Ne keilangan ne kene sikandin eg-inum te binu wey ke egpekewubug ne eg-inumen, wey egkapenu sikandin te Panisingan te Manama minsan ke diye pad sikandin te getek te iney rin. ¹⁶ Ne igpalibed din ka masulug ne kabuhalan ni Israil diye te Magbebaye ne Manama ran. ¹⁷ Egguna-

sikandin te Magbebaye, wey egpakaangken sikandin te Panisingan te Manama wey geem ne egpekeiling te ki prupita Ilyas dengan. Egpegulien din ka nenekeg-ehet ne me amey wey me anak, wey egpaliberen din diye te maheteng ne dalan ka masinupaken ne me etew. Puun due, egkaandam din ka me etew para te pegginguma te Magbebaye.”

¹⁸ Ne migkahiyan ni Sakariyas ka panalihan, “Egmenuwen ku te pegkannengneng ne malehet ka inlalag nu? Su buyag ad ma seini wey buyag e degma ka asawa ku.”

¹⁹ Ne migtabak ka panalihan, “Sikeddi si Gabriil ka sinalihan te Manama.* Impeendini a nikandin eyew te peglagat wey pegpanugtul keykew te seini ne meupiya ne panugtulen. ²⁰ Ne puun su ware ka migpalintutuu te ingkahi ku, egkeummew ka taman te aldew ne egkatuman e ka ingkahi ku keykew. Su egkatuman iya seeye te eleg ne timpu.

²¹ Ne dutu, migtetaharan te me etew si Sakariyas wey neinu-inu sikandan te naluhay sikandin diye te seled te timplu. ²² Te peglihawang din e, kenad sikandin egpakalalag wey migtingyasan din naan de sikandan. Puun due, nasabut dan ne due impakita kandin

diye te seled te timplu. Ne neummew en iya sikandin.

²³ Te napenge e ka pegpamakey ni Sakariyas diye te timplu, mig-uli e sikandin. ²⁴ Te ware naluhay, naberes e ka asawa rin ne si Ilisabit wey mig-uugpe de iya sikandin seled te lalimma ne bulan. ²⁵ Ne migkahi si Ilisabit diye te geyinawa rin, “Kuntee neyid-u e ka Manama keddiey. In-awe din e ka hilew ku diye te tangkaan te me etew.”

Ka pegtagne te pegkeetew ni Hisus

²⁶ Te hen-em e ne bulan ka getek ni Ilisabit, insuhu te Manama ka panalihan ne si Gabriil diye te lungsud te Nasarit ne sakup te Galiliya.

²⁷ Egpeendiyaan din ka sabeka ne mengebay ne egngararan ki Mariya ne egpangasaween te sabeka ne kanakan ne egngararan ki Husi ne kabuhalan ni Hari Dabid. ²⁸ Ne miggendiyad ka panalihan te kandin wey migkahi, “Kahale ka, Mariya! Migpanalanganan ka te Magbebabe wey egdumaan ka nikandin!” ²⁹ Nalibeg amana si Mariya meyitenged te narineg din wey impalemlem din ke nekey ka kaluwasan dutu.

³⁰ Ne migkahiyan sikandin te panalihan, “Kene ka egkaaldek, Mariya, su ingkeupii ka te Manama.

³¹ Egkaber es ka wey eganak te lukes, wey ngarani nu sikandin ki Hisus. ³²

1:19 Dan 8:16; 9:21. * **1:19** Te Grigu: migsasindeg diye te tangkaan te Manama. **1:27** Mat 1:18. **1:31** Mat 1:21. **1:32** 2Sam 7:12-13,16; Isa 9:7.

Egkeyimu sikandin ne mabantug wey eg-umawen sikandin ne Anak te Amana ne Mabantug ne Manama. Ne epaharien sikandin te Magbebabe ne Manama iling te kaapuan din ne si Hari Dabid.³³ Ne egharian din ka me kabuhalan ni Hakub te ware egtamanan, ne ware katammanan te kandin ne peghari."

³⁴ Ne mig-insaan ni Mariya ka panalihan, "Egmenuwen ku naa te eg-anak te mengebay e mem pad?"

³⁵ Ne migtabak ka panalihan, "Eggendini te keykew ka Panisingan te Manama wey egdalungan ka te geem din. Puun due, ka matulus ne bate ne ig-anak nu egngararan te Anak te Manama.³⁶ Sumsumana nu ka suled nu ne si Ilisabit. Kahiyan ne kene din eg-anak. Piru kuntee egkasalayan e sikandin su hen-em e ne bulan ka getek din, minsan buyag e sikandin.³⁷ Su ka Manama egpekeyimu te langun."

³⁸ Ne migkahi si Mariya, "Suluhuanen a te Manama. Egkeyitabu perem kayi te keddi ka inlalag nu." Ne mig-awe e ka panalihan te Manama.

*Ka pegpanumbaley ni
Mariya diye te ki Ilisabit*

³⁹ Te peglihad te pila ne me aldew, migpanines si Mariya wey miglukut-lukut miggendiyte sabeka ne lungsud ne diye te

me bubungan te Hudiya.
⁴⁰ Te pegginguma rin diye, migseled sikandin te baley enni Sakariyas wey migpangemusta ki Ilisabit.
⁴¹ Te pegkarineg ni Ilisabit te laheng ni Mariya, migweil ka bate diye te getek din. Ne dutu, napenu si Ilisabit te Panisingan te Manama,⁴² ne miglagat te meemen, "Te langun ne me malitan sikeykew re ka migpanalangan te Manama, wey migpanalangan degma ka bate ne ingkaberis nu!⁴³ Hentew e naan de iya se impanumbalan te iney te Magbebabe ku?
⁴⁴ Su te pegkarineg ku te laheng nu, migweil te kahale ka bate kayi te getek ku.
⁴⁵ Keupianan te seeye se migpalintutuu ne due katumanan te impanengneng te Manama diye kandin."

*Ka ulahingen ni Mariya te
pegdayan*

⁴⁶ Ne migkahi si Mariya,
"Egdayan a te Manama

⁴⁷ wey egkahale ka gimukud
ku su ka Manama ka
keddiey ne kaluwasan
⁴⁸ tenged te nakasuman-
suman sikandin ked-
diey te suluhuanen din
ne kene ne impurtanti!

Ne puun kuntee ka langun
ne etew egkahi te im-
panalangan a,

⁴⁹ tenged te kein-inuwan ne
innimu te maresen ne
Manama kayi te ked-
diey.

Matulus sikandin.

- 50 Egkeyid-u sikandin te langun ne due pegkaaldek diye te kandin, puun pad dengan wey minsan te keureme.
- 51 Migpakita sikandin te geem din
wey impegsuwey-suwey rin ka me etew ne migpaambug te pegkeetew ran.
- 52 In-awe din ka me Hari diye te katungdanan dan
wey imparibabew rin ka me etew ne kene ne impurtanti.
- 53 Impeyibhibulung din te me meupiya ka impanggutasan
wey impaaawe din ne ware me inuyanan ka me meyaman.
- 54 Ne migbulihan din ka me kabuhalan ni Israil ne suluhuanen din,
wey nakasuman-suman sikandin te hid-u rin
- 55 diye te ki Abraham
wey te langun ne me kabuhalan din te ware egtaaman
sumale te insaad din diye te me kaapuan ta.”
- 56 Ne mig-ugpe si Mariya diye te ki Ilisabit seled te tatelu ne bulan. Nataman, mig-uli din e diye te kandan.

Ka pegkeetew ni Huwan ne Talagbewutismu

57 Ne miggingsume e ka timpu ne mig-anak e si Ilisabit wey lukes ka anak din. 58 Nakarineg ka me sumbaley rin wey ka me karumaan din ne meupiya

amana ka Manama diye te kandin ne nahale sikandan langun duma ki Ilisabit.

59 Te walu e ne aldew ka bate, migpanumbaley sikandan diye te ki Ilisabit eyew te pegtambung te pegtuli te bate. Ne egngaranan dan e perem ki Sakariyas ka bate su igsangey ran e te ngaran te amey rin. 60 Piru migkahi ka iney rin, “Kene! Huwan ka inggaran kandin.”

61 Ne migkahiyan dan si Ilisabit, “Piru ware ma karumaan nu ne migngaranan te iling due!” 62 Ne migtingyasan dan ka amey te bate ne mig-inse, “Nekey-a ka igngaran nu te bate?”

63 Ne migbuyu si Sakariyas te egsulatan, ne neinuinu sikandan su ka insulat ni Sakariyas, “Huwan ka ngaran te bate.” 64 Ne sauhune ne nakalalag e si Sakariyas wey indayan din ka Manama. 65 Ne naaldek ka me sumbaley ran wey nekeempet te langun ne kabubunganan te Hudiya ka guhuren meyitenged te seeye ne neyitabu. 66 Ka me etew ne nakarineg te seeye ne guhuren, migsuman-suman wey migpein-inseey ke nekey ka katamanan te seini ne bate su ka himenew wey geem te Manama migduma kandin.

Ka pegpanagne ni Sakariyas

67 Si Sakariyas ne amey ni Huwan, napenu te

Panisingan te Manama wey migpanagne ne migkahi,
 68 "Dayanen ta ka Magbebaye ne Manama te Israil!
 Su miggendini sikandin eyew te pglekat te keet-etawan din.
 69 Impeendini rin kayi te kanta ka maresen ne manluluwas,
 ne kabuhalan te suluhuanen din ne si Dabid.
 70 Ne seini degma ka impahuhud din te matulus ne me prupita rin dengan.
 71 Intetaha sikandin ne egluwas kanta ligkat te me kuntre ta
 wey ligkat te karesen te me etew ne egdumut kanta. 72 Migkahi sikandin ne igkeyid-u rin ka me kaap-apuan ta
 wey egtantanuran din ka matulus ne kasabutan din.
 73 Migpahunlibet sikandin diye te kaapuan ta ne si Abraham
 74 ne egluwasen ki ligkat te me kuntre ta
 eyew egpakapamakey ki kandin te ware pegkaaldek.
 75 Ne egkeyimu ki ne matulus wey matareng
 diye te tangkaan din taman te egkabigtus e ka geyinawa ta.
 76 "Ne sikeykew se anak ku, egngaranan ka te prupita te Amana ne Mabantug ne Manama

su egguna ka te Magbebaye eyew eg-andam te egbayaan din;
 77 wey te pegnangen te keet-etawan din ne egkaluwas sikandan pinaahi te pegpasaylu te mesale dan.
 78 Su amana ne hiimenawen wey hiid-uwen ka Manama.
 Sikanaa ka due igpeuyan din ne egluwas kanta ne egpekeiling te aldew ne egsile diye te langit
 79 eyew egkalayahan seeye se diye te marusilem wey egkaaldek te kamatayen.
 Igpanulud kinikandin diye te dalan te keupianan."
 80 Ne intulin ka anak ni Sakariyas wey indakel ka katuenan din wey ka pegpal-intutuu rin. Diye sikandin mig-ugpe te mammara ne inged taman te migbunsude sikandin migpanulu te matig-Israel.

2

Ka pegkeetew ni Hisus (Mat. 1:18-25)

¹ Te seeye ne timpu, miggimu te balaud ka Impiradur te Ruma ne si Agustu ne keilangan ne egpalista ka langun ne sakup din. ² Seeye ka an-anayan ne pegsinsus te timpu ne si Siriniyu ka gubirnadur te Sirya. ³ Puundue, nangendiye ka langun ne etew te inged te me kaapuan dan eyew te pegpalista.

⁴ Seeye naa, si Husi ne matig-Nasarit ne sakup te Galiliya, miggendiye sikandin te Bitlihim ne sakup te Hudiya, ka ugpaan ni Hari Dabid dengan su kabuhalan sikandin ni Dabid.
⁵ Migparumeey sikandan ki Mariya ne egpangasaween din ne egkaber es te seeye ne timpu eyew egpalista.
⁶ Te diyad sikandan te Bitlihim, miggungume e ka timpu ne eglesutan e si Mariya.
⁷ Migpanganayan sikandin te lukes, wey imbukusan din ka bate te manggad wey impeyibat din diye te sungguranan diye te ugpaan te me ayam su warad egkeyirehaan dan.

Ka me talagtameng te karniru wey ka me panalihan

⁸ Ne marani te seeye ne inged, due me talagtameng ne migpalayud te me karniru ran wey migpulan migbanter te me ayam dan.
⁹ Te seeye ne karusileman, due migpakita kandan ne panalihan te Magbebaya wey nalayahan sikandan te layag te Magbebaya, wey naaldek amana sikandan.
¹⁰ Piru migkahiyan sikandan te panalihan, "Kene kew kaaldek, su seini a eyew te pegpangguhud kaniyu te meupiya ne panugtulen ne egpakapahale amana te langun ne keet-etawan.
¹¹ Su neetew kuntee diye te lung-sud dengan ni Hari Dabid ka Manluluwas niyu, ka Kristu* ne Magbebaya.
¹² Seini ka

palinneuwi niyu: egkakita niyu ka bate ne imbukusan te manggad wey impeyibat diye te sungguranan te me ayam."

¹³ Ne dutu, sahuhune ne due migpakita ne susuluhi ne me panalihan ne miglagpu kandin te migsaye te Manama ne migkahi,
¹⁴ "Dayanen ta ka Manama ne diye te langit, wey keupianan te me etew ne ingkahale din kayi te tane."

¹⁵ Te nanlibed e ka me panalihan diye te langit, migpanangnangeneyle ka me talagtameng te me karniru ne migkahi, "Eggendiye ki te Bitlihim su egpitawen ta seini se impanengneng te Manama kanta."

¹⁶ Seeye naa, miglukut-lukut sikandan nangipanew, wey nakita ran diye si Mariya wey si Husi wey ka bate ne impeyibat diye te sungguranan te me ayam.
¹⁷ Ne dutu, impangguhud dan e ka impanengneng kandan te panalihan meytenged te bate.
¹⁸ Ne neinu-inu ka langun ne nakarineg te guhuren te me talagtameng te karniru kandan.
¹⁹ Intetahu seeye ni Mariya diye te geyinawa rin wey layun din palemlema.
²⁰ Ne nanlibed e ka me talagtameng te karniru ne migdayan wey migsaye te Manama tenged te langun ne narineg wey nakita ran, sumale te impanengneng te panalihan kandan.

* 2:11 Ka igpasabut te Kristu, Insaad ne Manluluwas.

Ka bate ingngaranan ki Hisus

²¹ Te walu e ne aldew ka bate, intulian e sikandin wey ingngaranan ki Hisus. Sika ka ngaran ne innangen te panalihan te ware pad ipanganalin ka bate.

Ka peghalad ki Hisus diye te timplu

²² Miggingga ka timpu ne miggendiye ensi Husi wey Mariya te Hirusalim eyew pegtuman te Balaud ni Muwisis meytenged te peglinis te malitan ne miglesutan. Inuyan dan degma ka bate ne si Hisus eyew ighalad diye te Manama, ²³ su seini ka nasulat diye te Balaud te Magbebabe ne Manama, “Ka langun ne me panganey ne lukes keilangan ne ighalad diye te Magbebabe ne Manama.” ²⁴ Eyew egkalinisan ka miglesutan, eghanubad sikandan te daruwa ne tukmu, wey ke daruwa naa ne seleppati sumale te nasulat diye te Balaud te Magbebabe ne Manama.

²⁵ Ne due etew diye te Hirusalim ne egngaranan ki Simyun ne egtetahad ne egpangabangan te Manama ka kabuhalan ni Israil. Matareng sikandin ne etew wey migpamakey te Manama, wey egduma layun kandin ka Panisingan te Manama ²⁶ ne iyan migpanengneng kandin te kene din pad egpatey te kene din pad egkakita ka

Kristu ne igpeuyan te Magbebabe. ²⁷ Insuhu sikandin te Panisingan te Manama ne egpaseleren diye te timplu. Te seeye ne timpu, in-uyan e te iney wey amey si Hisus diye eyew te pegtuman te insuhu te Balaud. ²⁸ Nakita ni Simyun ka bate wey insapiri rin, wey migsaye sikandin te Manama ne migkahi,

²⁹ “Kuntee Magbebabe ne amana ne maresen, egkaayun ad ne egpatey,

su nakapalene-lene e ka isip ku su natuman e ka inlalag nu.

³⁰ Su nakita kud iya ka impeuyan nu ne Manlu-luwas

³¹ ne intahahe nu ne igpakita te langun ne keet-etawan.

³² Sika ka layag ne egpanulud te kene ne me Hudiyu peendiye te keykew, wey egbehey te kabantug te keet-etawan nu ne kabuhalan ni Israil.”

³³ Neinu-inu ka amey wey iney te inlalag ni Simyun meytenged te bate. ³⁴ Ne impanalanginan sikandan ni Simyun wey ingkahiyang din si Mariya ne iney te bate, “Seini ne bate in-alam te Manama eyew pegpariralem wey pegparibabew te masulug ne me etew te Israil. Sikandin ka palinneu ligkat te Manama ne egdaldian te me etew ³⁵ wey egkasakitan ka degma iling te eg sundangan te kampilan ka

pusung nu. Ne igpanengneng din ka neeles ne suman-suman te me etew."

³⁶ Due degma sabeka ne malitan ne prupita ne egngararanan ki Ana ne anak ni Panuwil ne kabuhalan ni Asir. Buyag e sikandin, wey migpalunglungguney sikandin te asawa rin te pitu re ne leg-un,³⁷ wey nabalu e sikandin. Migwalu ne pulu wey hep-at (84) e ne leg-un sikandin, wey layun de sikandin eg-uugpe diye te timpla ka egsimba, egpuasa wey eg-ampu tagse maaldew wey marusilem. ³⁸ Ne dutu, migparani sikandin diye te engki Husi wey migpasalamat te Manama, wey miglalag sikandin meyitenged te bate diye te langun ne egtetahad ne egluwasen te Manama ka Hirusalim.[†]

Ka peg-uli dan diye te Nasarit

³⁹ Te napengaan e enni Husi wey Mariya ka langun ne nasulat diye te Balaud te Magbebaye ne Manama, mig-uli e sikandan diye te lungsud dan ne sakup te Galiliya ne iyan ka Nasarit. ⁴⁰ Ne migtulin e ka bate wey manekal e ka lawa rin, wey dakel ka tahu te ulu rin, wey impanalanginan sikandin te Manama.

Ka bate ne si Hisus diye te timpla

⁴¹ Tagse leg-un ne egendiye ka iney wey amey

ni Hisus te Hirusalim ka egtambung te Sahakeen te Peglihad te Panalihan. ⁴² Te sapulu wey daruve (12) e ne leg-un si Hisus, migtambung sikandan te sahakeen sumale te nabatasan dan. ⁴³ Te napenge e ka pegasahakeen, nanguli e sikandan piru migpalunggehaat si Hisus diye te Hirusalim. Ware nanengnengi seeye te iney wey amey rin,⁴⁴ su kahiyan dan ne migluyud sikandin te me etew. Te migsenge kaaldew e sikandan ka miggipanew, impammitew ran si Hisus diye te me karumaan dan wey te me alukuy ran,⁴⁵ piru ware dan kitaa sikandin. Sikan naa ka miglibed sikandan diye te Hirusalim eyew te pegpammitew kandin. ⁴⁶ Te igkatedu e ne aldew, nakita ran e si Hisus diye te timpla ne migpinnuu duma te me talagpanulu te Balaud te Manama. Migpammineg sikandin wey mig-inse-inse kandan. ⁴⁷ Ka langun ne nakarineg kandin, neinuinu sikandan te katuenan din wey te pegpanabak din. ⁴⁸ Neinu-inu ka iney rin wey ka amey rin te pegkakita ran kandin. Ne migkahiyan sikandin te iney rin, "Tatu, mania te innimu nu seini kayi te kanami? Neipeng key te amey nu te pegpammitew ney keykew."

⁴⁹ Ne intabak ni Hisus sikandan, "Mania te eg-pammitawen a nikaniyu?

[†] 2:38 Iyan igpasabut te Hirusalim ka kabuhalan ni Israil.

2:39 Mat 2:23.

2:41 Iks 12:1-27; Diy 16:1-8.

Ware kew bes nakanengneng te keilangan ne kayi a te baley te Amey ku?”⁵⁰ Piru ware sikandan nakasabut te inlalag din kandan.

⁵¹ Ne migdume e si Hisus kandan te mig-uli diye te Nasarit wey migparumarama sikandin kandan. Seini se langun intetahu ni Mariya diye te geyinawa rin.⁵² Ne migdakel pad ka kaalam ni Hisus wey migpabulus migtulin, wey ingkeupii sikandin te Manama wey te me etew.

3

Ka pegwali ni Huwan ne Talagbewutismu

(Mat. 3:1-12; Mar. 1:1-8;
Huw. 1:19-28)

¹ Te igkasapulu wey lalimma (15) ne leg-un te pegmandu ni Hari Tibiriyu, si Punsiyu Pilatu ka gubirnadur diye te Hudiya. Ne si Hirudis ka migmandu diye te Galiliya, wey ka kakey rin ne si Pilipi ka pangulu diye te Ituriya wey diye te Trakuniti. Ne si Lisanyas ka pangulu diye te Abilina,² wey ensi Anas wey Kaypas ka me pangulu diye te timplu. Te seini ne timpu inlalahan te Manama ka anak ni Sakariyas ne si Huwan te diye din te mammara ne inged ne kene egkeugpaan.³ Ne miggendiye si Huwan te langun ne inged ne marani te weyig ne Hurdan ka

migwali ne migkahi, “Inniyuhi niyu ka me sale niyu wey pabewutismu kew eyew egpasayluwen te Manama ka me sale niyu.”⁴ Sumale te nasulat ni prupita Isayas ne eggendue,

“Due egpanguleyi diye te inged ne ware mahinged ne egkahi:
‘Andama niyu ka dalan te Magbebaye.

Tul-ira niyu ka egbayaan din!

⁵ Buneli niyu ka langun ne mgleb-eng-leb-eng,

Pataha niyu ka langun ne labuntud wey ka me bubungan,

Tul-ira niyu ka natiku-tiku ne dalan,

Ay-ayari niyu ka migpagpahendak ne dalan.

⁶ Eyew egkakita te langun ne etew ka kaluwasan ne egpuun diye te Manama!”

⁷ Ne due masulug ne etew ne nangendiye te ki Huwan eyew egpabewutismu kandin. Ingkahiyan ni Huwan sikandan, “Sikaniyu se me etew, iling kew te uled! Hentew ka miglag kaniyu ne egpakaalihi kew te langet te Manama ne mahaan e egginguma?⁸ Ipakita niyu pinaahi te himu niyu ne mig-inniyuhan niyud e ka me sale niyu. Ne kene kew palalahey ne kabuhalan kew ni Abraham. Su egnanganen ku sikaniyu te egkaayun ne egpabaluyen te Manama ne me etew ka seini se me batu

2:52 1Sam 2:26; Lal 3:4. **3:4** Isa 40:3-5 (LXX). **3:7** Mat 12:34; 23:33. **3:8**

Huw 8:33. **3:9** Mat 7:19.

eyew eggimuwen ne kabuhalan ni Abraham. ⁹ Andame ka perekul te pegpeled te kayu ne kene egbebehas te meupiya; egtempuhan, eggulayen ne igtemeg."

¹⁰ Mig-inse ka me etew ki Huwan, "Nekey naa ka eggimuwen ney?"

¹¹ Ne migtabak sikandin, "Ka etew ne due daruwa se kumbale keilangan ne igbehey rin ka sabeka diye te etew ne ware kumbale, wey ka etew ne due pegkeen keilangan ne egbehayan din seeye se etew ne ware egkakeen."

¹² Due me etew ne talagsukut te buhis ne nangendiye eyew te pegpabewutismu wey in-insaan dan si Huwan, "Talagpanulu. Nekey-a ka eggimuwen ney?"

¹³ Migtabak si Huwan kandan, "Kene niyu pasubleyi ka insuhu kaniyu te balaud ne igpasukut."

¹⁴ Ne mig-inse degma ka me sundalu kandin, "Sikanami degma. Nekey-a ka eggimuwen ney?"

Ne migtabak si Huwan kandan, "Kene kew paneleppi te minsan hentew pinaahi te pehes, wey kene kew pangawang egpamayung. Keilangan ne egkabennalan kew e te igsuwildu kaniyu."

¹⁵ Puun dutu, migsalig e ka me etew ki Huwan wey migsuman-suman ne kema ke sikandin buwad ka Kristu.

¹⁶ Ne migkahiyan ni Huwan sikandan langun, "Egbe-wutismu a kaniyu pinaahi te weyig, piru due egginguma ne subla pad ne maresen keddiey. Minsan sikeddi, kena a ne likes ne eggekad te hiket te sandal din. Sikandin ka egbewutismu kaniyu te Panisingan te Manama wey te hapuy. ¹⁷ Ne egpekeiling sikandin te sabeka ne etew ne miggen-gen te nihu ne igetap te inggaani rin eyew ka ukaba ig-esa te behas. Ne eglimuren seeye se meupiya ne behas diye te lelapeng piru ka ukaba egsilaban te hapuy ne kene egkeebukan."

¹⁸ Ne nalein-lein ne me panunggilingan ka inggamit ni Huwan te migpanulu wey te migwali te Meupiya ne Panugtulen diye te me etew.

¹⁹ Piru indew-ey ni Huwan si Gubirnadur Hirudis su inahew rin ma si Hirudiyas, ka asawa te suled din wey masulug pad ka neyimu rin ne mareet. ²⁰ Nekeyimu pad man-e si Hirudis te amana ne mareet ne iyan ka pegpaprisu rin ki Huwan.

*Ka pegbewutismu ki Hisus
(Mat. 3:13-17; Mar. 1:9-11)*

²¹ Te nabewutismuwan e ka langun ne etew, imbewutismuwan e degma si Hisus. Te mig-ampu pad sikandin, nalukatan ka langit, ²² wey miglene diye te kandin ka Panisingan te Manama ne egpekeiling te

seleppati. Ne due laheng diye te langit ne migkahí, "Sikeykew ka pinalangge ku ne Anak. Amana a nahale keykew."

*Ka kaligkatan ni Hisus
(Mat. 1:1-17)*

²³ Ne si Hisus migbunsud te himu rin te me tatelu e ne pulu (30) ka idad din. Ka suman-suman te me etew ne anak sikandin ni Husi ne anak ni Hili. ²⁴ Si Hili anak ni Matat ne anak ni Libi. Si Libi anak ni Milki ne anak ni Hana. Si Hana anak ni Husi ²⁵ ne anak ni Matatiyas. Si Matatiyas anak ni Amus ne anak ni Nahum. Si Nahum anak ni Isli ne anak ni Nagai. ²⁶ Si Nagai anak ni Maat ne anak ni Matatiyas. Si Matatiyas anak ni Simii ne anak ni Husik. Si Husik anak ni Huda ²⁷ ne anak ni Huwanan. Si Huwanan anak ni Risa ne anak ni Surubabil. Si Surubabil anak ni Salatiil ne anak ni Niri. ²⁸ Si Niri anak ni Milki ne anak ni Adi. Si Adi anak ni Kusam ne anak ni Ilmadam. Si Ilmadam anak ni Ir. ²⁹ Si Ir anak ni Huswi ne anak ni Iliisir. Si Iliisir anak ni Hurim ne anak ni Matat. Si Matat anak ni Libi. ³⁰ Si Libi anak ni Simyun ne anak ni Huda. Si Huda anak ni Husi ne anak ni Hunam. Si Hunam anak ni Ilyakim ³¹ ne anak ni Miliya. Si Miliya anak ni Mina ne anak ni Matata. Si Matata anak ni Natan ne anak ni Dabid. ³² Si Dabid anak ni Hisi ne anak ni Ubid. Si Ubid anak ni Buas ne anak ni Salmun. Si Salmun anak ni Nasun ³³ ne anak ni Aminadab. Si Aminadab anak ni Admin ne anak ni Arni. Si

Arni anak ni Isrum ne anak ni Piris. Si Piris anak ni Huda ³⁴ ne anak ni Hakub. Si Hakub anak ni Isaak ne anak ni Abraham. Si Abraham anak ni Tira ne anak ni Nahur. ³⁵ Si Nahur anak ni Sirug ne anak ni Riyu. Si Riyu anak ni Pilig ne anak ni Ibir. Si Ibir anak ni Sala. ³⁶ Si Sala anak ni Kainan ne anak ni Arpaksad. Si Arpaksad anak ni Sim ne anak ni Nuwi. Si Nuwi anak ni Lamik ³⁷ ne anak ni Mitusila. Si Mitusila anak ni Inuk ne anak ni Harid. Si Harid anak ni Mahalaliil ne anak ni Kainan. ³⁸ Si Kainan anak ni Inus ne anak ni Sit, wey si Sit anak ni Adan ne anak te Manama.

4

*Ka pegtintal ni Meibulan ki Hisus
(Mat. 4:1-11; Mar. 1:12-13)*

¹ Napenu si Hisus te Panisingan te Manama wey mig-awe sikandin diye te Hurdan, wey in-uyan sikandin te Panisingan te Manama diye te mammara ne inged ne kene egkeug-paan. ² Ne dutu tintala te ahalen te me busew seled te hep-at ne pulu (40) ne aldew. Te seeye ne timpu ware migkeen si Hisus. Nataman, miggutasan e sikandin.

³ Ne migkahiyán sikandin te ahalen te me busew, "Ke malehet kema ne anak ka te Manama, pabaluya nu ne paan seini se batu."

⁴ Ne migtabak si Hisus, "Nasulat te Kasulatan ne miggenendue, 'Kene

egkeuyag ka etew te egkeelin de ne keenen.' ”

⁵ Nataman, in-uyen e si Hisus te ahalen te me busew diye te ampew wey impapitew kandin ka langun ne me inged kayi te ampew te tane te sabeka re ne pegpele-pele.

⁶ Ne migkahiyan sikandin te ahalen te me busew, “Igbehey ku diye te keykew ka langun ne katenged wey ka langun ne karatuan. Su imbehey keddi seini langun wey sikeddiey ka mateu ke hentew ka igkeupii ku ne egbehayan. ⁷ Egkakeykew seini se langun ke egsimba ka keddiey.”

⁸ Ne migtabak si Hisus, “Nasulat te Kasulatan ne miggendue, ‘Simbaa nu ka Magbebeye ne Manama nu wey sikandin de pamakaya nu!’ ”

⁹ Ne in-uyen din e man-e si Hisus diye te Hirusalim wey diye itahu te kinaribabawan te timplu, wey migkahiyan, “Ke anak ke ma te Manama, tinugpu ka seeye te diralem.

¹⁰ Su nasulat te Kasulatan, ‘Egsuhu ka Manama te me panalihan din te pegbantey keykew. ¹¹ Egtapayeen ka nikandan, eyew kene egpakabar as te batu ka paa nu.’ ”

¹² Ne migtabak si Hisus, “Ka Kasulatan migkahi, ‘Kene nu tintala ka Magbebeye ne Manama nu.’ ”

¹³ Nataman, te neimpusan e sikandin tintala te ahalen te me busew te langun-langun

de iya ne paahi, in-engkeran pad sikandin.

Ka pegbunsud ni Hisus te himurin

(Mat. 4:12-17; Mar. 1:14-15)

¹⁴ Ne mig-uli e si Hisus diye te Galiliya ne due te kandin ka geem te Panisingan te Manama. Nekeempet te seeye ne inged ka pangguhuren meyitenged kandin.

¹⁵ Migpanulu sikandin diye te me simbaan te me Hudiyu wey indayan sikandin te langun ne etew.

Ka peggubabe ki Hisus te matig-Nasarit

(Mat. 13:53-58; Mar. 6:1-6)

¹⁶ Ne miggendiye si Hisus te Nasarit ne migtulinan din. Te Aldew te Peggimeley, miggendiye sikandin te simbaan te me Hudiyu sumale te batasan din. Ne migsasindeg sikandin eyew te pegbasa te Kasulatan, ¹⁷ ne imbehayan sikandin te inlulun ne baseen ne sinulat ni prupita Isayas. Imbelat din seeye wey te pegkakita rin te impamitew rin imbasra rin e,

¹⁸ “Kayi te keddiey ka Panisingan te Manama, su in-alam a nikandin eyew te pegwali te Meupiya ne Panugtulen diye te egkengaayu-ayu.

Insuhu a nikandin eyew te pegpangguhud te neneuripen meyitenged te kaligwangan dan,

wey pegbawi te me butud;
wey pegpangabang te seeye
se me indeeg-deeg,
19 wey pegpataha ne
miggingume e ka
timpu te Magbe-
baye ne Manama ne
egluwasen din e ka me
etew."

20 Ne inlulun e ni Hisus ka
baseen wey inlibed din diye
te impiyalan wey migpinnuu
e sikandin ka egpanulu.
Migmemetmet kandin ka
langun ne etew diye te
seled te simbaan. 21 Ne
migkahiyan din sikandan,
"Natuman e kuntee ne aldew
ka narineg niyu puun te
Kasulatan." 22 Nakareyrey
sikandan langun ki Hisus
wey neinu-inu te me
meupiya ne guhuren ne inlalag
din. Migkahi sikandan,
"Kene naa ne anak ni Husi
seini?"

23 Ne migkahiyan sikandan
ni Hisus, "Migpalintutuu ad
iya ne iglalag niyu perem
keddiey ka panunggilingan
ne eggenendue, 'Talagbawi,
un-neyi nu bawii ka lawa
nu.' Ne iyan igapasabut
due, 'Himuwa nu degma
kayi te inged nu ka narineg
ney ne innimu nu diye te
Kapirnaum.' " 24 Ne migkahi
si Hisus, "Egkahiyani ku
sikaniyu te malehet: kene eg-
ileen ka sabeka ne prupita
diye te inged ne intulinan
din. 25 Sumsumana niyu
dengan te timpu pad ni Ilyas
ne miggulabung te tatelu
ne leg-un wey liware, wey

nabilil te masumpit ka me
etew. Ne malehet ne masulug
ka me balu kayi te Israel,²⁶
piru ware ipeendiye si Ilyas
te minsan hentew kandan su
diye mule te balu ne matig-
Saripta ne sakup te Sidun.
27 Ne due masulug degma
ne me ibungen kayi te Israel
te timpu ni prupita Ilisyu,
piru ware sabeka kandan ne
nabawian su si Naaman de
iya ne matig-Siriya."

28 Te pegkarineg dutu
te langun ne diye te seled
te simbaan te me Hudiyu,
nalangetan amana sikandan.
29 Ne dutu, nanasindeg e
sikandan wey inggehanuy
ran e si Hisus diye te lihawan-
gan te lungsud peendiye
te tikeba te bubungan ne
impasasindehan dan te
lungsud dan. Eg-uuluhen
dan e perem si Hisus diye te
tikeba, ³⁰ piru miggipanew
sikandin diye te taliware te
me etew ne migpariyu e.

*Ka etew ne inserepan te
busew*
(Mar. 1:21-28)

31 Ne migtupang e si Hisus
peendiye te Kapirnaum,
sabeka ne siyudad diye te
Galiliya. Migpanulu sikandin
te me etew te Aldew te
Peggimeley. ³² Neinu-inu
ka me etew te kandin ne
pegpanulu su due geem
te kandin ne lalag. ³³ Ne
diye te seled te simbaan te
me Hudiyu, due etew ne
migserapan te busew ne
migbalbalukan ne migkahi,

³⁴ “Hisus ne matig-Nasarit! Nekey-a ka eggimuwen nu kayi te kanami? Iyan nu innendini ka egdereet kanami? Nekeila a keykew: sikeykew ka Matulus ne Impeuyan te Manama!”

³⁵ Piru insaparan ni Hisus ka busew, “Peeneng-eneng ka! Awe ka due te kandin!” Ne impabahed e te busew ka etew diye te tangkaan te me etew, wey mig-awe e ka busew ne ware namenu ka etew.

³⁶ Neinu-inu ka langun ne etew wey migpanangnangenev ne migkahi, “Nekey buwa seini ne pegpanulu? Mania te due katenged wey geem te seini ne etew ne epaaawe te busew?” ³⁷ Ne nekeempet ka guhuren meyitenged ki Hisus diye te langun ne me inged ne marani dutu.

Masulug ne me etew ne imbawian ni Hisus
(Mat. 8:14-17; Mar. 1:29-34)

³⁸ Ne mig-awe e si Hisus diye te simbaan te me Hudiyu wey miggendiyad e te baley ni Simun. Te seeye ne timpu, miglusungan te mangune-kune ka anuhang ni Simun ne malitan, wey innangenan dan e si Hisus ne egbawian sikandin. ³⁹ Seeye naa, migdugpu sikandin diye te miggibatan te malitan, wey impaawe din ka lusung. Ne due-rue ne neulian e ka malitan ne mig-enew sikandin wey intanggu rin e sikandin.

⁴⁰ Te miglineb e ka aldew, mig-uyan te me etew diye te ki Hisus ka me alukuy ran ne egmanderalu te naleinlein ne dalu. Ne dutu, inatul e ni Hisus sikandan telabi te belad din wey neulian sikandan langun. ⁴¹ Ne impaliyawang din degma puun te masulug ne me etew ka me busew wey migmanguleyi ne migkahi, “Sikeykew ka Anak te Manama!”

Piru insaparan ni Hisus ka me busew wey ware din palalaha tenged su nakanengneng sikandan ne sikandin ka Kristu.

Ka pegwali ni Hisus diye te Hudiya

(Mar. 1:35-39)

⁴² Te malayag e, mig-awe si Hisus diye te lungsud wey miggendiyad e te inged ne ware etew. Ne impammitew sikandin te me etew. Te nakita ran e sikandin, inggawiran dan perem sikandin ne kene pad eg-awe diye te kandan. ⁴³ Piru ingkahiyan din sikandan, “Keilangan ne igwali ku degma ka Meupiya ne Panugtulen meyitenged te Peghari te Manama diye te duma ne me siyudad, su seini ka tuyu te Manama te peg-peendini rin keddi.” ⁴⁴ Ne empet din te migwali ka me simbaan te me Hudiyu diye te Hudiya.

5

Ka peg-umew ni Hisus te an-anayan ne me hibateen din
(Mat. 4:18-22; Mar. 1:16-20)

¹ Due timpu ne migsasindeg si Hisus diye te ilis te lanew te Ginisarit ka egpanulu, wey egmekegsegseg e ka me etew diye te kandin ka egpammineg te lalag te Manama. ² Ne due daruwa ne balangey ne nakita ni Hisus diye te ilis te lanew ne mig-engkeran te me mangngengalap su egpanulu sikandin te me biyale dan. ³ Ne dutu, mig-untud e si Hisus te sabeka ne balangey ne iyan kamuney si Simun. Inhangyu din si Simun ne bayew igtuu ka balangey peendiye te weyig, ne migpinnuu e sikandin wey migpanulu te me etew.

⁴ Te nekeimpus e sikandin ka migpanulu, migkahiyan din e si Simun, "Hendiye ka te maralem wey isawile niyu ka me biyale niyu eyew eg-pekeutel kew."

⁵ Ne migtabak si Simun, "Talagpanulu, napawaan key ka migngengalap wey warad iya neutel ney. Piru puun su migkahi ke ma, igsawile ku ka me biyale ney." ⁶ Ne intuman dan ka ingkahi ni Hisus wey amana ne dakel ka ngalap ne migsahad te biyale dan, wey hapit e egkengahisi ka me biyale dan. ⁷ Ne ingkamey ran ka me duma ran diye te dangeb ne balangey ne egpeparaniyen kandan wey egpabulihen. Migparani kandan ka me duma ran wey

innipenu dan te ngalap ka daruwa ne balangey, sikan naa ka egkahan-ganaran e sikandin egkatanled. ⁸ Te pegkakita ni Simun Pidru dutu, migpanimbuel sikandin diye te tangkaan ni Hisus ne migkahi, "Magbebeye, pariyu ka keddiey su makasesala a ne etew."

⁹ Nakahi rin sika su neinuinu sikandin wey ka me duma rin te amana ne dakel ka neutel dan. ¹⁰ Neinuinu degma ka me duma ni Simun ne ensi Santiyagu wey Huwan ne me anak ni Sibidiyu. Ne migkahiyan ni Hisus si Simun, "Kene ka kaaldek. Puun kuntee, etew e ka eggingutelen nu."

¹¹ Te nakapeilis dan e ka me balangey ran, mig-engkeran dan ka langun, wey mig-ikul ran e ki Hisus.

Ka pegbawi ni Hisus te ibungen

(Mat. 8:1-4; Mar. 1:40-45)

¹² Te diye pad si Hisus te sabeka ne siyudad, due sabeka ne etew ne ibungen. Te pegkakita rin ki Hisus, mig-usengul sikandin diye te tangkaan ni Hisus ne migpeyid-u-hid-u ne migkahi, "Magbebeye, ke egkeupian ka, egkabawian* a nikeykew!"

¹³ Ne insamsam ni Hisus ka etew te migkahi, "Uya, igkeupii ku. Egkeulian kad!" Sahuhune neulian ka ibungen. ¹⁴ Ne migkahiyan ni Hisus ka etew, "Kene nu

^{5:1} Mat 13:1-2; Mar 3:9-10; 4:1. ^{5:5} Huw 21:3. ^{5:6} Huw 21:6. * ^{5:12} Te Grigu: eglinisan. (Diye te tuluuwen te me Hudiyu, ka etew ne ibungen in-isip ne malindit.) ^{5:14} Lib 14:1-32.

ipangguhud seini te minsan hentew. Ne hendiye kad te talagpanubad wey papitew ka kandin ne warade ka dalu nu wey panubad ka sumale te insuhu ni Muwisis eyew te pegpamalehet te me etew ne neulian kad e.”

¹⁵ Piru nasi de iya nekeempet ka guhuren meiyitenged ki Hisus. Purisu masulug ka me etew ne nangendiye eyew te pegpammineg ki Hisus wey eyew egpabawi te me dalu ran. ¹⁶ Piru egsabsabeka layun si Hisus ne eggendiye te mammara ne inged ne kene egkeugpaan, wey egampu.

Ka pegbawi ni Hisus te kene egkaweil se lawa

(Mat. 9:1-8; Mar. 2:1-12)

¹⁷ Sabeka ne aldew te migpanulu si Hisus, due me Parisiyu wey me talagpanulu te Balaud te Manama ne naminnuu dutu ne diye namuun te lein-lein ne me inged ne sakup te Galiliya, Hudiya wey Hirusalim. Ne imbehayan si Hisus te geem te Manama te pegpamawi te egmanderalu. ¹⁸ Due nanginguma ne me etew ne migyayung te etew ne kene egkaweil se lawa. Egseled perem sikandan te baley eyew igpakanabuk dan ka etew diye te tangkaan ni Hisus. ¹⁹ Piru ware sikandan nakaseled diye te baley tenged su masulug ka me etew. Ne in-uyan dan e seeye se etew diye te atep wey inlelekat dan ka atep

ne tisa wey intuntun dan e ka etew ne impeyibat diye te hibatanan din.[†] Ne diye dan ipalenged te taliware te me etew te tangkaan ni Hisus. ²⁰ Te pegkakita ni Hisus ne dakel ka pegpalintutuu ran, migkahiyan din e ka kene egkaweil se lawa, “Suled, impasaylu e ka me sale nu.”

²¹ Ne ka me talagpanulu te Balaud te Manama wey ka me Parisiyu nekeinse diye te geyinawa ran, “Hentew-a ne etew seini se egbaley-baley te Manama? Ware etew ne egpakapasaylu te me sale, su ka Manama re!”

²² Piru natahaan ni Hisus ka suman-suman dan ne migkahiyan din sikandan, “Mania te egsuman-suman kew te iling due? ²³ Hendei bes ka malemu: ka egkahi, ‘Impasaylu e ka me sale nu,’ wey ke egkahi, ‘Enew ka wey hipanew kad?’ ²⁴ Piru igpapitew ku kaniyu ne due katenged te Anak te Etew kayi te ampew te tane te pegpasaylu te me sale.” Ne migkahiyan din ka etew ne kene egkaweil se lawa, “Enew ka, wey uyana nu ka hibatanan nu wey uli kad e diye te kaniyu!”

²⁵ Ne sahuhune ne migsasindeg ka etew diye te tangkaan te me etew ne migsabilbil te hibatanan din. Ne mig-uli e sikandin ne migdayan te Manama. ²⁶ Nawangalan ka langun ne etew wey naaldek degma sikandan, wey indayan dan

[†] 5:19 Mapatag ka atep te me Hudiuy.

ka Manama ne migkahi,
“Kein-inuwān amana ka
nakita ta kuntee!”

*Ka peg-umew ni Hisus ki
Libi*
(Mat. 9:9-13; Mar. 2:13-
17)

²⁷ Pegkapenga dutu, miggipanew e si Hisus wey due nakita rin ne talagsukut te buhis ne egngaranan ki Libi ne migpinpinnuu diye te upisina rin. Ne migkahiyan ni Hisus sikandin, “Ikul ka kediey.” ²⁸ Ne migsasindeg si Libi wey mig-engkeran din e ka langun te mig-ikul ki Hisus.

²⁹ Nataman, migsahakeen si Libi te dakel diye te baley rin para ki Hisus. Due degma masulug ne me etew ne miglagpu kandan te migkeen wey me talagsukut te buhis iya ka duma kandan. ³⁰ Due me Parisiyu wey me talagpanulu te Balaud te Manama ne migbahulbul diye te me hibateen ni Hisus. Ne miginse sikandan, “Mania te migpakiglagpu kew migkeen wey mig-inum due te me talagsukut te buhis wey te duma ne me makasesale?”

³¹ Ne migtabak si Hisus diye te kandan, “Ka me etew ne ware dalu, kene egkeilangan te talagbawi, ke kene, seeye de se egmanderalu. ³² Wara a miggendini eyew te peg-umew te me matareng, ke kene, te me makasesale eyew eg-inniyuhan dan ka me sale dan.”

Ka inse meyitenged te pegpuasa
(Mat. 9:14-17; Mar. 2:18-
22)

³³ Due me etew ne migkahi diye te ki Hisus, “Ka me hibateen ni Huwan malasi ne egpuasa wey eg-ampu, wey iling ded degma ka me hibateen te me Parisiyu. Piru ka me hibateen nu, migpabulus mule migkeen wey miginum.”

³⁴ Ne migtabak si Hisus, “Egpapuaseen niyu naa ka mahaliyug te egpangasawa ke duma ran pad sikandin? Kene iya! ³⁵ Piru eggunguma ka timpu ne eg-angayen e diye te kandan ka egpangasawa, ne egpuase e sikandan te seeye ne aldew.”

³⁶ Ne migpangguhuran pad man-e sikandan ni Hisus te me panunggilingan, “Ware etew ne eggisi te iyam ne kumbale eyew igtupak din te tapey ne kumbale. Su ke eggimuwen din sika, egkareetan e ka iyam ne kumbale, wey kene man-e eggayul ka iyam ne igtupak diye te tapey ne kumbale ne egtupakan. ³⁷ Ne ware degma etew ne egtahu te iyam ne binu diye te tapey ne tahuanan ne laplap te mananap, su ke eggimuwen din sika, egbetu ka tahuanan wey egkeitis e ka binu ne egkareetan e degma ka tahuanan. ³⁸ Ka iyam ne binu keilangan ne diye igtahu te iyam ne tahuanan ne laplap. ³⁹ Ware etew ne egkeibeg pad

eg-inum te iyam ne binu ke nalayam e sikandin te tapey ne binu, su suman-suman din ne meupiya pad iya ka tapey ne binu.”

6

Ka inse meyitenged te Aldew te Peggimeley
(Mat. 12:1-8; Mar. 2:23-28)

¹ Te sabeka ne Aldew te Peggimeley, nangipanew ensi Hisus ne diye migbaye te impamulaan te trigu. Ne nangetu te me trigu ka me hibateen din ne ingkusu ran wey ingkeen dan e. ² Piru due me Parisiyu ne migkahi, “Hey, mania te miggimu kew te supak te Balaud te Aldew te Peggimeley?”

³ Ne migkahiyan ni Hisus sikandan, “Ware kew bes nakasabut te imbasu niyu meyitenged te innimu ni Dabid te miggutasan sikan-dan te me duma rin? ⁴ Migseled sikandin diye te baley te Manama wey mig-anney te paan ne inhalad e diye te Manama. Ne sumale te kanta ne Balaud, ka me talagpanubad de ka intuhutan ne egpakakeen dutu, piru migkeen si Dabid wey impamehayan din pad ka me duma rin.” ⁵ Ne migkahiyan pad man-e ni Hisus sikandan, “Ka Anak te Etew iyan ahalen te Aldew te Peggimeley.”

Ka etew ne nakengkeng se belad
(Mat. 12:9-14; Mar. 3:1-6)

⁶ Te lein e man-e ne Aldew te Peggimeley, migseled si Hisus diye te simbaan te me Hudiyu ka egpanulu. Ne due etew diye ne nakengkeng se kawanan ne belad. ⁷ Due degma me talagpanulu te Balaud te Manama wey me Parisiyu ne eg-iipat ki Hisus ke egbawian din te Aldew te Peggimeley seeye se etew su eyew igkasumbung dan sikandin. ⁸ Piru naneng-nengan ni Hisus ka suman-suman dan, wey migkahiyan din e ka etew ne nakengkeng se belad, “Sasindeg ka wey hendini ka te tangkaan.” Ne migsasindeg ka etew wey miggendiye te tangkaan te langun. ⁹ Ne migkahiyan ni Hisus sikandan, “Due inse ku kaniyu: Nekey bes ka intuhut te kanta ne Balaud ne eleg ne eggimuwen ta te Aldew te Peggimeley? Ka pegbulig naa wey ke peggereet? Ka pegluwas naa wey ke peggimatey?” ¹⁰ Ne migpanil-ap-sil-ap din ka langun wey ingkahiyan din ka etew, “Ketenga nu ka belad nu.” Ne ingketeng te etew ka belad din wey neulian e.

¹¹ Piru nalangetan amana sikandan ne migpalalahey ke nekey se eggimuwen dan diye te ki Hisus.

Ka peg-alam ni Hisus te 12 ne apustulis
(Mat. 10:1-4; Mar. 3:13-19)
¹² Te seeye ne timpu, migtakereg si Hisus diye

te bubungan eyew te pegampu, wey napawaan sikandin ka mig-ampu te Manama. ¹³ Te maselem e, in-umew rin ka me hibateen din wey mig-alam sikandin te sapulu wey daruwa (12) kandan ne ingngaranan din te apustulis. ¹⁴ Seini ka impangalam din: si Simun ne mig-immuan din ki Pidru wey si Andris ne suled din, si Santiyagu wey si Huwan, si Pilipi wey si Bartulumi, ¹⁵ si Matiyu wey si Tumas, si Santiyagu ne anak ni Alpiyu wey si Simun ne ribildi, ¹⁶ si Hudas ne anak ni Santiyagu, wey si Hudas Iskaryuti ne talag-eakal.

Ka pegpanulu wey pegpamawi ni Hisus
(Mat. 4:23-25)

¹⁷ Ne nanupang e ensi Hisus te me hibateen din diye te napu. Dutu due masulug ne me hibateen din wey susuluhi ne etew ne diye egpuun te intiru ne Hudiya wey Hirusalim, wey te me inged ne sakup te siyudad te Tiru wey te Sidun ne maddani te dahat. ¹⁸ Miggendiye sikandan te ki Hisus eyew egpammineg kandin wey eyew egpabawi te me dalu ran. Impamawian din degma ka nanerepan te me busew. ¹⁹ Amana iya egkeupian ka langun ne etew ne egpakashamsam kandin, su due geem ne egpuun diye te kandin ne egpakabawi kandan langun.

Ka due keupianan wey ka egkeyid-uwan
(Mat. 5:1-12)

²⁰ Ne migtengteng si Hisus te me hibateen din ne migkahi:

²¹ “Keupianan niyu te egkengaayu ayu,

su egkasakup kew te Peghari te Manama.

²¹ “Keupianan niyu te eggutasan kuntee, su eggibulungen kew keureme.

²² “Keupianan niyu te egsine-hew kuntee, su egngingisi kew keureme.

²² “Keupianan niyu te egdumutan, egsamsamilian, egpeylawan, wey egdereetan te me etew se ngaran tenged te Anak te Etew. ²³ Ne iling ded due ka innimu te me kabuybuyahan dan diye te me prupita. Purisu gale-gale kew wey letu kew te kahale ke eggimuwen dan sika due te kaniyu, su dakel ka dasag ne intahahe kaniyu diye te langit.

²⁴ “Piru mekeyid-u-hid-u kew kangkuwa se me meyaman, su naheraman niyud ka meupiya ne peg-ugpe!

²⁵ “Ne mekeyid-u-hid-u kew kangkuwa se nenabulung,

su eggutasan kew red keureme.

“Ne mekeyid-u-hid-u kew kangkuwa se egngingisi,

su eglungku wey egsine-hew kew red keureme.
 26 "Mekeyid-u-hid-u kew kangkuwa ke egdeyrayer kew te langun ne etew, su sika ka innimu te me kabuybuyahan dan diye te kene ne malehet ne me prupita."

Ka peggeyinawa te kuntere
(Mat. 5:38-48; 7:12a)

27 "Piru kuntee, egnangan ku sikaniyu se migpam-mineg keddiey te geyinawei niyu ka me kuntere niyu wey himuwa niyu ka me upiye diye te seeye se egdumut kaniyu. 28 Panalangini niyu ka me etew ne egdilus kaniyu wey panubtubari niyu ka me etew ne egdeeg-deeg kaniyu. 29 Ke due egtagpi te beneng niyu, ipatagpi niyu degma ka limang; ke due eg-ahew te dyakit niyu, ibehey niyu sika minsan ka kumbale niyu. 30 Behayi niyu ka langun ne egbuyu, ne ke due eg-anget te kasangkapan niyu kene niyud gawia. 31 Ke nekey ka igkeupii niyu ne eggimuwen te me etew diye te kaniyu, sika degma himuwa niyu diye te kandan.

32 "Kene kew pallateng ne due egkarawat niyu ne dasag ne egpuun te Manama ke iyan niyu re eggeyinawaan ka eggeyinawa degma kaniyu. Su minsan ka me makasesale, eggeyinawa ma te seeye se eggeyinawa kandan. 33 Ne emun ke

iyan niyu re eg-ay-ayaran ka meupiya degma kaniyu, nekey naa ka egkarawat niyu ne dasag ne egpuun te Manama? Su minsan ka me makasesale, eg-ay-ayaran dan ma ka me duma ran. 34 Ne emun ke iyan niyu re egpasambayen seeye se nata-haan niyu ne egpakabayad, nekey naa ka egkarawat niyu ne dasag ne egpuun te Manama? Minsan ka me makasesale egpasambayad ma te iling dan ne makasesale su mig-iman-iman sikan-dan ne egpakabayad iya sikandan te egsambayan dan. 35 Geyinawei niyu iya ka me kuntere niyu wey himuwa niyu ka meupiya diye te kandan. Pasambaya niyu sikandan te ware peg-iman-iman ne egkaliwanan ded seeye. Ke iling due ka eggimuwen niyu, dakel ka dasag ne egkarawat niyu wey egkeyimu kew ne me anak te Amana ne Mabantug ne Manama. Su meupiya sikandin te seeye se kene egpasalamat wey te seeye se mareet. 36 Keilangan ne hiid-uwen kew, iling te Amey niyu ne hiid-uwen.

Ka pegpanulu meyitenged te peggukum te duma
(Mat. 7:1-5)

37 "Kene kew hukum te duma ne kene kew degma eggukuman te Manama. Kene kew kahi diye te duma ne keilangan ne egdusaan sikandan, ne kene kew degma egdusaan te Manama.

Pasayluwa niyu sikandan ne egpasayluwen kew degma te Manama.³⁸ Behey kew te duma ne egbehayan kew degma te Manama. Egkarawat niyu ka eleg ne seked, egdaseken, egkigkihuen, wey egpasublaan pad. Ka seked ne eggamiten niyu diye te duma, sikan ded degma ka seked ne eggamiten te Manama diye te kaniyu."

³⁹ Ne migpangguhuran sikandan ni Hisus te seini ne panunggilingan, "Kene egpakakitkit ka sabeka ne butud te lein ne butud su egkengeulug iya sikandan diye te lungag." ⁴⁰ Ware hibateen ne labew te kandin ne talagpanulu piru ke napanulu e sikandin wey nabasbas e amana, egpekeiling sikandin te kandin ne talagpanulu.

⁴¹ "Mania te egtengteng ka te buleg te duma piru ware nu sahipaa ka buleg nu ne hendue karakel te terusu?⁴² Egmenuwen nu te egkahi diye te duma nu, 'Eg-aween ku ka buleg nu,' ke ware nu degma nakita ka buleg nu ne hendue karakel te terusu. Egpapitew-pitew re! Hun-eyi nu pa te eg-awe ka buleg nu ne hendue karakel te terusu, eyew egpakameleg-meleg ka ne eg-awe te buleg te duma nu.

Ka kayu egkeila ka behas din
(Mat. 7:16-20; 12:33-35)

⁴³ "Ka meupiya ne kayu kene egbebehas te mareet, ne ka mareet ne kayu kene egbebehas te meupiya.⁴⁴ Ka tagse kayu egkeila pinaahi te behas din. Su ka buleynen, kene egbebehas te beyabas, ne ka sapinit, kene egbebehas te kapayas.⁴⁵ Ka meupiya ne etew, eglalag te meupiya ligkat te meupiya ne pusung din. Ne ka mareet ne etew, eglalag te mareet ligkat te mareet ne pusung din. Su ke nekey ka diye te pusung te etew, iyan sika ka iglalag din."

Ka daruwa ne etew ne migbebaley
(Mat. 7:24-27)

⁴⁶ "Mania te eg-umew kew keddi te 'Magbebaye, Magbebaye,' ne kene kew eggimu sumale te insuhu ku kaniyu?" ⁴⁷ Igpakita ku kaniyu ka egkeilingan te minsan hentew ne egparani keddi wey egpammineg te keddi ne lalag wey egtuman kayi.⁴⁸ Egpekeiling sikandin te etew ne migbebaley ne migkekali te maralem wey batu se pabunsuran. Te migdakel e ka weyig, imbaggiawan ka baley rin piru ware seeye namenu tenged su maresen ka pegkeyimu.⁴⁹ Piru ka etew ne migpammineg te keddi ne lalag ne ware migtuman kayi, egpekeiling te etew ne migbebaley ne ware meupiya ne pabunsuran. Te migdakel e ka weyig, imbaggiawan

ka baley rin wey due-rue ne napeled wey natamtamanan nahuhus."

7

Ka pegbawi ni Hisus te suluhanen te kepitan

(Mat. 8:5-13)

¹ Te nakapenga si Hisus ne miglalag diye te me etew, miggendiyad sikandin te Kapirnaum. ² Dutu, due kepitan te me sundalu te Ruma ne migdaluan te uripen din ne inggeyinawaan din, wey egkabigtawan e. ³ Te pegkarineg te kepitan meyitenged ki Hisus, migsuhu sikandin te me igbuyag te me Hudiyu eyew eghangyu ki Hisus ne eggendiye te baley rin eyew egbawian ka uripen din. ⁴ Ne miggendiye sikandan te ki Hisus wey migpeyid-u-hid-u amana kandin ne migkahi, "Bulihi nu ubag seini ne etew ne likes ne egpangabangan. ⁵ Miggeyinawaan ki nikandin se me Hudiyu wey migpasasindeg pad man-e sikandin te simbaan ta."

⁶ Sikan naa, migdume e si Hisus kandan. Te marani e sikandan te baley te kepitan, migsuhu ka kepitan te me alukuy rin te pegsinug-ung ki Hisus eyew te pegkahi kandin, "Magbebaye, kene kad e biyat-biyat su kena a ne likes ne egpemaneyik keykew te baley ku. ⁷ Silka ka egpuunan ne wara ad iya migbul-ug migdani keykew. Piru ilalag nu re ne egkeulian iya ka suluhanen ku. ⁸ Nakanengneng a kayi, uya

su minsan degma sikeddi, due labew keddiey ne me upisyal wey due degma me sakup ku ne me sundalu. Ke egnangenan ku ka sabeka, 'Hendiye ka,' eggendiye iya sikandin. Ne emun ke egnangenan ku ka dangeb, 'Hendini ka,' eggendini iya sikandin. Ne emun ke egnangenan ku ka uripen ku, 'Himuwa nu seini,' eggimuwen din iya seeye."

⁹ Te pegkarineg ni Hisus dutu, neinu-inu sikandin wey migbalikid sikandin wey migkahi diye te keet-etawan ne migginundul kandin, "Ware e pad nakakita te iling kayi karakel ne pegpalintuu te etew, minsan kayi te Israil!"

¹⁰ Te nakalibed e diye te baley ka insuhu te kepitan, nakita ran ne neulian e ka uripen din.

Ka peg-uyag ni Hisus te anak te balu

¹¹ Te ware naluhay, miggendiye si Hisus te siyudad te Nain; migduma kandin ka me hibateen din wey ka susuluhi ne me etew. ¹² Te egpalinggumaan e sikandan te gumawan te siyudad, iyan degma peglihawang te me etew ne amana ne susuluhi ka eglebeng te minatey. Sabsabeka ne anak te balu ka migpatey. ¹³ Te pegkakita ni Hisus te balu, neyimenawan sikandin dutu wey migkahiyan din ka balu, "Kene ka sinehew." ¹⁴ Ne migdugpu si Hisus ne migsamsam te lungun

wey migsanggel ka me etew ne migyeyayung kayi. Ne migkahi si Hisus, “Tatu, enew ka!”¹⁵ Ne mig-enew e ka minatey wey miglalag e. Ne imbehey e ni Hisus seeye diye te iney rin.¹⁶ Ne dutu, mig-umaan te liyas ka langun ne etew, wey insaye dan ka Manama. Migkahi sikandan, “Miggendiniyan ki te maresen ne prupita! Migtantanuran ded te Manama ka keet-etawan din!”

¹⁷ Nekeempet te intiru ne Hudiya wey diye te me duma pad ne inged ka guhuren wey panugtulen meytenged ki Hisus.

Ka me etew ne insuhu ni Huwan

(Mat. 11:2-19)

¹⁸ Ne impanugtulan si Huwan te me hibateen din meytenged te langun ne neyitabu. Puun due, migumew si Huwan te daruwa te me hibateen din¹⁹ wey impeendiye din sikandan te Magbebaye eyew egpeinseen ke sikandin naan e iya ka egtetaharan dan wey ke egtetahad naan pad sikandan telein.

²⁰ Te nekeume e sikandan diye te ki Hisus, migkahiyan dan e sikandin, “Impeendini key ni Huwan ne Talagbewutismu eyew te peg-inse keykew ke sikeykew naan e iya ka egtetaharan ney wey ke egtetahad key naan pad telein?”

²¹ Te seeye ne timpu, due masulug ne me etew ne impamawian ni Hisus te

nalein-lein ne me dalu ran wey te masumpit ne egmanggeramen dan. Impangalew rin man-e ka me busew puun te migmanerepan wey masulug degma ka me butud ne impamawian din.²² Ne intabak din ka me sinuhuan ni Huwan, “Libed kew diye te ki Huwan wey guhuri niyu sikandin ke nekey ka nakita niyu wey narineg niyu. Guhuri niyu sikandin te ka me butud egmakakite e, ka me pungku egmekeyipanew e, ka me ibungen neneulian e, ka me bengel egmakarinig e, wey ka me minatey neneuyag e, wey ka egkengaayu-ayu, napangguhuran e te Meupiya ne Panugtulen.²³ Keupianan te seeye se ware migduwaruwa meytenged keddiey.”

²⁴ Te nekeyipanew e seeye se sinuhuan ni Huwan, miglalag si Hisus diye te masulug ne me etew meytenged ki Huwan, “Te peggendiye niyu ki Huwan diye te inged ne ware mahinged, nekey-a ka in-iman-iman niyu ne egtengtengan? Etew naa ne egpekeiling te tibehew ne hendeire iya tapid egbanlaya te kalamag?²⁵ Ke kene, nekey-a ka miggendiyaan niyu ne egtengtengan? Etew naa ne migsaluub te mahal ne kumbale? Sikandan se migsaluub te meupiya ne kumbale wey meupiya se peg-ugpe, mig-ugpe diye te me mateles ne ugpaan.²⁶ Na,

nekey naa iya ka in-iman-iman niyu ne egtengtengan te peggendiye niyu? Prupita naa? Uya, piru egnanganan ku sikaniyu te subla pad si Huwan te prupita,²⁷ su sikandin ka nasulat te Kasulatan ne miggenendue, ‘Igpewun-a ku keykew ka suluhuanen ku ne iyan eg-andam te dalan ne egbayaan nu.’²⁸ Ne migkahi pad man-e si Hisus, “Egnanganan ku sikaniyu te ware de due neetew kayi te ampew te tane ne subla pad ki Huwan, piru minsan hentew ne kene ne impurtanti diye te Migharian te Manama, subla pad iya ki Huwan.”

²⁹ Pegkarineg dutu te me etew, mig-uyun sikandan langun minsan ka me talagsukut te buhis ne eleg ka Manama, su migpabewutismu ma sikandan ki Huwan.³⁰ Piru ware mig-uyun ka me Parisiyu wey ka me talagpanulu te Balaud te Manama te igkeupii te Manama kandan, wey ware sikandan migpabewutismu ki Huwan.

³¹ Ne migpabulus si Hisus ka migkahi, “Nekey buwa ka egpeilingan ku te me etew te kuntee ne timpu, wey ke nekey ka egkeilingan dan?³² Egpekeiling sikandan te me bate ne naminnuu diye te palingkiyan ne egpangumew te duma ran ne egkahi, ‘Migpamulendahan ney e

sikaniyu piru ware kew migsesayew, mig-ulahingan ney e sikaniyu te peglungku piru ware kew migmanine-hew!’³³ Te peggendini ni Huwan ne Talagbewutismu, migpuasa sikandin wey ware mig-inum te binu, ne migkahi kew, ‘Migserepan sikandin te busew!’³⁴ Ne miggingga degma ka Anak te Etew ne migkeen wey mig-inum te binu, ne migkahi kew degma, ‘Pitawa niyu seini ne etew, bel-is wey taleinum, wey alukuy te me talagsukut te buhis wey te me makasesale.’³⁵ Piru ka kamalehetan meytenged te kaalam te Manama, egkakita diye te mig-ikul kandin.”*

Ka makasesale ne malitan ne impasaylu ni Hisus

³⁶ Due sabeka ne Parisiyu ne migginggaat ki Hisus ne eglagpu egkeen kandin. Sikan naa ka miggendiye si Hisus te baley rin eyew egkeen.³⁷ Te seeye ne siyudad, due sabeka ne malitan ne makasesale iya. Te pegkarineg din ne migkeen si Hisus diye te baley te Parisiyu, miggendiye sikandin ne mig-uyan te mahal ne peemut ne diye itahu te alabastru.³⁸ Ne migsasindeg sikandin diye te peka ni Hisus dapit te paa.[†] Migsinehew sikandin wey nasubid te luwe din ka paa ni Hisus wey impunasan

^{7:27} Mal 3:1. ^{7:29} Mat 21:32; Luk 3:12. * ^{7:35} Te Grigu: Piru impamalehetan ne eleg ka kaalam pinaahi te langun ne anak din. ^{7:37} Mat 26:7; Mar 14:3; Huw 12:3. † ^{7:38} Su migsuladlad si Hisus diye te bangku.

din seeye te bulbul rin wey inggarekan din. Ne in-itisan din e te peemut ka paa ni Hisus.³⁹ Te pegkakita dutu te Parisiyu ne miggenggat ki Hisus, migkahi sikandin diye te geyinawa rin, “Ke malehet ne prupita seini ne etew, egkanengnengan din perem ke nekey ne malitan seini se migsamsam kandin, su makasesale seini ne malitan.”

⁴⁰ Piru migkahiyan sikandin ni Hisus, “Simun, due iglalag ku keykew.”

Ne migtabak si Simun, “Nekey-a ka iglalag nu keddi, Talagpanulu?”

⁴¹ Ne migkahi si Hisus, “Due daruwa ne etew ne nekeutang diye te talagpasambey te seleppi. Ka sabeka nekeutang te lalimma ne gatus (500) ne dinaryu‡, wey ka sabeka lalimma ne pulu (50).⁴² Ne puun su neelin ne kene sikandan egpakabayad, sikan naa ka imbalahad e ka me utang dan te migpasambey kandan. Ne kuntee, hentew naa te daruwa ka dakel se geyinawa diye te talagpasambey te seleppi?”

⁴³ Ne migtabak si Simun, “Te keddi ne suman-suman, seeye se dakel se utang ne warad e pabayara.”

Ne migkahi si Hisus, “Eleg iya ka tabak nu.”⁴⁴ Ne miglilingey si Hisus diye te malitan wey migkahi ki Simun, “Nakita nu seini se malitan? Te pegseled ku kayi

te baley nu, wara a nikeykew behayi te weyig eyew iglu-lu ku te paa ku. Piru inllu-an din mule ka paa ku te luwe din wey impunasan din te bulbul din.⁴⁵ Wara a hareki nikeykew te peg-alumama nu keddiey, piru ganna re mule sikandin ka miggarek te paa ku bunsud pad te pegginguma ku kayi.⁴⁶ Ware nu baluhuwi te lana ka ulu ku, piru imbaluhuwan din mule te peemut ka paa ku.⁴⁷ Purisu egnanganan ku sikeykew, impasaylu e kuntee ka dakel ne sale din su amana ne dakel ka geyinawa rin keddi. Piru ka etew ne impasaylu e ka deisek ne sale din, deisek de ka geyinawa rin keddi.”

⁴⁸ Ne migkahiyan ni Hisus ka malitan, “Impasaylu e ka me sale nu.”

⁴⁹ Ne seeye se me etew ne miglagpu kandin te migkeen, migkahi diye te geyinawa ran, “Hentew buwa seini ne etew ne egpasaylu te me sale?”

⁵⁰ Ne migkahiyan ni Hisus ka malitan, “Ka pegpal-intutuu nu ka nakaluwas keykew. Uli ka ne meupiye e se geyinawa.”

8

Ka me malitan ne migduma ki Hisus

¹ Te ware naluhay, miggendiye si Hisus te me siyudad wey diye te me bariyu ne migwali te Meupiya ne Panugtulen

‡ 7:41 Ka sabeka ne dinaryu, eleg ne igbayad te senge kaaldew ne pegbasuk te etew.

meyitenged te Peghari te Manama. Migduma kandin ka sapulu wey daruwa (12) ne me hibateen,² wey ka me malitan degma ne impamawian din ka egmanderalu wey migserapan te me busew. Duma kandan si Mariya ne migserapan dengan te pitu ne busew,³ si Huwana ne asawa ni Kusa ne upisyal ni Hari Hirudis, si Susana, wey masulug pad ka duma ran ne me malitan. Sikandan ka me malitan ne migbulig ki Hisus wey te me hibateen din pinaahi te me kasangkapan dan.

*Ka panunggilingan
meyitenged te pegpamula*

(Mat. 13:1-9; Mar. 4:1-9)

⁴ Due masulug ne me etew puun te nalein-lein ne me lungsud ne miggendiye te ki Hisus. Te nalibulung e sikan-dan, impangguhuran sikan-dan ni Hisus te seini ne pa-nunggilingan,

⁵ “Due sabeka ne etew ne miggendiye te kamet eyew egpamula te beni din. Te pegpanawed din e te beni, due nakasawed diye te dalan. Nataman, nari-diekan e se-ye te me etew wey impanuk-tuk e te me manuk-manuk. ⁶ Ne ka duma ne beni diye nakasawed te batuwen. Te pegtubu e, nahangu e seeye su mammara ka tane ne na-pamulaan. ⁷ Ka duma ne beni diye nakasawed te duhiyen. Ne nanubu ka me duhi duma te beni wey naselung e ka

pinamula. ⁸ Ka duma ne beni, diye nakasawed te meupiya ne tane. Intubu seeye wey migbebehas te mahatus (100) ne lupi.”

Ne migkahi pad man-e si Hisus, “Purisu, ke egkeupian kew ne egpakashabut, sumsumana niyu ay-ayari ke nekey ka narineg niyu!**”

Ka kaluwasan te me pa-nunggilingan

(Mat. 13:10-17; Mar. 4:10-12)

⁹ Ne mig-inse ka me hi-bateen ni Hisus ke nekey ka igpasabut te seini ne panunggilingan. ¹⁰ Ne

migtabak si Hisus, “Impatahe e diye te kaniyu ka inggeles meyitenged te Peghari te Manama; piru diye te duma, impabaye seini pinaahi te me panunggilingan, eyew ke egtengteng sikandan, kene egpakakita, wey ke egpammineg sikandan, kene egpakashabut.”

Ka kaluwasan te panung-gilingan meyitenged te pegpa-mula

(Mat. 13:18-23; Mar. 4:13-20)

¹¹ Ne seini ka kaluwasan te panunggilingan: ka beni iyan sika ka lalag te Manama.

¹² Ka beni ne nakasawed diye te dalan, iyan seeye se me etew ne nakarineg te lalag te Manama. Piru miggingga ka ahalen te me busew wey in-ahew rin e ka lalag te Manama diye

8:2 Mat 27:55-56; Mar 15:40-41; Luk 23:49. * **8:8** Te Grigu: Pammineg ka ke due talinga nu. **8:10** Isa 6:9 (LXX).

te me pusung dan eyew kene sikandan egpalintutuu wey kene egkaluwas.¹³ Ka beni ne nakasawed diye te batuwen, iyan seeye se me etew ne nakarineg te lalag te Manama wey migdawat kayi ne nahale. Piru ware seini nakareralid diye te pusung dan, su migpalintutuu sikandan te dagdahew re, wey nataman, mig-engked e sikandan te timpu ne migginggaumaan te me peggintal.¹⁴ Ka beni ne nakasawed diye te duhiyen, iyan seeye se me etew ne nakarineg te lalag te Manama, piru ka pegkalaggew ran, ka me karatuan wey me kahalaan kayi te ampew te tane, iyan nekeumes kandan. Sikan naa, ware neyinuhi ka me behas dan.¹⁵ Ka beni ne insawed diye te meupiya ne tane, iyan seeye se me etew ne nakarineg te lalag te Manama wey migdawat wey migtuman kayi. Intetahu dan seeye diye te malehet wey meupiya ne pusung dan, wey nataman, neyinuhan e ka me behas dan.

*Ka panunggilingan
meyitenged te sulu*
(Mar. 4:21-25)

¹⁶ “Ware egpareket te sulu ne egsuuban te gantangan wey ke diye naa te selib te lantawan. Ke kene, igpatawan-tawan iya igtahu eyew egpakakita te malayag ka me etew ne egseled te baley.

8:16 Mat 5:15; Luk 11:33.

8:17 Mat 10:26; Luk 12:2.

19:26.

¹⁷ “Ka langun ne inggelles, egkanengnengan; wey ka langun ne imbunbunan, egkalekisan.

¹⁸ “Sikan naa, tantanuri niyu ke nekey ka egkarineg niyu su seeye se due katuenan, egtimulan pad piru seeye se deisek de se katuenan, eg-angayen pad iya minsan ka deisek ne in-isip din e ne kandin perem.”

Ka iney wey ka me suled ni Hisus
(Mat. 12:46-50; Mar. 3:31-35)

¹⁹ Nataman, miggendiye te ki Hisus ka iney rin wey ka me suled din. Piru ware sikandan nakaparani diye te kandin tenged su masulug ka me etew.²⁰ Ne due mignangen ki Hisus, “Diye te liyawangan ka iney nu wey ka me suled nu wey egkeupian sikandan ne egpakigkita keykew.”

²¹ Ne migkahiyan ni Hisus sikandan, “Iyan iney wey me suled ku seeye se egpammineg te lalag te Manama wey egtuman kayi.”

Ka peggapad ni Hisus te kalamag wey bunlud
(Mat. 8:23-27; Mar. 4:35-41)

²² Sabeka ne aldew miguntud si Hisus te balangey duma ka me hibateen din, ne migkahiyan din sikandan, “Eglapas ki diye te deyipag te lanew.” Seeye naa, miggipanew e sikandan.²³ Te ware pad sikandan

8:18 Mat 25:29; Luk

nakatuhun diye te deyipag, nakalipereng si Hisus. Ware naluhay, due miggunguma ne dakel ne kalamag ne nasuluhan te weyig ka balangey ran wey hapit e egkapenu wey nakatahu sikandin te karereetan te seeye ne timpu. ²⁴ Ne migparani diye te ki Hisus ka me hibateen din wey impukew ran sikandin ne migkahi, “Ahalen! Ahalen! Egkalened kid e!”

Ne dutu, mig-enew si Hisus ne insaparan din ka kalamag wey ka dakel ne me bunlud ne egpeeneng-eneng e. Seeye naa, migmalinawen e sikan dan wey warad e kalamag. ²⁵ Ne migkahiyan din ka me hibateen din, “Hendei naan e ka pegpalintutuu niyu?”

Piru neinu-inu sikan dan wey naaldek ne migpanangnangene, “Hentew buwa seini ne etew ne migpeengked din ka kalamag wey ka me bunlud, ne migpalintutuu ka kalamag wey bunlud te lalag din?”

Ka pegbawi ni Hisus te etew ne inserepan te busew
(Mat. 8:28-34; Mar. 5:1-20)

²⁶ Migpabulus sikandan diye te inged ne Girasa ne egkatalipag te Galiliya. ²⁷ Te nakatuhun e sikandan diye te deyipag, miglegsad e si Hisus te balangey. Ne due etew ne migserepan te busew ne migsinug-ung kandin ne diye migpuun te siyudad. Seini ne etew,

naluhey e ne migpalawas wey warad mig-ugpe diye te baley su diyad te me sulung ne sabalanan. ²⁸ Te pegkakita rin ki Hisus, migpanguleyi sikandin ne mig-usengul diye te tangkaan din wey migbalbalukan ne migkahi, “Hisus, Anak te Amana ne Mabantug ne Manama, kena a nikeykew banggawa[†]! Egpeyid-u-hid-u a keykew ne kena a legpari!” ²⁹ Inlag din sika su insuhu ma ni Hisus ne egpalihawangen ka busew dutu te kandin. Kamasulug e sikandin umeyi te busew, wey minsan egban tayan sikandin ne imbaku te keddina ka belad wey ka paa rin, egpamugtusen din de seeye. Nataman, in-uyan e sikandin te busew diye te mammara ne inged ne kene egkeugpaan.

³⁰ Ne mig-inse si Hisus kandin, “Hentew-a ka ngaran nu?”

Ne migtabak sikandin, “Ka ngaran ku si Matangen,” su masulug ka me busew ne migserep diye te kandin. ³¹ Ne migpeyid-u-hid-u ka me busew diye te ki Hisus ne kene sikandan egpatin ugpuen diye te bitu ne ware egtamanan.

³² Ne diye te bayew mad mariyu, due masulug ne me babuy ne migpanuwal diye te masandig. Ne migpeyid u-hid-u diye te ki Hisus ka me busew ne egpaserepen diye te me babuy. Nataman, in-uyunan e sikandin

[†] 8:28 Te Grigu: nekey ka tuyu nu keddi?

ni Hisus. ³³ Seeye se me busew migligwang diye te etew wey nanerep e diye te me babuy. Ne namallahuy e ka me babuy patupang diye te dalama peendiye te lanew wey nallened e.

³⁴ Nakakita te neyitabu seeye se me etew ne tlagtameng te babuy, ne namallahuy e sikandan diye te siyudad wey diye te me kamet ka migpangguhud. ³⁵ Nangendiye ka me etew eyew egleuy te neyitabu. Migparani sikandan ki Hisus wey nakita ran ne migpin-nuu diye te marani ni Hisus ka etew ne inserepan te me busew. Migkukumbale e sikandin wey maheteng e ka suman-suman din. Ne dutu, nenaaldek e sikandan. ³⁶ Sikandan se nakakita te neyitabu, migpanugtul ke immenu te pegbawi ka etew ne egbusawen. ³⁷ Nataman, ka langun ne etew ne nangguppe diye te me inged ne sakup te Girasa, mighangyu sikandan diye te ki Hisus ne eg-awe din dutu te inged dan su nenaaldek amana sikandan. Nataman, miguntud si Hisus te balangey ne miglibed e. ³⁸ Migpeyid-u-hid-u diye te ki Hisus ka etew ne migligwangan te busew ne egduma kandin.

Piru migkahiyan din ka etew, ³⁹ "Uli kad e diye te kaniyu wey ipangguhud nu ka innimu te Manama due te keykew."

Neiggipanew e ka etew wey inlingut din seeye ne

siyudad ne migpangguhud te me etew meyitenged te innimu ni Hisus diye te kandin.

Ka anak te pangulu wey ka eglangeseen.

(Mat. 9:18-26; Mar. 5:21-43)

⁴⁰ Nataman, nakalibed e si Hisus diye te deyipag te lanew, wey nahale ka me etew ne mig-elit-elit kandin su migtetahad sikandan langun kandin. ⁴¹ Ne dutu, due miggingga ne etew ne egngararan ki Hayru. Sabeka sikandin ne pangulu te simbaan te me Hudiyu. Migpanimbuel sikandin diye te tangkaan ni Hisus ne migpeyid-u-hid-u kandin ne eggendiye te baley rin ⁴² su egkabigtawan e ka sabsabeka ne beyi-beyi ne anak din. Me sapulu wey daruwe (12) e ne leg-un ka beyi-beyi.

Te miggipanew e si Hisus, due masulug ne me etew ne egmekegsegseg e diye te kandin. ⁴³ Ne due malitan ne eglangeseen seled e te sapulu wey daruwa (12) ne leg-un. Naamin de due ka langun ne diye te kandin te pegpabawi te dalu rin piru ware sikandin neulii.

⁴⁴ Nataman, migpatalisek sikandin te masulug ne me etew ka migparani diye te peka ni Hisus wey insamsam din ka sidsid te kumbale ni Hisus. Due-rue migtingpek e ka langesa. ⁴⁵ Ne miginse si Hisus, "Hentew-a ka migsamsam keddi?"

Piru migware-ware ka langun ne etew. Ne dutu migkahi si Pidru, "Ahalen, amana ne masulug ka me etew ne nakaalingkus ne egmasegsehey e due te keykew."

⁴⁶ Piru migkahi si Hisus, "Due migsamsam keddiey su naheram ku ne due miglihawang ne geem ligkat kayi te keddiey." ⁴⁷ Te nakita te malitan ne nanengnengan sikandin, migparani sikandin ne migkelkel diye te ki Hisus wey migusengul diye te tangkaan din. Ne impangguhud din diye te tangkaan te langun ne etew ke mania te migsamsam sikandin ki Hisus wey ke nekey ka paahi ne sahuhune sikandin ne neulian. ⁴⁸ Ne migkahiyan ni Hisus sikandin, "Beyi, ka pegpalintutuu nu ka nekeuli keykew. Uli ka ne meupiye e se geyinawa."

⁴⁹ Te sasangan pad ne eglalag si Hisus, due etew ne miggingga ne diye egpuun te baley ni Hayru ne migkahi, "Migpatey e ka anak nu. Kene nud e banggawa ka talagpanulu."

⁵⁰ Piru te pegkarineg dutu ni Hisus migkahiyan din si Hayru, "Kene ka egkalaggew. Palintutuu ke re eyew egkeulian ka anak nu."

⁵¹ Te pegginguma ni Hisus diye te baley, ware intuhutan din ne egduma kandin te egseled angin e engki Pidru, Huwan, Santiyagu wey ka iney wey amey

te bate. ⁵² Naninehew wey migmalumbibigtew ka langun ne etew tenged te bate ne migpatey. Piru migkahi si Hisus, "Kene kew egmandalawit. Ware migpatey ka beyi-beyi su nakalipereng de sikandin!"

⁵³ Piru migdali-dian de te me etew si Hisus su nakanengneng sikandan te napatey e ka bate. ⁵⁴ Ne migseled si Hisus wey miggen-genan din ka belad te bate te migkahi, "Beyi-beyi, enew ka!" ⁵⁵ Due-rue ne miglibed ka gimukud te bate wey migene newe sikandin. Ne migsuhu si Hisus ne egpakeenen ka bate. ⁵⁶ Amana ne neinu-inu ka iney wey amey te bate piru inteesan sikandan ni Hisus te kene igpangguhud te minsan hentew ka neyitabu.

9

*Ka pegsuhu ni Hisus te 12 ne hibateen din
(Mat. 10:5-15; Mar. 6:7-13)*

¹ Due timpu ne in-umew ni Hisus ka sapulu wey daruwa (12) ne hibateen din wey impamehayan din te geem wey katenged te pegpangalew te langun ne me busew wey pegpamawi te egpanderalu. ² Ne impeyipanew rin sikandan eyew te pegpangguhud meyitenged te Peghari te Manama wey egpamawi te egpanderalu. ³ Ne migkahiyan din sikan dan, "Kene kew uyan te minsan nekey te peggipanew niyu: kene kew uyan te tuked, kabil, keenen, seleppi,

wey eg-ilisan niyu ne kumbale. ⁴ Minsan nekey ne baley ne egpamaneyikan niyu, diye kew re iya ugpe tamante eg-awe kew e man-e dutu ne inged; ⁵ Ne minsan nekey ne baley ne kene egdawat kaniyu, engkeri niyu sika ne inged wey pelpela niyu ka alinepung diye te paa niyu isip palinneu ne ware sikandan ikahale te Manama.”

⁶ Nataman, nangipanew e ka me hibateen ni Hisus wey nangendiye te lein-lein ne me inged ka migpangguhud te Meupiya ne Panugtulen wey migpamawi te nanderalu.

Ka pegkalibeg ni Hirudis
(Mat. 14:1-12; Mar. 6:14-29)

⁷ Si Hari Hirudis ne iyan migmandu te Galiliya, nakarineg meyitenged te langun ne neyitabu. Ne nalibeg amana sikandin su due me etew ne migkahi ne neuyag kun si Huwan ne Talagbewutismu. ⁸ Migkahi man-e ka duma ne me etew ne miglibed kun si Ilyas. Ne migkahi pad man-e ka duma ne due sabeka ne prupita dengan ne neuyag kun kuntee. ⁹ Ne migkahi si Hirudis, “Impatempuhan kud e te ulu si Huwan. Hentew naa seini ne etew ne masulug se guhuren meyitenged kandin ne egkarineg ku?” Ne dakel ka peg-iman-iman ni Hirudis ne egpakakita ki Hisus.

Ka pegpakeen ni Hisus te 5,000 ne etew
(Mat. 14:13-21; Mar. 6:30-44; Huw. 6:1-14)

¹⁰ Nataman, nanlibed e ka me hibateen ni Hisus wey impangguhuran dan sikandin te langun ne neyimu ran. Ne induma rin e sikandan wey miggendiye te sabeka ne lungsud ne egngaranan te Bitsayda. ¹¹ Te pegkannengneng dutu te masulug ne me etew, migsinundul e sikandan engki Hisus. Ne insagsahipe ni Hisus ka me etew wey impanugtulan din meyitenged te Peghari te Manama wey impamawian din ka egmanderalu.

¹² Ne hengkayi te eglineb e ka aldew, migparani ki Hisus ka sapulu wey daruwa (12) ne hibateen din ne migkahi, “Peendiyya nu ka me etew te marani ne me bariyu wey me kamet eyew egpakapam-mitew sikandan te egkakeen wey egkeyirehaan dan su kayi ki pe ma te inged ne ware mahinged.”

¹³ Piru migkahiyan din sikandan, “Sikaniyu ka egbehey kandan te egkakeen.”

Ne migtabak sikandan, “Lalimma re ne paan wey daruwa ne ngalap te weyig ka kayi te kanta. Nekegmenu naan de iya sika, angin e ke eggipanew key pad wey egbebeli te igpakeen kandan langun.” ¹⁴ (Me lalimma ne libu (5,000) ka kasuluhan te me lukes dutu.)

Ne migkahiyan ni Hisus ka me hibateen din, "Papinnuuwa niyu ka me etew wey palibulunga niyu te tiglalimma ne pulu (50) tagse punduk." ¹⁵ Intuman seeye te me hibateen ne impapinnuu ran e ka langun. ¹⁶ Ne ingkuwa ni Hisus ka lalimma ne malisen ne paan wey ka daruwa ne malisen ne ngalap te weyig, ne migleng-ag sikandin diye te langit ne migpasalamat te Manama. Nataman, impanepik-tepik din e ka paan wey impamehey rin e diye te me hibateen din eyew igpepamehey diye te me etew. ¹⁷ Ne nangeen sikan-dan langun wey nenabulung-bulung, wey nakalimud pad sikan-dan te sapulu wey daruwa (12) ne liyang ne napenu te same dan.

Ka pegpataha ni Pidru meyitenged ki Hisus
(Mat. 16:13-19; Mar. 8:27-29)

¹⁸ Due timpu ne mig-ampu si Hisus ne migsabsabeka, ne ka me hibateen din diye ded te marani. Ne mig-insaan din sikan-dan, "Hentew e kun naa sumale te me etew?"

¹⁹ Ne migtabak sikan-dan, "Migkahi ka duma ne sikeykew kun si Huwan ne Talagbewutismu. Ka duma degma migkahi ne sikeykew kun si Ilyas, wey ka duma migkahi ne sabeka ke kun te me prupita dengan ne neuyag ded."

²⁰ Ne mig-inse si Hisus kandan, "Piru ke sikaniyu ka egpalalahen, hentew e naa iya?"

Ne migtabak si Pidru, "Sikeykew iya ka Kristu ne insaad te Manama."

Ka pegpanggihud ni Hisus te peg-antus wey kapatayan din
(Mat. 16:20-28; Mar. 8:30-9:1)

²¹ Piru migteesan sikan-dan ni Hisus wey impanpanayan ne kene igpepanugtul seini te minsan hentew. ²² Ne mig-abey sikandin ne migkahi, "Ka Anak te Etew keilangan ne amana eg-antus te masumpit ne igpeula-ula kandin wey egsamsamilian te me ighbuyag te me Hudiyu wey me pangulu te me talagpanubad wey me talagpanulu te Balaud te Manama. Eggimatayan sikandin wey egkeuyag te igkatedu ne aldew."

²³ Ne migkahiyan din ka langun ne etew, "Ke hentew seeye se egkeupian ne eg-ikul keddiey, keilangan ne engked te kandin ne igkeupii wey egtiang te kandin ne krus te tagse aldew wey eg-ikul keddiey. ²⁴ Su seeye se egkeupian ne egluwas te kandin ne umul, nasi egkawaraan kayi, piru seeye se egkawaraan te kandin ne umul tenged keddiey, egpakarawat te umul ne ware egtamanan. ²⁵ Nekey naa ka egkakuwa te etew ke

egkaangken din ka langun ne tahu kayi te ampew te tane piru egkaware ka umul din? Ware iya! ²⁶ Su emun ke igkeyilew a duma te lalag ku te minsan hentew, igkeyilew ku degma sikandin te timpu ne eggigume e ka Anak te Etew duma te katelesan din wey te Amey wey te matulus ne me panalihan. ²⁷ Egnangenan ku sikaniyu te malehet: due me etew ne kayi kuntee ne kene pad egpatey taman te kene dan pad egkakita ka Peghari te Manama.”

Nabalbalawan ka ulaula ni Hisus

(Mat. 17:1-8; Mar. 9:2-8)

²⁸ Me walu e ne aldew ka miglihad puun te peglagalag ni Hisus te seeye, induma rin si Pidru, si Huwan wey si Santiyagu wey migtakereg diye te bubungan eyew eg-ampu. ²⁹ Te mig-ampu e si Hisus, nabablawan ka ulaula rin wey miglayag te kaangkag ka kumbale din. ³⁰ Ne sauhune ne due daruwa ne etew ne migpakiglalag kandin. Sikandan ensi Muwisis wey Ilyas, ³¹ ka migpakita ne miglayag te katelesan, wey migpakiglalag sikan-dan ki Hisus meyitenged te kamatayen din diye te Hirusalim ne mahaan e egkatum-an. ³² Nakaliplichereng si Pidru wey ka me duma rin te seeye ne timpu. Te napukew e sikandan, nakita ran ka layag ni Hisus wey te daruwa ne etew ne migdangdang

kandin. ³³ Te eg-awe e seeye se daruwa ne etew diye te tangkaan ni Hisus, migkahiyan sikandin ni Pidru, “Ahalen, meupiya te kayi key* kuntee. Eggimu key te tatelu ne leeb: sabeka ka keykew, sabeka ki Muwisis, wey sabeka ki Ilyas.” (Nakahil rin sika su ware sikandin nakanengneng ke nekey ka iglagalag din.)

³⁴ Te miglagalag pad si Pidru, due gapun ne migdalung kandan ne nenaaldek ka me hibateen su nabunbunan e sikandan te gapun. ³⁵ Ne natagtaheed, due laheng ne egpuun due te gapun ne migkahi, “Iyan seini ka Anak ku ne in-alam ku. Pamineha niyu sikandin!”

³⁶ Te warad e laheng diye te gapun, si Hisus naan de ka nasame. Pegkapenga dutu, migpeeneng-eneng de ka me hibateen din wey ware sabeka kandan ne migpanugtul te minsan hentew meyitenged te nakita ran.

Ka pegbawi ni Hisus te bate ne inserepan te busew

(Mat. 17:14-18; Mar. 9:14-27)

³⁷ Te seup ne aldew, nanupang e sikandan puun te bubungan. Ne due susuluhi ne me etew ne migsinug-ung ki Hisus. ³⁸ Ne due sabeka ne etew dutu ne migbalbalukan ne migkahi, “Talagpanulu! Pitawa nu pa ubag seini se

* 9:33 key: wey ke ki. 9:35 Isa 42:1; Mat 3:17; 12:18; Mar 1:11; Luk 3:22. 9:35
2Pid 1:17-18.

lukes ne anak ku su sab-sabeka pe man de iya.³⁹ Egunaan sikandin te busew ne sahuhune ne egpanguleyi sikandin wey egkelkelen ne egkataman egbubuke e ka be-be din. Amana sikandin egbaybayari wey kenad iya egpeuwey-uwayen te masakit!⁴⁰ Inhangyu ku ka me hibateen nu te pegalew te busew piru ware dan naalew."

⁴¹ Migkahi si Hisus, "Sikaniyu se me etew te kuntee ne timpu, ware pegpalintutuu niyu wey seyyup ka suman-suman niyu! Hendei bes taman ka pegduma-ruma ku kaniyu? Hendei bes taman ka pegantus ku kaniyu? Uyana niyu ka bate kayi te keddi!"

⁴² Te pegparani te bate diye te ki Hisus, impabahed sikandin te busew diye te tane wey egbabuyen e sikandin. Piru in-alew ni Hisus ka busew ne imbawian din ka bate. Ne inlibed din e ka bate diye te amey rin.

⁴³ Ne nawangalan ka me etew te amana ne maresen ka Manama.

Ka peglalag e man-e ni Hisus te kamatayen din
(Mat. 17:22-23; Mar. 9:30-32)

Te neinu-inu pad ka me etew te langun ne innimu ni Hisus, migkahiyan din ka me hibateen din,⁴⁴ "Tantanuri niyu seini se iglalag ku kaniyu: mahaan e igbehey ka Anak te Etew diye te me etew."⁴⁵ Piru ware sikandin

nakasabut te kaluwasan kayi. Inneles seini kandan eyew kene dan egpakasabut, wey nenaaldek sikandin ne eg-inse kandin meyitenged kayi.

Hentew ka amana ne labew
(Mat. 18:1-5; Mar. 9:33-37)

⁴⁶ Te seeye ne timpu, migpaap-apuley ka me hibateen ke hentew ka labew kandan.⁴⁷ Piru nakanengneng si Hisus te me suman-suman dan. Sikan naa, migkuwa sikandin te bate wey impasasindeg din diye te andang din.⁴⁸ Ne migkahiyan din sikandan, "Ka minsan hentew ne egdawat te seini ne bate tenged su mig-ikul rin keddi, egdawat keddiey. Ne ka minsan hentew ne egdawat keddiey, egdawat degma te migpeuyan keddiey. Su ka kene ne impurtanti kaniyu langun, iyan sikandin labew."

Ka kene egpakig-ehet kaniyu iyan egpalapig kaniyu
(Mar. 9:38-40)

⁴⁹ Migkahiyan sikandin ni Huwan, "Ahalen, nakakita key te etew ne migpangalew te me busew pinaahi te ngaran nu wey insaparan ney sikandin tenged su kene ta ne duma sikandin."

⁵⁰ Piru migkahi si Hisus, "Kene niyu sapari sikandin su ka kene egpakig-ehet kaniyu egpalapig kaniyu."

Ware dawata si Hisus te matig-Samarya

⁵¹ Te marani e ka aldew ne ebatunen e si Hisus diye te langit, nasabeka ka suman-suman din ne eggendiye din te Hirusalim. ⁵² Purisu due impewun-a rin ne me etew diye te sabeka ne bariyu te Samarya eyew te peg-andam te egtuenan din. ⁵³ Piru ware sikandin dawata te me etew te seeye ne inged su diye nahud sikandin egsatangke te Hirusalim. ⁵⁴ Te pegkannengneng dutu te me hibateen din ne ensi Santiyagu wey Huwan, migkahiyan dan sikandin, "Magbebabe, egkeupian ke naa ne egbuyu key te hapuy puun te langit eyew egkasilaban sikandan?"

⁵⁵ Piru miglilingey si Hisus wey migsaparan din sikan-dan. ⁵⁶ Ne migpabulus sikan-dan ne miggipanew diye te lein ne inged.

*Ka me etew ne eg-ikul perem ki Hisus
(Mat. 8:19-22)*

⁵⁷ Te sasangan pad sikan-dan ne eggipanew, due sabeka ne etew ne migkahi diye te ki Hisus, "Eg-ikul a keykew minsan hendei ka eggendiye."

⁵⁸ Ne migtabak si Hisus kandin, "Due eggelesan te me laku wey due salag te me manuk-manuk te awawangan, piru ka Anak te Etew ware mule egkeyimme-layan."

⁵⁹ Ne migkahiyan din ka lein ne etew, "Ikul ka keddi."

Piru migkahi seeye se etew, "Ahalen, eg-uli e pad su eglebeng e pad te amey ku."

⁶⁰ Piru intabak sikandin ni Hisus, "Balahad e ka me minatey ne eglebeng te kandan ne minatey. Piru sikeykew mule, hipanew ka wey ipang-guhud nu ka meyitenged te Peghari te Manama."

⁶¹ Duen pad man-e migkahi diye te ki Hisus, "Ahalen, eg-ikul a keykew, piru tuhuti e pa ne eg-uli su egpana-tahe e pad te pamilya ku."

⁶² Piru migtabak si Hisus kandin, "Minsan hentew ne egdaru ne layun eglililingey, kene ne likes ne egkasakup te Migharian te Manama."

10

Ka pegsuhu ni Hisus te 72 ne me etew

¹ Te pegkapenga dutu, mig-alam ka Magbebabe te pitu ne pulu wey daruwa (72) pad ne me hibateen din. Impeendiye din sikan-dan ne naatag diye te me lungsud wey me inged ne eggendiyaan din. ² Ne migkahiyan din sikan-dan, "Dakel ka eggaaniyen, piru deisek de ka talaggaani. Purisu ampu kew diye te Kamuney te eggaaniyen ne egpeuyan sikandin te me talaggaani diye te eggaaniyen.

³ Hipanew kew! Igpeendiye ku sikaniyu ne egpekeiling te me nati te karniru diye

te me etew ne egpekeiling te mabbulut ne me singgalung.
⁴ Kene kew uyan te kemuyut, kabil, wey sandal; kene kew sanggel eyew eg-elit-elit te minsan hentew diye te dalan.

⁵ Minsan nekey ne baley ne eglasuran niyu, seini ihun-a niyu te egkahi, ‘Ka keupianan egkaangken niyu.’ ⁶ Ne ke due mig-ugpe dutu ne likes ne egpakaangken te keupianan, egkaangken dan iya sika; piru ke kene dan ne likes, kene iya degma sikandan egpakaangken te keupianan. ⁷ Diye kew re iya ugpe te baley ne egpamaneyikan niyu wey kene kew eggalin-halin. Keen kew wey inum kew te igsedad dan kaniyu, su seeye se egtrabahu, eleg iya ne egbayaran. ⁸ Ke eggendiye kew te lein ne lungsud wey egdawaten kew nikandan, keen kew te igsedad dan kaniyu. ⁹ Bawii niyu ka egmanderalu te sika ne lungsud wey kahii niyu sikandan, ‘Mahaan e egginggauma kayi te kaniyu ka Peghari te Manama.’ ¹⁰ Piru ke egginggauma kew diye te sabeka ne lungsud wey ke kene kew nikandan egdawaten, hendiye kew te me dalan wey kahii niyu ka me etew, ¹¹ ‘Minsan ka me alinepung te lungsud niyu ne migdekket kayi te paa ney, egpelpelen ney isip palinneu ne ware kew

ikahale te Manama. Piru tantanuri niyu ne mahaan e egginggauma ka Peghari te Manama.’ ¹² Egnanganen ku sikaniyu, te Aldew te Peggukum, maagkap pad ka iglegpad te Manama te matig-Suduma du te mahinged te sika ne lungsud.”

*Ka me etew ne ware mig-inniyug te sale dan
 (Mat. 11:20-24)*

¹³ Migkahi sikandin, “Mekeyid-u-hid-u kew ka me matig-Kurasin! Mekeyid-u-hid-u kew ka me matig-Bitsayda, su emun ke diye pa perem te Tiru wey te Sidun himuwa ka me kein-inuwan ne innimu diye te kaniyu, naluhay ran de perem inniyuhi ka me sale dan ne migsaluub te saku wey migbubukbuk te abu diye te ulu ran. ¹⁴ Te Aldew te Peggukum, maagkap pad ka iglegpad te Manama te matig-Tiru wey matig-Sidun du te iglegpad kaniyu. ¹⁵ Ne sikaniyu se matig-Kapirnaum, kahiyen niyu buwa ne egpakaparibabew kew taman diye te langit? Kene, nasi kew igdegpak diye te inged te me gimukud ne egngaranan te Hadis!”

¹⁶ Ne migkahiyan din ka me hibateen din, “Ka minsan hentew ne egpammineg kaniyu, egpammineg degma keddiey. Ne ka

10:7 1Kur 9:14; 1Tim 5:18. **10:10** Him 13:51. **10:11** Mat 10:7-14; Mar 6:8-11; Luk 9:3-5. **10:12** Hin 19:24-28; Mat 11:24; Mat 10:15. **10:13** Isa 23:1-18; Isi 26:1-28:26; Huwil 3:4-8; Amu 1:9-10; Sak 9:2-4. **10:15** Isa 14:13-15. **10:16** Mat 10:40; Mar 9:37; Luk 9:48; Huw 13:20.

minsan hentew ne eg-angge-angge kaniyu, eg-angge-angge degma keddiey wey ka eg-angge-angge keddiey, eg-angge-angge degma te migpeuyan keddiey.”

Ka peglibed te 72 ne hibateen

¹⁷ Nataman, nakalibed e ka pitu ne pulu wey daruwa (72) ne me hibateen ne nahalegale wey migkahi diye te ki Hisus, “Magbebeye, minsan ka me busew migparumaruma kanami pinaahi te peggamit ney te keykew ne ngaran!”

¹⁸ Ne migtabak si Hisus kandan, “Nakita ku si Meibulan ne neulug puun diye te langit iling te kilat. ¹⁹ Pammineg kew! Imbehayan ku sikaniyu te geem eyew egkaayun kew ne egdiiek te me uled wey me salipitsipit wey te langun ne geem te kuntere niyu. Ne kene kew egkamenu. ²⁰ Piru kene kew egkahale tenged te migparuma-ruma ka me busew kaniyu, ke kene, iyan niyu ikahale su nakalista ka me ngaran niyu diye te langit.”

Ka pegkahale ni Hisus

(Mat. 11:25-27; 13:16-17)

²¹ Te seeye ne timpu, imbehayan si Hisus te kahalaan te Panisingan te Manama ne migkahi si Hisus, “Ame, Manama te langit wey tane. Egpasalamatan ku sikeykew, su inneles nu seini puun

te matagseb wey te utekan ne me etew wey impakita nu seini diye te me etew ne ware katuenan.* Uya, Ame, natuman seini su iyan ma igkeupii nu.

²² “Imbehey te Amey ku ka langun kayi te keddiey. Ne ware nekeila te Anak gawas te Amey, wey ware nekeila te Amey gawas te Anak wey se-eye se igkeupii rin ne igpeila diye te Amey rin.”

²³ Ne migtangke si Hisus diye te me hibateen wey migkahiyan din sikan-dan tugtuhesi, “Keupianan niyu te nakakita te nakita niyu! ²⁴ Su egnanganan ku sikaniyu te masulug ka me prupita wey me Hari ne egkeupian ne egpakakita te nakita niyu, piru ware sikandan nakakita. Egkeupian sikandan ne egdineg te narineg niyu, piru ware sikandan nakarineg.”

Ka meupiya ne etew ne matig-Samarya

²⁵ Ne dutu, due sabeka ne talagpanulu te Balaud te Manama ne migsasindeg ne mig-eleg-eleg ki Hisus pinaahi te peg-inse, “Talagpanulu, nekey naa ka eggimuwen ku eyew egkaangken ku ka umul ne ware egtamanan?”

²⁶ Ne migtabak si Hisus kandin, “Nekey ma ka insulat diye te Balaud te Manama? Immenu nu ma seini te egsabut?”

10:19 Sal 91:13. * **10:21** Te Grigu: diye te me bate. **10:22** Huw 3:35; Huw 10:15. **10:25** Mat 22:35-40; Mar 12:28-34.

²⁷ Ne migtabak ka talagpanulu te Balaud te Manama, "Geyinawei nu ka Magbebbye ne Manama nu ne egpuun te pusung nu wey egpuun te gimukud nu wey egpuun te keseg nu wey egpuun te suman-suman nu. Ne geyinawei nu degma ka duma nu iling te peggeyinawa nu te pegkeetew nu."

²⁸ Ne migtabak si Hisus, "Eleg ka tabak nu. Himuwa nu sika eyew egkarawat nu ka umul ne ware egtamanan."

²⁹ Piru egkeupian sikandin ne eg-ileen ne eleg ka kandin, sikan naa ka mig-inse man-e sikandin ki Hisus, "Hentew naa ka duma ku?"

³⁰ Ne migtabak si Hisus, "Due sabeka ne etew ne migtupang te Hirusalim peendiye te Hiriku. Inggepasan sikandin te me tulisan diye te deralanen wey in-ahawan te inuyanan din, wey lagkes ka insaluub din. Inggumian dan sikandin wey in-engkeran ne hapit e egpatey. ³¹ Na, due degma talagpanubad ne nakasalengan ne migtupang dutu. Te pegkakita rin te etew, mig-alihu sikandin te dalan wey miglihad de. ³² Natagtaheed duen e man-e miglihad dutu ne talagbulig te talagpanubad ne egngararan te Libita. Pegkakita rin te etew, mig-alihu sikandin te dalan wey

miglihad de. ³³ Nataman, due sabeka ne etew ne matig-Samarya ne eglihad te seeye ne dalan. Pegkakita rin te etew, neyid-u amana sikandin ³⁴ wey indugpu din ka etew wey imbauian din. Mig-itisan din te lana wey binu ka pali wey migbagkesan din e. Nataman, impeuntud din ka etew te unturana din ne ayam wey indulung din diye te baley ne eg-ad-aranan. Ne intanggu rin sikandin diye. ³⁵ Te seup ne aldew, imbehayan din te daruwa ne dinaryu[†] ne seleppi ka kamuney te baley wey migkahiyen, 'Tangguwa nu sikandin. Ne emun ke egpaketimul ke pad egpakahastu, egbayaran ku re sikeykew te peglibed ku kayi.'

³⁶ Ne mig-inse si Hisus ne migkahi, "Na, te keykew ne suman-suman, hentew dutu te tatelu ka miggeyinawa te seeye se inggepasan te me tulisan?"

³⁷ Ne migtabak ka talagpanulu te Balaud te Manama, "Seeye se etew ne neyid-u kandin."

Ne migkahi si Hisus, "Hipanew ka wey himuwa nu ka iling te innimu rin."

*Ka pgleuy ni Hisus engki
Marta wey Mariya*

³⁸ Te migpabulus si Hisus ne miggipanew duma ka me hibateen din, miggingga sikandan diye te sabeka ne

10:27 Diy 6:5; Lib 19:18. **10:28** Lib 18:5. **10:33** 2Kru 28:15. [†] **10:35** Ka sabeka ne dinaryu, eleg ne igbayad te senge kaaldew ne pegbasuk te etew. **10:38** Huw 11:1.

bariyu. Ne due sabeka ne malitan ne egngararan ki Marta ne mig-elit-elit kandin diye te baley rin.³⁹ Due suled din ne egngararan ki Mariya ne migpinnuu diye te egkasikuwayan te Magbebaye ne si Hisus ka epgammineg te impanulu din.⁴⁰ Piru si Marta, egkatabikes e mule ka eg-andam te igsedad din engki Hisus. Sikan naa ka migparani sikandin ki Hisus wey migkahi, "Magbebaye, mania te ware nu sagmana ka suled ku ne migbalahad keddi ne egkatabikes te peg-andam te egkakeen? Kema, banasali nu sikandin ne ebulig keddiey."

⁴¹ Ne migtabak ka Magbebaye kandin, "He Marta! Masulug amana igkalanu nu wey igkalaggew nu Marta.⁴² Ne sabeka re perem ka egkeilanganen, wey seini iya ka in-alam ni Mariya. Meupiya seini wey kene egkaangey diye te kandin."

11

*Ka pegpanulu ni Hisus
meyitenged te peg-ampu
(Mat. 6:9-13; 7:7-11)*

¹ Te seeye ne timpu, migampu si Hisus diye te sabeka ne inged. Te pegkapenga rin te peg-ampu, due migkahi ne sabeka ne hibateen din, "Magbebaye, panlua key nikeykew te peg-ampu, iling ki Huwan te migpanulu te kandin ne me hibateen.

² Ne migtabak si Hisus kandan, "Henduena niyu kayi te eg-ampu:

'Amey:

Egdayanen ka matulus
ne ngaran nu;

Eghari ka kayi te kanami.

³ Ibehey nu kanami ka egkeilanganen ney te tagse aldew ne egkeenen

⁴ 4 wey pasayluwa key te
me sale ney,

su epgasaylu key degma
te nakasale kanami.

Ne kene key ipabaye
nikeykew diye te
pegtintal.'

⁵ Ne migkahiyan ni Hisus ka me hibateen din, "Panunggiling ke due alukuy nu, wey eggendiye ka te baley rin te egliware te marusilem wey egkahi kandin, 'Suled, pasambaye e pa te tatelu ne timman ne paan,⁶ su due alukuy ku ne sikan pad iya miggunguma wey ware igpakapakeen ku kandin.'

⁷ Ne egtabak sikandin diye te seled, 'Kene ad nikeykew banggawa su inlekeban kud e ka gumawan wey nangibat key e se taltalaanak. Sikan naa ka kene ad egpekeenew eyew egbehayan ka te egkakeen.'

⁸ Na, egnangenan ku sikaniyu, minsan kene sikandin eg-enew wey egbehey keykew te egkakeen minsan alukuy kew, piru egenew sikandin wey egbehey keykew te ingkeilangan nu puun su kene ka egkeyilew ne eglasi-lasi ne egbuyu.⁹ Purisu egnangenan ku

sikaniyu te buyu kew ne egbehayan kew; pammitew kew ne egpakakita kew; panektek kew ne eglukatan kew. ¹⁰ Su seeye se egbuyu, egbehayan; wey seeye se epammitew, egpakakita; wey seeye se egpanektek, eglukatan. ¹¹ Sikaniyu se me amey, ke egbuyu ka anak niyu te ngalap, nasi niyu naa sikandin egbehayan te uled? ¹² Ne ke egbuyu sikandin te atelug, egbehayan niyu naa sikandin te salipitsipit? Kene iya! ¹³ Ne sikaniyu, minsan makasesale kew, egkateu kew red ne egbehey te meupiya diye te me anak niyu. Ne ka Amey niyu ne diye te langit, subla pad ne egbehey te Panisingan din diye te egbuyu kandin!"

Ka pegbayung ki Hisus ne migserapan te busew

(Mat. 12:22-30; Mar. 3:20-27)

¹⁴ Ne due timpu ne migalew si Hisus te busew ne ummew ne migserap te etew. Te nakalihawang e ka busew, nakalalag e ka etew wey neinu-inu ka me etew. ¹⁵ Piru due me etew ne migkahi, "Si Meibulan* ne pangulu te me busew ka migbehey kandin te geem te pegpangalew te me busew."

¹⁶ Ka duma migbuyu sikandin ki Hisus ne egpapitawen te kein-inuwan ne egpuun te langit eyew te peg-eleg-eleg kandin.

¹⁷ Piru natahaan ni Hisus ka me suman-suman dan, purisu migkahiyan din sikandan, "Ka sabeka ne inged ne egmeun-unayey egmeeg-ehetey ka me etew, egkahuhus iya ka sika ne inged. Ne ka taltalaanak ne egmeeg-ehetey, egmekeg-suwey. ¹⁸ Ne emun ke egunayen ded ni Meibulan te eg-ehet ka me sakup din, egmenuwen dan naan e te egpasasindeg ka inged dan? Su migkahi kew ne migpangalew a te me busew tenged su imbehayan a ni Meibulan te geem. ¹⁹ Ne emun ke iyan ku pa inggamit ka geem ni Meibulan te pegpangalew te me busew, hentew naa ka migbehey te geem te me hibateen niyu ne egpangalew degma te me busew? Purisu ka me hibateen niyu ka mismu ne migpamalehet ne seyyup kew iya. ²⁰ Na, puun su migpangalew ku ka me busew pinaahi te geem te Manama†, migpeila seini ne miggingsume e diye te kaniyu ka Peghari te Manama.

²¹ "Ke due sabeka ne etew ne manekal, ne kumplitu te panganiban te pegbantey te baley rin, kene egkeubalan ka me kasangkapan din.

²² Piru ke eglusuran sikandin te manmanekal pad kandin ne etew, egkatalu iya sikandin. Egpanguen e ka insalsalihan din ne me pan-

* **11:15** Mat 9:34; 10:25. * **11:15** Te Grigu: Biilsibul. (Egkakita degma diye te birsikulu 18.) **11:16** Mat 12:38; 16:1; Mar 8:11. † **11:20** Te Grigu: kemel te Manama.

ganiban, wey egba-baaren e ka me kasangkapan din.

23 “Ka kene egpalapig keddiey, egkuntere keddiey; ka kene egbulig keddiey te pegpalibulung, egpegsuwey naa.”

*Ka peglibed te busew
(Mat. 12:43-45)*

24 Ne migpabulus si Hisus ka miglalag, “Ne emun ke eglihawang e diye te etew ka busew, egleug-leug sikandin diye te mammara ne me inged eyew egpammitew te egkeyimlayan din. Ke kene sikandin egpakakita, egkahi sikandin, ‘Eglibed e red diye te tapey ne inserepan ku.’ **25** Seeye naa, ke eglibed din wey ke egkakita rin ne malinis e ka geyinawa te etew wey meupiye e ka pegkapanines dutu, **26** egligwang sikandin ne eg-uyan te pitu pad mane ne me busew ne subla pad ne maddeet kandin, ne egsaled sikandan wey egugpe dutu. Te katammanan, egkanasnasion pad egmaret ka seeye ne etew.”

Ka malehet ne keupianan

27 Te nakapenge e si Hisus ka miglalag, due sabeka ne malitan diye te taliware te me etew ne migpanguleyi diye te kandin ne migkahi, “Keupianan te seeye se malitan ne mig-anak wey migpasusu keykew!”

28 Piru migtabak si Hisus, “Keupianan te seeye se egpammineg te lalag te Maman-a wey egtuman kayi.”

*Ka egbuyu ki Hisus te kein-inuwan
(Mat. 12:38-42)*

29 Te egkatimtimulan e ka kasulug te me etew ne nakaalingkus ki Hisus, migkahi sikandin, “Amana ne mareet ka me etew te kuntee ne timpu! Migbuyu sikandan te kein-inuwan piru ware igpakita kandan gawas te kein-inuwan ne neyitabu ki Hunas. **30** Iling ki Hunas ne neyimu ne palinneu te me etew diye te Ninibi, ka Anak te Etew degma, iyan egkeyimu ne palinneu te me etew te kuntee ne timpu. **31** Te Aldew te Peggukum, egsasindeg ka Rayna te Igkakawanan ne Balabahan dapit te Igsile duma te me etew te kuntee ne timpu wey egsenditan din sikandan su amana ne mariyu ka impuanan din te miggipanew eyew te pegpammineg te maralem ne katuenan ni Hari Sulunun. Ne kuntee, kayid e ka labew pad ki Sulunun. **32** Te Aldew te Peggukum, egpangenew degma ka me matig-Ninibi duma te me etew te kuntee ne timpu wey egsenditan dan sikandan. Su mig-inniyug sikandan te me sale dan te pegkarineg dan te wali ni Hunas. Ne kuntee, kayid e ka labew pad ki Hunas.”

*Ka mata sulu te lawa
(Mat. 5:15; 6:22-23)*

³³ Ne migpabulus pad si Hisus ka migkahi, “Ware epareket te sulu ne iggeles wey egsuuban naa te gantangan, ke kene, igaipatawan-tawan din iya igtahu eyew egkalayahan seeye se egseled te baley. ³⁴ Ka mata nu, sulu te lawa nu. Ke malayag ka peggengteng nu, malayag degma ka intiru ne lawa nu; piru ke marusilem ka peggengteng nu, marusilem degma ka intiru ne lawa nu. ³⁵ Purisu ayad-ayad ka su kema ke ka layag ne egkahiyen nu ne due te keykew, marusilem bes. ³⁶ Ke napenu te layag ka intiru ne lawa nu wey ke ware baad te lawa nu ne marusilem, eglayag iya ka intiru ne lawa nu iling te sulu ne nakateng-ew due te keykew.”

*Ka pegpaney-paney ni
Hisus meyitenged te me
pangulu te me Hudiyu*

(Mat. 23:1-36; Mar. 12:38-40)

³⁷ Te nakapenge e si Hisus ne miglalag, due sabeka ne Parisiyu ne miggingsgat kandin te egkeen. Seeye naa, migdume e si Hisus wey miglagpu migkeen duma kandin. ³⁸ Neinu-inu ka Parisiyu te nakakita ki Hisus ne migkeen ne ware migpanlu-lu te belad din.[‡]

³⁹ Puun due, migkahi ka Magbebaye diye te kandin,

“Sikaniyu se me Parisiyu, miglinisan niyu ka lawa te pakawan wey pinggan, piru malindit ka diye te seled. Iling kew naa degma rue su napenu te halamlam wey te langun ne mareet ka diralem niyu. ⁴⁰ Sikaniyu se egkengeungel! Innimu te Manama ka dapit te ligwang wey iling ded man-e ka dapit te seled. ⁴¹ Purisu ibehey niyu te egkengaayu-ayu ka tahu te me pakawan wey me pinggan niyu, wey egmalinis ka langun diye te kaniyu.

⁴² “Mekeyid-u-hid-u kew kangkuwa me Parisiyu! Migbehey kew diye te Manama te igkasapulu ne baad te me leggu niyu iling te hirbabuwina wey kaningag wey me duma pad ne me leggu, piru imbalahad niyu ka katareng wey peggeynawa te Manama. Keilangan ne egbehey kew te igkasapulu ne baad, piru kene niyu balahara ka duma ne panulu.

⁴³ “Mekeyid-u-hid-u kew me Parisiyu! Su eg-alam kew te me mateles ne pinnuwan diye te me simbaan te me Hudiyu, wey egkeupian kew ne egtahuren te me etew diye te me palingkiyan. ⁴⁴ Mekeyid-u-hid-u kew! Il-ing kew te me lebeng ne ware tuus ne ware de nanengnengi te me etew ne nariekan dan bes e.”

⁴⁵ Ne due sabeka ne talagapanulu te Balaud te Manama

11:33 Mat 5:15; Mar 4:21; Luk 8:16. [‡] **11:38** Su sumale te batasan te me Hudiyu, eghanlu-lu sikandan te me belad dan te kene pad egkeen. **11:42** Lib 27:30.

ne migkahi kandin, "Talagpanulu, te peglalag nu te iling due, impeyilawan key degma nikeykew!"

⁴⁶ Ne migtabak si Hisus, "Mekeyid-u-hid-u kew degma se me talagpanulu te Balaud te Manama! Impatiang niyu ka me etew te me dinulan ne bebehati ne egtiangen, pиру sikaniyu mismu kenad iya ebulig minsan deisek de te pegtiang kayi. ⁴⁷ Mekeyid-u-hid-u kew iya! Migpangimu kew te lebenganan te me prupita ne impangimatayan te me kaapuan niyu. ⁴⁸ Sikan naa, sikaniyu mismu ka migpamalehet wey mig-uyun te innimu te kaapuan niyu, su sikandan ka miggimatey te me prupita wey sikaniyu ka miggimu te sabalan dan. ⁴⁹ Tenged kayi, migkahi ka matagseb ne Manama, 'Egpeuyanan ku sikandan te me prupita wey me suluhuanen; wey eggimatayan dan ka duma wey ka duma egbaybaran dan.' ⁵⁰ Purisu, egleparan ka me etew te kuntee ne timpu tenged te peggimatey ran te langun ne me prupita puun pad dengan te peggimu te kalibutan, ⁵¹ puun te peggimatey ki Abil peendiye te ki Sakariyas ne innimatayan diye te elat-elat te altar wey te timplu. Uya, egnanganan ku sikaniyu, egleparan ka me etew te kuntee ne timpu meyitenged te langun ne me prupita ne

impangimatayan.

⁵² "Mekeyid-u-hid-u kew ka me talagpanulu te Balaud te Manama! Inggeles niyu ka yabi ne iyan perem egpakkalukat te gumawan te baley te katuenan; pиру sikaniyu mismu, kene kew egseled wey imbalabahan niyu seeye se egseled!"

⁵³ Te peg-awe ni Hisus diye, amana sikandin dewaya te me talagpanulu te Balaud te Manama wey te me Parisiyu. Ne miglasasiyan dan sikandin te eg-inse te masulug ne me inse, ⁵⁴ su eggeraman dan sikandin te egsahilut pinaahi te peglalag din eyew egkarakep dan sikandin ke egkaseyyup din.

12

*Ka pegpaney-paney
meyitenged te pegpapitew-
pitew*

(Mat. 10:26-27)

¹ Te seeye ne timpu, due me etew ne miglibulung diye te ki Hisus wey egmemekegdi-diekey e sikandan su amana ran ne susuluhi. Ne migkahiyan hun-eyi ni Hisus ka me hibateen din, "Bantey kew ne kene egkaalinan te igpatulin te paan te me Parisiyu ne iyan ka pegpapitew-pitew. ² Su ke nekey ka imbunbunan, egkalekisan, wey ka langun ne inneles, egkanengnenggan. ³ Purisu minsan nekey ne ingguhud niyu diye te marusilem, igkahuhud diye

te malayag. Ne minsan nekey ne innaas-naas niyu diye te inlekeban ne sinabeng, igkawangal-wangal diye te langun.*

*Ka eleg ne igkaaldek
(Mat. 10:28-31)*

⁴ Ne migpabulus si Hisus ne migpanulu, "Egnanganan ku sikaniyu me alukuy ku, kene kew kaaldek te seeye se egpekeyimatey te lawa niyu wey te pegkeimpus due warad elein ne egkeyimur ran kaniyu. ⁵ Piru egnanganan ku sikaniyu ke hentew ka eleg ne igkaaldek. Iyan niyu ikaaldek ka Manama ne egpekeyimatey te lawa wey due geem te pegdegpak te gimukud diye te linew ne hapuy. Uya, egnanganan ku sikaniyu te kaaldeki niyu sikandin.

⁶ "Ka lalimma ne mallilintek ne maya ne igbelegye de te baratu, piru ware sabeka kandan ne egkalingawan te Manama. ⁷ Ne sikaniyu, minsan ka me bulbul te ulu niyu naseel rin ma langun. Purisu, kene kew kaaldek, su subla kew pad ne labew du te me maya."

*Ka peg-angken ki Kristu
(Mat. 10:32-33; 12:32;
10:19-20)*

⁸ "Egnanganan ku sikaniyu te ka minsan hentew ne eg-angken keddiey diye te tangkaan te me etew, sikeddi ne Anak te Etew, eg-angken degma kandin diye

te tangkaan te me panalihan te Manama; ⁹ Piru minsan hentew ne egpahunware meyitenged keddiey diye te tangkaan te me etew, igpahunware ku degma diye te tangkaan te me panalihan te Manama.

¹⁰ "Minsan hentew ne egemet te Anak te Etew, egkapasaylu red, piru ka minsan hentew ne egbaley-baley te Panisingan te Manama, kene iya egkapasaylu.

¹¹ "Ne emun ke eg-uyanen kew diye te me simbaan te me Hudiyu wey diye te tangkaan te me gubirnadur wey diye naa te me pangulu, kene kew kalaggew ke egmenuwen niyu te pegpangatarengan wey ke nekey ka iglalag niyu ¹² su eghanulu kew te Panisingan te Manama te sika ne timpu ke nekey ka eleg ne iglalag niyu."

*Ka panunggilingan
meyitenged te meyaman ne
kene egtulik*

¹³ Nataman, due sabeka ne etew diye te kasuluhan ne migkahi diye te ki Hisus, "Talagpanulu, kahii nu pa ubag ka suled ku ne egbaaran a te karatuan ne inggaat te ameyney."

¹⁴ Ne intabak din sikandin, "Usi, hentew-a ka migbehey kedi te katenged ne talaggukum niyu wey ke talagbaad te karatuan niyu?" ¹⁵ Ne migkahiyen din ka me

* **12:3** Te Grigu: igkawangal-wangal diye te me atep. **12:10** Mat 12:32; Mar 3:29. **12:11** Mat 10:19-20; Mar 13:11; Luk 21:14-15.

etew, "Tanud-tanud kew wey bantey kew te pegkaalam-lamen te minsan nekey, su ka malehet ne umul te etew ware diye te katubung din wey karakel te karatuan."

¹⁶ Ne migpangguhud si Hisus te seini ne panung-gilingan diye te kandan: "Due sabeka ne meyaman ne due tane din wey amana ne dakel ka naahaani rin te me pinamula rin." ¹⁷ Ne kahi rin diye te suman-suman din, 'Nekey buwa ka eggimuwen ku te warad e egkatahuan ku te naahaani ku?' ¹⁸ Uya bes, seini ka eggimuwen ku. Egguhusen ku ka me lelapeng ku wey eggimu a te dakel ne me lelapeng wey diye ku igtahu ka langun ne naahaani ku wey me kasangkapan ku.' ¹⁹ Ne migkahi man-e sikandin, 'Matubung ad. Nakalimud ad te dakel ne ingkeilangan ku te minsan pila pad ne leg-un. Egpeelay-helay e naan de, egkeen, eg-inum wey eggale-gale.' ²⁰ Piru migkahi ka Manama diye te kandin, 'Egkeungel! Te seini ne karusileman, egkuen kud ka umul nu. Ne hentew naan e ka egpakakamuney te langun ne inlimud nu?"

²¹ "Sika degma ka egkata-manan te etew ne eglilimud te karatuan para kandin de iya piru egkaayu-ayu diye te suman-suman te Manama."

Ka pegsalig diye te Manama
(Mat. 6:25-34)

²² Ne migkahiyan ni Hisus ka me hibateen din, "Purisu egnanganan ku sikaniyu te kene kew kalaggew meyitenged te umul niyu, ke nekey ka egkakeen niyu. Kene kew kalaggew te lawa niyu, ke nekey ka igsaluub niyu." ²³ Su ka umul impurtanti pad du te egkeenen, ne ka lawa impurtanti pad du te igsaluub. ²⁴ Tengtengi niyu ka me uwak, ware me pinamula ran wey egganiyen dan wey ware lelapeng dan, piru impakeen sikandan te Manama. Ne sikaniyu, labew kew pad iya te me manuk-manuk. ²⁵ Na, hentew ma kaniyu ka egpakkapamalayat te umul rin pinaahi te pegkalaggew rin? Ware iya! ²⁶ Purisu, ke kene kew egpakaumpul te umul niyu minsan deisek de, mania te egkalaggew kew pad te duma ne keilangan niyu? ²⁷ Sumsumana niyu ka me bulak ke immenu ran te egdakel. Ware sikandan miggimu wey migpaneyi te igsaluub dan. Piru egnanganan ku sikaniyu te minsan si Suluman, ka amane e ne meyaman wey mabantug, ware ma kumbale din ne iling kateles te seeye ne me bulak. ²⁸ Ke impamatelesan te Manama ka me bulak ne neuyag pad kuntee, ne egsilaban ded te seup ne aldew, iyan kew naan pa kene pakumbalei nikandin? Amana ne deisek ka pegpal-intutuu niyu!"

29 "Kene kew kalaggew egdahayun ke nekey ka egkeenen niyu wey eg-inumen niyu. 30 Su sika ka igkalaggew te me etew ne ware pegpalintutuu wey pegaslig te Manama. Piru nakanengneng e ka Amey niyu te egkeilanganen niyu seeye. 31 Purisu, paharia niyu pa ka Manama diye te geyinawa niyu wey igbehey rin ka langun ne ingkeilangan niyu.

*Ka karatuan diye te langit
(Mat. 6:19-21)*

32 "Kene kew kaaldek minsan pila-pila kew re iya, su nahale ka Amey niyu te pegbehey kaniyu te me panalangin te peghari din. 33 Ibelegye niyu ka me kasangkapan niyu wey ipamehey niyu ka halin diye te egkaayu-ayu. Puun due, egpakakuwa kew te puntil ne kene egkareetan ne eglimuran niyu te karatuan diye te langit. Kenad sika egkasalinan wey egkareetan su ware takawen diye ne egpakarani wey aney ne egpakaketket. 34 Su ke hendei ka karatuan niyu, diye degma ka geyinawa niyu.

Ka matanud-tanud ne suluhuanen

35 "Pangandam[†] kew layun wey pareket kew te sulu, 36 iling te me suluhuanen ne migtetahad te ahalen dan ke ken-u eg-uli ka

miggendiye te kasal. Te peg-uli din e, egpanektek sikandin wey sauhune ne egkalukatan dan ka gumawan. 37 Keupianan te seeye se me suluhuanen ne nakita te ahalen dan ne ware miglipereng te pegginguma rin. Egnangenan ku sikaniyu te malehet: eg-ilis ka ahalen wey egpapinpinnuuwen din diye te keenanan ka me suluhuanen din wey egsendaran din sikandan. 38 Keupianan iya te seeye se migtetahad te peg-uli te ahalen dan minsan te egliware e te marusilem wey ke eg-ukale naan e ka manuk. 39 Tantanuri niyu seini: emun ke nakanengneng ka kamuney te baley ke nekey ne uras eglepew ka takawen, egbantayan din iya ka baley rin eyew kene egpakaseled ka takawen. 40 Ne sikaniyu degma, keilangan ne eg-andam kew su egginguma ka Anak te Etew te timpu ne ware niyu pallatenga."

*Ka meupiya ne suluhuanen wey ka lamu
(Mat. 24:45-51)*

41 Ne migkahsi si Pidru, "Magbebaye, sikanami naan de ka imparineg nu te sika ne panunggilingan wey ke para te langun?"

42 Ne migtabak ka Magbebaye, "Hentew-a ka suluhuanen ne matinumanen wey matagseb? Panunggilingan, ke imbehayan te ahalen ka

12:35 Mat 25:1-13. [†] **12:35** Te Grigu: egtaberan ka liwaraan. **12:36** Mar 13:34-36. **12:39** Mat 24:43-44.

suluhuanen din te katenged te pegmandu te me duma rin ne me suluhuanen, eyew epakeen kandan te eleg ne timpu,⁴³ keupianan din ke nasapenan sikandin ne maggimu te peg-uli te ahalen din.⁴⁴ Egnanganan ku sikaniyu te malehet: sikandin e ka egpeuyanan te ahalen din te langun ne karatuan din.⁴⁵ Piru ke mareet ka suluhuanen, egsuman-suman sikandin ne mananey pad eg-uli ka ahalen din, wey dutu egbunsud e egpanlampes te me duma rin ne me lukes wey malitan ne me suluhuanen, wey egpanaman-taman egkeen wey egpewubug-hubug.⁴⁶ Ne eg-uli ka ahalen din te sabeka ne aldew ne ware din pallatenga, wey te uras ne ware din nannengnengi, wey egdusaan[‡] sikandin te ahalen wey igpalemung te me etew ne kene ne matinumanen.

⁴⁷ “Ka uripen ne nakaneng-neng te igkeupii te ahalen din, piru ware migtanud-tanud wey ware migtuman dutu, egpanlampesan egpatamtamani.⁴⁸ Piru ka suluhuanen ne ware nakanengneng te ingkeupii te ahalen din, wey egpekeyimu te eleg ne egkalampesan sikandin, eglampesan iya sikandin piru deisek de. Su minsan hentew ne imbehayan te dakel, eg-im-imanan degma te dakel; wey ka insalihan te dakel, eg-im-

imanan degma te subla ne dakel.

Si Hisus ka paligkatan te pegbaad-baad

(Mat. 10:34-36)

⁴⁹ “Miggendini a su eyew te pegrilab kayi te ampew te tane; wey meupiya pad perem ke egkalegleg e.⁵⁰ Piru keilangan ne eg-antus e pad te igpaneem-neem keddi, § wey egmemasakit kuntee ka geyinawa ku taman te egkatuman e sika.⁵¹ Kahiyan niyu buwa ne iyan ku innendini ka eg-uyan te keupianan kayi te ampew te tane? Kene ne sika, su pegbaad-baad ka in-uyan ku.⁵² Puun kuntee egkabaad-baad e ka taltalaanak. Emun ke lalimma sikandan, ka tatelu egkuntere te daruwa wey ka daruwa egkuntere te tatelu.⁵³ Egpekegkuntere ka amey te anak din ne me lukes, wey ka iney egpekegkuntere te me anak din ne me malitan. Ne egpekegkuntere degma ka anuhang ne malitan te me ambey ran.”

Ka pegrilab te kaluwasan te timpu

(Mat. 16:2-3)

⁵⁴ Migkahi man-e si Hisus diye te me etew, “Ke egkakita niyu ka egpaddusilem diye te iglineb, mahaan kew egkahi, ‘Eg-uran seini te kene egkaluhay,’ wey eg-uran iya.⁵⁵ Ne emun ke nanengnengan niyu ne diye migpuun

[‡] 12:46 Te Grigu: egtadtaren. bewutismu ne igbewutismu.

12:50 Mar 10:38.

12:53 Mik 7:6.

§ 12:50 Te Grigu:

ka kalamag te igkakawanana
ne balabahan dapit te igsile,
egkahi kew, ‘Egmeinit naa
kuntee,’ wey egmeinit iya.
56 Sikaniyu se egmapitew-
pitew re, egpakasabut kew
te me palinneu diye te langit,
piru kene kew egpakasabut
te me palinneu te Manama
kuntee!

*Ka pegpeul-uliey te
migpeeg-ehetey*
(Mat. 5:25-26)

57 “Mania te kene kew
egpakasuman-suman ke
nekey ka eleg ne eggimuwen
niyu? 58 Ke due egbayung
keykew wey igsumbung kad
nikandin, pakannekal ka ne
egkewusey kew te diye kew
pad te dalan, su kema ke
igpeendiye kad e nikandin
te huwis, ne igpeendiye
kad e man-e te pulis, ne
egkataman ne igpaprisu
kad e. 59 Egnanganan ku
sikeykew te kene ka iya
egpakalihawang ke kene
nu egkaamin te egbayad ka
multa nu.”

13

*Engkeri niyu ka sale eyew
kene kew egkapatey*

1 Te seeye ne timpu, due
me etew diye ne mignangen
ki Hisus meyitenged te me
matig-Galiliya ne inggi-
matayan ni Pilatu taheed
te migpanubad sikandan te
Manama. 2 Ne migkahiyan
ni Hisus sikandan, “Ne puun
su inggimatayan sikandan te
iling due ne paahi, kahiyen
niyu buwa ne subla pad

sikandan ne makasesale du
te duma ne matig-Galiliya?

3 Kene! Piru egnanganan ku
sikaniyu te emun ke kene
niyu eg-inniyuhan ka me
sale niyu, sikaniyu langun,
egpatey red degma iling
kandan. 4 Sumsumana niyu
ka sapulu wey walu (18) ne
me etew ne nalundusan te
matikang ne baley diye te
Siluam wey nammatey e.
Kahiyen niyu buwa ne subla
pad sikandan ne mareet du
te duma ne matig-Hirusalin?

5 Kene! Piru egnanganan ku
sikaniyu te emun ke kene
niyu eg-inniyuhan ka me
sale niyu, sikaniyu langun,
egpatey red degma iling
kandan.”

*Ka panunggilingan
meyitenged te kayu ne ware
migbehas*

6 Nataman, migpangguhud
si Hisus kandan te seini
ne panunggilingan: “Due
sabeka ne etew ne migpa-
mula te kayu ne egngaranan
te iggira. Inleu rin seini
eyew egpitawen ke duen
e behas, piru ware nakita
rin. 7 Seeye naa, migkahiyan
din ka impatameng din te
pinamulaan, ‘Tatelu e kuntee
ne leg-un ka pgleuy-leuy
ku te seini ne kayu eyew
egpitawen ke duen naan
e behas, piru warad iya
nakita ku ne behas. Pelera
nud e su egdaat-daat de te
kalambahan te tane.’ 8 Piru
migtabak ka talagtameng,
‘Balahara nu pa ahalen,
minsan te seini naan de ne
leg-un su eglingkusen ku pad

te egkali ka lebut din wey eg-ebunuwan ku. ⁹ Emun ke egbebehas e seini te seup ne leg-un, ne meupiye iya, piru ke kene, egpeleren e mule.”

Ka peku ne imbawian ni Hisus

¹⁰ Te sabeka ne Aldew te Peggimeley, migpanulu si Hisus diye te simbaan te me Hudiyu. ¹¹ Ne due sabeka ne malitan diye ne migserapan te busew wey migderalu seled te sapulu wey walu (18) ne leg-un. Napeku e sikandin wey kenad e egkatul-id ka eggsasindeg. ¹² Te pegkakita ni Hisus te malitan, in-umew rin sikandin wey ingkahiyen, “Mengeatebey, neulian kad e te dalu nu!” ¹³ Ne intel-eban ni Hisus te belad din ka malitan wey due-rue ne nakasasindeg sikandin, wey indayan din e ka Manama.

¹⁴ Ne nabelu ka pangulu te simbaan te me Hudiyu su migpamawi si Hisus te Aldew te Peggimeley. Ne migkahi ka pangulu diye te me etew, “Due hen-em ne aldew te peg-gimu. Hendini kew te minsan nekey ne aldew ke egke-upian kew ne egkeulian, piru kene te Aldew te Peggimeley!”

¹⁵ Ne migtabak ka Mag-bebaye kandin, “Sikaniyu se egpapitew-pitew re! Te Aldew te Peggimeley, warad iya minsan sabeka kaniyu kayi ne kene eggekad te me ayam din diye te intakesan din wey eg-uyan te seeye eyew egpeinumen. ¹⁶ Na,

seini se kabuhalan ni Abraham, impaantus sikandin ni Meibulan seled te sapulu wey walu (18) ne leg-un. Mania te kene egkaayun ne egbawian sikandin te Aldew te Peggimeley?” ¹⁷ Puun te seeye ne lalag ni Hisus, neyilawan ka langun ne egkuntere kandin, wey nahale mule ka me etew tenged te kein-inuwan ne immangimu rin.

*Ka panunggilingan
meyitenged te behas ne mallil-intek*

(Mat. 13:31-32; Mar. 4:30-32)

¹⁸ Migkahi si Hisus, “Ma-menua ka Peghari te Manama? Nekey-a ka egkeilingan kayi? ¹⁹ Egpekeiling seini te beni te mustasa ne mallilintek ne impamula te etew diye te kamet din. Migtubu seeye wey migmalayat e ne nekeiling e te kayu wey migsesalah-an e te me manuk-manuk ka me sugpang din.”

*Ka panunggilingan
meyitenged te igpatulin te paan*

(Mat 13:33)

²⁰ Mig-inse e man-e si Hisus, “Nekey-a ka egpeilin-gan ku te Peghari te Manama? ²¹ Egpekeiling seini te igpatulin te paan ne in angey te sabeka ne malitan wey insewug din te harina ne egliware te saku, taman te migtulin ka langun ne innimu rin.”

Ka malig-et ne gumawan
(Mat. 7:13-14, 21-23)

²² Ne miggendiye si Hisus te Hirusalim wey sasangan degma sikandin ne egpanulu diye te me lungsud wey me bariyu ne egkaliharan din. ²³ Due sabeka ne etew ne mig-inse kandin, "Ahalen, deisek bu re ka egkaluwas?"

Ne migtabak si Hisus, ²⁴ "Pakannekal kew te egseled te malig-et ne gu-mawan, su egnanganan ku sikaniyu te masulug ka eg-eleg-eleg piru kene eg-pakaseled. ²⁵ Su egkataman ne eglekeban e te mahinged ka gumawan, wey diye kew naan de te lihawangan egsasasindeg wey egpanek-tek ne egkahi, 'Ahalen, lukati key nikeykew!' Ne egtabak sikandin, 'Wara a nakanengneng ke hendei kew egpuun!' ²⁶ Ne egtabak kew e, 'Sikanami iya ka duma nu te migkeen wey mig-inum. Ne migpanulu ke pad iya man-e diye te inged ney.' ²⁷ Piru egtabak e mane sikandin, 'Wara a nakanengneng ke hendei kew egpuun. Pariyu kew keddi, sikaniyu se mareet ne me etew.' ²⁸ Ke egkiteen niyud ensi Abraham, si Isaak wey si Hakub, wey ka langun ne me prupita diye te Migharian te Manama, egmandalawit kew wey egmegkihet te ngipen niyu su diye kew re mule te lihawangan. ²⁹ Due masulug ne me etew ne diye egpuun te igsile wey te iglineb wey

puun diye te igkahibang ne balabahan wey te igkakawanan ne balabahan dapit te igsile ne eglagpu egkeen diye te Migharian te Manama. ³⁰ Pammineg kew, due namewuri kuntee ne egpekekewun-a, wey due nekewun-a kuntee ne egkamewuri."

Ka geyinawa ni Hisus te Hirusalim
(Mat. 23:37-39)

³¹ Te seeye ne timpu, due me Parisiyu ne miggendiye te ki Hisus wey migkahi, "Keilangan ne eg-awe kad kayi su egpeyimatayan ka ni Hirudis."

³² Ne migtabak si Hisus kandan, "Hipanew kew wey kahii niyu sika se egpekeiling te laku te egpangalew e pad te me busew wey egpamawi a te egmanderalu taman kaaselem. Ne ikaruwa, egkeimpusan kud ka himu ku. ³³ Piru keilangan ne egpabulus a eggipanew kuntee, kaaselem wey ikaruwa su kene egkaayun ne diye eggimatayan te duma inged ka sabeka ne prupita, su diye de iya te Hirusalim.

³⁴ "E sikaniyu se matig-Hirusalim ne migpangimatey te me prupita wey migpandegpak te seeye se impeendue te kaniyu. Kamasalig ad e perem eglibulung kaniyu, iling te sabeka ne inayan ne migpangalup-kup te me piyak din, piru

ware kew neupii. ³⁵ Na, engkeran e ka siyudad* niyu. Ne egnangenan ku sikaniyu, kene kew e egpakkita kediey man-e taman te egkahi kew e, ‘Egdayanen sikandin se impeendini te Magbebkiye ne Manama[†] kanta.’ ”

14

Due migbawian ni Hisus

¹ Te sabeka ne Aldew te Peggimeley, miggendiye si Hisus te baley te sabeka ne pangulu te me Parisiyu eyew te pegkeen, wey inipat sikandin ay-ayari te me etew. ² Ne due etew diye te egkatangkaan din ne migpanlebag ka intiru ne lawa rin. ³ Mig-inse si Hisus te me talagpanulu te Balaud te Manama wey me Parisiyu, “Intuhut naan ded te Balaud ka pegpamawi te Aldew te Peggimeley?”

⁴ Piru ware sikandan migtabak. Ne inggen-genan ni Hisus ka etew wey imbawian din wey impeyipanew rin e. ⁵ Ne migkahiyan ni Hisus sikandan, “Ke due anak niyu wey ke ayam naa ne neulug diye te belun te Aldew te Peggimeley, kene niyu naa egdagdahawan te egkuwa?”

⁶ Piru ware sikandan nakatabak meytenged dutu.

Ka pegpariralem wey pegparibabew

⁷ Nasahinda ni Hisus ne due me mahaliyug ne migalam te pinnuwan te me

talahuren, purisu migpangguhud sikandin kandan te seini ne paney-paney: ⁸ “Ke due eggigat keykew te sahakeen te kasal, kene ka pinnuu diye te pinnuwan te talahuren ne me etew su hanew nu ke duen pad etew ne labew keykew. ⁹ Ne egdani-rani keykew seeye se miggigat kaniyu te daruwa wey egkahi, ‘Sikandin ka egpapinnuuwen ku kayi.’ Ne egkeyilawan kad e mule wey diye ke naan de egpapinnuu te nakaledled ne pinnuwan. ¹⁰ Ke due eggigat keykew, meupiya pad ke diye ka te nakaledled ne pinnuwan eyew egdani-rani ka miggigat keykew ne egkahi, ‘Suled, halin ka kayi te meupiya ne egpinnuuwan.’ Ligkat due, egkarayan ka diye te tangkaan te langun ne etew. ¹¹ Su ka minsan hentew ne egparibabew te pegkeetew rin, igpariralem, ne minsan hentew ne egpariralem te pegkeetew rin, igparibabew.”

¹² Ne migkahiyan ni Hisus ka miggigat kandin, “Ke eggilutu ka, kene nu iyan hinggata ka me alukuy nu wey me suled nu wey me karumaan nu wey me sumbaley nu ne meyaman su egpakkasuli sikandan eggigat keykew, ne puun due egkasulian kad te miggimu nu kandan. ¹³ Ke eggilutu ka, iyan nu hinggata ka egkaayu-

[†] **13:35** Te Grigu: sikandin se eggendini te ngaran te Magbebkiye. **14:5** Mat 12:11. **14:8** Lal 25:6-7. **14:11** Mat 23:12; Luk 18:14.

ayu wey ka me pungku wey ka me napiangan wey ka me butud. ¹⁴ Ne keupianan nu su kene sikandan egpakashili keykew. Iyan e eggsuli keykew ka Manama te timpu ne egkeuyag ka me etew ne matareng.”

*Ka panunggilingan
meyitenged te dakel ne peggi-
lulu*

(Mat. 22:1-10)

¹⁵ Te pegkarineg dutu te sabeka ne duma ran te egke-keen, migkahiyan din e si Hisus, “Keupianan te seeye se etew ne egpakakeen diye te Migharian te Manama!”

¹⁶ Ne migpangguhuran sikandin ni Hisus, “Due etew ne miggilutu te dakel ne egkeenen wey masalig ka me etew ne inggingat din. ¹⁷ Te miggungume e ka uras ne egsahakeen e, insuhu din e ka suluhuanen din eyew egnanganan seeye se impangingat din te naandam e ka langun. ¹⁸ Ka tagse sabeka kandan, mig-ealiddanan ne kene egpekeendiye. Migkahi ka an-anayan, ‘Kene ke re keenendueni su nakabeli a te tane wey keilangan ne egleuyen ku seini.’ ¹⁹ Ne migkahi ka igkarangeb, ‘Kene ke re keenendueni su nakabeli a te sapulu ne baka ne eggendiyaan ku naa su eg-el-elehan ku igdaru.’ ²⁰ Migkahi ka igkatelu, ‘Iyam a nakaasawa sikan naa ka kena a egkaayun ne eggendiye.’ ²¹ Seeye naa,

miglibed e ka suluhuanen wey impangguhuran din e ka ahalen din. Nabelubelu ka ahalen meyitenged dutu wey migkahiyan din ka suluhuanen din, ‘Hendiye ka dagdahew te kelesadda wey me dalan, wey dumaa nu kayi ka me etew ne egkaayu-ayu, me pungku, me butud wey ka nenapiangan.’ ²² Te ware naluhay, migkahi ka suluhuanen, ‘Ahalen, natuman e ka insuhu nu, piru ware napenu ka keenanan.’ ²³ Ne migkahi ka ahalen din, ‘Hendiye ke pa man-e te me dalan wey diye te ligwang te siyudad wey pehesa nu ka me etew ne eggendini eyew egkapenu seini se baley ku. ²⁴ Egnangenan ku sikaniyu te ware minsan sabeka te seeye se hun-a ne inningat ku ne egpakaheram te sahakeen ku!’ ”

*Ka keilangan eyew egkey-
imu ne hibateen*
(Mat. 10:37-38)

²⁵ Due masulug ne me etew ne migduma ki Hisus te miggipanew. Ne miglilingey sikandin wey migkahiyan din sikandan, ²⁶ “Minsan hentew ne eggendini te keddiey, ne kene din pad eg-engkeran ka igkatiglingey rin diye te amey rin wey iney rin wey asawa rin wey me anak din wey me suled din, wey kene din eg-engkeran ka kandin mismu ne igkeupii, kene egkaayun ne egkeyimu ne hibateen ku. ²⁷ Ne minsan

hentew ne kene egtiang te kandin ne krus wey kene egikul keddiey, kene egkeyimu ne hibateen ku.*²⁸ Ke due sabeka kaniyu ne egsuman-suman egpes-ek te matikang ne baley, eggun-aan din pad iya te egsuman-suman ke pila ka egkahastu rin wey ke egpekeeleg naa ka seleppi din taman te egkeimpusan ka baley.²⁹ Su emun ke kene din eggimuwen sika, kema ke tibal re egkapes-ekan ne kenad egkeimpusan, wey eglemetan e nasi sikandin te egpakakita dutu.³⁰ Egkahi sikandan, ‘Et, egpaalag-alag ubag seini ne etew egbebaley ne kene bes egpekeimpus!’³¹ Ne iling ded degma ke due sabeka ne Hari ne due sapulu ne libu (10,000) se sundalu rin ne egpakigbunu te lein ne Hari ne due daruwa ne pulu ne libu (20,000) se sundalu. Eggun-aan din pad iya te egsuman-suman ke egpakaatu naa sikandan ne egpakigsukub te Hari ne due daruwa ne pulu ne libu (20,000) se sundalu.³² Ke suman-suman din ne kene sikandin egpakaatu, meupiya ne egsuhu sikandin te me etew rin te pegnangen te kuntere din taheed te diye pad te mariyu ne egpewusayey naan de sikandan.³³ Iling naan ded due, sumsumana niyu pa ke egpekeikul kew naa keddiey. Su minsan hentew

ne kene egpekeengked te langun ne diye te kandin, kene egkeyimu ne hibateen ku.

Ka asin ne warad karuan
(Mat. 5:13; Mar. 9:50)

³⁴ “Meupiya ka asin, piru ke egkaawaan e ka asin te nanam din, egmenuwen pad te pegpalibed te nanam din?³⁵ Warad karuan due wey kenad egkahamit diye te tane wey ke ig-ebunu naa, sikan naa ka igdegpak e. Purisu, ke egkeupian kew ne egpakashabut, sumsumana niyu ay-ayari ke nekey ka narineg niyu!†”

15

Ka karniru ne natarin
(Mat. 18:12-14)

¹ Due sabeka ne timpu ne masulug ka me talagsukut te buhis wey me makasesale ne miggendiye te ki Hisus eyew te pegpammineg kandin.² Migbahulbul ka me Parisiyu wey ka me talagpanulu te Balaud te Manama. Migkahi sikandan, “Ka seini ne etew mig-al-alumama te me makasesale wey miglagpu kandan te egkeen!”³ Puun due, impangguhuran din sikandan te seini ne panung-gilingan:

⁴ “Panunggiling ke due sabeka kaniyu ne due mahatus (100) ne karniru ne

* **14:27** Iyan kaluwasan kayi ne minsan hentew ne kene egpakaantus te keyirapan wey minsan te kamatayen, ne eg-ikul ki Hisus, kene egkeyimu ne hibateen din. † **14:35** Te Grigu: Pammineg ka ke due talinga nu. **15:1** Luk 5:29-30.

natarinan te sabeka, nekey-a ka eggimuwen din? Engkeran din iya ka siyam ne pulu wey siyam (99) diye te eppanabtaban, wey egpammitawen din ka natarin ne karniru taman te egkakita rin.⁵ Ke egkakita rin e seini, egkahale iya sikandin wey egtiangen din e⁶ te eguli. Pegginguma rin diye te baley, epganginggaten din e ka me alukuy rin wey ka me sumbaley rin te egkahi, 'Eggale-gale ki su nakita kud e ka natarin ne ayam ku.'⁷ Iling naan ded degma due, egnanganan ku sikaniyu te subla pad ka kahalaan diye te langit tenged te sabeka ne makasesale ne eg-inniyug te sale din, du te siyam ne pulu wey siyam (99) ne me matareng ne kene egkeilangan ne eg-inniyug te sale.

Ka seleppi ne natarin

⁸ "Panunggiling ke due malitan ne due sapulu din ne pelata ne mahal wey natarinan te sabeka, nekey naa ka eggimuwen din? Epareket iya sikandin te sulu wey eppanlimas te baley rin, ne eppaay-ayaran din seeye te egpammitawen taman te egkakita rin.⁹ Ne emun ke egkakita rin e seini, egumawen din ka me alukuy rin wey me sumbaley rin te egkahi, 'Eggale-gale ki su nakita kud e ka natarin ne seleppi ku!'¹⁰ Iling naan ded degma due, egnanganan ku sikaniyu te igkahale te me panalihan te Manama ka

sabeka ne makasesale ne eg-inniyug te sale din."

Ka anak ne hendue te natarin

¹¹ Ne migpabulus si Hisus migkahi, "Due sabeka ne etew ne due anak ne daruwa ne neelin ne lukes.¹² Sabeka ne aldew, migkahi ka hari diye te amey, 'Ame, behayi ad e te keddiey ne baad te karatuan ta.' Ne imbaad e te amey ka karatuan din diye te daruwa ne anak din.¹³ Peglihad te pila ne aldew, imbelegye te hari ka kandin ne baad wey miggipanew sikandin diye te mariyu ne inged. Ne diye din us-usala ka seleppi din te ware karuan ne me himu.¹⁴ Te naamin din e te miggastu ka seleppi din, due miggingga ne masumpit ne bitil te seeye ne inged wey amana sikandin neilui te langun.¹⁵ Sikan naa, migweil-weil sikandin wey migtrabahu e diye te sabeka ne mahinged dutu wey impeendiye sikandin te unayan eyew eppatangguwen te me babuy.¹⁶ Ne puun su eggutasan e amana sikandin, egkeupian e perem sikandin ne egkeen te igsunggud te babuy, su ware minsan sabeka ne migbehey kandin te egkakeen.¹⁷ Te kata-manan, nakamaan-maan e sikandin te neyimu rin wey migkahi, 'Egkabayangan ka me suluhuanen te amey ku te egkakeen, piru egkapatey ad mule seini te gutas!¹⁸ Meupiya pad ke eg-awa a kayi wey eglibed a diye

te amey ku wey egkahiyan ku sikandin, "Ame, nakasala a te Manama wey due te keykew.¹⁹ Kena ad likes ne enggaranan e pad nikeykew ne anak nu. Isipe e naan de nikeykew ne sabeka ne suluhuanen nu."²⁰ Ne miggipanew e sikandin wey miggendiyad te amey rin.

"Piru te diye pad sikandin te mariyu, nakakite e ka amey ran kandin. Neyidu ka amey te anak din wey migpallahuy ka migsinung kandin wey migkep-kepan din wey miggarekan din ka anak din.²¹ Ne migkahi ka anak, 'Ame, nakasala a te Manama wey diye te keykew. Kena ad likes ne enggaranan e pad nikeykew te anak nu.'²² Piru migpangumew ka amey te me uripen din ne migkahi sikandin, 'Hendini kew! Uyana niyu kayi ka subla ne meupiya ne hinabel wey saluubi niyu sikandin wey saluubi niyu man-e te sising wey sepatusi niyu sikandin.²³ Ne kua niyu ka malambeg ne nati te baka wey himatayi niyu su egsahakeen ki.²⁴ Su seini se anak ku ne napatey e, neuyag ded; natarin sikandin ne nakite e.' Ne migbunsud e sikandan miggale-gale.

²⁵ "Te seeye ne timpu, diye te kamet ka kakey ne anak, wey eg-uli e degma. Te nakarani-rani e sikandin te baley ran, nakarineg sikandin te due eg-ulahing wey egsesayew.²⁶ Ne dutu,

in-umew rin ka sabeka te me suluhuanen wey mig-insaan, 'Nekey-a ka eggimuwen niyu due?'²⁷ Ne migtabak ka suluhuanen, 'Mig-uli ka hari nu wey ware ded sikandin namenu sikan naa, impeyimatayan te amey nu ka malambeg ne nati te baka.'²⁸ Nalangetan ka kakey wey kene egkeupian ne egseled te baley. Sikan naa ka miglihawang ka amey wey inlimlimuan din ka anak din.²⁹ Piru migtabak sikandin te amey rin, 'Kema Ame, sumsumana nu ke pila ne tuig ne migtrabahu a keykew iling te uripen, wey wara ad iya mig-apul te insuhu nu. Piru wara ad iya nikeykew behayi minsan nati naan de te kambing eyew eggale-gale a duma te me alukuy ku.³⁰ Piru te peg-uli mule te anak nu ne migdaat-daat te karatuan nu duma te me malitan ne egmamelegye te lawa, impeyimatayan nu pad sikandin te malambeg ne nati te baka.'³¹ Ne migtabak ka amey, 'Tatu, layun ku duma sikeykew, wey keykew degma ka langun ne keddiey.³² Ne keilangan ne egsahakeen ki wey eggale-gale ki su ka hari nu ne kahiyen ku ne napatey e, neuyag bes ded; natarin sikandin ne nakite e.'

16

*Ka panunggilingan
meyitenged te limbungen ne
sinalihan*

¹ Ne migpangguhuran e ni Hisus ka me hibateen din, "Due sabeka ne meyaman ne due sinalihan din. Due migsumbung diye te kandin ne migdaat-daatan kun te sinalihan din ka me karatuan din. ² Ne inumew rin ka sinalihan din wey migkahiyan, 'Nekey-a ka narineg ku meyitenged keykew? Behayi a te malehet ne guhuren meyitenged te impeuyan ku keykew ne karatuan, su kene kud eggsalihan sikeykew.' ³ Ne migkahi ka sinalihan diye te isip din, 'Egpaaween ad e te ahalen ku. Nekey buwad e se eggimuwen ku? Kene egkaayun ne egkekali a su kena a ne manekal wey egkeyilew a degma ne egpamuyu. ⁴ E, uya, seini bes ka eggimuwen ku su eyew ke egpaaween ad e te ahalen ku, duen ded me etew ne egpepamaneyik keddi diye te me baley ran.' ⁵ Ne impeumew rin ka langun ne nekeutang te ahalen din. Mig-insaan din ka hun-a, 'Pilaa ka utang nu diye te ahalen ku?' ⁶ Ne migtabak sikandin, 'Mahatus (100) ne lata ne lana.' Ne migkahi ka sinalihan, 'Seini red ka kentiddad. Dagdahew ka pinnuu wey lalimma ne pulu (50) de isulat nu.' ⁷ Ne mig-insaan din man-e ka ikarangeb, 'Ne sikeykew, pilaa ka utang nu?' Ne migtabak sikandin, 'Sabeka ne libu (1,000) ne saku ne trigu.' Ne migkahi ka sinalihan, 'Walu ne gatus

(800) de isulat nu.' ⁸ Indeyrey te ahalen ka limbungen ne sinalihan su egkateu ne egpaney-paney meyitenged te keuyahan din. Su ka kalibutanen ne me etew, subla pad ne egkateu ne egpeup-upianey te me iling dan ded du te me etew ne diye te malayag."

⁹ Ne migpabulus si Hisus migkahi, "Kuntee egnanganan ku sikaniyu te gamita niyu ka me karatuan niyu kayi te inged eyew due me alukuy niyu, su eyew ke egkaamin e seini, egdawaten kew red nikandan diye te ugpaan ne ware egtamanan. ¹⁰ Minsan hentew ne egkasalihan te deisek, egkasalihan degma te dakel; wey minsan hentew ne eglilimbung te deisek, eglilimbung degma te dakel. ¹¹ Ne emun ke kene kew egkasalihan te karatuan kayi te ampew te tane, hentew naa degma ka egsalig kaniyu te malehet ne karatuan diye te langit? ¹² Ke kene kew egkasalihan te kasangkapan te duma, hentew naa ka egbehey kaniyu te kasangkapan ne kaniyud e?

¹³ "Ware etew ne egkeyimu ne uripen te daruwa ne ahalen, su egdumutan din ka sabeka ne ka dangeb eggeynawaan din. Egdapihan din ka sabeka wey ka dangeb eglemetan din. Ne iling naan ded due, kene egkaayun ne egpeuripen kew te daruwa, te Manama wey te seleppi."

Ka duma ne me pang-guhuren ni Hisus

(Mat 11:12-13; Mar. 10:11-12)

¹⁴ Narineg seeye langun te me Parisiyu wey migdalian dan si Hisus su iyan dan indakelan ka seleppi. ¹⁵ Ne migkahiyan ni Hisus sikandin, “Egpapitew-pitew kew re diye te me etew ne meupiya kew, piru nakanengneng ka Manama te pusung niyu. Su ka amana igkatalesi te me etew, amana igkeepes te Manama.

¹⁶ “Ka Balaud te Manama wey ka sinulat te me prupita, in-ikul taman de te timpu ni Huwan ne Tagalbewutismu. Pegkapenga dutu, inwali e ka Meupiya ne Panugtulen meyitenged te Peghari te Manama, wey migpakannekal ka tagse etew te pegseled kayi. ¹⁷ Piru malemu pad ne egkaawe ka langit wey ka tane, du te egkeyimu ne ware karuan ka deisek ne baad te Balaud te Manama.

¹⁸ “Minsan hentew ne engked te asawa rin wey egbalew-balew eg-asawa, eg-pakapanlibug e. Ne ka lukes ne eg-asawa te malitan ne inengkeran, egpakapanlibug degma.

Ka meyaman wey si Lasaru

¹⁹ “Due sabeka ne meyaman ne migsaluub te kumbale ne ubi se batek wey mahal, wey egsahakeen

sikandin te mangune-kune te tagse aldew. ²⁰ Due degma egkaayu-ayu ne egngararan ki Lasaru ne neempet te kehang ka lawa rin. In-uyan sikandin diye te gumawan te baley te meyaman, ²¹ su egkeupian ubag sikandin ne egpakakeen te egkengeulug ne mummu puun te lamisa te meyaman. Migparaniyan sikandin te me asu wey impandilaan ka me kehang din. ²² Te katamanan, migpatey si Lasaru wey in-uyan sikandin te me panalihan te Manama diye te kakiliran ni Abraham. Migpatey degma ka meyaman wey inlebeng. ²³ Imbaybayaran sikandin diye te inged te me gimukud ne egngararan te Hadis, wey migleng-ag sikandin wey nakita rin si Abraham diye te mariyu wey si Lasaru diye te kakiliran din. ²⁴ Ne migpanguleyi ka meyaman ne migkahi, ‘Apu Abraham! Ikeyid-u a nikeykew wey suhua nu si Lasaru ne igtinduk din ka kemel rin te weyig wey egpatihisan ka dile ku eyew egmaagsil ubag, su mangune-kune ka pegantus ku te keinit te seini se hapuy!’ ²⁵ Piru migtabak si Abraham, ‘Mengeanak, sumsumana nu te diye ke pad te ampew te tane ne narawat nu ka langun ne me meupiya, piru si Lasaru mareet mule se natamtamanan. Piru kuntee nahale e sikandin kayi, wey sikeykew eg-antus ka due. ²⁶ Ne igkarangeb,

due seini se eletanan ta ne maralem, eyew ka etew kayi kene egpekeendue wey ka etew due kene egpekeendini.’²⁷ Ne migtabak ka meyaman, ‘Apu, ke iling due, eghangyu a keykew ne ipeendiye nu pa ubag si Lasaru te ugpaan te ameyku,²⁸ su duen pad suled ku ne lalimma ne neelin ne lukes. Peendiya nu sikandin eyew egkapanpanayan sikandan wey eyew kene egpekeendini kayi te inged ne mangune-kune se pegbayad-bayad.’²⁹ Piru migtabak si Abraham, ‘Mani naa su diye ded ka sinulat ni Muwisis wey te me prupita. Sikandan e ka mateu ne egpammineg dutu.³⁰ Ne migtabak ka meyaman, ‘Piru apu Abraham, kene pad ne eleg sika. Piru ke due perem egkeuyag ne eggendiye te kandan, eg-inniyuhan dan iya ka me sale dan.’³¹ Piru migkahi si Abraham, ‘Emun ke kene sikandan egpammineg te sinulat ni Muwisis wey te me prupita, kene ded iya man-e sikandan egkeuyan minsan pad due migpatey ne egkeuyag.’”

17

Ka sale
(Mat 18:6-7, 21-22; Mar. 9:42)

¹ Ne ingkahiyan ni Hisus ka me hibateen din, “Ka etew eggingumaan iya te me pegt-intal, piru mekeyid-u-hid-u ka etew ne egpuunan kayi.

17:3 Mat 18:15.

² Meupiya pad ke eggiketan ka lieg din te dakel ne galin-gan ne batu wey igdegpak diye te dahat, du te sikandin ka egpuunan ne egpakasale ka sabeka te seini se me bate.³ Sikan naa, tanud-tanud kew!

“Ke egpakasale ka duma nu, sapari nu sikandin; wey ke eg-inniyug te sale, pasayluwa nu.⁴ Ke kapapitu sikandin egpakasale keykew te sabeka ne aldew, wey kapapitu degma sikandin eglibed wey egbuyu te pasaylu diye te keykew, keilangan ne egpasayluwen nu sikandin.”

Ka pegpalintutuu

⁵ Ne migkahi ka me apus-tulis diye te kandin, “Magbe-baye, timuli nu ka pegpalintutuu ney.”⁶ Ne migtabak ka Magbebeye, “Ke due peg-palintutuu niyu minsan iling kareisek te behas te mustasa, egpakasuhu kew te seini ne kayu, ‘Kabarut ka wey halin ka diye te dahat!’ wey egpal-intutuu iya seini kaniyu.

Ka himu te suluhuanen

⁷ “Panunggiling ke due sabeka kaniyu ne due suluhuanen ne migdaru wey ke migtanggu te me ayam. Ke sikan pad iya sikandin egginguma puun te kamet, egkahiyen nu naa sikandin, ‘Hendini kad wey keen kad?’⁸ Kene iya! Ke kene, nasi nu sikandin egkahii, ‘An-dami a te iglabung ku, wey sendari a. Ke egpakapenga

ad, human ke pa keen.'
 9 Egpasalamatan nu naa ka suluhuanen nu puun su migpalintutuu sikandin te insuhu nu? Kene iya!
 10 Ne iling kew red degma, ke egkapengaan niyud e ka langun ne insuhu kaniyu, kahi kew, 'Me suluhuanen key re, wey innimu ney re ke nekey ka impeyimu kanami.'

Ka pegbawi ni Hisus te sapulu ne ibungen

11 Te sasangan pad ne eggipanew si Hisus peendiye te Hirusalim, miglihad sikandin te eletanan te Samarya wey Galiliya. 12 Te epalinggumaan e sikandin te sabeka ne bariyu, due migsinug-ung kandin ne sapulu ne ibungen. Diye de sikandan nanasindeg te madmariyu 13 wey migpan-guleyi sikandan, "Hisus ne Magbebaye! Ikeyid-u key nikeykew!"

14 Pegkakita ni Hisus kandan, migkahiyan din sikandan, "Hendiye kew te me talagpanubad wey papitew kew kandan." Te nangipanew e sikandan, neneulian dan e diye te deralanen. 15 Pegkakita te sabeka kandan ne neu-lian e sikandin, miglibed e sikandin wey migpanguleyi ka migdayan te Manama. 16 Migpanimbuel sikandin diye te tangkaan ni Hisus wey migpasalamat kandin. Matig-Samarya ka seeye ne

etew. 17 Ne migkahi si Hisus, "Sapulu niyu ma te neulian; hendei naan e ka siyam? 18 Mania te ware sikandan miglibed eyew epgasalamat te Manama, ne iyan de iya seini se kene ne mahinged kayi?" 19 Ne migkahiyan ni Hisus sikandin, "Sasindeg ka wey hipanew kad e. Iyan nekeuli keykew ka pegpalintutuu nu."

*Ka Peghari te Manama
(Mat. 24:23-28, 37-41)*

20 Due me Parisiyu ne mig-inse ki Hisus ke ken-u egginguma ka Peghari te Manama. Migtabak sikandin kandan, "Ware palinneu ne iyan tuus te pegginguma te Peghari te Manama. 21 Ware epakakah, 'Pitew kew, sein ded!' wey ke 'Seeye ded!' Su ka Peghari te Manama duen e te kaniyu."

22 Ne migkahiyan din ka me hibateen din, "Egginguma ka timpu keureme ne egkeupian kew ne egtengteng te Anak te Etew minsan senge ka aldew re perem, piru kene kew epakakita kayi. 23 Due me etew ne egkahi kaniyu, 'Pitew kew, diye sikandin!' wey ke 'Kayi sikandin!' Piru kene kew hendiye wey ikul kandan. 24 Su ka peglibed te Anak te Etew egpekeil-ing te kilat ne eggeteb ne epakatulis ka layag diye te langit. 25 Piru hun-a te langun, keilangan ne eg-antus sikandin wey egsamsamilian

te me etew te kuntee ne timpu.²⁶ Su ka pegginguma te Anak te Etew egpekeiling te neyitabu te timpu ni Nuwi.²⁷ Migpabulus ka me etew ne nangeeken wey nangiinum wey migmaas-asaweey taman te aldew ne migseled e ensi Nuwi diye te arka. Nataman, migsipuk e ka weyig wey nalened ka langun ne etew.²⁸ Egpekeiling ded degma te timpu ni Lut. Ka langun ne etew migpabulus nangeeken wey nangiinum, wey nambebeli wey nambelegye, migmammula wey nambebaley.²⁹ Te aldew ne mig-awe e si Lut te Suduma, mig-uranan seeye te hapuy wey te me batu ne egkalegleg ne enggararan te asupri ne miggule te langun ne me etew.³⁰ Iling degma due ka egkeyitabu te aldew ne egpakte e ka Anak te Etew.

³¹ “Te seeye ne timpu, seeye se etew ne diye te atep te baley rin, * keilangan ne kenad e egpamanueg eyew egkuwa te me kasangkapan din diye te seled. Ne seeye degma se diye te kamet, keilangan ne kenad e eg-uli.³² Tantanuri niyu ka neyitabu te asawa ni Lut![†]³³ Seeye se egkeupian ne egluwastekandin ne umul, nasi egkawaraan kayi, piru seeye

se egkawaraan te kandin ne umul, egpaketawat te umul ne ware egtamanan.³⁴ Te seeye ne karusileman, due daruwa ne etew ne migpewulirey ka miggibat; eg-angayen ka sabeka wey eggaaten ka dangeb.³⁵⁻³⁶ Ke due daruwa ne malitan ne eggehaling; eg-angayen ka sabeka wey eggaaten ka dangeb.[‡]

³⁷ Ne mig-inse ka me hibateen din, “Magbebaye, hendei sika egkeyitabu?”

Ne migtabak sikandin, “Ke hendei ka lawa ne napatey, diye degma eglibulung ka me banug.”

18

*Ka panunggilingan
meyitenged te balu wey huwis*

¹ Ne migpangguhuran ni Hisus ka me hibateen din te sabeka ne panunggilingan eyew te pegpanulu kandan ne keilangan ne layun egampu wey kene egkapelaan.

² Ne migkahi si Hisus, “Diye te sabeka ne siyudad, due sabeka ne huwis ne kene egkaaldek te Manama wey kene egtahud te minsan hentew ne etew.³ Te seeye ne siyudad, due degma balu ne malitan ne layun eglibedlibed eggendiye te huwis eyew te pegpepangabang te kandin ne kasu. Migkahi

17:27 Hin 7:6-24. **17:28** Hin 18:20-19:25. **17:31** Mat 24:17-18; Mar 13:15-16.

* **17:31** Mapatag ka atep te me Hudiyu. **17:32** Hin 19:26. † **17:32** Ka asawa ni Lut neyimu ne sungkaleg ne asin. (Hin. 19:26) **17:33** Mat 10:39; 16:25; Mar 8:35; Luk 9:24; Huw 12:25. ‡ **17:35-36** Due me sinulat ne inlagkes ka birsikulu 36 piru ware seini diye te malehet ne migpuunan. Intimul naan de seini ne miggendue: Ke due etew ne daruwa diye te kamet; eg-angayen ka sabeka wey eggaaten ka dangeb.

ka balu, ‘Pangabangi a nikeykew su due me kuntere ku!’⁴ Te an-anayan migkene-kene ne egpangabang ka huwis, piru te katamanan nakakahi sikandin diye te geyinawa rin, ‘Minsan kena a egkaaldek te Manama wey te me minsan hentew,⁵ piru tenged su layun eglibed-libed ka balu kayi te keddi, egpangabangan kud e. Su kema ke egkeupul ad tenged te peglibed-libed din.’”

⁶ Ne migkahi ka Magbebaye ne si Hisus, “Sumsumana niyu ka inlalag te huwis minsan kene din ne matareng.⁷ Na, kene naa degma egpangabangan te Manama ka me etew ne inalam din ne migpangananey te aldew wey marusilem? Eglamu-lamu naa ka Manama ne egpangabang kandan?⁸ Egnanganan ku sikaniyu, egdagdahawan din te egpangabang sikan-dan. Piru te peglibed te Anak te Etew, duen bu red egkakita rin ne me etew kayi te ampew te tane ne due pegpalintutuu?”

*Ka panunggilingan
meyitenged te Parisiyu wey
talagsukut te buhis*

⁹ Due me etew ne migsusuman-suman ne matareng en iya sikandan, wey migdew-ey te duma. Ne puun due, migpangguhan sikandan ni Hisus te seini ne panunggilingan.¹⁰ “Due daruwa ne etew ne miggendiye te timplu eyew

te pegampu. Ka sabeka Parisiyu wey ka dangeb talagsukut te buhis.¹¹ Ne migsasindeg ka Parisiyu ne mig-ampu te kandin, ‘Migpasalamat a keykew Manama ne kena a ne iling te duma ne leheren, limbungen, wey egpanlibug. Migpasalamat a ne kena a man-e ne iling te sika se talagsukut te buhis.¹² Ne egpuasa a man-e te daruwa ne aldew tagse simana, wey egbehey a te igkasapulu te langun ne egkaseleppi ku.¹³ Piru ka talagsukut te buhis diye de migsasindeg te mariyu wey ware sikandin migleng-ag diye te langit. Piru impandabi rin de mule ka kumeng din tenged te pegkalaggew wey migkahi, ‘Manama, ikeyid-u a nikeykew se makasesale!¹⁴ Na, egnanganan ku sikaniyu te sikandin ka inisip te Manama ne matareng te peg-uli din, kene ne seeye se Parisiyu. Su ka minsan hentew ne egparibabew te pegkeetew rin, igpariralem, piru minsan hentew ne egpariralem te pegkeetew rin, igparibabew.”

*Ka pegpanalangin ni Hisus
te me bate
(Mat. 19:13-15; Mar.
10:13-16)*

¹⁵ Due me etew ne miguyan te me anak dan diye te ki Hisus eyew igpasamsam kandin. Pegkakita dutu te me hibateen, insaparan

dan sikandan. ¹⁶ Piru im-peparani ni Hisus ka me bate wey migkahiyan din ka me hibatee din, “Balahara niyu re due ka me bate ne egparani keddiey wey kene niyu sikandan sapari, su nasakup te Migharian te Manama ka me bate ne iling kayi. ¹⁷ Egnanganan ku sikaniyu te malehet: emun ke kene niyu egdawaten ka Peghari te Manama iling te pegdawat te me bate, kene kew iya egpakalagkes dutu.

*Ka meyaman ne etew
(Mat. 19:16-30; Mar. 10:17-31)*

¹⁸ Mig-inse ka sabeka ne pangulu te me Hudiyu diye te ki Hisus, “Meupiya ne talagpanulu, nekey-a ka eggimuwen ku eyew egkarawat ku ka umul ne ware egtamanan?”

¹⁹ Ne migtabak si Hisus kandin, “Mania te inggaranan a nikeykew te meupiya? Sabeka re ka meupiya, ka Manama. ²⁰ Nakanengneng kad e te me suhu: ‘Kene ka panlibug, kene ka himatey, kene ka panakew, kene ka pamalehet te ubat, wey tahura nu ka amey nu wey iney nu.’”

²¹ Migtabak ka etew, “In-tantanuran kud sika langun ligkat te pegkabatei ku.”

²² Te pegkarineg ni Hisus kayi, migkahiyan din ka etew, “Sabeka naan de ka ware nu pad neyimu. Ibele-gey nu ka langun ne karatuuan

nu, wey ipamehey nu ka halin diye te egkengaayu-ayu eyew due karatuuan nu diye te langit. Ne egkataman, libed ka kayi wey ikul ka keddi.” ²³ Piru te pegkarineg dutu te etew, miglungku sikandin su subla ne meyaman sikandin.

²⁴ Ne migtengtengan ni Hisus ka etew ne miglungku wey migkahi, “Amana ne malised te me meyaman ka pegseled te Migharian te Manama! ²⁵ Malemu pad ka pegserep te ayam ne kamilyu diye te lungag te simat du te pegseled te meyaman diye te Migharian te Manama.”

²⁶ Ne mig-inse seeye se nakarineg dutu, “Hentew bes naan de ka egkaluwas?”

²⁷ Ne migtabak si Hisus, “Ka kene egkeyimu te etew, egkeyimu te Manama.”

²⁸ Ne migkahi si Pidru, “Na, sikanami seini, migengkeran ney ka langun ne kanami eyew te peg-ikul keykew.”

²⁹ Ne migkahiyan sikandan ni Hisus, “Egnanganan ku sikaniyu te malehet: ka min-san hentew ne eg-engked te baley rin, wey ke asawa rin, me suled din naa, wey ke amey wey iney rin, me anak din naa tenged te Peghari te Manama, ³⁰ egpakaangken te subla pad te seini ne timpu. Te egginguma ne timpu, eg-pakarawat sikandin te umul ne ware egtamanan.

Ka pegguhud ni Hisus te kamatayen din te igkatedu ne timpu

(Mat. 20:17-19; Mar. 10:32-34)

³¹ Impasuwey ni Hisus te me etew ka sapulu wey daruwa (12) ne hibateen din wey migkahiyan din, "Pammineg kew! Eggendiye kid e te Hirusalim ne egkatuman e ka langun ne insulat te me prupita meyitenged te Anak te Etew. ³² Ne igbehey sikandin diye te kene ne me Hudiyu, wey eglemetan sikandin wey egpeyilawan, wey eg-il-ileban sikandin. ³³ Eglampesan sikandin wey eggimatayan, piru egkeuyag sikandin te igkatedu ne aldew."

³⁴ Piru ware nakasabut ka me hibateen te igapasabut dutu, su inneles kandan ka kaluwasan te inlalag din.

Ka pegbawi ni Hisus te butud

(Mat. 20:29-34; Mar. 10:46-52)

³⁵ Te nakarani-rani e si Hisus diye te inged ne Hiriku, due sabeka ne butud ne migpinnuu diye te ilis te dalan ka egpamuyu. ³⁶ Te nakarineg sikandin te due masulug ne etew ne eglihad, mig-inse sikandin, "Nekey-a ka rue?"

³⁷ Migkahi ka me etew diye te kandin, "Eglihad si Hisus ne matig-Nasarit."

³⁸ Seeye naa, migpanguleyi sikandin ne migkahi, "E Hisus! Kabuhalan ni Dabid! Ikeyid-u a nikeykew!"

³⁹ Ne insaparan sikandin te me etew ne migguna ne egpeen-enengen e, piru nanasnasion de iya sikandin migpanaman-taman migpanguleyi ne migkahi, "Kabuhalan ni Dabid! Ikeyid-u a nikeykew!"

⁴⁰ Migsanggel si Hisus wey insuhu ne eg-uyanen ka butud diye te kandin. Te nakarani-rani e ka butud, mig-insaan e sikandin ni Hisus, ⁴¹ "Nekey-a ka igkeupii nu ne eggimuwen ku due te keykew?"

Migtabak sikandin, "Mag-bebaye, egkeupian a perem ne egpakkite e pad."

⁴² Ne migkahiyan sikandin ni Hisus, "Egpakkita kad e! Iyan nekeuli keykew ka pegpalintutuu nu."

⁴³ Ne sahuhune ne nakakite e sikandin wey migsinundul e ki Hisus, wey indayan din ka Manama. Ka langun ne etew ne nakakita dutu, migdayan degma sikandan te Manama.

19

Si Hisus wey si Sakiyu

¹ Ne migpabulus si Hisus diye te inged ne Hiriku wey eglihad de. ² Ne diye, due sabeka ne meyaman ne egngararan ki Sakiyu, ne pangulu te talagsukut te buhis ³ ne egkeupian ne egpitew ki Hisus. Piru ware sikandin nakakita kandin su masulug amana ka me etew wey malibutut sikandin. ⁴ Seeye naa, migpallahuy sikandin ka migguna wey

migpamaneyik te kayu ne enggaranan te sikumuru eyew epakakita sikandin ki Hisus su diye iya sikandin egbaye. ⁵ Te nakalenged e si Hisus dutu, migleng-ag sikandin wey migkahi, "Sakiyu, mahaan ka rue! Pamaneug ka su keilangan ne diya a kuntee eggunguma te baley nu."

⁶ Migdagdahew migpamanueg si Sakiyu wey mig-alumama ki Hisus ne nahale-gale.

⁷ Pegkakita dutu te me etew, migbahulbul sikandan langun ne migkahi, "Etuwey, iyan din mule egpanumbalan ka etew ne makasesale!"

⁸ Ne migsasindeg si Sakiyu wey migkahi, "Magbebeye, pammineg ka! Igbehey ku ka baad te karatuan ku diye te me etew ne egkaayu-ayu, wey ke due nalimbungan ku, eg-ulian ku sikandin te hep-at ne lupi."

⁹ Ne migkahiyan sikandin ni Hisus, "Seini ne aldawa miggungumaan te kaluwasan ka seini ne baley, su kabuhalan ka degma ni Abraham. ¹⁰ Su iyan innendini te Anak te Etew eyew te pegpammitew wey pegluwas te natarin."

*Ka panunggilingan te tatelu ne suluhuanen
(Mat. 25:14-30)*

¹¹ Nataman, migpangguhu-ran ni Hisus te panunggilingan ka me etew ne egkali-het pad ne egpammineg kandin, su egpalinggaan

e sikandan te Hirusalim wey nangen te me etew ne mahaan e eggunguma ka Peghari te Manama. ¹² Sikan naa ka migkahi si Hisus, "Due sabeka ne talahuren ne etew ne miggipanew te mariyu ne inged eyew egdawat te katenged te peghari diye te inged din, wey eg-uli ded sikandin. ¹³ Te ware pad sikandin miglikat, impeumew rin ka sapulu ne suluhuanen din wey ka tagse sabeka impamehayan din te seleppi ne bulawan wey migkahiyan din sikandan, 'Paanaka niyu seini te kene e pad eg-uli.' ¹⁴ Piru igkeepes-epes sikandin te me etew te seeye ne inged. Seeye naa, migsuhu sikandan te egpasinundulen kandin diye te innendiyaan din wey egpakahiyan te kene sikandan egkeupian ne eghari sikandin kandan.

¹⁵ "Piru neyimu iya sikandin ne Hari, ne nataman, mig-uli ded iya sikandin wey impeumew rin e ka me suluhuanen ne impamehayan din te seleppi, eyew egkanengnengan din ke pila ka anak te seleppi din diye te kandan. ¹⁶ Ka an-anayan miggendiye wey migkahi, 'Ahalen, mig-anak te sapulu ne lupi ka seleppi ne imbehey nu keddi.' ¹⁷ Ne migkahi ka Hari, 'E, meupiya. Meupiya ka ne suluhuanen. Tenged su egkasalihan ka te dereisek de, egbehayan ku sikeykew te katenged

ne egmandu te sapulu ne siyudad.'¹⁸ Miggunguma degma ka igkarangeb ne suluhuanen wey migkahi, 'Ahalen, mig-anak te lalimma ne lupi ka seleppi ne imbehey nu keddi.'¹⁹ Ne migkahi ka ahalen diye te kandin, 'Puun due, egbehayan ku sikeykew te katenged ne egmandu te lalimma ne siyudad.'

²⁰ Miggunguma degma ka igkatelu ne suluhuanen wey migkahi, 'Ahalen, seini red ka seleppi nu ne imbehey nu keddi. Imbugsung ku seini te manggad,²¹ su naaldek a keykew puun su mabulut ka amana. Egkuwa ka te kene ne keykew wey eggani ka te ware nu ibubul.'²² Ne migkahi ka ahalen diye te kandin, 'Mareet ka ne suluhuanen! Iyan ku red iggukum keykew ke nekey ka inlalag nu. Nakanengneng ke bes te mabulut a wey migkuwa a te kene ne keddi wey miggaani a te ware ku ipamula.²³ Na, mani naa te ware nu itahu diye te bangku ka seleppi ku eyew te peg-uli ku egkaangey ku red seini duma te anak kayi?²⁴ Ne migkahiyan din ka me etew ne nanasindeg diye, 'Kua niyu ka seleppi due te kandin wey ibehey niyu diye te nakaseleppi te sapulu ne lupi.'²⁵ Piru migkahiyan dan sikandin, 'Ahalen, duen man-e seleppi din ne sapulu!'²⁶ Ne migtabak sikandin, 'Egnanganan ku sikaniyu te

seeye se due kandin, egtimulan pad. Piru seeye se ware kandin, eg-angayen minsan ka deisek ubag ne in-isip din ne kandin perem.²⁷ Piru meyitenged te me kuntere ku ne kene egkeupian ne eghari a kandan, uyana niyu sikandan wey pangimatayi niyu kayi te tangkaan ku!'"

Ka meupiya ne pegginguma ni Hisus diye te Hirusalim

(Mat. 21:1-11; Mar. 11:1-11; Huw. 12:12-19)

²⁸ Te nekeimpus e si Hisus ka migpangguhud, migpabulus sikandin migpatakereng peendiye te Hirusalim, wey miggun-a sikandin kandan.²⁹ Te egpalinggu-maan sikandan te inged ne Bitpahi wey te Bitanya ne diye te Bubungan te Ulibu, impewun-e e ni Hisus ka daruwa te me hibateen din³⁰ wey migpanagtahaan din, "Hendiye kew seeye te kewun-aan ne bariyu. Te egpekeuma kew e, due egkakita niyu ne nati te asnu ne inniket ne ware pad neunturi te minsan hentew. Hekari niyu naa seeye wey uyana niyu kayi.³¹ Ne emun ke due eg-inse kaniyu, 'Mania te eggekaran niyu sika?' kahii niyu re, 'Ingkeilangan seini te Magbebaye!'"

³² Sikan naa, nangipanew e ka insuhu wey natuman iya ka langun ne innangen ni Hisus kandan.³³ Te egkalihet pad sikandan ne eggekad

te nati te asnu, mig-insaan sikandan te kamuney, "Hey, mania te eggekaran niyusika?"

³⁴ Ne migtabak sikandan, "Ingkeilangan seini te Magbebaye." ³⁵ Ne in-uyan dan e seeye diye te ki Hisus, wey innagpiyan dan te me kumbale dan, wey impeuntud e si Hisus. ³⁶ Te mig-untud e si Hisus, imbelatan te me etew te me kumbale dan ka dalam ne egbayaan din.

³⁷ Te egpatupang e sikandin te Bubungan te Ulibu ne marani e te Hirusalim, nahale-gale ka langun ne hibateen din wey migdayan te Manama ne migmanguleyi tenged te langun ne me kein-inuwan ne nakita ran. ³⁸ Migkahi sikandan, "Egdayanen ka Hari ne impeendini te Magbebaye ne Manama kanta! Keupianan diye te langit wey egdayanen ka Manama!"

³⁹ Due me Parisiyu ne nakasewug diye te masulug ne me etew ne migkahi, "Talagpanulu, sapari nu ka me hibateen nu!"

⁴⁰ Ne migtabak si Hisus diye te kandan, "Egnangan ku sikaniyu ne meyi egpeeneng-eneng sikandan, iyan e mule egbalbalukan ka me batu."

Ka pegsinehew ni Hisus tenged te Hirusalim

⁴¹ Te egpaliggingumaan e si Hisus te Hirusalim wey te

nakita rin e seini, migsinehew e sikandin⁴² ne migkahi, "Me matig-Hirusalim, me-upiya pad perem ke nanengnengan niyud kuntee ke nekey ka egpakabehey kaniyu te keupianan! Piru, ware pad napuwasan ka isip niyu. ⁴³ Egginguma ka aldew keureme ne egbalabahan kew wey eglingutan te me kuntere niyu, wey eg-asaseken kew nikandan te eglusud. ⁴⁴ Egguhusen dan ka siyudad niyu wey egguleen kew nikandan. Ne warad iya minsan sabeka naan de ne batu ne egkasame diye te neunturan kayi, su ware niyu ilaa ka timpu te pegluwas perem te Manama kaniyu."

Ka peggendiye ni Hisus te timplu

(Mat. 21:12-17; Mar. 11:15-19; Huw. 2:13-22)

⁴⁵ Pegginguma ran diye te Hirusalim, migseled si Hisus te timplu wey impandeldel rin ka egmanitinda ⁴⁶ wey migkahiyan sikandan, "Nasulat e diye te Kasulatan, 'Ka baley ku egngararan te baley ne ampuanan', piru innimu niyud e seini ne helesanan te me takawen!"

⁴⁷ Tagse aldew migpanulu si Hisus diye te timplu. Ka me pangulu te me talagpanubad, ka me talagpanulu te Balaud te Manama, wey ka me pangulu te me etew, migpammitew te paahi te peggimatey kandin. ⁴⁸ Piru

kene sikandan egpakasellat te eggimuwen dan, su ka langun ne me etew, amana ne neupian ne egpammineg te inlalag ni Hisus.

20

*Ka peggubabe meyitenged te katenged ni Hisus
(Mat. 21:23-27; Mar. 11:27-33)*

¹ Sabeka ne aldew taheed te migpanulu si Hisus te me etew wey migwali te Meupiya ne Panugtulen diye te timplu, migparani kandin ka me pangulu te me talagpanubad wey ka me talagpanulu te Balaud te Manama wey ka me igbuyag te me Hudiyu ² wey migkahi, "Nangeni key ke nekey ka katenged nu te peggimu kayi? Hentewa ka migbehey keykew te katenged te peggimu kayi?"

³ Ne migtabak si Hisus kandan, "Due degma inse ku kaniyu. Nangeni a ⁴ ke hendei migpuun ka katenged ni Huwan te pegpamewutismu? Diye naa te Manama wey ke diye te me etew?"

⁵ Ne migpalalahey sikandan ne migkahi, "Emun ke egkahi ki, 'Diye migpuun te Manama', kema ke egkahiyan ki nikandin, 'Na, mania te ware kew migpalintutuu ki Huwan?' ⁶ Piru ke egkahi ki, 'Diye migpuun te me etew', ne egbatuwen ki te me etew su migpalintutuu iya sikandan ne prupita si

Huwan." ⁷ Purisu migtabak sikandan ki Hisus, "Ware key nakanengneng ke hendei migpuun."

⁸ Ne migkahiyan sikandan ni Hisus, "Ke iling ma rue, kene ku degma egnangan sikaniyu ke nekey ka katenged ku te peggimu kayi."

Ka panunggilingan meyitenged te talagtanggu te parasan

(Mat. 21:33-46; Mar. 12:1-12)

⁹ Ne migpangguhuran ni Hisus ka me etew te seini ne panunggilingan: "Due sabeka ne etew ne migpamula te me prutas ne egngararan te paras wey migpatanggu rin e te me talagbasuk. Ne miglapu e sikandin diye te mariyu ne inged te naluhey ne timpu.

¹⁰ Te pegginguma te timpu te pegpamupu te me behas, migsuhu sikandin te sabeka ne uripen din eyew egpakuun te baad din te prutas diye te me talagtanggu. Piru inlelampesan te me talagtanggu ka uripen wey impeuli dan ne ware inuyanan.

¹¹ Ne migsuhu e man-e ka kamuney te lein ne uripen, piru inlelampesan ded te me talagtanggu wey impeylawan dan, wey impeuli ne ware inuyanan. ¹² Ne migsuhu man-e sikandin te igkatedu ne uripen din. Inggumian ka uripen wey inggehanuy diye te lihawangan te parasan.

¹³ Migkahi

e ka kamuney te parasan, ‘Nekey buwad ka eggimuwen ku? E uya, igpeendiye ku ka pinanglangge ku ne anak ne lukes, su kema ke egtahuren dan sikandin.’¹⁴ Piru te pegkakita te me talagtanggu te anak din, migpalalahey e sikandan, ‘Sikan e ka anak te kamuney te parasan ne iyan egpakakamuney kayi. Eggimatayan ta sikandin eyew sikante e ka egpakakamuney kayi.’¹⁵ Ne inggehanyu ran e sikandin diye te lihawangan te parasan wey inggimatayan dan e.”

Mig-inse si Hisus, “Nekey naa ka eggimuwen te kamuney te parasan diye te me talagtanggu?¹⁶ Eggendiyaan din ka me talagtanggu wey epangimatayan din sikan dan, wey egpasubalan din ka parasan te duma.”

Te pegkarineg dutu te me etew, migkahi sikandan, “Suwang-suwang!”

¹⁷ Piru migtengtengan ni Hisus sikandan wey migkahi, “Nekey naa ka kaluwasan te seini ne insulat: ‘Ka batu ne insamsamilian te me talagbebaley, nasi neyimu ne batu ne pabunsuran.’

¹⁸ Ka langun ne egkeulug ne egdeeg te seeye ne batu, egkallepuan, piru ka egkeuluhan te seeye ne batu, egkallupet iya.”

Ka inse meyitenged te pegbayad te buhis
(Mat. 22:15-22; Mar. 12:13-17)

20:17 Sal 118:22.

¹⁹ Te seeye ne timpu, egdakepen e perem si Hisus te me talagpanulu te Balaud te Manama wey te me pangulu te me talagpanubad, su nasabut dan ne sikandan ka innisuhat din te panunggilingan. Piru naaldek sikandan te me etew.²⁰ Seeye naa, migtantanuran naan de sikandin wey impeendiyaan te me etew ne egpeiipaten. Egpeubatan sikandan ne meupiya se tuyu dan wey egpepammitawen te seyyup te impanlalag din, su eyew igkasumbung dan sikandin diye te gubirnadur wey egpewukuman.²¹ Ne mig-inse ki Hisus seeye se me talag-iipat, “Talagpanulu, nakanengneng key ne malehet ka ingkahi nu wey impanulu. Nakanengneng key ne ware impalaphian nu, ke kene, impanulu nu ka kamalehetan meyitenged te igkeupii te Manama te me etew.²² Na, nangeni key ke supak naa te Balaud ta ka pegbayad te buhis diye ki Sisar ne Impiradur, wey se kene?”

²³ Piru natahaan ni Hisus ne egsahiluten de sikandin, sikan naa ka migkahiyan din sikandan,²⁴ “Papitawa a nikaniyu te seleppi. Hentew ne alung wey ngaran ka nakatahu kayi?”

²⁵ Migtabak sikandan, “Ki Sisar ne Impiradur.”

Ne migkahi si Hisus, “Ke iling due, ibehey niyu diye te Impiradur ka kandin, wey

ibehey niyu degma diye te Manama ka kandin."

²⁶ Ne ware iya sikandan nakasahilut kandin diye te tangkaan te me etew. Ne migpeeneng-eneng naan de sikandan, su neinu-inu sikandan te tabak ni Hisus.

Ka inse meyitenged te pegkeuyag

(Mat. 22:23-33; Mar. 12:18-27)

²⁷ Ne due me etew ne me Sadusiyu ne migparani ki Hisus. Sikandan ka migkahi ne kenad egkeuyag ka me minatey. Ne mig-insaan dan si Hisus, ²⁸ "Talagpanulu, migsulat si Muwisis kanta te balaud ne emun ke due etew ne egpatey ka kakey rin ne ware pad nakaanak, keilangan ne egpamaluwen din ka ipag din eyew duen ded anak te kakey rin ne migpatey e." ²⁹ Na, due pitu ne taltalaari ne neelin ne lukes. Nakaasawa ka panganey wey migpatey ne ware nakaanak. ³⁰ Ne impamalu te inggiba ka ipag din, ³¹ wey migpatey red degma ne ware nakaanak. Ne iling ded ka natamanan te igkatelu ne lukes. Naamin ka pitu ne taltalaari ne ware nakaanak. ³² Te katamanan, migpatey e degma ka malitan. ³³ Na, te aldew ne eg-uyahen e ka me minatey, hentew naa ka asawa rin ne malehet su naamin ma ka pitu ne nakaasawa kandin?"

³⁴ Ne intabak sikandan ni Hisus, "Egmaas-asaweey ka

me etew te seini ne timpu, ³⁵ piru seeye se in-isip te Manama ne likes ne eg-uyahen wey eg-uyanen diye te langit, kenad e egmaas-asaweey sikandan. ³⁶ Kenad sikandan egpatey su egpekeiling e sikandan te me panalihan te Manama. Me anak e sikandan te Manama su inuyag e sikandan. ³⁷ Na, meyitenged te pegkeuyag te me minatey, minsan si Muwisis migpamalehet kayi. Migsulat sikandin meyitenged te nalegleg ne sapinit ke hendei migkahi ka Magbebaye ne Manama ne sikandin 'ka Manama ni Abraham, ka Manama ni Isaak, wey ka Manama ni Hakub.' ³⁸ Iyan igapasabut kayi ne kene ne Manama sikandin te me minatey, ke kene, Manama te neneuyag. Su ka langun ne etew manekal red diye te kandin ne isip."

³⁹ Due me talagpanulu te Balaud te Manama ne migkahi, "Meupiya ka tabak nu, Talagpanulu!" ⁴⁰ Ne warad e egpaalag-alag ne eg-inse-inse kandin.

Ka inse meyitenged te Kristu

(Mat. 22:41-46; Mar. 12:35-37)

⁴¹ Ne migkahiyan sikandan ni Hisus, "Mania te migkahi sikandan ne ka Kristu kabuhalan kun ni Dabid?" ⁴² Su minsan si Dabid, migsulat sikandin diye te Libru te me Salmu,

'Ka Manama migkahi diye te
Magbebaye ku:

21

Pinnuu ka kayi te igkakawanan*
ku,

43 taman te eggimuwen ku
ne diekanan nu ka me
kuntere nu.'

44 Purisu ke ingngaranan ni
Dabid ka Kristu ne 'Mag-
bebaye', egmenuwen naa
te Kristu ne egkeyimu ne
kabuhalan ni Dabid?"

*Ka paney-paney ni Hisus
meyitenged te me talagpanulu
wey te me Parisiyu*

(Mat. 23:1-36; Mar. 12:38-
40)

45 Taheed te migpammineg
ka langun ne etew ki Hisus,
migkahiyan din ka me hi-
bateen din, 46 "Bantey kew
te me talagpanulu te Balaud
te Manama, su egkeupian
sikandan ne egleug-leug ne
egkukumbale te mallayat.
Ne egkeupian sikandan ne
egtahuren te me etew diye te
me palingkiyan wey eg-alam
te me mateles ne pinnuuwan
diye te me simbaan te me
Hudiyu wey te pinnuuwan
te me talahuren diye te sa-
hakeenan. 47 Inlupihan dan
ka me balu wey impangahew
ran ka me kasangkapan dan
minsan ka me baley ran,
wey mallayat sikandan ne
eg-ampu ka egpapitew-pitew
re. Sikan naa ka subla pad
ne masumpit ka legpad ne
egkeumaan dan!"

*Ka imbehey te balu diye te
Manama
(Mar. 12:41-44)*

1 Taheed te egpipitew si
Hisus, nakita rin ka me meya-
man ne mig-ulug te me se-
leppi dan diye te tahuinan
diye te timplu. 2 Ne due
degma nakita rin ne balu ne
egkaayu-ayu ne mig-ulug te
daddaruwa ne keddeku. 3 Ne
migkahi si Hisus, "Egnange-
nan ku sikaniyu te malehet:
sika se balu ne egkaayu-ayu,
subla pad ne dakel ka in-ulug
din du te langun ne mig-ulug.

4 Su ka duma migbehey te
subla naan de te seleppi dan,
piru ka balu ne egkaayu-ayu,
imbehey rin ka langun diye
te kandin."

*Ka pegtagne ni Hisus te
pegkahuhus te timplu
(Mat. 24:1-2; Mar. 13:1-2)*

5 Due me etew diye ne
migpalalahey meyitenged
te timplu ke mamenu ke-
upiya ne egtengtengan
ne migdayan-dayanan te
mateles ne me batu wey
me kasangkapan ne inda-
dasag te me etew diye te
Manama. Ne migkahi si
Hisus, 6 "Egginguma ka
timpu keureme ne seini se
langun ne nakita niyu, ware
minsan sabeka ne batu ne
egkasame diye te neunturan
din, egkahebe iya ka langun."

* **20:42** Sumale te tuluuwen te me Hudiyu, ka talahuren de ne etew ka egpakap-
inuu diye te igkakawanan te mabantug ne etew.

Ka me samuk wey me kalasayan

(Mat. 24:3-14; Mar. 13:3-13)

7 Ne mig-inse sikandan, "Talagpanulu, ken-u seini egkeyitabu? Nekey-a ka palinneu ke mahaan e seini egkeyitabu?"

8 Ne migtabak si Hisus, "Bantey kew ne kene kew egkeuyan te kene ne malehet ne talagpanulu su masulug ka eggendini ne egpeila ne sikandan kun ka Kristu, wey egkahi ne miggingsume e ka timpu. Piru kene kew ikul kandan." 9 Kene kew kaaldek ke egpakarinet kew te egmabunbunuey wey egkengasamuk, su keilangan ne egkeyitabu pad sika hun-a, piru ware sika migpasabut ne mahaan e ka katamanan te inged."

10 Migpabulus sikandin ne migkahi diye te kandan, "Egpakigkuntere ka sabeka ne nasud te lein ne nasud wey egpakigkuntere ka sabeka ne tribu te lein ne tribu." 11 Egginguma ka mangune-kune ne me linug, bitil, wey me dalu ne kene egkabawian diye te minsan hendei ne inged. Ne due man-e makaalat-halat wey kein-inuwan ne me palinneu puun diye te langit.

12 "Piru te kene pad egkeyitabu sika, egpandakepen kew, egbaybayaran, eg-prisuwen, wey eg-uyanan kew diye te simbaan te

me Hudiyu eyew eggukuman. Ne egpaatubangen kew diye te me Hari wey te me gubirnadur tenged keddiey. 13 Ne sikan en iya ka timpu ne egpaketangguhud kew kandan te Meupiya ne Panugtulen. 14 Sikan naa, tapey niyud sabekaa ka suman-suman niyu ne kene egkalaggew ke egmenuwen niyu te egpanabak, 15 su egpanuluun ku sikaniyu te iglalag niyu wey egbehayan kew te kaalam eyew kene egpaketabak wey ke egpakaapul ka me kunte niyu. 16 Igsumbung kew minsan te me amey wey iney niyu, wey te me hari wey me kakey niyu, wey te me suled wey me alukuy niyu. Ne ka duma kaniyu, eggimatayan dan iya. 17 Egdumutan kew te langun ne etew tenged keddiey. 18 Piru kene kew egbalaharen te Manama su minsan sabeka ne bulbul te ulu niyu kene egkatarin. 19 Ne pinaahi te peg-antus niyu, egpakarawat kew te umul ne ware egtamanan.

Impataha ni Hisus ka pegkareeti te Hirusalim
(Mat. 24:15-21; Mar. 13:14-19)

20 "Ke egkakita niyu ka Hirusalim ne eglikesan te me sundalu, egkanengnengan niyu ne egdereetan e seini te kene egkaluhay. 21 Ne seeye se me etew ne diye te Hudiya, keilangan ne egaput diye te me bubungan,

wey seeye se diye te siyudad keilangan ne eg-awe diye. Ne seeye se diye te me unayan, keilangan ne kene eggendiye te siyudad²² su seeye ne me timpu igpaneem-neem te Manama ka langet din eyew egkatuman ka langun ne nasulat diye te Kasulatan.²³ Mekeyid-uhid-u te seeye ne me timpu ka egkengaberes wey ka egmasusu pad te me anak dan. Su eggingume e ka masumpit ne peg-antus te seini ne inged wey egkaneem-neem te seini ne keet-etawan ka langet te Manama.²⁴ Egpangimatayan sikandan pinaahi te kampilan, wey egpanguripenen sikandan diye te langun ne inged. Ne seini se Hirusalim, eg-ahawen te kene ne me Hudiyu wey egmanduan dan taman te egkapenge e ka ingkerew te Manama kandan.”

Ka pegginguma te Anak te Etew
(Mat. 24:29-31; Mar. 13:24-27)

²⁵ “Due keureme me palinneu diye te aldew, bulan wey me bituen. Ne ka me etew te langun ne nasud, egkabantalanan wey egkabenga-benga te lehes te dakel ne me bunnud te dahat.²⁶ Egkengalepu ka me etew te kaaldek dan ka egkapanseb ke nekey ka egkeyitabu kayi te ampew te tane. Su egkawelwel ka me tahu diye te langit.²⁷ Ne egkataman, egkakita ran e ka Anak te Etew ne eglepew

diye te gapun duma te geem din wey dakel ne katelesan.²⁸ Ke egbunsud e seini egkeyitabu, nekal-nekal kew wey leng-ag kew su mahaan e ka kaluwasan niyu.”

Ka katahaan puun te kayu ne iggira
(Mat. 13:28-31) 24:32-35; Mar.

²⁹ Ne migpangguhuran sikandan ni Hisus te seini ne panunggilingan, “Na, pitawa niyu ka kayu ne iggira wey ka duma ne me kayu.³⁰ Emun ke egkakita niyud ne egderewun e, egkatahaan niyu ne mahaan e ka tingmeinit.³¹ Iling naan ded degma due, emun egkakita niyud ne egkeyitabu e seini, egkatahaan niyud ne mahaan e ka Peghari te Manama.

³² “Egnangenan ku sikaniyu te malehet: egkatuman e sika langun te kene pad egkengamatey ka me etew te kuntee ne timpu.³³ Egkaawe ka langit wey ka tane piru ka keddi ne lalag, kene iya egkaawe.

Keilangan ne egtanud-tanud

³⁴ “Sikan naa, tanud-tanud kew ne kene egparuyunduyun te egkasublaan ne pegdees wey pegpewubug-hubug, wey te pegkalaggew meyitenged te peg-ugpe niyu, su kema ke egkatigkew kew te seeye ne aldew wey egpekeiling kew te nabaled.³⁵ Su egtigkew

seini egginguma te langun ne etew ne mig-ugpe kayi te ampew te tane.³⁶ Purisu tanud-tanud kew layun wey ampu kew eyew egmanekal kew ne eg-antus te langun ne egkeyitabu, wey eyew egpakaatubang kew te Anak te Etew."

³⁷ Tagse aldew, egpanulu si Hisus diye te timplu, piru te pegkamarusilem eg-awe sikandin wey diye eggirehe te Bubungan te Ulibu. ³⁸ Te maselem-selem, eggendinyaan sikandin te me etew diye te timplu eyew egpammineg kandin.

22

Ka planu te peggimatey ki Hisus

(Mat. 26:1-5; Mar. 14:1-2; Huw. 11:45-53)

¹ Te seeye ne timpu, mahaan e ka Sahakeen te Paan ne Ware Patulin ne migngaranan man-e te Sahakeen te Peglihad te Panalihan. ² Ne ka me pangulu te me talagpanubad wey ka me talagpanulu te Balaud te Manama, migpammitew sikandan te paahi ke egmenuwen ne egkeyimatayan dan si Hisus, su naaldek sikandan te me etew.

Ka pegpakigsabut ni Hudas te peg-akal ki Hisus

(Mat. 26:14-16; Mar. 14:10-11)

³ Nataman, migserapan ni Meibulan si Hudas ne enggaranan ki Iskaryuti ne sabeka te sapulu wey daruwa

(12) ne hibateen ni Hisus. ⁴ Ne miggipanew sikandin wey migpakigkita te pangulu te me talagpanubad wey te me pangulu te talagbananey te timplu. Migpasabutey sikandan ke egmenuwen din te pegbehey ki Hisus diye te kandan. ⁵ Amana sikandan nahale wey migaaran dan sikandin ne egbehayan te seleppi. ⁶ Ne mig-uyun si Hudas wey migpamuuhawang ne egpasayuwani din eg-akali si Hisus ke ware ka masulug ne me etew.

Ka peg-andam te me hibateen ni Hisus te iglabung

(Mat. 26:17-25; Mar. 14:12-21; Huw. 13:21-30)

⁷ Ne miggigungume e ka aldew te Sahakeen te Paan ne Ware Patulin ne iyan pegpanubad te nati ne karniru eyew egkeenen te Sahakeen. ⁸ Ne migkahiyan ni Hisus si Pidru wey si Huwan, "Hipanew kew wey andama niyu ka iglabung ta te Peglihad te Panalihan."

⁹ Ne mig-insaan dan si Hisus, "Hendei nu igkeupii ne eg-andamen ney seini?" ¹⁰ Ne migkahiyan din sikandan, "Pammineg kew. Te egginguma kew e diye te siudad, due etew ne egkasinug-ung niyu ne egtiang te banga ka migpanakeru. Sinundula niyu naa sikandin wey lasud kew diye te baley ne eglasuran din, ¹¹ wey kahii niyu ka mahinged, 'Eg-inse

ka talagpanulu keykew: Hen-dei ka sinabeng ne egkeenan ku duma te me hibateen ku te Peglihad te Panalihan?"

¹² Ne igaipakita rin kaniyu ka maluag ne sinabeng diye te dibabew ne kumplitu te me kasangkapan, wey dutun kew naa andam te iglabung ta." ¹³ Nataman, miggipanew ka daruwa wey nakita ran ka langun ne sumale te inlalag ni Hisus kandan. Seeye naa, in-andam dan e ka egkeenen para te Sahakeen te Peglihad te Panalihan.

*Ka iglabung te Magbebaye
(Mat. 26:26-30; Mar. 14:22-26; 1 Kur. 11:23-25)*

¹⁴ Ne hengkayi te tinglabung e, migpinnuu si Hisus duma te me apustulis din eyew egkeen e. ¹⁵ Ne migkahiyan din sikandan, "Amana ad iya egkeupian ne eglagpu kaniyu egsahakeen te Peglihad te Panalihan te kene e pad eg-antus!" ¹⁶ Su egnanganan ku sikaniyu te kena ad eg-abey egkeen kayi taman te egkatuman e ka malehet ne kaluwasan te seini ne Sahakeen diye te Migharian te Manama."

¹⁷ Ne migkuwa si Hisus te senge ubab ne binu wey migpasalamatan din ka Manama, wey migkahi diye te me hibateen din, "Kua niyu seini wey pasamsamey kew. ¹⁸ Su egnanganan ku sikaniyu ne ligkat kuntee kena ad e eg-abey eg-inum te

seini ne inumen ne egpuun te paras taman te eggingsume e ka Peghari te Manama."

¹⁹ Ne migkuwa sikandin te paan wey migpasalamatan din ka Manama, wey impanepik-tepik din seini wey impamehey rin diye te me hibateen din te migkahi, "Seini ka lawa ku ne imbehey kaniyu. Himuwa niyu seini eyew te pegsuman-suman keddiey." ²⁰ Pegkapenga dutu, migkuwe e mane sikandin te ubab wey migkahi, "Seini se senge ubab ne inumen, iyan ka langesa ku ne igpatihis para kaniyu wey iyan egpamalehet te iyam ne kasabutan te Manama diye te keet-etawan din.

²¹ "Piru pammineg kew. Duma ta kuntee kayi te migkeen ka etew ne eg-akal keddiey. ²² Egpatey ka Anak te Etew sumale te intahaan iya kandin, piru mekeyid-u-hid-u ka etew ne eg-akal kandin!"

²³ Ne dutu, migpein-inseey sikandan ke hentew buwa kandan ka eg-akal kandin.

Ka pegpaap-apuley te me hibateen ni Hisus

²⁴ Ne migpaap-apuley ka me hibateen ni Hisus ke hentew dapit kandan ka labew.

²⁵ Sikan naa, migkahiyan sikandan ni Hisus, "Ka me Hari te kene ne Hudiyyu, impeuteng dan iya ka geem dan diye te me sakup dan, wey egkeupian sikandan se me pangulu ne egngararan

te 'egsandihan te me etew.'²⁶ Piru kene niyu sika himuwa. Ka minsan hentew kaniyu ne iyan mabantug, keilangan ne eg-iling te kinaariyan, wey ka pangulu keilangan ne egpeyimu ne suluhuanen.²⁷ Hentew ma ka labew, seeye se migsendaran wey ke seeye migsendad? Seeye iya se insendaran. Piru seini a kuntee duma kaniyu ne migtanggu kaniyu.

²⁸ "Mig-unung kew keddiey te me peg-eleg-eleg ne nabayaan ku. ²⁹ Sikan naa, eggimuwen ku degma diye te kaniyu ka innimu te Amey ku kayi te keddi. Egbehayan ku sikaniyu te katenged te peghari,³⁰ eyew epakalagpu kew egkeen wey eg-inum diye te keddi ne lamisa diye te egharian ku. Ne eyew epakapinnuu kew man-e diye te me trunu eyew te peggukum te sapulu wey daruwa (12) ne tribu te Israil."

Ka pectagne ni Hisus ne ig-pahunware din ni Pidru

(Mat. 26:31-35; Mar. 14:27-31; Huw. 13:36-38)

³¹ Ne migkahiyan ni Hisus si Simun, "He Simun, pammineg ka! Bantey ka su migtuhutan si Meibulan te peggeram kaniyu langun ne iling te etew ne egpalayap te trigu. ³² Piru mig-ampuan ku sikeykew Simun, eyew kene egkaawe ka pegpalintutuu nu. Ne emun ke eglibed kad

man-e egpalintutuu keddiey, keilangan ne eggeheten nu ka pegpalintutuu te me suled nu."

³³ Migtabak si Pidru, "Mag-bebaye, andam ad e ne eg-unung keykew minsan eg-prisuwen wey eggimatayan."

³⁴ Ne migtabak si Hisus, "Egnanganan ku sikeykew Pidru, te kene pad eg-ukale ka manuk kuntee ne marusilem, katatelu ad nikeykew igpahunware."

Sening, puntil wey kampilan

³⁵ Ne migkahiyan sikan-dan ni Hisus, "Nakulangan kew naa te impeendiye ku sikaniyu dengan ne ware in-uyan ne me sening, puntil, wey sandal?"

Ne migtabak sikandan, "Ware."

³⁶ Ne migkahi si Hisus, "Piru kuntee, seeye se due sening wey puntil, keilangan ne eg-uyanen din. Seeye se ware kampilan, keilangan ne ibelegye din ka binekad din wey egbeli te kampilan. ³⁷ Su egnanganan ku sikaniyu ne keilangan egkatuman ka diye te Kasulatan meyitenged keddiey ne eggenendue, 'In-isip sikandin ne sabeka ne mareet ne etew.' Ne kuntee, egkatuman en iya ka nasulat meyitenged keddiey."

³⁸ Migkahi ka me hibateen din, "Tew ka, Magbebeye. Duen e daruwa ne kampilan kayi."

Ne migtabak si Hisus, "Eleg e sika!"

Ka peg-ampu ni Hisus diye te Gitsimani

(Mat. 26:36-46; Mar. 14:32-42)

³⁹ Ne mig-awe e si Hisus wey miggendiyad te Bubungan te Ulibu iling te nabatasan din. Ne migduma kandin ka me hibateen din.
⁴⁰ Te pegginguma ran diye, migkahi si Hisus, "Ampu kew eyew kene kew egkatintal."

⁴¹ Ne migpariyu sikandin kandan te eleg de ne egkeumaan te egdegpak, wey migpanimbuel sikandin eyew eg-ampu. ⁴² Ne migkahi sikandin, "Ame, ke egtuhut ka, kene nud ipabulus ka igpaantus* nu keddi, piru kene ne iyan egkatuman ka keddiey ne pegbuut, ke kene, ka keykew ne pegbuut."

⁴³ [Ne due panalihan te Manama ne egpuun diye te langit ne miglepew eyew te pegbehey kandin te kanekal.

⁴⁴ Ne puun su amana ne masakit ka geyinawa rin, nanasnasian pad iya ne migmapahetpet ka pegampu din, wey miglimusengan sikandin iling te langesa ne migtihis diye te tane.]†

⁴⁵ Te nakapenge e sikandin ka mig-ampu, miglibed e sikandin diye te me hibateen din wey neumaan din sikandin ne nenewulep e su migmahuye puun te subla ne peglungku. ⁴⁶ Ne ingkahiyan

sikandin ni Hisus, "Mania te miglipereng kew? Enew kew wey ampu kew eyew kene kew egkatintal."

Ka pegdakep ki Hisus

(Mat. 26:47-56; Mar. 14:43-50; Huw. 18:3-11)

⁴⁷ Te sasangan pad ne eglalag si Hisus, nangingume e ka masulug ne me etew ne induma ni Hudas ne sabeka te sapulu wey daruwa (12) ne hibateen din. Migguna sikandin kandan wey migparani ki Hisus eyew eggarek kandin. ⁴⁸ Piru migkahi si Hisus, "Hudas, eg-akalan nu bes ka Anak te Etew pinaahi te harek?"

⁴⁹ Te pegkakita te me duma ni Hisus ne egsahap e sikandin, migkahi sikandin, "Magbebaye, igpanibas ney naan e seini se me kampilan ney?" ⁵⁰ Ne due sabeka kandan dutu ne intibbas din ka uripen te Labew ne Talagpanubad, wey natamped ka igkakawanan ne talinga te uripen.

⁵¹ Piru migkahi si Hisus, "Eleg e sika!" Ne insamsam ni Hisus ka talinga te uripen wey neulian e.

⁵² Nataman, migkahiyan ni Hisus ka me pangulu te me talagpanubad, ka me pangulu te talagbantey te timplu, wey ka me ighbuyag te me Hudiyu ne migduma te pegdakep kandin, "Takawen a? Mania te nanguyan kew te me kampilan wey me lampes

* 22:42 Te Grigu: ubab. † 22:44 Due tapey ne me sinulat ne ware miglagkes te birsikulu 43 wey 44, sikan naa ka kene buwa perem keilangan ne iglagkes seini kayi. 22:53 Luk 19:47; 21:37.

ka egdakep keddiey?⁵³ Tagse aldew duma a kaniyu diye te timplu, ne wara a nikaniyu derakepa. Piru seinid iya ka timpu ne imbehey kaniyu, ka timpu ne due katenged ni Meibulan.”[‡]

*Ka pegpahunware ni Pidru
meyitenged ki Hisus*

(Mat. 26:57-58, 69-75;
Mar. 14:53-54, 66-72; Huw.
18:12-18, 25-27)

⁵⁴ Ne indakep dan si Hisus wey in-uyan dan diye te baley te Labew ne Talagpanubad. Ne migsundul degma si Pidru ne migpadpariyu de. ⁵⁵ Ne migtetemeg ka me etew diye te taliware te lama wey naminuu sikandan ka egginarang. Ne migdugpu degma si Pidru kandan wey migpinnuu. ⁵⁶ Due suluhuanen ne malitan ne nakakita ki Pidru te migpinnuu diye te lenged te hapuy. Immemetmetan din si Pidru wey migkahi, “Sika ne etew, duma degma nikandin!”

⁵⁷ Piru migpahunware si Pidru ne migkahi, “Beyi, ware e ma mule nekeila kandin!”

⁵⁸ Te ware naluhay, duen e man-e lukes ne nakakita kandin wey migkahi, “Hey, duma ka iya degma nikandan!” Piru migtabak si Pidru, “Usi, kena a ne duma nikandan!”

⁵⁹ Me sabeka ne uras ka miglibad, duen e man-elein ne lukes ne migkahi, “Malehet iya ne duma rin ka seini

ne etew su matig-Galiliya ma degma sikandin!”

⁶⁰ Piru migtabak si Pidru, “Ti! Wara a nakanengneng te impanlalag nu!”

Te sasangan pad sikandin ne eglalag, due-rue ne mig-ukale ka manuk.

⁶¹ Miglilingey ka Magbebeye wey migtengteng diye te ki Pidru, wey nasuman-suman din ke nekey ka inlalag te Magbebeye kandin, “Te kene pad eg-ukale ka manuk kuntee ne marusilem, katatelu ad nikeykew igpahunware.”

⁶² Te sikan de, miglihawang e si Pidru wey migpanaman-taman migsinehew.

*Ka pegbayad-bayah ki
Hisus*

(Mat. 26:67-68; Mar.
14:65)

⁶³ Ne imbaley-baley wey inlampesan si Hisus te me etew ne migbanter kandin.

⁶⁴ Imbagkesan dan ka mata rin wey mig-insaan, “Ne la, antuki nu ke hentewa ka migpasakit keykew?”

⁶⁵ Ne masulug pad ka impanlalag dan te pegbaley-baley kandin.

*Ka peg-inse-inse ki Hisus te
me pangulu te me Hudiyyu*

(Mat. 26:59-66; Mar.
14:55-64; Huw. 18:19-24)

⁶⁶ Te pegkapawe e, miglibulung ka me igaubyag te me Hudiyyu ne iyan ka me pangulu te me talagpanubad, wey me talagpanulu te Balaud te Manama. Ne inuyan dan e si Hisus diye te tangkaan dan. ⁶⁷ Ne migkahi

[‡] 22:53 Te Grigu: marusilem.

sikandan, "Nangeni key ke sikeykew naa ka Kristu."

Ne migtabak si Hisus, "Ke egnanganan ku sikaniyu, kene kew egpalintutuu ked-diey,⁶⁸ wey ke eg-insaan ku sikaniyu, kene kew egtabak.⁶⁹ Piru puun kuntee, ka Anak te Etew egpinnuu diye te igkakawanan[§] te maresen ne Manama."

⁷⁰ Ne mig-inse sikandan langun, "Sikeykew naa iya ka Anak te Manama?"

Ne migtabak sikandin, "Malehet iya ka ingkahi niyu."

⁷¹ Ne dutu migkahi sikan-dan, "Mania te egkeilangan ki pad ne egkuwa te egpa-malehet? Sikante en iya ka nakarineg te inlalag din."

23

Ka peg-uyan ki Hisus diye te ki Pilatu

(Mat. 27:1-2, 11-14; Mar. 15:1-5; Huw. 18:28-38)

¹ Nataman, migsasindeg sikandan langun wey in-uyan dan si Hisus diye te tangkaan ni Pilatu ² wey insumbung dan sikandin. Ne migkahi sikandan, "Nas-apenan ney seini ne etew ne inlaag din ka me etew wey mignanganan din sikandan ne kene egpabayaren te buhis diye te Impiradur. Migkahi rin pad man-e te sikandin kun ka Kristu, ka sabeka ne Hari."

^{§ 22:69} Sumale te tuluuwen te me Hudiyu, ka talahuren de ne etew ka egpakap-innuu diye te igkakawanan te mabantug ne etew.

³ Ne mig-insaan sikandin ni Pilatu, "Sikeykew iya ka Hari te me Hudiyu?"

Migtabak si Hisus, "In-gkahi nud en iya."

⁴ Nataman, migkahiyan ni Pilatu seeye se me pangulu te me talagpanubad wey ka mas-lug ne etew, "Ware nakita ku ne sale te seini ne etew."

⁵ Piru migpanaman-taman sikandan mig-apul ne migkahi, "Sikandin ka puunan te samuk te me etew diye te intiru ne Hudiya tenged te kandin ne pegpanulu. Diye sikandin migbunsud te Galiliya taman te miggungume e kayi."

Ka pegtangke ni Hisus ki Hirudis

⁶ Te pegkarineg dutu ni Pilatu, mig-inse sikandin ke matig-Galiliya naa si Hisus.

⁷ Te natahaan din e ne diye miglikat si Hisus te inged ne immanduan ni Hirudis, impeendiye din e sikandin ki Hirudis, su diye degma si Hirudis te Hirusalim te seeye ne timpu. ⁸ Ne nahale amana si Hirudis te nakita rin si Hisus su nakarineg ma sikandin meytenged kandin, wey naluhey e ne eg-iman-iman ne egpakkita te kein-inuwan ne eggimuwen ni Hisus.

⁹ Ne mig-in-insaan ni Hirudis si Hisus, piru ware sikandin migtabak. ¹⁰ Nanasindeg degma diye ka me pangulu te me talagpanubad wey ka me talagpanulu te Balaud te

Manama wey egbebayanungan dan patamtami si Hisus.¹¹ Ne indeeg-deeg sikandin wey imbaley-baley ni Hirudis duma te me sundalu rin. Insaluuban dan sikandin te mateles ne kumbale wey impalibed dan diye te ki Pilatu.¹² Seeye ne aldawa nekeg-alukuy e si Hirudis wey si Pilatu, su dengan talagkuntere ma sikandan.

Ka peg-uyun ki Hisus ne eggimatayan

(Mat. 27:15-26; Mar. 15:6-15; Huw. 18:39-19:16)

¹³ Nataman, impeumew ni Pilatu ka me pangulu te me talagpanubad, ka me igbuyag te me Hudiyu, wey ka me etew,¹⁴ ne inlalahan din sikandan, "In-uyan niyu seini ne etew kayi te keddiey wey migkahi kew ne inlaag din ka me etew. Ne in-insaan ku sikandin diye te tangkaan niyu piru ware nakita ku ne mareet ne neyimu rin sumale te insumbung niyu keddiey.¹⁵ Ne minsan si Hirudis, ware nakita rin ne sale te seini ne etew, wey impalibed din e kayi te kanta. Ne ware iya neyimu rin ne mareet ne eleg ne eglegparan te kamatayen.¹⁶⁻¹⁷ Sikan naa, egpalampesan ku re seini ne egkataman eglekaan ded."*

¹⁸ Piru migmanguleyi ka masulug ne me etew, "Himatayi nu sikandin!"

Si Barabas ka lekei nu!"¹⁹ (Naprisu si Barabas su migribildi diye te Hirusalim wey nakapatey te etew.)

²⁰ Iyan igkeupii ni Pilatu ne eglekaan si Hisus, sikan naa ka miglalahan din abayi ka me etew.²¹ Piru migtabak sikandan ne migbalbalukan, "Ilansang nu sikandin te krus! Ilansang nu sikandin!"

²² Ne igkatatelu e ni Pilatu te egkahi kandan, "Mania, nekey bes ka neyimu rin ne mareet? Ware sale ne nakita ku ne eleg sikandin eglegparan te kamatayen. Egpalampesan ku re sikandin wey egpalekaan e."

²³ Piru migpabulus sikan-dan ne migpanguleyi ne migkahi, "Ilansang nu sikandin te krus!" Ne iyan tamani se nahambaan sikandin te me etew.²⁴ Ne mig-uyun si Pilatu te igkeupii te me etew,²⁵ wey impalekaan din e ka imbuyu dan ne naprisu tenged su migribildi te gubirnu wey nakapatey te etew. Piru im-behey rin mule si Hisus diye te kandan eyew egkeyimu ran kandin ka langun ne igkeupii ran.

Ka peglansang ki Hisus te krus

(Mat. 27:32-44; Mar. 15:21-32; Huw. 19:17-27)

²⁶ Te in-uyan dan e si Hisus, due nasinug-ung dan ne matig-Sirini ne egngaranan

* **23:16-17** Due me sinulat ne inlagkes ka birsikulu 17 piru ware seini diye te malehet ne migpuunan. Intimul naan de seini ne miggendue: Tagse Sahakeen te Peglihad te Panalihan, nabatasan te Gubirnadur ne due egkaprisu ne eglekaan din te seeye ne timpu.

ki Simun ne diye egpuun te sityu wey eggendiye te siyudad. Indakep dan sikandin wey impatiang te krus ne impasinundul ran ki Hisus.

²⁷ Masulug amana ne etew ka migsinundul ki Hisus wey due me malitan ne migmandalawit wey migmalumbibigtew tenged kandin. ²⁸ Nataman, miglilingey si Hisus diye te me malitan ne migkahi, "Sikaniyu se matig-Hirusalim ne me malitan, kena a nikaniyu sinehawi. Iyan niyu sinehawi ka pegkeetew niyu wey ka me anak niyu. ²⁹ Su egginguma ka aldew ne egkahi ka me etew, 'Keupianan te seeye se me malitan ne ware mig-anak wey ware migpangalalin wey ware impasu ne bate!' ³⁰ Te sika ne timpu egkahi ka me etew diye te me bubungan, 'Kengalunew kew kayi te kanami!' wey egkahi degma diye te me labuntud, 'Bunbuni key!' ³¹ Emun ke innimu ran seini diye te etew ne ware sale, wey naan pa iya kene ne subla ne mareet ka eggiwuwen dan diye te due sale.[†]

³² Duen pad man-e daruwa ne mareet ne me etew ne in-uyan dan eyew eggi-matayan duma ki Hisus.

³³ Te nekeume e sikandin diye te inged ne egngaranan te Angkal, inlansang dan e si Hisus wey ka mareet ne me etew, ka sabeka diye te

igkakawanan din wey ka sabeka diye te igkahibang din. ³⁴ Ne migkahi si Hisus, "Ame, pasayluwa nu sikandan su ware dan nakanengneng ke nekey ka eggimuwen dan."

Nataman, migpintut-pintut sikandan ke hentew kandan ka egpakakamuney te me kumbale ni Hisus. ³⁵ Nanasindeg ka me etew ne migtengteng, taheed te migdali-di ki Hisus ka me ighbuyag te me Hudiyu ne migkahi, "Inluwas din ka duma, igaipaluwas degma kandin ka pegkeetew rin ke malehet ne sikandin ka Kristu ne in-alam te Manama!"

³⁶ Migdali-dian man-e sikandin te me sundalu, wey migparani sikandan wey intaruwayan sikandin te maperes ne binu. ³⁷ Ne migkahi sikandan, "Ke sikeykew ka Hari te me Hudiyu, luwasa nu ka pegkeetew nu!"

³⁸ Ne seini ka insulat diye te keretula te krus, "Seini ka Hari te me Hudiyu."

³⁹ Ka sabeka ne mareet ne etew ne inlansang duma ki Hisus, migbaley-baley degma kandin ne migkahi, "Sikeykew ma iya ka Kristu? Luwasa nu ka pegkeetew nu wey ilagkes key!"

⁴⁰ Piru insaparan sikandin te duma rin ne migkahi, "Ware ke naa naaldek te Manama? Nekeg-iling de

23:30 Hus 10:8; Imp 6:16. [†] **23:31** Te Grigu: Ke innimu ran seini diye te meyilew ne kayu, nekey naa ka egtamanan ke nahangu e seini? **23:34** Sal 22:18.

23:35 Sal 22:7.

ka legpad ta, ⁴¹ piru sikanta se daruwa, likes ki iya ne egleparan tenged te hin-imuwan ta. Piru sikandin, ware mule mareet ne neyimu rin.” ⁴² Ne migkahiyen din si Hisus, “Hisus, sumsumana a nikeykew te timpu te eghari kad e.”

⁴³ Ne migtabak si Hisus, “Egnanganan ku sikeykew te malehet: kuntee ne aldew duma ki diye te ugpaan te Manama.”

Ka pegkapatey ni Hisus
(Mat. 27:45-56; Mar. 15:33-4; Huw. 19:28-30)

⁴⁴ Ne hengkayi te meudtu e, mig-engked ka aldew ne miglayag wey migmarusilem ka intiru ne nasud taman te alas tris te maapun;[‡] ⁴⁵ wey nabindas ka kurtina diye te timplu wey nabaad te daruwa. ⁴⁶ Ne migpanguleyi si Hisus te meemen ne migkahi, “Ame. Igbehey ku diye te keykew ne me belad ka panisingan ku!” Nataman sikandin se miglalag, nabigtawan e.

⁴⁷ Te pegkakita te kepitan te me sundalu te neyitabu, indayan din ka Manama te migkahi, “Malehet iya ne matareng seini ne etew!”

⁴⁸ Ne ka langun ne etew ne miglibulung ne egmamipitew, nakakita te neyitabu wey nanguli sikandan ne migmandabi te me kumeng dan tenged te pegkalaggew ran. ⁴⁹ Ka langun ne nekeila ki Hisus duma te me malitan

ne migsinundul kandin puun te Galiliya, diye de sikandan migsasindeg te madmariyu ne migtengteng te neyitabu ki Hisus.

Ka pegrasabak ki Hisus
(Mat. 27:57-61; Mar. 15:42-47; Huw. 19:38-42)

⁵⁰⁻⁵¹ Due etew ne egnaraganan ki Husi ne matig-Arimatiya, sabeka ne lung-sud te me Hudiyu. Meupiya sikandin wey matareng ne etew ne egtetahad te Peghari te Manama. Minsan sabeka sikandin ne sakup te Talag-gukum te me Hudiyu, piru ware sikandin migparumarama te innimu ran diye te ki Hisus. ⁵² Miggendiye sikandin ki Pilatu wey imbuyu din ka lawa ni Hisus. ⁵³ Ne in-anneye rin ka lawa ni Hisus diye te krus wey imbukusan din te hinabel wey intahu din diye te inlungahan ne dalama ne ware pad nasabali. ⁵⁴ Aldew seeye te Pegpangandam su mahaan e eggingga ka Aldew te Peggimeley.

⁵⁵ Ka me malitan ne migsinundul ki Hisus ligkat te Galiliya, migduma ki Husi wey nakita ran ka insabalan wey ke immenu te egtahu ka lawa ni Hisus. ⁵⁶ Nataman, mig-uli e sikandan wey in-andam dan e ka me peemut wey ka lana ne igbaluhu te lawa ni Hisus.

Seeye ne aldawa, Aldew te Peggimeley sumale te Balaud

[‡] **23:44** Te Grigu: ka meudtu, igkeem-em ne uras; alas tris te maapun, igkasiyam ne uras. **23:45** Iks 26:31-33. **23:46** Sal 31:5. **23:49** Luk 8:2-3. **23:56** Iks 20:10; Diy 5:14.

te me Hudiyu wey miggimley e sikandan.

24

Ka pegkeuyag ni Hisus

(Mat. 28:1-10; Mar. 16:1-8;
Huw. 20:1-10)

¹ Te maselem-selem te aldew te Duminggu, miggendiye ka me malitan te inlungahan ne dalama ne insabalan ki Hisus. Mig-uyan sikandan te peemut ne in-andam dan para te minatey.
² Pegginguma ran, nakita ran ne nalilid e ka batu ne in-elet dutu te gumawan te insabalan. ³ Ne migseled e sikandan, piru ware dan nakita ka lawa ni Hisus ⁴wey amana sikandan ne nalibeg. Ne dutu, due daruwa ne lukes ne miglepew ne nangukumbale te masil-ew wey diye migsasindeg te lenged dan. ⁵ Nenaaldek ka me malitan wey nangunduk naan de. Ne migkahi ka daruwa ne lukes, "Mania te kayi niyu egpamitawa te inged te me minatey ka neuyag e? ⁶ Warad sikandin kayi su neuyag din e. Sumsumana niyu ka inlalag din kaniyu te diye pad sikandin te Galiliya ne miggenendue, ⁷ 'Keilangan ne igbehey ka Anak te Etew diye te me makasesale wey iglansang te krus, piru egkeuyag ded sikandin te igkatelu ne aldew.'

⁸ Ne nasuman-suman te me malitan ka inlalag ni Hisus.

⁹ Ne nanguli e sikandan

wey impangguhuran dan e te langun ka sapulu wey sabeka (11) ne hibateen ni Hisus wey ka me duma ran. ¹⁰ Ka me malitan ne migpangguhud te me apustulis iyan ensi Mariya Magdalina, si Huwana, si Mariya ne iney ni Santiyagu, wey ka me malitan ne duma ran. ¹¹ Piru kahiyen te me hibateen ne ware karuan te guhuren dan, sikan naa ka ware sikandan migpalintutuu. ¹² Piru migsasindeg si Pidru wey migpallahuy peendiye te insabalan ki Hisus. Migpepeku sikandin eyew egseilang diye te seled, wey iyan din naan de nakita ka hinabel ne imbukus te minatey. Nataman, miguli sikandin ne neinu-inu meyitenged te neyitabu.

Ka pegpakita ni Hisus te me etew ne egpeendiye te Immaus

(Mar. 16:12-13)

¹³ Te seeye ded ne aldew, due daruwa ne etew ne miggipanew peendiye te Immaus ne me sapulu wey sabeka (11) ne kilumitru ka kariyu puun te Hirusalim.

¹⁴ Taheed te eggipanew sikandan, migpalalahey sikandan meyitenged te langun ne neyitabu. ¹⁵ Te egkalihet sikandan ne egpalalahey, migparani si Hisus kandan wey migluyud kandan te eggipanew. ¹⁶ Piru ware sikandan nekeila kandin su hendue te imbunbunan ka mata ran. ¹⁷ Ne migkahiyan

sikandan ni Hisus, “Nekey-a ka igkewengete niyu taheed te egmangipanew kew?”

Mig-engked sikandan ka eggipanew ne nalanu. ¹⁸ Ka sabeka ne egngararan ki Kliyupas mig-inse diye te ki Hisus, “Sikeykew naan de ka mahaliyug diye te Hirusalim ne ware nakanengneng te neyitabu te nanlihad ne me aldew?”

¹⁹ Mig-inse si Hisus, “Nekey-a ka neyitabu?”

Migtabak sikandan, “Ka meyitenged ki Hisus ne matig-Nasarit. Sabeka sikandin ne maresen ne prupita diye te tangkaan te Manama wey diye te langun ne etew, su due geem te pegpanulu din wey te me himu rin. ²⁰ Insumbung sikandin te me pangulu te me talagpanubad ta wey te me igbuyag te me Hudiyu eyew eggukuman te kammatayen, wey inlansang dan e sikandin te krus.

²¹ Migpallateng key perem ne sikandin ka eglekat te me kabuhalan ni Israil! Piru natateluhan e mule kuntee seeye se neyitabu. ²² Ne due duma ney ne me malitan ne nakapeinu-inu kanami. Migselem-selem sikandan miggendiye te migsabalan ki Hisus, ²³ piru ware dan nakita ka lawa ni Hisus diye. Ne miglibed sikandan ne migpangguhud ne nakakita kun sikandan te me panalihan te Manama ne migkahi te neuyag e sikandin. ²⁴ Ne due me duma ney ne miggendiye

te insabalan, wey iling ded te ingkahi te me malitan ka nakita ran. Piru ware sikandan nakakita ki Hisus.”

²⁵ Ne migkahiyan sikandan ni Hisus, “Egkeungel kew iya! Mananey kew egpalintutuu te langun ne inlalag te me prupita! ²⁶ Su keilangan ka Kristu ne eg-antus pad te seini se neneyitabu human sikandin egmabantug.” ²⁷ Ne impasabut ni Hisus diye te kandan ka langun ne ingkahi te Kasulatan meyitenged kandin, bunsud te sinulat ni Muwisis taman te sinulat te me prupita.

²⁸ Seeye ne timpu, marani e sikandan te inged ne eggendiyaan dan, ne si Hisus hendue te egpabulus pad, ²⁹ piru impegpehetan dan sikandin hawiri ne ingkahiyan, “Aran ke pa kayi te kanami su miglinebe ka aldew wey mahaan e egkasagkup.” Nataman, migdume e si Hisus kandan.

³⁰ Te diyad e sikandin te lamisa duma kandan, migangey sikandin te paan wey impasalamatan din. Ne impanepik-tepik din e seini wey impamehey rin e diye te kandan. ³¹ Sahuhune ne iling te napuwasan ka mata ran wey neilaan dan e si Hisus, piru sahuhune ne nalaag sikandin diye te tangkaan dan. ³² Ne migpanangnangenev sikandan ne migkahi, “Sikan bes iya ka iling te due hapuy ne miglegleg kayi te pusung ta te impasabut din ka Kasulatan te diye ki pad te

dalan."

³³ Due-rue ne migsasindeg sikandan wey miglibed diye te Hirusalim. Ne nakita ran diye ka sapulu wey sabeka (11) ne me hibateen wey ka duma pad ne me etew ne nalibulung ³⁴ne migkahi, "Malehet iya ne neuyag ka Magbebaya! Migpakita sikandin ki Simun!"

³⁵ Ne impangguhud degma te daruwa ne etew ka neyitabu diye te dalan, wey ka pegkeila ran te Magbebaya te pegtevik-tevik din e te paan.

Ka pegpakita ni Hisus te me hibateen din

(Mat. 28:16-20; Mar. 16:14-18; Huw. 20:19-23; Him. 1:6-8)

³⁶ Te sasangan pad sikandan egmalalahey, sauhune ne mglepew ka Magbebaya wey migsasindeg diye te taliware dan ne migkahi, "Ka keupianan egduma kaniyu."

³⁷ Natingkemed sikandan wey nenaaldek, su kahiyau dan ne saping ka nakita ran. ³⁸ Piru migkahiyan din sikandan, "Mania te egkalaggew kew? Mania te egduwa-ruwa kew? ³⁹ Tengtengi niyu seini se me belad ku wey me paa ku. Sikeddi iya seini. Samsama a wey pitawa a. Ka saping, ware sapu wey ware tul-an piru sikeddiey kuntee ne nakita niyu, due sapu wey due me tul-an."

⁴⁰ Pegkapenga rin te eglalag, impapitew rin kandan ka belad din wey ka paa

rin. ⁴¹ Ne puun su nahale-gale sikandan wey amana ne neinu-inu, hendue te kene sikandan egpakapalintutuu te nakita ran. Seeye naa, mig-insaan sikandan ni Hisus, "Due egkakeen niyu kayi?" ⁴² Ne imbehayan dan sikandin te sabeka ne getad te tinuug te ngalap te weyig. ⁴³ Ingkuwa ni Hisus seeye wey ingkeen din e diye te tangkaan dan.

⁴⁴ Ne migkahiyan din sikandan, "Seini ka ingkahi ku kaniyu te dume e pad kaniyu, ne keilangan ne egkatuman ka langun ne nasulat te Balaud ni Muwisis wey te me prupita wey diye te me Salmu meyitenged keddiey."

⁴⁵ Nataman, imbulihan ni Hisus ne egkapuwasan ka me suman-suman dan eyew egpaka-sabut te Kasulatan. ⁴⁶ Ne migkahiyan din sikandan, "Nasulat diye te Kasulatan ne ka Kristu keilangan ne eg-antus wey egpatey, wey egkeuyag ded sikandin te igkatatelu ne aldew. ⁴⁷ Keilangan ne igpangguhud diye te langun ne nasud, bunsud kayi te Hirusalim, ne tenged kandin, egkapasaylu ka eg-inniyug te me sale dan. ⁴⁸ Ne sikaniyu ka me talagpamalehet te seini se langun. ⁴⁹ Ne igpeuyan ku kaniyu ka insaad te Amey ku. Piru keilangan ne uugpe kew pa diye te Hirusalim taman te egkaleneban kew e te geem

ne egpuun diye te langit."

*Ka pegbatun ki Hisus diye
te langit
(Mar. 16:19-20; Him. 1:9-
11)*

⁵⁰ Nataman, in-uyan ni Hisus sikandan diye te li-hawangan te siyudad taman te Bitanya. Te diyad sikan-dan, ingkayew rin e ka belad din wey impanalanginan din sikandan. ⁵¹ Te egkalihet sikandin ne egpanalangin kandan, egkahan-ganaran e degma sikandin egkabatun diye te langit. ⁵² Ne indayan dan sikandin, wey miglibed e sikandan diye te Hirusalim ne amana nahale-gale. ⁵³ Ne layun de sikandan diye te timplu eyew te pegpasalamat te Manama.

Ka Meupiya ne Panugtulen Sumale ki Huwan

Igpewun-a

Ka migsulat te seini ne baseen iyan si Huwan ne sabeka te sapulu wey daruwa (12) ne hibateen ni Hisus. Sikandin ka hibateen ne miggeyinawaan amana ni Hisus, wey suled din si Santiyagu ne hibateen ded degma ni Hisus. Te ware pad neyimu ne me hibateen ensi Huwan ki Santiyagu, mangngengalap pad sikandan diye te lanew te Galiliya duma te amey ran ne si Sibidiyu. Te neyimu e sikandan ne me hibateen, layun sikandan egdumdumaa ni Hisus te me hipanawan din. Ka pegduma-ruma ni Huwan ki Hisus, sabeka ne pamalehet ne malehet iya ka nasulat te seini ne baseen.

Ka guhuren ni Huwan, diye migbunsud te pegpanengneng din ke nekey ka Lalag te Manama, ne neyimu e ne etew wey mig-ugpe e kayi te ampew te tane duma kanta. Nataman, nahuhud din e man-e ka meyitenged ki Huwan ne Talagbewutismu ne migguna-a miggendini ki Hisus eyew te peg-andam te keet-etawan te pegginguma ni Hisus.

Diye te kapitulu daruwa (2) peendiye te kapitulu sapulu

wey daruwa (12) ka nalein-lein ne me kein-inuwan ne innimu ni Hisus ne migpeila ne sikandin iya ka Kristu ne insaad te Manama ne egluwas te me Hudiyu, wey te langun ne kene ne me Hudiyu ne egpalintutuu wey egsalig kandin. Egkatahaan ta kayi ne due me etew ne migpalintutuu wey migsalig kandin wey neyimu ne me hibateen din, wey due degma miggubabe kandin.

Diye te kapitulu sapulu wey tatelu (13) peendiye te kapitulu sapulu wey pitu (17), nasulat ka amana ne meupiya ne pegpaalukuyey enni Hisus te me hibateen din te ware pad dakepa sikandin. Impanpanayan din sikandan lalahi wey baggeta su natahaan din e ne mahaan e ka timpu ne iglansang e sikandin te krus.

Diye te katammanan ne me kapitulu, nahuhud ka pegdakep ki Hisus wey ka peggukum kandin, ka peglansang kandin diye te krus, ka pegkeuyag din, wey ka pegpakita rin te me hibateen din.

Impaay-ayaran degma ni Huwan te egpanengneng ne egkarawat ta ka dasag ne umul ne ware egtamanan pinaahi te pegpalintutuu wey pegaslig ta ki Hisu Kristu. Sikandin de ka dalan, ka kamalehetan, wey ka umul.

Ka nasulat te seini ne baseen

Igpewun-a 1:1-18

Si Huwan ne Talagbe-wutismu wey ka an-anayan ne me hibateen ni Hisus 1:19-51

Ka immangimu ni Hisus ne nakita te keet-etawan 2:1-12:50

Ka katammanan ne simana diye te Hirusalim wey diye te marani te Hirusalim 13:1-19:42

Ka pegkeuyag wey ka pegpakita te Magbebaye 20:1-31

Ka pegpakita ni Hisus te me hibateen din diye te Galiliya 21:1-25

Ka Lalag ne egbehey te umul

¹ Te ware pad neyimu ne minsan nekey, duen e ka egngaranan te Lalag. Ka Lalag duma te Manama, wey iyan iya ka Manama. ² Puun te an-anayan, ka Lalag dume e te Manama. ³ Neyimu ka langun pinaahi te Lalag, wey ware minsan sabeka ne neyimu ne kene ne pinaahi kandin. ⁴ Ne ka Lalag, iyan egpuunan te umul ne iyan miglayag te suman-suman te me etew. ⁵ Nakateng-ew te marusilem ka kalayag, wey ware seini nareeg te marusilem.

⁶ Na, due etew ne insuhu te Manama ne egngaranan ki Huwan. ⁷ Migpamalehet sikandin diye te me etew meyitenged te kalayag, su eyew egpakanlintuu ka langun pinaahi te pegpamalehet din. ⁸ Ne kene ne si Huwan ka kalayag, piru

miggendini sikandin eyew egpamalehet meyitenged kayi. ⁹ Ne seini se malehet ne kalayag, iyan ka miggendini te kalibutan ne egteng-ew te langun ne etew.

¹⁰ Ne miggendini sikandin te kalibutan, ne minsan neyimu ka kalibutan pinaahi kandin, piru ware migila kandin ka nangugpe kayi. ¹¹ Miggendini sikandin te kandin ne inged, piru ka kandin ne keet-etawan ware migdawat kandin. ¹² Piru minsan hentew-a ne migdawat wey migpalintutuu kandin, imbehayan din te katenged ne egkeyimu ne anak te Manama. ¹³ Ware sikandan neyimu ne me anak te Manama pinaahi te pegpewulirey te alunggun wey te pegbuut naa te etew, ke kene, pinaahi te pegbuut te Manama.

¹⁴ Ne ka Lalag, neyimu ne etew wey miglemung mig-ugpe kanta. Amana sikandin ne meupiya wey hiid-uweng, wey malehet ka inlalag din. Nakita ney ka katelesan din, ka katelesan isip sabsabeka ne Anak te Manama ne Amey.

¹⁵ Ne migpamalehet si Huwan meyitenged kandin, wey migpanguleyi ka migkahi, "Sikandin ka ingkahi ku ne egpakaninundul keddi. Ne labew sikandin keddiey, su duen e sikandin te ware e pad miglesut."

¹⁶ Ne puun te dakel ne keupiya wey keyid-

u rin, ware tamanan te pegpanalangin din kanta.

¹⁷ Ka Balaud imbehey te Manama kanta pinaahi ki Muwisis, piru pinaahi ki Hisu Kristu ne miggunguma ka keupiya wey keyid-u, wey ka kamalehetan. ¹⁸ Ware minsan sabeka ne nakakita te Manama. Piru ka Anak te Manama ne layun duma te Amey rin, sikandin ka migpeila te Manama kanta.

Ka guhuren ni Huwan ne Talagbewutismu

(Mat. 3:1-12; Mar. 1:1-8;
Luk. 3:1-18)

¹⁹ Due me talagpanubad wey me Libita* ne insuhu te me pangulu te Hudiyu te Hirusalim ne egpeendiyeen ki Huwan su egpeinseen. Ne migkahi sikandan ka miginse, "Hentew kaa?"

²⁰ Ne ware miggeeles si Huwan su migpangguhud sikandin te malehet ne migkahi, "Kene ne sikeddi ka Kristu." †

²¹ Ne mig-inse e man-e sikandan kandin, "Hentew ke naan iya? Si Ilyas ka?"

Ne migtabak si Huwan, "Kena a ne si Ilyas."

Ne mig-inse e man-e sikandan, "Kema ke sikeykew ka Prupita ne egtetaharan ney?"

Ne migtabak e man-e si Huwan, "Kene ne sikeddiey."

²² Seeye naa, migkahi sikandan, "Na, panugtuli key ke hentew kaa, su eyew due igkatabak ney te migsuhu kanami. Nekey-a ka

igkalalag nu meytenged te pegkeetew nu?"

²³ Ne migtabak si Huwan, "Sikeddiey ka egkahiyen ni prupita Isayas ne eggendue:

'Due epanguleyi diye te mammara ne inged ne kene egkeugpaan ne egkahi,

Tul-ira niyu ka dalan te Magbebaye!'

²⁴ Ne iyan migsuhu te seeye ne me etew ka me Parisiyu.

²⁵ Ne mig-insaan dan e mane si Huwan, "Ne mania te egpamewutismu ka te kene ke bes ne Kristu wey ke si Ilyas naa, wey ke ka Prupita?"

²⁶ Ne migtabak si Huwan, "Egpamewutismu e re te weyig, piru due duma niyu kayi kuntee ne ware niyu neileyi. ²⁷ Egpakasinundul sikandin keddiey, piru kena a ne likes ne eggekad te hiket te sandal din."

²⁸ Neyitabu seini diye te Bitanya, diye te deyipag te weyig ne egngaranan te Hurdan ne egpamewutismuwan ni Huwan.

Ka migbayad te sale te me etew

²⁹ Te seup ne aldew, nakita ni Huwan si Hisus ne eggendiye te kandin. Ne dutu, migkahi e si Huwan, "Pammineg kew, kayid e ka Nati ne Karniru te Manama ne eg-awe te me sale te me etew kayi te ampew te tane! ³⁰ Sikandin

* **1:19** Ka me Libita ka talagbulig te talagpanubad. † **1:20** Ka igapasabut te Kristu, Insaad ne Manluluwas. **1:21** Mal 4:5; Diy 18:15,18. **1:23** Isa 40:3 (LXX).

ka egkahiyan ku ne eg-pakasinundul keddiey piru labew keddiey, su duen e sikandin te ware e pad ilesut. 31 Minsan sikeddi dengan, ware a nekeila ke hentew-a sikandin. Piru miggendini a ka egpamewutismu pinaahi te weyig su eyew egkeila sikandin te me kabuhalan ni Israel.

32 "Egpamalehet a ne nakita ku ka Panisingan te Manama ne miglene diye te kandin iling te seleppati puun diye te langit, wey migpalunggehaat seini diye te kandin. 33 Dengan, ware e pad nekeila ke hentew-a sikandin, piru ka Manama ne migsuhu keddi te peg-pamewutismu pinaahi te weyig, tapey e migkahi keddi, 'Ka etew ne egkakita nu ne eglenaan te Panisingan wey egpalunggehaat seini diye te kandin, sikandin naa ka egpamewutismu pinaahi te Panisingan.' 34 Ne nakita kud en iya sika kuntee, sikan naa ka egpamalehet a te sikandin iya ka Anak te Manama."

Ka an-anayan ne me hibateen ni Hisus

35 Te seup ne aldew, diyad e man-e si Huwan duma te daruwa ne hibateen din. 36 Ne nakita ni Huwan si Hisus ka eglihad, wey migkahi sikandin, "Senid e ka Nati ne Karniru te Manama!"

37 Ne seeye se daruwa ne hibateen din nakarineg te ingkahi rin wey migsinundul

e sikandan ki Hisus. 38 Te peglilingey ni Hisus, nakita rin sikandan ka egsinundul kandin. Ne mig-insaan din e sikandan, "Nekey-a ka eg-pammitawen niyu?"

Ne migtabak sikandan, "Rabi, hendei kaa mig-ugpe?" (Ka kaluwasan te Rabi, Talagpanulu.)

39 Ne migkahi si Hisus, "Kema, duma kew keddi eyew egkiteen niyu." Purisu migdume e sikandan wey nakita ran e ka in-ugpaan din, wey migpalunggehaat sikandan duma kandin su me alas kuwatu‡ e seeye te maapun.

40 Si Andris ne suled ni Simun Pidru ka sabeka te se-eye se daruwa ne nakarineg te ingkahi ni Huwan wey ka migsinundul ki Hisus.

41 Migweil-weil si Andris, impammitew rin ka suled din ne si Simun Pidru wey ingkahiyan, "Nakita ney e ka Misiyas." (Ka kaluwasan te Misiyas, Kristu.§) 42 Ne induma rin e si Simun diye te ki Hisus.

Te pegginguma ran diye te ki Hisus, migmemetmetan sikandin ni Hisus wey migkahiyan, "Sikeykew si Simun ne anak ni Huwan. Piru puun kuntee, egn-garanan kad e ki Sipas." (Ka Sipas iling ded ka kaluwasan te Pidru ne iyan igpasabut se, "batu.")

Ka peg-umew ni Hisus engki Pilipi ki Natanail

‡ 1:39 Te Grigu: mahaan e ka igkasapulu ne uras. § 1:41 Ka igpasabut te Kristu, ka insaad ne Manluluwas.

⁴³ Te seup ne aldew, nakasuman-suman si Hisus ne eggendiye te Galiliya. Ne nalambag din si Pilipi diye wey migkahiyan din, "Ikul ka keddiey." ⁴⁴ (Si Pilipi, matig-Bitsayda. Ne diye degma te sikan siyudad nangugpe ensi Andris wey Pidru.) ⁴⁵ Nataman, nakita ni Pilipi si Natanail wey migkahiyan din, "Nakita ney e ka etew ne nasulat diye te Balaud ni Muwisis wey nasulat ded degma te me prupita. Sikandin bes si Hisus ne matig-Nasarit ne anak ni Husi."

⁴⁶ Ne mig-insaan sikandin ni Natanail, "Duen bes ded meupiya ne etew ne matig-Nasarit?"

Ne migtabak si Pilipi, "Kema, egparumeey ki eyew egkakita nu."

⁴⁷ Te pegkakita ni Hisus te egparani e si Natanail diye te kandin, migkahi e sikandin, "Te, seinid e ka malehet ne kabuhalan ni Israil, wey kene mule sikandin egpanlimbung."

⁴⁸ Ne mig-inse si Natanail, "Immenu nu te eg-ila ked-diey?"

Ne migtabak si Hisus, "Te ware ke pad umawa ni Pilipi, nakita kud e sikeykew diye te lebut te kayu ne egngaranan te iggira."

⁴⁹ Ne migkahi si Natanail, "Talagpanulu, sikeykew bes iya ka Anak te Manama! Sikeykew bes iya ka Hari te Israil!"

⁵⁰ Ne migtabak si Hisus, "Kema ke migpalintutuu ke re puun te ingkahi ku ne nakita ku sikeykew diye te lebut te kayu? Subla pad kangkuwa due ka egkakita nu." ⁵¹ Ne migkahiyan ni Hisus sikandan langun, "Egnanganan ku sikaniyu te malehet: egkakita niyu ka langit ne egkalukatan wey ka me panalihan te Manama ne egpamaneug wey egpamaneyik diye te Anak te Etew."

2

Ka kasal diye te Kana

¹ Te peglihad e te daruwa ne aldew, due kasal diye te lungsud te Kana ne sakup te Galiliya. Ne migtambung ka iney ni Hisus, ²wey inninggat degma ensi Hisus duma te me hibateen din. ³ Te naamin e ka eg-inumen ne binu, migkahiyan e si Hisus te iney rin, "Naaminan e sikandan te binu."

⁴ Ne migtabak si Hisus, "Ine, kena a banasali su ware pad miggunguma ka keddi ne timpu."

⁵ Nataman, migkahiyan e te iney ni Hisus ka me suluhuanen, "Himuwa niyu ka minsan nekey ne igsuhu din kaniyu."

⁶ Ne due tuluuwen te me Hudiyu meyitenged te peg-ayad-ayad pegpanlu-lu. Sikan naa ka due hem diye ne banga ne batu ne egkatahuan ka tagse sabeka te daruwa ne pulu

(20) peendiye te tatelu ne pulu (30) ne gelun ne weyig.⁷ Ne migkahiyan ni Hisus ka me suluhuanen, "Hipenua niyu te weyig ka hen-em ne banga." Ne miggipenu dan en iya seeye.⁸ Nataman, migkahiyan e man-e sikandan ni Hisus, "Na, sakug kew naan e due te weyig wey uyana niyu diye te migpangulu te seini ne sahakeen." Ne intuman dan iya seeye.⁹ Ne miggeraman e degma te migpangulu te kasal ka weyig ne neyimu ne binu, piru ware sikandin nakanengneng ke hendei migpuun ka binu. (Piru nakanengneng e ka me suluhuanen ne migsakug te weyig.) Seeye naa, impeumew rin e ka egpangasawa¹⁰ wey migkahiyan, "Nabatasan te kasuluhan ne iyan iggun-a igsendad ka subla ne mananam ne binu ne igpeinum te me mahaliyug. Ne emun ke dakel e ka egkeinum dan, henduen pad ka kene amana ne meupiya ne binu. Piru sikeykew mule, kunteen nud e ipalihawang ka subla ne mananam ne binu!"

¹¹ Sika ka an-anayan ne innimu ni Hisus ne keiniuwani diye te Kana ne sakup te Galiliya. Impakita rin ka karesen din, wey migpalintutuu kandin wey migsalig ka me hibateen din.

¹² Te pegkapenga rutu, migtupang e si Hisus

peendiye te Kapirnaum duma te iney rin, me suled din, wey me hibateen din, wey migpalunggeaat sikan-dan diye te me pila ne aldew.

Ka peggendiye ni Hisus te timplu

(Mat. 21:12-13; Mar. 11:15-17; Luk. 19:45-46)

¹³ Te seeye ne timpu, mahaan e ka sahakeen te me Hudiyu ne egngaranan te Sahakeen te Peglihad te Panalihan te Manama,* purisu miggendiye si Hisus te Hirusalim.¹⁴ Ne diye te timplu, nakita rin ka egmamelegye te me baka, me karniru, wey me seleppati. Nakita rin man-e diye ka egmanaliyu te seleppi ne naminnuu te me lamisa ran.¹⁵ Ne puun dutu, miggimu si Hisus te lubid ne igpanlampes din, wey impangalew rin ka me ayam ne me karniru wey me baka, wey impalihawang din diye te timplu. Ne insabulak din ka me seleppi te egmanaliyu te seleppi wey impamalintuad din ka me lamisa.¹⁶ Ne migkahiyan din ka egmamelegye te seleppati, "Awaa niyu sika kayi! Kene niyu himuwa ne palingkiyan ka baley te Amey ku."¹⁷ Ne dutu, nasuman-suman e te me hibateen din ka nasulat diye te Kasulatan ne miggendue, "Ka subla ne peggeyinawa ku te baley nu ka egpakapanulud keddi diye te kamatayen."

* 2:12 Mat 4:13. 2:13 Iks 12:1-27. 2:17 Pitawa niyu diye listaan te me lalag ne diye egkakita te peka te libru. 2:17 Sal 69:9.

3*Ka pegpahuhurey enni Hisus wey Nikudimu*

¹⁸ Ne puun te maggimu rin, mig-insaan sikandin te me pangulu te me Hudiyu te migkahi, “Nekey-a ne kein-inuwan ka igkapapitew nu kanami ne due katenged nu te peggimu te iling kayi?”

¹⁹ Ne migtabak si Hisus, “Guhusa niyu seini se timplu, ne seled te tatelu ne aldew, igpes-ek ku red man-e.”

²⁰ Ne migkahi sikandan, “Miggingumaan te hep-at ne pulu wey hen-em (46) ne leg-un ka pegbebaley kayi, ne kuntee, igpes-ek nu re seled te tatelu ne aldew?”

²¹ Piru ka timplu ne egkahiyen ni Hisus, sika se lawa rin. ²² Purisu te timpu ne in-uyag e sikandin, nasuman-suman te me hibateen din ka inlalag din. Ne migpalintutuu e sikandan te nasulat te Kasulatan wey te inlalag ni Hisus meyitenged te lawa rin.

Nanengnengan ni Hisus ka suman-suman te me etew

²³ Ne diye te Hirusalim te timpu te Sahakeen te Pegihad te Panalihan te Manama, masalig ne me etew ka migpalintutuu wey migsalig ki Hisus[†] puun te pegkakita ran te me kein-inuwan ne neyimu rin. ²⁴ Piru ware mule migsalig si Hisus kandan su nanengnengan din ka langun ne etew. ²⁵ Ne kenad ne keilangan ne egpanugtulan pad sikandin meyitenged te me etew su nakanengneng e sikandin ke nekey ka diye te pusung dan.

¹ Ne due sabeka ne etew ne egngararan ki Nikudimu. Sabeka sikandin ne pangulu te me Hudiyu wey sakup te punduk te me Parisiyu. ² Sabeka ne marusilem, miggendiye sikandin te ki Hisus wey migkahi, “Talagpanulu, nakanengneng key ne talagpanulu ka ne impeendini te Manama, su ware egpekeyimu te me kein-inuwan iling te neyimu nu ke ware ka Manama diye te kandin.”

³ Ne migtabak si Hisus, “Egnangenan ku sikeykew te malehet: ware etew ne egkasakup te Peghari te Manama ke kene sikandin ig-abey iglesut.”

⁴ Ne mig-inse si Nikudimu, “Egmenuwen naan pad te ig-palesut ka etew ke buyag e? Kenad egkaayun ne eglibed pad sikandin egseled diye te getek te iney rin eyew igpalesut e man-e.”

⁵ Ne migtabak si Hisus, “Egnangenan ku sikeykew te malehet: ware etew ne egpakaseled te Migharian te Manama ke kene sikandin ig-anak pinaahi te weyig wey te Panisingan te Manama.

⁶ Su ka ig-anak te etew, etew re degma, piru ka ig-anak te Panisingan te Manama, ispirituwanen degma. ⁷ Purisu, kene ka keinu-inu ne migkahiyan ku

sikeykew te keilangan ne ig-abey ka iglesut. ⁸ Iling te kalamag ne minsan hendei egpabaye, egkarineg ta ka dahing kayi piru kene ta egkanengnengan ke hendei migpuun wey ke hendei egpabulus. Iling ded degma due ka langun ne ig-anak te Panisingan te Manama.”

⁹ Ne mig-inse si Nikudimu, “Egmenuwen naa seini?”

¹⁰ Ne migtabak si Hisus, “Ware ke bes nakanengneng kayi te mabantug ke ma perem ne talagpanulu kayi te Israil? ¹¹ Egnanganan ku sikeykew te malehet: ke nekey ka nanengnengan ney wey nakita, sikan ded ka egpamalehetan ney. Piru ware kew migpalintutuu te guhuren ney. ¹² Ke ware kew migpalintutuu te iga pangguhud ku kaniyu meyitenged te kayi te kalibutan, wey kew naan pa iya egpalintutuu ke iyan ku iga pangguhud ka meyitenged te diye te langit. ¹³ Ne ware pad etew ne nekeendiye te langit, angin e te seeye se migpamanenug puun te langit, ne iyan ka Anak te Etew.

¹⁴ “Ne iling te pegkayew ni Muwisis te putew ne uled te diye sikandan te mammara ne inged ne kene egkeugpaan, iling naan ded degma ka Anak te Etew ne keilangan ne egkayawen ¹⁵ eyew ka langun ne egpalintutuu wey egsalig kandin, egpakaangken te umul ne

ware egtamanan. ¹⁶ Su miggeyinawaan amana te Manama ka me etew kayi te ampew te tane, sikan naa ka imbehey rin ka sabsabeka ne Anak din su eyew ka langun ne egpalintutuu wey egsalig kandin, kene egpatey, ke kene, egpakaangken te umul ne ware egtamanan. ¹⁷ Su ware ipeendini te Manama ka Anak din kayi te ampew te tane eyew te peggukum te me etew, ke kene, te pegluwas kandan.

¹⁸ “Purisu ka minsan hentew ne egpalintutuu wey egsalig kandin, kene eggukuman ne egleparan, piru ka minsan hentew ne kene egpalintutuu kandin, tapey e newukuman su ware sikandin migpalintutuu te sabsabeka ne Anak te Manama. ¹⁹ Iling kayi ka peggukum: ka kalayag, ne-keendinid e te kalibutan piru ware geyinawei te me etew, ke kene, iyan dan miggeyinawaan ka marusilem su mareet ka eggimuwen dan. ²⁰ Su ka langun ne eggimu te mareet, kene egkeupian te malayag wey kene degma ne egparani te malayag su egkaaldek ne egkatahaan ka mareet ne eggimuwen dan. ²¹ Piru seeye se etew ne mig-ikul te kamalehetan, egparani te malayag su eyew egkatahaan ne iyan egpuunan te meupiya ne neyimu rin ka Manama.”

Si Hisus wey si Huwan ne Talagbewutismu

²² Te pegkapenga dutu, miggendiyad e te prubinsya te Hudiya ensi Hisus duma te me hibateen din. Ne migpalunggehaat sikandan diye, wey migpamewutismu sikandin. ²³ Ne si Huwan, migpamewutismu degma diye te Inun ne marani te Salim, su dakel ka weyig diye. Migpamewutismuwan din ka me etew ne nangendiye te kandin. ²⁴ (Te seeye ne timpu, ware pad naprisu si Huwan.) ²⁵ Ne dutu, migpakig-apul ka me hibateen ni Huwan te sabeka ne Hudiyu meyitenged te tuluuwen dan ne peglinis. ²⁶ Nangendiye sikandan te ki Huwan ne migkahi, "Talagpanulu, nasuman-suman nu pad seeye se etew ne duma nu dengan diye te deyipag te weyig ne Hurdan, ne impeila nu te me etew? Migpamewutismu man e degma sikandin kuntee wey nangendiyad e te kandin ka langun ne etew!"

²⁷ Ne migtabak si Huwan, "Ware egkeyimu te etew, angin e ke igbehey seini kandin te Manama. ²⁸ Sikaniyu mismu ka egpaka-pamalehet te migkahi ku ne kene ne sikeddiey ka Kristu, ke kene, impewune e re kandin ipeendini te Manama. ²⁹ Iling te egkasalen: ka epangasawa, iyan iya egpakkamuney te epangasaween. Ka alukuy te epangasawa ne

egtetahad kandin, egkahale ke egkarineg din e ka la-heng te epangasawa. Ne egpekeiling e naa degma te alukuy te epangasawa, ne amana a nahale kuntee. ³⁰ Su keilangan ne egpakaparib-abew sikandin, ne sikeddi, egpakapariralem."

Sikandin ka migpuun diye te langit

³¹ Sikandin se migpuun diye te langit iyan labew te langun. Ka migpuun kayi te ampew te tane, malebud de wey iyan de iya egkahuhud ka kayi re te ampew te tane. Piru, sikandin se migpuun diye te langit ka labew te langun. ³² Ne iyan din impamalehetan ka egkakita rin wey ka egkarineg din, piru ware epalintutuu te igpangguhud din. ³³ Piru seeye se epalintutuu te iglalag din, migpamalehet ne malehet ka inlalag te Manama. ³⁴ Su ka insuhu te Manama, epangguhud te lalag te Manama su ware tamanan te Panisingan ne imbehey te Manama diye te kandin. ³⁵ Amana geyinawei te Amey ka Anak din, ne ka langun imbehey rin diye te kandin. ³⁶ Ne minsan hentew ne epalintutuu wey egsalig te Anak din, egpakaangken te umul ne ware egtamanan. Piru ka kene epalintutuu wey egsalig te Anak din, kene egpakaangken te umul ne ware egtamanan, ne nasi

kene egkaawe ka langet te
Manama kandin.

4

Ka pegpakiglalag ni Hisus te malitan ne matig-Samarya

¹ Ne nakarineg ka me Parisiyu te iyan e masalig ka neyimu ne hibateen wey nabewutismuwan ni Hisus du te ki Huwan. ² (Piru ka malehet, kene ne si Hisus iya ka migpamewutismu su ka me hibateen din de.) ³ Te pegkanengneng ni Hisus te narineg seeye te me Parisiyu, mig-awe e sikandan diye te Hudiya wey miglibed e diye te Galiliya. ⁴ Ne due inged ne egngararan te Samarya ne egkaliharan dan te eggendiye te Galiliya.

⁵ Pegginguma ran te Samarya, due lungsud diye ne egngararan te Sikar ne marani te tane ne imbehey ni Hakub te anak din ne si Husi. ⁶ Ne due belun dutu ne impakali dengan ni Hakub. Ne diye migpinnuu si Hisus te ilis te belun su nabeley sikandin ka miggipanew. Me meudtu en iya seeye.

⁷ Ne dutu, nangendiye te lungsud ka me hibateen din ka egbebeli te egkakeen dan. Te iyug de te me hibateen din, due malitan ne matig-Samarya ne mglepew eyew epanakeru. Ne migkahiyan sikandin ni Hisus, "Peinume e pa." ⁸ (Te seeye ne timpu, nangendiye te siyudad ka me hibateen din su egbebeli te egkakeen.)

⁹ Ne migtabak ka malitan, "Mania te egbuyuan a nikeykew te weyig te Hudiyu ke ma, wey sikeddi, matig-Samarya a ne malitan?" (Nakakahia ka malitan te iling due su kenad iya eg-elit-elit ka me Hudiyu te me matig-Samarya.)

¹⁰ Ne migtabak si Hisus, "Ke nanengnengan nu pa perem ke nekey ka igkabehay te Manama, wey ke hentew seini se migbuyu keykew te weyig, sikeykew en iya perem ka egbuyu keddi wey egbehayan ku sikeykew te weyig ne egpakabehey te umul."

¹¹ Ne migkahi ka malitan, "Ahalen, ware timbe nu, wey maralem degma seini se belun. Hendei ke naa egaangey te weyig ne egpakabehey te umul? ¹² Impakali re te kaapuan ta ne si Hakub ka seini ne belun wey kayire iya degma sikandin mig-inum duma te me anak din wey te me ayam din. Mania, labew ke bes te kaapuan ta ne si Hakub?"

¹³ Ne migtabak si Hisus, "Minsan hentew ne eg-inum te seini ne weyig, egkam-maraan ded man-e; ¹⁴ piru ka egpekeinum te weyig ne igbehey ku kandin, kenad egkam-maraan. Su ka weyig ne igbehey ku kandin, egpekeiling te sebseb diye te lawa rin ne kene egkeetiyan ne egpakabehey te umul ne ware egtaman."

¹⁵ Ne migkahi ka malitan, "Ahalen, behayi a te sika ne weyig su eyew kena ad egkammaraan, wey eyew kena ad degma eggendini ka egsakeru."

¹⁶ Ne migkahiyan sikandin ni Hisus, "Hendiyei nu ka asawa nu wey dumaa nu kayi."

¹⁷ Ne migtabak ka malitan, "Ware asawa ku."

Ne migtabak si Hisus, "Malehet ka ingkahi nu ne ware asawa nu." ¹⁸ Su kalalimma kad nakaasawa wey ka iglukes nu kuntee, kene ne malehet ne asawa nu. Sikan naa ka malehet ka ingkahi nu."

¹⁹ Ne migkahi ka malitan, "Ahalen, pegsuman ku ne prupita ka." ²⁰ Ka me kaapuan ney, kayi migsimba te Manama te seini ne bubungan. Piru sikaniyu se me Hudiyu, migkahi kew te diye de te Hirusalim eleg ne egsimba te Manama."

²¹ Ne migkahiyan sikandin ni Hisus, "Pammineg ka inayen. Egginguma ka timpu ne kene kew e kayi te bubungan wey ke diye naa te Hirusalim egsimba te Amey ne Manama." ²² Sikaniyu se matig-Samarya, ware kew nekeila te egsimbeen niyu, piru sikanami se me Hudiyu, nekeila key mule te egsimbeen ney su kayi ma te me Hudiyu egpuun ka kaluwasan. ²³ Piru egginguma ka timpu, ka seinid en iya kuntee, ne ka malehet ne egsimba, egsimba te Manama pinaahi

te panisingan wey te kamaleshetan. Ne iling iya due ka igkeupii te Manama ne egsimba kandin. ²⁴ Ka Manama, panisingan sikandin. Purisu ka egsimba kandin, keilangan ne egsimba pinaahi te panisingan wey te kamaleshetan."

²⁵ Ne migkahi ka malitan, "Nakanengneng a te eggendini ka Misiyas ne egngaranan te Kristu. Emun ke eggingume e sikandin, igapasabut din kanta ka langun."

²⁶ Ne migtabak si Hisus, "Sikeddi seini se migpakiglalag keykew, sikan en iya ka egkahiyan nu."

²⁷ Ne dutu, nakalibed e degma ka me hibateen ni Hisus. Ne neinu-inu sikandin te nakita ran sikandin ne migpakiglalag te malitan. Piru ware sabeka kandan ne egpekeinse te malitan ke nekey ka igkeupii rin, wey ware degma egpekeinse ki Hisus ke mania te migpakiglalag sikandin te malitan.

²⁸ Seeye naa, mig-engkeran e te malitan ka banga din te miglibed diye te lungsud wey migkahiyan din ka me etew, ²⁹ "Kema, mahaan kew, wey tengtengi niyu ka etew ne migpanugtul keddi te langun ne neyimu ku. Sikandin buwad ka Kristu?" ³⁰ Ne nangawe ka me etew diye te lungsud wey nangendiye te ki Hisus.

³¹ Taheed te egpaling-gumaan pad ka me etew, imbanasalan si Hisus te me

hibateen din ne migkahi, "Talagpanulu, keen ke pa."

³² Piru migkahi si Hisus, "Due egkakeen ku ne ware niyu nanengnengi."

³³ Seeye naa, migmein-inseey ka me hibateen din ne migkahi, "Duen buwa migdulung kandin te egkakeen?"

³⁴ Ne migkahiyan sikandan ni Hisus, "Ka egkakeen ku, iyan sika se pegtuman te igkeupii te migsuhu keddiey, wey te peg-impus te himu ne impeyimu keddi. ³⁵ Due epad niyu ne eggenendue, 'Eggingumaan pad te hep- at ne bulan human ka tinggaani.' Piru egnanganan ku sikaniyu, tinggaani e kuntee. Pitawa niyu ka me pinamula diye te me kamet ne neyinuhan e wey eleg e ne eggaaniyen!

³⁶ Ka eggaani, egbayaran sikandin, wey seeye se egkahaani, eglimuren wey egbehayan te umul ne ware egtamanan. Purisu, egkahale seeye se migpamula duma te seeye se miggaani.

³⁷ Malehet iya ka eparen ne eggenendue, 'Lein ne etew ka egpamula wey lein ne etew ka eggaani.' ³⁸ Impeyipanew ku sikaniyu eyew eggaani te ware niyu ikalasey te pegpamula. Nalasey ka me duma piru meupiya kew su sikaniyu ka nasunged puun te kandan ne himu."

³⁹ Masalig ka matig-Samarya ne migpalintutuu

ki Hisus puun te migpanug-tulan sikandan te malitan te nanengnengan ni Hisus ka langun ne neyimu rin. ⁴⁰ Te pegginguma te me matig-Samarya diye te ki Hisus, inhangyu dan sikandin ke egkaayun ne eggirehe pad sikandin diye te kandan. Purisu, miggirehe pad iya si Hisus diye seled te daruwa ne aldew.

⁴¹ Ne migmasalig pad man-e ka migpalintutuu kandin tenged te pegpanulu din.

⁴² Ne migkahiyan te me etew ka malitan, "Kuntee, migpalintutuu key e kandin, kene ne puun de te impangguhud nu kanami, ke kene, puun te sikanami en iya ka nakarineg kandin. Ne natahaan ney e ne sikandin bes iya ka Manluluwas te me etew kayi te ampew te tane."

Ka pegbawi ni Hisus te anak te upisyal

⁴³ Te nararuan e ensi Hisus diye, mig-awe e sikandan dutu wey miggendiyad e te Galiliya. ⁴⁴ (Ne si Hisus mismu ka migkahi ne kene egtahuren ka prupita diye te inged ne intulinan din.)

⁴⁵ Te pegginguma rin diye te Galiliya, meupiya ka pegragsahipe kandin te me etew. Su nekeendiye ma sikandan te Hirusalim te timpu te Sahakeen te Pegli-had te Panalihan te Manama wey nakakita degma sikan-dan langun te immangimu ni Hisus diye.

⁴⁶ Ne miglibed e man-e si Hisus diye te Kana ne sakup te Galiliya, ka inged ne miggimuwan din te binu puun te weyig. Ne dutu, due sabeka ne upisyal te gubirnu ne migdalawan te anak din ne lukes diye te Kapirnaum. ⁴⁷ Te pegkarineg din ne miglibed si Hisus diye te Galiliya puun te Hudiya, migdagdahew sikandin miggendiye te ki Hisus ne migpeyid-u-hid-u kandin ne eggendiye te Kapirnaum eyew egbawian ka anak din ne egkabigtawan e. ⁴⁸ Migkahiyen sikandin ni Hisus, “Wey kew re egpal-intutuu keddi ke egpakakita kew te me palinneu wey me kein-inuwan ne himu.”

⁴⁹ Piru migtabak ka upisyal, “Ahalen, duma ke pa ubag keddi te kene pad egkabigtawan ka anak ku.”

⁵⁰ Ne migtabak si Hisus kandin, “Uli kad e su egkeulian e ka anak nu.”

Migpalintutuu ka upisyal te inlalag ni Hisus diye te kandin, ne sikan de ne miguli sikandin. ⁵¹ Te egpatiralan pad sikandin, insinugung e sikandin te me suluhuanen din wey migpangguhuran, “Manekal e ka anak nu.”

⁵² Ne mig-inse sikandin ke nekey ne uras ne migkabaluan ka anak din. Ne

migtabak ka me suluhuanen, “Inlibuwanan e sikandin gabii te me ala una* te maapun.” ⁵³ Ne nasuman-suman te upisyal ne seeye iyan urasa ka pegkahi ni Hisus te egkeulian e ka anak din. Purisu, migpalintutuu sikandan langun se talta-laanak ki Hisus.

⁵⁴ Sika ka igkarangeb ne kein-inuwan ne innimu ni Hisus te pegginguma rin diye te Galiliya puun te Hudiya.

5

Ka pegbawi ni Hisus te etew ne diye te lanew

¹ Te pegkapenga dutu, miggendiyad e man-e si Hisus te Hirusalim eyew te pegtambung te sahakeen te me Hudiyu. ² Ne diye te Hirusalim, due gumawan ne bayaanan te me karniru. Ne due lanew ne marani te seeye ne gumawan ne ingngaranan te me Hudiyu te Bitsata. Due lalimma ne helunganan ne nakaalingkus te lanew ³⁻⁴ ne impangibatan te susuluhi ne egmanderalu, me butud, me pungku, wey kene egkengaweil se lawa ne me etew.* ⁵ Ne due sabeka ne etew diye ne tatelu ne pulu wey walu (38) e ne leg-un ka migderalu. ⁶ Nakita ni Hisus ka etew ne miggibat diye wey nanengnengan din e degma ka kaluhey te pegderalu rin.

* **4:52** Te Grigu: Igkapitu ne uras. ka birsikulu 4 piru ware seini diye te malehet ne migpuunan. Intimul naan de seini ne miggendue: Egtetahad sikandan ke egkalihew ka weyig su due timpu ne egpamaneg ka panalihan te Manama eyew eglilihew. Ka egpekewun-a egpakeseneb te weyig ne miglihew te panalihan, egkeulian te minsan nekey ne dalu rin.

* **5:3-4** Due me sinulat ne inlagkes ka birsikulu 4 piru ware seini diye te malehet ne migpuunan. Intimul naan de seini ne miggendue: Egtetahad sikandan ke egkalihew ka weyig su due timpu ne egpamaneg ka panalihan te Manama eyew eglilihew. Ka egpekewun-a egpakeseneb te weyig ne miglihew te panalihan, egkeulian te minsan nekey ne dalu rin.

Seeye naa, mig-insaan din e ka etew, "Egkeupian ka ne egkeulian?"

⁷ Ne migtabak ka egderalu, "Ahalen, egkeupian a perem piru ware etew ne egpaseneb keddi due te weyig ke egkali-hew e sika te panalihan, su emun ke egpeenduen ad e te weyig, duen e egpekewun-a keddiey."

⁸ Ne migkahiyan sikandin ni Hisus, "Enew ka, wey uyana nu ka hibatanan nu wey hipanew kad."

⁹ Sahuhune ne neulian ka etew te dalu rin, wey insabil-bil din e ka hibatanan din wey miggipanew e.

Neyitabu seeye te Aldew te Peggimeley. ¹⁰ Purisu migkahiyan te me pangulu te me Hudiyu ka lukes ne neulian, "Mania te mig-uyan ka te hibatanan nu te Aldew kuntee te Peggimeley? Supak seini te Balaud ta."

¹¹ Ne migtabak ka etew, "Ka migbawi keddi ka migsuhu ne igpeuyan ka hibatanan ku wey egpeyipanawen a."

¹² Seeye naa, mig-insaan dan ka etew ke hentew ka migsuhu kandin te peg-uyan te hibatanan din wey te peg-peyipanew kandin.

¹³ Piru ware neileyi te etew ke hentew ka migbawi kandin, su nakasewug-sewug man-e si Hisus te susuluhi ne me etew.

¹⁴ Nataman, nakite e man-e ni Hisus diye te timplu ka etew ne imbawian din wey

migkahiyan din, "Tengtengi nu naa te neulian kad en iya. Kene kad himu te sale su kema ke subla pad ne mareet ka egkeyitabu keykew."

¹⁵ Nataman, mig-awe e ka etew ne migpangguhud te me pangulu te me Hudiyu ne si Hisus bes ka migbawi kandin. ¹⁶ Ne puun dutu, migbunsuran e te me pangulu te me Hudiyu si Hisus te egbayad-bayad tenged su migpamawi sikandin te Aldew te Peggimeley. ¹⁷ Ne migkahiyan sikandan ni Hisus, "Kene eg-engked ka Amey ku ne eggimu, sikan naa ka kena a degma eg-engked."

¹⁸ Puun te ingkahi ni Hisus, nanasnasion de iya nalelehet ka me pangulu te me Hudiyu ne eggimatey kandin, su kene ne iyan de egpuunan ka pegrupak din te Balaud meyitenged te Aldew te Peggimeley, ke kene, migkahi pad man-e sikandin te ka Manama iyan iya ka Amey rin. Iyan kaluwasan due ne nekeiling sikandin te Manama.

Ka geem te Anak te Manama

¹⁹ Purisu migkahi si Hisus diye te kandan, "Egnanganan ku sikaniyu te malehet: ware egkeyimu te Anak ke sikandin de. Eggimu re sikandin ke nekey ka nakita rin ne eggimuwen te Amey rin. Ke nekey ka eggimuwen te Amey, iling ded degma ka eggimuwen

te Anak. ²⁰ Miggeyinawaan amana te Amey ka Anak din wey impakita rin kandin ka langun ne eggimuwen din. Igpakita rin pad man-e diye te Anak din ka subla pad kayi ne me kein-inuwan, ne sika ka egpaktepeinu-inu kaniyu. ²¹ Eg-uyahen te Amey ka me minatey wey egbehayan te umul, ne egbehey red degma ka Anak te umul te seeye se igkeupii rin ne eguyahen. ²² Kene eggukum ka Amey te minsan hentew, su imbehey rin diye te Anak din ka katenged te peggukum, ²³ su eyew egtahud ka langun te Anak iling te pegtahud dan te Amey. Purisu, ka kene egtahud te Anak, kene degma egtahud te Amey ne migsuhu kandin.

²⁴ “Egnanganan ku sikaniyu te malehet: ka egpammineg te iglalag ku wey egpalintutuu te migsuhu keddiey, due umul ne ware egtamanan. Kenad sikandin eggukuman ne eglegparan tenged su nakabaye e sikandin puun te kamatayen peendiye te umul. ²⁵ Egnanganan ku sikaniyu te malehet: eggingga ka timpu, ne ka seinid en iya kuntee, ne egdineg ka me minatey te laheng te Anak te Manama, ne seeye se egpakterineg, egkeuyag. ²⁶ Ka Amey ka egpakteheyy te umul, ne iling ded degma ka Anak din su imbehayan din te

katenged te pegbehey te umul. ²⁷ Migbehayan din man-e ka Anak te katenged te peggukum, tenged su Anak ma sikandin te Etew. ²⁸ Kene kew keinu-inu kayi su eggingga ka timpu ne egpakterineg te laheng din ka langun ne me minatey diye te lebenganan, ²⁹ wey egmanlihawang sikandan. Ka seeye se meupiya se neyimu, eg-uyahen wey egbehayan te umul ne ware egtamanan. Ka seeye se maret se neyimu, eg-uyahen ded degma piru eggukuman ne eglegparan.”

Kamigpamalehet meyitenged ki Hisus

³⁰ Mig-abey pad man-e migkahi si Hisus, “Ware egkeyimu ku ke sikeddiey re. Su minsan eggukum a, piru iyan ku eg-ikulen ka iglalag te Manama keddii. Purisu matareng ka peggukum ku su kene e ma eggimu te igkeupii ku, ke kene, seeye de se igkeupii te migsuhu keddiey.

³¹ “Emun ke sikeddiey re ka egpamalehet meyitenged te pegkeetew ku, kene seini egkapalintutuuwan. ³² Piru due duma ne migpamalehet meyitenged keddiey, wey nakanengneng a ne malehet ka ingkahi rin meyitenged keddii. ³³ Due insuhu niyu diye te ki Huwan eyew te peg-inse-inse kandin, wey migpangguhud sikandin te malehet meyitenged keddii.

³⁴ Kena a egkeilangan te pegpamalehet te me etew meyitenged keddiey, piru miglalag ku re sika eyew egpalintutuu kew wey egkaluwas kew. ³⁵ Nekeiling si Huwan te impareketan ne sulu ne miglayag. Ne ingkahale niyu ka peglayag din minsan te malepet de ne timpu. ³⁶ Piru due egpamalehet meyitenged keddiey ne subla pad te pegpamalehet ni Huwan. Su ka immangimu ku ne igmeyimu iya te Amey ku keddiey, iyan sika ka migpamalehet te impeendini a iya te Amey ku. ³⁷ Ne ka Amey ne migpeendini keddiey iyan iya migpamalehet meyitenged keddii. Piru ware kew en iya nakakita te ulaula rin wey ke nakarineg naa te laheng din, ³⁸ wey warad iya nakapamula te pusung niyu ka lalag din, su ware kew migpalintutuu keddii te impeendini rin. ³⁹ Inugsi-ugsi niyu ka Kasulatan su kahiyen niyu ne sika ka paahi ne egpakaangken kew te umul ne ware egtamanan. Ne ka Kasulatan, migpamalehet iya meyitenged keddiey ⁴⁰ piru ware kew red iya mane migparani keddiey eyew egpakaangken te umul ne wäre egtamanan.

⁴¹ “Kena a egparayandayan te me etew. ⁴² Piru neilaan ku mule sikaniyu wey nanengnengan ku ne ware diye te pusung niyu ka geyinawa te Manama.

⁴³ Miggendini a ka miguyan te katenged te Amey ku, piru ware a nikaniyu dawata. Ne ke due lein ne eggendini te kandin de ne katenged, iyan niyu nasi egdawaten. ⁴⁴ Egmenuwen niyu te egpalintutuu ke iyan niyu re igkeupii ne egmekegdayan kew, piru ebalaharen niyu ka pegdayan ne egpuun te sabsabeka ne Manama. ⁴⁵ Piru kene kew egsuman-suman ne sikeddi ka egsumbung kaniyu diye te Amey ku. Si Muwisis iya ne migpallatengan niyu ka egsumbung kaniyu. ⁴⁶ Ke malehet ne migpalintutuu kew ki Muwisis, egpalintutuu kew perem degma keddiey su sikandin iya ka migsulat meyitenged keddii. ⁴⁷ Piru tenged su kene kew egpalintutuu te insulat din, sikan naa ka kene kew degma egpalintutuu te iglalag ku kaniyu.”

6

*Ka pegpakeen ni Hisus te 5,000 ne me etew
(Mat. 14:13-21; Mar. 6:30-44; Luk. 9:10-17)*

¹ Pegkapenga dutu, miglapas e man-e ensi Hisus diye te Lanew te Galiliya ne egngararan degma te Lanew te Tibiryas. ² Amana ne masalig ne me etew ka migsinsinundul engki Hisus su nakakita sikandan te me kein-inuwan ne innimu rin te pegpamawi din te egmanderalu. ³ Ne

migpatakereg e ensi Hisus
duma te me hibateen din
diye te bubungan wey diye
migpinpinnuu. ⁴ Te seeye
ne timpu, mahaan e man-e
ka Sahakeen te Peglihad te
Panalihan te Manama. ⁵ Te
pegtengteng ni Hisus, nakita
rin ka susuluhi ne me etew
ne egpeendiye te kandan.
Ne migkahiyan din si Pilipi,
“Hendei ki egpakabebeli te
egkakeen ne igaapeen ta te
seini ne me etew?” ⁶ (Inlalag
din sika eyew te peg-eleg-eleg
ki Pilipi, kunaleg te tapey e
sikandin nakanengneng ke
nekey ka eggimuwen din.)

⁷ Ne migtabak si Pilipi,
“Minsan pad ke egbebeli ki
te paan ne bali te daruwa
ne gatus (200) ne dinaryu,
* wey egdereiseken te re
te pegpamehey, kene de
egkakeenan ka seini ne me
etew.”

⁸ Ne migkahiyan sikandin
te sabeka te me hibateen din
ne egngararan ki Andris ne
suled ni Simun Pidru, ⁹ “Due
lukes-lukes kayi ne due paan
ne lalimma ne malisen wey
daruwa ne ngalap te weyig.
Piru nekegmenu naan de iya
sika te iling kayi ne kasu-
luhan?”

¹⁰ Ne migkahi si Hisus,
“Ne papinnuuwa niyu ka me
etew.” Purisu immapinnuu
ran e ka me etew diye te me
hilamunen, su dakel ka me
hilamunen dutu. Lalimma
ne libu (5,000) ka kasuluhan
te me lukes de. ¹¹ Nataman,
ingkuwa ni Hisus ka me

paan wey migpasalamat pad
sikandin te Manama hendue
ipamehey diye te me etew ne
namminnuu. Ne iling ded ka
ngalap, impanalad din ded
degma diye te me etew, wey
nangeen sikandan taman te
igkeupii ran. ¹² Te nabulung-
bulung e sikandan langun,
migkahiyan e ni Hisus ka
me hibateen din, “Limura
niyu ka nasame su egkaraat.”
¹³ Seeye naa, impanlimud
dan e ka nasame puun
te lalimma ne paan, wey
nakapenu te sapulu wey
daruwa (12) ne liyang ka
nasame.

¹⁴ Te pegkakita te me
etew te kein-inuwan ne
innimu ni Hisus, migkahi
sikandan, “Seinid en iya ka
Prupita ne nasulat diye te
Kasulatan ne eggendini te
ampew te tane!” ¹⁵ Ne tapey
e nakanengneng si Hisus
ne egpehesen sikandin te
me etew eyew eggimuwen
dan ne Hari, seeye naa ka
mig-awe sikandin diye wey
miglied migtakereg diye te
bubungan ne migsabsabeka.

*Ka peggipanew ni Hisus
diye te kulit te weyig
(Mat. 14:22-33; Mar. 6:45-
52)*

¹⁶ Ne hengkayi se eg-
pangilumkilum e, nanupang
e ka me hibateen din diye te
lanew ¹⁷ wey nanguntud te
balangey ka eglapas diye te
Kapirnaum. Ne nasagkup de
due, ware pad nakasundul si
Hisus kandan. ¹⁸ Taheed te

* **6:7** Ka sabeka ne dinaryu, eleg ne igbayad te etew ne egtrabahu te senge
kaaldew.

eglapas e sikandan, migpan-galamag te kekesehi wey migdakel e ka me bunlud. ¹⁹ Te me lalimma e wey ke hen-em e ne kilumitru ka imbaye dan te pegpamegsey, nakita ran si Hisus ka miggipanew diye te weyig ne egpeendiye te unturanan dan, wey nenaaldek sikandan. ²⁰ Piru migkahiyan sikandan ni Hisus, “Kene kew kaaldek su sikeddiey seini.” ²¹ Ne dutu, igkeupii ran ne eg-untud si Hisus te balangey, wey sauhune ne nakatuhun sikandan diye te eggendiyaan dan.

Ka pegpammitew te me etew ki Hisus

²² Te seup ne aldew, ka me etew ne migpalungge-haat pad diye te deyipag te linew nakamaan-maan te nangawe e ka me hibateen ni Hisus ne nanguntud te sabsabeka ne balangey diye. Nanengnengan dan man-e ne ware migduma si Hisus te me hibateen din su sikandan de ka nangi-panew. ²³ Ne dutu, due me balangey puun te Tibiryas ne nanginguma diye te marani te nangeenan dan te paan te napasalamat e seeye te Magbebaye. ²⁴ Purisu te pegkanengneng dan ne ware bes e si Hisus diye wey ka me hibateen din, nanguntud e sikandan te me balangey wey nangendiyad te Kapirnaum ka egpammitew ki Hisus.

Ka keenen ne egpakabehey te umul

²⁵ Pegginguma te me etew diye te deyipag te lanew, nakita ran si Hisus wey miginsaan dan, “Talagpanulu, ken-u ke bes pad kayi?”

²⁶ Ne migtabak si Hisus, “Egnanganan ku sikaniyu te malehet: kene ne iyan niyu igpammitew keddi su nakakita kew te me kein-inuwan ne neyimu ku, ke kene, puun de su impakeen ku sikaniyu te paan wey nenabulung kew. ²⁷ Kene kew pakannekal ne eggimu para te keenen ne eglihad de, ke kene, te keenen ne egpakabehey te umul ne ware egtamanan. Ne ka Anak te Etew iyan egbehey kaniyu kayi su sikandin ka imbehayan te Amey ne Manama te katenged te pegbehey kayi.”

²⁸ Puun due, mig-inse sikandan kandin, “Nekey naa ka eleg ne eggimuwen ney eyew egkatuman ney ka igpeyimu te Manama?”

²⁹ Ne migtabak si Hisus, “Seini ka igkeupii te Manama ne eggimuwen niyu: palintuu wey salig kew te insuhu din.”

³⁰ Ne migtabak sikandan, “Nekey naa ne kein-inuwan ka igkapapitew nu kanami eyew egpakapalintuu key keykew? Nekey ka eggimuwen nu? ³¹ Ka me kaap-apuan ney dengan, nangeen te mana te diye pad sikandan te mammara ne

inged ne kene egkeugpaan. Su sumale te nasulat te Kasulatan, ‘Imbehayan din sikandan te keenen ne diye egpuun te langit.’”

³² Ne migkahi si Hisus, “Egnanganan ku sikaniyu te malehet: kene ne si Muwisis ka migbehey kaniyu te egkeenen ne egpuun diye te langit, su ka Amey ku. Ne sikandin ded man-e ka egbehey kaniyu te malehet ne keenen ne egpuun diye te langit. ³³ Su ka keenen ne igbehey te Manama, iyan sika se egpamanueg puun te langit wey egbehey te umul te me etew kayi te ampew te tane.”

³⁴ Ne migkahiyan dan si Hisus, “Ahalen, behayi key ma layun te sika ne keenen.”

³⁵ Ne migkahiyan ni Hisus sikandan, “Sikeddiey ka keenen ne egbehey te umul. Ka egparani keddi kenad iya eggutasan, wey ka egpalintutuu wey egsalig keddi, kenad egkammaraan. ³⁶ Piru iling te nakahi kud e kaniyu ne minsan nakita ad nikaniyu, kene kew red iya man-e egpalintutuu. ³⁷ Ka langun ne etew ne igbehey te Amey ku keddi, egparani keddiey. Ne ka egparani keddi, kene ku egdeldelen. ³⁸ Su wara a migpamanueg puun te langit eyew te pegtuman te keddi ne igkeupii, ke kene, eyew te pegtuman te igkeupii te Amey ku ne migsuhu keddiey. ³⁹ Ne seini ka igkeupii te migsuhu

keddiey: egtantanuran ku ka imbehey rin keddi ne kene egkatarinan te minsan sabeka, piru eg-uyahen ku sikandan te katammanan ne aldew. ⁴⁰ Su seini ka igkeupii te Amey ku: ka langun ne egpammitew wey egpalintutuu wey egsalig te Anak, egpakaangken te umul ne ware egtamanan wey eg-uyahen ku sikandan te katammanan ne aldew.”

⁴¹ Seeye naa, migsalew-salew e ka me Hudiyu meyitenged kandin tenged te ingkahi rin ne sikandin ka keenen ne diye egpuun te langit. ⁴² Migkahi sikandan, “Si Hisus ma sika ne anak ni Husi. Nakataha ki ke hentewa ka amey wey ka iney rin, ne mania te egkahi sikandin te diye din egpuun te langit?”

⁴³ Ne migtabak si Hisus, “Kene kew e pasalsalawey.

⁴⁴ Ware egpakaparani keddi ke kene egpeparaniyen te Amey ne migsuhu keddi. Ne seeye se egparani keddi, eg-uyahen ku red te katammanan ne aldew. ⁴⁵ Due insulat te me prupita ne eggenendue, ‘Egpanuluen sikandan langun te Manama.’ Purisu, ka langun ne egpammineg te Amey wey egdawat te iglalag din, egparani keddiey. ⁴⁶ Ne ware seini migpasabut ne due etew ne nakakita te Amey, su ware iya nakakita kandin angin e keddi te diye migpuun te Manama.

⁴⁷ Egnanganan ku sikaniyu te malehet: ka egpalintutuu

wey egsalig keddi, due umul ne ware egtamanan.⁴⁸ Sikeddi ka keenen ne egbehey te umul.⁴⁹ Ka me kaap-apuan niyu, nangeen te mana te diye pad sikandan te mammara ne inged ne kene egkeugpaan, piru nammatey man ded sikandan.⁵⁰ Piru lein ka seini se keenen ne migpamaneug puun te langit. Minsan hentew ne egkeen kayi, kenad e egpatey.⁵¹ Sikeddiey ka manekal ne keenen ne migpamaneug puun te langit. Minsan hentew ne egkeen te seini ne keenen, egkeuyag te ware egtamanan. Ne iyan keenen ka lawa ku ne igbehey ku eyew egpakaangken te umul ne ware egtamanan ka me etew kayi te ampew te tane."

⁵² Ne dutu, nenekegapul ka me Hudiyu diye. Ne migkahi sikandan, "Egmenuwen te seini ne etew te pegbehey te lawa rin eyew igpakeen kanta?"

⁵³ Ne migkahiyan sikandan ni Hisus, "Egnangenan ku sikaniyu te malehet: emun ke kene kew egkeen te lawa te Anak te Etew, wey kene eg-inum te kandin ne langesa, kene kew egpakaangken te umul.⁵⁴ Piru ka minsan hentew ne egkeen te keddi ne lawa, wey eg-inum te keddi ne langesa, due umul ne ware egtamanan, wey eguyahen ku te katammanan ne aldew.⁵⁵ Su ka lawa ku, iyan sika ka malehet ne keenen, ne ka langesa ku, iyan sika ka malehet

ne inumen.⁵⁶ Ka minsan hentew ne egkeen te keddi ne lawa wey eg-inum te keddi ne langesa, eg-uugpe sikandin kayi te keddiey wey eg-ugpa a degma diye te kandin.⁵⁷ Ka manekal ne Amey ka migsuhukeddi, wey neuyag a tenged kandin. Ne iling naan ded degma due, ka egkeen keddiey, egkeuyag tenged keddi.⁵⁸ Ne iyan iya seini ka keenen ne egpuun diye te langit, kene ne iling seini te keenen ne mana ne ingkeen te me kaap-apuan niyu, su nammatey red sikandan. Su ka egkeen te seini ne keenen, egkeuyag te ware egtamanan."

⁵⁹ Inlalag seeye ni Hisus te pegpanulu din diye te simbaan te me Hudiyu diye te Kapirnaum.

Ka lalag ne egpakabehey te umul

⁶⁰ Masalig ne me hibateen din ka nakarineg kayi wey nakakah, "Malised seini se impanulu din. Hentew-a ka egpekeuyun kayi?"

⁶¹ Ne minsan ware migpanugtul ki Hisus, piru nanengnengan din ne migsalew-salew ka me hibateen din meyitenged te impanulu din. Sikan naa ka migkahiyan din sikandan, "Neenenduenan kew te ingkahi ku?⁶² Emun ke iling due, wey naan pa iya ke egkiteen niyud ka Anak te Etew ne egbatunen igpalibed diye te impuunan din.⁶³ Ka egbehey te umul iyan ka Panisingan te Manama wey

kene seini egkeyimu te etew. Ka inlalag ku kaniyu, diye egpuun te Panisingan te Manama wey egpakabehay te umul.⁶⁴ Piru due duma niyu kayi ne kene egpalintutuu keddi." (Ingkahi seini ni Hisus su tapey rin e nanengnengi ke hentew ka kene egpalintutuu wey ke hentew degma ka eg-akal kandin.)⁶⁵ Ne migpabulus sikandin migkahi, "Sika ka egpuunan ne migkahiyan ku sikaniyu te ware egpakaparani keddi, angin e te igpeparani keddi te Amey."

⁶⁶ Ne puun dutu, masalig ka me hibateen din ne migengked wey warad migduma kandin.

⁶⁷ Ne migkahiyan ni Hisus ka sapulu wey daruwa (12) ne hibateen din, "Ne sikaniyu, eg-engkeran e naa degma nikaniyu?"

⁶⁸ Migtabak si Simun Pidru kandin, "Magbebaye, hentew naa ka egkeendiyaan ney? Sikeykew re ka due lalag ne egpakabehay te umul ne ware egtamanan.⁶⁹ Migpalintutuu key keykew wey nanengnengan ney ne sikeykew iya ka Matulus ne in-alam te Manama."

⁷⁰ Ne migkahiyan sikandan ni Hisus, "Sikeddiey iya ka mig-alam kaniyu te sapulu wey daruwa (12). Piru ahalen te me busew ka sabeka kaniyu."⁷¹ Si Hudas ne anak ni Simun Iskaryuti ka egkahiyan ni Hisus, su minsan sabeka sikandin te

sapulu wey daruwa (12) ne hibateen, sikandin iya ka egakal ki Hisus.

7

Ka peggubabe te me suled ni Hisus kandin

¹ Pegkapenga dutu, migleug-leug si Hisus diye te Galiliya. Kene sikandin egleug-leug diye te Hudiya, su egbentaanan sikandin te eggimatey te me Hudiyu.² Te seeye ne timpu, mahaan e ka sahakeen te me Hudiyu ne egngararan te Sahakeen te me Balungbalung,³ wey migkahiyan si Hisus te me suled din, "Awe ka kayi wey hendiye ka te Hudiya su eyew egpakkita ka me hibateen nu te me kein-inuwan ne eggimuwen nu.⁴ Su ware etew ne eggeles te eggimuwen din ke egkeupian sikandin ne egpabantug. Ne puun su eggimu ke ma te iling due, panengnenga nu nasi ka me etew kayi te ampew te tane meyitenged keykew!"⁵ (Nalalag sika te me suled ni Hisus su minsan sikandan, ware migpalintutuu wey migsalig kandin.)

⁶ Ne migkahiyan sikandan ni Hisus, "Kene pad eleg keddi kuntee ne eggendiye, piru egkaayun kew mule te minsan ken-u.⁷ Kene egkaayun ne egdumutan kew te me etew kayi te ampew te tane, piru egdumutan a mule nikandan su impamalehetan ku ne mareet ka hinimuwan dan.⁸ Hendiye kew e te

sahakeen. Kene e pad eggendiye su kene pad ne eleg ka timpu ne eggimuwen ku ka eleg ne eggimuwen ku.”⁹ Sika ka inlalag din kandan wey migpalunggehaat pad sikandin diye te Galiliya.

Ka Sahakeen te me Balung-balung

¹⁰ Te nangipanew e ka mesuled ni Hisus peendiye te sahakeen, migsinundul e degma si Hisus piru ware migpeeyang-heyang. ¹¹ Ne impammitew sikandin te me pangulu te me Hudiyu diye te sahakeen wey nanginse sikandan ke hendeid e sikandin.

¹² Te seeye ne kalibulungan, masalig ka egmananaasey meyitenged kandin. Ka duma migkahi, “Meupiya sikandin ne etew.” Piru ka duma migkahi degma, “Kene ne malehet sika, su eg-akalan din de ka me etew.” ¹³ Piru ware sabeka kandan ne egpakkawangal-wangal meyitenged kandin su egkaaldek sikandan te me pangulu te me Hudiyu.

¹⁴ Te mahaan e eg-pekegliware ka sahakeen, miggendiye si Hisus te timplu wey migpanulu. ¹⁵ Ne dutu, neinu-inu ka me pangulu te me Hudiyu wey migkahi, “Immenu rin buwa te pegkateu te ware ma sikandin nekeiskuya?”

¹⁶ Seeye naa, intabak sikan dan ni Hisus, “Ka pegpanulu ku, kene egpuun kayi te keddiey, ke kene, diye egpuun te

Manama ne migsuhu keddi. ¹⁷ Minsan hentew ne egkeupian ne eggimu te igkeupii te Manama, egpakaneng-neng ke diye naa egpuun te Manama ka pegpanulu ku wey ke kayi re egpuun te keddiey. ¹⁸ Ka etew ne eglalag puun te kandin de ne suman-suman, egpabantug te pegkeetew rin. Piru ka etew ne iyan igpabantug ka migsuhu kandin, egkapalintutuwan wey kene ne ubaten. ¹⁹ Imbehayan kew ni Muwisis te Balaud te Manama, menu ma iya? Piru ware minsan sabeka kaniyu ne migtuman te Balaud, su emun ke migtuman kew pa perem, kena a nikaniyu eggimatayan.”

²⁰ Ne migtabak ka me etew, “Migserepan kad te busew! Hentew ma ka egkeupian ne eggimatey keykew?”

²¹ Ne migtabak si Hisus, “Duen de innimu ku te Aldew te Peggimeley wey neinuinu kew e langun ²² minsan nekeg-iling ki re iya. Su due impanulu ni Muwisis kaniyu ne pegtuli te me anak niyu (minsan kene ne diye egbunsud sika te ki Muwisis su diye te kaapapuan din), ne innimu niyu sika minsan ke Aldew te Peggimeley. ²³ Ke egtulien niyu ka sabeka ne bate te Aldew te Peggimeley eyew te pegtuman te Balaud ni Muwisis, ne mania te nabelu kew keddi te imbawian ku ka sabeka ne etew te Aldew

te Peggimeley? ²⁴ Kene niyu hukumi ka etew pinaahi te egkakita niyu ne hinimuwan din, ke kene, hukumi niyu sikandin pinaahi te eleg ne gantangan wey palabian.”

Ka peg-agseb ne Kristu si Hisus

²⁵ Ne due me matig-Hirusalim ne migkahi, “Hendue te seini ma iya ne etew ka egbentaanan dan te eggimatey? ²⁶ Na, pitawa niyud te egpanulu man e mule sikandin kayi te kasuluhan, wey ware igkaapul te me pangulu ta kandin! Kema buwa ke nakanengneng e sikandan te sikandin ka Kristu? ²⁷ Piru nakanengneng ki ke hendei migpuun ka seini ne etew. Ne ka Kristu mule ke egginguma, ware egpakanengneng ke hendei sikandin egpuun.”

²⁸ Seeye naa, migbal-balukan si Hisus te pegpanulu din diye te timplu ne migkahi, “Malehet naan iya ne nekeila kew keddi wey nakanengneng kew ke hendei a egpuun? Ka malehet, wara a mig-uney-uney miggendini, ke kene, impeendini e re. Egkasalihan sikandin se migsuhu keddi, wey ware kew nekeila kandin. ²⁹ Piru nekeila a mule kandin, su diye a migpuun te kandin wey sikandin ka migsuhu keddi.”

³⁰ Ne puun due, egdakepen dan e perem sikandin, piru ware egpakaaku tenged su ware pad miggingga ka kandin ne timpu. ³¹ Piru

masalig ka me etew diye ne migpalintutuu wey migsalig kandin. Migkahi sikandan, “Emun ke egginguma ka Kristu, kene buwa sikandin egpekeyimu te kein-inuwan ne subla pad te neyimu te seini ne etew!”

Ka me sundalu ne insuhu eyew pegdakep ki Hisus

³² Nakarineg ka me Parisiyu te igmegna-naasey te me etew meyitenged ki Hisus, purisu sikandan wey ka me pangulu te me talagpanubad, migsuhu te me talagbantey te timplu ne egparakepen ki Hisus.

³³ Ne migkahi si Hisus, “Kene naan de egkaluhey ka timpu ne egmekegduma ki, egkataman, eglibed ad man-e diye te migsuhu keddi. ³⁴ Egpammitawen a nikaniyu piru kena ad nikaniyu egkakita su ka eggendiyaan ku, kene niyu egkeendiyaan.”

³⁵ Ne migmein-inseey ka me pangulu te me Hudiyu ne miggendue, “Hendei bes sikandin eggendiye mania te kene ta sikandin egkakita? Eggendiye buwa sikandin te me siyudad te me Grigu ne nangubpaan te me karumaan ta ne me Hudiyu eyew diyad e man-e egpanulu? ³⁶ Su migkahi sikandin, ‘Egpammitawen a nikaniyu piru kena ad nikaniyu egkakita,’ wey, ‘Kene kew egpekeendiye te eggendiyaan ku.’ Na, nekey buwa ka igapasabut din due?”

Ka sebseb ne egpakabehey te umul

³⁷ Ne miggunguma ka katammanan ne aldew te sahakeen ne iyan ka amana ne impurtanti ne aldew. Te seeye ne aldew, migsasindeg si Hisus ne migbalbalukan, “Hentew seeye se nammaraan, parani kew keddi wey inum kew.

³⁸ Su sumale te nasulat diye te Kasulatan, ‘Ka minsan hentew ne egpalintutuu wey egsalig keddi, egtulayas te pusung din ka weyig ne egpakabehey te umul.’ ³⁹Iyan igpasabut ni Hisus kayi ne seeye se egpalintutuu wey egsalig kandin, egpakarawat te Panisingan te Manama. Su ware pad ibehey ka Panisingan te Manama te seeye ne timpu, tenged su ware pad sikandin imbantug te Manama pinaahi te pegbatun kandin.

Ka pegkabaad te me etew

⁴⁰ Masalig ne me etew te seeye ne kalibulungan ka nakarineg te ingkahi rin wey nakakah, “Malehet iya ne sikandin ka Prupita ne egtetaharan ta!”

⁴¹ Ne migkahi degma ka duma, “Sikandin iya ka Kristu!”

Piru due degma duma ne migkahi, “Kene ne diye te Galiliya egpuun ka Kristu! ⁴² Su nasulat diye te Kasulatan ne ka Kristu diye egpuun te kabuhalan ni Dabid, wey diye eglesut te Bitlihim ne

ugpaan ni Dabid.” ⁴³ Seeye naa, nabaad ka me etew meytenged te suman-suman dan ki Hisus. ⁴⁴ Egkeupian ka duma ne egdakepen dan e perem sikandin, piru ware egpakaaku ne egdakep kandin.

Ka peggubabe te me pangulu ki Hisus

⁴⁵ Nataman, miglibed e ka me talagbantey te timplu diye te me pangulu te talagpanubad wey te me Parisiyu. Ne mig-insaan sikandan, “Mania te ware niyu uyana sikandin kayi?”

⁴⁶ Ne migtabak ka me talagbantey, “Ware de due etew ne nekeiling kandin ke eglalag!”

⁴⁷ Ne mig-insaan sikandan te me Parisiyu, “Ew, naakalan kew bes e degma nikandin? ⁴⁸ Duen naan e natahaan niyu ne me pangulu te me Hudiyu wey ke Parisiyu naa ne migpalintutuu e kandin? ⁴⁹ Seeye se me etew ne nalibulung, ware nakataha te Balaud ni Muwisis, purisu indilus sikandan te Manama!”

⁵⁰ Ne due sabeka ne Parisiyu ne si Nikudimu, ne migpakigkite e dengan ki Hisus ne migkahi kandan,

⁵¹ “Sumale te kanta ne Balaud, kene ki egpekewukum ne nakasale ka sabeka ne etew te kene te pad egkewusey wey egkanengnengan ka neyimu rin.”

⁵² Ne migtabak sikandan, “Egpekeiling ka degma te

matig-Galiliya! Kema, ug-ugsiya nu ka Kasulatan wey egkanengnengan nu ne ware prupita ne egpuun te Galiliya.”⁵³ [Nataman, nanguli e sikandan langun.*

8

Ka malitan ne nasapenan ne nalibuhan

¹ Ne si Hisus mule, miggendiye sikandin te Bubungan te Ulibu. ² Te pegkapawe, migselem-selem e man-e si Hisus miggendiye te timplu. Ne miglingutan sikandin te masalig ne me etew wey migpinnuu sikandin ka migpanulu kandan. ³ Ne ka me talagpanulu te Balaud te Manama wey ka me Parisiyu, mig-uyan te malitan ne nasapenan dan ne nalibuhan wey impasasindeg dan diye te tangkaan te me etew. ⁴ Ne migkahiyan dan si Hisus, “Talagpanulu, nasapenan ka seini ne malitan ne nalibuhan. ⁵ Ne sumale te Balaud ni Muwisis, eleg sikandin ne egbatuwen taman te egpatey. Na, nekey ka igkalalag nu?” ⁶ Inlalag dan seeye eyew te pegasihlut ki Hisus eyew igpakasumbung dan sikandin. Piru migweil-weil si Hisus, mig-usengul sikandin wey migsusulat te kemel rin diye te tane. ⁷ Migpabulus sikandan ka eg-inse kandin, ne dutu, migsasindeg si Hisus ka

migkahi, “Ke hentew kayi te kaniyu ka ware nakasale, sikandin ka egguna-a egbatu kandin.” ⁸ Ne mig-usengul e man-e si Hisus ka migsusulat diye te tane. ⁹ Te pegkarineg dan te inlalag ni Hisus, masihipanew e sikandan, ne iyan migguna-a ka me buyag. Nataman, si Hisus naan de ka nasame wey ka malitan ne migsasindeg diye. ¹⁰ Ne migsasindeg si Hisus wey migkahiyan din ka malitan, “Beyi, hendei naan e sikandan? Ware bes sabeka ne miggukum keykew?”

¹¹ Ne migtabak ka malitan, “Ware, ahalen.”

Ne migkahiyan sikandin ni Hisus, “Kene ku degma eggukuman sikeykew. Hipanew kad wey kene kad himu te sale.”]

Si Hisus ka kalayag te kalibutan

¹² Ne migkahiyan e man-e ni Hisus ka me etew, “Sikeddiey ka kalayag te kalibutan. Ka eg-ikul keddi, egpakaangken te kalayag te umul wey kenad egpekeyi-panew diye te marusilem.”

¹³ Ne migkahiyan sikandin te me Parisiyu, “Sikeykew red ka eg-uney-uney egpamalehet meyitenged keykew, sikan naa ka kene ka egkapal-intutuuwan.”

¹⁴ Ne migtabak si Hisus, “Minsan ke eg-uney-uney a egpamalehet meyitenged keddiey, malehet iya ka

* **7:53** Ka duma ne me sinulat ware miglagkes te 7:53 peendiye te 8:11, sikan naa ka kene ne klaru ke iglagkes naa degma seini kayi. **8:5** Lib 20:10; Diy 22:22-24.

8:12 Mat 5:14; Huw 9:5. **8:13** Huw 5:31.

eglalahen ku, su nakaneng-neng a ke hendei a migpuun wey hendei a eggendiye. Piru ware kew nataha ke hendei a migpuun wey ke hendei a eggendiye.¹⁵ Ka peggukum niyu puun de te suman-suman niyu, piru sikeddiey mule, wara a miggukum te minsan hentew.¹⁶ Piru ke eggukum e ma, eleg mule ka peggukum ku su kene ne sikeddi de ka eggukum, ke kene, daruwa ney te Amey ne migpeendini keddi.¹⁷ Nasulat diye te Balaud niyu ne emun ke egpekeg-iling ka guhuren te daruwa ne talagpamalehet, malehet naa ka guhuren dan.¹⁸ Mig-uney-uney a migpamalehet meyitenged keddiey, wey migpamalehet degma meyitenged keddi ka Amey ne migsuhu keddi.”

¹⁹ Ne mig-inse sikandan, “Hendei ka amey nu?”

Ne migtabak si Hisus, “Ware kew nekeila kanami te Amey ku. Emun perem ke nekeila kew keddi, nekeila kew perem degma te Amey ku.”

²⁰ Inlalag ni Hisus sika langun te pegpanulu din diye te lenged te intahuan te tahuunan te seleppi diye te timplu. Piru ware migdakep kandin puun su ware pad miggingga ka kandin ne timpu.

Kene kew egpekeendiye te eggendiyaan ku

^{8:17} Diy 19:15. * ^{8:28} Ka igpasabut te egkayawen, ka iglansang e sikandin te krus.

²¹ Nataman, migkahiyan e man-e sikandan ni Hisus, “Eggipanew a, wey egpam-mitawen a nikaniyu, piru egkammatey kew re due ne makasesale ded. Ne kene kew egpekeendiye te eggendiyaan ku.”

²² Purisu migkahi ka me pangulu te me Hudiyu, “Kene ki kun egpekeendiye te eggendiyaan din. Iyan buwa igpasabut due ne egluhe sikandin?”

²³ Ne migtabak si Hisus, “Sikaniyu, kayi kew migpuun te tane, piru sikeddi, diya a migpuun te langit. Kayi kew ne mahinged te kalibutan, piru kena a mule ne mahinged kayi.²⁴ Ingkahiyan kud sikaniyu ne egkammatey kew re due ne makasesale ded. Su emun ke kene kew egpalintutuu ne sikeddi iya ka egnangen ku, egkammatey kew re due ne makasesale ded.”

²⁵ Ne mig-insaan dan sikandin, “Hentew ke bes iya?”

Ne migtabak si Hisus, “Sikeddi iya seeye se impangguhud kud e kaniyu puun pad dengan.²⁶ Dakel ka igpakalalag ku wey ka igpekewukum ku kaniyu. Piru iyan ku re iglalag te me etew kayi te ampew te tane ka egkarineg ku ne egpuun diye te migpeendini keddi, su egkasalihan sikandin.”

²⁷ Ware sikandan nakasabut te ka Amey bes e ne Manama ka egkahiyan din. ²⁸ Seeye

naa, migkahiyan sikandan ni Hisus, "Te timpu ne egkayawen* niyud ka Anak te Etew, egkanengnengan niyud e ne sikeddi iya seeye se egnangenen ku. Egkanengnengan niyud man-e ne wara a mig-uney-uney miggimu te egkasuman-suman ku, ke kene, iyan ku re inlalag ka impanulu keddi te Amey ku." ²⁹ Ne sikandin se migpeendini keddi, migduma keddiey. Wara a nikandin balahara ne migsabsabeka, su layun ku ma himuwa ka egpakapahale kandin."

³⁰ Masalig ka migpalintutuu ki Hisus te pegkarineg dan te inlalag din.

Ka kamalehetan ka egbehey te kaligwangan

³¹ Nataman, migkahiyan ni Hisus ka me Hudiyu ne migpalintutuu wey migsalig kandin, "Emun ke egpabulus kew eg-ikul te pegpanulu ku, malehet naa iya ne me hibateen ku sikaniyu. ³² Egkanengnengan niyu ka kamalehetan, ne ka kamalehetan ka egbehey kaniyu te kaligwangan."

³³ Ne migtabak sikandan, "Me kabuhalan key ni Abraham wey ware key re due neuripen te minsan hentew. Ne mania te migkahi ka te egbehayan key te kaligwangan?"

³⁴ Ne migtabak si Hisus kandan, "Egnangenan ku sikaniyu te malehet: minsan

hentew ne eggimu te sale, uripen te sale. ³⁵ Ne ka uripen, egkaayun ne eg-aween te pamilya, piru ka anak, kene mule egkaayun ne eg-aween. ³⁶ Purisu emun ke egbehayan kew te Anak te kaligwangan, egpakaligwang kew iya! ³⁷ Nakataha a te me kabuhalan kew iya ni Abraham, piru egbentaanan a nikaniyu te eggimatey su kene niyu egkarawat ka igpanulu ku kaniyu. ³⁸ Iyan ku re igpangguhud ka impapitew keddi te Amey ku, piru sikaniyu, iyan niyu eggimuwen ka narineg niyu puun te amey niyu."

³⁹ Ne migtabak sikandan, "Si Abraham ka amey ney."

Ne migtabak si Hisus, "Ke malehet ne kabuhalan kew ni Abraham, iling ded perem ka eggimuwen niyu te innimurin. ⁴⁰ Piru nasi mule ne egbentaanan a nikaniyu te eggimatey minsan migpangguhud e re te kamalehetan ne narineg ku puun te Manama. Ne warad iya nekeyimu si Abraham te iling kayi! ⁴¹ Ka eggimuwen niyu, iling ded te eggimuwen te amey niyu."

Ne migtabak sikandan, "Kene key ne me anak te dalan. Sabeka re ka Amey ney, ka Manama re iya."

⁴² Ne migkahiyan sikandan ni Hisus, "Ke malehet ne ka Manama ka amey niyu, eggeyinawaan a perem nikaniyu, su diya a migligkat kandin te peggendini ku.

Wara a mig-uney-uney re due miggendini, ke kene, impeendini e re nikandin. ⁴³ Iyan puunan ne kene kew egpaketabut te iglalag ku, su egkeepes kew ne egpamminig te iglalag ku. ⁴⁴ Iyan niyu amey ka ahalen te me busew, ne iyan niyu igkeupii te eggimu ka igkeupii rin. Mangimatey sikandin puun pad te bunsuranan, wey ware sikandin migpalapig te kamalehetan su ware kamalehetan diye te kandin. Emun ke eg-uubat sikandin, mig-ikul naan de sikandin te batasan din, tenged su ubaten sikandin wey sikandin ka puunan te langun ne ubat. ⁴⁵ Ne iyan ku mule igpangguhud kaniyu ka kamalehetan, sikan naa ka kene kew egpalintutuu keddi. ⁴⁶ Hentew ma kaniyu ka egpakapamalehet ne nakasala a? Ware iya! Ne mania te kene kew egpalintutuu keddi te kamalehetan ma ka igpangguhud ku? ⁴⁷ Seeye se kandin te Manama, egpalintutuu te lalag te Manama. Piru sikaniyu, kene kew ne kandin te Manama, sikan naa ka kene kew egpalintutuu te lalag din.”

Si Hisus wey si Abraham

⁴⁸ Ne migtabak ka me pangulu te me Hudiyu diye te ki Hisus, “Malehet bes ka inlalag ney ne matig-Samarya ka wey migserapan te busew.”

⁴⁹ Ne migtabak si Hisus, “Wara a serepi te busew. Imbantug ku re ka Amey

ku, piru impeyilawan a mule nikaniyu. ⁵⁰ Wara a migparayan-dayan te keddi ne pegkeetew. Due ka Amey ne iyan egkeupian ne egkarayan a te me etew, wey sikandin ka eggukum ne malehet. ⁵¹ Egnanganen ku sikaniyu te malehet: ka minsan hentew ne egtuman te iglalag ku, kenad iya egpatey.”

⁵² Ne migkahiyan sikandin te me pangulu te me Hudiyu, “Kuntee, nanengnengan ney e ne malehet iya ne migserapan ka te busew! Migpatey e si Abraham wey ka me prupita, piru kuntee, egkahi ka te minsan hentew ne egtuman te iglalag nu, kenad iya egpatey. ⁵³ Mania, labew ke bes pad ubag te apu ney ne si Abraham ne migpatey e? Nammatey e degma ka me prupita. Na, hentew ke naa iya ubag?”

⁵⁴ Ne migtabak si Hisus, “Emun ke egparayan-dayan e re, ware karuan te pegparayan-dayan ku. Piru ka Amey ku ne egkahiyan niyu ne Manama niyu, iyan egdayan keddi. ⁵⁵ Ware kew nekeila kandin, piru nekeila a mule kandin. Su emun ke egkahi a te ware a nekeila kandin, egpekeiling ad e kaniyu te ubaten. Piru nekeila a iya kandin wey egtumanen ku ka lalag din. ⁵⁶ Nahale-gale ka apu niyu ne si Abraham ne egkakita rin e ka aldew ne eggendini a. Ne nakita rin e iya seini wey nahale-gale sikandin.”

⁵⁷ Ne migkahiyan sikandin te me pangulu te me Hudiyu, “Ware ke pad miglalimma ne pulu (50) ne leg-un. Ne immenu nu naa ubag te pegkakita ki Abraham?”

⁵⁸ Ne migtabak si Hisus, “Egnanganan ku sikaniyu te malehet: duen ad e te ware pad miglesut si Abraham.”

⁵⁹ Ne puun dutu, migpamurut e sikandan te me batu su egbatuwen dan e si Hisus, piru miggeles sikandin wey mig-awe e diye te timplu.

9

Ka pegbawi ni Hisus te butud

¹ Taheed te eggiphapanew si Hisus, due nakita rin ne etew ne nabutud puun te pglest din. ² Ne mig-insaan sikandin te me hibateen din, “Talagpanulu, sale din naa wey ke sale te amey wey iney rin ka egpuunan ne nabutud sikandin puun te pglest din?”

³ Ne migtabak si Hisus, “Nabutud sikandin, kene ne puun te sale din wey ke sale naa te amey wey iney rin. Neyitabu ka iling kayi su eyew egkakita te me etew ka geem te Manama pinaahi kandin. ⁴ Keilangan ne eggimuwen ta ka me himu te migsuhu keddi taheed te maaldew pad, su egginguma ka marusilem ne warad egpekeyimu. ⁵ Ne taheed te kayi e pad te ampew te tane, sikeddiey ka egpakalayag te langun ne etew.”

⁶ Te pegkapenga rin te eglalag, mig-ileb sikandin diye te tane wey inluyang din ka in-ileban din. Nataman, impulitan din ka mata te etew ⁷ wey migkahiyan din, “Hendiye ka te lanew te Silui wey pandep-ug ka diye.” (Insuhu ka kaluwasan te Silui.) Purisu miggipanew e ka etew wey migpandep-ug, ne egpakkite e sikandin te peglibed din.

⁸ Ka me sumbaley rin wey ka me etew ne nakakita kandin te egpampamuyu pad, nekeinse sikandan ne eggenendue, “Hendue te seini ka etew ne egpinpinnuu ne egpampamuyu?”

⁹ Due duma ne migkahi, “Uya, sika iya.” Piru due duma ne migkahi, “Kene ne sika. Egpekegsahid de ka ulaula ran.”

Ne migkahi seeye se etew, “Sikeddi iya ne.”

¹⁰ Ne mig-insaan dan sikandin, “Mania te egpakkita kad e?”

¹¹ Ne migtabak sikandin, “Migluluyang te tane ka etew ne egngararan ki Hisus, wey impulit din e te mata ku. Ne insuhu ad nikandin ne egpeendiyeen te lanew te Silui wey egpepandep-uhen. Purisu miggendiya a degma wey migpandep-ug, ne nataman, nakakita ad.”

¹² Ne mig-inse e mane sikandan, “Hendeid e sikandin?”

Ne migtabak ka etew, “Wara a nakataha.”

*Ka peg-inse-inse te me
Parisiyu te imbawian ne etew*

¹³ Nataman, mig-uyan dan e diye te me Parisiyu ka etew ne nabutud dengan.

¹⁴ Aldew seeye te Peggimeley te inluyang ni Hisus ka tane wey imbawian din ka butud.

¹⁵ Nataman, mig-insaan e man-e te me Parisiyu ka etew ke mania te nakakita rin e. Ne migkahi ka etew diye te kandan, "Impulitan din te inluyang ne tane ka mata ku, ne nataman, migpandep-ug a wey nakakita ad."

¹⁶ Ne migkahi ka duma ne me Parisiyu, "Kene ne diye te Manama egpuun ka seini ne etew su ware migtuman te Balaud te Aldew te Peggimeley."

Piru due degma duma ne migkahi, "Egmenuwen ma te makasesale te peggimu te iling kayi ne kein-inuwan?" Seeye naa, nabaad sikandan.

¹⁷ Purisu mig-abayan e man-e insei te me Parisiyu ka etew, "Nekey-a ka igkalalag nu meytenged kandin, su egkahiyen nu ne imbawian din ka mata nu?"

Ne migtabak ka etew, "Sabeka sikandin ne prupita."

¹⁸ Piru ware migpalintutuu ka me pangulu te Hudiyu ne butud sikandin dengan ne egpakkite e kuntee. Ne puun due, impeumew ran ka amey wey iney rin. ¹⁹ Mig-insaan nikandan ka amey wey iney te etew, "Anak niyu iya seini se egkahiyen niyu ne nakapaney nabutud?

Ne mania te egpakkite e sikandin kuntee?"

²⁰ Ne migtabak ka amey wey iney te etew, "Malehet iya ne anak ney sikandin, wey malehet degma ne nakapaney sikandin nabutud.

²¹ Piru ware key nakataha ke mania te nakakite e sikandin wey ke hentew ka migbawi kandin. Insei niyu sikandin su dakel e wey egkateu e ne egtabak."

²² Seeye ka nakahi ran puun su naaldek sikandan te me pangulu te me Hudiyu. Su neuyunan e nahud te me Hudiyu ne emun ke due egangken ne si Hisus iya ka Kristu, kenad e eg-ileen ne sakup pad te simbaan te me Hudiyu. ²³ Sika ka egpuunan te nakakahka amey wey iney rin, "Insei niyu sikandin su dakel e!"

²⁴ Nataman, impeumew ran e man-e ka etew ne nabutud dengan wey mig-insaan, "Pahunlibet ka te Manama ne egpangguhud ka te malehet, su nakanengneng key ne makasesale ka etew ne migbawi keykew."

²⁵ Ne migtabak ka etew, "Ware a nakataha ke makasesale naa sikandin wey ke kene. Iyan ku re natahaan ne butud a dengan, ne kuntee egpakkita ad."

²⁶ Ne mig-inse e man-e sikandan kandin, "Nekey ka innimu rin diye te keykew? Immnu rin e te egbawi ka mata nu?"

²⁷ Migtabak sikandin, "Impangguhuran kud e sikaniyu

piru ware kew migpalintutuu. Ne mania te egkeupian kew pad man-e ne egpammineg kayi? Egkeupian kew degma ne egkeyimu ne me hibateen din?”

²⁸ Miglanglangitan dan sikandin wey migkahiyan, “Sikeykew re iya ka hibateen din! Piru sikanami, me hibateen key ni Muwisis.

²⁹ Nakanengneng key te migpakiglalag ka Manama ki Muwisis, piru meyitenged te sika ne etew, minsan se egpuunan ne ware ney en iya nataheyi ke hendei!”

³⁰ Ne migtabak ka etew, “Etuwey, amana seini! Imbawian din mule ka mata ku, ne migkahi kew te ware kew nakataha ke hendei sikandin migpuun! ³¹ Nakataha ki ne kene egpaminehen te Manama ka me makasesale. Piru seeye se egtahud wey egtuman te pegbuut te Manama, egpaminehen din mule. ³² Puun te peggimu te kalibutan, ware de due egkabantug ne egpakabawi te mata te etew ne nakapaney nabutud. ³³ Ke kene egpuun diye te Manama ka seini ne etew, ware egkeyimu rin.”

³⁴ Ne migtabak sikandan, “Makasesale ka puun te peglesut nu, ne kuntee, iyan key re ubag egpanuluen nikeykew?” Ne puun dutu, impaawe e sikandin diye te simbaan te me Hudiyu.

Ka ispirituwanen ne pegkabutud

³⁵ Nakarineg si Hisus te impaawe e seeye se etew diye

te simbaan te me Hudiyu. Te nakita rin e ka etew, migkahiyan din e, “Egpalin-tutuu ka wey egsalig te Anak te Etew?”

³⁶ Ne migtabak ka etew, “Magbebaye, nangeni a ke hentew sikandin su eyew egpaketintutuu wey egpaketintutuu a kandin!”

³⁷ Ne migkahiyan sikandin ni Hisus, “Nakakita kad e kandin wey sikandin iya ka migpakiglalag keykew kuntee.”

³⁸ Ne migkahi ka etew, “Egpalin-tutuu a Magbebaye.” Ne migpanimbuel sikandin ka migsimba ki Hisus.

³⁹ Migkahi si Hisus, “Miggendini a te ampew te tane eyew te peggukum te me etew. Ne eyew seeye se me butud te kamalehetan egpakakita, wey seeye se egpakakita kayi, egkabutud.”

⁴⁰ Due me Parisiyu diye te lenged din ne nakarineg te inlalag din. Ne mig-insaan dan sikandin, “Me butud key bes degma seini?”

⁴¹ Ne migtabak si Hisus, “Emun ke butud kew perem te kamalehetan, ware perem sale niyu. Piru puun su migkahi kew te egpakakita kew kayi, migpasabut naa sika te ware pad naawe ka sale niyu.”

10

Ka malehet ne talagtameng te karniru

¹ “Egnangenangku sikaniyu te malehet: ka etew ne kene egbaye diye te gumawan

te pegseled din diye te kulungan te karniru, wey ke egpamaneyik de sikandin diye te duma ne egbayaan, egpekeiling sikandin te takawen wey ke tulisan.² Piru ka etew ne egbaye diye te gumawan, iyan sika ka talagtameng te me karniru.³ Eglukatan sikandin te talagbantey te gumawan, wey egkeilaan te me karniru ka laheng din te egpangumew kandan. Egpangumawen din ka ngaran te tagse sabeka kandan wey igpanulud din diye te lihawangan.⁴ Ne emun ke igkapalihawang din e sikandan langun, egguna-sikandin te me karniru, wey egsinundul sikandan kandin su neilaan dan ka laheng din.⁵ Kene egsinundul sikandan te lein ne etew su nasi egpamallahuy puun su ware nekeila te laheng din.”

⁶ Impanguhuran sikan-dan ni Hisus te seini ne panunggilingan piru ware dan nakasabut ke nekey ka igpasabut din.

Si Hisus ka meupiya ne talagtameng

⁷ Seeye naa, migkahi e man-e si Hisus, “Egnangenan ku sikaniyu te malehet: sikeddiey ka gumawan te me karniru.⁸ Ka langun ne migguna-keddi te miggendini, me takawen wey me tulisan sikandan. Piru ware migpammineg kandan ka me karniru.⁹ Sikeddiey ka gumawan. Minsan hentew ne egseled ne

egbaye keddiey, egkaluwasa. Egpekeiling sikandin te karniru ne egseled wey eglihawang ne due egkakita ne panabtaban.¹⁰ Piru ka takawen, eggendini re eyew egpanakew, eggimatey, wey egdereet. Ne miggendini a mule eyew egbehey te umul ne warad egpammitawen pad.

¹¹ “Sikeddiey ka meupiya ne talagtameng te karniru. Ka meupiya ne talagtameng, andam ne egpeyimatey para te me karniru.¹² Kene sikandin egpekeiling te egyptaran de ne talagtameng te me karniru ne egpallahuy ke egpakkita te bubuluti ne singgalung ne egpeendiye te kandan. Eg-engkeran din ka me karniru wey egpamueren e te singgalung ka me karniru wey egmekegsuwey-suwey e sikandan.¹³ Egpallahuy sikandin su imbayaran man de wey ware de diye te kandin ke nekey ka egtamanan te me karniru.¹⁴ Sikeddiey ka meupiya ne talagtameng te karniru. Nekeila a te me karniru ku wey nekeila degma sikandan keddi¹⁵ iling te pegkeila te Amey ku keddi wey te pegkeila ku degma kandin. Andam a ne egpeyimatey para kandan.¹⁶ Due duma ne me karniru ku ne ware kayi te seini ne kulungan. Keilangan ne eg-uyanen ku degma sikandan kayi. Egpammineg sikandan te laheng ku wey egkeyimu

sikandan ne sabeka ne punduk wey sabeka degma ka egtameng kandan.

¹⁷ “Miggeyinawaan a te Amey puun su egpeyimatey a para kandan, wey egkeuyag e red man-e. ¹⁸ Ware eg-pekeyimatey keddi ke kene ne keddi ne pegbuut. Piru sikeddiey en iya ka eg-uney-uney egbehey te umul ku, su due katenged ku te pegbehey kayi wey te peggawi man-e kayi. Ne seini iya ka insuhu keddi te Amey ku.”

¹⁹ Ne puun te inlalag din, nabaad e man-e ka me Hudiyu. ²⁰ Masalig kandan ka migkahi, “Migserepan sikandin te busew! Egbusawen e sikandin! Ne mania te egpammineg kew pad kandin?”

²¹ Piru migkahi ka duma, “Ka etew ne eggserepan te busew, kene egpakashalag te iling kayi! Egmenuwen-a te migserepan te busew te pegbawi te mata te butud?”

Ka pegransamsili te me Hudiyu ki Hisus

²² Miggingsume e ka timpu te Sahakeen te Peghalad te Timplu diye te Hirusalim. Ne tingmaagsil te seeye ne timpu. ²³ Miggipanew si Hisus diye te Likansu ni Sulumun diye te timplu, ²⁴ wey miglibulung ka me pangulu te me Hudiyu diye te kandin ne migkahi, “Ken-u nu ma igpalene-lene ka geyinawa ney? Nangeni key e nikeykew ke sikeykew naan iya ka Kristu?”

²⁵ Ne migtabak si Hisus, “Mignanganan kud e sikaniyu piru ware kew migpalintutuu keddi. Ka me kein-inuwan ne eggimuwen ku pinaahi te ngaran te Amey ku, ka egpamalehet meyitenged keddi. ²⁶ Piru kene kew egpalintutuu puun su kene kew ne duma te me karniru ku. ²⁷ Ka keddi ne me karniru, egpekeila te laheng ku, wey neilaan ku degma sikandan, sikan naa ka egsinundul sikandan keddi.

²⁸ Egbehayan ku sikandan te umul ne ware egtamanan wey kenad e sikandan eg-patey. Ne ware sabeka ne egpakaahew kandan kayi te keddi. ²⁹ Su imbehey sikandan keddi te Amey ku ne iyan labew te langun. Ne ware minsan hentew ne egpakaahew kandan puun te pegtanggu te Amey. ³⁰ Ne sikeddi wey ka Amey, sabeka re.”

³¹ Pegkarineg dutu te me pangulu te me Hudiyu, migpamurut e sikandan te me batu eyew igdegpak kandin. ³² Piru migkahiyan sikandan ni Hisus, “Masalig ka impapitew ku kaniyu ne meupiya ne me himu ne impeyimu keddi te Amey. Ne hendei naa rue ka igbatuwa niyu keddi?”

³³ Ne migtabak ka me pangulu te me Hudiyu, “Kene ney sikeykew egbatuwen puun te meupiya ne me himu, ke kene, puun te pegbaley-baley nu te Manama! Etew

ke re piru egpeiling ka te Manama!"

³⁴ Ne migtabak si Hisus, "Nasulat diye te Balaud niyu ne migkahi ka Manama, 'Me manama kew.' ³⁵ Nakanengneng ki ne layun malehet ka nasulat diye te Kasulatan. Ne emun ke ingngaranan te Manama ne me manama seeye se me etew ne imbehayan din te lalag din, ³⁶ ne mania te egkahi kew te imbaley-baley ku ka Manama te pegkahi ku te sikeddi ka Anak te Manama? Sikandin ka mig-alam keddiey wey impeendini a kayi te kalibutan. ³⁷ Purisu, kena a palintutuuwa ke ware ku himuwa ka igmeyimu keddi te Amey ku. ³⁸ Piru ke eggimu a kayi, palintutuuwa niyu ka me himu ku minsan kene kew palintutuu keddi eyew egkatahaan niyu ne ka Amey, kayi te keddiey wey sikeddi, diye degma te Amey."

³⁹ Egdakepen dan e man-e perem si Hisus piru nakapallahuy sikandin kandan.

⁴⁰ Nataman, miglapas e man-e si Hisus diye te weyig te Hurdan ne migpamewutismuwan dengan ni Huwan, wey diye pad sikandin mig-uugpe. ⁴¹ Masalig ka me etew ne miggendiye te kandin wey migkahi, "Si Huwan, ware nekeyimu te me kein-inuwan, piru malehet langun ka inlalag din meyitenged te seini ne etew." ⁴² Seeye

naa, masalig ka me etew ne migpalintutuu kandin.

11

Ka pegpatey ni Lasaru

¹ Due etew ne migderalu ne egngaranan ki Lasaru. Diye sikandin mig-ugpe te Bitanya duma te me atebey rin ne si Mariya wey si Marta. ² (Sikan ded ne Mariya ka egitis te peemut te paa te Magbebaye wey egnupasan din ded te bulbul din. Ne maama rin iya si Lasaru ka migderalu.) ³ Purisu migpanahaan te talaatebey ka Magbebaye ne si Hisus te migderalu si Lasaru ka amana ne alukuy rin.

⁴ Te pegkarineg ni Hisus dutu, migkahi sikandin, "Kene ne kapatayan ka epgangkusan te dalu ni Lasaru. Neyitabu seini eyew egkareyrey ka Manama tenged te geem din. Ne eyew degma egkarayan ka Anak te Manama pinaahi kayi."

⁵ Miggeyinawaan ni Hisus ensi Marta, Mariya wey si Lasaru. ⁶ Piru te pegkarineg din te migderalu si Lasaru, mig-uugpe pad si Hisus te daruwa ne aldew diye te inged ne neugpaan din. ⁷ Nataman, migkahiyan din ka me hibateen din, "Eglibed ki diye te Hudiya."

⁸ Ne migtabak ka me hibateen din, "Talagpanulu, ware pad iya naluhey ne egbebatuwen ka perem te

me Hudiyu diye, ne kuntee, eglibed kad e man-e diye?"

⁹ Ne migtabak si Hisus, "Due sapulu wey daruwa (12) ne uras te aldew ne egkaapunan. Purisu ke eggipanew ka etew te maaldew pad, kene sikandin egkasaligkat su malayag mem pad. ¹⁰ Piru ke eggipanew sikandin te marusilem e, egkasaligkat sikandin su marusilem ma." ¹¹ Te pegkapenga rin te miglalag kayi, migpabulus e man-e sikandin ka eglalag, "Newulep ka alukuy ta ne si Lasaru, ne eggendiyaan ku sikandin eyew egpukawen ku."

¹² Ne migtabak ka me hibateen din, "Magbebeye, ke newulep sikandin, egkeulian ded sikandin."

¹³ Ka igpasabut ni Hisus ne migpatey e si Lasaru, piru kahiyen te me hibateen din ne maheteng de ne newulep. ¹⁴ Purisu impaayayaran e sikandan kahii ni Hisus, "Migpatey e si Lasaru, ¹⁵ piru amana a nahale te wara a diye te impatayan para te keupianan niyu, su egkatimtimulan ka pegpalintutuu niyu tenged te egkakita niyu. Na, eggendiyaan tad sikandin."

¹⁶ Ne si Tumas ne mig-imuan ki 'Seping', migkahiyan din ka duma rin ne me hibateen, "Egduma ki kandin eyew epakalagkes ki kandin te eggimatayan."

Si Hisus ka egbehey te umul

¹⁷ Te pegginguma ni Hisus, nahuhuran e sikandin ne neep-atan e si Lasaru ka insabal. ¹⁸ Me tatelu ne kilumitru ka kariyu te Bitanya puun te Hirusalim. ¹⁹ Ne masalig ka matig-Hirusalim ne me Hudiyu ne migpanumbaley diye te engki Marta wey ki Mariya eyew egliwang kandan te namatayan te maama ran.

²⁰ Te pegkanengneng ni Marta ne egpalinggumaan e si Hisus, miglihawang sikandin ka egsinug-ung kandin, piru si Mariya, migpalunggehaat de diye te baley. ²¹ Te nekegsinugung e sikandan, migkahiyan din e si Hisus, "Magbebeye, emun ke kayi ke pa perem, ware ded perem migpatey ka maama ku! ²² Piru nakataha a te minsan kuntee, igbehey te Manama keykew ka minsan nekey ne egbuyuen nu diye te kandin."

²³ Ne migkahiyan sikandin ni Hisus, "Egkeuyag ded ka maama nu."

²⁴ Migtabak sikandin, "Nakanengneng a ne egkeuyag sikandin te katamanan ne aldew ke eguyahen e ka nammatey e."

²⁵ Ne migkahiyan sikandin ni Hisus, "Sikeddiey ka eguyag te nammatey e wey egbehey te umul. Minsan hentew ne egpalintutuu wey egsalig keddi, egkeuyag ded minsan egpatey sikandin. ²⁶ Ne minsan hentew ne eg-ugpe ne egpalintutuu wey egsalig keddi, kenad e

egpatey. Migpalintutuu ke naa kayi?"

²⁷ Ne migtabak sikandin, "Uya, Magbebabe. Egpalintutuu a ne sikeykew ka Kristu, ka Anak te Manama ne insaad ne eggendini te ampew te tane."

Ka pegsinehew ni Hisus

²⁸ Pegkapenga ni Marta te miglalag, miglibed e sikandin wey in-umew rin si Mariya wey migkahiyan, "Duen e ka Talagpanulu wey impammitew ka nikandin."

²⁹ Te pegkarineg ni Mariya, migdagdahew sikandin migsasindeg wey miglihawang ka egsinug-ung ki Hisus. ³⁰(Te seeye ne timpu, ware pad migginguma si Hisus te lungsud, su diye pad sikandin te inged ne nasinungan ni Marta.) ³¹Ka me Hudiyu ne diye te baley enni Mariya ne egliwang kandin, insinundul dan sikandin te nakita ran ne migdagdahew migsasindeg wey miglihawang. Kahiyan dan ne eggendiye de sikandin te insabalan wey diye egsinehew.

³² Te pegginguma ni Mariya diye te ki Hisus, migusengul sikandin diye te tangkaan din wey migkahi, "Magbebabe, emun ke kayi ke pa perem, ware ded perem migpatey ka maama ku!"

³³ Te pegkakita ni Hisus ne migsinehew si Mariya wey ka me Hudiyu ne migduma kandin, migmasakit ka geyinawa rin wey nabantalan

amana sikandin. ³⁴ Ne migsinaan din sikandan, "Hendei niyu sikandin isabal?"

Ne migtabak sikandan, "Magbebabe, kema hengkayi ka wey tengtengi nu."

³⁵ Ne dutu migsinehew e si Hisus. ³⁶ Seeye naa, migkahi ka me Hudiyu, "Pitew kew, amana rin geyinawei si Lasaru!"

³⁷ Piru due duma ne migkahi, "Imbawian din ka mata te butud, ne mania te ware din nabalabahi ka pegpatey ni Lasaru?"

Ka peg-uyag ni Hisus ki Lasaru

³⁸ Ne dutu, naamanaan e man-e nabantali si Hisus wey miggendiye sikandin te insabalan ki Lasaru ne sabeka ne sulung ne mig-eletan te batu ka gumawan. ³⁹ Ne migsuhu si Hisus ne igpaawe ka batu.

Ne migkahi si Marta ne atebey te migpatey, "Magbebabe, mangareg e sikandin kuntee su neepatan e sikandin ka insabal!"

⁴⁰ Ne migkahiyan sikandin ni Hisus, "Migkahiyan kud e sikeykew te egkakita nu ka karesen te Manama ke egyptutuu ka." ⁴¹ Seeye naa, in-awe dan e ka batu. Ne migleng-ag si Hisus diye te langit wey migkahi, "Amey, migpasalamat a keykew su indineg a nikeykew.

⁴² Nakanengneng a ne egdinehen a layun nikeykew, piru inlalag ku seini puun te me etew ne seini kuntee, eyew egyptutuu sikandan ne sikeykew ka migsuhu keddi." ⁴³ Pegkapenga rin

ka miglalag kayi, migpan-guleyi sikandin ka migkahi, "Lasaru, lihawang ka kayi!"

⁴⁴ Nataman, miglihawang e ka minatey ne nakedked pad ka paa wey me belad te hinabel wey nabukusan pad ka ulaula te manggad. Ne migkahiyan sikandan ni Hisus, "Awaa niyu ka nakabedbed kandin wey peyipanawa niyu sikandin!"

Ka planu te peggimatey ki Hisus

(Mat. 26:1-5; Mar. 14:1-2;
Luk. 22:1-2)

⁴⁵ Seeye se me Hudiyu ne migpanumbaley engki Mariya, masulug kandan ka migpalintutuu wey migsalig ki Hisus te pegkakita ran te innimu rin. ⁴⁶ Piru due degma duma ne miggendiye te me Parisiyu ne migpang-guhud kandan meyitenged te innimu ni Hisus. ⁴⁷ Purisu inlibulung te me pangulu te me talagpanubad wey te me Parisiyu ka langun ne sakup te Talaggukum te me Hudiyu. Ne migkahi sikandan, "Nekey buwa ka eggimuwen ta te seini ne etew ne eggimu te masalig ne me kein-inuwan?" ⁴⁸ Emun ke egparumdumaan ta sikandin ne egpabulus te eggimuwen din, egpalintutuu wey egsalig e ka langun kandin. Ne egkataman, eggendinid e ka matig-Ruma wey egguhusen dan e ka timplu wey ka nasud ta!"

⁴⁹ Piru si Kaypas ne iyan Labew ne Talagpanubad te

seeye leg-un, migkahi diye te me duma rin, "Ew, ware bes me aperu niyu?" ⁵⁰ Ware kew bes nakanengneng ne meupiya pad ke sabeka re ne etew ka egpatey para te masulug ne me etew du te intiru ne nasud ka egkareetan?" ⁵¹ Kene ne puun te kandin ne suman-suman seeye se inlalag din, ke kene, isip Labew ne Talagpanubad te seeye ne leg-un, intagne din ne keilangan ne egpatey si Hisus para te me Hudiyu.*

⁵² Ne kene de man-e ne para kandan, ke kene, eyew degma egkalibulung wey egkasabeka ka me anak te Manama ne nekegsuwey-suwey te minsan hendei.

⁵³ Puun dutu ne aldew, migplanu e ka me pangulu te me Hudiyu ke egmenuwen dan te peggimatey ki Hisus. ⁵⁴ Ne seeye naa, warad e migpeeyang-heyang miggiphapanew si Hisus diye te Hudiya, wey miggendiyad nasi te sabeka ne lungsud ne egngaranan te Ipraim ne marani te mammara ne inged ne kene egkeugpaan. Ne diye din pad mig-uugpe duma te me hibateen din.

⁵⁵ Te seeye ne timpu, mahaan e man-e ka Sahakeen te Peglihad te Panalihan te Manama. Masalig ka me etew puun te me bariyu ne migtakereg diye te Hirusalim eyew te pegtuman te tuluwuen dan ne peglinis te kene pad egginguma ka sahakeen. ⁵⁶ Ne impammitew ran si

* 11:51 Te Grigu: nasud.

Hisus te eglibulung e sikan-dan diye te timplu. Migmein-inseey sikandan ne egkahi, “Te kaniyu ne suman-suman, egtambung bu red sikandin te sahakeen?”⁵⁷ Kunaleg te tapey bes e migsuhu ka me pangulu te talagpanubad wey ka me Parisiyu te emun ke due egpakataha ke hendei si Hisus, keilangan ne eg-pangguhuran sikandan eyew egkarakep dan sikandin.

12

Ka peg-itis ki Hisus te peemut
(Mat. 26:6-13; Mar. 14:3-9)

¹ Te igkeen-em naan de ne aldew ka Sahakeen te Peglihad te Panalihan te Manama, miggendiye si Hisus te Bitanya ne mig-ugpaan ni Lasaru te in-uyag din ka napatey. ² Miggilutuan dan sikandin te iglabung, wey si Marta ka migpangenat te keenen. Ne miglagpu mule si Lasaru ki Hisus te egkeen diye te lamisa. ³ Nataman, migkuwa si Mariya te liware te litru ne peemut ne mahal ne nardu, wey mig-itisan din ka paa ni Hisus, wey impunasan din man-e te bulbul din. Ne migsekel de iya te baley ka keemut te peemut. ⁴ Piru migkahi si Hudas Iskaryuti ne sabeka te me hibateen ni Hisus ne iyan ka eg-eakal kandin,⁵ “Mania te ware ibelegye seini se peemut te tatelu ne gatus

(300) ne dinaryu, * ne ka halin, igpamehey e diye te egkengaayu-ayu?”⁶ Inlalag din seini, kene ne puun su neyid-u sikandin te egkaayu-ayu, ke kene, puun su takawen sikandin. Sikandin nahud ka egpeuy-uyanan te puntile ne tahuunan te seleppi, wey nalayam sikandin ne egkuwa te seleppi diye te puntile.

⁷ Piru migkahi si Hisus, “Balahara nu re due sikandin, wey kene nu balabahi ne igtahahe seini te aldew te pegasbal keddi. ⁸ Su ka egkengaayu-ayu, layun niyu mule egkaruma, piru sikeddi, kena a nikaniyu layun egkaruma.”

Ka planu te peggimatey ki Lasaru

⁹ Due masalig ne me Hudiyu ne miggendiye te ki Hisus te pegkarineg dan te diye sikandin te Bitanya. Miggendiye sikandan, kene ne tenged de ki Hisus, ke kene, eyew egpitew degma ki Lasaru te in-uyag din ka migpatey. ¹⁰ Seeye naa, imbentaanan e degma te me pangulu te talagpanubad ne eggimatayan dan si Lasaru, ¹¹ su tenged kandin, masalig ka me Hudiyu ne nangawe diye kandan wey migpalintuu wey migsalig e ki Hisus.

Ka meupiya ne peg-ginguma ni Hisus diye te

12:3 Luk 7:37-38. * **12:5** Ka tatelu ne gatus (300) ne dinaryu, eleg ne igsuwildu te sabeka ne etew te sabeka ne leg-un.

12:8 Diy 15:11.

Hirusalim

(Mat. 21:1-11; Mar. 11:1-11; Luk. 19:28-40)

¹² Te seup ne aldew, nakarineg ka masalig ne etew ne migtambung te Sahakeen te Peglihad te Panalihan te Manama te eglepew si Hisus diye te Hirusalim. ¹³ Purisu nanguwa sikandan te pakew te palmira wey insinug-ung dan sikandin wey migbal-balukan ne eggenendue, “Egdayanen ka Manama! Egpanalanganan sikandin se impeendini te Manama kanta. Egpanalanganan ka Hari te Israil!”

¹⁴ Nakakita si Hisus te nati te asnu wey migpangudde sikandin kayi. Ne natuman ka nasulat diye te Kasulatan,

¹⁵ “Kene kew kaaldek me matig-Hirusalim!†
Eggingga ka Hari niyu,
ne eg-untud te nati te asnu.”

¹⁶ Te seeye ne timpu, ware pad nakasabut dutu ka me hibateen din, piru te imbatun e sikandin, henduen pad nikandan nasuman-suman ne seeye se innimu te me etew diye te kandin, seeye bes iya ka nasulat diye te Kasulatan.

¹⁷ Ka me etew ne nakaruma ki Hisus te peg-pangumew rin wey peg-uyag ki Lasaru diye te sulung, iyan migpabulus ne migpang-guhud ke nekey ka neyitabu.
¹⁸ Ne seeye ka puunan ne masalig ka egsinug-ung kandin tenged su nakarineg

sikandan te seeye ne kein-inuwan ne innimu rin.
¹⁹ Ne migmalalahey ka me Parisiyu ne eggenendue, “Tengtengi niyu naa, ware iya egkeyimu ta! Pitew kew, migsinundul e kandin ka langun ne etew!”

Ka pegpammitew ki Hisus te me Grigu

²⁰ Due duma ne me Grigu ne miggendiye te Hirusalim eyew te pegasimba te Manama te timpu te sahakeen. ²¹ Ne migparani sikandan ki Pilipi ne matig-Bitsayda ne sakup te Galiliya, wey migkahiyan dan sikandin, “Ahalen, egke-upian key ne egpakigkita ki Hisus.”

²² Mignangenan ni Pilipi si Andris, wey migparumeey sikandan se daruwa ka miggendiye ki Hisus eyew egnangen kandin.

²³ Ne migtabak si Hisus, “Miggingume e kuntee ka timpu ne egmabantug ka Anak te Etew. ²⁴ Egnangenan ku sikaniyu te malehet: ka sabeka ne beni te trigu ne kene iglebeng te tane, egkey-imu ne sabeka re iya ne beni. Piru ke iglebeng wey egpatey, egtubu seeye wey egbebehas te masalig. ²⁵ Seeye se amana eggeyinawa te kandin ne umul, nasi egkawarei kayi, piru seeye se kene egkan-nuhun te kandin ne umul, egpakaangken te umul ne ware egtamanan. ²⁶ Minsan hentew ne egpamakey keddi,

12:13 Sal 118:25-26. **12:15** Sak 9:9. † **12:15** Te Grigu: anak ne malitan te Siyun. **12:25** Mat 10:39; 16:25; Mar 8:35; Luk 9:24; 17:33.

keilangan ne eg-ikul keddi eyew ke hendei a, diye degma ka suluhuanen ku. Ka etew ne egpamakey keddi, eggiwuwen ne mabantug te Amey ku.”

Ka pegpaney-paney ni Hisus meyitenged te kapatayan din

²⁷ Ne migkahi pad mane si Hisus, “Due igkabantali ku seini. Nekey buwa ka iglalag ku? Egkahiyan ku buwa ka Amey ku te kene e re egpabaybayaran? Kene, su sika iya ka innendini ku, ka eg-antus te me keyirapan te seini ne timpu.” ²⁸ Ne migkahiyan din ka Amey rin, “Ame, ipakita nu ka karesen nu eyew egmabantug ka ngaran nu!”

Ne due laheng ne diye egpuun te langit ne migkahi, “Impakita kud e ka karesen ku, piru igaipakita ku pad mane seini.”

²⁹ Ka me etew ne nanaasideg diye, nakarineg te laheng wey migkahi sikandan, “Migluluhung!”

Ne due degma duma ne migkahi, “Due panalihan ne migpakiglagalag kandin!”

³⁰ Piru migkahiyan sikandan ni Hisus, “Imparineg kaniyu ka seeye ne laheng, kene ne sikeddi ka imparineg dutu. ³¹ Senid iya ka timpu ne eggukuman e ka me etew kayi te ampew te tane. Senid iya ka timpu ne egdeldelen

e si Meibulan[‡] ne iyan migmandu kuntee kayi te ampew te tane. ³² Due timpu keureme ne egkayawen ad puun te tane, § wey egpeparaniyen ku ka langun ne etew kayi te keddiey.” ³³ (Inlalag din seini eyew te pegpasabut kandan ke nekey ne klasi te kapatayan ka egpangkusan din.)

³⁴ Ne migtabak kandin ka me etew, “Sumale te Balaud ta, kene egpatey ka Kristu. Ne mania te migkahi ka te ka Anak te Etew keilangan ne egkayawen? Hentew bes seini se Anak te Etew?”

³⁵ Ne migtabak si Hisus, “Kene naan de egkaluhey ka malayag ne egpaketiduma kaniyu. Purisu, hipanew kew taheed te malayag pad eyew kene kew egkeyingu-maan te marusilem. Su ka eggipanew te marusilem, kene egpakanengneng ke hendei sikandin egpabulus.

³⁶ Purisu palintutuuwa niyu wey salihniyu ka malayag taheed te duen pad seini te kaniyu, eyew egkeyimu kew ne keet-etawan te kalayag.”

Ka peggubabe te me Hudiyu

Te pegkapenga rin dutu te miglalag, miggipanew e sikandin wey miggeles kandan. ³⁷ Minsan masalig e ka me kein-inuwan ne neyimu rin diye te tangkaan dan, piru ware pad iya mane

[‡] **12:31** Te Grigu: talagmandu. **§ 12:32** Ka igpasabut te egkayawen, ka pegpasasideg e te krus ne inlansangan kandin wey ka pegbatun kandin. **12:34** Sal 110:4; Isa 9:7; Isi 37:25; Dan 7:14.

sikandan migpalintutuu wey migsalig kandin. ³⁸ Seini ka migpamalehet te ingkahi ni prupita Isayas ne eggenendue:

“Magbebaye ne Manama, hentew buwad iya ka migpalintutuu te guhuren ney?

Ne hentew buwad iya ka migila te karesen ne impapitew nu?”

³⁹ Sikan naa iya ka ware sikandan migpalintutuu su migkahi pad si Isayas:

⁴⁰ “Imbutud sikandan te Manama, wey impakehal rin ka me ulu ran, su kema ke epakakita sikan dan wey epakasabut, wey eglibed e sikandin kandan eyew epabawi.”

⁴¹ Inlalag seeye ni prupita Isayas su nakita rin ka karesen ni Hisus wey migpangguhud sikandin meytenged kandin.

⁴² Ne minsan pad due, masalig ka me pangulu te me Hudiyu ne migpalintutuu wey migsalig ki Hisus. Piru tenged te me Parisiyu, ware sikandan migpeila eyew kene dan epaaween diye te simbaan te me Hudiyu.

⁴³ Su iyan dan in-awes ka pegdayan te me etew, du te pegdayan te Manama.

Ka lalag ni Hisus ka eggukum

⁴⁴ Nataman, migbalbalukan si Hisus ka miglalag

ne eggenendue, “Ka egpalintutuu wey egsalig keddiey, kene de ne sikreddi ka egpalintutuuwan wey egsalihan din, ke kene, minsan degma ka migsuhu keddiey. ⁴⁵ Ka nakakita keddi, nakakita degma te migsuhu keddi.

⁴⁶ Miggendini a kayi te ampew te tane isip kalayag, su eyew minsan hentew ne egpalintutuu wey egsalig keddiey, kene egkahaat diye te marusilem. ⁴⁷ Ke due epakarineg te iglalag ku wey kene egtuman kayi, kene ku sikandin eggukuman. Su wara a miggendini te ampew te tane eyew te peggukum, ke kene, eyew te pegluwas te me etew. ⁴⁸ Seeye se egsamsamili keddi wey eggubabe te iglalag ku, seini iya se igpangguhud ku ka eggukum kandin te katammanan ne aldew!

⁴⁹ Su wara a miguney-uney migpangguhud te keddi de ne guhuren, ke kene, ka igpepangguhud te Amey ne migpeendini keddiey ka iglalag ku wey igpangguhud ku. ⁵⁰ Ne nakanengneng a ne ka suhu din, epakabehey te umul ne ware egtamanan. Purisu, ka inlalag ku, impalalag naa sika keddiey te Amey.”

13

Ka pegpanlu-lu ni Hisus te paa te me hibateen din

¹ Te ware pad miggunguma ka aldew te Sahakeen te Peglihad te Panalihan te Manama, tapey e nataheyi

* **12:40** Te Grigu: Makehal ka me pusung dan.

ni Hisus ne miggungume e ka timpu ne eg-awe e sikandin kayi te ampew te tane wey eglibed e diye te Amey. Miggeyinawaan din amana seeye se migpamakey kandin kayi te ampew te tane, wey igpapitew rin ka geyinawa rin taman te katamanan.

² Te peglabung e enni Hisus te me hibateen din, impasuman-suman e ni Meibulan si Hudas ne anak ni Simun Iskaryuti meyitenged te peg-akal ki Hisus. ³ Nanengnengan ni Hisus ne due katenged din te minsan nekey, su imbehey seini te Amey diye te kandin. Ne nanengnengan din man-e ne diye din egpuun te Manama wey eglibed din ded man-e diye te kandin. ⁴ Seeye naa, migsasindeg sikandin diye te keenanan wey miglu-luang te ingkukuyumbu din wey miglilibed te tualya. ⁵ Ne mig-itisan din te weyig ka pelenggana wey impanlu-luan din ka me paa te me hibatee din wey impamunasan din man-e te tualya ne inllibed din. ⁶ Te neumaan din e si Simun Pidru, migkahi e si Simun, "Magbebeye, egluluhan nu ka paa ku?"

⁷ Ne migtabak si Hisus, "Kuntee, kene nu pad egkasabut ka eggimuwen ku, pиру wey nud e seini egkasabut."

⁸ Ne migkahi si Pidru, "Kena ad iya egpalu-lu keykew te paa ku te minsan ken-u!"

Piru migtabak si Hisus, "Ke kene ka egpalu-lu te paa nu, kene kud e ne hibateen sikeykew!"

⁹ Ne migkahi si Pidru, "Ke iling ma rue Magbebeye, kene de ne paa lu-lui nu su ilagkes nud degma ka ulu ku wey ka belad ku!"

¹⁰ Piru migkahi si Hisus, "Ka nakapamanihu e, malinis e wey kenad ne keilangan ne egpanlu-lu pad. Paa rin naan de ka eglu-luan. Sikaniyu langun, malinis e, angin e te sabeka ne duma niyu." ¹¹ (Tapey e ne nanengnengan ni Hisus ke hentew ka eg-akal kandin, purisu migkahi sikandin, "Sikaniyu langun, malinis e, angin te sabeka ne duma niyu.")

¹² Te pegkapenga rin te miglu-lu te me paa ran, insaluub din e man-e ka ingkukuyumbu din wey miglibed diye te keenanan. Nataman, mig-insaan din e sikandan, "Nakasabut kew red te innimu ku kaniyu?

¹³ Migngaranan a nikaniyu te Talagpanulu wey Magbebeye, wey eleg iya sika, su malehet iya ne sikan a iya.

¹⁴ Ne emun ke migpanlu-luan ku ka me paa niyu te Magbebeye wey Talagpanulu e ma perem nikaniyu, eleg de iya ne egmaluluey kew degma te me paa niyu. ¹⁵ Innimu ku sika isip panunggilingan eyew egilingan niyu ka innimu ku

kaniyu. ¹⁶ Egnanganan ku sikaniyu te malehet: ware uripen ne labew te kandin ne ahalen, ne ware degma insuhu ne labew te migsuhu kandin. ¹⁷ Ne kuntee te nakataha kew e te kamalehetan, egpanalanginan kew ke eggimuwen niyu seini!

¹⁸ “Kene ne sikaniyu langun ka egkahiyan ku ne egpanalanginan, su nekeila a te in-alam ku. Piru keilangan ne egkatuman ka nasulat te Kasulatan ne eggenendue, ‘Ka etew ne migpakigtuhen keddi, iyan egkuntere keddi.’ ¹⁹ Egpanpanayan kud sikaniyu eglalahan meyitenged kayi te ware pad seini neyitabu eyew ke egkeyitabu e seini, egpaka-palintutuu kew ne ‘Sikeddi iya sikandin.’ ²⁰ Egnanganan ku sikaniyu te malehet: ka minsan hentew ne egdawat te me etew ne migsuhu ku, egdawat degma keddiey, ne ka egdawat keddi, egdawat degma te migsuhu keddi.”

Ka hibateen ni Hisus ne eg-akal kandin

(Mat. 26:20-25; Mar. 14:17-21; Luk. 22:21-23)

²¹ Te pegkapenga ni Hisus dutu te peglalag, migmasakit ka geyinawa rin wey migkahi, “Egnanganan ku sikaniyu te malehet: due sabeka kaniyu ne eg-akal keddi.”

²² Migmatengtengey ka me hibateen din ne nalibeg ke hentew kandan ka egkahiyan din. ²³ Ka

sabeka te me hibateen ni Hisus ne inggeyinawaan din, diye miglumpang te lenged din. ²⁴ Ne migtingyasan ni Simun Pidru seeye ne hibateen ne egpeinseen ki Hisus ke hentew kandan ka egkahiyan din.

²⁵ Purisu mig-ensig sikandin diye te ki Hisus wey mig-inse, “Magbebabe, hentew bes sikandin?”

²⁶ Ne migtabak si Hisus, “Ke hentew seeye se egbehayan ku te paan ne igdallut ku, seeye naa ka eg-akal keddi.” Ne dutu, migkuwa sikandin te paan wey indallut din wey imbehey rin ki Hudas ne anak ni Simun Iskaryuti.

²⁷ Te narawat e ni Hudas ka paan, migserp e si Meibulan diye te kandin. Ne migkahiyan sikandin ni Hisus, “Mahaan ka! Himuwa nu ke nekey ka eggimuwen nu.” ²⁸ Ne ware minsan sabeka diye te keenanan ne nakasabut ke mania te inlalag seeye ni Hisus diye te ki Hudas. ²⁹ Kahiyen te duma ne me hibateen ne insuhu de sikandin ni Hisus eyew egpabeliyan te ingkeilangan dan te sahakeen, wey ke due igpabehey ni Hisus diye te egkaayu-ayu, su iyan ma tiguyan si Hudas te puntil ne tahuunan te seleppi.

³⁰ Te nakeen e ni Hudas ka paan, migdagdahew sikandin miglihawang. Ne marusilem en iya seeye.

Ka iyam ne suhu

³¹ Te nekeyipanew e si Hudas, migkahi e si Hisus, "Kuntee, egmabantug e ka Anak te Etew, ne egmabantug degma ka Manama pinaahi kandin. ³² Ne emun ke egmabantug ka Manama pinaahi kandin, igaabantug degma sikandin te Manama. Ne due-rue ne eggimuwen seini te Manama. ³³ Me anak ku, kenad e egkaluhay ne egpaketuma a kaniyu. Egpammitew kew keddi piru kene niyu egkeendiyaan ka eggendiyaan ku. Ne sikan ded ka inlalag ku te me pangulu te me Hudiyu. ³⁴ Egbehayan ku sikaniyu te iyam ne suhu: paheyinaweeey kew. Ke immenu ku sikaniyu te eggeyinawa, iling naan ded degma rue ka pegpaheyinaweeey niyu. ³⁵ Emun ke egpaheyinaweeey kew, egpaketaha ka langun ne etew te sikaniyu ka me hibateen ku."

Ka pegtagne ni Hisus ne ig-pahunware din ni Pidru

(Mat. 26:31-35; Mar. 14:27-31; Luk. 22:31-34)

³⁶ Ne mig-inse si Pidru kandin, "Magbebabe, hendei bes ka eggendiyaan nu?"

Ne migtabak si Hisus, "Kuntee, kene ke pad egpaketuma keddi te eggendiyaan ku, piru egpaketumul ke red keureme."

³⁷ Mig-inse si Pidru, "Magbebabe, mania te kena a egpaketuma keykew kuntee?

Andam a ne egpeyimatey para keykew!"

³⁸ Ne migtabak si Hisus, "Andam ke naan en iya ne egpeyimatey para keddi? Egnangenan ku sikeykew te malehet: te kene pad egukale ka manuk, katatelu ad nikeykew igpahunware."

14

Si Hisus ka dalan peendiye te Amey

¹ Ne migkahiyan sikan-dan ni Hisus, "Kene kew kalaggew. Palintutuu kew wey salig kew te Manama wey kayi te keddiey.

² Diye te baley te Amey ku, due masalig ne sinabeng. Eggendiye a ka eg-andam te eg-ugpaan niyu. Ke kene ne malehet seini, kene ku perem egnangenan sikaniyu kayi. ³ Ne emun ke diye ad e wey egpakaandam ad te eg-ugpaan niyu, eglidet a wey eg-angayen ku sikaniyu su eyew ke hendei a, diye kew degma. ⁴ Nakatulitu kew e te egbayaan peendiye te eggendiyaan ku."

⁵ Piru migkahiyan sikandin ni Tumas, "Magbebabe, ware key nakanengneng ke hendei ka eggendiye, purisu egmenuwen ney naa te egtulitu te dalan te eggendiyaan nu?"

⁶ Ne migtabak si Hisus, "Sikeddi ka dalan, ka kamale-hetan, wey ka umul. Ware egpekeendiye te Amey ke kene egbaye keddiey. ⁷ Ke

nekeila kew e keddi, nekeila kew e degma te Amey ku. Ne puun kuntee, nekeila kew e kandin wey nakakita kew e kandin.”

⁸ Ne migkahiyan sikandin ni Pilipi, “Magbebaye, ipapitew nu kanami ka Amey, ne eleg e sika kanami.”

⁹ Ne migtabak si Hisus, “Naluhey ad e ka migpakigduma kaniyu, ne ware ke bes pad nekeila keddi Pilipi? Ka nakakita keddi, nakakita degma te Amey. Purisu mania te nakakahai ke pad te igpapitew ku kaniyu ka Amey? ¹⁰ Pilipi, ware ka migpalintutuu ne duen a te Amey, ne ka Amey kayi te keddiey? Ka me lalag ne immangguhud ku kaniyu, kene ne kayi te keddi egpuun. Ka Amey ne kayi te keddiey ka egpuunan te langun ne eggimuwen ku. ¹¹ Palintutuu kew keddi ne duen a te Amey, ne ka Amey kayi te keddiey. Ke kene kew egpalintutuu te inlalag ku, palintutuu kew naan de keddi tenged te me kein-inuwan ne innimu ku.

¹² Egnangenan ku sikaniyu te malehet: ka egpalintutuu keddi, eggimu degma te miggimu ku wey labew pad kayi ka eggimuwen din, su eggendiya ad e te Amey. ¹³ Ne eggimuwen ku ka minsan nekey ne egbuyuen niyu pinaahi te keddi ne ngaran, eyew egmabantug ka Amey pinaahi te Anak. ¹⁴ Minsan nekey ka egbuyuen niyu keddi pinaahi te keddiey ne ngaran, eggimuwen ku iya

seini.”

*Ka Panisingan te Manama
ne insaad ni Hisus*

¹⁵ Ne migpabulus si Hisus ka migkahi, “Ke miggeyinawaan a nikaniyu, tumana niyu ka me suhu ku. ¹⁶ Ne egbuyu a te Amey wey egbehayan kew nikandin te lein ne Talagpangabang ne egduma kaniyu taman te katamanan. ¹⁷ Egngaranan seini te Panisingan te Manama, wey egpanulu kaniyu te kamalehetan. Ka me etew kayi te ampew te tane, kene egpakarawat kandin su kene dan egkakita wey ware dan nekeila kandin. Piru nekeila kew kandin su egduma-ruma sikandin kaniyu wey eg-ugpe due te kaniyu.

¹⁸ “Ne kene ku sikaniyu engkeran wey egkabalalahad e, su egliberan ku sikaniyu.

¹⁹ Te kene egkaluhey, kena ad egkakita te me etew kayi te ampew te tane, piru egpakkita kew mule keddi. Ne tenged su neuyag e ma, egkeuyag kew red degma.

²⁰ Pegginguma te sika ne aldew, egkanengnengan niyu ne duen a te Amey ku, ne sikaniyu, kayi kew te keddiey, wey duen a degma te kaniyu.

²¹ “Ka egdawat te me suhu ku wey egtuman kayi, sika ka miggeyinawa keddi. Ne minsan hentew ne eggeyinawa keddi, eggeyinawaan te Amey ku. Ne eggeyinawaan ku degma ka sika ne etew wey igpeila ku kandin ke hentew a iya.”

²² Ne mig-insaan sikandin ni Hudas (kene ne si Hudas Iskaryuti), "Magbebaye, mania te kayi ka te kanami egepila ke hentew ka? Mania te kene ne diye te langun ne etew?"

²³ Ne migtabak si Hisus, "Ka eggeyinawa keddi, egtuman te iglalag ku. Ne eggeyinawaan sikandin te Ameyku, wey eggendiye key se talaanak te kandin wey eugupe diye te kandin. ²⁴ Piru ka ware miggeyinawa keddi, kene egtuman te iglalag ku. Ne ka lalag ne narineg niyu, kene ne keddiey, ke kene, kandin te Amey ne migsuhu keddi.

²⁵ "Miglalahan ku sikaniyu kayi taheed te dume e pad kaniyu. ²⁶ Piru iga subal te Amey ka Talagpangabang ne ka Panisingan te Manama. Igpeuyan din seini pinaahi te keddi ne ngaran, wey epanuluun kew nikandin te langunlangun wey iga suman din kaniyu ka langun ne inlalag ku kaniyu.

²⁷ "Kene kew keipeng wey kaaldek su ka keupianan igaat ku kaniyu. Ka keddi ne keupianan mismu ka ibehey ku kaniyu, ne kene ne iling te keupianan ne ibehey te kalibutan. ²⁸ Mignanganan kud sikaniyu te eggipanewa, piru eglibed e red kayi te kaniyu. Ke miggeyinawaan a nikaniyu, egkahale kew perem ne epekeendiya a te Amey ne labew pad keddiey. ²⁹ Impanpanayan

kud sikaniyu te eglalag kayi te kene pad seini egkeyitabu, eyew ke egkeyitabu e seini, egpakapalintuu kew pad amana. ³⁰ Kena ad egkaluhey ka egpakiglag kaniyu su egpalinggumaan e si Meibulan ne talagmandu kayi te ampew te tane. Kene egdari ka geem din keddiey, ³¹ piru keilangan ne egpakanengneng ka me etew kayi te ampew te tane ne miggeyinawaan ku ka Amey, purisu eggimuwen ku ka langun ne insuhu din keddi.

"Ne, kuwa kid. Eggipanew kid."

15

Si Hisus ka malehet ne lawa te paras

¹ Ne migkahi si Hisus, "Sikeddiey ka malehet ne lawa te paras, ne ka Ameyku ka talagtanggu. ² Ne ka me sugpang ku ne kene egbebehas, egtempuhun din. Ne ka sugpang ne epanamehas, epanamperan din eyew egmalinis wey epanamehas pad te masalig.

³ Ne sikaniyu, nalinisan kew e pinaahi te lalag ne impanugtul ku kaniyu. ⁴ Ne palunggehaat kew keddiey, ne egpalunggehaat a degma kaniyu. Ka sugpang, kene seini egbebehas ke sikandin de, su keilangan ne naksugpat ded iya te lawa. Ne iling naan ded due, kene kew egpakabebehas ke kene kew egpalunggehaat keddiey.

⁵ "Sikeddiey ka lawa te paras, ne sikaniyu ka me sugpang. Seeye se eg-palunggehaat keddiey, wey diya a degma te kandin, iyan epakabebehas te masalig, su ware egkeyimu niyu ke wara a. ⁶ Ka etew ne egsuwey keddi, egpekeiling te sugpang ne egkatempug wey igdegpak. Ne egkahangu e se-eye wey egpamuruten e wey egsilaban e. ⁷ Emun ke eg-palunggehaat kew keddiey, wey due degma te kaniyu ka lalag ku, epakabuyu kew te minsan nekey ne igkeupii niyu, wey igbehey seini kaniyu. ⁸ Egkarayan ka Amey ku te me etew pinaahi te pegpamehas niyu te masalig, wey egkapamalehetan dan ne me hibateen ku sikaniyu. ⁹ Inggeyinawaan ku sikaniyu iling te peggeyinawa te Amey ku keddiey. Ne palunggehaat kew te keddi ne geyinawa. ¹⁰ Ke egtumanen niyu ka me suhu ku, epakapalunggehaat kew te keddi ne geyinawa, iling te pegtuman ku te me suhu te Amey ku wey nakapalunggehaat a te kandin ne geyinawa.

¹¹ "Inlalag ku seini kaniyu eyew egkahale kew degma iling keddi, wey eyew egkahale-gale kew amana. ¹² Ne seini ka suhu ku kaniyu: peggeyinaweeey kew iling te peggeyinawa ku kaniyu. ¹³ Warad egpekeiling te dakel ne geyinawa te etew ne egpeyimatey para te me

alukuy rin. ¹⁴ Me alukuy ku sikaniyu ke eggimuwen niyu ka igsuhu ku kaniyu. ¹⁵ Ne kene kud e sikaniyu egngaranan te me uripen, su ka uripen, kene epakataha te eggimuwen te ahalen din. Alukuy e ka igngaran ku kaniyu, su ke nekey ka narineg ku puun te Amey ku, sikan ded degma ka innangen ku kaniyu. ¹⁶ Kene ne sikaniyu ka mig-alam keddi, ke kene, sikeddi ka mig-alam kaniyu. Ne in-alam ku sikaniyu eyew egpangipanew wey egpamehas te masalig ne behas ne kene egkatebas. Ne puun due, minsan nekey ne egbuyuen niyu te Amey pinaahi te keddi ne ngaran, igbehey rin kaniyu. ¹⁷ Seini ka igsuhu ku kaniyu: peggeyinaweeey kew.

Ka pegdumut te me etew te me hibateen

¹⁸ "Ke egdumutan kew te me etew kayi te ampew te tane, sumsumana niyu ne sikeddiey ka an-anayan ne indumutan dan. ¹⁹ Ke iyan niyu eg-ikulen ka me etew kayi te ampew te tane, eggeyinawaan kew nikandan. Piru indumutan kew nikandan tenged su kene kew nikandan ne duma, ke kene, in-alam ku sikaniyu puun kandan. ²⁰ Tantanuri niyu ka inlalag ku kaniyu: 'Ware uripen ne labew te kandin ne ahalen!' Ne emun ke imbaybayaran a nikandan, egbaybayaran

kew degma nikandan! Ke intuman dan ka inlalag ku, egtuman degma sikandan te iglalag niyu. ²¹ Piru eggimuwen dan seini langun diye te kaniyu tenged keddiey, su ware sikandan nekeila te migsuhu keddiey. ²² Ware perem sale dan ke wara a miggendini wey migpakiglag kandan, piru kuntee, kenad e sikandan egpakananalakaye ne ware sale dan. ²³ Ka egdumut keddi, egdumut degma te Amey ku. ²⁴ Ware perem sale dan ke ware ku himuwa diye te kandan ka me kein-inuwan ne ware pad neyimu te minsan hentew, piru kuntee, nakakite e sikandan te neyimu ku, piru egdumutan key pad iya man-e nikandan te Amey ku. ²⁵ Piru keilangan ne egkeyitabu seini eyew egkatuman ka nasulat diye te kandan ne Balaud ne eggendue, ‘Indumutan a nikandan minsan ware eleg ne egpuunan.’

²⁶ “Eggendini ka Talag-pangabang ne iyan ka Panisingan ne diye egpuun te Amey, wey egpanulu kaniyu te kamalehetan. Ne egpamalehet sikandin meyitenged keddi. ²⁷ Ne keilangan degma ne egpamalehet kew meyitenged keddi su nenekegduma kid e puun pad te an-anayan.

16

¹ “Egpanpanayan kud sikaniyu te eglalag kayi eyew

kene kew egkatigkew wey eg-engked egpalintutuu keddiey. ² Egdeldelen kew nikandan te me simbaan dan, wey eggingsuma ka timpu ne seeye se eggimatey kaniyu egpalintutuu ne igkeupii te Manama ka eggimuwen din. ³ Eggimuwen dan sika kaniyu su ware sikandan nekeila kanami te Amey. ⁴ Piru impanpanayan kud sikaniyu meyitenged kayi eyew te pegginguma te timpu ne eggimuwen dan e seini diye te kaniyu, egkasuman-suman niyu ka inlalag ku.

Ka himu te Panisingan te Manama

“Ware ku ilalag seini te an-anayan su dume e mem pad kaniyu. ⁵ Piru kuntee, eglibed ad e diye te migsuhu keddi, ne warad iya minsan sabeka kaniyu ne mig-inse ke hendei a eggendiye. ⁶ Ne kuntee te ingkahiyen kud sikaniyu, nalaggew kew e amana. ⁷ Piru egnanganan ku sikaniyu te malehet: egpakameupiya kaniyu ne eg-awa a kayi su emun ke kene, kene eggendini te kaniyu ka Talagpangabang. Piru ke eg-awa ad, igpasubal kud seini kayi te kaniyu. ⁸ Te pegginguma rin e kayi te ampew te tane, egpataheen din e ka me etew te makasesale sikandan, wey igpataha rin ne matareng a, wey ka Amey ka eggukum kandan. ⁹ Egpataheen din sikandan te makasesale dan, su ware dan migpalintutuu

wey migsalig keddiey. ¹⁰ Ne egpataheen din sikandan ne matareng a, su eggendiye a te Amey wey kene kew e epakakita keddiey. ¹¹ Ne egpataheen din sikandan ne ka Manama ka eggukum, su newukuman e si Meibulan ne iyan migmandu kayi te ampew te tane.

¹² “Masulug pad perem ka iglalag ku kaniyu, piru egkeyirapan kew te pgsabut kayi kuntee. ¹³ Piru te pegginguma te Panisingan ne egpanulu te kamalehetan, egpanuluun kew nikandin te langun ne kamalehetan. Kene eglalag sikandin te kandin de ne pegbuut, ke kene, egpanugtulan kew nikandin te egkarineg din wey egnanganan kew nikandin ke nekey ka egkeyitabu te mewuri ne aldew. ¹⁴ Egpabantuhen a nikandin su ka iglalag ku, sika ka iglalag din kaniyu. ¹⁵ Ka langun ne kandin te Amey ku, keddiey degma, purisu nakahi kud e ne egkuun te Panisingan te Manama ke nekey ka keddi, wey igpangguhud din kaniyu.

Ka kahalaan wey pegkalaggew

¹⁶ “Kene egkaluhay ne kena ad egkakita nikaniyu, wey kene degma egkaluhay, egkiteen ad e man-e nikaniyu.”

¹⁷ Due me hibateen ne migmein-inseey, “Nekey-a ka igpasabut din te ingkahi rin kanta ne kene egkaluhay ne kene tad e egkakita sikandin wey kene de degma

egkaluhay ne egkiteen tad e man-e sikandin? Ne migkahi pad man-e sikandin te eggendiye kun sikandin te Amey. ¹⁸ “Nekey buwa mule ka igpasabut din te ‘Kene egkaluhay?’ Ware tad iya seini nasabut.”

¹⁹ Nakanengneng si Hisus ne egkeupian sikandan ne eg-inse kandin, purisu migkahiyan din sikandan, “Egmeg-in-inseey kew meyitenged te ingkahi ku ne kene egkaluhay ne kena ad egkakita nikaniyu, ne kene degma egkaluhay ne egkiteen ad e man-e nikaniyu? ²⁰ Egnanganan ku sikaniyu te malehet: egsinehew kew wey egpandalawit, piru egkahale mule ka me etew. Piru ka pegkalaggew niyu egkaliwanan sika te kahalaan. ²¹ Iling te sabeka ne malitan ne egbaletikan, egkalaggew sikandin su miggingsume e ka timpu ne egkalasey rin e. Piru te pgesut e te bate, egkalingew e sikandin te pegkalasey rin, su egkahale e sikandin te neetew e ka anak din kayi te ampew te tane. ²² Iling ded degma ka egkeyitabu kaniyu: kuntee, egkalaggew kew, piru egpakigkite e red kaniyu man-e wey egkahale kew red kangkuwa. Ne ware egpakaahew kaniyu te kahale niyu.

²³ “Te pegginguma te sika ne aldew, kenad ne keilangan ne eg-inse kew pad keddi

te minsan nekey. Egnanganen ku sikaniyu te malehet: minsan nekey ne egbuyuen niyu diye te Amey pinaahi te keddi ne ngaran, igbehey rin sika kaniyu.²⁴ Ne taman kuntee, ware kew pad nakabuyu kandin te minsan nekey pinaahi te keddi ne ngaran. Buyu kew eyew egpakarawat kew, ne eyew egkahale-gale kew pad.

Natalu ni Hisus ka kalibutan

²⁵ “Inlalag ku seini kaniyu pinaahi te me panunggilingan. Piru eggingsuma ka timpu ne kena ad eglalag te me panunggilingan, ke kene, igpaayad/ayad kud igapasabut kaniyu ka meyitenged te Amey. ²⁶ Te peggingume e te sika ne aldew, eg-uneypney kew e egbuyu te Amey pinaahi te keddi ne ngaran. Kenad e ne sikeddi pad ka egbuyu diye te Amey para kaniyu, ²⁷ su ka Amey mismu ka miggeyinawaan kaniyu. Inggeyinawaan kew nikandin su inggeyinawaan e ma nikaniyu wey migpalintutuu kew ne diya a migpuun te Manama. ²⁸ Diya a migpuun te Amey wey miggendini a te ampew te tane, ne kuntee, egawa ad kayi te ampew te tane wey eglibed a diye te Amey.”

²⁹ Ne migkahiyan sikandin te me hibateen din, “Te, impaayad/ayad nud e te eglalag ka guhuren nu wey kenad e ne pinaahi te panunggilingan.

³⁰ Nakanengneng key e kuntee ne nakataha ka te langun. Su ke due eg-inse keykew, tapey nud e nanengnengi ke nekey ka ig-inse keykew. Sikan naa ka migpalintutuu key e ne diye ka migpuun te Manama.”

³¹ Ne migtabak si Hisus diye te kandan, “Migpalintutuu kew e kuntee? ³² Piru eggingsuma ka timpu, ne kuntee miggingsume en iya, ne egmemekgsuwey-suwey kew ka egpanguli, wey engkeran ad nikaniyu. Piru kena a egpakashabsabeka su due ka Amey ne duma ku. ³³ Inlalag ku seini kaniyu eyew due keupianan niyu pinaahi te pegasabeka niyu keddiey. Egpaantusen kew kayi te kalibutan, piru pakannekal kew su natalu kud e seini!”

17

Ka peg-ampu ni Hisus te me hibateen din

¹ Te nakapenge e si Hisus ka miglalag kayi, migleng-ag e sikandin diye te langit wey migkahi, “Ame, miggingsume e ka timpu. Ipabantug nud ka Anak nu eyew egbantuhen ka degma te Anak. ² Su imbehayan nu sikandin te katenged ne egmandu te langun ne etew eyew egkabehayan din te umul ne ware egtamanan ka langun ne imbehey nu kandin. ³ Seini ka umul ne ware egtamanan: ne ka me etew eg-ila keykew te sikeykew re ka sabsabeka ne malehet ne

Manama, wey eg-ila degma ki Hisu Kristu te insuhu nu.⁴ Impabantug ku sikeykew kayi te ampew te tane tenged su napengaan kud ka im-peyimu nu keddi.⁵ Purisu kuntee Ame, ipabantug a due te tangkaan nu. Ibehey nu keddi ka kabantug ne keddiey dengan te timpu ne dume e pad keykew, ka timpu ne ware nu pad himuwa ka kalibutan.

⁶ "Impeila kud sikeykew diye te me etew ne imbehey nu keddiey ne impangangey nu puun te kalibutan. Sikandan, keykew dengan, ne imbehey nud keddi, wey intuman dan ka me suhu nu.⁷ Ne kuntee, nakanengneng e sikandan te ka langun ne imbehey nu keddi, diye egpuun te keykew.⁸ Ke nekey ka impanulu nu keddi, sikan ded degma ka impanulu ku kandan wey indawat dan seini. Nanengnengan dan man-e ne malehet ne diya a migpuun te keykew, wey migpalintutuu sikandan ne sikeykew ka migsuhu keddi.

⁹ "Eg-ampu e pad kandan. Ne kene ne langun ne etew kayi te ampew te tane ka eg-ampuan ku, ke kene, seeye de se me etew ne imbehey nu keddi tenged su keykew sikandan.¹⁰ Ka langun ne keddiey, keykew, ne ka langun ne keykew, keddiey degma. Ne impabantug a nikandan.¹¹ Ne kuntee, eggenduen ad e te keykew. Kena ad e kayi te ampew

te tane, piru sikandan, kayi pad. Matulus ne Amey, bantayi nu sikandan pinaahi te geem te ngaran nu ne imbehey nu degma keddi, eyew egkasabeka sikandan langun iling kanta te sabeka re!¹² Taheed te dume e pad kandan, imbantayan ku sikandan pinaahi te geem te ngaran nu ne imbehey nu keddi. Imbantayan ku sikandan ne ware minsan sabeka kandan ne nalaag angin e te seeye se egkalaag iya eyew egkatuman ka Kasulatan.¹³ Ne kuntee, eggenduen ad te keykew, ne seini inlalag kud e kandan taheed te kayi e pad te ampew te tane eyew egkahale-gale degma sikandan iling keddiey.¹⁴ Impanengneng kud e kandan ka lalag nu wey indumutan e sikandan te me etew kayi te ampew te tane, su iling e sikandan keddi te kenad ne duma te me etew kayi te ampew te tane.¹⁵ Kena a eg-ampu ne egkuuen nud e sikandan kayi te kalibutan, ke kene, bantayi nu re sikandan puun ki Meibulan.¹⁶ Iling degma sikandan keddiey te kenad e ne duma pad te me etew kayi te ampew te tane.¹⁷ Matulusa nu sikandan pinaahi te kamalehetan; ne sika iya se lalag nu ka kamalehetan.¹⁸ Insuhu ku sikandan diye te me etew iling te pegpeendini nu keddi te ampew te tane.¹⁹ Igbehey ku keykew ka keddi ne lawa

para kandan, eyew sikandan, egpakabehey iya degma te umul ran diye te keykew.

²⁰ “Kene ne sikandan de se imbehey nu keddi ka mig-ampuan ku, ke kene, seeye degma se egpalintutuu wey egsalig keddi pinaahi te pegpanulu dan. ²¹ Mig-ampu a ne egkasabeka perem sikandan langun. Ame, egkasabeka perem sikandan kayi te kanta, iling keykew te kayi te keddiey wey sikeddi ne due degma te keykew. Egkasabeka perem sikandan eyew egpalintutuu ka langun ne etew kayi te ampew te tane ne sikeykew ka migsuhu keddi! ²² Imbehayan ku sikandan te kabantug ne iling te kabantug ne imbehey nu keddi, eyew egkasabeka sikandan iling kanta te sabeka re. ²³ Sikeddiey, diye te kandan, ne sikeykew kayi te keddi eyew egkasabeka iya sikandan. Ne puun dutu, epakanengneng ka langun ne etew kayi te ampew te tane te sikeykew ka migsuhu keddi, wey eyew egkatahaan dan ne inggeyinawaan nu sikandan iling te peggeyinawa nu keddiey.

²⁴ “Ame, egkeupian a ne sikandan se imbehey nu keddiey, egpakanuma degma keddi ke hendei a, eyew egpakkita sikandan te karesen ku ne imbehey nu keddi, su inggeyinawaan e ma nikeykew minsan ware pad himuwa ka kalibutan! ²⁵ Amey ne matareng, ware nekeila keykew ka

me etew kayi te ampew te tane, piru nekeila a mule keykew. Ne seini se me duma ku, nakataha sikandan ne sikeykew ka migsuhu keddi. ²⁶ Impeila ku sikeykew diye te kandan wey egpabulusan ku seini te egpeila eyew egkarawat dan degma ka geyinawa ne iling te geyinawa nu keddi, wey eg-ugpa a degma diye te kandan.”

18

Ka pegdakep ki Hisus

(Mat. 26:47-56; Mar. 14:43-50; Luk. 22:47-53)

¹ Te nakapenge e si Hisus ka mig-ampu, miggipanew e sikandin duma te me hibateen din wey miglapas te beuhan ne egngaranan te Kidrun. Ne due pamulaan te seeye ne inged wey miggendiye sikandan te seeye ne pamulaan. ² Ne si Hudas ne mig-akal ki Hisus, nakatulitu dutu, su malasi sikandan eglibulung te seeye ne inged. ³ Purisu miggendiye si Hudas te pamulaan ne migduruma te me sundalu wey ka duma ne me talagbantey te timplu ne insuhu te me pangulu te talagpanubad wey te me Parisiyu. Nanguyan sikandan te me ganse wey me sulu wey me panganiban. ⁴ Nakanengneng si Hisus ke nekey ka egkeyitabu kandin, purisu insinug-ung din sikandan ne migkahi, “Hentew-a ka egpammitawen niyu?”

⁵ Ne migtabak sikandan, “Si Hisus ne matig-Nasarit.”

Ne migkahi si Hisus, “Sikeddi iya.”

Ne si Hudas ka mig-eakal kandin, diye iya degma. ⁶ Te pegkahi ni Hisus te sikandin iya ka egpammitawen dan, mig-isues sikandan wey ne-napeled diye te tane. ⁷ Mig-abayan e man-e insei sikan-dan ni Hisus ke hentew-a ka egpammitawen dan.

Ne migtabak sikandan, “Si Hisus ne matig-Nasarit.”

⁸ Ne migkahi si Hisus, “Migkahiyan kud e sikaniyu te sikeddi iya si Hisus. Ne emun ke sikeddi ka egpam-mitawen niyu, peyipanawa niyu re seini se me duma ku.” ⁹ (Inlalag seini ni Hisus su eyew egkatuman ka ingkahi rin ne eggenendue, “Ame, ware minsan sabeka kandan te imbehey nu keddi ne egkalaag.”)

¹⁰ Ne si Simun Pidru due kampilan din. Inggulabut din seini wey intibbas din e ka uripen te Labew ne Talagpanubad, ne natamped e ka kawan-an ne talinga te uripen. Egngaranan ki Malku ka uripen. ¹¹ Ne migkahiyan ni Hisus si Pidru, “Ilipi nu ka kampilan nu. Kahiyen nu ne kene ku eg-inumen ka tahu te ubab ne imbehey keddi te Ameyku*?”

Ka peg-uyan ki Hisus diye ki Anas

¹² Nataman, inderakep e si Hisus wey imbebaku e te me sundalu duma te kepitan dan, wey te me Hudiyu ne talagban-tey te timplu.

¹³ Miggunaan dan pad uyana sikandin diye te ki Anas ne anuhang ni Kaypas ne iyan Labew ne Talagpanubad te seeye ne timpu. ¹⁴ Ne si Kaypas iya ka migtambag te me pangulu te me Hudiyu ne meupiya pad ke sabeka re ne etew ka egpatey para te me etew.

Ka pegpahunware ni Pidru meyitenged ki Hisus

(Mat. 26:59-66; Mar. 14:55-64; Luk. 22:66-71)

¹⁵ Migsinundul ki Hisus si Simun Pidru wey ka sabeka ne hibateen. Ne ka seeye ne hibateen, neilaan te pangulu te talagpanubad diye te timplu, purisu nakaseled sikandin duma ki Hisus diye te lama te baley te pangulu te talagpanubad. ¹⁶ Piru diye de migpalunggehaat si Pidru te lihawangan ne marani te gumawan te alad. Nataman, miglibed e man-e miglihawang ka se sabeka ne hibateen ne neilaan te pangulu te talagpanubad wey migpakiglag te malitan ne migtetameng te gumawan. Nataman, impaseled din e si Pidru. ¹⁷ Ne migkahiyan si Pidru te malitan ne diye te gumawan, “Kema ke sabeka ka ne hibateen te sika ne etew?”

18:11 Mat 26:39; Mar 14:36; Luk 22:42. **18:14** Huw 11:49-50.

* **18:11** Iyan igpasabut ni Hisus te

tahu te ubab ka peg-antus din.

Ne migtabak si Pidru, "Kene ne!"

¹⁸ Maagsil te seeye ne timpu purisu migtetemeg ka me uripen wey ka me talagbantey, ne mig-alungut sikandin ka migmanasindeg ne egginarang. Ne migsasindeg degma si Pidru wey migdangdang kandan ka egginarang.

Ka peg-inse-inse te Labew ne Talagpanubad ki Hisus

(Mat. 26:59-66; Mar. 14:69-72; Luk. 22:58-62)

¹⁹ Ne dutu, mig-insaan e te Labew ne Talagpanubad si Hisus meyitenged te me hibateen din wey te pegpanulu din. ²⁰ Ne migtabak si Hisus, "Kene ne heles ka pegpanulu ku te me etew su diya a migpanulu te me simbaan wey diye te timplu ne libulunganan te langun ne Hudiyu. Ware impanulu ku te heles de. ²¹ Mania te iyan a eg-insaan nikaniyu? Insei niyu ka nakarineg keddiey su nakataha sikandin te inlalag ku."

²² Te peglalag ni Hisus kayi, intagpi sikandin te sabeka ne talagbantey ne diye te lenged din, wey migkahiyan sikandin, "Mania te egilingen nu due te egtabak ka Labew ne Talagpanubad?"

²³ Ne migtabak si Hisus, "Emun ke nakalalag e ma te kene ne eleg, tew ki la ipawangal-wangal nud kuntee kayi. Piru ke eleg ma ka inlalag ku, mania te intagpi a nikeykew?"

²⁴ Nataman, impeuyan e ni Anas si Hisus ne nabaku de due diye te ki Kaypas ne Labew ne Talagpanubad.

Ka igkarangeb ne pegpahunware ni Pidru meyitenged ki Hisus

(Mat. 26:71-75; Mar. 14:69-72; Luk. 22:58-62)

²⁵ Te seeye ne timpu, migsasindeg pad si Pidru ka egginarang, wey mig-insaan sikandin te me etew, "Kene ka ne sabeka ne hibateen te sika ne etew?"

Piru migpahunware si Pidru ne migkahi, "Kene ne!"

²⁶ Nataman, due sabeka ne uripen te Labew ne Talagpanubad ne karumaan te etew ne intibbas ni Pidru se talinga. Ne migkahi sikandin, "Hendue te sikeykew ma iya seeye se nakita ku ne duma rin diye te pamulaan?"

²⁷ Ne dutu, migpahunware e man-e si Pidru, ne due-rue ne mig-ukale ka manuk.

Ka peg-uyan ki Hisus diye te ki Pilatu

(Mat. 26:71-75; Mar. 14:69-72; Luk. 22:58-62)

²⁸ Nataman in-uyan dan e man-e si Hisus puun te baley ni Kaypas peendiye te palasyu te gubirnadur te pegkamaselem e. Ne ware migseled diye te palasyu ka me Hudiyu su egpakaupak sikandin te tuluuwen dan, su emun ke egseled sikandin te baley te kene ne Hudiyu, eg-isipen sikandin ne malindit wey kene egpakakeen te iglabung

te Sahakeen te Peglihad te Panalihan te Manama.²⁹ Purisu, iyan e miglihawang si Pilatu wey mig-inse kandan, “Nekey-a ka igsumbung niyu meyitenged te seini ne etew?”

³⁰ Ne migtabak sikandan, “Kene ney perem eg-uyanen kayi te keykew ka seini ne etew ke ware nakasale.”

³¹ Ne migkahiyan sikandan ni Pilatu, “Kua niyu red sikandin wey sikaniyud e ka eggukum kandin sumale te kaniyu ne balaud.”

Ne migtabak ka me pangulu te me Hudiyu, “Piru ware katenged ney te me Hudiyu ne eggimatey te minsan hentew.”³² (Neyitabu seini eyew egkatuman ka ingguhud ni Hisus ke nekey ne klasi te kapatayan ka eppangkusan din.)

³³ Nataman, miglibed e man-e migseled si Pilatu diye te palasyu wey in-umew rin si Hisus wey mig-insaan, “Sikeykew iya ka Hari te me Hudiyu?”

³⁴ Ne migtabak si Hisus, “Keykew naa iya sika ne inse, wey ke ingguhuran ke re te duma meyitenged keddi?”

³⁵ Ne migtabak si Pilatu, “Mania, kahiyen nu buwa ne Hudiyu a? Iyan miguyan keykew kayi te keddi ka duma nu ne me Hudiyu wey ka me pangulu te talagpanubad. Nekey-a ka neyimu nu?”

³⁶ Ne migtabak si Hisus, “Ka peghari ku, kene ne kayi

te kalibutan. Su emun ke kayi pa seini te kalibutan, egpakig-ehet e perem ka me etew ku eyew kena a egkarakep te me pangulu te me Hudiyu. Piru kene iya ne kayi te kalibutan ka peghari ku!”

³⁷ Ne puun due, mig-inse e man-e si Pilatu diye te kandin, “Hari ka iya?”

Ne migtabak si Hisus, “Ingkahi nud en iya ne Hari a. Neetew a wey miggendini te ampew te tane para te sabeka ne katuyuan ne pegpamahet te kamalehetan. Ka langun ne diye te kamalehetan, epgammineg keddiey.”

³⁸ Ne mig-inse e man-e si Pilatu diye te kandin, “Nekey-a ka kamalehetan?”

*Kapeg-uyun te peggimatey
ki Hisus*
(Mat. 27:15-31; Mar. 15:6-20; Luk. 23:13-25)

Nataman, miglihawang e man-e si Pilatu wey migkahi diye te me Hudiyu, “Ware nakita ku ne sale te seini ne etew.”³⁹ Piru nabatasan niyu ne due sabeka ne pinirisu ne eglekaan ku te tagse Sahakeen te Peglihad te Panalihan te Manama. Na, igkeupii niyu naa ne eglekaan ku ka Hari te me Hudiyu?”

⁴⁰ Ne migbalbalukan sikan dan ka migtabak, “Kene ne sikandin! Si Barabas ka igkeupii ney!” (Si Barabas, sabeka ne ribildi.)

19

¹ Nataman, impakuwa ni Pilatu si Hisus wey impalam-pesan. ² Ne miggimu ka me sundalu te kuruna ne duhi wey impakuruna ran ki Hisus. Impakukuyumbu dan man-e sikandin te kumbale ne ubi se batek, ³ wey migpasubsubaley sikandan ka egparani kandin ne migkahi, “Egmabantug ka Hari te me Hudiyu!” wey impanagpi dan sikandin.

⁴ Ne miglihawang e man-e si Pilatu wey migkahi diye te me etew, “Kuntee, eg-uyanen kud sikandin kayi te kaniyu eyew egpakanengneng kew te ware nakita ku ne sale din.” ⁵ Ne dutu, miglihawang e si Hisus ne migkukuruna te duhi wey ingkukuyumbu te kumbale ne ubi se batek. Ne migkahi si Pilatu diye te kandan, “Pitawa niyu! Senid e sikandin!”

⁶ Te pegkakita kandin te me pangulu te talagpanubad wey te me talagbantey, migbalbalukan sikandan ka migkahi, “Ilansang nu sikandin te krus! Ilansang nu sikandin!”

Ne migkahiyan sikandan ni Pilatu, “Ke iling ma rue, sikaniyu ka egkuwa kandin wey eglansang te krus, su ware mule nakita ku ne sale din.”

⁷ Ne migtabak sikandan, “Due kanami ne balaud, ne sumale te sika ne balaud, eleg sikandin ne eggimatayan su migkahi sikandin te Anak din kun te Manama.”

⁸ Te pegkarineg ni Pilatu dutu, nasi de iya man-e

sikandin naaldek. ⁹ Purisu, miglibed e man-e migseled sikandin diye te palasyu wey mig-inse ki Hisus, “Hendei ke bes iya migpuun?”

Piru ware migtabak si Hisus. ¹⁰ Purisu migkahiyen sikandin ni Pilatu, “Mania te kene ka egtabak keddi? Ware ke buwa nakataha te due katenged ku te pegpaleke keykew wey te pegpalansang degma keykew te krus?”

¹¹ Ne migtabak si Hisus, “Egkeyimu nu re sika keddi tenged su sika ne katenged, imbehey te Manama keykew. Purisu iyan dakel se sale te etew ne migbehey keddi diye te keykew.”

¹² Te pegkarineg ni Pilatu kayi, migpakannekal sikandin ne eglekaan perem si Hisus. Piru migbalbalukan ka me pangulu te me Hudiyu, “Emun ke eglekaan nu sikandin, kene ke naa ne alukuy te Impiradur! Su ka minsan hentew ne egpaari-Hari, kuntere te Impiradur!”

¹³ Te pegkarineg dutu ni Pilatu, mig-uyan din e si Hisus diye te lihawangan wey migpinnuu sikandin diye te pinnuuwan te talag-gukum diye te plasa ne migngaranan, “Plasa ne Neelin ne Batu.” (Egngaranan seini te me Hibruwanen te “Gabata.”) ¹⁴ Ne seeye, mahaan e egkeudtu wey dispiras e te Sahakeen te Peglihad te Panalihan te Manama. Ne migkahi e si Pilatu diye te me Hudiyu, “Senid e ka Hari niyu!”

¹⁵ Piru migbalbalukan sikandan ka migtabak, “Himatayi nu sikandin! Himatayi nu! Ilansang nu sikandin te krus!”

Ne mig-insaan sikandan ni Pilatu, “Iyan niyu igkeupii ne iglansang ku te krus ka Hari niyu?”

Ne migtabak ka me pangulu te me talagpanubad ne migkahi, “Ware Hari ney, ka Impiradur de!”

¹⁶ Seeye naa, imbehey e ni Pilatu si Hisus diye te kandan eyew iglansang te krus.

Ka peglansang ki Hisus te krus

(Mat. 27:32-44; Mar. 15:21-32; Luk. 23:26-43)

Purisu in-uyan dan e si Hisus, ¹⁷ wey miglihawang sikandan te siyudad. Ne impatiang dan sikandin te krus, wey in-uyan dan sikandin diye te inged ne egngaranan te “Angkal.” (Egngaranan seini te me Hibruwanen te “Gulguta.”) ¹⁸ Ne diye dan e ilansang sikandin te krus. Ne due degma daruwa ne etew ne inlansang duma kandin. Ka sabeka diye te igkahibang din, ka dangeb diye te igkakawanan din.

¹⁹ Ne migsusulat si Pilatu te keretula ne impatahu diye te krus ni Hisus. Seini ka nasulat: “Si Hisus ne matig-Nasarit, ka Hari te me Hudiyu.” ²⁰ Ne masalig ka me Hudiyu ne nakabasa dutu su marani re te siyudad ka inged ne miglansangan ki Hisus. Ne nasulat pad iya

man-e seeye te Hibruwanen, te Latin, wey te Grigu ne me linalahan. ²¹ Ne migkahiyan si Pilatu te me pangulu te talagpanubad te me Hudiyu, “Kene ne ‘Hari te me Hudiyu’ ka isulat nu, ke kene, ‘Migkahi ka seini ne etew te sikandin kun ka Hari te me Hudiyu.’”

²² Piru migtabak si Pilatu, “Ka nasulat kud, kene kud e egliwanan.”

²³ Te nakapenge e ka me sundalu te eglansang ki Hisus te krus, ingkuwa ran e ka me kumbale din wey imbaad dan te hep-at eyew due baad te tagse sundalu. Ne ingkuwa ran e man-e ka malayat ne kumbale ni Hisus, piru ware mule teyi dutu. ²⁴ Ne migmanangnangeney ka me sundalu, “Kene te re eggisien seini, ke kene, egpintut-pintut ki re ke hentew ka egpakakamuney kayi.” Neyitabu seini su eyew egkatuman ka nasulat te Kasulatan ne migkahi, “Imbaad-baad dan ka me kumbale ku,

wey migpapinpintutey ke hentew ka egpakakuwa te kumbale ku ne malayat.”

Ne sika iya ka innimu te me sundalu.

²⁵ Ne diye migsasindeg te marani te krus ni Hisus ka iney rin wey ka atebey te iney rin, wey si Mariya ne asawa ni Kliyupas, wey si Mariya Magdalina. ²⁶ Te pegkakita ni Hisus te iney rin wey te inggeyinawaan

din ne hibateen din ne migsasindeg dutu te marani rin, migkahiyan din e ka iney rin, "Ine, sikandin e anaknu."

²⁷ Ne migkahiyan din e man-e seeye se hibateen, "Sikandin e inaya nu." Ne puun de dutu, indume e te seeye ne hibateen si Mariya wey impalemung din e diye te kandan.

Ka pegkapatey ni Hisus

(Mat. 27:45-56; Mar. 15:33-41; Luk. 23:44-49)

²⁸ Nanengnengan ni Hisus ne napenge e ka langun, wey migkahi sikandin, "Nam-maraan a," eyew egkatuman ka Kasulatan.

²⁹ Ne due yahung diye ne napenu te maperes ne binu. Seeye naa, in-eled dan dutu ka egpekeiling te kutsun wey intagkes dan diye te sugpang te isupu wey impasupsup dan ki Hisus.

³⁰ Te nakaheram e si Hisus te binu, migkahi e sikandin, "Napenge e." Nataman, mig-unduk sikandin wey nabigtawan e.

Ka pegpilak te kilid ni Hisus

³¹ Aldew seeye te peg-pangandam te Peggimeley. Ne kene egkeupian ka me pangulu te me Hudiyu ne egkahaat diye te krus ka me lawa te me minatey tenged su ka seup ne aldew, Aldew e te Peggimeley ne amana ne impurtanti diye te me Hudiyu. Purisu mighangyu sikandan

ki Pilatu ke egkaayun ne egpanggepuen ka me paa te me etew ne inlansang te krus eyew mahaan egpatey wey eg-aween e. ³² Purisu nangendiye ka me sundalu wey impanggepu dan ka me paa te daruwa ne etew ne inlansang duma ki Hisus.

³³ Piru te pegginguma ran diye te ki Hisus, nakita ran ne migpatey e sikandin, purisu ware dan e gepua ka paa rin. ³⁴ Piru ka sabeka te me sundalu, impilak din te deldeg din ka kakiliran ni Hisus, wey due-rue ne migthis ka langesa wey weyig.

³⁵ (Malehet seini ne neyitabu su due nakakita kayi, wey migpamalehetan din seini. Nakanengneng sikandin te malehet ka guhuren din, wey ingguhud din seini eyew egpalintutuu kew degma.) ³⁶ Neyitabu seini su eyew egkatuman ka nasulat diye te Kasulatan ne eggendue, "Ware minsan sabeka ne tulan din ne egkahepu." ³⁷ Ne duen pad man-e nasulat diye te Kasulatan ne eggendue, "Egtengtengan dan ka etew ne impilak dan."

Ka pegsabal ki Hisus

(Mat. 27:57-61; Mar. 15:42-47; Luk. 23:50-56)

³⁸ Te pegkapenga kayi, imbuyu e ni Husi ne matig-Arimatiya ka lawa ni Hisus diye te ki Pilatu. (Si Husi, sabeka ne hibateen ni Hisus piru te heles de su egkaaldek sikandin te me pangulu te

me Hudiyu.) Ne intuhutan ni Pilatu si Husi, purisu maggendiye sikandin wey ingkuwa rin e ka lawa ni Hisus.³⁹ Migduma degma kandin si Nikudimu, ka migpakigkita ki Hisus te sabeka ne marusilem. Miguyan sikandin te peemut ne me lalimma ne pulu (50) ne kilu ne migsewuhan te mira wey aluyi.⁴⁰ Nataman, migkuwa ran e te daruwa ka lawa ni Hisus wey imbuksan dan te hinabel ne migtahuan te peemut. Seini ka batasan te me Hudiyu ke eglebeng te minatey.⁴¹ Ne due sabeka ne pamulaan ne diye te miglansangan ki Hisus, wey due iyam pad ne sabalanan ne ware pad nasabali.⁴² Ne puun su Aldew e seeye te Pegpangandam te Peggimeley te me Hudiyu, wey marani re degma ka sabalanan, diye dan e isabal ka lawa ni Hisus.

20

Ka insabalan ne warad tahu
(Mat. 28:1-8; Mar. 16:1-8;
Luk. 24:1-12)

¹ Te sikan pad egkaliwaswas te aldew te Dumminggu, maggendiye si Mariya Magdalina te inlungahan ne dalama ne insabalan ki Hisus. Te pegtengteng din, nalilid e ka batu ne in-elet dutu te gumawan te insabalan. ² Seeye naa, migpallahuy sikandin peendiye engki Simun Pidru wey te seeye se hibateen ne

miggeyinawaan ni Hisus. Ne migkahiyan din sikandan, "Ingkuwa ran e ka Magbebaya diye te insabalan, ne ware key nakataha ke hendei ran e sikandin itahu."

³ Purisu maggendiye te insabalan si Pidru wey ka sabeka ne hibateen.⁴ Namallahuy sikandan se daruwa, piru meiyal ne egpallahuy ka duma ni Pidru, purisu iyan nekewuna diye te insabalan. ⁵ Te pegginguma rin diye, migunduk sikandin ka egseilang wey nakita rin ka hinabel, piru ware sikandin migseled.⁶ Ne miggungume e degma si Simun Pidru ka migsundul kandin, piru migleus sikandin migseled diye te insabalan. Ne nakita rin dutu ka me hinabel,⁷ wey ka manggad ne imbuksan te ulu ni Hisus. Nalipi e seini wey nakasuwey te me hinabel.⁸ Ne migseled e degma ka sabeka ne hibateen ne nekewuna ne miggunguma diye te insabalan, wey nakakita degma sikandin dutu wey migpalintutuu ne neuyag e si Hisus.⁹ (Nakapalintutuu e sikandan minsan ware dan pad nasabut ka nasulat te Kasulatan ne egkeuyag si Hisus.) ¹⁰ Nataman, mig-uli e ka daruwa ne hibateen.

*Ka pegpakita ni Hisus ki
Mariya Magdalina*
(Mat. 28:9-10; Mar. 16:9-11)

¹¹ Si Mariya mule, migsasindeg sikandin diye te lihawangan te insabalan ka egsinsinehew. Te egkalihet sikandin ne egsinehew, migunduk sikandin ka egseilang diye te insabalan. ¹² Ne due nakita rin dutu ne daruwa ne panalihan te Manama ne migkukumbale te maangkag ne diye migpinnuu te migtahuan te lawa ni Hisus. Ka sabeka diye migpinnuu lenged te keulunanan din wey ka dangeb diye lenged te kasikuwayan. ¹³ Ne mig-insaan dan sikandin, “Mengeatebey, mania te egsinehew ka?”

Ne migtabak si Mariya, “Uya, su ingkuwa ran e ka lawa te Magbebaye ku, wey wara a nakataha ke hendei ran e sikandin itahu!”

¹⁴ Te pegkapenga rin te miglalag, migbalikid e sikandin wey nakita rin si Hisus ka migsasindeg, piru ware sikandin nekeila ne si Hisus bes seeye. ¹⁵ Ne mig-insaan sikandin ni Hisus, “Mengeatebey, mania te egsinehew ka? Hentew bes ka egpammitawen nu?”

Kahiyan ni Mariya ne talagtanggu seeye te me pinamula diye, purisu migkahiyan din, “Emun ke sikeykew ka migkuwa kandin, nangeni a ke hendei nu sikandin itahu su egkuen ku.”

¹⁶ Ne migkahiyan sikandin ni Hisus, “Mariya!”

Ne migtangke si Mariya diye te ki Hisus ne migkahi

te Hibruwanen ne linalahan, “Rabuni!” (ka igpasabut, “Talagpanulu.”)

¹⁷ Ne migkahiyan sikandin ni Hisus, “Kene ka gen-gen keddi su ware e pad nabatun diye te Amey. Piru hendiyei nu ka me suled ku wey panugtuli nu sikandan te eggendiya ad te dibabew diye te Amey ku ne Amey niyu red, wey Manama ku ne Manama niyu red degma.”

¹⁸ Purisu miggendiyaan e ni Mariya Magdalina ka me hibateen wey impanugtulan din sikandan te nakita rin ka Magbebaye. Ne ingguhuran din man-e sikandan te in-lalag ni Hisus diye te kandin.

*Ka pegpakita ni Hisus te me hibateen din
(Mat. 28:16-20; Mar. 16:14-18; Luk. 24:36-49)*

¹⁹ Te pegkamarusilem e te seeye ne Duminggu, migliblung ka me hibateen diye te sinabeng wey migsiraduhan dan ka me gumawan su naaldek sikandan te me pangulu te me Hudiyu. Nataman, miglepew e si Hisus wey migsasindeg diye te taliware dan wey migkahi, “Ka keupianan egduma kaniyu.” ²⁰ Te pegkapenga rin te eglalag, impapitew rin e kandan ka me belad din wey ka kakiliran din. Ne nahale-gale ka me hibateen te nakakita sikandan te Magbebaye. ²¹ Ne migkahiyan e man-e sikandan ni Hisus, “Ka keupianan egduma kaniyu. Insuhu a te Amey kayi, ne egsuhuen ku degma

sikaniyu.” ²² Ne inniyupan din e sikandan wey migkahiyan, “Dawata niyu ka Panisingan te Manama. ²³ Emun ke egpasayluwen niyu ka minsan hentew te me sale dan, impasaylu e sikandan. Piru ke kene niyu egpasayluwen, ware sikandan pasayluwa.”

Ka pegduwa-ruwa ni Tumas

²⁴ Te pegginguma ni Hisus, ware diye si Tumas ne egnaranan ki Seping, ka sabeka te sapulu wey daruwa (12) ne hibateen. ²⁵ Purisu migpangguhuran naan de sikandin te duma ne me hibateen te nakita ran ka Magbebaye.

Piru migkahiyan sikan dan ni Tumas, “Angin e ke egkakita ku ka naye te lansang diye te belad din wey egkatiyuk ku te kemel ku ka imbaye te lansang, wey ke egkasamsam ku ka pali diye te kakiliran din, human e naa egpalintutuu.”

²⁶ Te egsenge simane e ka miglihad, miglibulung e man-e ka me hibateen diye te sinabeng, ne dutu, duma ran e si Tumas. Nasir-aduwan ka me gumawan piru miglepew e man-e si Hisus wey migsasindeg diye te taliware dan ne migkahi, “Ka keupianan egduma kaniyu.” ²⁷ Ne ingkahiyan din si Tumas, “Hendini ka, tengtengi nu ka me belad ku wey tiyuka nu. Samsama nu degma ka pali kayi te

kakiliran ku. Kene kad duwaruwa, ke kene, palintutuu kad nasi.”

²⁸ Ne migkahiyan sikandin ni Tumas, “Magbebaye ku wey Manama ku!”

²⁹ Ne migkahiyan sikandin ni Hisus, “Migpalintutuu ke naan e su nakakita kad e keddi? Egpanalanganin se-eye se egpalintutuu minsan ware nakakita keddi!”

Ka katuyuan te pegrusat te seini ne baseen

³⁰ Masalig pad ka me kein-inuwan ne innimu ni Hisus ne napamalehetan te me hibateen ne ware nasulat te seini ne baseen. ³¹ Piru ka nasulat kayi insulat eyew egpaketpalintutuu kew ne si Hisus ka Kristu ne Anak te Manama. Ne eyew pinaahi te pegpalintutuu niyu, egpakaangken kew te umul ne ware egtamanan tenged te pegrusat niyu kandin.*

21

Ka pegpakita ni Hisus te piti ne hibateen din

¹ Te peglihad te pila ne aldew, migpakite e man-e si Hisus te me hibateen din diye te Lanew te Tibiryas. Iling kayi ka pegpakita rin. ² Nalibulung ensi Simun Pidru, si Tumas ne egnaranan ki Seping, si Natanail ne matig-Kana ne sakup te Galiliya, wey ka me anak ni Sibidiyu, wey duen pad daruwa ne hibateen. ³ Ne nataman, migkahiyan ni

Simun Pidru ka me duma rin, "Egngengalap a."

Ne migkahi sikandan, "Egduma key keykew." Purisu nangendiyad e sikandan wey nanguntud e te balangey. Piru warad iya neutel ran te seeye ne marusilem.

⁴ Te pegsile e te aldew, migsasindeg si Hisus diye te ilis te lanew, piru ware sikandan nekeila te sikandin bes seeye. ⁵ Ne migkahiyan sikandan ni Hisus, "Mesuled, ware neutel niyu?"

Ne migtabak sikandan, "Ware da!"

⁶ Ne migkahiyan din sikandan, "Iantug niyu ka biyale niyu diye te egkakawanan te balangey ne egpekeutel kew e." Purisu in-antug dan e ka biyale dan diye te igkakawanan te balangey. Ne dutu, kene dan e egkeehan te egganuy ka biyale dan puun su dakel amana ka migsahad.

⁷ Ne migkahiyan si Pidru te hibateen ne miggeyinawaan ni Hisus, "Ka Magbebabe ma mule sika!" Te pegkarineg ni Simun Pidru ne ka Magbebabe bes seeye, insaluub din e ka kumbale ne inluung din wey miglumbuk e ka eggakap. ⁸ Ka duma ne me hibateen mule, nanguntud ded sikandan te balangey ka migpeilis te lanew ne migganuy te biyale ne napenu te ngalap. Kene de amana ne mariyu sikandan te ilis te lanew su me siyam

de ne pulu (90) ne mitrus ka kariyuan. ⁹ Te nakahakap e sikandan, due nakita ran ne nalimud ne baha ne due intuug ne me ngalap, wey due degma paan. ¹⁰ Ne migkahiyan sikandan ni Hisus, "Uyan kew kayi te duma ne ngalap ne neutel niyu."

¹¹ Purisu mig-untud e man-e si Simun Pidru te balangey wey migganuy rin e diye te ilis te lanew ka biyale ne napenu te derakel ne ngalap ne 153 ne timman. Piru minsan dakel amana ka neutel ran, ware ded nahisi ka biyale. ¹² Nataman, migkahiyan e ni Hisus sikandan, "Apas kew e wey keen kew." Ne ware minsan sabeka ne hibateen ne migpatagal eg-inse ke hentew sikandin su nekeila man e sikandan te sikandin ka Magbebabe. ¹³ Ne dutu, migparani e si Hisus wey ingkuwa rin ka paan ne imbehey rin kandan. Ne ingkuwa rin degma ka ngalap ne imbehey rin man-e kandan.

¹⁴ Ne seeye ka igkatatelu ne pegpakita ni Hisus diye te me hibateen din puun te pegkeuyag din.

Si Hisus wey si Pidru

¹⁵ Te nakapenge e sikandan ka miglem-ag, miginsaan e ni Hisus si Simun Pidru, "Simun ne anak ni Huwan, miggeyinawaan e red nikeykew subla pad te duma kayi?"

Ne migtabak si Pidru, "Uya Magbebabe, nakanengneng ka te miggeyinawaan ku sikeykew."

Ne migkahiyan sikandin ni Hisus, "Tangguwa nu ka me nati ne karniru ku." ¹⁶ Nataman, miginsaan e man-e sikandin ni Hisus, "Simun ne anak ni Huwan, miggeyinawaan e red nikeykew?"

Ne migtabak si Pidru, "Uya Magbebabe, nakanengneng ka te miggeyinawaan ku sikeykew."

Ne migkahiyan sikandin ni Hisus, "Tangguwa nu ka me karniru ku." ¹⁷ Ne miginsaan e man-e sikandin ni Hisus te igkatatelu e, "Simun ne anak ni Huwan, miggeyinawaan e red nikeykew?"

Ne dutu, neenenduenan e si Pidru su katatelu e sikandin insei ni Hisus ke miggeyinawaan din naa iya. Ne migtabak si Pidru, "Magbebabe, nakanengneng ka te langun. Nakanengneng ka te miggeyinawaan ku sikeykew."

Ne migkahiyan sikandin ni Hisus, "Tangguwa nu ka me karniru ku." ¹⁸ Egnanganan ku sikeykew te malehet: te bate ke pad, sikeykew re ka eg-uney-uney egkukumbale wey egpekeendiye ka te minsan hendei ne igkeupii nu te eggendiye. Piru ke egkabuyag kad e, egkayawen nu naan de ka me belad nu wey lein e ka egsaluub keykew wey eg-uyanan ka diye te inged ne kene nu

igkeupii te eggendiye." ¹⁹ (Te peglagalag ni Hisus kayi, impa-nengneng din ke nekey ne paahi ka pegpatey ni Pidru eyew egpakareyrey sikandin te Manama.) Nataman, migkahiyan sikandin ni Hisus, "Ikul ka keddi."

²⁰ Te peglilingey ni Pidru, nakita rin ne migsinundul kandan ka hibateen ne miggeyinawaan ni Hisus. Sikandin seeye se amana ne marani ki Hisus te peglabung dan wey ka mig-inse te Magbebabe ke hentew-a ka eg-akal kandin. ²¹ Te pegkakita ni Pidru kandin, mig-inse e sikandin diye te ki Hisus, "Magbebabe, nekey ma degma ka egkeyingumaan te seini ne etew?"

²² Ne migtabak si Hisus, "Emun ke igkeupii ku ne kene sikandin egpatey taman te peglibed ku, nekey ma ka labet nu? Ikul ke re keddi!"

²³ Purisu nekeempet ka guhuren diye te migmalintutuu ki Hisus ne kene egpatey ka seeye ne hibateen. Piru ware migkahi si Hisus ne ka seeye ne hibateen, kene egpatey, ke kene, migkahi re sikandin, "Emun ke igkeupii ku ne kene egpatey sikandin taman te peglibed ku, nekey ma ka labet nu?"

²⁴ Ne sikandin iya ka hibateen ne migpamalehet ne malehet ka langun, wey sikandin iya ka migsusulat kayi. Ne nakanengneng key te malehet ka ingkahi rin.

Ka katammanan

25 Masalig pad amana ka
neyimu ni Hisus ne emun ke
ig-amin igsulat, kene buwa
eg-eleg kayi te ampew te tane
ka me libru ne egkasulatan.

Me Himu Ka Me Himu te me Apustulis ni Hisu Kristu

Igpewun-a

Ka me Himu te me Apustulis ni Hisu Kristu, sumpul ded te Meupiya ne Panugtulen Sumale ki Lukas. Ka amana ne impurtanti ne tuyu te seini ne baseen, ka pegpanggihud ke immenu te an-anayan ne me etew te peg-ikul ki Hisus dengan. Ka Panisingan te Magbebkiye ka migbulig kandan te pegpanugtul te Meupiya ne Panugtulen meyitenged kandin “diye te Hirusalim, diye te intiru ne inged te Hudiya, wey diye te Samarya, wey te minsan hendei ne inged kayi te ampew te tane” (1:8). Seini ka guhuren te me himu te me Kristuwanen ne migbunsud diye te me Hudiyu ne migpabulus taman te neyimu e ne impalintutuuwan kayi te intiru ne kalibutan. Su ka pegpalintutuu ki Hisus, iyan katumanan te rilihiyun te me Hudiyu.

Ka seini ne baseen, nabaad te tatelu ne baad, ne seini egpekeiling te tatelu ne inged ne inwalian te Meupiya ne Panugtulen meyitenged ki Kristu: (1) Nabunsuran ka me himu te me Kristuwanen diye te Hirusalim te nabatun e si Hisus diye te langit; (2) Ne seini nekeempet man-e diye te Hudiya; wey (3) diye pad

man-e te Miditiranyu taman te Ruma.

Kayi degma nasulat ka sika se himu te Panisingan te Manama ne miggunguma te me Kristuwanen diye te Hirusalim te aldew te Pintikustis. Nakabulig sika wey nakabehey te kanekal te me etew wey te me pangulu te migmalintutuu dengan ne ingguhud te seini ne baseen.

Ka nasulat te seini ne baseen

Ka pegpangandam te pegpamalehet 1:1-26

- a. Ka katammanan ne suhu ni Hisus wey ka saad din 1:1-14
- b. Ka pegliwan ki Hudas 1:15-26

Ka pegpamalehet diye te Hirusalim 2:1-8:3

Ka pegpamalehet diye te Hudiya wey diye te Samarya 8:4-12:25

Ka neyimu ni Pablu 13:1-28:31

- a. Ka an-anayan ne peggipanew ni Pablu 13:1-14:28

b. Ka kalibulungan diye te Hirusalim 15:1-35

- c. Ka igkarangeb ne peggipanew ni Pablu 15:36-18:22

d. Ka igkatelu ne peggipanew ni Pablu 18:23-21:16

- e. Naprisu si Pablu diye te Hirusalim, diye te Sisarya, wey diye te Ruma 21:17-28:31

¹ Miggeyinawaan ku ne Tiyupilu, ka an-anayan ne baseen ne insulat ku, nahuhud kud e ka langun

ne innimu ni Hisus wey ka impanulu din puun te pegbunsud te himu rin² taman te aldew ne imbatun e sikandin diye te langit. Te ware pad sikandin batuna, impanpanayan din panulua pinaahi te Panisingan te Manama seeye se in-alam din ne eggimuwen ne me apustulis.³ Ne puun te pegpatey rin, kamasalig pad sikandin migpakita kandan seled te hep-at ne pulu (40) ne aldew eyew te pegpamalehet ne neuyag e man-e sikandin. Nakita ran pad sikandin wey migpakiglag pad kandan meyitenged te Peghari te Manama.⁴ Taheed te duma ran pad si Hisus, impanag-tahaan din pad sikandan te miggenendue, "Kene kew pa awe kayi te Hirusalim su tahari niyu pa ka igdasag ne insaad te Amey ku sumale te ingkahi ku kaniyu.⁵ Su si Huwan, migpamewutismu te weyig, piru pila naan de ne aldew puun kuntee ne egbewutismuwan kew e te Panisingan te Manama."

Ka pegbatun ki Hisus diye te langit

⁶ Purisu, te nalibulung e sikandan, mig-insaan dan e si Hisus, "Magbebeye, egtuhut ke naa kuntee ne sikanami se me Hudiyu ka egmandu man-e kayi te nasud te Israil?"

⁷ Ne migtabak si Hisus kandan, "Ware kew tuhuti

ne egpakataha meyitenged te me timpu wey me aldew ne tapey e itahahe te Amey ku, su kandin de sika ne katenged.⁸ Piru egpakarawat kew te geem ke eglene due te kaniyu ka Panisingan te Manama. Ne sikaniyu ka talagpamalehet ku diye te Hirusalim, te intiru ne inged te Hudiya wey te Samarya, wey te minsan hendei kayi te ampew te tane."⁹ Te nekeimpus e sikandin ka miglag, imbatun e sikandin diye te langit taheed te namipitew sikandan kandin. Nataman, ware dan e nakita sikandin su nabunbunan e te gapun.

¹⁰ Te sasangan pad sikandan ne egtetengteng diye te langit te pegbatun ki Hisus, sahuhune ne due daruwa ne etew ne migsasindeg diye te lenged dan ne maangkag se me kumbale.¹¹ Ne migkahi sikandan, "Matig-Galiliya, mania te egsesasindeg kew pad kayi ne egleng-ag diye te langit? Si Hisus se imbatun diye te langit, egliped ded kayi te iling ded due ne paahi te pegbatun kandin."

Ka pegliwan ki Hudas

¹² Nataman, nanlibed e ka me apustulis diye te Hirusalim puun diye te Bubungan te Ulibu, me sabeka ne kilumitru ka kariyuan puun te siyudad te Hirusalim.¹³ Peglibed dan e diye te Hirusalim,

1:4 Luk 24:49. **1:5** Mat 3:11; Mar 1:8; Luk 3:16; Huw 1:33. **1:8** Mat 28:19; Mar 16:15; Luk 24:47-48. **1:9** Mar 16:19; Luk 24:50-51. **1:13** Mat 10:2-4; Mar 3:16-19; Luk 6:14-16.

aneled e sikandan diye te sinabeng ne hirehaanan dan ne diye te dibabew. Sikandan ensi Pidru, si Huwan, si Santiyagu, si Andris, si Pilipi, si Tumas, si Bartulumi, si Matiyu, si Santiyagu ne anak ni Alpiyu, si Simun ne ribildi, wey si Hudas ne anak ni Santiyagu.¹⁴ Layun sikandan miglibulung ka egsabeka eg-ampu duma te me malitan, wey ki Mariya ne iney ni Hisus wey te me suled ni Hisus ne me lukes.

¹⁵ Te seeye ne timpu, migsasindeg si Pidru diye te taliware dan, me sabeka ne gatus wey daruwa ne pulu (120) sikandan langun, wey migkahi sikandin,
¹⁶ "Me suled, keilangan ne egkatuman ka diye te Kasulatan ne ingkahi te Panisingan pinaahi ki Dabid. Meyitenged seini ki Hudas, ka migpanulu te me etew ne migdakep ki Hisus.¹⁷ Sabeka sikandin ne sakup te punduk ta dengan su in-alam ma eyew egbulig te himu ta."

¹⁸ (Ka seleppi ne imbayad te mareet ne himu rin, imbeli e te kamet ne neuluhan din ne nekewun-a se ulu, ne migbetu ka getek din, wey nabukayat e ka bituka rin.¹⁹ Ka langun ne matig-Hirusalim nakanengneng kayi, purisu ingngaranan dan te Akildama te kandan ne linalahan ka seeye ne kamet ne ke sikanta pa, "Ka Tane ne Imbayaran te

Langesa.")

²⁰ "Su nasulat diye te baseen ne Salmu ne miggenendue,

'Eg-engkeran e perem ka ug-paan din, wey warad e perem eg-ugpe dutu.'

Nasulat ded man-e ne miggenendue,

'Due perem igliwan te katungdanan din.'

²¹ "Purisu, keilangan ne eg-alam ki te me etew ne nakaruma-rume e kanta puun pad te duma te pad ka Magbebeye ne si Hisus.

²² Ka puun pad iya te pegpamewutismu ni Huwan taman te pegbatun e ki Hisus. Su keilangan ne egpakkapamalehet sikandin duma kanta meyitenged te pegkeuyag ni Hisus."

²³ Ne nakaalam sikandan te daruwa ne me lukes: si Husi ne egngaranan ded ki Barsabas (ne egngaranan ded man-e ki Gustus), wey si Matiyas.²⁴ Nataman, mig-ampu e sikandan, kahi ran, "Magbebeye, nakanengneng ka te pusung te langun ne etew. Purisu Magbebeye, ipapitew nu ke hentew kayi te daruwa ka in-alam nu²⁵ ne egkeyimu ne apustulis liwan ki Hudas, su migengkeran din ka sika ne himu wey miggendiye te inged ne eleg kandin."²⁶ Ne dutu, migpintut-pintut e sikandan, wey si Matiyas ka naalam dan ne igitimul kandan te

apustulis ne sapulu wey sabeka (11).

2

Ka pegginguma te Panisingan te Manama

¹ Peggingume e te aldew ne egngaranan te Pintikustis, miglibulung e sikandan langun diye te sabeka ne baley. ² Ne sahuhune ne due dahing ne diye egpuun te langit ne egekeiling te make-seg ne kalamag wey nekeempet e te baley ne inlibulungan dan. ³ Ne nakakita sikan-dan te hendue te me dile te hapuy ne miglatun te tagse sabeka kandan. ⁴ Ne dutu, napenu e sikandan langun te Panisingan te Manama wey nakalalag e te nakalkalasi ne me linalahan sumale te ig-palalag kandan te Panisingan.

⁵ Ne due mig-ugpe diye te Hirusalim ne me Hudiyu ne amana egtuman te Balaud, ne egpuun te langun ne nasud kayi te ampew te tane. ⁶ Pegkarineg dan te kahulub, nalibulung e ka masalig ne etew. Ne neinu-inu sikandan langun su ka tagse sabeka kandan nakarineg te due egpakalalag te kandin ne linalahan. ⁷ Neinu-inu sikandan ne migkahi, "Matig-Galiliya ma mule seini se egmangasak! ⁸ Mani buwa te egpakalalag sikandan te linalahan te tagse sabeka kanta? ⁹ Su ka kayi te kanta, due matig-Partiya, matig-Midiya, matig-Ilam,

matig-Misuputamya, matig-Hudiya, matig-Kapadusya, matig-Puntu, matig-Asya, ¹⁰ matig-Prigya, matig-Pampilya, matig-Ihiptu, wey ka diye lenged te Libya ne marani te Sirini. Ka duma kanta matig-Ruma, ¹¹ me Hudiyu, wey ka kene ne me Hudiyu ne neuyan te pegpalintutuu te me Hudiyu. Ne duen pad man-e matig-Krita wey matig-Arabya, ne sikanta langun, egpakanineg kandan te eglalag te kanta ne me linalahan meytenged te kein-inuwan ne himu te Manama." ¹² Neinu-inu ka langun wey nabenga-benga, ne migmein-inseey e sikandan ne miggenendue, "Nekey buwa seini?" ¹³ Ne due duma ne egbaley-baley ne eggendue, "Etuwey, nenewubug e sikandan!"

Ka pegwali ni Pidru

¹⁴ Ne dutu, migsasindeg e si Pidru duma te sapulu wey sabeka (11) ne me apustulis wey migkahi te meemen, "Karumaan ku ne me Hudiyu, wey sikaniyu langun se mig-ugpe kayi te Hirusalim, igpasabut ku seini kaniyu ne pammineg kew naa ayad-ayad te iglalag ku. ¹⁵ Ka seini ne me etew, ware newubug sumale te insuman-suman niyu. Kene egkengewubug ka me etew te alas nuwibi pad te maselem. ¹⁶ Senid en iya ka ingkahi ni prupita Huwil,

17 Migkahi ka Manama, 'Seini ka eggimuwen ku te katammanan ne timpu: igbehey ku te langun ne etew ka Panisingan ku. Ne ka anak niyu ne me lukes wey me malitan, egpangguhud e te igpanengneng te Manama kandan, ne ka me kanakan niyu, egmakkite e te iga-kita te Manama, ne ka me buyag e ne me lukes, egmakkata-heinep.¹⁸ Uya, minsan ka me uripen ku ne me lukes wey me malitan, egbehayan ku te ked-diey ne Panisingan te seeye ne timpu, wey egpangguhud e sikan-dan te igpanengneng te Manama.¹⁹ Eggimu a te me kein-inuwan sika te aw-awangan wey kayi te tane: ne due me langesa, me hapuy, wey amana ne dakel ne ebel,²⁰ egpaddusilem ka aldew, ne ka bulan egmalalab iling te langesa te kene pad eggingga ka amana ne mateles ne aldew te peglibed te Magbeb-e. ²¹ Ne seeye se egpangananey te Magbeb-e, egkaluwas.'

²² "Matig-Israel, pammineg kew! Si Hisus ne matig-Nasarit, ka etew ne impa-

malehetan te Manama kayi te kanta pinaahi te me kein-inuwan wey me palinneu ne innimu rin pinaahi kandin, sumale te natahaan niyud e.²³ Sikaniyu mismu ka nakataha su kayi ma ney-itabu te kaniyu. Ne sumale te pegbuut te Manama wey te daan ne planu rin ne nata-haan din ne egkatuman, im-behey rin si Hisus kayi te kaniyu, wey impeyimatayan niyu sikandin te me makas-esale te pegpalansang kandin diye te krus.²⁴ Piru in-uyag sikandin te Manama wey in-luwas puun te geem te ka-matayen, su kene egkaayun ne egkaprisu sikandin te ka-matayen.²⁵ Su migkahi si Dabid meyitenged kandin, 'Layun ku egkakita kayi te tangkaan ku ka Magbeb-e, su kayi sikandin te igkakawan-an ku. Purisu ware eg-pakawelwel te peg-palintutuu ku.²⁶ Ne puun due, egkahale ka pusung ku wey due kahale te peglaglag ku. Ne minsan egkapatey a piru due egkapal-lateng ku²⁷ su kene nu ma eg-engkeran ka gimukud ku diye te inged te me gimukud ne egngaranan te Hadis, kene nu igtuhut ne egkamewu ka lawa te maruma-ruma ne suluhuanen nu.

2:23 Mat 27:35; Mar 15:24; Luk 23:33; Huw 19:18. **2:24** Mat 28:5-6; Mar 16:6; Luk 24:5. **2:25** Sal 16:8-11 (LXX).

²⁸ Impapitew nu keddi ka bayaanan peendiye te umul, ne amana a nahale-gale tenged te pegduma nu keddiey!

²⁹ "Me suled, iglag ku kaniyu ig-ayad-ayad ka meyitenged ki Dabid ne kaa-puan ta. Migpatey sikandin wey inlebeng, ne ka inleben-gan kandin, kayi pad minsan kuntee. ³⁰ Ne puun su prupita sikandin, nakataha sikandin ne migsaad ka Manama kandin ne due sabeka ne kabuhalan din ne eggimuwen ne Hari. ³¹ Tapey e nakanengneng si Dabid ke nekey ka eggimuwen te Manama, purisu miglalag e sikandin meyitenged te peguyag ki Kristu,"

'Ware din engkeri diye te inged te me gimukud ne egngaranan te Hadis, ne ka lawa rin ware namewu.'

³² Ne in-uyag te Manama ka sika ne Hisus, ne sikanami langun ka egpamalehet kayi.

³³ Imbatun sikandin diye te kakawanant[†] ne belad te Manama wey nakarawat sikandin te Panisingan ne insaad kandin te Amey. Ne ka seini ne Panisingan ka impalene kayi te kanami ne nakita niyud en iya kuntee wey narineg niyud e ka geem din. ³⁴ Su si Dabid, ware mismu nekeendiye te langit, piru migkahi sikandin,

'Ka Manama migkahi

^{2:30} Sal 132:11; 2Sam 7:12-13.

Manluluwas.

^{† 2:33} Sumale te tuluuwen te me Hudiyu, ka talahuren de ne

etew ka egpakapinnuu diye te igkakawanan te mabantug ne etew.

^{2:34} Sal 110:1.

diye te Magbebaye ku: Pinnuu ka kayi te igkakawanan ku, ³⁵ taman te eggimuwen ku ne diekanan nu ka me kuntere nu.'

³⁶ "Purisu ka langun ne etew kayi te Israil keilangan ne egpakanengneng amana te ka seini ne Hisus ne in-lansang niyu te krus, innimu te Manama ne Magbebaye wey Kristu!"

³⁷ Te pegkarineg dutu te me etew, amana nekegsendit sikandan wey migkahi diye te ki Pidru wey diye te duma ne me apustulis, "Me suled, nekey ma ka eggimuwen ney?"

³⁸ Ne migtabak si Pidru, "Inniyuhi niyu ka me sale niyu wey pabewutismu kew ka tagse sabeka te ngaran ni Hisu Kristu eyew egkapasaylu ka me sale niyu, wey egkarawat niyu ka dasag te Manama ne sika se Panisingan din. ³⁹ Su ka saad te Manama, para iya kaniyu wey te me anak niyu, wey te langun ne diyad te maddiyu—ka langun ne eg-umawen te Magbebaye ne Manama ta."

⁴⁰ Masalig pad ka inlalag ni Pidru te pegpamalehet wey pegbanasal kandan, "Luwasa niyu ka pegkeetew niyu te peglegpad ne ig-peuma te seini se maddeet ne me etew!" ⁴¹ Ne seeye se migdawat te inlalag ni Pidru,

* ^{2:31} Ka igpasabut te Kristu, Insaad ne

Manluluwas.

^{† 2:33} Sumale te tuluuwen te me Hudiyu, ka talahuren de ne

etew ka egpakapinnuu diye te igkakawanan te mabantug ne etew.

^{2:34} Sal 110:1.

migpabewutismu e. Me 3,000 ka nakatimul kandan ne migpalintutuu.⁴² Ne migpabulus sikandan ka egpammineg te pegpanulu te me apustulis, ka egsabeka langun, wey ka egkeen wey eg-ampu.

Ka peg-ugpe te me migpalintutuu

⁴³ Masalig ka me kein-inuwan wey me palinneu ne neyimu te me apustulis, purisu masalig ka me etew ne naaldek duma te pegtahud. ⁴⁴ Ne ka langun ne migmalintutuu, migpabulus ka eglibulung wey insaamulan dan ka langun ne kasangkapan dan. ⁴⁵ Ne impameligye dan ka me karatuan dan wey ka duma pad ne me kasangkapan dan, wey in-atul ran ipamehey ka halin diye te tagse sabeka sumale te keilangan din. ⁴⁶ Migpabulus sikandan tagse aldew ka eglibulung diye te timplu, wey egsabeka sikandan ka egkeen diye te me baley ran duma te pegkahale wey te mapariralemen ne pusung. ⁴⁷ Migpabulus sikandan ka migdayan te Manama, wey ingkeupii sikandan te langun ne etew. Ne tagse aldew, intimulan sikandan te Magbebaye te seeye se egkengaluwas.

3

Ka pegbawi te pungku

¹ Due sabeka ne aldew ne miggendiye si Pidru ki Huwan te timplu te me alas

tris en iya te maapun su sika ka uras te peg-ampu. ² Diye te gumawan ne egngaranan te "Mateles ne Gumawan," due sabeka ne etew ne napungku puun te peglesut din. Ne tagse aldew, igdurulung sikandin diye te gumawan te timplu eyew egpakilimus te me etew ne egseled. ³ Te pegkakita rin engki Pidru wey ki Huwan te egseled te timplu, migbuyu e sikandin te limus. ⁴ Intetengtengan sikandin enni Pidru ki Huwan, ne migkahi e si Pidru, "Tengtengi key!" ⁵ Ne migtengteng ka pungku diye te kandan ne migtetahad ke egbehayan te limus. ⁶ Piru migkahi si Pidru, "Ware iya mule seleppi ku, piru egbehayan ku sikeykew te kayi te keddi: te ngaran ni Hisu Kristu ne matig-Nasarit, hipanew ka!" ⁷ Ne dutu, inggen-genan din ka kawanan ne belad te pungku wey imbulihan te egpasasindeg. Ne due-rue ne migmanekal ka me paa wey lelenguan te pungku. ⁸ Ne migletu sikandin te pegasasindeg din wey miggipanew e. Nataman, migdume e sikandin engki Pidru te migseled diye te timpu ne miggiphipanew wey migletuletu ka migdayan te Manama. ⁹ Nakakita ka langun ne etew kandin te miggiphipanew ne migdayan te Manama. ¹⁰ Te neilaan dan e ne sikandin bes ka egpampamuyu ne eg-pinpinnuu diye te gumawan

te timplu ne egngararanan te "Mateles ne Gumawan," amana neinu-inu sikandin te neyitabu diye te kandin.

Ka pegwali ni Pidru diye te timplu

¹¹ Te ware pad migleke engki Pidru ki Huwan ka neulian ne pungku, neinu-inu ka langun ne etew wey namallahuy peendiye te kandan diye te likansu ne egngararanan te Likansu ni Sulumun. ¹² Te pegkakita ni Pidru te me etew, ingkahiyian din e sikandan, "Matig-Israil, mania te neneinu-inu kew kayi wey amana key nikaniyu tengtengi? Kahiyan niyu buwa ne puun te geem ney ne nakapeyipanew key te seini ne etew, wey ke puun naa te amana key egtuman te Balaud? ¹³ Ka Manama ni Abraham, ni Isaak, ni Hakub, wey te me kabuybuyahan ta, ka migbehey te kabantug te suluhuanen din ne si Hisus. Sika ne Hisus ka imbehey niyu diye te me pangulu wey ka indeeg-deeg niyu diye te tangkaan ni Pilatu, minsan epalekaan din ded perem. ¹⁴ Matulus wey matareng sikandin piru ware niyu dawata. Nasi niyu re iya hangyua si Pilatu ne iyan eglekaan ka nekeyimatey te etew. ¹⁵ Miggimatayan niyu ka kamuney te umul, piru in-uyag sikandin te Manama, wey sikanami iya ka egpakamemalehet kayi.

3:13 Iks 3:15. **3:14** Mat 27:15-23; Mar 15:6-14; Luk 23:13-23; Huw 19:12-15.

* **3:18** Ka igpasabut te Kristu, Insaad ne Manluluwas. **3:22** Diy 18:15,18 (LXX).
3:23 Diy 18:19.

¹⁶ Ka ngaran ni Hisus wey ka pegpalintutuu kandin ka nakabehey te kanekal te seini se etew ne nakita niyu wey neila. Ka pegpalintutuu ki Hisus ka nekeuli kandin sumale te nakita niyu.

¹⁷ "Ne kuntee me suled, nakataha a ne sikaniyu wey ka me pangulu niyu ka miggimu kayi diye ki Hisus, ware kew nakataha ke hentew sikandin. ¹⁸ Piru tapey e ipanengneng te Manama ka peg-antus te Kristu* pinaahi te me prupita. Ne intuman iya te Manama seini te iling kayi ne paahi. ¹⁹ Purisu inniyuhi niyu ka me sale niyu wey libed kew e diye te Manama eyew egpasayluwen ka me sale niyu ²⁰ wey eyew eggingga due te kaniyu ka kanekal te pegpalintutuu ne egpuun te Manama. Ne egkataman, igpeuyan din e si Hisus, ka Kristu ne in-alam din para kaniyu. ²¹ Piru keilangan ne diye pad iya sikandin te langit taman te egbalbalawan e te Manama ka langun, sumale te insaad din dengan pinaahi te matulus ne me prupita rin. ²² Su migkahi si Muwisis, 'Egpeuyan ka Magbebaye ne Manama niyu te prupita ne kabuhalan niyu red iling te pegpeuyan din keddiey. Keilangan ne egtumanen niyu ka langun ne iglalag din. ²³ Ka kene egtuman te iglalag te seeye

ne prupita, egpaaween ligkat te keet-etawan te Manama wey egpangimamatayan.’²⁴ Iling ded due ka inlalag te me prupita puun pad ki Samwil wey minsan seeye se nakasinundul e kandin. Migpangguhud sikandan langun meyitenged te seini ne timpu.²⁵ Ka me saad te Manama ne impangguhud te me prupita, para iya kaniyu. Ne sikaniyu, nakalagkes te kasabutan ne innimu te Manama ne imbehey te me kabuybuyahan niyu, su due inlalag din diye te ki Abraham, ‘Pinaahi te kabuhalan nu, egpanalanganin ku ka langun ne etew kayi te ampew te tane.’²⁶ Purisu, inalam te Manama ka suluhuanen din wey sikaniyu ka ananayan ne impeuyanan eyew te pegbulig kaniyu pinaahi te pegpeinniyug kaniyu te mareet ne hinimuwan niyu.”

4

Ka pegtangke enni Pidru ki Huwan te me talaggukum

¹ Te sasangan pad ensi Pidru ki Huwan ne eglalag diye te me etew, due migdugpu kandan ne me talagpanubad wey ka pangulu te talagtameng te timplu, wey me Sadusiyu.² Ingkabelu dan ka daruwa ne apustulis tenged su migpanulu sikandan te me etew wey migpamalehet ne neuyag ded si Hisus.*³ Ne puun dutu, indakep dan e

sikandan wey imprisu ran te sabeka ne karusileman, su marusilem man-e seeye.⁴ Piru masalig ka migpalintutuu te pegkarineg dan te wali, wey miggunguma te me lalimma ne libu (5,000) ka kasuluhan te me lukes ne migpalintutuu.

⁵ Pegkapawe, miglibulung diye te Hirusalim ka me pangulu wey ka me igbuyag te me Hudiyu, wey ka me talagpanulu te Balaud te Manama,⁶ duma te Labew ne Talagpanubad ne si Anas, wey si Kaypas, si Huwan, si Alihandru, wey ka karumaan te Labew ne Talagpanubad.⁷ Te nakaatubang e kandan ka me apustulis, mig-insaan dan e, “Nekey-a ne geem wey ngaran ka inggamit niyu?”

⁸ Ne si Pidru se napenu te Panisingan te Manama, migtabak kandan, “Me pangulu te keet-etawan wey me igbuyag.⁹ Ke eg-insaan key kuntee meyitenged te meupiya ne himu ne neyimu diye te pungku, wey ke nekey ne paahi ne neulian sikandin,¹⁰ eleg iya ne egkanengnengan niyu langun wey te langun ne keet-etawan te Israil, ne ka seini ne etew se migsasindeg kayi te tangkaan niyu, neulian pinaahi te geem te ngaran ni Hisu Kristu ne matig-Nasarit—seeye se inlansang niyu te krus ne in-uyag mane te Manama.¹¹ Si Hisus ka nakahi diye te Kasulatan,

^{3:25} Hin 22:18. * ^{4:2} Ka me Sadusiyu, kene egpalintutuu ne egkeuyag ka etew ne impatey e. ^{4:11} Sal 118:22.

'Ka batu ne insamsamilian niyud e te talagbeballey, neyimu ne subla ne keilanganen ne batu.'

¹² Ka kaluwasan, diye de egkakita te kandin, su warad e duma ne ngaran kayi te ampew te tane ne imbehey te Manama te keet-etawan ne epakaluwas kanta, ke kene, si Hisus de."

¹³ Te pegkakita ran te kabulut enni Pidru ki Huwan, neinu-inu sikandan tenged su nanengnengan dan ne ware sikandan nenekeiskuyla wey egkaleig-leig de. Nanengnengan dan man-e ne migdumaruma pad sikandan dengan ki Hisus. ¹⁴ Piru warad e igkalalag dan su nakita ran ma ka etew ne neulian e ne migsasindeg duma engki Pidru ki Huwan. ¹⁵ Ne dutu egpuun, impaliyawang dan e ensi Pidru ki Huwan diye te libulunganan te Me Talag-gukum te me Hudiyu wey migmein-inseey, ¹⁶ "Nekey naan e ka eggimuwen ta te seini ne me etew? Su ka langun ne mig-ugpe kayi te Hirusalim, nakanengneng meyitenged te seini se masumpit ne kein-inuwan wey kene ki epakaapul kayi. ¹⁷ Ne eyew kene amana egpekeempet ka seini se kein-inuwan diye te keet-etawan, egkenaan tad sikandan ne eglalag meyitenged te ngaran ni Hisus diye te minsan hentew." ¹⁸ Purisu impeumew ran e man-e ka daruwa ne

apustulis wey ingkenaan en iya ne egpepanugtulen wey egpepanuluun te ngaran ni Hisus.

¹⁹ Piru migtabak ensi Pidru ki Huwan, "Na, hukumi niyu ke hendei ka malehet diye te tangkaan te Manama: ka peg-ikul naa te suhu niyu wey ke suhu naa te Manama? ²⁰ Su kene key eg-pakasanggel ka egpanugtul te nakita ney wey narineg ney." ²¹ Pegkapenga dutu, amana pad sikandan panpanayi te me pangulu, naman, inlekaan e sikandan su ware ma nakita ran ne malehet ne katarengan ne eleg sikandan ne eglegparan, su seeye se me etew, migdayan ma te Manama puun te seeye ne neula-ula. ²² Seeye se etew ne neulian, suble e te keepatan se idad.

Ka peg-ampu te migmalintutuu

²³ Te nalekaan e ensi Pidru ki Huwan, miggendiyaan dan e ka me alukuy ran wey impangguhuran dan e meyitenged te ingkahi kandan te pangulu te talagpanubad wey me ighbuyag te me Hudiyu. ²⁴ Te pegkarineg dan dutu, mig-ampu e sikandan langun diye te Manama. Migkahi sikandan, "Magbebaye ne Manama ne talagmandu, sikeykew ka miggimu te langit, te tane, te dahat, wey te langun ne nakatahu kayi te inged! ²⁵ Ne pinaahi te Panisingan nu, impalalag nu ka kaapuan ney

ne si Dabid, ka suluhuanen nu. Migkahi sikandin,

'Mania te egkabelu ka kene ne me Hudiyu? Ne mania te migplanu ka me keet-etawan te ware karuan? ²⁶ Migandam ka me Hari kayi te ampew te tane, wey miglibulung ka me pangulu su egpakigkuntere te Magbebeye ne Manna ma wey te in-alam din ne iyan ka Kristu.'†

²⁷ Kunaleg te si Hirudis, si Punsiyu Pilatu, nasabeke e kayi te seini ne siyudad duma te kene ne me Hudiyu wey te keet-etawan te Israil ne egpakigkuntere ki Hisus, ka matulus ne suluhuanen nu ne innimu nu ne Kristu. ²⁸ Ne nasi dan e himuwa ka tapey nud e planuwa ne egkeyitabu sumale te pegbuut nu. ²⁹ Ne kuntee Magbebeye, tengtengi nu seini se pglelalis dan. Behayi key se me uripen nu te kabulut te pegpangguhud te keykew ne lalag. ³⁰ Ipapitew nu ka geem nu te pegbawi, wey ituhut nu ne egkeyimu perem ka me kein-inuwan wey me palinneu pinaahi te matulus ne ngaran te suluhuanen nu ne si Hisus."

³¹ Te nakapenge e sikan dan ka mig-ampu, nawelwel ka inlibulungan dan. Ne sikandan langun, napenu te Panisingan te Manama wey migwali te lalag te Manama

te ware pegkaaldek.

Insaamulan te migmalintutuu ka me kasangkapan dan

³² Nasabeka ka me sumansuman wey me pusung te me migmalintutuu. Ne ware sabeka ne egkahi te sikandin de ka kamuney te sika ne kasangkapan, ke kene, egsaamulan dan ka langun ne diye te kandan.

³³ Ne dakel ka geem te me apustulis te pegpamalehet te peg-uyag te Magbebeye ne si Hisus, wey amana sikandan langun bulihi te Manama.

³⁴ Ne ware sabeka kandan ne nakulangan. Seeye se due me kamet wey me baley, impamelegye dan e ³⁵ ne ka halin, imbehey ran diye te me apustulis, ne ka me apustulis e ka egtalad-talad te tagse sabeka kandan sumale te keilangan dan.

³⁶ Ne iling naa due ka innimu ni Husi, sabeka sikandin ne Libita ne matig-Sipri ne ingngararan te me apustulis ki Birnabi (ke sikanta pa, "Ka Talagbagget"), ³⁷ migbelegye sikandin te kamet din wey ka halin, imbehey rin diye te me apustulis.

5

Si Ananiyas wey si Sapira

¹ Ne due alunggun ne migbelegye te me karatuan dan, si Ananiyas ka lukes, ne si Sapira ka malitan. ² Piru in-angayan ni Ananiyas

† **4:26** Ka igpasabut te Kristu, Insaad ne Manluluwas. **4:27** Luk 23:7-11; Mat 27:1-2; Mar 15:1; Luk 23:1; Huw 18:28-29. **4:32** Him 2:44-45.

ka halin, ne ka asawa rin nakanengneng dutu, ne iyan naan de imbehey diye te me apustulis ka nasame.³ Ne migkahiyan sikandin ni Pidru, "Ananiyas, mania te migpaakal ka ki Meibulan wey mig-uubat ka te Panisingan te Manama te peg-angey nu te baad te seleppi ne halin te tane nu?"⁴ Te ware nu pad ibelegye seeye, keykew pad iya, wey te nakabelegye e, keykew red man-e ka halin. Na, mania te migsumansuman ka ne eggimu te iling kayi? Su kene ne me etew ka in-ubatan nu, ke kene, ka Manama!"⁵⁻⁶ Te pegkarineg ni Ananiyas dutu, napeled e sikandin wey namatey. Ne migdugpu ka me kanakan, bukuši ran ka lawa ni Ananiyas wey indulung dan e diye te lihawangan wey inlebeng. Naaldek ka langun ne nakarineg te seeye ne neyitabu.

⁷ Peglihad te tatelu ne uras, migseled e degma ka asawa ni Ananiyas, piru ware sikandin nakataha ke nekey ka neyitabu.⁸ Ne migkahiyan sikandin ni Pidru, "Nangeni a ke seini re iya ka halin te tane ne imbelegye niyu?"

Ne migtabak ka malitan, "Uya, sikan de iya."

⁹ Piru migkahiyan sikandin ni Pidru, "Mania te nekegsabut kew ka alunggun ne eg-eleg-eleg eg-uubat te Panisingan te Manama? Kuntee, duen e te gumawan ka me kanakan ne mglebeng

te asawa nu. Ne sikandan ded degma ka eglebeng keykew!"¹⁰ Ne due-rue ne napeled si Sapira diye te tangkaan ni Pidru wey migpatey. Pegseled te me kanakan, nakita ran ne migpatey e ka malitan, ne in-uyan dan e diye te lihawangan wey inlebeng diye lenged te asawa rin.¹¹ Amana naaldek ka langun ne punduk te migmalintuu wey ka langun ne nakarineg te sika ne neyitabu.

Ka me kein-inuwan

¹² Masalig ka me palinneu wey me kein-inuwan ne neyimu te me apustulis diye te me etew. Ne ka langun ne migmalintuu, layun eglibulung diye te likansu ne egngaranan te Likansu ni Sulumun.¹³ Ne ware minsan sabeka ne mig-apil kandan su naaldek, piru amana tahura sikandan te me etew.¹⁴ Piru nasi migmasalig ka nakatimul kandan ne migpalintuu te Magbebaye-lukes ma wey malitan.¹⁵ Ne puun te himu te me apustulis, impanguyan e ka egmanderalu diye te deralanen. Diye imeyibat te me hibatanan wey diye te me ikam su egpaalew-alew sikandan ke egkaralungan ni Pidru ke eglihad.¹⁶ Ne due degma nanginguma ne me etew puun te lungsud ne marani te Hirusalim. Nanguyan sikandan te nanderalu wey te nanerepan te busew, wey neneulian sikandan langun.

Ka pegbayad-bayad te me apustulis

¹⁷ Piru amana neimma te me apustulis ka Labew ne Talagpanubad te timplu wey ka langun ne me duma rin ne sakup te me Sadusiyu. ¹⁸ Purisu indakep dan ka me apustulis wey imprisu. ¹⁹ Piru te seeye ne karusileman, inlukatan te panalihan te Magbebkiye ka gumawan te prisuwan, wey impaliyawang ka me apustulis wey migkahiyan, ²⁰ “Pangendiye kew te timplu wey panugtuli niyu ka me etew diye meytenged te seini se iyam ne umul.” ²¹ Ne intuman seeye te me apustulis, ne hengkayi te egkaliwaswas e, migseled e sikandan diye te timplu wey migpanulu.

Nataman, impeumew e te Labew ne Talagpanubad wey te me duma rin ka me Talaggukum te me Hudiyu eyew egkalibulung sikandan langun ka me upisyal te me Hudiyu. Ne due degma insuhu dan ne eggendiye te prisuwan eyew te egpeganey te me apustulis wey eg-uyanen diye te tangkaan dan. ²² Piru te peggendiye te me pulis te prisuwan, warad e ka me apustulis. Purisu nanlibed e ka me pulis diye te Labew ne Talagpanubad te me Hudiyu wey migkahi, ²³ “Te pegginguma ney diye te prisuwan, nakita ney ne amana ne maresen ka pglekeb, ne ka me talagta-

meng, diye ded te gumawan ka egtetameng. Piru te peglukat ney e te gumawan, warad e diye te seled ka me pinirisu!” ²⁴ Pegkarineg dutu te kepititan te talagtameng te timplu, wey te me pangulu te me talagpanubad, nalibeg e sikandan ke nekey ka neyitabu te me apustulis. ²⁵ Ne due etew ne migseled ne migkahi, “Diyad e te timplu ka impamirisu niyu, wey migpanulu e te me etew.” ²⁶ Ne puun dutu, miggendiyaan e te kepititan te talagtameng te timplu wey te me pulis ka me apustulis wey indakep dan e man-e. Ware sikandan miggamit te keseg su egkaaldek sikandan te egbatuwen te me etew.

²⁷ Ne in-uyan dan e ka me apustulis diye te tangkaan te me Talaggukum eyew eginsaan. Kahi te Labew ne Talagpanubad, ²⁸ “Migkenaan ney e sikaniyu ne kenad egpepanuluun meytenged te sika ne ngaran, piru nasi de iya nekeempet te intiru ne Hirusalim ka pegpanulu niyu, ne sikanami pe ma ka indakeselan niyu te kamatayen din!” ²⁹ Ne migtabak ensi Pidru wey ka me duma rin ne me apustulis, “Keilangan ne ka Manama re ka egpalintutuuwan ta, kene ne me etew. ³⁰ Ka Manama te kabuybuyahan ta ka miguyag ki Hisus te innimatayan niyu pinaahi te peglansang kandin te krus. ³¹ Imbatun sikandin te Manama diye

te igkakawanan* din eyew egkeyimu ne Pangulu wey Manluluwas, wey eyew te pegbehey te timpu diye te me matig-Israel te peg-inniyug te me sale dan eyew egkapasaylu. ³² Sikanami ka talagpamalehet due wey ka Panisingan degma ne indasag te Manama te seeye se egpalintutuu kandin."

³³ Pegkarineg dan dutu, amana sikandan nabelu wey egkeupian ne egpangimatayan ka me apustulis. ³⁴ Piru migsasindeg diye te tangkaan dan ka duma ran ne egngararanan ki Gamaliil; sabeka sikandin ne talagpanulu te Balaud te Manama wey intahud te me etew. Migsuhu sikandin ne egpalihawangen pad te dagdahew re ka me apustulis. ³⁵ Nataman, migkahiyan din e ka me pangulu te Hudiyu, "Kabuhalan ni Israel, bantey kew ke nekey ka eggimuwen niyu te seini ne me etew. ³⁶ Nakasuman-suman kew pad ki Tudas? Mig-angken sikandin ne mabantug, ne due me hep-at ne gatus (400) ne me etew ka neuyan din. Piru innimatayan sikandin wey nallaag-laag e ka me hibateen din, ne nataman, warad e nakapabulus ka pegpanulu din. ³⁷ Timpu te sinsus, si Hudas e man-e ne matig-Galiliya ka miggigat te me etew ne eg-ikul kandin, piru innimatayan ded sikandin wey nenekegsuwey-suwey e

man-e ka me hibateen din. ³⁸ Ne ka seini se prublima kuntee, kene niyu re due hil-abeti sikandan wey balahara niyu re due, su emun ke himu re seini te etew wey ke planu re seini te etew, egkaawe ded te kene egkaluhay. ³⁹ Piru ke kandin sika te Manama, kene niyu iya sikandan egkatalu. Ne kema ke iyan niyu pad egkakuntere ka Manama."

Ne migpalintutuu te tambag ni Gamaliil ka me pangulu. ⁴⁰ Ne impalasud dan e man-e ka me apustulis wey impalampesan dan wey ingkenaan en iya ne egpanugtul te meyitenged te ngaran ni Hisus. Ne nataman, inlekaan e sikandan. ⁴¹ Nataman, nanlihawang e ka me apustulis puun te tangkaan te me Talaggukum, wey nahale-gale sikandan su in-isip sikandan te Manama ne likes te me pegantus te keyilawan tenged te ngaran ni Hisus. ⁴² Ne tagse aldew, migpabulus sikandan ka egpanugtul wey egpanulu te Meupiya ne Panugtulen meyitenged ki Hisus isip Kristu. Diye dan sika eggimuwa te timplu wey te me kabalbalayan.

6

Ka pitu ne talagbulig

¹ Na, te seeye ne timpu te egkatimtimulan e ka me hibateen, neepes ka me Hudiyu ne Grigu se linalahan

* **5:31** Sumale te tuluuwen te me Hudiyu, ka talahuren de ne etew ka egpakap-innuu diye te igkakawanan te mabantug ne etew.

te seeye se me Hudiyu ne mahinged dutu, tenged su ware nabehayi ka me balu ran te tagse aldew ne keilangan dan. ² Ne puun dutu, inlibulung te sapulu wey daruwa (12) ne apustulis ka langun ne me hibateen wey ingkahiyan, "Kene ne meupiya ne egkabalalahad ney ka pegwali te lalag te Manama puun te pegtanggu te me etew ne due keilangan. ³ Purisu me suled, alam kew te pitu ne etew ne meupiya se batasan wey napenu te Panisingan te Manama wey te katuenan, su sikandan ka egbehayan ney te katenged te peg-uyan due. ⁴ Ne sikanami, eggamiten ney ka timpu ney te peg-ampu wey te pegwali."

⁵ Ne sikandan langun neupian te planu te me apustulis. Ne due egpuun ne in-alam dan ensi Istiban ne napenu te Panisingan te Manama wey te pegpalintutuu, wey si Pilipi, si Purukuru, si Nikanur, si Timun, si Parminas, wey si Nikulas ne matig-Antiyukiya ne kene ne Hudiyu ne neuyan te tuluuwen te me Hudiyu. ⁶ Nataman, in-uyan e sikandan diye te me apustulis. Ne dutu, in-ampuan e sikandan te me apustulis wey intel-eban te me belad.

⁷ Purisu, nakapabulus nekeempet ka lalag te Manama. Ne ka me hibateen diye te Hirusalim, hutuk pad migmasalig. Ne masalig degma ka me talagpanubad

diye te timplu ne mig-ikul e te kamalehetan.

Ka pegdakep ki Istiban

⁸ Ne si Istiban, sabeka ne etew ne imbulihan te Manama wey imbehayan te geem. Nekeyimu sikandin te me kein-inuwan wey te me palinneu diye te tangkaan te me etew. ⁹ Due duma ne me etew ne kene egpalintutuu kandin wey egpakig-ehet. Ka duma kandan matig-Sirini wey matig-Alihandriya ne sakup te simbaan te me Hudiyu ne egngaranan te "Me Etew Ne Inlekaan Puun te Pegkeuripen." Ne ka me duma, me matig-Silisya wey Asya. ¹⁰ Ware sikandan nakaapul ki Istiban su imbehayan ma sikandin te katuenan te Panisingan te Manama. ¹¹ Purisu migpamayad e sikandan te me etew ne egpabayungen kandin ne eggendue, "Nakarineg key kandin te migbaley-baley ki Muwisis wey te Manama!" ¹² Sikan naa, nasamuk e ka me etew, me igbuyag dan, wey ka me talagpanulu te Balaud te Manama. Purisu impamitew ran e si Istiban wey inderakep dan e wey in-uyan e diye te me Talaggukum te me Hudiyu. ¹³ Nataman, impaatubang dan e ka me etew ne egpeuubaten wey egpakahiyan, "Ka seini ne etew, kene eg-engked ka egdereet te matulus ne timplu wey te Balaud ni Muwisis. ¹⁴ Narineg ney sikandin ne si Hisus kun ne

matig-Nasarit ka egguhus te timplu wey egbalbalawan din ka tulumenan ne inggaat ni Muwisis kanta!”¹⁵ Ka langun ne me Talaggukum te me Hudiyu, migmemetmet ki Istiban, ne nakita ran ne nekeiling e te ulaula te panalihan te Manama ka kandin ne ulaula.

7

Ka inlalag ni Istiban

¹ Ne mig-insaan si Istiban te Labew ne Talagpanubad diye te timplu, “Malehet seini se imbayung dan?”

² Ne migtabak si Istiban, “Mesuled ku wey me anggam ku! Pammineg kew keddiey! Ka Manama ne subla ne mabantug wey maresen, migpakita te kaapuan ta ne si Abraham te diye pad sikandin mig-ugpe te Misuputamya, te ware pad sikandin mig-ugpe diye te Haran.³ Migkahika Manama diye te kandin, ‘Engkeri nu ka inged nu wey ka me karumaan nu, wey hendiye ka te inged ne ippapitew ku keykew.’⁴ Ne puun dutu, mig-awe e si Abraham diye te Kaldiya wey diyad e mig-ugpe te Haran. Pegpatey te amey rin, impaalain e man-e sikandin te Manama te seini ne inged ne inugpaan niyu kuntee.⁵ Ware sikandin behayi te Manama te tane kayi, minsan eleg de ubag ne egkariekan

din. Piru insaaran sikandin te Manama ne igbehey kandin ka seeye ne tane wey egkakandin e wey te me kabuhalan din. Te seeye ne timpu, ware pad anak ni Abraham.⁶ Seini ka ingkahi te Manama diye te kandin, ‘Ka me kabuhalan nu, diye eg-ugpe telein ne nasud wey egkeuripen sikandan diye, wey egpaantusen sikandan selede hep-at ne gatus (400) ne leg-un.⁷ Piru eglegparan ku ka nasud ne eg-uripen kandan, ne egkataman egmangawe e sikandan te seeye ne inged wey egsimba keddiey kayi te seini ne inged.’⁸ Ne migbehey ka Manama te kasabutan diye ki Abraham pinaahi te pegtuli isip palinneu. Ne puun dutu, intulian din e ka anak din ne si Isaak te nawaluwan pad ka miglesut. Nakapabulus ka sika ne eggimuwen te peglesut ni Hakub te anak ni Isaak, wey diye te sapulu wey daruwa (12) ne me anak ni Hakub ne sika se mabantug ne me kaapuan ta.

⁹ “Ne ka mabantug ne me kaapuan ta ne me anak ni Hakub, neimma te hari ran ne si Husi, purisu imbelegye dan e eyew eg-uripenen diye te Ihiptu. Piru indumaan sikandin te Manama,¹⁰ wey inluwas puun te langun ne me keyirapan din. Te timpu ne mig-atubang si Husi te Hari te Ihiptu, inlapihan

7:2 Hin 12:1. **7:4** Hin 11:31; Hin 12:4. **7:5** Hin 12:7; 13:15; 15:18; 17:8.

7:6 Hin 15:13-14. **7:7** Iks 3:12. **7:8** Hin 17:10-14; Hin 21:2-4; Hin 25:26; Hin 29:31-35:18. **7:9** Hin 37:11; Hin 37:28; Hin 39:2,21. **7:10** Hin 41:39-41.

sikandin te Manama wey imbehayan te katuenan. Ne puun due, innimu sikandin te Hari ne pangulu te nasud wey te pamilya te Hari.¹¹ Nataman, due miggunguma ne bitil diye te intiru ne Ihiptu wey diye te Kanaan. Amana neyirapi ka me etew wey warad egkakeen te me kabuybuyahan ta.¹² Pegkarineg ni Hakub ne due egkakeen diye te Ihiptu, impeendiye din e ka me kabuybuyahan ta. Seeye ka an-anayan ne peggendiye dan.¹³ Te igkarangeb e ne peggendiye dan te Ihiptu, henduen pad ipeila ni Husi ka pegkeetew rin diye te me suled din. Ne dutu, neilaan e te Hari te Ihiptu ka pamilya ni Husi.¹⁴ Ne puun due, impeuyanan ni Husi si Hakub, ka amey rin, te lalag ne diye egpeugpaa te Ihiptu duma te me suled din. Me pitu ne pulu wey lalimma (75) sikandin langun.¹⁵ Purisu nangendiyad e ensi Hakub te Ihiptu wey diyad e migpatey sikandin wey ka me kabuybuyahan ta.¹⁶ Diye ded uyana ka me lawa ran te Sikim wey diye ilebeng te lebenganan ne imbeli ni Abraham diye te me anak ni Hamur."

¹⁷ Ne migpabulus si Istiban ka migkahi, "Ne hengkayi te mahaan e egtumana te Manama ka insaad din ki

Abraham, hutuk pad ne migmasalig ka keet-etawan ta diye te Ihiptu.¹⁸ Ne due nakasubal ne Hari diye te Ihiptu ne ware nekeila ki Husi.¹⁹ Inlimbungan din ka keet-etawan ta wey indeeg-deeg ka me kabuybuyahan ta su impehes sikandin ne egpalihawangen te baley ka me anak dan ne dereisek pad eyew egpamatey.²⁰ Te seeye ne timpu, neetew si Muwisis ka ingkatelesi te Manama. Me tatelu ne bulan sikandin ka natanggu diye te kandan ne ugpaan.²¹ Ne hengkayi te in-engkeran e sikandin diye te lihawangan, ingkuwe e sikandin te anak te Hari te Ihiptu ne malitan wey in-anak-anak e.²² Napanulu si Muwisis te langun ne katuenan te me Ihiptuhanen, wey neyimu sikandin ne mabantug pinaahi te peglalag din wey te himu rin.

²³ "Te hep-at ne pulu (40) ka idad ni Muwisis, nakasuman-suman sikandin ne egpanumbaley diye te me karumaan din ne me kabuhalan ni Israil.²⁴ Te pegkakita rin ne due sabeka kandan ne inlampesan te Ihiptuhanen, migpangabangan din e, ne migsulian din ka Ihiptuhanen wey innimatayan din e.²⁵ (Kahiyan ni Muwisis ne egpakasabut ka me karumaan din ne eggamiten sikandin te Manama te pegluwas kandan,

7:11 Hin 42:1-2. **7:13** Hin 45:1; Hin 45:16. **7:14** Hin 45:9-10,17-18; Hin 46:27 (LXX). **7:15** Hin 46:1-7; Hin 49:33. **7:16** Hin 23:3-16; 33:19; 50:7-13; Huswi 24:32. **7:17** Iks 1:7-8. **7:19** Iks 1:10-11; Iks 1:22. **7:20** Iks 2:2. **7:21** Iks 2:3-10. **7:23** Iks 2:11-15.

piru ware bes sikandan nakasabut.)²⁶ Te igkarangeb ne aldew, due nakita rin ne daruwa ne etew ne me kabuhalan ni Israil ne migpeehetey, wey mig-elehan din sikandan te eggusey. Migkahi sikandin, 'Me suled ku, mania te egpeunayey kew egpeehetey se tahasuled de?'²⁷ Piru sika se etew ne miglam-pes te duma rin, ingkeyis din si Muwisis te migkahi, 'Hentew-a ka innimu keykew ne pangulu wey talaggukum kanami?'²⁸ Eggimatayan a nikeykew iling te peggi-matey nu te Ihiptuhanen gabii?'²⁹ Pegkarineg dutu ni Muwisis, migpallahuy e sikandin peendiye te inged ne Midyan. Ne diyad sikandin mig-ugpe wey diyad e sikandin nakaasawa wey nakaanak te daruwa ne lukes.

³⁰ "Te peglihad te hep-at ne pulu (40) ne leg-un, due panalihan ne migpakita ki Muwisis diye te sapinit ne egkalegleg. Diye seeye te mammara ne inged ne kene egkeugpaan ne diye seeye te Bubungan te Sinay.³¹ Neinuinu si Muwisis te pegkakita rin dutu, purisu migdani-rani e sikandin diye te sapinit ka egtengteng ke nekey se-eye. Piru nakarineg sikandin te laheng te Magbebabe ne Manama ne miggenendue,³² 'Sikeddiey ka Manama te me kabuybuyahan nu, ka

Manama ni Abraham, ni Isaak, wey ni Hakub.' Ne dutu migkelkel e si Muwisis wey naaldek ne egpitew.³³ Ne migkahiyan sikandin te Magbebabe ne Manama, 'Luunga nu ka sandal nu su matulus ka tane ne ins-esasindehan nu.³⁴ Nakita ku iya ne amana egkabaybayari ka keet-etawan ku diye te Ihiptu wey narineg ku ka pegpangananey ran. Ne migpamaneug ad e kayi eyew te pegluwas kandan. Purisu, hendini ke naa su igpeuyan ku sikeykew diye te Ihiptu.'

³⁵ "Seini ka Muwisis ne insamsamilian te me kabuhalan ni Israil te miggenendue, 'Hentew-a ka migtuhut ne sikeykew ka egkeyimu ne pangulu wey talaggukum kanami?' Si Muwisis ka impeuyan te Manama ne egkeyimu ne pangulu wey manluluwas, wey imbulihan sikandin te panalihan ne nakita rin diye te sapinit ne nalegleg.³⁶ Sikandin ka migpangulu kandan te mig-awe diye te Ihiptu, wey due me kein-inuwan wey me palinneu ne innimu rin diye te Ihiptu wey diye te Malalab ne Dahat. Miggimu man-e sikandin te iling due seled te hep-at ne pulu (40) ne leg-un diye te mammara ne inged ne kene egkeugpaan.³⁷ Sika ne Muwisis ka migkahi diye te kabuhalan ni Israil, 'Egpeuyanan kew te Manama te prupita iling te pegpeuyan

din keddi. Ne sabeka sikandin ne kabuhalan niyu.'
 38 Si Muwisis ka migduma te me kabuhalan ni Israil ne nalibulung diye te mammara ne inged ne kene egkeug-paan. Diye sikandin duma te kabuybuyahan ta wey te panalihan ne migpakiglalag kandin diye te Bubungan te Sinay, seeye se nakarawat sikandin te lalag te Manama ne igpabehey kanta."

39 "Piru nekewukum ka me kabuybuyahan ta ne kene egtuman kandin, purisu imbalahad dan sikandin wey egkeupian e perem sikandan ne eglibed diye te Ihiptu. 40 Seeye naa, migkahiyan dan si Aarun, 'Himuwi key nikeykew te me diyus-diyus ne iyan egguna-a kanta su ware ki nakataha ke nekey-e ka neyitabu diye te ki Muwisis ne in-uyen kanta ligkat te Ihiptu.' 41 Ne puun dutu, miggimu e sikandan te diyus-diyus ne egpekeiling te nati te baka. Ne impanubaran nikandan seeye wey migsahakeen sikandan te pegpeila ne nahale sikandan te innimu ran. 42 Piru in-engkeran sikandan te Manama wey imbalahad sikandan ne eggimba te me bituen diye te langit, sumale te insulat te baseen te me prupita,

'Me kabuhalan ni Israil, sikeddi ka impanubaran niyu wey ka inhalaran niyu

seled te hep-at ne pulu (40) ne leg-un diye te mammara ne inged ne kene egkeugpaan?
 43 Kene! In-uyen niyu ka balungbalung te diyus-diyus ne si Muluk, wey ka inetewetew ne bituen te diyus-diyus niyu ne si Ripan. Innimu niyu sika se me diyus-diyus eyew egsimbeen. Purisu egpaaween ku sikaniyu peendiye te mariyu ne inged ne eglihad pad te Babilunya.'

44 "Diye te mammara ne inged ne kene egkeug-paan, due balungbalung te me kabuybuyahan ta ne palinneu te due diye te kandan ka Manama. Innimu ni Muwisis seini se balungbalung sumale te impakita kandin te Manama ne egpeilingan. 45 Nataman, te si Huswi e ka migpangulu te me kabuybuyahan ta te peg-ahew ran te me nasud ne impaawe te Manama, ka me kabuybuyahan tad e degma ka mig-uyen te sika ne balungbalung. Ne duen pad ka balungbalung taman te miggingleme e si Dabid. 46 Ne ingkeupii te Manama si Dabid, wey mighangyu sikandin te Manama ne egpes-ek te ugpaan para te Manama ni Hakub. 47 Piru si Sulumun ka nakapapes-ek te ugpaan para te Manama.

48 "Piru ka Amana ne Mabantug ne Manama, kene egugpe te ugpaan ne impes-ek te etew, su sumale te ingkahi te me prupita,

49 'Migkahi ka Magbebaya ne Manama, Ka langit ka pinnuuwanan ku, wey tane ka diekanan ku.

Nekey ne klasi te ugpaan ne eggimuwen niyu para keddiey?

Wey ke hendei naa ka himelayanan ku?

50 Sikeddiey ka miggimu kayi langun!"

51 "Amana ne makehal ka me ulu niyu wey ka me pusung niyu, wey kene kew epgammineg te lalag te Manama! Ne nekeiling kew te me kabuybuyahan niyu! Ne layun kew eg-apul te Panisangan te Manama! 52 Ware prupita ne ware baybayari te me kabuybuyahan niyu. Innimatayan dan seeye se migpaney-paney migpataha meyitenged te pegginguma te Suluhuanen ne Matareng, sika se inliputan niyu wey innimatayan. 53 Sikaniyu ka nakarawat te Balaud ne imbehey te me panalihan, piru ware niyu seini tumana!"

Ka pegbebatu ki Istiban

54 Pegkarineg dutu te me pangulu te me Hudiyu, amana sikandan nabelu ki Istiban wey nakapangngahat te pegkabelu dan. 55 Piru si Istiban ne napenu te Panisangan te Manama, migleng-ag

sikandin te langit wey nakita rin ka katelesan te Manama wey nakita rin degma si Hisus ne migsasindeg diye te igkakawanan* te Manama.

56 Ne migkahi sikandin, "Pitew kew! Nakita ku ka langit ne nalukatan e, ne ka Anak te Etew diye migsasindeg te igkakawanan te Manama!"

57 Piru migpanguleyi sikan-dan ne migsesagpeng te talinga ran, wey miglegse sikandan ka migpallahuy ne egsukeung kandin. 58 Ne inggehanuy e sikandin diye te lihawangan te siyudad wey imbebatu e. Ne inggaat te me talagpamalehet meyitenged ki Istiban ka me kumbale dan diye te lukes ne kene pad amana ne mayansan ne si Saulu.

59 Taheed te egbebatuwen dan si Istiban, mig-ampu e sikandin ne miggendue, "Magbebaya ne si Hisus, dawata nu ka panisingan ku!" 60 Ne migpanimbuel sikandin wey migbal-balukan ne migkahi, "Magbebaya, kene nu sikandan pakasalaa te innimu ran!" Pegkapenga rin te miglag-dutu, nabigtawan e sikandin.

8

¹ Ne mig-uyunan ni Saulu ka peggimatey ki Istiban.

Imbaybayaran ni Saulu ka migmalintutuu

^{7:49} Isa 66:1-2. ^{7:51} Isa 63:10. * ^{7:55} Sumale te tuluuwen te me Hudiyu, ka talahuren de ne etew ka epgakapinnuu diye te igkakawanan te mabantug ne etew.

Te seeye ne aldew, migbunsud e ka masumpit ne pegbayad-bayad te migmalintutuu ki Hisus diye te Hirusalim. Ne sikandan langun, angin e te me apustulis, nenekegsuwey-suwey e diye te me prubinsya diye te Hudiya wey te Samarya. ² Ne due me lukes ne migpamakey te Manama ne mglebeng ki Istiban, wey migpalumbibigtew sikandan te pegkalange dan te pegpatey rin.

³ Piru si Saulu, impakan-nekal sikandin ka egdereet te me etew ne migpalintutuu. Ne tagse baley, eggendiyaan din wey migpannganuy rin ka egyptintutuu ne me lukes wey me malitan, wey impamirisu rin e.

Ka peggendiye ni Pilipi te Samarya

⁴ Ne seeye se nenekegsuwey-suwey ne migmalintutuu, migwali e te lalag te Manama te minsan hendei ne egkeendiyaan dan. ⁵ Ne si Pilipi, miggendiye te sabeka ne siyudad diye te Samarya wey migwali te me etew meyitenged te Kristu. ⁶ Pegkarineg te sesalihi ne etew te inlalag ni Pilipi, wey te pegkakita ran te me kein-inuwan ne innimu rin, mig-ayad-ayad e sikandan migpammineg kandin. ⁷ Masalig ne me etew ka nanerepan te busew ne neneulian wey migmanguleyi ka me busew te meemen.

Ne masalig degma seeye se kene egkaweil se lawa wey me pungku ne neneulian e. ⁸ Purisu nahale amana ka me etew diye te Samarya.

⁹ Te seeye ne siyudad, due etew ne egngaranan ki Simun ne migimu te salamangka, wey nakapeinuinu seeye te matig-Samarya. Migpeggasal man-e sikandin ne mabantug kun. ¹⁰ Ne ka langun ne etew te seeye ne siyudad, datu ma wey se kene, migpammineg iya kandin. Migkahi sikandin, "Sikandin ka geem te Manama ne egngaranan te 'Ka Dakel ne Geem.' "

¹¹ Migpammineg sikandin kandin tenged su naluhey re ne nakapeinuinu kandan ka salamangka rin. ¹² Piru te migpalintutuu e sikandan te wali ni Pilipi meyitenged te Meupiya ne Panugtulen te Peghari te Manama wey te ngaran ni Hisu Kristu, imbewutismuwan e sikandin, lukes ma wey malitan. ¹³ Ne minsan si Simun, migpalintutuu e degma. Ne hengkayi te nabewutismuwan e sikandin, migduma-rume e sikandin ki Pilipi. Nawangalan sikandin te me kein-inuwan wey me palinneu ne neyimu ni Pilipi.

¹⁴ Te pegkarineg te me apustulis diye te Hirusalim ne migdawat e te lalag te Manama ka matig-Samarya, impeuyan dan e ensi Pidru ki Huwan diye te kandan. ¹⁵ Te pegginguma ran, mig-

ampuan dan e ka me migpal-intutuu ne egpakarawat te Panisingan te Manama.¹⁶ Su ka Panisingan te Manama, ware pad ipeyinguma diye te minsan sabeka kandan; nabewutismuwan de sikandan te ngaran te Magbebabe ne si Hisus.¹⁷ Nataman, migtel-eban e sikandan enni Pidru ki Huwan, ne dutu, narawat dan e ka Panisingan te Manama.

¹⁸ Te pegkakita ni Simun ne nakarawat ka me etew te Panisingan pinaahi te pegtel-eb te belad dan, migbehayan din e perem sikandan te seleppi¹⁹ te migkahi, "Behayi a degma nikaniyu te sika ne geem eyew egpakarawat te Panisingan te Manama ka langun ne egtel-eban ku te belad ku."²⁰ Piru migkahiyan sikandin ni Pidru, "Egkareetan ka perem duma te seleppi nu tenged su kahiyen nu ne egkabeli nu ka dasag te Manama.²¹ Ware apil nu wey ware labet nu te seini ne himu su kene ne meupiya ka pusung nu diye te tangkaan te Manama.²² Purisu inniyuhi nu seini se maret ne suman-suman nu wey ampu ka ne egpasayluwen ka te Magbebabe tenged te pegsuman-suman nu te iling due.²³ Su nakataha a ne amana ke re neimma kanami wey neuripen ka te sale."

²⁴ Ne migkahiyan ni Simun si Pidru wey si Huwan, "Iampu a nikaniyu te Magbebabe eyew kene egkatuman ka inlalag niyu keddiey."

²⁵ Te pegkapenga enni Pidru ki Huwan te pegpamalehet meyitenged te ki Hisus wey te pegwali te lalag te Magbebabe, miglibed e sikandan diye te Hirusalim. Ne migwali sikandan te Meupiya ne Panugtulen diye te masalig ne me inged diye te Samarya.

Si Pilipi wey ka upisyal ne matig-Itiyupiya

²⁶ Nataman, migkahiyan si Pilipi te panalihan te Magbebabe, "Hendiye ka te igkakawanan ne balabahan dapit te igsile, diye te dalan peendiye te Hirusalim wey Gasa." Ka seeye ne dalan, warad e bayei.²⁷⁻²⁸ Purisu miggipanew e si Pilipi te seeye ne timpu. Ne due degma sabeka ne sinalihan ne upisyal ne matig-Itiyupiya ne eg-uli diye te kandan. Sabeka sikandin ne kinepun ne lukes wey talaggen-gen te seleppi ni Kandasi ne rayna te Itiyupiya. Miggendiye sikandin te Hirusalim eyew egsimba te Manama. Te seeye ne aldew, mig-uli e sikandin ne mig-untud te kerumata, ne due baseen ne insulat ni Prupita Isayas ne imbasra rin taheed te mig-untud din.²⁹ Ne migkahiyan si Pilipi te Panisingan te Manama, "Hendiye ka wey andangi nu ka kerumata."³⁰ Purisu migpallahuy si Pilipi peendiye te kandin wey narindeg din ka upisyal ne migbasa te sinulat ni

Prupita Isayas. Ne miginsaan sikandin ni Pilipi, "Nasabut nu red ka imbasanu?"

³¹ Ne migtabak ka upisyal, "Egmenuwen ku te egsabut ke ware egpanulu keddiey?" Ne impeuntud din e si Pilipi te kerumata wey migpinnuu andang kandin. ³² Seini ka baseen te Kasulatan ne imbasanu rin:

"Iling sikandin te karniru ne in-uyan eyew eggilangen. Ne iling man-e sikandin te nati te karniru ne egpeeneng-eneng ke eg-alutan, ware sikandin miglalag te minsan sabeka re ne lalag. ³³ Impeylawan sikandin wey ware nabehayi te me-upiya ne hukum, ne ware egpakapanugtul meytenged te me kabuhalan din su malepet de ka pegugpe din kayi te ampew te tane."

³⁴ Ne mig-inse ki Pilipi ka upisyal, "Nangeni e kun ubag ke hentew-a ka egguhuren din kayi, ka kandin naa mismu ne lawa wey ke lein?"

³⁵ Purisu impangguhuran e sikandin ni Pilipi te Meupiya ne Panugtulen meytenged ki Hisus, ne migbunsud te seini ne baad te Kasulatan. ³⁶⁻³⁷ Ne diye te hipanawan dan, due

neyingumaan dan ne weyig, ne migkahie ka upisyal, "Pitew ka, due weyig seini. Mania te kena a nikeykew egbewutismuwan?"*

³⁸ Purisu impasanggel nikandin ka kerumata wey migpamanueg e sikandan se daruwa. Ne migdugpu sikandan diye te weyig wey migbewutismuwan e ni Pilipi ka upisyal. ³⁹ Te peggakap dan e te weyig, insalukagmit e si Pilipi te Panisingan te Magbebeye, ne warad e nakita sikandin te upisyal, piru migpabulus ka upisyal ne miggipanew ne nahale-gale. ⁴⁰ Te naalimukawan e si Pilipi, diye bes e sikandin te Asutu, ne migpabulus e man-e sikandin ka egwali te Meupiya ne Panugtulen diye te langun ne lungsud taman te pegginguma rin diye te Sisarya.

9

Ka pegpalintutuu ni Saulu (Him. 22:6-16; 26:12-18)

¹ Te seeye ne timpu, migpabulus si Saulu ka egleialis ne egpangimatey te me hibateen te Magbebeye. Purisu miggendiye sikandin te Labew ne Talagpanubad ² eyew egbuyu te me sulat ne eg-uyanen din diye te me simbaan te me Hudiyu diye te Damasku. Iyan din igbuyu te sulat su eyew due

^{8:32} Isa 53:7-8 (LXX). * ^{8:36-37} Due me sinulat ne inlagkes ka birsikulu 37 piru ware seini diye te malehet ne migpuunan. Intimul naan de seini: Ne migtabak si Pilipi, "Ew, egkaayun ne egbewutismuwan ka ke egpuun te pusung nu ka pegpalintutuu nu." Ne migtabak ka upisyal, "Ew, uya su migpalintutuu ad e ne Anak te Manama si Hisu Kristu."

katenged din te pegpandakep ke due egkakita rin ne egikul te Magbebaye wey egyptanen din te eglived diye te Hirusalim, lukes ma wey ke malitan.

³ Te peggendiye din te Damasku, wey te marani e sikandin te siyudad, sahuhune ne due malayag ne egligkat te langit ne nakaalingkus kandin. ⁴ Nataman, napeled e sikandin, ne due laheng ne narineg din ne migkahi, "Saulu, Saulu. Mania te migbaybayaran a nikeykew?"

⁵ Ne mig-inse sikandin, "Hentew ke ma, Magbebaye?"

Ne migkahi ka laheng, "Sikeddi si Hisus ka imbabayaran nu. ⁶ Ne enew kad wey hipanew kad peendiye te siyudad wey diye kad e egnangeni ke nekey ka egimuwen nu."

⁷ Ne ka me etew ne duma ni Saulu te hipanawan, nenakasasindeg de ne natannengan. Nakarineg sikandan te laheng piru ware etew ne nakita ran. ⁸ Ne dutu migenew e si Saulu, peggimelat din, kenad e epakakita sikandin. Purisu ingkitkit naan de sikandin te me duma rin peendiye te Damasku. ⁹ Tatelu ne aldew ne kene sikandin epakakita, wey ware degma migkeen wey mig-inum.

¹⁰ Ne diye te Damasku, due sabeka ne hibateen ni Hisus ne egngaranan ki Ananiyas. Ne hendue te impataheinep

sikandin te Magbebaye ne migkahiyan, "Ananiyas."

Ne migtabak si Ananiyas, "Seini e red, Magbebaye."

¹¹ Ne migkahiyan sikandin te Magbebaye, "Hipanew ka peendiye te dalan ne egngaranan te 'Matul-id ne Dalan,' wey pamitawa nu diye te baley ni Hudas ka sabeka ne etew ne egngaranan ki Saulu ne matig-Tarsu. Eg-ampu sikandin ¹² wey diye te impakita kandin te Manama, due nakita rin ne sabeka ne etew ne egngaranan ki Ananiyas ne migseled wey migtel-eb kandin te me belad din su eyew epakakite e man-e sikandin."

¹³ Ne migtabak si Ananiyas, "Magbebaye, masalig ka nakahuhud keddiey meyitenged te sika ne etew, ne subla kun ne mareet ka eggimuwen din te keet-etawan nu diye te Hirusalim. ¹⁴ Ne kuntee, kayid e sikandin te Damasku ne imbehayan te katenged te me pangulu te talagpanubad te pegdakep te langun ne egpamakey keykew."

¹⁵ Piru migkahiyan sikandin te Magbebaye, "Hendiyei nu su in-alam ku sikandin eyew te pegpataha te kedi ne ngaran diye te me kene ne me Hudiyu wey diye te me Hari wey diye te me kabuhalan ni Israil. ¹⁶ Ne igpapitew ku kandin ka langun ne eg-antusen din tenged keddiey."

¹⁷ Purisu miggendiyaan e ni Ananiyas si Saulu te baley wey migtel-eban din te me belad din te migkahi, "Suled, ka Magbebeye ne si Hisus ne migpakita keykew te peggendini nu ka migpeuyan keddiey su eyew egpakkakita kad e man-e wey egkapenu te Panisingan te Manama." ¹⁸ Sahuhune ne due neneulug diye te mata ni Saulu ne hendue te me engil, ne dutu, nakakite e man-e sikandin. Ne mig-enew sikandin wey migpabewutismu e. ¹⁹ Te nakakeen e sikandin, miglibed e man-e ka kanekal din.

Ka pegwali ni Saulu diye te Damasku

Ne mig-ugpe pad si Saulu diye te Damasku seled te pila ne aldew duma te me hibateen ni Hisus. ²⁰ Due-rue miggendiye sikandin te me simbaan te me Hudiyu eyew te pegpanugtul ne si Hisus ka Anak te Manama.

²¹ Neinu-inu ka langun ne nakarineg kandin wey migmein-inseey ne migkahi, "Henduen ma te seini ka diye te Hirusalim ne egbayabayad te seeye se egpamakey ki Hisus. Ne kema ke iyan din de iggendini ka egpandakep te eg-uyanan din diye te me pangulu te talagpanubad?"

²² Piru migmasumpit ka pegwali ni Saulu wey amana nakasuhat te migpammineg kandin. Ne ware nakaapul ka me Hudiyu diye te

Damasku puun te pegpemalehet ni Saulu ne si Hisus ka Kristu.

²³ Te peglihad te masalig ne me aldew, migplanu ka me pangulu te me Hudiyu te peggimatey ki Saulu.

²⁴ Piru nakarineg si Saulu ke nekey ka planu ran ne eggimuwen. Aldew wey marusilem ka peg-eatang dan diye te gumawan te siyudad eyew te peggimatey ki Saulu. ²⁵ Piru te sabeka ne marusilem, intahu si Saulu te me hibateen diye te bukag wey intutuntun diye te bintana te alad te siyudad ne matikang wey makepal.

Ka peggendiye ni Saulu te Hirusalim

²⁶ Ne puun dutu, miggendiyyad e si Saulu te Hirusalim wey migduma-rume e perem sikandin te me hibateen ni Hisus dutu. Piru naaldek kandin ka langun su ware sikandan migpalintutuu ne sabek e degma sikandin ne hibateen. ²⁷ Piru imbulihan e sikandin ni Birnabi wey in-uyan diye te me apustulis. Nataman, impangguhuran e sikandan ni Birnabi ke immenu te Magbebeye te migpakita wey migpakiglagalag ki Saulu diye te dalan peendiye te Damasku, wey ke immenu rin te pegwali te ngaran ni Hisus diye te Damasku te ware pegkaaldek. ²⁸ Purisu nakarume e si Saulu kandan wey in-empet dan ka Hirusalim te pegwali te ngaran te Magbebeye ne si

Hisus te ware pegkaaldek.
 29 Ne nekeglalag wey nenekeg-apul sikandan te me Hudiyu ne Grigu se linalahan piru migpammitew sikandan te paahi ne egkeyimatayan sikandin. 30 Te pegkannengnengi te me suled ne migpalintutuu, in-uyan dan e si Saulu diye te Sisarya wey impeendiye te Tarsu.

31 Purisu ka migmalintutuu diye te intiru ne Hudiya, Galiliya, wey diye te Samarya, nalig-en e wey warad e samuk. Ne migmasalig pad sikandan tenged su due pegkaaldek dan te Magbebkiye wey imbagget sikandan te Panisangan te Manama.

Ka pegbawi ni Pidru ki Iniyas

32 Nekey naa te si Pidru, miggiphapanew sikandin te minsan hendei, nataman, miggendiye sikandin te keetetawan te Manama diye te lungsud te Lida. 33 Ne diye din nakita ka pungku ne lukes ne egngaranan ki Iniyas, ne ware nekeenew seled te walu ne leg-un. 34 Ne migkahiyan sikandin ni Pidru, "Iniyas, egbawian ka ni Hisu Kristu, purisu enew ka wey paninesa nud ka miggibatan nu." Ne due-rue ne mig-enew si Iniyas. 35 Ne ka langun ne etew ne mig-ugpe diye te Lida wey diye te Sarun, nakakita kandin wey migpalintutuu e te Magbebkiye.

Ka pegkeuyag ni Pidru ki Tabita

36 Ne diye te Hupi, due malitan ne migpalintutuu ne egngaranan ki Tabita.* Ne layun sikandin eggimu te meupiya wey egbulig te egkaayu-ayu. 37 Te seeye ne timpu, migderalu sikandin wey migpatey. Ne ka lawa rin, miglu-luan dan wey impaley-as dan diye te sinabeng ne diye te dibabew. 38 Ne ka Hupi, bayew re marani te inged ne Lida. Te pegkarineg te me hibateen diye te Hupi ne diye si Pidru te Lida, migsuhu e sikandin te daruwa ne lukes wey impanagtahaan ne egpeendiyeen egparagdahawa si Pidru te Hupi. 39 Purisu migdume e si Pidru kandan. Te pegginguma ran, impanulud e si Pidru diye te sinabeng ne diye te dibabew. Ne dutu, miglingutan e si Pidru te langun ne me malitan ne balu ne egmaninehew wey impapitew ran kandin ka me kumbale wey ka me dyakit ne innimu ni Durkas te neuyag pad sikandin. 40 Nataman, impaliyawang e sikandin langun ni Pidru, ne dutu, migpanimbuel sikandin wey mig-ampu diye te Manama. Ne nataman, migtangkaan din e ka minatey te migkahi, "Tabita, enew ka." Ne miggimelat e si Tabita, pegkakita rin ki Pidru, henduen pad ne migpinnuu sikandin.

* 9:36 Te Grigu: Durkas, ke sikanta pa, usa.

⁴¹ Miggeng-genan ni Pidru ka belad te malitan wey impasasindeg din. Nataman, in-umew rin e ka migmalintutuu wey ka me balu, wey impakita rin e kandan si Durkas ne neuyag e. ⁴² Nekeempet te intiru ne Hupi ka guhuren meyitenged kandin wey masulug ka me etew ne migpalintutuu te Magbebabe. ⁴³ Ne mig-uugpe pad si Pidru diye te Hupi seled te me pila ne aldew diye te ki Simun ne talagderampil te laplap te ngalap.

10

Si Pidru wey si Kurnilyu

¹ Due lukes ne egngaranan ki Kurnilyu ne diye migugpe te siudad te Sisarya. Sabeka sikandin ne kepitan te Rumanhun ne me sundalu ne egngaranan te “Punduk te Italyanu.” ² Migpamakey sikandin te Manama wey migsimba te Manama duma te langun ne pamilya rin. Dakel ka nabulig din diye te me etew ne egkaayu-ayu, wey layun eg-ampu sikandin diye te Manama. ³ Sabeka ne maapun te me alas tris e, hendue te impataheinep sikandin te Manama. Nakita rin ka sabeka ne panalihan te Manama ne migparani kandin wey migkahi, “Kurnilyu!”

⁴ Migmemetmet sikandin te panalihan duma te pegkaaldek ne mig-inse, “Nekey-a, Ahalen?”

Ne migkahi ka panalihan, “Indawat e te Manama

ka peg-ampu nu wey ka pegbulig nu diye te egkaayu-ayu, wey ware ka nikandin nalingawi. ⁵ Ne kuntee, suhu ka te me lukes ne egpeendiyeen te Hupi ne egpaangayen te lukes ne egnagaranan ki Simun Pidru. ⁶ Diye sikandin miglemung ki Simun ne talagderampil te laplap te ngalap, marani te dahat ka baley rin.” ⁷ Te peg-awe e te panalihan ne miglag kandin, migpangumew e si Kurnilyu te daruwa ne suluhuanen din wey sabeka ne sundalu ne sinalihan din ne migpamakey degma te Manama. ⁸ Ne dutu, impangguhuran din e sikandin te innangen kandin te panalihan te Manama. Nataman, impeendiye din e ka tatelu ne etew diye te Hupi.

⁹ Te seup ne aldew, te sasangan e sikandin ne miggipanew, wey te marani e sikandin diye te siudad, migpamaneyik si Pidru diye te atep eyew eg-ampu, meudtu en iya seeye. ¹⁰ Ne dutu, miggutasan e si Pidru wey egkeupian e ne egkeen. Taheed te nanusubba pad te egkeenen, hendue te impataheinep sikandin te Manama. ¹¹ Nakita rin ne nalukatan ka langit wey due intuntun kayi te tane ne egpekeiling te dakel ne manggad ne miggiketan ka tagse pikungan. ¹² Iyan tahu dutu ka langun ne klasi te me ngalap ne egmangipanew wey egmanlayang

wey egmandul-ug.¹³ Ne due laheng ne migkahi kandin, "Pidru, enew ka wey gilang ke naa wey keen ka!"

¹⁴ Piru migtabak si Pidru, "Kena a Magbebaye, su ware e pad nakakeen te minsan nekey ne in-isip ney te me Hudiyu ne malindit wey ke mareet naa."^{*}

¹⁵ Ne migkahi man-e ka laheng, "Kene nu sumsumana ne malindit ka minsan nekey ne inlinisan e te Manama."

¹⁶ Neyitabu seini te katatelu, ne nataman, miglibed ded diye te langit ka intuntun.

¹⁷ Ne taheed te migsusuman-suman pad si Pidru ke nekey ka kaluwasan te impakita kandin, mig-inse e ka me etew ne insuhu ni Kurnilyu ke hendei lenged ka baley ni Simun. Diyad e sikandan te egkatangkaan te gumawan.
¹⁸ Ne migpangumew sikandan ka mig-inse ke migle-mung naa dutu si Simun ne enggaranan ded degma ki Pidru.

¹⁹ Te seeye ne timpu, migpabulus pad si Pidru ka egsusuman-suman te impakita kandin. Ne migkahiyan sikandin te Panisingan te Manama ne miggendue, "Due tatelu ne etew ne egpammitew keykew.
²⁰ Ne enew ka wey pamaneug ka wey kene ka duwa-ruwa ka egduma kandan su sikeddiey ka migpeendini kandan."

²¹ Purisu, migpamaneug e si Pidru wey migkahi diye te me etew, "Sikeddiey ka egpamitawen niyu. Ne mania te miggendini kew?"

²² Ne migtabak sikandan, "Impeendini key ni Kurnilyu ne kepitan te me sundalu. Matareng sikandin ne etew wey migpamakey degma te Manama, wey amana tahura te langun ne me Hudiyu. Insuhu sikandin te matulus ne panalihan te Manama ne egpeyinggaten keykew te eggendiye te baley rin eyew egpakarineg sikandin te iglalag nu."
²³ Nataman, impalasud e ni Pidru ka me etew wey diyad sikandan peyirehaa te seeye ne karusileman.

Pegkapawe, migparumeey e sikandan duma man-e te migmalintutuu ne diye egpuun te Hupi.
²⁴ Te seup e man-e ne aldew, henduen pad ne nekeuma sikandan diye te Sisarya. Ne migtahad e kandan ensi Kurnilyu duma te me pamilya rin wey me alukuy rin ne impang-inggat din.
²⁵ Ne hengkayi te eglasud e perem si Pidru, migsinug-ung de sikandin ni Kurnilyu ne mig-usengul diye te tangkaan din ka egsimba kandin.
²⁶ Piru impasindeg sikandin ni Pidru wey migkahiyan, "Sasindeg ka. Etew e re degma."
²⁷ Ne miglasud e si Pidru ka migpahuhurey ka Kurnilyu.

* **10:14** Su ka me Hudiyu, kene egkeen te me babuy, me ekang, me kasili, wey duma pad su eg-ikul te suhu te Manama ne egkakita diye te Libitiku kapitulo 11.

Ne iyan din nakita ka masalig ne etew ne nalibulung diye te seled. ²⁸ Ne migkahiyan sikandan ni Pidru, "Nakanengneng kew e ne sikanami se me Hudiyu, ingkenaan ne egduma-ruma wey ke egpanumbaley te kene ne me Hudiyu. Piru impapitew a te Manama te keilangan ne kene ku egsumsumanen ne malindit wey ke mareet ka minsan hentew. ²⁹ Purisu te pegpaangey niyu keddi, wara a mig-apul. Ne eg-insa a kaniyu, mania te impeendini a nikaniyu?"

³⁰ Ne migkahi si Kurnilyu, "Te iling kayi ne uras, te me alas tris te maapun te seeye se neep-atan, mig-ampu a diye te seled te baley ku. Sahuhune ne due sabeka ne lukes ne migkukumbale te epakasilang ne migsasindeg kayi te tangkaan ku ³¹ wey migkahi, 'Kurnilyu, narineg te Manama ka peg-ampu nu wey nakita rin ka pegbulig nu diye te egkaayu-ayu. ³² Ipaangey nu diye te Hupi si Simun Pidru, diye sikandin miglemung ki Simun ne talagderampil te laplap te ngalap ne diye te marani te dahat.' ³³ Purisu impaangey ku sikeykew paragdahawi wey salamat te miggendini ka. Ne kuntee, seini key langun te tangkaan te Manama ka egpammineg te langun ne igpalalag keykew te Magbebaye."

Ka lalag ni Pidru

10:34 Diy 10:17.

³⁴ Ne migkahi si Pidru, "Kuntee nanengnengan kud e ne ware bes iya indapihan te Manama. ³⁵ Ka etew ne due pegkaaldek te Manama wey matareng ka eggimuwen, egdawaten sikandin te Manama minsan ke nekey ka tribu rin. ³⁶ Nakataha kew e te guhuren ne impeuyan din kayi te me kabuhalan ni Israil, ne migpanugtul te Meupiya ne Panugtulen ne egpekeg-uli ka meupiya ne geyinawa ta kandin pinaahi ki Hisu Kristu, ka Magbebaye te langun ne etew. ³⁷ Nakataha kew e man-e te neyitabu diye te intiru ne prubinsya te Hudiyu, ne migbunsud diye te Galiliya te pegkapenga ni Huwan te migwali meytenged te bewutismu. ³⁸ Ne nakataha kew e man-e meytenged ki Hisus ne matig-Nasarit ne in-alam te Manama wey imbe-hayan te Panisingan din wey geem. Ne puun su migdu-maan sikandin te Manama, miggiphipanew sikandin ne miggimu te meupiya wey migpamawi te langun ne etew ne migbaybayaran te ahalen te me busew. ³⁹ Ne sikanami ka egpamalehet te langun ne neyimu rin diye te siyudad te Hirusalim wey diye te duma ne lungsud te me Hudiyu. Innimatayan dan sikandin pinaahi te peglansang kandin te krus. ⁴⁰ Piru in-uyag sikandin te Manama te igkatelu ne aldew wey migpakita pad sikandin

kanami. ⁴¹ Ware migpakita sikandin te langun ne etew, ke kene, kayi re te kanami te in-alam te Manama ne talagpamalehet. Te neuyag e sikandin, nenekegduma key pad iya ka migkeen wey mig-inum. ⁴² Insuhu key nikandin te pegwali te Meupiya ne Panugtulen diye te me etew, wey te pegpamalehet ne sikandin iya ka in-alam te Manama te peggukum te neuyag pad wey te nammatey e. ⁴³ Si Hisu Kristu ka ingguhud te langun ne me prupita ne ka minsan hentew ne egpalintutuu kandin, egkapasaylu se me sale pinaahi te ngaran din.”

*Ka peglene te Panisingan
diye te kene ne me Hudiyu*

⁴⁴ Te sasangan pad ne eglalag si Pidru, miglene ka Panisingan te Manama diye te langun ne migpam-mineg te wali. ⁴⁵ Neinuinu ka migmalintutuu ne me Hudiyu ne migduma ki Pidru puun te Hupi te migbehayan degma te Manama te Panisingan ka kene ne me Hudiyu. ⁴⁶ Su nakarineg sikandan te kene ne me Hudiyu ne eglalag te nalein-lein ne me linalahan wey migdayan te karesen te Manama. Ne dutu, migkahi e si Pidru, ⁴⁷ “Minsan kene sikandan ne me Hudiyu, piru nakarawat te Panisingan iling te pegkarawat ta degma. Purisu, kene ne meupiya ke egbalabahan sikandan ka egpabewutismu te weyig.”

⁴⁸ Nataman, insuhu din e sikandan ne egpabewutismu te ngaran ni Hisu Kristu. Pegkapenga dutu, inhangyu dan e si Pidru ne diye pad egpeugpaa te kandan seled te me pila ne aldew.

11

*Ka pegpanengneng ni
Pidru diye te punduk te
migmalintutuu te Hirusalim*

¹ Na, ka me apustulis wey ka me suled ne migmalintutuu diye te Hudiya, nakarineg ne nakarawat e degma te lalag te Manama ka kene ne me Hudiyu. ² Purisu te peglibed ni Pidru diye te Hirusalim, inlemetan e sikandin te punduk te me Hudiyu ne migpalintutuu ki Hisus piru mig-uyun ne ka kene ne Hudiyu, keilangan ne egtulian henduen pad ig-apil kandan. ³ Ne migkahiyan dan si Pidru, “Mania te migpanumbaley ka te kene ne me Hudiyu ne ware natulii, wey migpakig-tuhen kandan te egkeen?”

⁴ Purisu impangguhuran e sikandan ni Pidru puun te pegbunsud ⁵ ne miggen-due, “Te timpu ne migampu a te diye e pad te siyudad te Hupi, hendue te impataheinep a te Manama. Nakakita a te hendue te dakel ne manggad ne intuntun puun te langit ne miggiketan ka tagse pikungan, ne diye te lenged ku migsanggel. ⁶ Migmelmelehan ku ay-ayari ka tahu dutu, ne iyan ku nakita ka me ayam, ka me

mahintalunan ne mananap, ka me ngalap ne egdul-ug, wey ka me manuk-manuk ne eglayang diye te awawangan.⁷ Nataman, due laheng ne narineg ku ne migkahi keddi, 'Pidru, enew ka wey gilang ke naa wey keen ka!'⁸ Piru migtabak a, 'Kena a Magbebaye, su ware e re due nakakeen te in-isip ney te me Hudiyu ne malindit wey ke mareet naa.'⁹ Ne migkahi e man-e ka laheng ne diye egpuun te langit, 'Kene nu sumsumana ne malindit pad ka miglinisan e te Manama.'¹⁰ Katatelu seini neyitabu. Nataman, miglibed e man-e diye te langit.¹¹ Te seeye iya ne timpu, due tatelu ne etew puun te Sisarya ne miggunguma diye te baley ne in-ugpaan ney ne egpaangayen keddi.¹² Ne migkahiyan a te Panisingan te Manama ne egparumeen kandan te ware pegduwara. Ne due degma seini se hen-em ne migmalintutuu ne migduma keddi peendiye te Sisarya, wey migseled key langun te baley ni Kurnilyu.¹³ Ne dutu, migpangguhuran key e ni Kurnilyu te pegkakita rin te panalihan te Manama ne migsasindeg diye te seled te baley rin ne migkahi, 'Suhu ka te egpeendiyeen te Hupi ne egpaangayen te etew ne egnggaranan ki Simun Pidru.'¹⁴ Due pangguhuren din ne egpakaluwas keykew duma te langun ne sakup te pamilya nu.¹⁵ Ne

hengkayi te migbunsud ad ka eglalag, miglene e ka Panisingan te Manama diye te kandan ne egpekeiling te pglene degma kanta te ananayan.¹⁶ Ne puun dutu, nasuman-suman kud ka ingkahi te Magbebaye, 'Si Huwan, migpamewutismu te weyig, piru sikaniyu, egbewutismuwan te Panisingan te Manama.'¹⁷ Purisu seeye se neyitabu, migpamalehet ne ka imbehey te Manama kanta te me Hudiyu te timpu ne migpalintutuu ki te Magbebaye ne si Hisu Kristu, imbehey e degma diye te kene ne me Hudiyu. Ke seini ka igkeupii te Manama, hentew e ma ka eg-apul kandin!"¹⁸

¹⁸ Te pegkarineg dutu te migmalintutuu ne me Hudiyu, migpeeneng-eneng e sikandan. Ne indayan dan e ka Manama te miggendue, "Ke iling ma due, imbehey bes e degma diye te kene ne me Hudiyu ka timpu te peginniyug te me sale, su eyew egpakaangken sikandan te umul ne ware egtamanan."

Ka migpalintutuu diye te Antiyukiya

¹⁹ Puun te pegpatey ni Istiban, nenekegsuwey-suwey e ka migmalintutuu tenged te pegbayad-bayad kandan. Ka duma, nekeendiye te Pinisiya, te Sipri, wey diye te Antiyukiya, ne impangguhud dan ka Meupiya ne Panugtulen diye de te me Hudiyu.²⁰ Piru

due duma ne matig-Sipri wey matig-Sirini ne migpalintutuu ki Hisus ne miggendiye degma te Antiyukiya, ne migpangguhud te Meupiya ne Panugtulen meyitenged te Magbebaye ne Hisus diye te kene ne me Hudiyu. ²¹ Ne due geem te Magbebaye diye te kandan wey puun dutu, masalig amana ka migpalintutuu wey migsalig te Magbebaye.

²² Ne seini se neyitabu, narineg te me punduk te migmalintutuu diye te Hirusalim. Purisu impeendiye dan e si Birnabi te Antiyukiya. ²³ Te pegginguma rin diye, nahale sikandin te nakita rin ne ingkeyid-u te Manama ka me etew diye. Ne imbagget din sikandan ne eg-ikul te Magbebaye puun te pusung dan wey kene eg-engked ne egsalig kandin. ²⁴ Meupiya ne etew si Birnabi, napenu sikandin te Panisingan te Manama wey manekal ka pegpalintutuu rin. Ne amana ne masalig ne etew ka migpalintutuu te Magbebaye.

²⁵ Nataman, miggendiyad e si Birnabi te Tarsu ka eg-pammitew ki Saulu. ²⁶ Ne hengkayi te nakita rin e si Saulu, induma rin e diye te Antiyukiya. Ne migdumaruma sikandan te me punduk te migmalintutuu diye seled te senge leg-un, wey masalig ne etew ka napanulu dan. Ka me hibateen diye

te Antiyukiya ka an-anayan ne migngaranan te Kristuwanen.

²⁷ Te seeye ne timpu, due me prupita ne migpangendiye te Antiyukiya ne diye egpuun te Hirusalim. ²⁸ Ne due sabeka kandan ne egngaranan ki Agabu ne migsasindeg, ne pinaahi te geem te Panisingan te Manama, migpangguhud sikandin te impanengneng te Manama ne due dakel ne gutas ne eggingga te intiru ne kalibutan. Neyitabu seini te timpu ne si Klawdiyu ka Impiradur diye te Ruma. ²⁹ Ne puun dutu, nenekegsabut ka me hibateen ne ka tagse sabeka kandan egpeuyan sumale te egkeyimu ran ne igbulig te me duma ran ne migpalintutuu ki Hisus diye te Hudiya. ³⁰ Ne innimu ran seeye, ne nataman, impeuyan dan e engki Birnabi ki Saulu eyew igbehey diye te me igbuyag te migmalintutuu.

12

Ka pegbayad-bayah man-e te migmalintutuu

¹ Te seeye ne me timpu, migbunsud e si Hari Hirudis* ka egbayad-bayah te duma ne me punduk te migmalintutuu. ² Ne ka suled ni Huwan ne si Santiyagu, impeyimatayan ni Hirudis pinaahi te kampilan. ³ Te nakita ni Hirudis ne nahale ka me pangulu te me Hudiya

* **12:1** Hari Hirudis: ka an-anayan ne Hirudis Agripa ne talagmandu te intiru ne Israel.

te innimu rin, imparakep din e degma si Pidru. Neyitabu seini te timpu te Sahakeen te Paan ne ware Patulin.⁴ Ne dutu, indakep dan e si Pidru wey impaprisu. Impatamengan dan te hep-at ne punduk ne me sundalu ne tighep-at-hep-at ka tagse punduk. Isip ni Hirudis ne diye eggusaya ka kasu ni Pidru te tangkaan te me etew pegkapenga te Sahakeen te Paan ne ware Patulin.⁵ Purisu diye de iya itahu si Pidru te prisuwan. Piru migpakannekal mig-ampu ki Pidru ka me punduk te migmalintutuu.

Ka pegpalihawang te panalihan ki Pidru

⁶ Te seeye ne karusileman te iga palihawang e sikandin ni Hirudis te pegkapawe, newulep sikandin ne impataliwarean te daruwa ne me sundalu, wey imbaiku pad te daruwa ne keddina. Ne duen pad man-e migtameng diye te gumawan te prisuwan. ⁷ Sahuhune ne due migsasindeg ne panalihan te Magbebeye wey nalayahan ka prisuwan. Nataman, impukew e te panalihan si Pidru ne in-welwel se pamanayen te migkahi, “Enew ka rue! Mahaan ka!” Ne sauhune ne neekad ka me keddina diye te belad ni Pidru. ⁸ Ne migkahi e ka panalihan, “Sis-inturun kad wey sesandal kad.” Ne intuman iya degma ni Pidru. Ne migkahi e man-e ka panalihan, “Kukuyumbu

ka wey sinundul ka keddi.”⁹ Ne migsinundul e degma sikandin te panalihan ne egli-hawang diye te prisuwan. Ne ware nakataha si Pidru ke malehet naa ka neyitabu su kahiyen din ne taheinep din de seeye. ¹⁰ Ne ka seeye se an-anayan ne talagtameng, inliharan dan de wey ka igkarangeb degma. Pegginguma ran diye te putew ne gumawan ne egkatangkaan te siyudad, nalukatan de due te kandin ka seeye ne gumawan. Purisu nakali-hawang e sikandan. Ne hengkayi se nakalihad e sikandan te sabeka ne kelesadda, sauhune ne mig-awe ka panalihan.

¹¹ Ne henduen pad ne naalimukawan si Pidru, ne migkahi sikandin, “Kunteen ku pad nataheyi ne malehet bes iya ne migpeuyan ka Magbebeye te panalihan din eyew te pegluwas keddi puun ki Hirudis wey diye te langun ne planu te me pangulu te Hudiyu ne eggimuwen dan perem.”

¹² Te naalimukawan e si Pidru, miggendiyad e sikandin te baley ni Mariya ne iney ni Huwan Markus. Ne masalig ne me etew ka nalibulung diye te kandan ne mig-ampu. ¹³ Ne migpanektek si Pidru diye te gumawan. Ne due suluhanen ne egngaranan ki Ruda ne eglulukat perem te gumawan. ¹⁴ Pegkeileyi rin te laheng ni Pidru, nalingawan din e te eglukat ka

gumawan tenged te kahale din, wey migpallahuy e sikandin ka mignangen te diyad e te lihawangan si Pidru. ¹⁵ Ne migkahiyan dan si Ruda, “Egkeungel kad!” Piru egkanasnasion si Ruda ka egmemalehet, purisu migkahi e sikandan, “Panalihan buwa ni Pidru ka due.”

¹⁶ Ne si Pidru degma, egkalihet e ne egpanektek. Ne hengkayi te miglukatan dan e ka gumawan, nawan-galan sikandan te pegkakita ran ki Pidru. ¹⁷ Piru migtingyasan sikandan ni Pidru te singkalahan, kene kew lalag. Ne dutu, migpang-guhuran e sikandan ni Pidru ke immenu sikandin te peg-palihawang te Magbebaise diye te prisuwan. Ne migkahi si Pidru, “Guhuri niyu degma si Santiyagu wey ka duma ne me suled ta meyitenged kayi.” Ne nataman, mig-awe e sikandin wey miggendiyad telein ne inged.

¹⁸ Te seeye ne maselem, nasamuk e ka me talagtameng te prisuwan su ware sikandan nakataha ke nekey ka neyitabu ki Pidru. ¹⁹ Ne puun dutu, migsuhu si Hirudis ne igpepammitew si Pidru, piru ware dan nakita. Purisu impeinsaan e ka me talagtameng, ne nataman, impeyimatayan din e.

Nataman, mig-awe e si Hirudis te Hudiya ne miggendiyad te Sisarya, ne diye sikandin mig-ugpe te bayew naluhay.

Ka pegpatey ni Hirudis
²⁰ Na, si Hari Hirudis, amana nabelu te matig-Tiru wey te matig-Sidun. Purisu, nasabeka ka me etew ne egpakighusey te Hari, piru ka an-anayan ne innimu ran, in-alukuy pad nikandan si Blastu eyew egbulig kandan su iyan sikandin sinalihan te palasyu te Hari. Nataman, imparaniyan dan ka Hari te migpakighusey, tenged su ka me lungsud dan, diye de egkuwa te egkakeen te kandin ne nasud.

²¹ Te pegginguma te aldew ne egpakigkite e si Hari Hirudis te matig-Tiru wey te matig-Sidun, migsaluub sikandin te kumbale din te pegkahari wey migpinnuu diye te trunu rin. Nataman, miglalag e sikandin diye te me etew. ²² Ne migbalbalukan ka me etew ne migkahi, “Kenad ne etew ka miglalag su maname e.” ²³ Due-rue ne miglegparan te panalihan te Magbebaise si Hirudis su ware din tahura ka Manama. Nataman, mig-uleran e sikandin wey migpatey.

²⁴ Piru nakapabulus nekeempet ka lalag te Manama wey masalig ka nakapalintutuu.

²⁵ Ne ensi Birnabi wey si Saulu, mig-uli e sikandan puun te Hirusalim su neimpusan dan e ka impeyimu kandan, wey induma ran si Huwan Markus.

13

Birnabi wey si Saulu

¹ Seini ka me talagpanulu diye te punduk te migmalintutuu te Antiyukiya: si Birnabi, si Simun ne egimuan te Nigru, si Lusyu ne matig-Sirini, si Manain ne diye migtulin te engki Gubirnadur Hirudis, wey si Saulu. ² Due sabeka ne aldew ne taheed te migsimba sikandan te Magbebeye wey migpuasa, migkahiyan sikandan te Panisingan te Manama, "Ilein niyu ensi Birnabi ki Saulu su eyew egpekeyimu sikandan te igpeyimu ku kandan." ³ Ne migpuasa wey mig-ampu sikandan, wey migtel-eban dan e ensi Birnabi ki Saulu te me belad dan. Nataman, impeyipanew ran e sikandan.

Ka pegwali enni Birnabi ki Saulu diye te Sipri

⁴ Purisu nangipanew e ensi Birnabi ki Saulu ka insuhu te Panisingan te Manama peendiye te Siliusya. Ne puun dutu, nanguntud e sikandan te barku peendiye te Sipri ne pulu te dahat.

⁵ Te pegginguma ran diye te siyudad te Salamis, impang-guhud dan e man-e ka lalag te Manama diye te me simbaan te me Hudiyu. Ne si Huwan Markus ka egbulig-bulig te egimuwen dan.

⁶ In-empet dan ka pulu te dahat te miggendiye taman te nekeuma sikandan diye te Papus. Ne diye dan nalambag ka salamangkiru ne si Bar-Hisus. Hudiyu sikandin ne mig-angken ne prupita

kun te Manama, piru kene ne malehet. ⁷ Alukuy sikandin ni Sirgiyu Paulu te matagseb ne etew wey gubirnadur te seeye ne pulu. Impeumew ni Sirgiyu ensi Birnabi ki Saulu su egkeupian sikandin ne egpammineg te lalag te Manama. ⁸ Piru migbal-abahan sikandan ni Ilimas ne salamangkiru (si Ilimas ka ngaran ni Bar-Hisus te linalahan te Grigu), su iyan din igkeupii ne kene egpakapalintutuu ka gubirnadur. ⁹ Ne si Saulu ne egngararanan degma ki Pablu ne napenu te Panisingan te Manama, immemetmetan din te egtetengteng ka salamangkiru ¹⁰ te migkahi, "Anak ka ni Meibulan! Kuntere ka te langun ne matareng. Layun kad egpan-limbung wey eg-uubat, wey ka kamalehetan ne egpuun te Magbebeye, layun nu eggimuwa ne ubat. ¹¹ Ne kuntee, eglegparan ka te Magbebeye, bayew egkaluhay ne kene ka egpakkita te kalayag te aldew."

Ne sahuhune ne migmarusilem ka pegtenteng ni Ilimas, wey nakapanamsam naan de sikandin ka egpam-mitew te egkitkit kandin. ¹² Nakapalintutuu e ka gubirnadur te pegkakita rin te neyitabu, wey nawanganan sikandin te pegpanulu meyitenged te Magbebeye.

Ka pegginguma enni Pablu diye te Pisidiya

¹³ Nataman, nanguntud e te barku ensi Pablu puun

te Papus peendiye te siyudad te Pirga ne sakup te Pampilya. Ne si Huwan Markus, migsuwey e mule kandan ne miglibed diye te Hirusalim.¹⁴ Puun te Pirga, nangendiyad e sikandan te Antiyukiya ne sakup te prubinsya te Pisidiya. Pegginguma te Aldew te Peggimeley, naneled e sikandan diye te simbaan te me Hudiyu wey naminuu e diye.¹⁵ Te nakapenge e ka migbasa te Balaud ni Muwisis wey te sinulat te me prupita, impasuhuan e te me upisyal te simbaan te Hudiyu ensi Pablo te miggendue, "Me suled, ke due igkalalag niyu ne epakabagget te me etew, egkaayun ne epakalalag kew."

¹⁶ Ne migsasindeg si Pablo ne migtingyas pinaahi te belad din diye te kandan ne migkahi, "Kabuhalan ni Israil, wey sikaniyu se kene ne me Hudiyu ne due pegkaaldek te Manama: pammineg kew keddi!¹⁷ Ka Manama te kabuhalan ni Israil ka mig-alam te kaap-apuan ta, wey ka migpeyibuhal kandan wey migpanalangin kandan te diye pad sikandan te Ihiptu. Ne pinaahi te karesen din, impaawe din sikandan diye te Ihiptu.¹⁸ Ne seled te hep-at ne pulu (40) ne leg-un, naantus te Manama ka pegsukul ran kandin diye te mammara ne inged ne kene egkeugpaan.¹⁹ Ne due

imparereetan din ne pitu ne nasud diye te Kanaan, wey iyan din e impakamkamuney te seeye ne tane ka keetetawan din²⁰ seled te me 450 ne leg-un.

"Te pegkeimpus dutu, migbehayan din e sikandan te talaggukum taman te timpu ni prupita Samwil.²¹ Nataman, migbuyu e man-e sikandan te Hari, ne imbehayan sikandan te Manama ki Saulu ne anak ni Kis ne kabuhalan ni Binhamin eyew iyan eghari diye te kandan seled te hep-at ne pulu (40) ne leg-un.

²² Ne hengkayi te impaawe e sikandin te Manama, si Dabid e man-e ka innimu te Manama ne Hari dan. Seini ka ingkahi te Manama meyitenged kandin, 'Nakita ku ne si Dabid ne anak ni Hisi, epakapahale keddiey. Egtumanen din ka langun ne igpeyimu ku kandin.'

²³ Ka kabuhalan ni Dabid ne egngaranan ki Hisus, ka in-alam te Manama eyew te pegluwas te me kabuhalan ni Israil sumale te insaad din.²⁴ Te ware pad migbunsud si Hisus te himu rin, tapey e migwali si Huwan diye te langun ne kabuhalan ni Israil meyitenged te peg-inniyug te salewey te pegpabewutismu.

²⁵ Ne hengkayi te mahaan e egkapenga ka himu ni Huwan, mig-insaan din e ka me etew, 'Diye te sumansuman niyu, hentew e buwa? Su kene ne sikeddiey ka egtetaharan niyu. Piru due epakasinundul keddi,

ne minsan se peggekad te sandal din, kena a ne likes.'

²⁶ "Me suled ku, sikaniyu se me kabuhalan ni Abraham wey sikaniyu degma se me duma ne due pegkaaldek te Manama, sikanta ka impeuyanan te seini se guhuren meyitenged te kaluwasan!

²⁷ Su ka matig-Hirusalim, wey ka me pangulu ran, ware nekeila ne si Hisus ka Manluluwas. Ware mane sikandan nakasabut te inlalag te me prupita ne egbaseen dan te tagse Aldew te Peggimeley. Piru sikandan de iya ka nakapatuman te ingkahi te me prupita te pegpeyimatey ran ki Hisus.

²⁸ Ne minsan ware malehet ne katarengan ne nakita ran eyew egkeyimatayan dan si Hisus, piru imbuu dan iya ki Pilatu ne egpeyimatayan si Hisus. ²⁹ Te natuman e nikandan ka langun ne nasulat te Kasulatan meyitenged kandin, ingkuwa ran e ka lawa ni Hisus diye te krus wey inluglug dan e sikandin diye te inlungahan ne dalama.

³⁰ Piru in-uyag sikandin te Manama puun te kamatayen. ³¹ Ne migpakita pad sikandin te masalig ne aldew diye te me etew ne migdumarama kandin dengan puun te Galiliya peendiye te Hirusalim. Ne sikandan kuntee ka talagpamalehet te me kabuhalan ni Israil meyitenged kandin. ³² Ne miggendini key kuntee eyew te pegpangguhud kaniyu te Meupiya ne Panugtulen ne

ka insaad te Manama diye te me kabuybuyahan ta, ³³ intuman din kayi te kanta te me kabuhalan dan pinaahi te peg-uyag ki Hisus. Seini ka nasulat te igkarangeb ne Salmu ne miggendue: 'Anak ku sikeykew; Ne kuntee, igpanengneng ku ne amey ad e nikeykew.'

³⁴ Tapey e migsaad ka Manama ne eg-uyahen din si Hisus ne kene egkamewu se lawa. Migkahi sikandin, 'Igbehey ku keykew ka matulus wey malehet ne panalangin ne insaad ku ki Dabid.'

³⁵ Ne sumale degma te nasulat diye te lein ne baad te Salmu ne miggendue, 'Kene nu ituhut ne egkamewu ka lawa te matulus ne suluhuanen nu.'

³⁶ Te natuman e ni Dabid ka impeyimu te Manama kandin te kandin ne timpu, migpatey e sikandin wey diye ilebeng te kakiliran te lebeng te kaapuan din. Ne ka lawa rin, namewu e. ³⁷ Piru seeye se in-uyag te Manama, ware namewu. ³⁸ Purisu me suled ku, igpannguhud ney kaniyu ne pinaahi ki Hisus, egkapasaylu te Manama ka me sale ta. ³⁹ Ka minsan hentew ne egpalintutuu kandin, eg-isipen te Manama ne matareng. Ne sika, kene niyu egkeyimu pinaahi te pegtuman te Balaud ni Muwisis. ⁴⁰ Purisu tanud-tanud kew eyew kene egkeyitabu diye te kaniyu ka inlalag te me prupita ne miggendue,

41 'Pitew kew, sikaniyu se me lemeten! Egkeinu-inu kew, ne egkataman, egpatey kew.

Te kaniyu ne timpu, due eggimuwen ku ne kene kew egpakapalintutuu minsan ke due egpasabut kaniyu.'

42 Te peglihawang enni Pablu ki Birnabi diye te simbaan, inninggat sikandan te me etew ne egpaliberen te seup ne Aldew te Peggimeley eyew te egpanulu kandan.

43 Te nakalihawang e ka me etew, masalig ka me Hudiyu wey ka kene ne me Hudiyu ne neuyan te pegpalintutuu te me Hudiyu, ne migsundul engki Pablu wey ki Birnabi. Ne dutu, miglalahsan sikandan te me apustulis wey imbagget ne keilangan ne egpabulus sikandan ka eggalig te keupiya wey keyidu te Manama.

44 Te seup ne Aldew te Peggimeley, hapit e egkaamin ka me etew diye te siyudad ka miglibulung eyew te pegpammineg te lalag te Magbebabe. **45** Te pegkakita te pangulu te me Hudiyu ne amana masalig ka me etew, neimme e sikandan wey in-apul ran e ka inlalag ni Pablu, wey inlemetan dan e sikandin. **46** Piru nasi de iya ne migmabulut ne eglalag ensi Pablu ki Birnabi ne migkahi, "Keilangan iya ne sikaniyu ka miggunaan pangguhuri te lalag te Manama. Piru tenged su ware niyu ma sahipaa, ne seini

migpeila ne kene kew ne likes ne egbehayan te umul ne ware egtamanan. Purisu, puun kuntee, eggendiye key e te kene ne me Hudiyu. **47** Su seini ka insuhu te Magbebabe kanami:

'Intahu ku sikeykew ne kalayag para te kene ne me Hudiyu,

Eyew pinaahi keykew, egginguma ka kaluwasan minsan diye te kataamanan te kalibutan.'

48 Ne nahale-gale ka kene ne me Hudiyu te narindeg dan seeye, ne migkahi sikandan, "Mateles amana ka lalag te Magbebabe." Ne migpalintutuu e seeye se naalam para te umul ne ware egtamanan.

49 Ne ka lalag te Magbebabe, nekeempet te seeye ne inged. **50** Piru intipu te me Hudiyu ka me pangulu te seeye ne siyudad duma te talahuren ne me malitan ne migpamakey te Manama, ne eyew egpakigkuntere e engki Pablu ki Birnabi, ne nataman, impepaawe e sikandan te seeye ne inged.

51 Impelpel enni Pablu ki Birnabi ka alinepung diye te paa ran, isip palinneu ne ware ikahale te Manama ka me mahinged dutu. Nataman, miggendiyad e sikandan te Ikuniyu. **52** Ne amana ne nahale ka me hibateen diye te Antiyukiya wey napenu degma sikandan te Panisingan te Manama.

*Diye te Ikuniyu ensi Pablu
wey si Birnabi*

¹ Diye te Ikuniyu, nangendiye ensi Pablu ki Birnabi te simbaan te me Hudiyu ne migwali te amana eg-pakasuhat. Ne puun te wali ran, amana ne masalig ka me Hudiyu wey ka kene ne me Hudiyu ne migpalintutuu ki Hisus. ² Piru intipu te me Hudiyu ne ware migpalintutuu seeye se kene ne me Hudiyu eyew egkabelu degma sikandin te me suled ne migmalintutuu. ³ Ne naluhay pad mig-ugpe ensi Pablu wey si Birnabi dutu ka egwali te ware pegkaaldek meyitenged te Magbebabe. Impamalehetan te Magbebabe ka impanulu dan meyitenged te keupiya wey keyid-u rin pinaahi te pegbehey rin kandan te geem te peggimu te me kein-inuwan wey te me palinneu. ⁴ Piru nabaad ka me etew diye te siyudad su ka duma diye miglapig te me Hudiyu, ne ka duma degma diye migdapig te me apustulis.

⁵ Migplanu ka me Hudiyu wey ka kene ne me Hudiyu duma te me pangulu ran ne egpasakitan dan ka me apustulis wey egbebatuwen dan. ⁶ Piru nanengnengan te me apustulis ka planu ran, purisu migpallahuy e sikandin diye te siyudad te Listra wey Dirbi, ne sakup te Likaunya, wey diye te nakaalingkus ne me inged. ⁷ Ne diye, migwali mane sikandin te Meupiya ne

Panugtulen.

Diye te Listra wey te Dirbi

⁸ Due lukes ne pungku ne diye mig-ugpe te Listra. Ne kene egpekeyipanew sikandin puun te pegkeetew rin. ⁹ Migpammineg sikandin ki Pablu te miglalag. Ne migmemetmetan sikandin ni Pablu, wey nakita ni Pablu ne egpalintutuu sikandin ne egkeulian. ¹⁰ Purisu migkahiyen sikandin ni Pablu te meemen, “Tigkew ka sasindeg!” Ne migtigkantigkan migsasindeg ka etew wey miggiphapanew. ¹¹ Te pegkakita te masulug ne me etew te innimu ni Pablu, migbalbalukan e sikandin te kandan ne linalahan ne Likaunyahen, “Migpamanueg kayi te kanta ka me manama ne impeiling te ulaula te etew!” ¹² Ne ingngengararan e sikandin te me ngaran te me manama ran. Iyan igngaran ki Birnabi si Siyus, ne si Hirmis ka ki Pablu su sikandin ma ka tigwali. ¹³ Ka timplu te manama ran ne si Siyus, marani re diye te lihawangan te siyudad. Purisu, ka pari ni Siyus, mig-uyan te me turu ne baka wey me bulak diye te gumawan te siyudad su egkeupian sikandin duma te me etew ne egpanubad diye te me apustulis.

¹⁴ Te pegkanengnengi enni Pablu ki Birnabi te iling due ka eggimuwen dan, inggisi dan e ka me kumbale dan

te pegkalaggew, wey migpalahuy sikandan diye te taliware te me etew ne migbalbalukan ne migkahi,¹⁵ “Me suled, mania te eggimu kew te iling kayi? Sikanami seini, etew re degma iling kaniyu! Miggendini key kayi ka egpangguhud te Meupiya ne Panugtulen su eyew eginniyuhan niyud ka ware karuan ne me himu niyu. Parani kew te manekal ne Manama ne iyan miggimu te langit wey te tane, te dahat, wey te langun ne nakatahu kayi.¹⁶ Dengan ne timpu, intuhutan te Manama ka langun ne etew ne eggimu te igkeupii ran.¹⁷ Piru migpeila pad ka Manama diye te me etew pinaahi te meupiya ne himu rin. Migbehayan kew nikandin te uran wey te egkahaani te eleg ne timpu; migbehayan kew degma nikandin te egkakeen wey migbehayan kew te kahale.”¹⁸ Piru minsan inlalahian e sikandan te me apustulis, kene iya perem eg-engked ka me etew ne eggilang te me baka ne igpanubad diye te kandan.

¹⁹ Ne due me Hudiyu ne nanginguma puun diye te Antiyukiya ne sakup te Pisidiya. Ne ka duma diye egpuun te Ikuniyu. Miglalahian nikandan ka me etew taman te migpalintutuu e kandan. Puun dutu, imbatu ran e si Pablu wey ingganuy diye te lihawangan te siyudad su kahiyan dan ne migpatey e sikandin.²⁰ Piru

te inlibulungan e sikandin te egmalintutuu ki Hisus, mig-enew e sikandin wey miglibed ded diye te siyudad. Te pegkapawe, miggendiyad e sikandan ki Birnabi te Dirbi.

Ka peglibed diye te Antiyukiya ne sakup te Siriya

²¹ Ne migwali te Meupiya ne Panugtulen ensi Pablu wey si Birnabi diye te Dirbi, wey masalig ka migpalintutuu ki Hisus. Nataman, miglibed e man-e sikandan diye te Listra, diye te Ikuniyu, wey diye degma te Antiyukiya ne sakup te Pisidiya.²² Inlig-en dan ka migmalintutuu wey imbagget ne egpabulus ne egikul te kamalehetan. Impanulu dan pad man-e sikandan te miggendue, “Keilangan ne masalig ka me keyirapan ne egkabayaan ta eyew egpakaseled ki te Migharian te Manama.”²³ Si Pablu wey si Birnabi ka mig-alam te eggimuwen ne ighbuyag te tagse punduk te migmalintutuu. Mig-ampuan dan wey migpuasaan dan ka naalam dan, nataman imbehey ran e diye te Magbebeye ne insalihan dan.

²⁴ Ne diye migbaye sikandan te Pisidiya, nataman, nangendiyad e sikandan te Pampilya.²⁵ Ne inwali ran ka lalag te Magbebeye diye te Pirga, nataman, miggendiyad e sikandan te Atalya.²⁶ Ne puun dutu, mig-untud e man-e sikandan te barku ne eglibed diye

te Antiyukiya, ka inged ne migligkatan dan. Su dengan, mig-ampuan sikandan te migmalintutuu diye te Antiyukiya ne egbulihan sikandan te Manama te eggimuwen dan, ne kuntee, napenga ran e.

²⁷ Te pegginguma ran diye, impalibulung dan ka punduk te migmalintutuu wey impangguhuran dan te langun ne innimu te Manama pinaahi kandan, wey ka paahi te Manama ne nakapalintutuu degma ka kene ne me Hudiyu. ²⁸ Ne naluhey pad sikandan ka mig-ugpe diye duma te me hibateen.

15

Ka kalibulungan diye te Hirusalim

¹ Due me etew ne miggingga diye te Antiyukiya ne diye egpuun te Hudiya ne migpanulu te me suled ne migmalintutuu. Migkahi sikandan, "Kene kew egkaluwas ke kene kew egyptuli sumale te insuhu te Balaud ni Muwisis." ² Amana migsupak ensi Pablu ki Birnabi meyitenged kayi, purisu neuyunan ne si Pablu ki Birnabi wey ka duma ne migmalintutuu diye te Antiyukiya ka egpeendiyeen te Hirusalim eyew egpakigkitaa te me apustulis wey te me pangulu diye meyitenged te seini ne prublima.

³ Purisu impeyipanew e sikandan te seeye se punduk te migmalintutuu.

Te pegbaye dan diye te prubinsya te Pinisiya wey te Samarya, impangguhuran dan e sikandan meyitenged te kene ne me Hudiyu ne migpalintutuu e te Manama. Ne seeye, amana nakapahale te me suled te pegpalintutuu diye.

⁴ Te pegginguma enni Pablu diye te Hirusalim, insagsahipe sikandan te migmalintutuu diye, te me apustulis, wey te me igbuyag te simbaan. Migpangguhuran dan sikandan te langun ne innimu te Manama pinaahi kandan. ⁵ Piru due migmalintutuu ne sakup te Parisiyu ne migsasindeg ne migkahi, "Keilangan ne egtulian ka kene ne me Hudiyu wey egyptumanen te Balaud ni Muwisis."

⁶ Ne miglibulung ka me apustulis wey ka me igbuyag te migmalintutuu eyew te peggusey dutu. ⁷ Te nakapenge e sikandan ka migpaapuley te malmalayat, migsasindeg e si Pidru ka migkahi, "Me suled, naneng-nengan niyud ne in-alam a te Manama dengan kayi te kaniyu eyew te pegpanulu te Meupiya ne Panugtulen diye te kene ne me Hudiyu eyew egpakarineg degma sikandan wey egpakapalintutuu. ⁸ Ka Manama ne nakataha te suman-suman te me etew, ka migpakita ne indawat din degma ka kene ne me Hudiyu tengedsu imbehayan din sikandan te Panisingan din iling te pegbehey rin

dengan kanta. ⁹ Nekegiling de ka pegtenteng te Manama kanta te me Hudiyu wey diye te kandan te kene ne me Hudiyu; miglinisan din ka me pusung dan su migpalintutuu ma sikandan. ¹⁰ Ne kuntee, mania te egel-elehan niyu ka Manama pinaahi te pegpatiang niyu te mabehat te migmalintutuu? Su minsan sikanta wey ka me kaapuan ta, ware nekeeleg due! ¹¹ Piru migpalintutuu ki mule ne naluwas ki pinaahi te keupiya wey keyid-u kanta te Magbebaise ne si Hisu Kristu, ne iling naan ded degma ka kene ne me Hudiyu.”

¹² Ne migpeeneng-eneng ka langun ne nanlibulung dutu te pegpangguhud enni Pablu ki Birnabi meyitenged te me palinneu wey ke kein-inuwan ne innimu te Manama diye te kene ne me Hudiyu pinaahi kandan. ¹³ Te nakapenge e sikandan ka migpangguhud, migkahi e degma si Santiyagu, “Me suled ku, pammineha a! ¹⁴ Nahuhud e ni Simun ka an-anayan ne pegpapitew te Manama te hid-u rin diye te kene ne me Hudiyu pinaahi te peg-alam din te me etew ne egpuun diye te kandan ne neyimu ne kandin ne keetetawan. ¹⁵ Ne seini iya ka inlalag te me prupita dengan, su sumale te ingkahi te Kasulatan ne miggendue: ¹⁶ ‘Pegkapenga kayi, eglibed a, wey ebalbalawan ku te

egpes-ek ka nahuhus e ne baley ni Dabid. Egbalbalawan ku man-e te egpes-ek wey igpasasindeg, ¹⁷ eyew ka duma ne me etew, egpammitew te Magbebaise, wey ka langun ne kene ne me Hudiyu ne in-umew ku, egkeyimu ne keetetawan ku. ¹⁸ Seini iya ka ingkahi ku ne naluhey ku re ipataha,’ kahi te Magbebaise.”

¹⁹ Ne migpabulus si Santiyagu ka migkahi, “Ka keddiey mule, sika se kene ne me Hudiyu ne migpalintutuu te Manama, kene tad egpabehatan. ²⁰ Meupiya pad ke egsulatan ta sikandan ne kene egpakeenen te keenen ne impanubad e diye te me diyus-diyus, wey kene degma egpeyibilabetey ka kene ne alunggun. Kene man-e egpakeenen te langesa wey te ngalap ne nehet. ²¹ Su puun pad dengan, egbaseen e ka Balaud ni Muwisis diye te me simbaan te tagse Aldew te Peggimeley, ne ka lalag din inwali e diye te tagse siyudad.”

Kasulat para te kene ne me Hudiyu

²² Nataman, nenekegsabut ka me apustulis, ka me igbuyag dan, wey ka langun ne migmalintutuu ne egalam te etew diye te kandan ne igpeendiye te Antiyukiya duma engki Pablu wey ki Birnabi. Ne iyan dan naalam

ensi Hudas ne eg-anggaan ki Barsabas wey si Silas. Seini se daruwa, amana tahura te me suled te pegpalintutuu.²³ "Sikanami se me apustulis wey me ighbuyag te migmalintutuu, migpangemusta key kaniyu te me suled ney ne kene ne me Hudiyu diye te Antiyukiya, diye te Sirya, wey diye te Silisya.²⁴ Nakarineg key te due me etew ne kayi egpuun te kanami ne miggendue te kaniyu wey migpanulu te nakasamuk kaniyu wey nakalibeg kaniyu. Piru ware ney suhua sikandan ne egpeenduenen eyew epanulu te iling due.²⁵ Purisu miglibulung key wey nenekegsabut ne egalam te me etew ne igpeuyan diye te kaniyu, ne imparuma ney engki Birnabi wey ki Pablu te inggeyinawaanta ne me suled ta.²⁶ Amana migrantus ensi Birnabi ki Pablu ka egpamakey te kanta ne Magbebaye ne si Hisu Kristu, minsan ke eggimatayan perem sikandan.²⁷ Purisu, igpeuyan ney due te kaniyu ensi Hudas ki Silas eyew sikandan mismu ka egpangguhud kaniyu te tahu te seini ne sulat.²⁸ Nenekegsabut key duma te bulig te Panisingan te Manama ne kene kew egpeyibehatan angin e te seini ne me balaud:²⁹ Kene kew keen te inhalad e diye te me diyus-diyus, wey kene

kew keen te langesa, wey te ngalap ne neehet, wey kene kew peyibhilabetey ka kene ne alunggun. Meupiya ke egpaketariyu kew te iling kayi. Kayi re taman."

³⁰ Nataman, nangipanew e ka me etew ne impeendiye dan. Te pegginguma ran diye te Antiyukiya, inlibulung dan ka migmalintutuu wey imbehey ran e ka sulat.³¹ Nabagget wey nahale ka matig-Antiyukiya te pegbasa ran te seeye ne sulat.

³² Si Hudas wey si Silas, me prupita sikandan. Ne imbagget dan wey inlig-en ka me suled te pegpalintutuu.³³⁻³⁴ Pegkapenga te pila ne me aldew te peg-ugpe dan diye, impepaligkat e sikandan te me suled te pegpalintutuu te migkahi, "Ayadayad kew ma." Nataman miglibed e sikandan diye te migpeuyan kandan.*

³⁵ Ne mig-ugpe pad te naluhay-luhay ensi Pablu ki Birnabi diye te Antiyukiya. Ne migpanulu sikandan duma te masalig ne etew wey migwali te lalag te Magbebaye.

Nekegsuwey si Pablu ki Birnabi

³⁶ Te peglihad te pila ne aldew, migkahiyan e ni Pablu si Birnabi, "Kuwa kad su egliberan ta wey egpanumbalan ta ka me suled ta te pegpalintutuu

* **15:33-34** Due me sinulat ne inlagkes ka birsikulu 34 piru ware seini diye te malehet ne migpuunan. Intimul naan de seini ne miggendue: Piru si Silas, impalunggehaat pad mule.

diye te tagse siyudad ne nawaliyan ta te lalag te Magbebaye wey egnengnengan ta ke nekey e sikandan.”³⁷ Ne igkeupii ni Birnabi ne egdumeen din si Huwan Markus.³⁸ Piru kene eguyun si Pablu ne egdumeen si Huwan Markus su dengan te duma ran pad sikandin te himu, mig-engkeran sikandan ni Huwan Markus diye te Pampilya.³⁹ Ne puun dutu, nekeg-apul amana ensi Pablu ki Birnabi wey nataman, nekegsuwey e sikandan. Ne indume e ni Birnabi si Markus te miguntud te barku peendiye te Sipri.⁴⁰ Piru si Silas mule ka in-alam ni Pablu. Nataman, in-ampuan e sikandan te me suled te pegpalintutuu eyew egkabulihan sikandan te Magbebaye, nataman miggiapanew e sikandan.⁴¹ Diye migbaya ensi Pablu te Siriya wey te Silisya wey inlig-en din ka migmalintutuu diye.

16

Ka pegduman ni Timutiyu ki Pablu wey ki Silas

¹ Migpabulus ensi Pablu ka miggipanew peendiye te Dirbi wey diye te Listra. Ne due hibateen diye ne enggaranan ki Timutiyu; Hibruwanen ka iney rin ne migpalintutuu degma, piru Grigu ka amey rin.² Indayan sikandin te me suled te pegpalintutuu diye te Listra wey diye te Ikuniyu.³ Egkeupian si Pablu ne

egdumeen din si Timutiyu, purisu intuli din. Innimu rin seini su nakataha ka langun ne me Hudiyu ne migugpe diye, ne Grigu ka amey ni Timutiyu.⁴ Diye te me siyudad ne nangendiyaan dan, impasabut dan te migmalintutuu ka me balaud ne nasabekaan te me apustulis wey me igbuyag diye te Hirusalim ne igpatuman te migmalintutuu.⁵ Purisu nalig-en ka pegpalintutuu te seeye se punduk te migmalintutuu wey tagse aldew ne egkatimulan ka kasuluhan dan.

Ka taheinep ni Pablu diye te Truwas

⁶ Nataman, miggendiyad e man-e sikandan te me inged ne sakup te Prigya wey te Galasya su ware sikandan tuhuti te Panisingan te Manama ne eggendiye te prubinsya te Asya ka egwali.⁷ Te pegginguma ran diye te eletanan te inged ne enggaranan te Misya, eggendiyad e perem sikandan te prubinsya te Bitinya, piru ware tuhuti sikandan te Panisingan ni Hisus.⁸ Purisu migbaya naan de sikandan diye te prubinsya te Misya wey migpatupang e diye te siyudad te Truwas.⁹ Te seeye ne marusilem, hendue te impataheinep si Pablu te Manama, ne due sabeka ne lukes ne matig-Masidunya ne migsasindeg ne mighangyu kandin ne miggendue, “Hendini ke pa te Masidunya wey bulihi key!”¹⁰ Ne puun

te impakita ki Pablu, due-rue ne migpangandam key ka eggendiye te Masidunya, su nakataha key ne in-alam key te Manama eyew te pegwali te Meupiya ne Panugtulen diye te kandan.

*Ka pegpalintutuu ni Lidya
diye te Pilipus*

¹¹ Ne puun te Truwas, mig-untud key e man-e te barku ne mgleus diye te Samutrasya. Te seup ne aldew, diye key e te Niyapulis. ¹² Ne puun dutu, miggendiye key e man-e te Pilipus, ka kinarakelan ne siyudad te an-anayan ne distritu te Masidunya ne sakup ded degma te Ruma. Ne diye key pad mig-ugpe seled te pila ne me aldew. ¹³ Te Aldew te Peggimeley, nanlihawang key diye te siyudad wey nangendiye key te ilis te weyig, su isip ney ne due inged diye ne ampuanan. Ne naminnuu key seini wey migpakiglag te me malitan ne miglibulung iya diye. ¹⁴ Si Lidya ne matig-Tiyatira ka duma te seeye se migpammineg kanami. Talagpamelegye sikandin te me manggad ne ubi se batek. Migpamekey sikandin te Manama wey inlukatan te Magbebaye ka pusung din eyew egdawaten ka inwali ni Pablu. ¹⁵ Nataman, migpabewutismu e sikandin duma te langun ne mig-ugpe diye te kandan. Ne inningat key e nikandin te miggenendue, "Emun ke in-isip a nikaniyu

ne malehet ka pegpalintutuu ku te Magbebaye, diye kew ubag girehe te baley ku." Ne impehes key nikandin.

*Ka pegkaprisu enni Pablu
wey ni Silas*

¹⁶ Sabeka ne aldew te peggendiye ney te inged ne ampuanan, due sabeka ne uripen ne mengebay ne migsinug-ung kanami ne migserapan te mareet ne panisingan. Ne iyan din himu ka egpanagne ke nekey ka egginguma. Ne tenged te pegpanagne din, nakaseleppi amana ka me ahalen din. ¹⁷ Ne migsinundul sikandin kanami ki Pablu ka egpanguleyi ne eggenendue, "Ka seini ne me etew, uripen te Amana ne Maresen ne Manama! Egpanuluun kew nikandan ke egmenuwen te egkaluwas." ¹⁸ Ne tagse aldew, seeye ka eggimuwen din taman te napelaan e si Pablu. Purisu miglilingey sikandin ka migkahi diye te mareet ne panisingan, "Te ngaran ni Hisu Kristu, awe ka due te kandin!" Te sikan de, miglihawang e ka mareet ne panisingan.

¹⁹ Pegkanengnengi te ahalen te mengebay ne kenad e egpakaseleppi sikan dan, indakep dan e ensi Pablu ki Silas, wey ingganuy ran diye te tangkaan te me upisyal diye te palingki. ²⁰ Ne hengkayi te in-uyan e sikan dan diye te me talaggukum ne Rumanhun, migkahi ka mig-uyan kandan, "Ka seini ne me etew, me Hudiyu ne

mig-uyan te kasamuk kayi te kanta ne inged.²¹ Egpanulu sikandan te pegbebasan ne supak te kanta ne balaud. Sikanta, me Rumanhunki, ne ingkene kanta ka pegdawat wey peg-ikul te kandan ne me pegbebasan!"²² Ne migsabeka ka me etew ne egpakig-ehet engki Pablu ki Silas. Ne migsuhu ka me pangulu ne igaahisi ka kumbale enni Pablu ki Silas wey egpalampesan sikandan.²³ Te pegkapenga lelampsesi sikandan te masumpit, hendum pad prisuwa duma te pegpaney-paney ne egpaayayaran sikandan egpata-mengi.²⁴ Purisu impaseled sikandan te talagtameng diye te kinaledleran e te prisuwan ne intipil te kayu ka me paa ran.

²⁵ Ne hengkayi te egliware e te marusilem, migampu wey mig-ulahing ensi Pablu ki Silas te pegdayan te Manama. Ne ka me duma ran te me pinirisu, migpammineg de kandan.²⁶ Ne dutu, sahuhune ne miglilinug te makeseg wey nawelwel ka prisuwan, ne sikan de nallukatan ka me gumawan te prisuwan wey nenapekas e ka me keddina te langun ne me pinirisu.²⁷ Nekeyimata ka talagtameng te prisuwan wey te pegkakita rin ne nallukatan e ka me gumawan, kahiyan din ne nakalihawang e ka me pinirisu. Purisu ingkulabut din e ka kampilan din su egluhe e sikandin.²⁸ Piru

migpanguleyi si Pablu ka migkahi, "Kene ka luhe! Seini key red langun te seled!"

²⁹ Ne dutu, migpakuwa te sulu ka talagtameng wey migdagdahew sikandin migseled wey migpanimbuel diye te tangkaan enni Pablu ki Silas ne migkelkel.

³⁰ Nataman, induma rin e ensi Pablu diye te lihawangan wey mig-insaan din e ne miggendue, "Nekey ka eggimuwen ku eyew egkaluwas a?"

³¹ Ne migtabak sikandan, "Palintutuu ka wey salig ka te Magbebaye ne si Hisus eyew egkaluwas ka wey ka me pamilya nu."³² Nataman, migwaliyan dan e sikandin te lalag te Manama duma te langun ne diye te baley rin.

³³ Te seeye ne uras te karusileman, miglu-luan te talagtameng ka me pali dan wey te seeye ne timpu, migpabewutismu sikandin duma te pamilya rin.³⁴ Te pegkapenga dutu, in-uyan din e ensi Pablu diye te baley rin wey impakeen. Nahale amana ka talagtameng duma te pamilya rin te duen e pegpalintutuu rin diye te Manama.

³⁵ Te pegkapawe, insuhu te me talaggukum ka me pulis ne egpalekaan e ensi Pablu.

³⁶ Ne impangguhuran e sikandan te talagtameng te prisuwan te egpalekaan e sikandan te me talaggukum, wey egpakalihawang e sikan-dan ne malinawen.

³⁷ Piru migkahiyan ni Pablu ka me upisyal te pulis, "Sikanami, narihistru key ma diye te Ruma, ne migpalampesan key te me talaggukum diye te tangkaan te me etew minsan ware nakita ran ne sale ney, wey impaprisu key pad man e. Ne kuntee, iggeles de nikandan ka pegpalihawang kanami? Kene egkaayun! Keilangan ne sikandan mismu ka me upisyal ne Rumanhun ka eggengkayi ne egpalihawang kanami!"

³⁸ Ne ingguhud e seeye te me pulis diye te me talaggukum, purisu naaldek e sikandan te pegkarineg dan ne narihistru bes ensi Pablu diye te Ruma.³⁹ Purisu nangendiye sikandan ne migbuyu te pasaylu engki Pablu. Nataman, impanulud dan e sikandan diye te lihawangan te prisuwan wey mighangyu kandan ne eg-awe e te seeye ne siyudad.⁴⁰ Te peglihawang e enni Pablu wey ni Silas diye te prisuwan, miggendiyad e sikandan te baley ni Lidya. Ne diye dan nallambag ka me suled te pegpalintutuu wey imbagget dan sikandan. Ne nataman, miggipanew e man-e ensi Pablu ki Silas.

17

Diye te Tisalunika

¹ Ne diye migbaye sikan-
dan te Ampipulis wey
diye te Apulunya taman
te Tisalunika. Ne diye te
Tisalunika, due simbaan

te me Hudiyu. ² Sumale te nabatasan din, migseled e man-e si Pablu diye te simbaan. Seled te tatelu e ne Aldew te Peggimeley, migwali sikandin te me etew ne iyan din inggamit ka diye te Kasulatan. ³ Impasabut din sikandan meyitenged te Kasulatan wey impamalehet din ne ka Kristu, keilangan ne eg-antus wey eg-uyahen puun te kamatayen. Migkahi sikandin, "Ka seini ne Hisus ne igwali ku kaniyu, iyan sika ka Kristu."⁴ Ne due me Hudiyu ne neuyan dutu wey mig-apil e te punduk enni Pablu ki Silas. Ne due mig-apil ne masalig ne me Grigu ne migpamekey e te Manama wey due degma me talahuren ne me malitan.

⁵ Piru, neimma ka me Hudiyu, purisu miglibulung sikandan te me etew ne mareet se batasan. Ne hengkayi se masalig e ka inlibulung dan, migbunsuran dan e te egsamuk ka siyudad. Inlusuran dan ka baley ni Hasun su ka tuyu dan ne eg-uyanan dan ensi Pablu wey si Silas diye te tangkaan te me etew. ⁶ Ne tenged su ware dan nakita ensi Pablu, si Hasun e mule duma te seeye se nasapenan dan ne me suled te pegpalintutuu ka ingganuy ran peendiye te me pangulu te siyudad. Ne migbalbalukan sikandan ka miggendiyad, "Seini ne me etew ka miggimu te kasamuk te minsan hendei ne egkeendiyaaan dan! Ne kuntee, kayid e sikandan

te siyudad ta. ⁷ Ne diye sikandan ipeugpe ni Hasun te baley rin. Migsupak sikandan langun te balaud te Impiradur su migkahi sikandan te due lein ne Hari ne migngaranan ki Hisus.” ⁸ Te pegkarineg dutu te me etew wey te me pangulu te siyudad, nasamuk e sikandan. ⁹ Te ware pad lekei te me pangulu ensi Hasun wey ka duma rin, impabayad pad sikandan ne hendue lekei.

Diye te Biry

¹⁰ Te seeye de ne karusileman, due-rue ne impeyi-panew te me suled te pegpalintutuu ensi Pablu ki Silas peendiye te Biry. Pegginguma ran diye, miggendiye sikandan te simbaan te me Hudiyu. ¹¹ Ne ka me etew diye, mewumel pad ka me suman-suman dan du te me etew diye te Tisalunika. Amana egkeupian sikandan ne egpammineg te igpanulu ni Pablu. Ne tagse aldew, egbaseen dan ka Kasulatan eyew egnengneng ke malehet naa ka impanlalag ni Pablu. ¹² Masalig diye te kandan ka migpalintutuu, wey minsan ka me lukes ne kene ne me Hudiyu wey ka me talahuren ne me malitan, migpalintutuu e degma. ¹³ Piru te pegkarineg te me Hudiyu diye te Tisalunika ne migwaliyan e degma ni Pablu te lalag te Manama ka Biry, miggendiyaan dan e sikandan wey intipu ran ka masulug ne me etew diye ne egpeyimuwen te samuk. ¹⁴ Te

sikan de, impeendiyad e te me suled te pegpalintutuu si Pablu te ilis te dahat. Piru migpalunggehaat de mule ensi Silas ki Timutiyu diye te Biry. ¹⁵ Seeye se me etew ne migpanulud ki Pablu, migduma pad kandin taman diye te siyudad te Atinas ne henduen pad ne miglibed diye te Biry. Migpanaha si Pablu kandan ne mahaan de egpasundula ensi Silas ki Timutiyu.

Diye te Atinas

¹⁶ Ne taheed te egtetahad si Pablu ki Silas wey ki Timutiyu diye te Atinas, nakita rin diye te siyudad ne amana ne masalig ka diyus-diyus, ne puun dutu, amana sikandin nalaggew. ¹⁷ Purisu, diye te simbaan te me Hudiyu, migpakig-apul sikandin te me Hudiyu wey te kene ne me Hudiyu ne egpamakey e te Manama, wey te me etew ne egpamayebaye diye te palingki te tagse aldew. ¹⁸ Due degma me talagpanulu ne me Ipikiriyu wey me Istuyku ne migpakig-apul kandin. Migkahi ka duma kandan, “Nekey-a ka igpasabut te seini se ubag kun matagseb?”

Ne kahi te duma, “Hendue te egwali sikandin meyitenged te me manama te lein ne inged.” Nalalag dan seeye tenged su migwali si Pablu meyitenged ki Hisus wey te peg-uyag te me minatey. ¹⁹ Ne puun dutu, mig-uyan dan e si Pablu diye te libulungan te me

pangulu ne egngaranan te Ariyupagu. Ne migkahi sikandan, "Egkeupian key ne epakanengneng te iyam ne pegpanulu ne impangguhud nu!"²⁰ Su lein ka impanulu nu wey iyam pad seini kayi te kanami, purisu egkeupian key ne epakanengneng ke nekey ka kaluwasan kayi."²¹ Su ka langun ne mahinged te Atinas wey ka me duma ne mig-ugpe diye, amana egkeupian ne egmekeglalag-lalag wey egmammineg te me iyam ne guhuren.

²² Nataman, migsasindeg e si Pablu diye te katangkaan te kunsiyal te Ariyupagu ne migkahi, "Me matig-Atinas! Nakita ku ne amana kew migpalintutuu te me manama.²³ Su te peghiphipanew ku kayi te siyudad niyu wey te pegtengteng ku te egsimbaan niyu, nakakita a te altar ne migsulatan te seini ne lalag, 'Para te Manama ne ware neila.' Ka sika se insimba niyu ne ware niyu neileyi ka igpeila ku kuntee kaniyu.²⁴ Ka Manama ne miggimu te kalibutan wey te langun ne nakatahu kayi, iyan sika ka Magbebaye ne Manama te langit wey te tane, ne ware mig-ugpe sikandin diye te timplu ne innimu re te etew.²⁵ Kene degma sikandin egkeilangan te minsan nekey ne egpuun te himu te etew, su sikandin ma mismu ka migbehey te umul diye te etew wey te geyinawa ta wey te langun-langun de iya.²⁶ Puun te

sabeka ne lukes, innimu rin ka langun ne klasi te etew, wey impeugpe din te langun ne inged kayi te ampew te tane. Sikandin mismu ka mig-alam te timpu te peglesut wey pegpatey ran, wey ka mig-alam ke hendei taman ka egkeugpaan dan.²⁷ Innimu te Manama sika su eyew egpammitew kandin ka me etew wey eg-alew-alew ne epakasamsam kandin wey egpakakita. Piru ka malehet, kene ne mariyu ka Manama kanta.²⁸ Su 'Neuyag ki, egpakaweil ki, wey neetew ki tenged kandin.'

Iling te ingkahi te duma niyu ne talagbalak,

'Me anak ki red nikandin!'²⁹ Ne puun su me anak ki te Manama, kene ta egsumsumanen ne iling ka Manama te me larawan ne bulawan wey te pelata wey ke batu naa ne innimu pinaahi te katuenan te etew.³⁰ Dengan, te ware pad nakanengneng ka me etew te Manama, imbalahad din ka eggimuwen dan ne migsimba te me diyus-diyus, piru kuntee, egsuhu ka Manama te langun ne etew te minsan hendei ne inged te keilangan ne eg-inniyug te me sale dan.³¹ Su mig-alam sikandin te aldew ne eggukuman din ka intiru ne kalibutan te matareng ne paahi, ne seini pinaahi te sabeka ne etew ne in-alam din. Impamalehetan din seini diye te langun ne etew pinaahi te peg-uyag kandin."

³² Te pegkarineg dan te inlalag ni Pablu meyitenged te peg-uyag te minatey, due duma ne miglemet kandin, pиру due me duma ne migkahi, "Egkeupian key man-e ne egpammineg keykew meyitenged kayi te lein ne timpu." ³³ Nataman, mig-awe e man-e si Pablu diye te kalibulungan. ³⁴ Pila ne me etew ka mig-apil te punduk din wey migpalintutuu e. Ne iyan dan duma ka egngararanan ki Diyunisyu ne sakup te kunsiyal te Ariyupagu, wey si Damaris ne sabeka ne malitan wey duen pad duma.

18

Diye si Pablu te Kurintu

¹ Te pegkapenga dutu, mig-awe e man-e si Pablu diye te Atinas wey miggendiyad e te Kurintu. ² Ne diye din nalambag si Akilu, sabeka ne Hudiyu ne neetew diye te inged ne egngararanan te Puntu. Iyam pad sikandin miggunguma puun te Italya duma te asawa rin ne si Prisila. Nakaawe sikandan puun te mandu ni Impiradur Klawdiyu ne egpaaween diye te Ruma ka langun ne me Hudiyu. Ne migpanumbaley si Pablu diye te kandan, ³ wey tenged su nekeg-iling ka himu ran ne talaggimu te balungbalung, miglemung e sikandin kandan wey miggimu duma kandan. ⁴ Tagse Aldew te Peggimeley, diye si Pablu te simbaan

te me Hudiyu ka egpakig-apul te me Hudiyu wey te me Grigu su igkeupii rin ne egpalintutuu sikandan.

⁵ Te pegginguma enni Silas ki Timutiyu puun te Masidunya, ware lein ne eggimuwen ni Pablu gawas te pegwali te lalag te Manama. Migpangguhud sikandin diye te me Hudiyu ne si Hisus, iyan sika ka Kristu. ⁶ Piru insupak dan si Pablu wey inlemetan. Purisu impelpel rin ka alinepung diye te kumbale din te migkahi, "Ke kene kew egkaluwas, kaniyud e sika ne seyyup! Ware labet ku rue. Ne puun kuntee, eggendiye ad e te kene ne me Hudiyu." ⁷ Purisu mig-awe e sikandin diye wey diyad e miglemung te kene ne Hudiyu ne egngararanan ki Titu Hustu ne migpamakey degma te Manama. Lenged te simbaan te me Hudiyu ka baley rin. ⁸ Ne si Krispu, ka pangulu te simbaan te me Hudiyu, migpalintutuu te Magbebeye duma te pamilya rin, wey masalig pad ne matig-Kurintu ne nakarineg te lalag te Manama ne migpalintutuu wey migpabewutismu e.

⁹ Due sabeka ne marusilem ne hendue te impataheinep si Pablu te Magbebeye wey migkahiyan, "Kene ka kaaldek, pabulus ka wali. Kene ka peeneng-eneng, ¹⁰ su egdumaan ku sikeykew. Ware egpakanereet keykew su masalig ka me etew te

seini ne siyudad ne migpalintutuu keddi.”¹¹ Purisu mig-uugpe pad si Pablu diye seled te sabeka ne leg-un wey liware wey impanulu din pad ka me etew te lalag te Manama.

¹² Piru te si Galiyu e ka gubirnadur diye te Akaya, miglibulung e ka me Hudiyu wey indakep dan e si Pablu wey in-uyan dan diye te ki Galiyu eyew igsumbung.¹³ Migkahi sikandan, “Ka seini ne etew, egpamehes te me etew egpasimba te egpakaupak te balaud!”

¹⁴ Ne hengkayi te eglalag e perem si Pablu, migkahi e si Galiyu diye te me Hudiyu, “Emun ke dakel perem ka sale din wey ke amana naa ne mareet ka eggimuwen din, egkaantus ku perem ka egpammineg kaniyu me Hudiyu.¹⁵ Piru puun su meyitenged ma seini te me lalag, te me ngaran, wey te balaud niyu, sikaniyu mismu ka eggusey kayi. Kena a eggusey te iling kayi!”¹⁶ Nataman, impalihawang din e sikandan diye te hukumanan.¹⁷ Ne dutu, indakep dan e si Sustinis ne pangulu te simbaan te me Hudiyu wey inlampesan dan diye te tangkaan te hukumanan, piru imbalahad ni Galiyu.

Ka peglibed ni Pablu diye te Antiyukiya

¹⁸ Naluhey pad si Pablu ka migpalunggehaat diye te Kurintu duma te me suled te pegpalintutuu. Nataman, miggipanew e sikandin wey

mig-untud te barku duma engki Prisila wey ki Akilu peendiye te Siriya. Te ware pad sikandin migligkat, migpeupew pad sikandin diye te Sinkriya tenged su due impanaad din.¹⁹ Te pegginguma ran diye te Ipusu, inggaat din de ka alunggun ne si Prisila wey si Akilu. Nataman, miggendiye sikandin te simbaan te me Hudiyu ka migpakig-apul te me Hudiyu.²⁰ Mighangyu ka me etew ne diye pad perem sikandin eg-ugpe te bayew egkaluhay, piru ware migsuhut sikandin.²¹ Piru te pegligkat din e, migkahiyan din pad sikandan, “Emun ke igtuhut te Manama, eglibed e red kayi.” Nataman, miguntud e sikandin te barku puun te Ipusu.

²² Te pegginguma rin diye te Sisarya, mgleus e sikandin diye te Hirusalim wey impangemusta rin ka migmalintutuu diye. Ne nataman, miggendiyad e man-e sikandin te Antiyukiya.²³ Te ware de naluhey, migligkat e man-e sikandin wey diye migbaye te me prubinsya te Galasya wey Prigya wey inlig-en din ka langun ne migmalintutuu ki Hisus diye.

Diye si Apulus te Ipusu wey te Kurintu

²⁴ Due sabeka ne Hudiyu ne egngararan ki Apulus ne matig-Alihandriya ne miggendiye te Ipusu. Meupiya amana sikandin ne eglalag-lalag wey masalig ka natuenan

din meyitenged te Kasulatan. ²⁵ Tapey e sikandin napanulu meyitenged te Magbebabe. Ne amana sikandin mabagget-bagget ne egpangguhud wey eleg ka igpanulu din meyitenged te Magbebabe ne si Hisus. Piru ke meyitenged te bewutismu, iyan din de natuenan ka bewutismu ne impanulu ni Huwan. ²⁶ Ware naaldek sikandin ne egpanulu diye te simbaan te me Hudiyu. Te pegkarineg enni Prisila ki Akilu te pegpanulu ni Apulus, inggingat dan e sikandin ne egpeendiyeen te baley ran, ne dutu, impasabut dan pad sikandin te duma ne pamaahi te Manama ne ware din pad natueni. ²⁷ Te timpu ne nakaplanu si Apulus ne eggendiye te Akaya, ka migmalintutuu diye te Ipisu ka migbulig kandin. Ne insulatan dan ka me suled te pegpalintutuu diye te Akaya eyew egdawaten sikandin. Pegginguma rin diye, dakel amana ka ingkabulig din te seeye se neyimu ne migmalintutuu tenged te keupiya wey keyidu te Manama ne impapitew kandan. ²⁸ Amana ne maligen ka katarengan din puun te Kasulatan te si Hisus iya ka Kristu. Ne ware neyimu te me Hudiyu ne egpakin-apul kandin diye te taliware te me etew.

19

Diye si Pablu te Ipisu

¹ Te diye pad si Apulus te Kurintu, migbayaan ni Pablu ka me inged ne sakup te prubinsya taman te miggunguma sikandin diye te Ipisu. Ne due me hibateen ne nalambag din diye, ² ne mig-insaan din e, “Nakarawat kew e te Panisingan te Manama te timpu te migpalintutuu e?”

Ne migtabak sikandan, “Ware, su ware ma kalintahaan ney te duen bes Panisingan te Manama.”

³ Ne mig-insaan e man-e sikandan ni Pablu, “Nekey bes ne bewutismu ka nabayaan niyu?”

Ne migtabak sikandan, “Ka bewutismu ni Huwan.”

⁴ Ne nataman, migkahi e man-e si Pablu, “Ka bewutismu ni Huwan, para re te seeye se eg-inniyug te sale. Impanulu e ni Huwan ka kabuhalan ni Israel te keilangan ne egpalintutuu sikandan wey egsalig te seeye se egpakinundul kandin ne si Hisus.”

⁵ Te pegkarineg dan kayi, sikan de ne imbewutismuwan sikandan te ngaran te Magbebabe ne si Hisus. ⁶ Ne hengkayi se migtel-eban e sikandan te belad ni Pablu, miglene e diye te kandan ka Panisingan te Manama. Ne puun dutu, nakalalag e sikandan te lein ne me linalahan, wey migpangguhud e te impanengneng te Manama sikandan. ⁷ Me sapulu dan wey daruwa (12) langun ne etew.

⁸ Ne migseled si Pablu diye te simbaan te me Hudiyu, wey migwali sikandin te ware pegkaaldek seled te tatelu ne bulan. Migpakig-apul man-e sikandin wey migpakannekal ne eg-pasabut kandan meyitenged te Peghari te Manama. ⁹ Piru due duma ne makehal se me pusung ne ware migpalintutuu. Ne diye te taliware te me etew, indereetan dan ka pamaahi te Manama. Purisu mig-engkeran sikandan ni Pablu wey induma rin ka me hibateen, ne tagse aldew, epakig-apul sikandin diye te iskuylaan ni Tirantu. ¹⁰ Iling kayi ka innimu rin seled te daruwa ne leg-un, purisu ka langun ne mig-ugpe diye te prubinsya te Asya, Hudiyu ma wey se kene, nakarinieg iya te lalag te Magbebaye.

Ka me anak ni Iskiba

¹¹ Masalig ka innimu te Manama ne subla ne me kein-inuwan pinaahi ki Pablu. ¹² Ne minsan ka me panyu wey ka me manggad ne inggamit din, in-uuyan diye te egmanderalu wey nekeuli seeye kandan, wey nanlihawang degma ka me busew. ¹³ Ne due me Hudiyu ne migmanleug ne egmangalew te me busew diye te migpanerepan. Miggeraman dan te eggamit ka ngaran te Magbebaye ne si Hisus eyew epangalew te me busew. Migkahi sikandan, "Te ngaran ni Hisus ne

inwali ni Pablu, awe kew rue!" ¹⁴ Due nanginguma kayi ne pitu ne me lukes ne anak ni Iskiba te pangulu te talagpanubad te me Hudiyu.

¹⁵ Piru migkahiyan sikandan te busew, "Nekeila a ki Hisus wey ki Pablu, piru hentew kew ma?"

¹⁶ Nataman, insukeung e sikandan te seeye se migserapan te busew wey impasakitan sikandan langun. Ne migpallahuy e sikandan te seeye ne baley ne warad me kukumbaleen su naggisi e, wey napalian e sikandan. ¹⁷ Ne ka seini se neyitabu, nanengnengan e te langun ne me Hudiyu wey te kene ne me Hudiyu ne mig-ugpe diye te Ipisu, wey naaldek sikandan. Ne dutu, narayan dan ka ngaran te Magbebaye ne si Hisus. ¹⁸ Masalig degma ka nanginguma ne migmalintutuu, ne mig-angken sikandan wey migpangguhud te marette ne himu ran. ¹⁹ Masalig degma seeye se me salamangkiru ne nanguyan te me libru ran wey intutung dan e diye te tangkaan te langun ne etew. Ne inseel ran seeye wey minilyun* ka kentiddad te me libru. ²⁰ Ne puun dutu, nekeempet pad ka lalag te Magbebaye wey masalig pad ka migpalintutuu.

Ka kasamuk diye te Ipisu

²¹ Pegkapenga te seeye se neyitabu, nakaplanu si Pablu ne diye egbaye te

* **19:19** Te Grigu: lalimma ne pulu ne libu (50,0000) ne timman ne pelata.

Masidunya wey Akaya ne egleus diye te Hirusalim. Migkahi sikandin, "Puun diye, eggendiye e pad degma te Ruma." ²² Ka daruwa ne migbulig-bulig kandin ne si Timutiyu wey si Irastu, impewun-a rin e diye te Masidunya, ne sikandin, diye pad mule naluhay-luhey te prubinsya te Asya.

²³ Te seeye ne timpu, due dakel ne samuk diye te Ipisu puun te pegpanulu meyitenged te Magbebaye ne si Hisus. ²⁴ Su due sabeka ne talaggimu te minsan nekey ne egpuun te pelata ne egngararanan ki Dimitriyu. Sikandin ka talaggimu te dereisek ne timplu ne innimu puun te pelata ne iling te timplu ni Artimis ne manama ran. Puun dutu, nakaseleppi sikandin te dakel duma te me trabahanti rin. ²⁵ Purisu inlibulung din ka me trabahanti duma te seeye se iling dan te himu wey migkahiyan, "Me suled, nakataha kew e ne kayi re iya egpuun te trabahu ta ka karatuan ta. ²⁶ Egkakita niyu wey egkarineg niyu ka innimu te seini ne etew ne egngararanan ki Pablu. Migkahi sikandin ne ka me manama ne innimu te etew, kene ne malehet ne manama. Masalig e ka neuyan din kayi te Ipisu wey hapit iya ne intiru ne prubinsya te Asya. ²⁷ Nakatahu te karereetan seini se eggimuwen ta, ne kene ne sikan de, egkeyimu e ne ware karuan te timplu te egbantuhen ne diyusa ne

egngararanan ki Artimis, wey kenad e eg-ileen ka diyusa ta ne insimba kayi te Asya wey te intiru ne kalibutan!"

²⁸ Te pegkarineg dutu te me etew, amana sikandan nabelu wey migmanguleyi ne eggendue, "Maresen si Artimis te Ipisu!" ²⁹ Ne seeye se kasamuk, nekeempet e te intiru ne siyudad. Ne migderakep dan e ensi Gayu ki Aristarku ne duma ni Pablu ne matig-Masidunya. Ne migpamallahuy e sikandan langun wey inggehanuy ka daruwa peendiye te libulungan te me etew diye te siyudad. ³⁰ Egkeupian perem si Pablu ne eggendiye te tangkaan te me etew piru migbalabahan sikandin te seeye se egmalintuu. ³¹ Ne due me alukuy ni Pablu ne me upisyal diye te prubinsya te Asya, ne migpeuyan degma sikandan te hangyu diye ki Pablu ne kene egpeendiyeen te kalibulungan. ³² Te seeye ne timpu, amane e nasamuk ka me etew. Migbalbalukan ka duma te lein ne guhuren wey ka duma, migbalbalukan te lein man-e ne guhuren. Ka kasuluhan kandan, ware nakataha ke mania te nalibulung sikandan diye. ³³ Kahiyan te duma ne etew ne si Alihandru ka nakasale su mania te sikandin ka intutuu te me Hudiyu diye te tangkaan te keet-etawan. Nataman, migtingyas si Alihandru wey migpakannekal ne egpasabut te me etew.

20

*Ka peggendiye ni Pablu te
Masidunya wey te Akaya*

34 Piru te pegkeila ran ne Hudiyu bes sikandin, migbal-balukan e man-e sikandan langun seled te me daruwa ne uras ka egkahi, "Maresen si Artimis te Ipusi!"

35 Te katammanan, iyan e nakapapeeneng-eneng te me etew ka sikritari diye te siyudad. Migkahi sikandin, "Me matig-Ipusi! Nakataha ka langun ne ka matig-Ipusi iyan talagtameng te timplu te maresen ne diyusa ne si Artimis wey te matulus ne batu ne neulug puun te langit. 36 Ne ware egpakaapul kayi, purisu peeneng-eneng kew re wey kene kew gaan-gaan himu su kema ke egpekegsendit kew. 37 Ne ka seini ne me etew, inuyan niyu minsan ware sikandin migpanakew kayi te me timplu wey ware dan balbalaya ka kanta ne diyusa. 38 Ke duen ma igsumbung enni Dimitriyu wey te me trabahanti rin, due aldew te pegasusumbung wey due degma me pangulu; ne egkaayun ne diye egmeg-sumsumbungey sikandan. 39 Piru ke duen pad prublima niyu, keilangan ne diye niyu husaya te kalibulungan te nelayaman ta ne paahi. 40 Su kema ke iyan kid egbayungan ne egpuunan te kasamuk ne neyitabu kuntee, ne ware eleg ne katarengan ta ne igkabehey meyitenged kayi." 41 Te pegkapenga te sikritari te siyudad te miglalag dutu, impeuli din e ka me etew ne inlibulung.

1 Pegkapenga te samuk, impeumew e ni Pablu ka migmalintutuu wey imbagget din sikandan. Nataman, migpanaha-tahe e sikandin kandan wey miggendiyad e te Masidunya. 2 Masulug ne inged ka imbayaan din diye te Masidunya wey imbagget din ka migmalintutuu pinaahi te pegwali rin kandan. Ne nataman, miggingsume e sikandin diye te Akaya, 3 ne diye pad sikandin mig-ugpe seled te tatelu ne bulan. Te naka-pangandam e sikandin ka eg-untud te barku peendiye te Siriya, henduen din pad nataheyi ka planu te me Hudiyu te peggimatey kandin. Purisu nakasuman-suman sikandin ne diye ded egbaye te Masidunya. 4 Ne migduma kandin si Supatir ne anak ni Piru ne matig-Birya, wey ka matig-Tisalunika ne si Aristarku wey si Sigundu, si Gayu ne matig-Dirbi, si Timutiyu, wey ensi Tikiku wey si Trupimu ne matig-Asya. 5 Ne miggune e sikandan kanami wey diyad migtetahad te Truwas. 6 Pegkapenga te sahakeen te Paan ne ware Patulin, miglapas key e te dahat puun te Pilipus. Peglihad te lalimma ne aldew, henduen key pad ne nekeuma diye te Truwas wey migsimanaan key pad diye.

Ka katammanan ne pegpanumbaley ni Pablu diye te Truwas

⁷ Te Sebadu te marusilem, miglibulung key langun eyew te pegkeen te impameri ne paan. Ne migwaliyan ni Pablu ka me etew taman te egliware e te marusilem, su eggipanew e sikandin te pegkapawe. ⁸ Masalig ka sulu diye te sinabeng ne miglibulungan ney diye te dibabew. ⁹ Te seeye ne timpu, due kanakan ne egngararan ki Iyutiku ne diye migpinnuu te bintana. Taheed te egwali si Pablu, egtuytuyungen e sikandin taman te natulensan e newulep. Nataman, neulug e sikandin diye te tane puun te igkatebu ne andana te baley. Te pegkuwa te me etew kandin, migpatey e sikandin. ¹⁰ Piru migpamaneug si Pablu wey migsalumpaangan din si Iyutiku te mighleheng. Ne migkahi sikandin, “Kene kew kalaggew su neuyag e sikandin!” ¹¹ Nataman, miglibed e si Pablu diye te dibabew wey migpameriperi rin e ka paan wey migkeen key e. Ne napawaan sikandin ka migpakiglalag te me etew, nataman, miggiapanew e sikandin. ¹² Ne in-uyan e te me etew si Iyutiku diye te baley rin ne neuyag ded, wey henduen pad nakapalene-lene ka geyinawa ran.

Ka peglapas puun te Truwas peendiye te Militu

¹³ Migguna-a key e miguntud te barku peendiye te Asun, su sika ka tahataha ni Pablu ne egpatulan e sikandin diye su miggiapanew re sikandin. ¹⁴ Ne hengkayi te nenekegkita key e diye te Asun, impeuntud ney e sikandin, wey migpabulus key e diye te Mitilin. ¹⁵ Te seup ne aldew, miggunguma key e man-e diye te Kiyu puun te Mitilin. Te peglihad te sabeka ne aldew, henduen key pad ne miggunguma diye te Samu. Ne seup e man-e ne aldew, nekeyinguma key e diye te Militu. ¹⁶ Nakasuman-suman si Pablu ne eglihad de diye te Ipusu su eyew kene sikandin egkatalehen diye te Asya; su egkaana-ana sikandin eyew egpekeyinguma perem sikandin diye te Hirusalim te Aldew te Pintikustis.

Ka pegpanaha-taha ni Pablu diye te Ipusu

¹⁷ Te diye pad si Pablu te Militu, inggingat din ka me igbuyag te migmalintutuu diye te Ipusu ne egpeendiyeen kandin. ¹⁸ Te pegginguma ran, migkahiyan e sikandan ni Pablu, “Natahaan niyu ka langun ne innimu ku taheed te dume e pad kaniyu, puun te ananayan ne aldew te pegginguma ku kayi te prubinsya te Asya. ¹⁹ Migpamakey a te Magbebaye duma te pegpariralem wey pegtihis te me luwe ku. Masalig ka inantus ku tenged te mareet ne planu te me Hudu keddiey.

20 Nakataha kew ne wara a migkehe ka miglalag due te kaniyu te langun-langun de iya ne egpakabulig kaniyu. Impanulu ku sikaniyu diye te kasuluhan wey diye degma te me baley niyu.
 21 Impanpanayan kud ka me Hudiyu wey ka kene ne me Hudiyu te keilangan ne eglibed sikandan diye te Manama ne eg-inniyug te me sale wey egpalintutuu te Magbebaye ta ne si Hisus.
 22 Ne kuntee, eggendiya a te Hirusalim tenged su seini ka insuhu keddi te Panisingan te Manama. Ne wara a nakataha ke nekey-a ka egkeyingumaan ku diye.
 23 Iyan ku re natahaan ne minsan hendei ne siyudad ka eggendiyaan ku, impanpanayan ad e te Panisingan te Manama ne ka prisuwan wey ka me keyirapan ka eggingumaan ku keureme.²⁴ Piru imbalahad kud ka keddi ne umul basta egkeimpusan ku re ka himu ne imbehey keddi te Magbebaye ne si Hisus ne iyan sika se pegwali te Meupiya ne Panugtulen meyitenged te geyinawa wey te keupiya wey keyid-u te Manama.

25 "Ne kuntee, nakataha a ne sikaniyu langun se nabayaan ku te pegwali meyitenged te Peghari te Manama, kenad e egpakkita pad keddiey.²⁶ Purisu seini ne aldew, eglalahan ku sikaniyu te emun ke hentew kaniyu seeye se kene egkaluwas, kena a

senditi. ²⁷ Su ware a neepes ne egpanengneng kaniyu meyitenged te langun ne katuyuan te Manama. ²⁸ Tantanuri niyu ka pegkeetew niyu wey ka langun ne migpalintutuu ne insalig kaniyu te Panisingan te Manama. Tangguwa niyu degma ka me etew te Manama ne inluwas din pinaahi te pegpatey te kandin mismu ne anak. ²⁹ Nakanengneng a te emun ke eg-engkeran kude sikaniyu, eggendiniyan kew e te me etew ne eg-pekeiling te mabulut ne me mananap ne eg-apil kaniyu eyew egdereetan ka punduk niyu. ³⁰ Egginguma ka timpu ne due me etew ne egpanulu te ubat, wey diye sikandan egpuun te punduk niyu, ne egpegsuwey te migmalintutuu eyew diye eg-ikul kandan. ³¹ Purisu bantey kew wey sumsumana niyu ne seled te tatelu ne leg-un, wara a mig-engked ka egpanulu te tagse sabeka kaniyu. Innimu ku sika aldew wey marusilem duma te hid-u ku kaniyu.

³² "Ne kuntee, me suled, igsalig ku sikaniyu diye te Manama wey diye te lalag din ne iyan sika se keupiya wey keyid-u rin ne egpakalig-en te pegpalintutuu niyu wey egpakabehey kaniyu te keupianan ne intahahe din te langun ne immatus din. ³³ Wara a neimma te me seleppi, me bulawan, me kumbale te minsan hentew. ³⁴ Sikaniyu mismu

ka nakataha te migtrabahu a eyew due egkahastu ku para te keilangan ku wey te me duma ku. ³⁵ Impakita ku kaniyu ka paahi ne epakabulig ki te magguye: pinaahi te pegpakanekal te langun ne me himu, duma te pegpasuman-suman te ingkahi te Magbebkiye ne si Hisus, ‘Meupiya pad ka egbehey du te egdawat!’ ”

³⁶ Te pegkapenga ni Pablu te miglalag, migpanimbuel e sikandan langun wey mig-ampu e sikandin. ³⁷ Migsinehew sikandan langun ne mgleheng ki Pablu wey miggarek te pegpanahataha. ³⁸ Nalaggew sikandan tenged te ingkahi ni Pablu ne kenad e egmekegkita pad sikandan. Nataman, impanulud dan e si Pablu diye te barku ne eg-unturan din.

21

Ka peggendiye ni Pablu te Hirusalim

¹ Ne migpanataha-taha key e kandan, nataman, mig-untud key e te barku ne miglapas peendiye te pulu te dahat ne egngaranan te Kus. Te seup ne aldew, nekeyinguma key e diye te Rudas. Ne puun dutu, migpabulus key e diye te inged ne egngaranan te Patara. ² Ne diye te Patara, due barku ne eggendiye te Pinisiya, purisu nangntud key e man-e. ³ Ne hengkayi te egkakita ney e ka Sipri, migpakawanan

key e peendiye te Sirya. Ne diye key e migdunggu te siudad ne Tiru su due igtemew ne indulan te barku. ⁴ Pegkakita ney diye te migmalintutuu, diye key pad mig-ugpe te kandan seled te senge simana. Ne pinaahi te geem te Panisingan, migkahiyan dan si Pablu te kene egpeendiyen te Hirusalim. ⁵ Te napenge e ka peg-uugpe ney diye te kandan, migpabulus key e man-e ka miglapas. Naamin-amin sikandan langun ka migpanulud kanami diye te lihawangan te siudad minsan ka me asawa wey ka me anak dan. Nataman, migpanimbuel key langun diye te ilis te dahat wey mig-ampu. ⁶ Nataman, mig-untud key e te barku pegkapenga ney te pegpanahataha, wey nanguli e degma sikandan.

⁷ Ne migpabulus key te peggipanew ney puun te Tiru peendiye te Tulimayda. Pegginguma ney diye, nekegkita key e man-e te me suled te pegpalintutuu, wey migsengekaaldew key pad diye. ⁸ Te seup ne aldew, miggipanew key e man-e peendiye te Sisarya. Te pegginguma ney diye, miggendiye key te baley ni Pilipi ne talagpanggihud te Meupiya ne Panugtulen wey diye key miggirehe. Sabeka si Pilipi te seeye se pitu ne me etew ne in-alam diye te Hirusalim eyew te pegpamehey te egkeenen diye te me balu. ⁹ Ne

hep-at ka anak din ne me mengebay ne migpanagne.¹⁰ Te peglihad te pila ne me aldew taheed te diye key pad, due miggunguma ne prupita ne egngaranan ki Agabu ne diye egpuun te Hudiya.¹¹ Ne migparani sikandin kanami wey ingkuwa rin ka tabed ni Pablu wey imbaku din ka kandin mismu ne paa wey belad. Nataman, migkahi e sikandin, "Sumale te Panisangan te Manama: iling ded degma kayi ka eggimuwen te me Hudiyu diye te Hirusalim te kamuney te seini ne tabed, wey igbehey sikandin diye te kene ne me Hudiyu."

¹² Te pegkarineg ney dutu, sikanami duma te me mahinged, inhangyu ney si Pablu ne kene epeendiyeen te Hirusalim.¹³ Piru migtabak si Pablu, "Mania te egmaninehew kew wey impalaggew a nikaniyu? Andam ad e, ne kene de te pegpabaku diye te Hirusalim, ke kene, minsan te pegpeyimatey degma para te Magbebeye ne si Hisus."

¹⁴ Ne ware ney iya nababalabi sikandin purisu migkahi key naan de, "Ka pegbuut te Magbebeye ka egkatuman."

¹⁵ Te pegkapenga dutu, impanines ney e ka me kasangkapan ney wey nangipanew key e peendiye te Hirusalim. ¹⁶ Due me pila ne hibatee ne matig-Sisarya ne migduma kanami, wey impanulud key nikandan diye te baley ni Manasun ne

iyen ney egtungepan. Matig-Sipri si Manasun wey sabeka sikandin te seeye se me ananayan ne migpalintutuu te Magbebaye.

Ka pegpanumbaley ni Pablu diye te ki Santiyagu

¹⁷ Te pegginguma ney diye te Hirusalim, nahale amana ne migsahipe kanami ka me suled te pegpalintutuu. ¹⁸ Te seup ne aldew, migduma si Pablu kanami te migpanumbaley diye te ki Santiyagu; ne nangendiye degma ka langun ne me igbuyag te migmalintutuu.

¹⁹ Impangemusta sikandan ni Pablu wey migpangguhuran te langun ne innimu te Manama diye te kene ne me Hudiyu pinaahi kandin.

²⁰ Te pegkarineg dan dutu, migsaye e sikandan langun te Manama. Nataman, migkahiyan dan e si Pablu, "Tengtengi nu suled, ke pila ne libu ka me Hudiyu ne migpalintutuu wey sikandan langun, mig-ikul te Balaud ni Muwisis. ²¹ Nahuhuran sikandan te sikeykew kun ka egpanulu te me Hudiyu ne diye mig-ugpe te me inged te kene ne me Hudiyu ne kenad ne keilangan ne egtuman sikandan te Balaud ni Muwisis. Migkahi ke kun te kenad e igpatuli kandan ka me anak dan wey kenad egtuman te duma pad ne me batasan te me Hudiyu. ²² Na, nekey buwa ka eggimuwen ta? Su egkatahaan iya nikandan ne miggunguma kad e. ²³ E,

meupiya buwa ne himuwa nu ke nekey ka iglalag ney keykew: due hep-at ne me lukes kayi ne migpanaad te Manama.²⁴ Duma ka kandan wey apil ka te eggimuwen dan te tuluuwen ne peglinis, wey bayari nu ka egkahastu ran su eyew egpakapeupew e sikandan. Te seini ne paahi, egkanengnengan te langun ne kene ne malehet ka narineg dan meyitenged keykew, tenged su egkakita ran ma ne egtuman ka degma te Balaud ni Muwisis.²⁵ Piru meyitenged te kene ne me Hudiyu ne migpalintutuu, duen e impeuyan ney ne sulat meyitenged te neuyunan ney ne kene egkeen te minsan nekey ne impanubad e diye te me diyus-diyus, wey te minsan nekey ne langesa, wey te minsan nekey ne ngalap ne neehet, wey kene degma egpeyibhilabetey ka kene ne alunggun."

²⁶ Te seup ne aldew, inuyan e ni Pablu ka hep-at ne lukes wey mig-apil sikandin kandan te peglinis. Nata-man, miggendiyad e si Pablu te timplu ka migpanengneng ke ken-u egkapenga ka peglinis dan, ne pegkapenga due, egpakahalad e ka tagse sabeka kandan.

Ka pegdakep ki Pablu diye te seled te timplu

²⁷ Ne hengkayi te hapit e egkapenga ka pitu ne aldew, due me Hudiyu ne matig-Asya ne nakakita ki Pablu diye te timplu. Ne dutu egpuun, intipu ran

e ka me etew diye wey indakep dan e si Pablu.²⁸ Ne migbalbalukan sikandin langun, "Me kabuhalan ni Israil! Bulihi key! Seini ka etew ne eggendiye te langun ne inged ne egpanulu te me etew te ware kun pulus te keet-etawan te Israil, wey te Balaud ni Muwisis, wey te seini ne timplu. Ne kuntee, mig-uyan sikandin kayi te timplu te kene ne me Hudiyu ne nakamalindit te seini se matulus ne timplu.²⁹ Nalalag dan seeye su nakita ran ma si Trupimu ne matig-Ipisu ne nakaruma ki Pablu diye te Hirusalim, ne kahiyen dan ne in-uyan ni Pablu diye te timplu.

³⁰ Nekeempet ka kasamuk diye te intiru ne siyudad wey migmamallahuy ka langun ne etew, wey indakep dan e si Pablu wey inggehanuy diye te lihawangan te timplu. Ne sikan de, mglekeban dan e ka me gumawan te timplu.³¹ Ne hengkayi te eggimatayan dan e perem si Pablu, nakarineg ka kumandir te me sundalu te Ruma ne nasamuk ka me etew te intiru ne Hirusalim.³² Due-rue ne migkuwa sikandin te me kepitan wey me sundalu wey migdag-dahew miggendiye te me etew. Te pegkakita te me etew kandin ne migdumaan te me sundalu, henduen pad ne migpeeneng-eneng sikandin ka eglampes ki Pablu.³³ Imparaniyan te kumandir si Pablu wey indakep din e,

wey impabaku din te daruwa ne keddina. Nataman, miginse e sikandin ne miggenden-due, "Hentew ma ne etew seini? Nekey-a ka neyimurin?"³⁴ Migbalbalukan ka me etew piru lein-lein ka tabak dan. Ne puun su kene din egkatahaan ke nekey ka neyitabu tenged su nasamuk e ka me etew, migsuhu e sikandin ne igpeuyan si Pablu diye te kampu ran.³⁵ Te diyad e sikandan te haheran, napehes ka me sundalu ne eggenat ki Pablu tenged te kabulut te me etew³⁶ ne migsundul kandan wey migmanguleyi ne eggenendue, "Himatayi niyu sikandin!"

Ka pegpangatarengan ni Pablu

³⁷ Ne hengkayi te igseled dan e perem si Pablu diye te kampu, migkahiyen din e ka kumandir, "Due perem iglalag ku keykew."

Ne migtabak ka kumandir, "Mania, egpakalalag ke bes te Grigu?"³⁸ Kene bes ne sikeykew seeye se Ihiptuhanen ne ware pad naluhey ne migribildi te gubirnu wey mig-uyan te me hep-at ne libu (4,000) ne me etew ne neelin ne due me pangani-ban diye te mammara ne inged ne kene egkeugpaan!"

³⁹ Ne migtabak si Pablu, "Sabeka a ne Hudiyu wey neetew a diye te Tarsu; nari-histru a te seeye se dakel ne

siyudad ne sakup te prubinsya te Silisya. Ke egkaayun, palalahe e pa te me etew."

⁴⁰ Migtuhutan sikandin te kumandir, purisu migsasindes si Pablu diye te haheran wey migtingyasan din ka me etew ne egpeen-enengen. Ne hengkayi se migpeeneng-eneng e sikandan, miglagalag e si Pablu diye te kandan te Hibruwanen ne linalahan,

22

¹ "Me suled ku wey me anggam ku. Pammineha a ka egpangatarengan kayi te tangkaan niyu!"² Te pegkarineg dan ne miglagalag sikandin te linalahan ne Hibruwanen, subla pad ne migmeeneng-eneng sikan-dan, ne migpabulus si Pablu ka migkahi,

³ "Sabeka a ne Hudiyu ne neetew diye te Tarsu ne sakup te prubinsya te Silisya, piru kayi a migtulin te Hirusalim. Kayi ad migiskuyla ne si Gamaliil iya ka migpanulu keddi. Napanulu a naay-ayari meyitenged te Balaud te me kabuybuyahan ta wey manekal a ne migpamakey te Manama iling degma kaniyu langun te kayi kuntee.⁴ Imbaybayaran ku ka me etew ne mig-ikul te seini ne Dalan taman te kamatayen dan. Impandakep ku ka me malitan wey me lukes wey imprisu ku.⁵ Ne ka Labew ne Talagpanubad wey ka langun ne ighbuyag te me

* **22:5** Ka seeye ne me sulat, migbehey te katenged te pegpandakep te me etew ne migmalintutuu ki Hisus.

Hudiyu ka egpakapamalehet ne malehet ka inlalag ku. Nakarawat a te me sulat* ne diye egpuun te kandan para te me karumaan ta ne me Hudiyu diye te Damasku. Purisu miggendiya a eyew te pegpandakep te seeye ne me etew wey te pegbaku kandan te keddina eyew eguyanan kayi te Hirusalim wey egleparan.

*Ka pegpangguhud ni Pablu
meyitenged te pegpalintutuu
rin*

(Him. 9:1-19; 26:12-18)

6 "Hengkayi te meudtu e te egpaketani-rani ad e te Damasku, sauhune ne due masil-ew ne layag ne diye egpuun te langit ne nakaalingkus keddi. 7 Napeled a diye te tane wey due narineg ku ne laheng ne miggendue, 'Saulu, Saulu! Mania te egbaybayaran a nikeykew?' 8 Ne mig-inse a, 'Hentew ke bes Magbebabe?' Ne migtabak sikandin, 'Sikeddiey si Hisus ne matig-Nasarit ka egbaybayaran nu.' 9 Ne ka me duma ku, nakakita te layag piru ware nakarineg te laheng ne migpakiglagalag keddi. 10 Nataman, mig-inse ad man-e, 'Magbebabe, nekey ma ka eggimuwen ku?' Ne migkahi sikandin, 'Sasindeg ka wey hendiye ka te Damasku, ne diye kad egpanugtuli te langun ne igpeyimu ku keykew.' 11 Ne dutu, wara ad nakakita tenged te masil-ew ne layag, purisu ingkikitkit e naan de

te me duma ku peendiye te Damasku.

12 "Ne due sabeka ne etew ne egngararan ki Ananiyas ne manekal ne egpamakey te Manama wey amana ne matinumanen te Balaud ta wey amana tahura te langun ne me Hudiyu ne mig-ugpe diye te Damasku.

13 Miggendiye sikandin te keddi ne diye migsasindeg te kakiliran ku ne migkahi, 'Suled Saulu, egpaketita kad e!' Ne sikan de nakakita ad e wey nakita kud e sikandin.

14 Ne migkahi sikandin, 'Inalam ka te Manama te me kabuybuyahan ta eyew egkannengnengan nu ka igkeupii rin wey eyew egkakita nu ka Suluhuanen din ne matareng ne si Hisus wey egpaketineg ka te kandin mismu ne laheng. 15 Su egkeyimu ka ne talagpamalehet meyitenged kandin diye te langun ne me etew meyitenged te nakita nu wey narineg nu. 16 Na, nekey-aka egtaharan nu? Enew kad wey pabewutismu kad, wey pangananey kad e kandin eyew egkapasaylu e ka me sale nu.'

Ka suhu ki Pablu te pegwali diye te kene ne Hudiyu

17 "Nataman, miglibed ad diye te Hirusalim, ne taheed te mig-ampu a diye te timplu, hendue te impataheinep a te Manama 18 ne nakita ku ka Magbebabe, ne migkahi keddiey, 'Mahaan ka, awe ka te mahaan kayi te Hirusalim, su ka me etew kayi, kene egdawat te igpangguhud nu

meyitenged keddi.'¹⁹ Ne migkahiyan ku sikandin, 'Magbebeye, nakataha sikan-dan ne iyan ku innendiye te me simbaan ka migpan-dakep wey migpanlampes te migpalintutuu keykew.²⁰ Te peggimatey ki Istiban te talagpamalehet meyitenged keykew, sabeka a iya ne migtuhut ne eggimatayan sikandin, wey sikeddi pad iya ka migtameng te me kumbale te miggimatey kandin.'²¹ Piru migtabak ka Magbebeye keddi, 'Hipanew kad, su egpeendiyeen ku sikeykew te mariyu ne inged, diye te kene ne me Hudiyu.'

²² Kayi re taman ka me etew ne migpammineg kandin, wey migbalbalukan e sikandan ka miggendue, "Himatayi niyu sikandin! Kenad e ne eleg ne egkeuyag pad sikandin!"²³ Ne migpabulus sikandan ka egmanguleyi ne egwelewes te me kumbale dan wey migsabulak te me alinepung diye te aw-awangan.²⁴ Ne puun dutu, migsuhu e ka kumandir ne Rumanhun te me sundalu rin te igpeuyan si Pablu diye te kampu wey egpalampesan kandan eyew egkanengnengan dan ke mania te egpanguleyian sikandin te me Hudiyu te iling dutu.²⁵ Ne hengkayi te imbakу e sikandin eyew eglampesan e, mig-inse e si Pablu te kepitan te sundalu ne migsasindeg diye, kahi rin, "Nekeikul red te balaud seini se peglampes te etew ne

narihistru diye te Ruma, te ware pad nakita ne due sale din?"

²⁶ Te pegkarineg dutu te kepitan, miggendiyad e sikandin te kumandir ne migkahi, "Nekey ma seini se eggimuwen nu? Ka seini ne etew, narihistru bes diye te Ruma."

²⁷ Purisu miggendiye ka kumandir te ki Pablu wey mig-inse, "Nangeni a, narihistru ka iya diye te Ruma?"

Ne migtabak si Pablu, "Uya iya."

²⁸ Ne migkahi ka kumandir, "Dakel ka nahastu ku eyew egkarihistro e re diye te Ruma."

Ne migtabak si Pablu ne migkahi, "Piru sikeddi mule, puun te peg-anak keddi, narihistru ad diye te Ruma."

²⁹ Purisu, seeye se egmanginse-inse perem ki Pablu, nangisues e. Naaldek degma ka kumandir te pegkanengnengi rin ne narihistru bes diye te Ruma si Pablu ka impabaku din te keddina.

Diye si Pablu te huku-manan te me Hudiyu

³⁰ Ne seeye se kumandir, egkeupian ne egpakataha ke nekey iya ka sumbung te me Hudiyu meyitenged ki Pablu. Purisu te seup ne aldew, im-peekaran din e te keddina si Pablu wey inlibulung din ka me pangulu te talagpanubad te timplu wey ka me Talag-gukum te me Hudiyu. Nata-man, in-uyan din e si Pablu wey impaatusbang e kandan.

23

¹ Ne migmemetmetan ni Pablu ka me Talaggukum te migkahi, “Me suled, puun dengan taman kuntee, malinis ka kunsinsya ku meyitenged te keddiey ne pegkeetew diye te tangkaan te Manama.” ² Ne ka Labew ne Talagpanubad ne si Ananiyas, migsuhu te me etew ne migsasindeg diye te marani ni Pablu te igpatagpi ka be-be din. ³ Ne migkahi si Pablu, “Egtagpien ka te Manama—sikeykew, egpekeiling ka te mareet ne alabat ne impintalan de te maangkag! Migpinpinnuu ka due eyew te peggukum keddiey sumale te Balaud, piru insupak nu ka Balaud te pegsuhu nu kandan te pegtagpi keddiey!”

⁴ Ne migkahi ka me etew ne diye te marani ni Pablu, “Inlemetan nu ka Labew ne Talagpanubad te Manama!”

⁵ Ne migtabak si Pablu, “Me suled, wara a nakanengneng te sikandin bes ka Labew ne Talagpanubad. Su migkahi ka Kasulatan, ‘Kene kewlalag te mareet diye te pangulu te keet-etawan nu.’”

⁶ Piru te pegkakita ni Pablu ne due me Sadusiyu ne nalibulung dutu, wey due degma me Parisiyu, migkahi sikandin te meemen, “Me suled, sabeka a ne Parisiyu wey anak e pad man-e te Parisiyu. Impaatubang a kayi puun su egpalintutuu a ne eg-uyahen ka me minatey!”

⁷ Te nalalag de iya seeye ni Pablu, nenekeg-apul e ka me Sadusiyu wey ke me Parisiyu. Ne puun dutu, nabaad e ka me etew. ⁸ Su egkahi ka me Sadusiyu te ka me minatey kun, kenad e eg-uyahen, wey ware panalihan wey panisingan, piru ka me Parisiyu, egpalintutuu te langun. ⁹ Nasi e ne migmeemen ka me kuleyian, ne due me talagpanulu te Balaud te Manama ne sakup te me Parisiyu ne migsasindeg ka mig-apul wey migkahi, “Ware nakita ney ne mareet ne innimu te seini ne etew! Kema ke due migpakiglalag kandin ne panisingan wey ke panalihan!”

¹⁰ Ne suble e ne migmasumpit ka apulanan purisu naaldek e ka kumandir ke eg-binbintengen dan e si Pablu. Ne puun dutu, impepamanneug din ka me sundalu ne egpaangayen ki Pablu pariyu kandan wey igpeuyan diye te kampu.

¹¹ Te seeye ne marusilem, miglepew ka Magbebaye diye te lenged ni Pablu wey migkahi, “Pakannekal ka! Migpamalehet ka keddiey kayi te Hirusalim, ne keilangan ne iling ded degma ka eggimuwen nu diye te Ruma.”

Ka planu te peggimatey ki Pablu

¹² Te pegkapawe, due me Hidiyu ne miglibulung ne migpasabutey. Migpahunlibet sikandan te Manama ne kene egkeen wey eg-inum

ke kene dan egkeyimatayan si Pablu.¹³ Subla sikandan te hep-at ne pulu (40) ka migpasabutey.¹⁴ Nataman, nangendiyad sikandan te me pangulu te talagpanubad wey te me igbuyag dan ne migkahi, "Amana key e migpanaad ne kene egkeen ke kene ney egkeyimatayan si Pablu.¹⁵ Ne sikaniyu naa, duma te me Talaggukum te me Hudiyu, ka egpataha te kumandir te Ruma ne igpeuyan kayi te kaniyu si Pablu, ne ubag kun egkeupian kew ne egpakaneng-neng amana meyitenged kandin. Ne egkataman, eggimatayan ney sikandin te kene pad egpekeyinguma kayi."

¹⁶ Piru nakarineg te seeye ne planu ka kanakan ne anak te atebey ni Pablu; purisu miggendiyaan din te kampu si Pablu wey migpangguhuran din dutu.¹⁷ Nataman, impeumew ni Pablu ka sabeka ne kepitan te me sundalu wey migkahiyan, "Uyana nu seini se kanakan diye te kumandir su due iglalag din kandin."¹⁸ Ne purisu in-uyan e sikandin te kepitan diye te kumandir. Ne migkahi ka kepitan, "Impeumew a ni Pablu ne pinirisu wey mighangyu ne eg-uyanen ku seini se kanakan kayi su duen kun iglalag keykew."

¹⁹ Miggengen-an te kumandir ka belad te kanakan wey in-uyan din diye te madmariyu te me etew wey

mig-insaan din, "Nekey bes ka iglalag nu kedi?"

²⁰ Ne migtabak ka kanakan ne migkahi, "Nenekegsabut ka me pangulu te me Hudiyu ne eghangyu keykew ne ig-peuyan nu si Pablu kaaselem peendiye te kalibulungan dan su ka tuyu ne ubag kun egkeupian sikandan ne egpakataha te duma pad man-e meyitenged kandin.²¹ Piru kene ka palintutuu kandan su due subla te hep-at ne pulu (40) ne me etew ne egtetahad wey eg-eatang kandin diye te dalan. Migpahunlibet sikandan ne kene egkeen wey eg-inum ke kene dan egkeyimatayan si Pablu. Andam e sikandan wey egtetahad naan de ke ken-u nu egpeyipanawa."

²² Ne migkahi ka kumandir diye te kandin, "Kene ka panugtul te minsan hentew te migpangguhuran a nikeykew." Ne dutu, impeyi-panew rin e ka kanakan.

Ka pegpeuyan ki Pablu diye ki Gubirnadur Piliks

²³ Nataman, impeumew e te kumandir ka daruwa te me kepitan din wey migkahiyan, "Andam kew te daruwa ne gatus (200) ne me sundalu su igpeendiye ku sikaniyu te lungsud te Sisarya kangkuwa te me alas alas nuwibi te marusilem, duma te pitu ne pulu (70) ne egmangudde wey daruwa ne gatus (200) ne egpanguyan te kalawit.²⁴ Andam kew man-e te me kudde ne egpeunturan ki Pablu wey bantayi

niyu ne ware egkeyitabu diye te kandin taman te egpekeyinguma diye te ki Gubirnadur Piliks.”²⁵ Ne migsusulat ka kumandir te seini:

²⁶ “Amana ne talahuren ne Gubirnadur Piliks, siked-diey si Klawdiyu Lisiyas ne migpangemusta keykew.²⁷ Ka seini ne etew, indakep te me Hudiyu wey eggimatayan dan e perem. Piru nanengnengan ku ne narihistru bes sikandin diye te Ruma, purisu inluwas ku sikandin duma te me sundalu ku.²⁸ Neupian a ne egpakataha ke mania te insumbung dan sikandin, ne puun due, indulung ku sikandin diye Talaggukum te me Hudiyu.²⁹ Nataman, nanengnengan ku ne ware mareet ne neyimu rin ne eleg ne eggimatayan wey ke egprisuwen naa sikandin. Ka sumbung kandin, meyitenged de te kandan mismu ne balaud.³⁰ Purisu te pegkanengnengi ku ne egplanuwan bes sikandin eggimatayi te me Hudiyu, impeendini kud e sikandin keykew. Ne insuhu ku ka migsusumbung kandin ne kayid e te keykew igpepamaneyik ka sumbung dan.”

³¹ Purisu, in-uyan e si Pablu te me sundalu sumale te insuhu kandan. Te seeye ne marusilem, ingkuwa ran si Pablu wey in-uyan dan taman diye te Antipatris.³² Te pegkapawe, miglibed e diye te kampu seeye se me

sundalu ne nangipanew re, ne iyan naan de migduma ki Pablu seeye se nangukudde.³³ Te pegginguma ran diye te Sisarya, imbehey ran e ka sulat diye te Gubirnadur, wey si Pablu, imbehey ran e degma kandin.³⁴ Te pegkapenga te Gubirnadur te migbasa te sulat, mig-insaan din e si Pablu ke hendei ne prubinsya sikandin migpuun. Te pegkanengnengi rin ne matig-Silisyas bes si Pablu,³⁵ migkah e sikandin, “Wey kud e eggukumi ka kasu nu ke eggingleme e ka migsusumbung keykew.” Ne migpabantayan din e si Pablu diye te tapey ne palasyu ni Hirudis.

24

Ka sumbung te me Hudiyu meyitenged ki Pablu

¹ Te peglihad te lalimma ne aldew, miggendiye te Sisarya si Ananiyas ne Labew ne Talagpanubad duma te duma ne ighbuyag te me Hudiyu wey sabeka ne ebugadu ne egngaranan ki Tirtulu. Ne miggendiye sikandan te ki Gubirnadur Piliks wey impangguhud dan e ka igsumbung dan meyitenged ki Pablu.² Ne dutu, impeumew ran e si Pablu, ne hengkayi te duen e sikandin, migbunsud e si Tirtulu ka migsumbung meyitenged ki Pablu ne miggenendue,

“Amana ne talahuren ne Gubirnadur. Tenged te meupiya ka pegmandu nu te nasud ney, nakabehey

seini te keupianan kanami seled te malayat ne timpu, wey masulug ka meupiya ne neyimu nu te kanami ne nasud.³ Ne minsan hendek key, wey ke minsan ken-u ne timpu, egkahale key e kayi wey amana key egpasalamat keykew.⁴ Na, kene ku igkeupii ne egdaat-daat te keykew ne timpu, purisu eghangyu a ne pammineha nu seini se malepet de ne igpangguhud ney.⁵ Nakita ney ne ka seini ne etew mahaan de egpekeyimu te mareet, wey nasamuk din ka me Hudiyu te langun ne me inged, wey sabeka sikandin ne pangulu te punduk ne enggaranan te Nasarinu.⁶⁻⁷ Ne minsan ka timplu, migel-elehan din pad te egbaley-baley, piru indakep ney sikandin.*⁸ Ne emun ke eg-in-insaan nu seini ne etew, duen nu egkanengnengi ka langun ne insumbung ney meyitenged kandin.”⁹ Ne ka me Hudiyu ne migtambung iya dutu, migpamalehet e degma ne malehet iya ka inlalag ni Tirtulu.

Ka pegtabak ni Pablu te sumbung meyitenged kandin

¹⁰ Nataman, migtingyasane te Gubirnadur si Pablu ne egpalalahen e degma. Ne migkahi si Pablu,

“Nakanengneng a ne naluhay e ne timpu ne sikeykew ka talaggukum te seini ne nasud. Purisu ingkahale ku ka pegangan-gatarengan kayi te tangkaan nu.¹¹ Ne ke eg-ug-ugsiyen nu, ware pad neyingumei kuntee te sapulu wey daruwa (12) ne aldew ka peggendiye ku te Hirusalim eyew te pegsimba.¹² Ne kene egpaketapamalehet ka me Hudiyu ne migpakig-apul a te minsan hentew diye te timplu, wey ke intipu ku naa ka me etew diye te simbaan wey ke diye naa te siyudad.¹³ Ne kene egpaketapamalehet sikandan keykew te insumbung dan kuntee meyitenged keddi.¹⁴ Piru seini re ka eg-angkenen ku diye te tangkaan nu: ne egpamekey a te Manama te me kabuybuyahan ney pinaahi te peg-ikul te Dalan ne egkahiyen te seini ne me etew ne seyyup. Egpalin-tutuu a degma te langun ne nasulat te Balaud ni Muwisis wey te me baseen ne insulat te me prupita.¹⁵ Ne migpallateng a degma iling kandan te migsusumbung keddiey ne eg-uyahen te Manama ka langun ne me minatey, matareng ma wey se kene.¹⁶ Purisu layun ku egpakannekali ne malinis ka kunsinsya ku diye te Manama wey diye te me

* **24:6-7** Due me sinulat ne inlagkes ka birsikulu 7 piru ware seini diye te malehet ne migpuunan. Intimul naan de seini ne miggendue: Eggukuman ney e perem sikandin sumale te kanami ne balaud piru miggingga si Lisiyas ne kumandir wey impehes key nikandin paangaya ki Pablu. Nataman, migsuhu si Lisiyas ka seeye se migsusumbung ki Pablu, keilangan ne eggendini te keykew.

etew.

¹⁷ “Te peglihad te me pila ne leg-un ne nakariyu-diyu a te Hirusalim, nakalibed a diye ka migdulung te seleppi ne igkabulig te me duma ne Hudiyu wey eyew mane te pegpanubad te Manama diye te timplu. ¹⁸ Ne diya a nikandan neyingumei, ka mighalad diye te timplu te pegkapenga ku te peggimu te tuluuwen ney te pegpamanihu. Ne ware me etew ne nalibulung duma keddiey wey ware kasamuk ne neyitabu. ¹⁹ Piru due me Hudiyu diye ne matig-prubinsya te Asya ne sikandan perem ka eleg ne egpepamaneyik kayi te keykew te sumbung ke duen ma igkasumbung dan meyitenged keddiey. ²⁰ Wey ke palalaha nu seini se me etew ke nekey ka nakita ran ne neyimu ku ne sale te peg-atubang ku diye te me Talaggukum ney, ²¹ gawas te inlalag ku te meemen te timpu te peg-atubang ku kandan, ‘Insumbung a nikaniyu kuntee tenged su migpalintutuu a ne eguyahen ka me minatey.’”

²² Ne puun su amana nakataha si Piliks meyitenged te Dalan te kaluwasan, impeen-enengan din e si Pablu te eg-ugsi-ugsi. Ne migkahi si Piliks diye te kandan, “Wey kud e eggukumi ka insumbung niyu ke eggingume e si Kumandir Lisiyas.” ²³ Nataman, insuhu din e ka kepitan te sundalu ne egpabantayan si Pablu, piru

egbehayan ded te deisek ne kaligwangan wey egtuhutan ded ka me alukuy rin ne egbehey te keilangan din.

Ka peg-atubang ni Pablu ki Piliks wey ki Durusila

²⁴ Peglihad te me pila ne aldew, miggungume e si Piliks duma te asawa rin ne si Durusila, sabeka ne Hudiyu. Nataman, impeumew rin e si Pablu wey migpammineg si Piliks te peglalag ni Pablu meyitenged te pegpalintutuu rin ki Kristu Hisus. ²⁵ Piru te pegpangguhud ni Pablu meyitenged te pegkamatareng, te pektigkel te pegkeetew, wey meyitenged te Aldew te Peggukum ne egginguma, naaldek e si Piliks ne migkahi, “Hipanew kad e wey igpeumew ku re sikeykew ke due kaayunan ku.” ²⁶ Ne iyan din perem igkeupii ne egbehey kandin te seleppi si Pablu, purisu kamasalig din ipeumew si Pablu eyew egpakiglagalag kandin.

²⁷ Peglihad te daruwa ne leg-un, naliwanan si Piliks ki Pursiyu Pistu te pegkagubirnadur. Ne puun su egkeupian si Piliks ne egkeupian kandin ka me Hudiyu, imbalahad din si Pablu diye te prisuwan.

25

Ka pegduput ni Pablu diye te Impiradur

¹ Te natateluwan e si Pistu ka miggunguma diye te prubinsya, miggendiyad e sikandin te Hirusalim

puun te Sisarya. ² Ne dutu, impanugtul e te me pangulu te talagpanubad wey te me pangulu te me Hudiyu ka sumbung dan meyitenged ki Pablu. Imbanasalan dan si Pistu ³ne emun ke egkeupian sikandin ne egpahale te me etew, egpeendiyeen din si Pablu te Hirusalim, su migplanuwan dan e ne egatangan dan te eggimatey diye te deralanen. ⁴ Piru migkahi si Pistu, “Diye prisuwa si Pablu te Sisarya, ne kene egkaluhay, eglibed ad e diye. ⁵ Purisu parumaa niyu keddi ka me pangulu niyu wey pepamaneyiki niyu sikandin te sumbung ke duen ma neyimu rin ne mareet.”

⁶ Migginggaan te walu wey ke sapulu ne aldew si Pistu diye te kandan ne henduen pad miggendiye te Sisarya. Te seup ne aldew, migpinnuu e sikandin diye te hukumanan, ne migsuhu sikandin ne egpaatubangen kandin si Pablu. ⁷ Te pegginguma ni Pablu, miglingutan sikandin te me Hudiyu ne diye egpuun te Hirusalim wey migpepamaneyik te mabehat ne sumbung meyitenged kandin ne ware dan napamaleheti. ⁸ Ne migpangatarengan si Pablu ka migkahi, “Ware neyimu ku ne supak te Balaud te me Hudiyu, wey te timplu, wey te Impiradur te Ruma.”

⁹ Ne tenged su iyan igkeupii ni Pistu ne egpahale te

me Hudiyu, mig-insaan din e si Pablu te miggenendue, “Egkeupian ka ne eggendiye te Hirusalim eyew diye kud eggukumi ka kasu nu?”

¹⁰ Ne migtabak si Pablu, “Kayi e ma migsasindeg te hukumanan te Impiradur, keilangan ne kayi a degma eggusaya. Nakanengneng ka ne ware iya neyimu ku ne sale diye te me Hudiyu. ¹¹ Ke nakasupak e ma te Balaud wey ke nekeyimu te minsan nekey ne eleg ne iglegpad keddi te kamatayen, kena a eghangyu ne kena a eglegparan. Piru ke ware kamalehetan te me sumbung dan meyitenged keddi, ware minsan hentew ne due katenged ne egbehey keddi diye te kandan. Migparani ad kuntee te Impiradur.”

¹² Te nakapenga si Pistu ka migpakiglag te me tlagtambag kandin, migkahi e sikandin, “Migparani ke bes e te Impiradur, ne eg-uyanen kad en iya diye te kandin.”

Diye si Pablu te tangkaan ni Agripa

¹³ Te peglihad e te me pila ne aldew, nanginguma ensi Hari Agripa* wey si Birinis diye te Sisarya ka egsagsahipe ki Pistu. ¹⁴ Te napilaan e sikandan ka mig-ugpe diye, migpanugtulan e ni Pistu ka Hari meyitenged te kasu ni Pablu te migkahi, “Due pinirisu

* **25:13** Hari Agripa: ka igkarangeb ne Hirudis Agripa. Sikandin ka anak ni Hari Agripa ne egkakita diye te 12:1.

kayi ne ware lekei ni Piliks.¹⁵ Te peggendiye ku te Hirusalim, migpepamaneyik te sumbung ka me pangulu te me talagpanubad wey ka me igbuyag te me Hudiyu meyitenged kandin, wey inhangu a nikandan ne egpalegparan sikandin.¹⁶ Piru migkahiyan ku sikandan te kene ne batasan te matig-Ruma ne eglegpad te minsan hentew ne kene egpakaatubang te migsumbung kandin, wey te ware pad nabehayi te timpu ne egtabak te insumbung meyitenged kandin.¹⁷ Purisu te pegginguma ran kayi, wara a migluhey-luhey, su te seup ne aldew, migpin-nuu a diye te hukumanan wey impeumew ku ka seini ne etew.¹⁸ Ne hengkayi te miglalag e ka migsusumbung kandin, kahiyen ku ne egpepamaneyik sikandan te mabehat ne sumbung meyitenged kandin piru ware bes.¹⁹ Ne iyan dan bes de igsumbung ka meyitenged te kandan ne tuluuwen wey meyitenged te sabeka ne etew ne migpatey e ne egnaranan ki Hisus ne neuyag kun kahi ni Pablu.²⁰ Ne wara a nakataha ke nekey ka eggimuwen ku te seini ne kasu, purisu mig-insa a ki Pablu ke igkeupii rin naa ne eggendiye te Hirusalim eyew diye ku eggukumi.²¹ Piru migkahi si Pablu te igparani rin e te Impiradur ka kasu rin eyew iyan e eggukum. Purisu impabantayan ku sikandin

taman te igaapeuyan ku sikandin diye te Impiradur.”

²² Ne migkahi si Agripa diye te ki Pistu, “Egkeupian a ne egpammineg te seini ne etew.”

Ne kahi ni Pistu, “Egpakapammineg ka kandin kaasellem.”

²³ Pegkapawe, miggendiye te hukumanan si Agripa ki Birinis ne egkakita se katelesan dan. Ne migseled sikandan diye te libulunganan ne migdumaan te me pangulu te me sundalu wey te me pangulu te siudad. Nataman, migsuhu si Pistu ne igpaatubang si Pablu.²⁴ Ne migkahi si Pistu, “Hari Agripa, wey te langun ne kayi kuntee, seini ka etew ne insumbung keddiey te langun ne me Hudiyu kayi te Sisarya wey diye te Hirusalim. Migmanguleyi sikandan ne eleg sikandin ne eggimatayan.”²⁵ Piru sumale te nakita ku, ware neyimu rin ne eleg ne eglegparan te kamatayen. Ne puun su migparani ma sikandin te Impiradur, migplanu a ne igpeuyan ku sikandin diye te Impiradur.

²⁶ Ne puun su ware ma igkasulat ku diye te Impiradur ne malehet meyitenged kandin, impaatubang kud sikandin kuntee kaniyu, labi e keykew Hari Agripa, eyew duen e igkasulat ku pegkapenga te pegnengneng te kasu rin.²⁷ Su kene ne meupiya ka egpeuyan te pinirisu diye te Impiradur ke ware

kamalehetan te sumbung
meyitenged kandin."

26

Ka pegpangatarengan ni Pablu

¹ Ne migkahi si Agripa diye te ki Pablu, "Migtuhutan ka te pegpangatarengan." Ne migtingyas si Pablu te belad din wey migkahi sikandin,

² "Hari Agripa, mig-isip ku ne impanalanganin a iya tenged su kuntee ne aldew egpakapangatarengan a kayi te tangkaan nu meyitenged te langun ne me sumbung keddiey te me pangulu te me Hudiyu,³ tenged su amana ka egkateu te langun ne batasan wey te igmekeg-apul te me Hudiyu. Purisu eghangyu a keykew ne kene ka kapeleyi ne egpammineg te iglalag ku kuntee keykew.

⁴ "Nanengnengan te langun ne me Hudiyu ka keddiey ne pegkeetew puun te pegkabatei ku diye te keddiey ne nasud wey diye degma te Hirusalim. ⁵ Ne emun ke eglalag de perem sikan dan te malehet, naluhey e sikandan nakanengneng wey sikandan mismu perem ka egpakapamalehet ne migikul a te tuluuwen te me Parisiyu ne amana egtuman te Balaud te me Hudiyu. ⁶ Ne kuntee, seini ad ka eggukuman tenged su migpallateng a te saad te Manama diye te me kaapuan ney. ⁷ Sika ne saad ka impallateng te me kabuhalan te sapulu wey daruwa (12) ne kaapuan

ney taheed te migsimba sikandan te Manama aldew wey marusilem. Ne tenged te seini ne pegpallateng, Hari Agripa, insusumbung a te me Hudiyu! ⁸ Ne sikaniyu se me Hudiyu, mania te kene kew egpakapalintutuu ne eguyahen te Manama ka me minatey?

⁹ "Nekani, sikeddi mismu ka migsusuman-suman ne keilangan ne eggimuwen ku ka langun ne egkeyimu ku eyew te peg-ehet te ngaran ni Hisus ne matig-Nasarit. ¹⁰ Ne seini ka innimu ku dengan diye te Hirusalim. Migbehayan a te katenged te me pangulu te talagpanubad te pegpamirisu te migmalintutuu. Ne mig-uyun a man-e ne eggukuman sikandan te kamamatayen. ¹¹ Kamasalig a miggendiye te me simbaan te me Hudiyu ka egpammitew kandan, ne egbayad-bayah wey egpehes ne egpeengked kandan te pegpalintutuu ran. Tenged te subla ka kabelu ku kandan, nekeyingume e pad diye te mariyu ne siyudad eyew te pegbayad-bayah kandan."

Impangguhud ni Pablu ka pegkeila rin te Magbebaye

¹² Ne migpabulus si Pablu ka miglalag, "Sika ka puunan ne miggendiya a te Damasku ne mig-uyan te katenged wey te me suhu te me pangulu te talagpanubad. ¹³ Meudtu en iya seeye, Hari Agripa, taheed te miggipanew a, nakakita a te malayag ne

egpuun te langit ne masil-ew pad amana te aldew ne miglayag keddiey wey te me duma ku.¹⁴ Pegkapeled ney langun diye te tane, due narineg ku ne laheng te Hibruwanen ne linalahan ne miggendue, ‘Saulu, Saulu! Mania te migbaybayaran a nikeykew?’ Sikeykew re ka egkasakitan kayi te innimu nu. Egpekeiling ka te baka ne egsipe ke egtinduken te kayu.’¹⁵ Ne mig-insa a kandin, ‘Hentew kaa Magbebabe?’ Ne migtabak ka Magbebabe ne migkahi, ‘Sikeddi si Hisus ne imbaybayaran nu.¹⁶ Ne enew ka wey sasindeg ka, su migpakita a keykew eyew eggimuwen ku sikeykew ne suluhuanen ku. Ipangguhud nu diye te duma ka ingkita nu kayi te keddii kuntee, wey ka igpakita ku pad keykew te mewuri ne aldew.¹⁷ Egluwasen ku sikeykew puun te me Hudiyu wey te kene ne me Hudiyu, ne sikandan ka egpeendiyan ku keykew.¹⁸ Sikeykew ka egpeyimelat te me mata ran wey ka egpeinniyug kandan puun te marusilem peendiye te malayag, wey puun te geem ni Meibulan peendiye te Manama, eyew pinaahi te pegpalintutuu ran keddii, egkapasaylu ka me sale dan wey egpakalagkes sikandan te me etew ne immatus e te Manama.’”

*Ka pegpangguhud ni Pablu
te himu rin*

¹⁹ Ne migpabulus e man-e si Pablu ka miglalag, “Purisu, Hari Agripa, wara a migsupak te impakita keddii ne egpuun te langit.²⁰ Te an-anayan, diya a migwali te Damasku, nataman diye te Hirusalim wey te intiru ne nasud te Hudiya wey diye te kene ne me Hudiyu. Migwali a te keilangan ne eg-inniyug sikandan te sale dan wey egpalintutuu te Manama, wey igpakita ran pinaahi te himu ran ne malehet ka peg-inniyug dan te sale dan.²¹ Ne tenged kayi, inderakep a te me Hudiyu diye te timplu wey eggimatayan ad e perem nikandan,²² piru taman kuntee ne aldew, imbulihan a te Manama. Purisu seini a ka egpamalehet te langun ne etew, mabantug ma wey se kene. Ka inlalag ku, sikan ded iya se inlalag dengan te me prupita wey ni Muwisis ne egkeyitabu:²³ ne keilangan ne eg-antus wey egpatey ka Kristu, wey sikandin ka an-anayan ne egkeuyag puun te me minatey eyew te pegpangguhud te kalayag te kaluwasan diye te me Hudiyu wey te kene ne me Hudiyu.”

²⁴ Te sasangan pad ne egpangatarengan si Pablu, migbalbalukan e si Pistu ne migkahi, “Egbusawen kad Pablu! Egbusawen kad puun te subla ne katuenan nu!”

²⁵ Ne migtabak si Pablu, “Talahuren ne Pistu, kena a egbusawen! Malehet wey maheteng ka inlalag ku.

²⁶ Hari Agripa, migpakiglag a keykew te ware pegkaaldek tenged su nakataha ke ma meyitenged kayi. Nakataha a te nanengnengan nud seini se langun, tenged su ware iheles seini se neyitabu.
²⁷ Hari Agripa, egpalintutuu ka te me prupita? Nakataha a ne migpalintutuu ka iya!"

²⁸ Ne migkahiyan ni Agripa si Pablu, "Egsuman-suman ke buwa ne mahaan e re nikeykew egkeuyan te pegka-Kristuwanen."

²⁹ Ne migkahi si Pablu, "Mahaan ma wey se mananey, ka peg-ampu ku te Manama ne kene de ne sikekyew, ke kene, sikaniyu langun se migpammineg kuntee keddiey ne eg-pekeiling keddī—gawas te pegkaprisu ku.

³⁰ Nataman, nanasindeg e ka Hari, ka Gubirnadur, si Birinis wey ka langun ne naminnuu duma kandan. ³¹ Ne hengkayi te nanlihawang e sikandan, migpalalahey e sikandan ne miggendue, "Ka sika ne etew, kene ne eleg ne eggi-matayan wey ke egprisuwen naa." ³² Ne migkahi si Agripa diye te ki Pistu, "Ke ware de perem migduput diye te Impiradur ka sika ne etew, egkaayun e perem ne eglekaan."

27

Ka peglapas ni Pablu te da-hat peendiye te Ruma

¹ Ne hengkayi te nekegsabut e sikandan ne egpeunturen

key e te barku peendiye te Italia, imbehey ran e si Pablu duma te duma ne me pinirisu diye ki Hulyu ne sabeka ne kepitan te sundalu. Ingngaranan ka seini ne me sundalu te "Batalyun te Impiradur."² Nataman, mig-untud key e te barku ne egpuun te Adramitu ne mahaan en iya egligkat te seeye ne timpu peendiye te me tuhunanan te prubinsya te Asya. Ne migduma kanami si Aristarku ne matig-Tisalunika, ne ka Tisalunika sabeka ne siyudad diye te Masidunya. Ne nataman, migligkat e ka barku.

³ Te seup ne aldew, nekeyinguma key e diye te inged ne Sidun. Amana ne meupiya si Hulyu diye te ki Pablu wey migtuhutan din sikandin ne egpakaleuy te me alukuy rin eyew egk-abehayan sikandin te keilangan din. ⁴ Nataman, migpabulus key e te hipanawan ney wey diye key migbaye te limang te pulu te Sipri ne egkaandilungan te kalamag, tenged su nakasinug-ung key te kalamag. ⁵ Miglapas key te dahat ne egkatangkaan te inged ne Silisya wey te inged ne Pampilya wey nakatuhun key diye te inged ne Mira ne sakup te prubinsya te Lisya. ⁶ Ne dutu, due nakita te kepitan te sundalu ne sabeka ne barku ne diye egpuun te Alihandriya, eggipanew en iya peendiye te Italia, purisu impaalain key e diye.

⁷ Mananey ka peglapas ney te me pila ne aldew, wey nabaybayaran key taman te nekeyinguma key diye te marani te lungsud ne Nidu. Ne tenged su nakasinung kanami ka kalamag, ware key nakabulus diye te egbayaan ney, ne diye key e migpabulus lenged te naandilungan ne pulu ne Krita ne egkatangkaan te Salmuni. ⁸ Ne migpahunilis key naan de, wey nabaybayaran key taman te miggingga key te inged ne enggaranan te Me Meupiya ne Tuhunanan ne kene ne mariyu te siyudad te Lasiya.

⁹ Ne diye key pad naluhey taman te neyingumaan key te timpu ne amana ne makaaldek-haldek ka peglapas te dahat, su miglihad man-e ka Aldew te Pegpasaylu te me Sale.* Purisu, migtambahan sikandan ni Pablu te miggendenue,¹⁰ “Me suled, kene ne meupiya ne epabulus ki te peggipanew ta su egkakita-kita kud iya ne egsahap ki. Ne kene ne ka dinulan wey ke barku re ka egkareetan, su minsan sikanta ne egkallened ki degma.” ¹¹ Piru iyan migpalintutuuwan te kepitan te sundalu ka inlalag te kepitan te barku wey ka kamuney te barku, du te ki Pablu. ¹² Ne tenged su kene ne meupiya ka tuhunanan diye ke timpu te maagsil, nakasuman-suman ka kasuluhan kandan

ne eglapas te dahat wey eleg-eleg egtuhun diye te inged ne Piniks. Sabeka seini ne inged diye te Krita ne due daruwa ne tuhunanan: ka sabeka diye lenged te igkahibang te iglineb wey ka dangeb diye lenged te igkakawanan te iglineb, ne meupiya ne egpaandilungan te barku ke timpu ne maagsil.

Ka makeseg ne kalamag diye te dahat

¹³ Ne hengkayi se migkalamag e te kene amana ne makeseg, kahiyan dan ne egkaayun e ne eglapas te dahat. Ne dutu, imbatun dan e man-e ka me palibehat ne putew, wey migpabulus e sikandan ka migpahunilis diye te pulu te Krita. ¹⁴ Piru te ware naluhey, due miggingga ne amana ne makeseg ne kalamag ne egpuun te pulu te dahat. Inggaranan seeye te ‘kalamag ne migpuun te igkahibang te balabahan dapit te igsile.’

¹⁵ Te peggingga te makeseg ne kalamag diye te barku, ware key e nakapabulus, ne migparuma-ruma key naan de te kalamag ke hendei egpeendiye su nabeley key e ka epakannekal. ¹⁶ Ne nakapaalindung key te mahaan de diye lenged te deisek ne pulu ne Kauda. Ne minsan nabaybayaran key e, nahanuy ney red diye te barku ka deisek ne balangey.

* **27:9** Ne ke kene pad eggingga ka sika ne aldew, sika perem ne timpu ka meupiya ne peggipanew te barku.

17 Ne indulan dan e seini wey miggiresenan dan e te egbagkes ka barku. Ne tenged su naaldek sikandan ne epakasanglad ka barku diye te lelanek ne marani te Libya, inlulun dan e ka maluag ne hinabel.[†] Ne migparumarama key naan de te kalamag ke hendei egpeendiye. 18 Ne migpabulus pad ka makeseg ne kalamag, purisu te seup ne aldew, migbunsuran dan e te egpangulug ka dinulan te barku diye te dahat,¹⁹ wey te seup pad man-e ne aldew, sikandan mismu ka migpangulug te me gamit te barku. 20 Me pila ne aldew ne ware key nakakita te aldew wey me bituen, wey migpabulus ka amana ne makeseg ne kalamag. Te katammanan, ware key e mig-iman-iman ne egkaluwas pad.

21 Pila ne me aldew ne ware keen-keen te me etew, purisu migsasindeg si Pablu diye te tangkaan dan ne migkahi kandan, “Me suled, ke migpammineg kew pa perem keddi, wey ware miglapas puun diye te Krita, ware ki perem nekeyinguma te iling kayi ne karereetan wey ware perem naleden ka indulan. 22 Piru kuntee, egkahiyani ku sikaniyu te kene kew kaaldek, su ware sabeka kaniyu ne egpatey. Ka barku re ka egkareetan. 23 Su ganna te marusilem, migpeuyan te panalihan ka Manama ne

migkamkamuney keddi wey ka impamakey ku,²⁴ wey migkahiyani a nikandin, ‘Pablu, kene ka kaaldek! Keilangan ne eg-atubang ka te Impiradur. Ne puun te keyid-u te Manama, ka langun ne me duma nu kayi te barku egkaluwas tenged keykew.’²⁵ Purisu kene kew kaaldek, me suled, su egsalig a te Manama ne egtumanen din ka inlalag din keddiey. 26 Piru epakasanglad seini se unturanan ta diye te sabeka ne pulu te dahat.”

27 Igkasapulu e wey hep-at (14) ne marusilem ne neuyan-uyan key te makeseg ne kalamag diye te dahat ne egngaranan te Miditiranyu. Ne hengkayi se egliware e te marusilem, migsumansuman ka me trabahanti te barku ne epakapahun-ilis key e te dahat. 28 Purisu intirew ran e ka dahat wey natahaan dan ne me daruwa ne pulu (20) pad ne depa ka karaleman. Ne ware naluhay, intirew ran e mane wey duen naan de sapulu wey lalimma (15) ne depa. 29 Ne tenged su naaldek sikandan ne epakasanglad key te batu, in-ulug dan e ka hep-at ne palibehat ne diye dapit te peka te barku ne mig-ampu sikandan ne egkapawe e. 30 Egkeupian perem ka me trabahanti ne eg-awe diye te barku, purisu impepamanueg dan

[†] 27:17 Ka maluag ne hinabel ne imbitin diye te pes-ek, iyan epakapeyipanew te barku ke egkeyiyup te kalamag. Inlulun dan e su eyew kene egkahisi tenged su suble e ka kalamag.

ka balangey diye te dahat, su mig-ealiddanan ne eg-ulug de sikandan te me palibehat diye te ulu te barku.³¹ Piru migkahi si Pablu diye te kepitan wey diye te me sundalu rin, "Emun ke eg-awe kayi te unturanaan ka me trabahanti te barku, kene kew egkaluwasa."³² Purisu intamped te me sundalu ka me lubid ne inggiket te balangey wey imbalahad e ne egkalened.

³³ Ne hengkayi te egkaliwaswas e, egpehesen e perem sikandan langun ni Pablu te epakeen. Migkahi sikandin, "Migdaruwaan kew e ne simana ka egte-tahad ne egkeimpusan ka kalamag, ne warad en iya keen-keen niyu minsan deisek."³⁴ Purisu keilangan ne egkeen kew kuntee eyew egmanekal kew, su ware mareet ne eggingsuma te minsan sabeka kaniyu."[‡] ³⁵ Nataman, migkuwa si Pablu te paan wey migpasalamat te Manama diye te tangkaan dan langun, ne impanepik-tepik din seini wey migkeen e.³⁶ Nabagget sikandan langun wey nangeen e.³⁷ Sikanami langun, miggingsuma key te 276 diye te barku.³⁸ Te nabulung e ka langun, indegpak dan e diye te dahat ka trigu eyew kene egkabehatan ka barku.

Ka pegsanglad te barku

[‡] 27:34 Te Grigu: ware minsan sabeka ne bulbul niyu ne egkalaag diye te ulu niyu.

³⁹ Te pegkamaselem, ware neileyi te me trabahanti te barku ke nekey ne inged ka neyingumaan ney, piru due nakita ran diye te mariyu ne ilis te dahat ne due lelanek, purisu nenekegsabut sikandan ne diye dan ig-eleg-eleg igpatuhun ka unturanaan.⁴⁰ Purisu impanamped dan e ka me lubid ne impangiket te me palibehat wey inengkeran dan e diye te dahat. Ne inggekad dan degma ka me lubid ne inggiket te me derakel ne begsey ne iyan egbuut ke hendei igpabayek ka barku. Nataman, ingkayew ran e ka maluag ne hinabel ne diye dapit te ulu te barku eyew diye igpeendiye te kalamag ka barku te ilis te dahat.⁴¹ Piru nekeendiye ka barku te bayew mababew ne lelanek wey nakasanglad. Amana nakasanglad ka ulu wey warad nakaweil, piru ka diye te lebut nahuhus e te makeseg ne bunlud.

⁴² Egpangimatayan e perem te me sundalu ka me pinirisu eyew ware sabeka kandan ne egpakanlumbuk wey egpakahakap diye te ilis te dahat wey egpakanpallahuy.⁴³ Piru imbalahan sikandan te kepitan te sundalu puun su egkeupian sikandin ne egluwasen si Pablu. Ne migsuhu sikandin ne egpatinugpuen diye te dahat ka langun ne egkateu ne eglumbuk, wey egpahakapen e.⁴⁴ Nataman,

impasinundul rin e ka duma ne nangeampuan te me tabla wey ke minsan nekey ne nahuhus diye te barku. Ne iling kayi ka neyimu ney, wey nekeyinguma key langun diye te ilis te dahat ne ware namenu.

28

Ka diye te Malta

¹ Ne hengkayi te nakali-hawang key e te karereetan wey te nakahakap key e, henduen ney pad naneng-nengi ne Malta bes ka ngaran te pulu.

² Maal-alukuy amana ka mahinged kanami. Nataman, migbunsud e ka uran wey maagsil ka timpu, purisu migtetemeg sikandan wey insagsahipe key nikandan.

³ Ne migpamurut si Pablu te igtemeg, piru te pegtemeg din e te kayu diye te hapuy, sahuhune ne due migligwang ne uled tenged te keinit wey migkahat te belad din.

⁴ Te pegkakita te me mahinged te uled ne migbitin-bitin te belad ni Pablu, migpalalahey e sikandan, "Nekeyimatey naa ka seini ne etew. Naluwas sikandin diye te dahat piru kene egtuhut ka palad din ne egkeuyag sikandin."

⁵ Piru insawile de ni Pablu ka uled diye te hapuy ne ware sikandin namenu.

⁶ Migtetahad ka me etew ke eglebag ka belad ni Pablu wey ke sahuhune egkapeled naa wey egkapatey, piru naluhey e sikandan ka egte-tahad ne ware ma namenu

sikandin. Ne naalin e man-e ka suman-suman dan wey migkahi, "Sabeka bes seini ne manama!"

⁷ Si Publiyu ka ngaran te pangulu te seeye ne pulu, ne ka tane din, kene de ne mariyu te seeye se neyingumaan ney. Ne insagsahipe key nikandin, ne nekeugpe key diye te kandan seled te tatelu ne aldew.

⁸ Te seeye ne timpu, miggibat-hibat de ka amey ni Publiyu su eglusungan wey egpangindes. Purisu migseled si Pablu diye te sinabeng din wey in-ampuan din, ne intel-eban din te belad din wey neulian e.

⁹ Tenged te seeye ne neyitabu, nangendiye ka langun ne me duma ne etew ne nanderalu te seeye ne pulu, wey neneulian sikandan.

¹⁰ Nataman, migpamehayan key nikandan te masalig ne me dasag, wey migpabewuhan key nikandan te keilangan ney te peggipanew.

Puun te Malta peendiye te Ruma

¹¹ Migginggaan key te tatelu ne bulan te seeye ne pulu. Nataman, miguntud key e te barku ne egngararan te "Ka me Seping ne Manama" ne migpuun te Alihandriya. Diye nekeugpe ka barku te pulu te dahat te timpu te maagsil.

¹² Ne nekeyinguma key diye te inged ne Sirakusa wey diye key pad mig-ugpe seled te tatelu ne aldew.

¹³ Ne puun diye, miglapas key e man-e

te dahat wey nekeyinguma key diye te inged ne Rigiyu. Te seup ne aldew, due miggunguma ne kalamag puun te igkakawanan ne balabahan dapit te igsile wey nekeyipanew key e mane, ne igkarangeb ne aldew, nekeyinguma key e diye te lungsud ne egngaranan te Putiyuli.¹⁴ Ne due me suled te pegpalintutuu ne nakita ney diye wey mighangyu kanami ne egpeugpeen key pad diye te kandan seled te senge simana. Ne nataman, nekeyinguma key e diye te Ruma.¹⁵ Te pegkarineg te me suled te pegpalintutuu diye te Ruma ne eggunguma key e diye, nangendiyad e sikandan ka eggsinug-ung kanami diye te Temuwanan ni Apiyu, wey diye te Tatelu ne Hirehaanan. Te pegkakita ni Pablu kandan, migpasalamat sikandin te Manama wey nabagget sikandin.

Diye te Ruma

¹⁶ Te pegginguma ney diye te Ruma, migtuhutan si Pablu ne eg-ugpe te minsan hendei ne igkeupii rin, piru due sabeka ne sundalu ne migbantey kandin.

¹⁷ Te peglihad e te tatelu ne aldew, impalibulung ni Pablu ka me pangulu te me Hudiyu te Ruma. Ne hengkayi se nalibulung e sikandan, migkahiyan e sikandan ni Pablu, "Mesuled, minsan ware neyimu ku ne mareet diye te karumaan ta wey diye te me tulumanen te

me kaap-apuan ta, inderakep a nikandan diye te Hirusalim wey imbehey diye te gubirnu te Ruma.¹⁸ Mig-in-insaan a nikandan wey eglekaan e red perem su nakita ran ne ware neyimu ku ne eleg ne eglegparan a te kamatayen.¹⁹ Piru imbalabahan seini te me pangulu te me Hudiyu, purisu napehes a ne egduput diye te Impiradur minsan ware igkasumbung ku meyitenged te me karumaan ta.²⁰ Seini ka egpuunan te impeumew ku sikaniyu wey migpakiglalag a kaniyu; su naprisu a kuntee tenged kandin ne iyan impallateng te keet-etawan te Israil."

²¹ Ne migkahi sikandan, "Ware key nakarawat te sulat meyitenged keykew ne egpuun te Hudiya. Ne minsan ka me suled ta ne diye egpuun, ware nakahuhud wey nakanangen te mareet meyitenged keykew.²² Piru egkeupian key degma ne egpakarineg ke nekey ka igkalalag nu, su natahaan ney ne minsan hendei ne inged, kene ne meupiya ka inlalag te me etew meyitenged te punduk ne inapilan nu."

²³ Purisu migsabut sikandan te aldew ke ken-u sikandan eglibulung. Te pegginguma te aldew ne nasabutan dan, masalig ka me etew ne miglibulung diye te baley ne in-ugpaan ni Pablu. Ne puun te maselem peendiye te marusilem, inwaliyan sikandan ni Pablu

meyitenged te Peghari te Manama. Impakannekal sikandin ne egpakapalin-tutuu sikandan ki Hisus pinaahi te Balaud ni Muwisis wey te me prupita.²⁴ Ne due pila kandan ka migpalintutuu te inlalag din, piru ka duma ware.²⁵ Purisu ware sikandan nekegbennaley, wey nanguli e sikandan te nakapenga si Pablu ka miglalag kayi: “Malehet ka inlalag te Panisingan te Manama diye te kaapuan niyu pinaahi ki prupita Isayas,

²⁶ ‘Hendiyei nu wey lalahi nu
seini ne me etew:
Minsan egmenuwen niyu
te egpammineg, kene
kew iya egpakasabut.
Ne minsan egmenuwen niyu
te egtengteng, kene
kew iya egpakakita.

²⁷ Su memakehal ka ulu te
seini ne me etew,
insapgengan dan ka
talinga ran,
wey impileng dan ka
mata ran.

Sukema ke egpakakita sikan-
dan,
wey egpakarineg,
wey egpakasabut,
wey eglibed kayi te keddi,
ne egbawian ku sikan-
dan.’”

²⁸⁻²⁹ Ne miggipenga ni Pablu te migkahi, “Purisu keilangan ne egkaneng-nengan niyu ne ka lalag te Manama meyitenged te kaluwasan, impangguhud e

diye te kene ne me Hudiyu
wey egpammineg sikandan
kayi!”*

³⁰ Miggingumaan si Pablu te daruwa ne leg-un diye te in-ugpaan din ne baley ne in-arkilaan din, wey insagsahipe din ka langun ne migpanumbaley kandin.

³¹ Inwali rin ka meyitenged te Peghari te Manama wey migpanulu meyitenged te Magbebaye ne si Hisu Kristu. Mabulut ka pegpanulu din wey ware migbalabag kandin.

* **28:28-29** Due me sinulat ne inlagkes ka birsikulu 29 piru ware seini diye te malehet ne migpuunan. Intimul naan de seini ne miggendue: Te pegkapenga ni Pablu te eglalag kayi, nanguli e ka me Hudiyu ne amana egmekeg-apul.

Ka Sulat ni Pablu te Matig-Ruma

Igpewun-a

Ka Sulat ni Pablu te Matig-Ruma impeendiye din te me Hudiyu wey te kene ne me Hudiyu ne egpalintutuu wey egsalig ki Hisu Kristu. Insulatan din sikan dan eyew egpakaandam te pegbebentaan din ne egpanumbaley diye te kandan. Migplanu si Apustulis Pablu ne egtrabahu duma te me Kristuwanen diye te kene de egkaluhey, ne egkataman eggendiyad sikandin te Ispanya pinaahi te bulig dan. Migsulat sikandin eyew te pegpangguhud meyitenged te pegasabut din te egpalintutuu te Kristuwanen wey te aldew-aldew ne peg-ugpe isip me Kristuwanen. Ka seini ne baseen, nasulatan te kumplitu ne pegpasabut ni Pablu meyitenged te guhuren din.

Impangemusta rin ka migmalintutuu diye te Ruma, wey impangguhuran din te in-ampuan din sikandan. Pegkapenga rue, ingguhud e ni Pablu ka uluwan te sulat din, "Su pinaahi te Meupiya ne Panugtulen, impaneng-neng te Manama ke immenu rin te eg-isip ne matareng ka me etew." (1:17a). Ka langun ne etew, Hudiyu ma wey se kene, keilangan ne egkeyimu ne matareng diye te tangkaan te Manama

pinaahi te pegpalintutuu ki Hisu Kristu.

Ka seup ne impangguhud ni Pablu iyan ka iyam ne umul pinaahi te pegasabeka ki Kristu ne diye egpangkus te iyam ne rilasyun diye te Manama. Duen e keupianan te migmalintutuu duma te Manama wey inluwas sikandan pinaahi te geem te Panisingan te Manama puun te geem te sale wey te kamatayen. Te kapitulo 5-8, migguhud si Pablu meyitenged te tuyu te Balaud te Manama wey te geem te Panisingan te Manama due te migmalintutuu.

Migpakanekal si Pablu ne egkatabak din ka inse ke egmenuwen ne egpakatupu ka me Hudiyu wey ka kene ne me Hudiyu te planu te Manama para te langun ne etew. Impasabut ni Pablu ne baad e te planu te Manama ne ka peggubabe te me Hudiyu te kene de egkaluhey diye egpangkus te igpakawali ka Meupiya ne Panugtulen diye te kene ne me Hudiyu. Piru meyitenged te peg-alam te Manama te me Hudiyu, indakelan din ded sikandan te geyinawa tenged te saad din te kaap-apuan dan. Puun kayi, ka langun ne etew egpakarawat te geyinawa wey hid-u te Manama pinaahi ki Kristu Hisus.

Te katammanan, migpanengneng si Pablu ke egmenuwen te peg-ugpe isip Kristuwanen, labew en iya te

paahi te pegparawdawatey
wey pegpaheyheyinaweeey
te tagse sabeka. Inlagkes
din degma ka me uluwan
iling te pegpamakey te
Manama, ka katungdanan
ne keilangan ne eggimuwen
te me Kristuwanen diye te
gubirnu wey te tagse sabeka,
wey ka me inse meyitenged
te kunsinsya. In-epus ni
Pablu ka sulat din pinaahi
te pegpangemusta rin wey te
me duma rin, wey te pagsaye
din te Manama.

Ka nasulat te seini ne baseen

Igpewun-a wey uluwan
1:1-17

Migkeilangan ka etew te
kaluwasan **1:18-3:20**

Ka paahi te Manama te
pegluwas te etew **3:21-4:25**

Ka iyam ne umul due te ki
Kristu **5:1-8:39**

Ka planu te Manama
meyitenged te Israil **9:1-11:36**

Ka peg-ugpe te Kristuwa-
nen **12:1-15:13**

Ka katammanan wey me
pangemusta **15:14-16:27**

¹ Sikeddiey si Pablu ka
migpeuyan kayi. Uripen a
ni Hisu Kristu wey in-alam
a ne egkeyimu ne apustulis
eyew egwali te Meupiya
ne Panugtulen ² ne insaad
dengan te Manama pinaahi
te me prupita diye te Matulus
ne Kasulatan. ³ Ka Meupiya
ne Panugtulen, meyitenged
sika te Anak din ne si Hisu
Kristu. Ne sumale te kandin
ne pegkeetew, kabuhalan

sikandin ni Dabid. ⁴ Ne
meyitenged te pegkamatulus
din isip Manama, * impakita
te Amey ne Anak din ka
Magbebaye ta te peg-uyag
kandin pinaahi te geem
din. ⁵ Pinaahi ki Kristu wey
eyew egkareyrey sikandin,
neyimu key ne apustulis
tenged te keupiya te Manama
eyew egpanulu te langun ne
etew ne egpalintutuu wey
egtuman kandin. ⁶ Sikaniyu
degma se matig-Ruma, in-
lagkes kew alama te Manama
eyew egkasabeka due ki Hisu
Kristu.

⁷ Migsusulat a kaniyu lan-
gun due te Ruma ne miggeyi-
nawaan wey in-alam te Man-
ama ne egkeyimu ne me keet-
etawan din.

Ka keyid-u wey keupianan
ne egpuun te Manama ne
Amey wey te Magbebaye ta
ne si Hisu Kristu, egkaangken
niyu.

*Ka pegbebentaan ni Pablu
ne egpanumbaley diye te
Ruma*

⁸ Hun-a te langun, eg-
pasalamat a te Manama ta
pinaahi ki Hisu Kristu tenged
kaniyu langun su nahuhud
diye te langun ne inged ka
egpalintutuu niyu. ⁹ Ka
Manama ka talagpamalehet
ku ne layun ku sikaniyu
iglagkes te peg-ampu ku.
Sikandin ka Manama ne
impamakey ku pinaahi te
pegpakannekal ku te pegwali
te Meupiya ne Panugtulen
meyitenged te Anak din.
¹⁰ Layun a eg-ampu diye te

* **1:4** Te Grigu: Panisingan ne Matulus.

kandin ne igtuhut din perem ne egpakapanumbaley ad due te kaniyu. Su naluhey e¹¹ ne amana ad iya egkeupian ne egpakigkita kaniyu eyew egpakapanulu a kaniyu te katuenan puun te Panisingan te Manama eyew egkeehet ka pegpalintutuu niyu.¹² Iyan ku igrasabut ne egmabagbaggetey ki eyew egkeehet ka pegpalintutuu ta langun.

¹³ Me suled, egkeupian a ne egkanengnengan niyu ne kamasalig ad migbebentaan ne egpanumbaley due te kaniyu, piru due egpabalag keddiey taman kuntee. Egkeupian a ne eggendue su eyew duen e man-e perem me duma niyu due ne egkeuyan ku ne egpalintutuu e ki Hisus, iling te innimu ku te kene ne me Hudiyu diye te duma ne me inged.¹⁴ Su ka katungdanan ne keilangan ne eggimuwen ku iyan ka egpangguhud te Meupiya ne Panugtulen diye te langun ne etew ne nekeiskuyla wey ware nekeiskuyla, wey diye te matagseb wey kene ne matagseb.¹⁵ Sikan naa ka egkabagget-bagget ad iya degma ne egwali te Meupiya ne Panugtulen kaniyu due te Ruma.

¹⁶ Su kene ku igkeyilew ka Meupiya ne Panugtulen, su sika ka geem te Manama te pegluwas te langun ne egpalintutuu, an-anayan ka me Hudiyu wey peendiye te kene ne me Hudiyu.¹⁷ Su pinaahi

te Meupiya ne Panugtulen, impanengneng te Manama ke immenu rin te eg-isip ne matareng ka me etew. In-isip din sikandan ne matareng pinaahi re te pegpalintutuu, su sumale te nasulat te Kasulatan, "Egkeuyag ka etew ne namatareng pinaahi te pegpalintutuu rin."

Ka langet te Manama te me etew ne egsupak kandin

¹⁸ Impanengneng te Manama ne diye te langit ne egkalangetan sikandin te me etew ne egsupak kandin wey maddeet se hinimuwan, su egkabalabahan ka kamalehetan te mareet ne hinimuwan dan.¹⁹ Su ka kamalehetan meyitenged te Manama, nasabut dan e su sikandin mismu ka migpasabut kandan.²⁰ Minsan kene egkiteen ka Manama, impapitew rin kanta ka karesen din ne ware egtamanan wey ka pegka-Manama rin pinaahi te immangimu rin. Amana egkasabut seini puun dengan te peggimu te kalibutan. Sikan naa, kene iya sikandan egpakapanalakaye ne ware nakasabut.²¹ Su minsan neilaan dan e ka Manama, piru ware dan sikandin dayana wey pasalamati isip Manama. Ke kene, ware karuan te egsumsumanen dan wey warad meupiya ne tahu te ulu ran, sikan naa ka kenad sikandan egsabut te kamalehetan.²² Kahiyan dan ne me matagseb sikandan,

kunaleg te egkengeungel bes.
 23 Ne ware dan simbaa ka Manama ne ware egpatayan, ke kene, iyan dan insimba ka diyus-diyus ne impeiling te etew ne due kamatayen, wey te manuk-manuk, me mananap wey te me uled.

24 Purisu imparuyunduyunan e sikandan te Manama ne eggimu te mallindit ne igkeupii te suman-suman[†] dan, sikan naa ka migparulun-dulunan dan e ka langun ne malindit ne himu ne egpekeyilew te me lawa ran. 25 Ne ware sikandan migpalintutuu te kamalehetan meyitenged te Manama su iyan dan impalintutuuwan ka ubat. Ne iyan dan insimba wey impamakey ka innimu re te Manama wey imbalahad dan ka Talaggimu ne iyan perem eleg ne egsayeen te ware egtamanan. Malehet iya!

26 Puun due, imparuyunduyunan e sikandan te Manama ne egparulun-dulun te mekeyilew-hilew ne igkeibeg te me lawa ran. Ne minsan ka me malitan, kenad ne lukes pad ka egguliren dan su egmeel-elinelye e. 27 Ne iling ded degma ka me lukes, me baliyuten e sikandan wey kenad ne malitan ka egguliren dan su egmeel-elinelye e degma. Sikandan se migparulun-dulun kayi te mekeyilew-hilew ne hinimuwan, egdusaan sikandan

sumale te sale dan.

28 Ne puun su ware karuan kandan ka peg-ila te Manama, imparuyun-duyunan din e sikandan te mallindit ne suman-suman dan wey te hinimuwan ne kene perem ne eleg ne eggimuwen.

29 Neelin naan de iya ne mareet ka egkasuman-suman dan ne eggimuwen. Maddeet sikandan, me halamlamen, me talagdereet, me iimmeen, me talaggimatey, me usig, me limbungen, malindit se egsumsumanen wey salupeten. 30 Me id-iranen sikandan wey egdumut te Manama. Malangit ne egpanlelag, egmapitew-pitew re wey me hambuhen, layun egsuman-suman te

mareet ne eggimuwen wey talagsupak te amey wey iney ran. 31 Egkengeungel sikan-dan, kene egkasalihan, ware geyinawa ran diye te duma wey kene ne hiid-uwen. 32 Minsan nanengnengan dan e ka Balaud te Manama ne likes te kamatayen ka eggimu te iling dutu, piru imparulun-dulunan dan ded seeye ne eggimuwen wey indayan dan pad ka duma ne eggimu te iling dutu.

2

Kamatareng ne peggukum te Manama

¹ Na, kene ka suman-suman ne egpakanalakaye ka te Manama te peggukum nu te duma nu ne mareet se hinimuwan iling keykew.

Su emun ke miggukuman nu sikandin, sikeykew red iya ka miggukum te pegkeetew nu.² Su nakanengneng ki ne eleg ka Manama te peggukum din te me etew ne mareet se hinimuwan.³ Purisu kene ka suman-suman ne egpakaalihu ka te legpad te Manama ke nekeg-iling kew red te miggukuman nu ne mareet se hinimuwan.⁴ Ka Manama amana iya ne meupiya kanta, nenaneyi egkeupul, wey kene egkapelaan. Ne kema ke immareet nu re te egsuman-suman sika? Ware ke bes nakataha te neyid-u keykew ka Manama eyew eg-inniyug ka te me sale nu?⁵ Piru tenged su makehal ka ulu nu wey kene ka eg-inniyug te sale, nasi egmabehat ka iglegpad te Manama keykew te aldew te langet din. Te sikan aldew, egkakite e ka matareng ne peggukum din.⁶ Su egsulian te Manama ka tagse sabeka sumale te hinimuwan din.⁷ Egbehayan din te umul ne ware egtamanan seeye se migpabulus miggimu te meupiya eyew egkarayan te Manama wey egbantuhen.⁸ Piru seeye se egmanuhestuhes wey ware migpalintutuu te kamalehetan wey nasi miggimu te mareet, egpokaneem-neem te egmangebel-ebel ne langet te Manama.⁹ Egkabaybayaran wey egkalasayan ka langun ne etew ne miggimu te mareet: an-anayan ka me Hudiyu wey peendiye te

kene ne me Hudiyu.¹⁰ Piru egkarayan wey egbantuhen wey egbehayan te keupianan te Manama ka langun ne miggimu te meupiya: an-anayan ka me Hudiyu wey peendiye te kene ne me Hudiyu¹¹ su nekeg-iling de iya ka peggukum te Manama te langun.

¹² Su egdusaan te Manama ka kene ne me Hudiyu emun ke egpakaale sikandan minsan ware sikandan nabehayi te Balaud te Manama. Ne ka me Hudiyu mule, egdusaan pinaahi te Balaud te Manama ke egpakaale sikandan.

¹³ Su kene ne iyan in-isip ne matareng diye te tangkaan te Manama ka migpammineg te Balaud, ke kene, ka migtuman te Balaud.

¹⁴ Su minsan ware nabehayi te Balaud te Manama ka kene ne me Hudiyu, piru hendue te egkatuman dan ded ka Balaud te egpanuluun sikandan te suman-suman dan te eleg ne eggimuwen.

¹⁵ Impakita ran pinaahi te meupiya ne himu ran ne napamulaan e ka me pusung dan te me suhu diye te Balaud, su egpakauman-suman e sikandan ke meupiya naa ka innimu ran wey ke mareet.¹⁶ Egkeyitabu seini te aldew ne egpewukuman e te Manama ki Kristu Hisus ka neeles ne hinimuwan wey suman-suman te me etew, sumale te Meupiya ne Panugtulen ne inwali ku.

Ka me Hudiyu migsupak te

Balaud

¹⁷ Sikaniyu se iling ku te Hudiyu, migsalig-salig kew te Balaud wey migpegpeggasal ne marani te Manama. ¹⁸ Ne nakanengneng kew degma ke nekey ka igkeupii te Manama wey napanulu te Balaud ke nekey ka meupiya. ¹⁹ Nasabeka ka suman-suman niyu ne talagkitkit kun te me butud, wey layag te seeye se diye pad te marusilem, ²⁰ wey talagpanulu te me ungel, wey te me etew ne egpekeiling te me bate. Su nanengnengan niyu ne ka katuenan wey kamalehetan due te Balaud te Manama. ²¹ Na, kene niyu naa egpanuluen ka pegkeetew niyu emun ke talagpanulu kew te duma? Migwali kew ne kene egpanakew, egkaayun naa ne egpanakew kew? ²² Migkahi kew ne ingkene ka pegpanlibug, egpanlibug kew naa? Ingkeepes niyu ka me diyus-diyus, egpanakawan niyu naa ka me timplu ne impanahuan kayi? ²³ Na sikaniyu se migpegpeggasal te Balaud te Manama, egpeylawan niyu naa ka Manama pinaahi te pegrupak niyu te Balaud? ²⁴ Su nasulat te Kasulatan, “Tenged kaniyu te me Hudiyu, imbaley-baley te kene ne me Hudiyu ka ngaran te Manama.”

²⁵ Duen de karuan te pegpatuli niyu, ke egtumanen niyu ka Balaud. Piru ke egsupaken niyu ka Balaud, hen-

duen kew red te kene ne me Hudiyu ne ware natulii. ²⁶ Purisu ke egtumanen te kene ne me Hudiyu ka Balaud, minsan ware sikandan natulii piru eg-ileen te Manama ne natulian. ²⁷ Sikandan se ware natulii piru egtuman te Balaud, iyan egpakaipayilew kaniyu diye te Manama su natulian kew wey due Balaud piru nasi migsupak kayi. ²⁸ Su ka malehet ne Hudiyu, kene ne diye de te ulaula, wey ka malehet ne pegpatuli, kene ne diye de te lawa. ²⁹ Ka malehet ne Hudiyu wey natulian, kene ne puun su natulian sikandin sumale te Balaud, ke kene, puun su imbalbalawan e te Panisangan te Manama ka pusung din. Minsan kene sikandin egdayanen te me etew piru ka Manama egdayan kandin.

3

¹ Na, nekey naa ka nakameupiya te me Hudiyu du te kene ne Hudiyu? Duen naa karuan te pegpatuli?

² Amana ne masalig ka nakameupiya isip Hudiyu! Hun-a te langun, ka me Hudiyu ka insalihan te lalag te Manama. ³ Piru due me Hudiyu ne kene ne matinumanen. Puun due, kene naan e degma egmatinumanen ka Manama wey egbalaharen din naan e ka saad din? ⁴ Kene! Su kene ne ubaten ka Manama minsan pad ubaten ka langun ne etew. Su sumale te nasulat te Kasulatan,

“Manama, emun ke eglalag ka, egkanengnengan ne matareng ka.

Ne emun ke due egsumbung keykew, egpanalu ka iya.”

⁵ Ne kema ke due egkah, “Piru ke iyan egpakita te pegkamatareng te Manama ka me sale ta, kene ne eleg ne egleparan ki te Manama.” (Migpangasak a iling te ware aperu ne etew.) ⁶ Kene ki iya egpakkahi te iling due! Su emun ke kene ne matareng ka Manama, egmenuwen din naa te eggukum ka langun ne etew kayi te ampew te tane?

⁷ Ne kema ke due man-e egkahi, “Piru ke igkapapitew pinaahi te peg-uubat ku ne layun malehet ka lalag te Manama wey egmabantug sikandin tenged kayi, mani naa te eggukuman e pad ne makasesale?” ⁸ Due imbayung kanami ne migkahi key kun, “Mania te kene ki eggimu te mareet eyew meupiya ka epgangkusan?” Sikandan se me talagbayung, eleg ne egleparan.

Ware etew ne matareng

⁹ Na, me-meupiya ki naan pad se me Hudiyu te kene ne me Hudiyu? Kene! Su ingkahi kud e ne ka langun ne etew nariralem te geem te sale, Hudiyu ma wey se kene.

¹⁰ Su sumale te Kasulatan, “Ware minsan sabeka ne etew ne matareng,

¹¹ ware sabeka ne egpakashabut te Manama wey ware egpammitew kandin.

¹² Mig-inniyuhan dan langun ka Manama wey warad karuan dan diye te kandin; wey ware minsan sabeka ne miggimu te meupiya.

¹³ Egpekeiling te egngareg ne lebeng ka abelengan dan, inggamit dan ka me dile dan te pegpanlimbung wey egpekeiling te lalas te uled ka me lalag dan.

¹⁴ Neelin ne masakit ne dilus ka diye te be-be dan.

¹⁵ Malemu re diye te kandan ka peggimatey;

¹⁶ Egdereet sikandan wey egbayad-bayah te me etew minsan hendei sikandan egbaye.

¹⁷ Ware sikandan nakataha te dalan te keupianan,

¹⁸ wey ware pegkaaldek dan te Manama.”

¹⁹ Nakanengneng ki ne seeye se imbehayan te Balaud iyan perem egtuman dutu, sikan naa sikanta se me Hudiyu, kene ki egpakkangatarengan ne ware sale ta wey eggukuman ki te Manama duma te langun ne etew kayi te ampew te tane. ²⁰ Su ware egisipen ne matareng diye te tangkaant te Manama pinaahi te pegtuman te Balaud. Su ka

Balaud ilaan de ne due sale te etew.

Ka paahi te Manama te peg-isip ne matareng te etew

²¹ Piru kuntee, impaneng-neng e te Manama ka paahi ke immenu rin te peg-isip ne matareng ka me etew, piru kene ne pinaahi te pegtuman te Balaud. Nasulat seeye ne paahi diye te Balaud ni Muwisis wey te sinulat te duma ne me prupita.

²² In-isip ne matareng te Manama ka langun ne migpalintutuu wey migsalig ki Hisu Kristu. Nekeg-iling de iya ka langun diye te kandin ²³ su nakasale ka langun wey nakariyu-diyu e te kabantug te Manama. ²⁴ Piru tenged te keupiya wey keyid-u ne indasag te Manama kanta langun, in-isip ki nikandin ne matareng pinaahi te pglekat kanta ni Kristu Hisus. ²⁵ Impeuyan sikandin te Manama isip igpalangesa te sale ta eyew egkapasaylu ki ke egpalintutuu wey egsalig ki kandin. Ne puun due, igpakapapitew te Manama ka katareng din su imbalahad din pad dengan ka me sale te me etew wey ware din sikandan duseyi.

²⁶ Neyimu sika te Manama eyew kuntee igpakapapitew rin ka katareng din pinaahi ki Hisus. Matareng sikandin wey eg-isip ne matareng ka langun ne egpalintutuu wey egsalig ki Hisus.

²⁷ Purisu kene ki eg-pakapeggasal te pegkamatareng ta su in-isip ki nikandin ne matareng tenged te pegpalintutuu ta ki Hisu Kristu wey kene ne tenged te pegtuman ta te Balaud. ²⁸ Su migsumansuman key ne in-isip ne matareng te Manama ka etew tenged te pegpalintutuu, kene ne tenged te pegtuman te Balaud. ²⁹ Ne kene ne Manama re sikandin te me Hudiyu su Manama red degma sikandin te kene ne me Hudiyu, ³⁰ su sabsabeka re ka Manama. Ne elin din eg-isipen ne matareng ka me Hudiyu wey ka kene ne me Hudiyu tenged de te pegpalintutuu ran. ³¹ Ne puun te pegpalintutuu ta, indapig te naan e ka Balaud? Ware, su nasi te re iya impamalehetan ka Balaud.

4

In-isip ne matareng si Abraham tenged te pegpalintutuu rin

¹ Nekey naa ka igkalalag ta meyitenged te neula-ula ni Abraham ne apu ney te me Hudiyu? ² Ne emun ke in-isip ne matareng si Abraham te Manama pinaahi te hinimewan din, due perem igpakapeggasal din. Piru ka malehet, ware igpakapeggasal rin diye te tangkaan te Manama. ³ Su nasulat te Kasulatan ne miggenendue, “Migpalintutuu si Abraham

te Manama, sikan naa ka insip sikandin ne matareng te Manama.”⁴ Egsuulan ka etew ne egtrabahu, piru kene egkaayun ne eg-isipen ne dasag ka insuul kandin su bayad te pegtrabahu rin.⁵ Piru ka etew ne ware maggimu te minsan nekey eyew egkaluwas piru migsalig te Manama ne eg-isip ne matareng te seeye se me etew ne kene pad egikul te Manama, eg-isipen sikandin ne matareng tenged te pegpalintutuu rin.⁶ Sikan ded ka igpasabut ni Dabid te ingkahi rin ne egpanalanginan ka etew ne in-isip ne matareng te Manama, kene ne tenged te hinimuwan din:
7 “Egpanalanganin seeye se impasaylu e te Manama,
 wey in-awe e ka me sale!

8 Egpanalanganin ka etew ne inlingawan e ka sale te Magbebaye ne Manama!”

9 Na, kandan naan de te me Hudiyu ne nenatulian ka sika ne panalangin, wey ke lagkes e degma ka kene ne me Hudiyu ne ware nenatulii? Nakahi kud e ne in-isip ne matareng si Abraham te Manama tenged de te pegpalintutuu rin.¹⁰ Ken-u naa seeye neyitabu? Te timpu naa ne natulian e si Abraham wey ke ware pad sikandin natulii? Neyitabu seeye te timpu ne ware pad sikandin natulii.¹¹

4:7 Sal 32:1-2. **4:11** Hin 17:10. **4:13** Hin 17:4-6; 22:17-18; Gal 3:29. **4:14** Gal 3:18. **4:16** Gal 3:7.

Intulian sikandin isip tuus ne matareng e tenged te pegpalintutuu rin te ware pad sikandin natulii. Sikan naa ka neyimu sikandin ne amey te langun ne migpalintutuu ne ware pad natulii eyew eg-isipen degma te Manama ne matareng sikandan.¹² Ne amey degma si Abraham te nenatulian, kene ne puun de su nenatulian sikandan, ke kene, tenged su migiling degma sikandan te pegpalintutuu te amey ney ne si Abraham te ware pad natulii.

Ka saad te Manama ne egkarawat pinaahi te pegpalintutuu

13 Iyan saad te Manama diye te ki Abraham wey te me kabuhalan din ne egkaangken dan ka kalibutan. Ne kene ne tenged te pegtuman din te Balaud ka egpuunan te sika ne saad, ke kene, tenged te pegpalintutuu wey in-isip sikandin ne matareng te Manama.¹⁴ Su emun ke iyan de egpakaangken te saad te Manama ka migtuman te Balaud, egkeyimu ne ware karuan te pegpalintutuu ta wey te saad te Manama.¹⁵ Su ka Balaud ka egpuunan ne egdusaan te Manama ka me etew. Ke ware balaud, ware degma egkasupak te me etew.

16 Purisu tenged de te pegpalintutuu ne egkarawat te me etew ka insaad te Manama eyew pamalehet

ne innimu rin sika isip dasag diye te me kabuhalan ni Abraham. Ka saad te Manama kene ne para re te me Hudiyu ne migtuman te Balaud, ke kene, egkarawat iya te langun ne migpalintutuu iling ki Abraham su sikandin ka amey te langun ne migpalintutuu.¹⁷ Sudue nasulat te Kasulatan ne miggendue, "Innimu ku sikeykew ne amey te me etew puun te masulug ne me nasud." Ne natuman sika su neyimu si Abraham ne amey ta langun diye te tangkaan te Manama ne impalintutuuwan din. Sikandin ka Manama ne egpekeuyag te me minatey wey egpakakahi ne duen e ka ware pad.¹⁸ Migpalintutuu si Abraham wey migpalateng te insaad kandin te Manama minsan hendue te kenad egkatuman. Sikan naa ka neyimu sikandin ne amey te me etew puun te masulug ne me nasud sumale te ingkah kandin te Manama ne miggendue, "Egpekeiling kasulug te me bituen diye te langit ka me kabuhalan nu."¹⁹ Te seeye ne timpu, egkabuyag e si Abraham wey hendue te kenad egpakaanak su egmahatus (100) e ka idad din. Nakataha degma sikandin ne kenad eg-anak ka asawa rin ne si Sara, piru ware sikandin mig-engked ka migpalintutuu.²⁰ Ware sikandin migduwa-ruwa ne egkatuman ka insaad te

Manama kandin wey nasi de iya neehet ka pegpalintutuu rin, wey insaye din ka Manama.²¹ Nasabeka ka suman-suman din ne ka Manama egpaketuman iya te insaad din.²² Purisu tenged te sika ne pegpalintutuu, inisip sikandin ne matareng te Manama.²³ Ne kene ne ki Abraham de ka insulat ne lalag ne miggendue, "Inisip sikandin ne matareng,"²⁴ ke kene, nalagkes ki degma se egpalintutuu wey egsalig te Manama ne mig-uyag te Magbebeye ta ne si Hisus.²⁵ Impeyimatayan si Hisus tenged te me sale ta wey inuyag sikandin eyew eg-isipen ki ne matareng te Manama.

5

Ka pegkahale tenged te pegkamatareng

¹ Purisu tenged su in-isip kid ne matareng te Manama tenged te pegpalintutuu ta, nekeg-uli e ka meupiya ne geyinawa ta diye te kandin pinaahi te Magbebeye ta ne si Hisu Kristu.² Ne pinaahi te pegpalintutuu ta diye te kandin, nakaneem-neem ki te seini se keupiya wey keyid-u te Manama ne migdesdesenan tad e. Ne egkahale ki man-e te impalateng ta ne egpakesawit te katelesan te Manama.³ Ne kene ne sikan de, su igkahale ta degma minsan due me pegbayad-bayad kanta su egpakabasbas sika kanta ne egkateu ne eg-antus.⁴ Ne

emun ke egkateu kid ne eg-antus, egkeehet e ka pegpalintutuu ta. Ne emun ke egkeehet e ka pegpalintutuu ta, egpakkapallateng kid ne egpakkasawit te katelesan te Manama.⁵ Kene ki egkeyilawan te impallateng ta su nakapamule e ka geyinawa te Manama kayi te pusung ta pinaahi te Panisingan din ne imbehey rin kanta.

⁶ Te eleg ne timpu taheed te kene ki pad egpekeyimu te igkeupii te Manama, migpeyimatey si Kristu para te me etew ne kene eg-ikul te Manama. ⁷ Na, ware buwa etew ne egpeyimatey para te matareng ne etew, piru kema ke duen buwa etew ne kene egkaaldek ne egpeyimatey para te meupiya ne etew.⁸ Piru impapitew te Manama ka dakel ne geyinawa rin kanta su migpatey si Kristu para kanta te makasesale ki pad te seeye ne timpu.

⁹ Ne puun su in-isip kid te Manama ne matareng pinaahi te langesa ni Kristu, wey ki naan pa iya kene egluwasen nikandin ligkat te legpad te Manama keureme.¹⁰ Su minsan kuntere ki pad dengan te Manama, piru nekeg-uli ded ka meupiya ne geyinawa ta kandin pinaahi te kamatayen te Anak din. Ne puun su nekeg-uli ded ka meupiya ne geyinawa ta kandin, wey ki naan pa iya kene egkaluwas keureme te neuyag man ded si Kristu.¹¹ Ne kene ne sikan de, su

imbehayan ki te Manama te kahale tenged te Magbebaye ta ne si Hisu Kristu ne iyan egpuunan ne nekeg-uli ka meupiya ne geyinawa ta te Manama.

Ka intamanan te innimu ni Adan wey te innimu ni Kristu

¹² Ne nakaseled ka sale kayi te ampez te tane pinaahi ki Adan, wey ka sale mig-uyan te kamatayen, wey ka langun egbaye te kamatayen su nakasale ka langun ne etew.¹³ Minsan tapey e kayi te ampez te tane ka sale te ware pad ibehey ka Balaud, piru ware neila su ware Balaud.¹⁴ Piru minsan pad iling due, narahabas ka langun namatey puun pad te timpu ni Adan taman te timpu ni Muwisis, minsan seeye se kene ne iling ka sale te ki Adan ne migsupak te Manama.

Si Adan ka egkapahunsilingan te nakasinundul ne si Kristu.¹⁵ Piru ware nekeg-iling ka sale ni Adan wey ka indasag te Manama. Su masulug ka nammatey tenged te sale te sabeka ne etew, piru subla pad iya ne dakel ka keupiya wey keyid-u te Manama wey ka dasag din diye te masulug ne me etew pinaahi te keupiya wey keyid-u te sabeka ne etew ne si Hisu Kristu.¹⁶ Ne ware degma nekeg-iling ka egpangkusan te sale ni Adan wey te indasag te Manama. Su egkarahabas ka me etew ne eglegparan tenged te sale

ni Adan, piru egkapasaylu ka me etew te dakel ne sale dan wey eg-isipen ne matareng tenged te dasag te Manama.

¹⁷ Egkarahabas ka langun egpatey tenged te sale te sabeka ne etew. Ne tenged degma te sabeka ne etew ne si Hisu Kristu, subla pad iya ne egkabayangan te umul ne ware egtamanan seeye se nakarawat te dakel ne keyid-utte Manama wey te katareng ne indasag din.

¹⁸ Purisu tenged te sale te sabeka ne etew, egkarahabas te legpad ka langun ne etew, ne tenged degma te matareng ne himu te sabeka ne etew ne si Kristu, eg-isipen ded ne matareng ka me etew wey egpakarawat te umul ne ware egtamanan. ¹⁹ Tenged te pepsupak te sabeka ne etew, masulug ka neyimu ne makasesale. Ne tenged degma te pegtuman te sabeka ne etew, masulug ka egkeyimu ne matareng.

²⁰ Imbehey te Manama ka Balaud eyew egkanengnengan te me etew ne dakel ka sale dan. Tenged due, nasi de iya migdakel ka sale, piru nanasnasian de iya degma migdakel ka keupiya wey keyid-u te Manama. ²¹ Ne eyew iling te sale ne egpakarabas te langun ne egpatey, ka keyid-u degma te Manama egpakarabas te me etew ne egkeisip ne matareng wey egpakarawat te umul ne ware egtamanan pinaahi te Magbebaye ta ne

si Hisu Kristu.

6

Kapegpatay wey pegkeuyag due ki Kristu

¹ Na, nekey naa ka igkalalag ta? Egpabulus ki naa ka eggimu te sale eyew egkanasnasion egdakel ka keupiya wey keyid-u te Manama? ² Kene! Su meytenged te sale, nekeiling te migpatey kid due wey kene kid egpabulus eggimu te sale. ³ Nanengnengan niyud ne sikanta langun se nabewutismuwan e ne nasabeke e due ki Kristu Hisus, in-isip kid ne nakalagkes degma kandin te migpatey. ⁴

Su te nabewutismuwan kid e, nakalagkes kid ki Kristu te inlebeng eyew egugpe ki degma te iyam ne umul iling te pegkeuyag ni Kristu pinaahi te karesen te Amey. ⁵ Su emun ke nakalagkes kid kandin te migpatey, egpakalagkes ki red man-e te pegkeuyag din. ⁶ Su nanengnengan ta ne inlansang e te krus ka tapey ne pegkeetew ta duma kandin eyew egkareetan e ka lawa ta ne makasesale wey kene kid e egkeuripen te sale. ⁷ Su kenad eg-utengan te sale ka etew ne migpatey e. ⁸ Ne emun ke nakalagkes kid ki Kristu te migpatey, egpalintutuu ki ne egkalagkes ki degma te umul rin. ⁹ Su nanengnengan ta ne kenad egpatey pad eg-abey si Kristu puun su neuyag din e, wey

kenad sikandin eg-utengan te kamatayen.¹⁰ Su kasabeka re sikandin migpatey eyew te peg-awe te sale wey kenad egkaabey pad. Piru ka pegugpe din kuntee para te pegpamakey te Manama.¹¹ Purisu is-isipa niyu degma ne nekeiling te migpatey kew e wey kenad egpakasale* piru neuyag kew eyew egpamakey te Manama tenged te pgsabeka niyu ki Kristu Hisus.

¹² Sikan naa, kene niyu paruyun-duyuni ka sale ne egmandu kaniyu eyew kene kew egpakaruma-ruma te mareet ne igkeupii te lawa niyu.¹³ Kene niyu paruyunduyuni ne egpakasale ka minsan nekey ne baad te lawa niyu, ke kene, paruyunduyuni niyu ka Manama ne eggamit te lawa niyu isip me etew ne nammatey piru inuyag e. Ne ipahamit niyu te Manama ka intiru ne lawa niyu te matareng ne hinimuwan.¹⁴ Su ka sale, kenad egmandu kaniyu tenged su ware kew nariralem te Balaud, ke kene, nariralem kew e te keyid-u.

Ka eggimu te matareng

¹⁵ Nekey naan e, eggimu ki naan ded te sale su ware ki nariralem te Balaud, ke kene, te keyid-u? Kene!¹⁶ Ware kew bes nakataha ne emun ke egpeiluk-iluk kew te senge etew isip matinumanen ne uripen, sikandin iya ka ahalen niyu? Sikan naa, emun ke egparuyun-duyun

kew te sale, uripen kew iya te sale ne diye egpangkus te kamatayen. Ne emun egpeuripen kew eyew te pegtuman te Manama, egkeyimu kew ne matareng.¹⁷ Piru migpasalamat a te Manama su sikaniyu se neuripen dengan te sale, malehet ne migmatinumanen e kuntee te kamalehetan ne impanulu kaniyu.¹⁸ Nakaawe kew e puun te sale wey neyimu ne uripen te pegkamatareng.¹⁹ Iyan ku re inggamit ka pahunsilingan ne mahaan de egkasabut, su malebud pad ka isip niyu. Imparuyunduyunan niyu dengan ka intiru ne lawa niyu ne eggimu te malligsem wey migpanaman-taman kew miggimu te mareet. Piru kuntee, iparuyun-duyun niyu ka intiru ne lawa niyu te pegkamatareng eyew egmatulus kew.

²⁰ Su kene kew pad dengan ne uripen te pegkamatareng te neuripen kew pad te sale.²¹ Ne nekey naa ka meupiya ne egkaangey niyu te maddeet ne nangimu niyu dengan ne ingkeyilew niyud kuntee? Ware iya su kamatayen ka egpangkusan due.²² Piru kuntee te nakaawe kew e puun te sale wey neyimu kew e ne uripen te Manama, ka meupiya ne egkaangey niyu iyan ka pegkamatulus ne egpangkus diye te umul ne ware egtamanan.²³ Su iyan

* **6:11** Te Grigu: migpatey te sale.

bayad te peggimu te sale ka kamatayen, piru iyan dasag te Manama ka umul ne ware egtamanan tenged te pgsabeka ta ki Kristu Hisus ne Magbebaye ta.

7

Ware kid neuripen te Balaud

¹ Me suled, nakanengneng a ne egpakashabut kew iya te iglalag ku su nakataha kew te Balaud. Natahaan niyu ne duen de katenged te Balaud diye te etew ke manekal pad sikandin. ² Iyan panunggilingan ka manggiasawe e ne malitan ne egkeyiketan pad diye te asawa rin taheed te manekal pad ka iglukes din. Piru ke egpatey e ka asawa rin, kenad sikandin egkeyiketan te balaud te pegpaasaweey. ³ Purisu egpakapanlibug ka malitan ke eg-asawa sikandin te manekal pad ka asawa rin. Piru ke egpatey e, kenad sikandin egkeyiketan te balaud te pegpaasaweey wey kenad egpakapanlibug ke egbalew-balew sikandin eg-asawa. ⁴ Iling naan ded due me suled, nakaawe kew e te Balaud pinaahi te pegkalagkes niyu ki Kristu te migpatey. Ne nasakup kid e nikandin te neuyag ded eyew mabehas ka pegpamakey ta te Manama. ⁵ Su dengan te egparuyun-duyunan te pad ka igkeupii te lawa ta ne makasesale, nasi de iya neulat ka ibeg ta te malindit

ne igkeupii te lawa ta te nakanengneng kid e te Balaud, ne sika diye egpangkus te kamatayen. ⁶ Piru ware kid e kuntee neyiketi te Balaud su migpatey kid due te miguripen dengan kanta. Ka pegpamakey ta kuntee te Manama kenad ne pinaahi te nasulat ne Balaud, ke kene, pinaahi te iyam ne peg-ugpe ne egpuun te Panisingan te Manama.

Egkeilaan ka sale pinaahi te Balaud

⁷ Na, nekey naa ka igkalalag ta? Egpakakahi ki naa te mareet ka Balaud? Kene! Su wara a perem nakataha ke nekey ka sale ke ware Balaud. Wara a nakataha ke nekey ka pegkeimma ke ware pa migkahi ka Balaud, "Kene ka egkeimma!" ⁸ Piru tenged te sale ne tapey kayi te keddi, nasi e re iya egkanasnasion ne egkeimma tenged te sika ne suhu. Su emun ke ware Balaud, ware degma geem te sale. ⁹ Manekal e pad dengan te ware e pad nakashabut te Balaud, piru te nakashabut ad e, hendue te naalimukawan ad te tapey ne pegkamakasesale ku ¹⁰ wey iling te migpatey ad e diye te Manama. Sikan naa ka Balaud ne iyan perem egbehey te umul, iyan nasi migpuunan te kamatayen ku. ¹¹ Su pinaahi te Balaud, migpalimmakut ka sale ne tapey e kayi te keddi eyew peglimbung keddi, wey

newukuman ad te Balaud ne egpatey.

¹² Sikan naa, matulus ka Balaud wey matareng wey meupiya ka langun ne suhu ne due te Balaud.

¹³ Ne migpasabut naa ne iyan nakapatey keddi ka meupiya? Kene! Su iyan ka sale ne tapey e kayi te keddi, wey inggamit de ka meupiya eyew egkamelmelehan ne mareet ka sale. Ne pinaahi te Balaud, egkakita ka subla ne kareet te sale.

Ka samuk diye te diralem ta

¹⁴ Nanengnengan ta ne meupiya ka Balaud su diye migpuun te Manama. Piru etew e re ne egpakasale wey iling te imbelegye isip uripen te sale. ¹⁵ Neinu-inu a te egkeyimu ku, su kene ku egkeyimu ka igkeupii ku ne eggimuwen, ke kene, iyan ku mule egkeyimu ka igkeepes ku. ¹⁶ Sikan naa, emun ke igkeepes ku ka egkeyimu ku ne mareet, eg-uyun a ne meupiya ka Balaud. ¹⁷ Sikan naa ka kene ne sikeddi ka eggimu kayi, ke kene, ka sale ne tapey e kayi te keddiey.

¹⁸ Su nakanengneng a ne ware meupiya kayi te lawa ku ne makasesale, tenged su minsan egkeupian a ne eggimu te meupiya piru kene ku egkeyimu. ¹⁹ Su kene ku egkeyimu ka meupiya ne igkeupii ku ne eggimuwen, ke kene, iyan ku egkeyimu ka mareet ne igkeepes ku ne eggimuwen. ²⁰ Sikan

naa, emun ke eggimuwen ku ka igkeepes ku, kenad ne sikeddi pad ka eggimu due su ka sale e ne tapey e kayi te keddi.

²¹ Purisu nanengnengan ku seini ne kamalehetan: te timpu ne egkeupian a ne eggimu te meupiya, due iya degma ka mareet ne igkeupii te lawa ku. ²² Su amana iya ingkahale te pusung ku ka Balaud te Manama. ²³ Piru naheram ku ne due lein ne balaud kayi te lawa ku ne migpakig-ehet te Balaud ne igkeupii te suman-suman ku. Sika ka nekeuripen keddi te sale ne kayi te keddiey. ²⁴ Mekeyid-u-hid-u a amana! Hentew buwa ka egluwas keddiey puun te lawa ku ne eggukuman ne egpatey? ²⁵ Salamat te Manama ne nakaluwas keddi pinaahi te Magbebkiye ta ne si Hisu Kristu.

Na, egkeupian ka suman-suman ku ne egtuman te Balaud te Manama, piru iyan ku egkatuman ka mareet ne igkeupii te lawa ku ne makasesale.

8

Ka pegparuma-ruma ta te Panisingan te Manama

¹ Purisu kenad e ne likes te dusa te Manama seeye se nasabeke e ki Kristu Hisus.

² Su tenged te pegsabeka ta ki Kristu Hisus, ka Panisingan te Manama ne egbehey te umul iyan nakapaawe kanta puun te Balaud ne migbehey te geem te sale ne diye

egpangkus te kamatayen.
³ Kene ki igaipakapaawe te Balaud puun te geem te sale su mahuye ki tenged te makasesale ne lawa ta. Piru innimu te Manama ka kene egkeyimu te Balaud. Impeendini rin ka Anak din ne due lawa iling te etew ne makasesale eyew igpalangesa te sale ta. Ne pinaahi te lawa rin, nakaawe ki puun te geem te sale
⁴ eyew egkatuman kayi te kanta ka matareng ne suhu te Balaud. Su ware kid migparuma-ruma te makasesale ne lawa ta, ke kene, te Panisingan te Manama.
⁵ Su seeye se migparuma-ruma te makasesale ne lawa ran, iyan dan de iya egsumsumanen ka mareet ne igkeupii te lawa ran. Piru seeye se migparuma-ruma te Panisingan te Manama, iyan dan egsumsumanen ka igkeupii rin. ⁶ Emun ke iyan diye dapit te sumansuman te etew ka igkeupii te lawa rin ne makasesale, diye sika egpangkus te kamatayen, piru emun ke iyan diye dapit te sumansuman din ka Panisingan te Manama, egkeuyag sikandin te ware egtamanan wey due keupianan. ⁷ Su kuntete te Manama ka etew ne iyan diye dapit te suman-suman din ka igkeupii te lawa rin ne makasesale, su kene sikandin egtuman te Balaud te Manama wey kene iya sikandin egpaketuman kayi.

⁸ Ne seeye se migparuma-ruma te igkeupii te lawa ran ne makasesale, kene egpaketuman te Manama.

⁹ Piru sikaniyu, ware kew e migparuma-ruma te igkeupii te lawa niyu ne makasesale, ke kene, iyan niyud imparumduaan ka Panisingan te Manama ke duen e sikandin te kaniyu. Piru ka minsan hentew ne ware ugpei te Panisingan te Manama, kene ne ki Kristu. ¹⁰ Piru ke duen e si Kristu te kaniyu, minsan egpatey ka lawa niyu tenged te sale, egkeuyag ded ka panisingan niyu tenged su in-isip kew ne matareng te Manama. ¹¹ Ka Manama ka mig-uyag ki Hisus. Ne emun ke duen e te kaniyu ka Panisingan te Manama, eg-uyahen din degma ka lawa niyu ne egpatey pinaahi te Panisingan din due te kaniyu.

¹² Purisu me suled, due keilangan ne egtumanan ta iya, piru kene ne sika se igkeupii te lawa ta ne makasesale. ¹³ Su emun ke egparuma-ruma kew te igkeupii te lawa niyu ne makasesale, egpatey kew iya. Piru ke egpegnelen niyu ka hinimuan ne igkeupii te lawa niyu pinaahi te bulig te Panisingan te Manama, due umul niyu ne ware egtamanan. ¹⁴ Su ka langun ne impanulu te Panisingan te Manama, me anak sikandan te Manama. ¹⁵ Su ware

kew behayi te Panisingan te Manama eyew eg-uripenen wey egliyasen, ke kene, eyew egkeyimu ne me anak te Manama. Sika ka egpuunan ne egpaketawit kid e kandin te "Amey".¹⁶ Ka Panisingan te Manama duma te panisingan ta ka egpamalehet ne me anak ki iya te Manama.¹⁷ Ne puun su me anak kid te Manama, egpaketawit ki te panalangin duma ki Kristu. Su emun ke eg-antus kiling ki Kristu, egpaketawit ki degma te katelesan din.

Ka eggunguma ne katelesan

¹⁸ Ke egsumsumanen ku ka me peg-antus ta kuntee, ware de nakaarew-arew te katelesan ne igpakita kanta keureme. ¹⁹ Su minsan ka langun ne innimu te Manama, kenad egpekegteil ka egtetahad ne igpakte e te Manama ka me anak din. ²⁰ Minsan kene egkeupian ka langun ne innimu te Manama piru indilus din seini langun. Ne minsan iling due, duen ded egkapallateng ²¹ su eggunguma ka timpu ne igpaawe din ded puun te pegkeuripen te kamatayen* ka langun ne innimu rin eyew egpaketawit ded te mateles ne kaligwangan te me anak te Manama. ²² Nakanengneng ki ne ligkat dengan taman kuntee, migdeg-uy te kasakit ka langun ne innimu te Manama iling te malitan ne

egbaletikan. ²³ Ne kene ne sikandan de, su minsan sikanta se naleneban te Panisingan te Manama ne iyan ka an-anayan ne dasag kanta, migdeg-uy ki degma taheed te egtetahad ne eglekaten din e ka me lawata ne iyan palinneu ne egan-anaken kid te Manama.²⁴ Su sika ka impallateng ta puun te naluwas kid. Piru kenad egkapallateng ka duen e. Su nekey naan pad ka egpallatengen emun ke duen e? ²⁵ Piru emun ke egpallateng ki te ware pad due, kene ki egkapelaan ne egtetahad.

²⁶ Iling naan ded due, egbulihan ki degma te Panisingan te Manama te kahuye ta. Kene ki egkateu ke egmenuwen te eg-ampu te eleg ne paahi, piru ka Panisingan te Manama ka eg-uney-uney egpangananey te Manama para kanta, duma te pegdeg-uy ne kenad igkalalag. ²⁷ Ka Manama ne nakanengneng te sumansuman te me etew, nakanengneng degma te sumansuman te Panisingan din, su migpangananey sikandin sumale te pegbuut te Manama para te keet-etawan din.

²⁸ Nakanengneng ki ne ka langun ne egkeyitabu, eggimuwen sika ne meupiya te Manama para te seeye se miggeyinawa kandin ne inalam din sumale te igkeupii rin. ²⁹ Su seeye se tapey rin e alama, tapey rin e sikandan

itahahe ne egpekeiling te Anak din eyew egkeyimu sikandin ne kinakakayan te langun ne tagtahasuled.
30 Ne seeye se tapey rin e itahahe, in-alam din degma, wey seeye se in-alam din, in-isip din ne matareng. Ne seeye se in-isip din ne matareng, impasawit din te katelesan te Anak din.

Ka geyinawa te Manama due ki Kristu Hisus

31 Na, nekey naan e ka igkalalag ta meytenged kayi? Emun ke eglapig kanta ka Manama, hentew naa ka egpakatalu[†] kanta?
32 Ware sikandin nannuhun te Anak din wey nasi din ibehay sikandin para kanta langun. Egkaayun naa degma ne kene ki nikandin egbehayan te langun ne ingkeilangan ta?
33 Hentew naa ka eleg ne egsumbung te me etew ne in-alam te Manama? Ware, su ka Manama ka mig-isip ne matareng e sikandan.
34 Ne hentew naa ka egpakakahi ne eleg ki ne egleparan? Si Kristu Hisus naa ne migpatey piru neuyag ded wey diyad man-e te igkakawananan[‡] te Manama? Sikandin man-e ka egpangananey te Manama para kanta.
35 Nekey naa ka egpakapariyu kanta puun te geyinawa ni Kristu? Ka kalasayan naa wey ka keyirapan, ka me pegbayad-bayad naa? Ka gutas naa wey ware kukumbaleen, ka pgsahap

wey ke kamatayen naa? 36 Su sumale te Kasulatan, “Tenged keykew, duen key layun te tangkaan te kamatayen, wey nekeiling key te me karniru ne eggilan-gen.”

37 Piru minsan pad due langun, ware egpakatalu kanta su egpanalu ki iya pinaahi kandin ne miggeyinawa kanta! 38 Su nakamemalehet a ne minsan ka kamatayen wey ka umul, ka me panalihan wey ka me busew wey ka me due geem, wey ka minsan nekey ne kayid e wey ka eggingga pad, kene egpakapariyu kanta puun te geyinawa rin. 39 Minsan ka diye te ampew wey diye te diralem, wey ka langun ne kayi te kalibutan, kene iya egpakapariyu kanta puun te geyinawa te Manama ne impabaye din ki Kristu Hisus ne Magbebaye ta.

9

Ka katenged te Manama te peg-alam

1 Malehet ka iglalag ku kaniyu wey kena a eg-uubat su nasabeka ad ki Kristu. Ka kunsinsya ku ne impanulu te Panisingan te Manama migpamalehet degma 2 ne amana ne mabehat ka diralem ku wey layun ne masakit ka pusung ku.
3 Egawesen ku pad ne iyan a egkarilus wey egpaka-suwey

[†] 8:31 Te Grigu: egkunttere. [‡] 8:34 Sumale te tuluuwen te me Hudiyu, ka talahuren de ne etew ka egpakapinnuu diye te igkakawananan te mabantug ne etew.

8:36 Sal 44:22. **9:4** Iks 4:22.

ki Kristu para te keupianan te me suled ku ne me Hudiyu.⁴ Sikandan ka me kabuhalan ni Israil, wey in-anak-anak te Manama. Impakita rin kandan ka katelesan din, wey imbehey rin kandan ka kasabutan wey Balaud din. Impanengneng din kandan ka malehet ne pegsimba wey insaaran te meupiya.⁵ Me mabantug ne etew ka me kabuybuyahan dan. Ne minsan ka Kristu,^{*} kabuhalan dan sikandin sumale te pegkeetew rin, wey Manama sikandin te langun. Egdayanen sikandin te ware egtamanan. Malehet iya.

⁶ Piru minsan ke iling due, ware migpasabut ne ware natuman ka saad te Manama diye te Hudiyu, su kene ne langun ne kabuhalan ni Israil keet-etawan te Manama.⁷ Kene degma langun ne anak ni Abraham ne kabuhalan din, su migkahiyan te Manama si Abraham, "Ka kabuhalan de ni Isaak ka eg-isipen ku ne kabuhalan nu."⁸ Ka igpasabut kayi ne kene ne me anak te Manama ka langun ne me anak ni Abraham, ke kene, seeye de se neetew tenged te insaad te Manama.⁹ Su seini ka saad te Manama, "Te iling ded kayi ne timpu te seup ne leg-un, eglibed a kayi wey duen e anak ni Sara ne lukes."

¹⁰ Ne kene ne sikan de, su te timpu ne migsesepingan pad si Ribika te anak dan ki

Isaak ne kaapuan ta,¹¹⁻¹² migkahiyan te Manama si Ribika, "Egpamakayen te kakey ka hari." Ne minsan ware pad miglesut ka me bate wey ware pad naneng-nengi ke mareet naa wey ke meupiya ka hinimuwan dan, piru impanengneng e te Manama ke hentew ka in-alam din. Su tapey e planuwa te Manama ke hentew ka eg-alamen din, wey kene ne tenged te hinimuwan ta.¹³ Sikan naa ka miggenendue ka Kasulatan, "Miggeyinawaan ku si Hakub, piru migdumutan ku si Isaw."

¹⁴ Na, egpakakahi ki naa te kene ne matareng ka innimu te Manama? Kene!¹⁵ Su migkahiyan din si Muwisis, "Igkeyid-u ku seeye se igkeyid-u ku wey igkalulunu ku seeye se igkalulunu ku."¹⁶ Purisu ka peg-alam te Manama kene ne tenged te pegbuut te etew wey te pegpakanekal din, ke kene, tenged te hid-u rin.¹⁷ Su nasulat diye te Kasulatan ne migkahiyan te Manama ka Hari te Ihiptu, "Innimu ku sikeykew ne Hari eyew igpakapakita ku ka geem ku pinaahi te eggimuwen ku keykew, su eyew egmabantug ka ngaran ku diye te langun ne inged te kalibutan."¹⁸ Purisu iyan de igkeyid-u te Manama ka igkeupii rin ne igkeyid-u wey egpakehalen din ka ulu te

* **9:5** Ka igpasabut te Kristu, Insaad ne Manluluwas. **9:7** Hin 21:12. **9:9**
Hin 18:10. **9:11-12** Hin 25:23. **9:13** Mal 1:2-3. **9:15** Iks 33:19. **9:17**
Iks 9:16 (LXX).

igkeupii rin ne egpakehalen.

Ka langet wey hid-u te Manama

¹⁹ Ne kema ke egkahiyan a nikaniyu, “Ke iling ma rue, mania te egsenditan ded te Manama ka etew ne impakehal rin se ulu? Duen naa iya mule etew ne egpakanalliya te pegbuut te Manama?” ²⁰ Piru etew ke re, wey nekey ka katenged nu ne egpakig-apul te Manama? Egpasagsahukul naa ka in-nimu re te miggimu kandin, “Mania te in-iling a nikeykew kayi te eggimu?” ²¹ Ware bes katenged te talaggimu te kuren ke kene din egegilingen te eggimu puun te tane ka daruwa ne kuren? Ware naa katenged din ne eggimuwen ne amana ne mateles ka sabeka wey eleg-eleg de ka dangeb?

²² Iling due ka inggimu te Manama. Igkeupii rin ne igpakita ka langet wey igpeila ka geem din. Piru nenaneyi sikandin egkeupul wey kene din egsalutan te egleppad ka me etew ne natahahe e ne egdereetan, ²³ eyew igpakapanengneng din degma te ingkeyid-u rin ka kein-inuwan ne keupiya rin, kayi te kanta te in-alam din ne egbehayan te sika ne keupiya. ²⁴ Su sikanta ka keet-etawan ne in-alam din, wey kene ne me Hudiyu re su minsan degma ka kene ne me Hudiyu. ²⁵ Su nasulat ni

prupita Husiya ne migkahi ka Manama,

“Seeye se kene ne keet-etawan ku,
egngaranan kud te keet-etawan ku,
wey seeye se ware ku geyinawei ne me etew,
eggeyinawaan kud e.

²⁶ Ne diye te inged ke hendei kahii sikandan,
'Kene ku sikaniyu ne keet-etawan,'
diye degma sikandan egn-garani te me anak te manekal ne Manama.”

²⁷ Ne migtagne degma si prupita Isayas meytenged te matig-Israil, “Minsan iling kasulug te lelanek diye te ilis te dahat ka kabuhalan ni Israil, piru deisek de ka egkaluwas.” ²⁸ Su igpaneem-neem iya te Magbebaye ne Manama kayi te kalibutan ka peggubabe te kabuhalan ni Israil

Ka peggubabe te kabuhalan ni Israil

³⁰ Na, seini re ka igkalalag ta meytenged kayi. Ka kene ne me Hudiyu ne ware migpakanekal ne egkeyimu ne matareng, nasi neyimu ne

matareng pinaahi te pegpalintutuu.³¹ Piru ka kabuhalan ni Israil ne migpakannekal ne egkeyimu ne matareng pinaahi te pegtuman te Balaud, nasi natalangaan.³² Mania te neiling due? Tenged su migpakannekal sikandan kene ne pinaahi te pegpalintutuu, ke kene, pinaahi te meupiya ne hin imuwan. Nakasipe sikandan te egpakaparugsu ne batu ne iyan si Kristu.³³ Su sumale te nasulat te Kasulatan,

“Pitew kew, igtahu ku diye te Siyun ka batu eyew eg pakasipe ka me etew, wey egpakaparugsu kandan.

Piru ka egpalintutuu wey egsalig kandin kene iya egkeyilawan.”

10

¹ Me suled, igkalelehet kud iya perem ne egkaluwas ka duma ku ne me Hudiyu, wey in-ampu ku sika diye te Manama. ² Su egpakamemalehet a ne mapahetpet ka pegpamakey ran te Manama piru nekeisu te eleg ne pegpamakey. ³ Su ware sikandan nakanengneng te pegkamatareng ne puun de te Manama, wey nasi sikandan migparahas-dahas te kandan ne paahi eyew egkamatareng wey ware sikandan nakatumana te paahi te Manama. ⁴ Su duen de nataman ki Kristu ka Balaud eyew ka tagse etew ne

due pegpalintutuu eg-isipen ne matareng te Mamana.

Ka kaluwasan para te langun ne etew

⁵ Migsusulat si Muwisis meyitenged te pegkamatareng pinaahi te pegtuman te Balaud, “Ka etew ne mig-ikul te Balaud egkeuyag tenged te Balaud.” ⁶

Piru nasulat te Kasulatan ka meyitenged te pegkamatareng pinaahi te pegpalintutuu, “Kene ka inse diye te suman-suman nu, ‘Hentewa ka eggendiye te langit?’” (eyew egpepamanuehen si Kristu). ⁷ “Wey ke, ‘Hentewa ka epgamaneug diye te ugpaan te gimukud?’” (eyew eg-uyahen si Kristu).

⁸ Su sumale te Kasulatan, “Marani keykew ka lalag te Manama. Nakapamule e seini due te pusung nu wey igkalalag nud e.” Sika ne lalag meyitenged te pegpalintutuu ne inwali ney. ⁹ Su emun ke eangkenen nu ne Magbebaye si Hisus wey egpalintutuu ka te mapahetpet ne inuyag sikandin te Manama, egkaluwas ka. ¹⁰ Su eg-isipen ne matareng ka etew ne mapahetpet ne egpalintutuu, wey egkaluwas sikandin puun te peg-angken din te impalintutuuwan din. ¹¹ Su migkahi ka Kasulatan, “Ka minsan hentew ne egpalintutuu wey egsalig kandin, kene iya egkeyilawan.” ¹² Su ware kaleinan te me Hudiyu

wey te kene ne me Hudiyu. Sabsabeka re iya ka Magbebeye te langun ne etew wey egtumpisan din ka langun ne egpangananey kandin.¹³ Su sumale te Kasulatan, “Ka langun ne egpangananey te Magbebeye, egkaluwas.”

¹⁴ Piru egmenuwen naa te me etew te egpangananey kandin te ware ma sikandan migpalintutuu wey migsalig kandin? Ne egmenuwen dan naa te egpalintutuu te ware dan ma nakarineg te guhuren meyitenged kandin? Ne egmenuwen dan naa te egpakarineg ke ware egwali diye te kandan?

¹⁵ Ne egmenuwen naa te etew te egwali ke ware egsuhu kandan? Piru duen e insuhu ne egwali su nasulat te Kasulatan, “Amana ne tetelesi ka paa te seeye se eg-uyan te Meupiya ne Panugtulen!”¹⁶ Piru kene ne langun ne etew ne migdawat te Meupiya ne Panugtulen. Su migkahi si prupita Isayas, “Magbebeye ne Manama, hentew-a ka migpalintutuu te inwali ney?”¹⁷ Sikan naa, egpakapalintutuu ka me etew emun egpakarineg te Meupiya ne Panugtulen meyitenged ki Kristu.

¹⁸ Piru eg-insa a: Ware naa nakarineg ka me Hudiyu te guhuren? Nakarineg ded sikandan, su sumale te Kasulatan, “Nanengku-sengku ka la-

heng dan te intiru ne kalibutan; wey nangabbas-abbas ka me lalag dan diye te katamanan te inged.”

¹⁹ Ne eg-abey ad man-e eg-inse: Ware naa sikandan nakasabut? Nakasabut dan ded, su nasulat ni Muwisis ne migkahi ka Manama, “Egpeimmeen ku sikaniyu te kene ne me Hudiyu.”^{*}

Egpeyibeluen ku sikaniyu pinaahi te me etew ne egkengeungel.”

²⁰ Ne ware degma pegkaaldek ni Isayas te migkahi, “Natulituan a te seeye se ware migpammitek keddi.

Migpakita a te seeye se migbalahad keddiey.”

²¹ Piru seini ka ingkahi rin meyitenged te me Hudiyu, “Aldew-alde a ka eg-pangumew te me etew ne masinupaken wey makehal se me ulu.”

11

Ka hid-u te Manama para te me Hudiyu

¹ Sikan naa eg-insa a, “Imbalahad naa te Manama ka keet-etawan din ne me Hudiyu?” Ware iya! Su minsan sikeddi, Hudiyu a degma ne kabuhalan ni Abraham, wey nabuhal puun te tribu ni Binhamin. ² Ware balahara te Manama ka keet-etawan din ne tapey rin e alama. Sumsumana niyu ka ingkahi

10:13 Huwil 2:32. **10:15** Isa 52:7.

(LXX). **10:19** Diy 32:21. * **10:19** Te Grigu: kene ne nasud. **10:16** Isa 53:1 (LXX). **10:18** Sal 19:4 (LXX). **10:21** Isa 65:2 (LXX). **11:1** Pil 3:5.

te Kasulatan meyitenged ki Ilyas ne migpangananey te Manama. Migsalew-salew sikandin te me Hudiyu³ ne migkahi, "Magbebaye ne Manama, impangimatayan dan ka me prupita nu wey impangguhus dan ka me altar nu. Sikeddi naan de ka nasame wey eggimatayan a perem nikandan."⁴ Piru nekey ka intabak te Manama kandin? "Duen pad inlein ku ne pitu ne libu (7,000) ne me etew ne ware migsimba te diyus-diyus ne si Baal."⁵ Ne iling naan ded degma due kuntee, duen pad pila-pila ne me Hudiyu ne in-alam te Manama tenged te keupiya wey keyid-u rin.⁶ Piru ke in-alam din sikandan tenged te keupiya wey keyid-u rin, kenad ne tenged te hinimuwan dan ne in-alam sikandan. Su emun ke in-alam din sikandan tenged te hinimuwan dan, kene tad egkakahi ne keupiya wey keyid-u pad seini.

⁷ Na, nekey naan e? Ware nakaangken ka kasuluhan te me Hudiyu te impamitew ran, piru naangken seini te seeye se in-alam te Manama. Ka duma impakehal te Manama ka me ulu ran.⁸ Sumale te ingkahi te Kasulatan, "Innemu sikandan te Manama ne egpekeiling te mulug ne etew, due me mata ran piru kene sikandan egpakakita, due me talinga ran piru kene sikandan egpakarineg

taman kuntee."⁹ Ne migkahi si Dabid meyitenged kandan, "Egkengarakep perem sikandan wey egkengasapenan ka egliblibulung ne eggale-gale, iling te mahintalunan ne migsahad te baled wey kenad egpakaawe!¹⁰ Egkengabutud perem sikandan eyew kenad egpakakita wey egkabekut perem sikandan te ware egtamanan."

¹¹ Sikan naa ka eg-insa a, ke nakasipe wey nakarugsu ka me Hudiyu, kene naan e sikandan egpekeeenew? Kene ne iling due! Su pinaahi te pagsupak dan, naluwas ka kene ne me Hudiyu eyew igkasekel ran sikandan.¹² Ne emun ka pagsupak wey pegasahap te me Hudiyu egpakabehey te keupianan te langun ne kene ne me Hudiyu kayi te ampew te tane, wey naan pa iya ke masulug ded ka me Hudiyu ne egpalintutuu.

Ka kaluwasan te kene ne me Hudiyu

¹³ Kuntee egnanganan ku sikaniyu se kene ne me Hudiyu. Apustulis a eyew egwali diye te kaniyu, wey indakelan ku seini ne himu¹⁴ eyew egkeimma ka duma ku ne me Hudiyu wey sika ka paahi ne egkaluwas ka duma kandan.¹⁵ Su emun ke ka peg-inniyug te Manama te

me Hudiyu iyan egpuunan ne nekeg-uli ded ka meupiya ne geyinawa rin te duma ne me etew kayi te ampew te tane, iyan naan pa iya ke egdawaten din ded sikandan. Su emun ke egdawaten din ded man-e sikandan, iyan egkeilingan te epgangkusan kayi ka pegkeuyag te minatey.

¹⁶ Panunggiling ke due paan ne inhalad ka baad diye te Manama, iling ded te nalakes e degma te peghalad ka same te paan. Ne ka kayu degma, su emun ke ka dalid kandin te Manama, kandin naan ded man-e ka me sugpang. ¹⁷ Iyan panunggilingan te me Hudiyu ka pinamula ne ulibu ne impanempuhan te duma ne me sugpang. Ne sikaniyu se kene ne me Hudiyu, egpekeiling kew te me sugpang te leew ne ulibu ne impanugpat diye te lawa te pinamula ne ulibu, wey nekegsaamul kew e te kalambuan te malehet ne sugpang. ¹⁸ Piru kene niyu lemeti seeye se impanempug ne me sugpang, su tantanuri niyu ne kene ne sikaniyu ka mig-uyag te dalid, ke kene, ka dalid ka mig-uyag kaniyu.

¹⁹ Ne kema ke due egkah, "Uya, piru impanempug seeye ne me sugpang eyew igpakasugpat key subal kandan." ²⁰ Malehet sika, impanempug sikandan su ware sikandan migpalintuu piru nakasubal kew re

su migpalintutuu kew. Sikan naa, kene kew paketul, ke kene, kaaldek kew. ²¹ Su emun ke ware ul-ulungi te Manama te eghanempug ka malehet ne me sugpang, kene din degma eg-ul-ulungan te eghanempug ka kene ne malehet ne me sugpang iling kaniyu te kene ne me Hudiyu. ²² Egkakita ta kayi ke kamenu karakel ka hid-u te Manama wey ka kabulut din degma. Mabulut sikandin te seeye se migsupak, piru sikaniyu, igkeyid-u kew nikandin ke egpabulus kew egsalig te keyid-u rin. Su emun ke kene, eghanempuhun kew degma. ²³ Ne seeye se me Hudiyu ne kenad egpakehalk-kehalk su egsalig te Manama, iglibed din ded sikandan igsugpat su egkeyimu sika te Manama. ²⁴ Ne sikaniyu se egpekeiling te me sugpang te leew ne ulibu, emun ke ingkasugpat kew nikandin diye te pinamula ne ulibu, iyan din naan pa iya kene igpakasugpat ded ka malehet ne me sugpang kayi.

Ka hid-u te Manama te langun ne etew

²⁵ Me suled, egkeupian a ne egkanengnengan niyu ka nekeelles ne kamalehetan su eyew kene kew egpakepeg-gasal ne me matagseb kew e. Iyan ku igpanengneng kaniyu ne egkataman de ka kakehal te me ulu te Hudiyu te timpu ne egkatimpad e

ka kasulug te kene ne me Hudiyu ne egpalintutuu.²⁶ Ne puun due, egkaluwas ka langun ne kabuhalan ni Israil. Su sumale te nasulat te Kasulatan,

“Diye egpuun te Siyun ka Manluluwas.

Eg-aween din ka mareet ne hinimuwan te kabuhalan ni Hakub.

²⁷ Ne egkatuman iya ka kasabutan ku dengan kandan

ne eg-aween ku ka me sale dan.”

²⁸ Meyitenged te peggubabe te me Hudiyu te Meupiya ne Panugtulen, neyimu sikan dan ne kuntere te Manama ne iyan nakabulig kaniyu. Piru meyitenged te peg alam kandan te Manama, indakelan din ded sikandan te geyinawa puun te saad din te kaap-apuan dan.²⁹ Su kene iya egkabalbalawan ka suman-suman te Manama meyitenged te dasag wey peg-alam din.³⁰ Sikaniyu se kene ne me Hudiyu, migsupak kew dengan te Manama, piru kuntee ingkeyid-u kew nikandin tenged te pegsupak te me Hudiyu.³¹ Ne iling naan ded degma due, migsupak sikandan te Manama kuntee piru igkeyid-u red degma sikandan te Manama tenged te pegkeyid-u rin kaniyu.³² Su nekeiling te imprisu te Manama ka langun ne etew te kandan ne pegkamasinupaken eyew

ipakapapitew rin kandan ka keyid-u rin.

Egsayeen ka Manama

³³ Amana ne matubung ka Manama te keyid-u wey amana ne dakel ka katuenan din wey kaalam! Ware egpaketabut te me planu rin wey ware egpaketarew te me paahi rin!³⁴ Su nasulat te Kasulatan ne miggenendue, “Hentew naa ka nakataha te suman-suman te Magbebaye ne Manama?

Hentew naa ka egpakan ulu kandin te eleg ne eggimuwen?

³⁵ Hentew naa ka nakadasag kandin te minsan nekey, ne keilangan ne egsulian din?”

³⁶ Su sikandin ka miggimu te langun wey egbuut kayi. Neyimu ka langun eyew egkareyrey sikandin. Egdayanen sikandin te ware egtamanan. Malehet iya.

12

Ka eleg ne pegpamakey te Manama

¹ Sikan naa me suled, tenged te hid-u te Manama kanta, egbanasalan ku sikaniyu ne ibehey niyu ka lawa niyu diye te Manama isip halad ne manekal, matulus wey egpakahale kandin. Sika ka eleg ne eggimuwen niyu eyew te pegsimba kandin.² Kene kew paruma-ruma te egbatasanen te me etew te kuntee

ne timpu, ke kene, tuhuti niyu ne egkabalbalawan te Manama ka pegkeetew niyu pinaahi te peg-iyam din te suman-suman niyu. Ne puun due, egkanengnengan niyu ke nekey ka igkeupii rin ne iyan ka meupiya, epakapahale wey ka ware seyyup.

³ Su tenged te katenged ne imbehey keddiey te Manama, egkahiyani ku sikaniyu te kene niyu iparibabew ka suman-suman niyu meyitenged te pegkeetew niyu, ke kene, ipaayun-ayun niyu re ka suman-suman niyu sumale te pegpalintutuu ne imbehey kaniyu te Manama. ⁴ Su sabeka re ka lawa te etew piru masulug ka baad wey ware nenekegiling ka himu te tagse baad. ⁵ Ne iling ki red degma se migmalintutuu, su minsan masulug ki piru sabeka ki re ne lawa su nasabeka kid diye te ki Kristu, wey nenekegsugpat ki langun. ⁶ Imbehayan ki te Manama te nalein-lein ne katuenan tenged te keyidu rin. Purisu ke imbehayan ka te katuenan te pegpangguhud te impanengneng te Manama diye te keykew, gamita nu sika sumale te pegpalintutuu nu. ⁷ Ne emun ke imbehayan ka te katuenan te pegtanggu, tanggu ka, wey ke imbehayan ka te katuenan te pegpanulu, panulu ka. ⁸ Emun ke imbehayan ka te katuenan te pegbagget te

duma, sika iya himuwa nu, wey ke iyan nu katuenan ka pegbehey te egkaayayu, behey ka ne ware lehed-lehed. Ne emun ke pegpangulu ka katuenan nu, pangulu ka ne maali-ali, wey ke iyan nu katuenan ka hiduwen te duma, parumeyi nu te kahale ka hid-u nu.

⁹ Keilangan ne malehet ka geyinawa niyu te duma. Dumuti niyu ke nekey ka maret wey desdeseni niyu ka meupiya. ¹⁰ Paheyinaweeey kew te tagse sabeka iling te pegpaheyinaweeey te tagtagasuled, wey pegtagtahurey kew amana. ¹¹ Kene kew papapehul, ke kene, pamakey kew ne mabagget-bagget diye te Magbebaye. ¹² Kahale kew tenged te impallateng niyu puun te Manama, kene kew kapeleyi ne eg-antus te me keyirapan wey ampu kew layun. ¹³ Behayi niyu ka keilangan ne egbulihan ne keet-etawan te Manama, wey paal-alumameey kew.

¹⁴ Ampu kew te Manama ne egpanalanginan din seeye se migbayad-bayad kaniyu, wey kene niyu sikandan dilusa. ¹⁵ Kahale kew duma te seeye se nenahale, wey lungku kew duma te seeye se nanlungku. ¹⁶ Peuy-uyuney kew te tagse sabeka. Kene kew paambug, ke kene, paalalukuyey kew te kabaluhan de ne me etew, wey kene kew suman-suman ne matagseb kew.

¹⁷ Kene niyu sulii te mareet ka etew ne miggimu kaniyu te mareet, ke kene, sumsumana niyu ke nekey ka eleg ne eggimuwen diye te tangkaan te langun ne etew. ¹⁸ Taman te egkeyimu niyu, gerami niyu ne egpekegtuleddu kew te langun ne etew. ¹⁹ Inggeyinawaan ku ne me suled, kene kew suli, ke kene, balahara niyud sika su iyan e mateu ne eglegpak kandan ka Manama. Su nasulat te Kasulatan ne migkahi ka Magbebeye ne Manama, "Sikeddiey ka egsuli, sikreddi ka egbayad." ²⁰ Purisu ikula niyu ka ingkahi te Kasulatan, "Ke miggutasan ka kuntere nu, pakeena nu sikandin; ke nammaraan sikandin, peinuma nu. Su emun ke eggimuwen nu sika, egkeyilew e sikandin te mareet ne innimu rin." ²¹ Kene kew pareeg te mareet, ke kene, deeha niyu ka mareet pinaahi te meupiya ne himu.

13

Ka pegparuma-ruma te me upisyal te gubirnu

¹ Ka langun keilangan ne egparuma-ruma te upisyal te gubirnu su ware migpangatungdanan ne ware ituhut te Manama. Ne seeye se migpangatungdanan, intunde sikandan te Manama. ² Purisu ka egsupak te upisyal te gubirnu, egsupak te intunde te Manama wey eglegparan ka eggimu kayi.

12:19 Diy 32:35. **12:20** Lal 25:21-22 (LXX). **13:6** Mat 22:21; Mar 12:17; Luk 20:25.

³ Su ka miggimu te meupiya, kene egkaaldek te seeye se migpangatungdanan, ke kene, ka miggimu re te mareet. Ne emun ke egkeupian kew ne kene egkaaldek te seeye se migpangatungdanan, keilangan ne meupiya ka eggimuwen niyu wey egdayanen kew pad iya nikandan. ⁴ Su suluhuanen sikandan te Manama eyew due keupianan niyu. Piru ke miggimu kew te mareet, eleg iya ne egkaaldek kew su imbehayan iya sikandan te katenged eyew te peggelpad. Suluhuanen sikandan te Manama eyew eg-uyan te legpad din diye te miggimu te mareet. ⁵ Purisu keilangan ne egparuma-ruma ki te migpangatungdanan, kene ne puun de su eghanalliya ki ne egkalegparan, ke kene, puun su nakanengneng ki ke nekey ka eleg ne eggimuwen.

⁶ Sika ka egpuunan ne egbayad ki degma te me buhis, su me suluhuanen te Manama seeye se migpangatungdanan ne migpakanekal te trabahu ran. ⁷ Sikan naa ka egbayaran ta ka keilangan ne egbayaran wey ka langun ne buhis, wey eg-ayad-ayad egtahud te langun ne migpangatungdanan.

Ka katungdanan te tagse sabeka

⁸ Kene ta egmananayen te egbayad ke due utang ta diye te duma, piru egtantanuran

ta layun ka utang ta ne egpaheyinaweeey te tagse sabeka. Su ka miggeyinawa te duma nakatumana te Balaud te Manama.⁹ Su ka me suhu ne miggendue, "Kene ka panlibug, kene ka himatey, kene ka panakew, kene ka keimma," wey ka duma pad ne me suhu, nabalakes de kayi te seini ne suhu, "Geyinawei nu ka duma nu iling te peggeyinawa nu te pegkeetew nu."¹⁰ Su emun ke miggeyinawaan ta ka me duma ta, kene ki iya egpekeyimu te mareet diye te kandan. Purisu ka peggeyinawa te duma iyan ka katumanan te Balaud.

¹¹ Amana kew man-e nakanengneng ke nekey ka eleg ne eggimuwen te seini ne timpu. Keilangan ne eggimata kew e su marani e ka kaluwasan ta du te pegbunsud ta te pegpalintutuu.¹² Egpekeiling seini te marusilem ne mahaan e egkapawe. Keilangan ne eg-engkeran tad e ka maddeet ne hinimuwan ne eleg diye te marusilem, wey egsaliyuwan tad e te meupiya ne hinimuwan ne iyan eleg ne panganiban te seeye se diye te malayag.¹³ Iyan ta eg-ikulen ka meupiya ne peg-ugpe ne eleg eggimuwen te maaldew. Kene ki egpanaman-taman eggsahakeen wey egpewubug-hubug, wey eg-amung-amung te me agkayen, wey kene ki eggimu te malindit ne igkeupii te lawa ta.

Kene ki egmeeg-ehetey wey egkasekel te tagse sabeka.¹⁴ Ke kene, igsaluub ta isip kumbale ka Magbebabe ne si Hisu Kristu, wey kene ta egtuhutan ne egkaparuyunduyunan ta ka igkeupii te lawa ta ne makasesale.

14

Kene ki eggukum te duma

¹ Ke due etew ne mahuye se pegpalintutuu, dawata niyu sikandin te ware pegpakig-apul te kandin ne suman-suman.² Panunggilingan, seeye se mahuye ne migpalintutuu ne kene egkakeen ka ngalap, iyan de egkeenen se gulay. Piru ka duma migpalintutuu ne egkakeen ka minsan nekey.³ Seeye se egkeen te minsan nekey, kene din eglemetan seeye se gulay re se egkeenen. Ne seeye degma se gulay re se egkeenen, kene din egdewayen ka egkeen te minsan nekey su indawat sikandin te Manama.⁴ Purisu nekey naa ka katenged ta te pegdeweey te suluhuanen te duma? Su ka ahalen din de ka due katenged ne eglalag ke mareet ka innimu rin wey ke meupiya naa. Ne igkabennali iya ne meupiya ka eggimuwen din su egbulihan sikandin te Magbebabe.

⁵ Due egsuman-suman ne due mahal ne aldew ne nakasangi te duma ne aldew,

13:9 Iks 20:14; Diy 5:18; Iks 20:13; Diy 5:17; Iks 20:15; Diy 5:19; Iks 20:17; Diy 5:21; Lib 19:18. **14:1** Kul 2:16.

piru ka duma egsuman-suman ne nenekeg-iling de ka langun ne me aldew. Ne ka tagse sabeka keilangan ne kene egduwa-ruwa te insuman-suman din. ⁶ Ka migsuman-suman ne due mahal ne aldew, inggimu rin sika eyew te pegtahud te Manama. Iling naan ded ka egkeen te minsan nekey, inggimu rin sika eyew te pegtahud te Manama su migpasalamat ma sikandin te ingkeen din. Ka kene egkeen te minsan nekey, inggimu rin sika eyew degma te pegtahud te Manama su migpasalamat ma sikandin te ingkeen din. ⁷ Su neetew ki, kene ne para te kanta ne pegkeetew, wey egpatey ki, kene ne para te kanta red ne pegkeetew. ⁸ Ke kene, neetew ki para te Magbebabe wey egpatey ki para te Magbebabe. Purisu, minsan manekal ki pad wey ke namatey kid, kandin ki red iya te Magbebabe. ⁹ Su si Kristu namatey wey neuyag eyew egkeyimu sikandin ne Magbebabe te nammatey e wey te mannekal pad. ¹⁰ Purisu mania te egdew-ayen niyu wey eglemetan ka mesuled niyu te egtangke ki ma langun te Manama eyew eggukuman nikandin? ¹¹ Su nasulat te Kasulatan ne migkahi ka Magbebabe ne Manama,
“Egpahunlibet a ne egkatuman iya
ne egpanimbuel ka lan-

gun diye te tangkaan ku
wey eg-ileen a ne Manama.”

¹² Sikan naa, tagse sabeka kanta egpanabak diye te Manama meyitenged te immangimu ta.

Egsalsalliya ki ne kene egpakanale ka duma ta

¹³ Kene kid e egmarewdewayey, ke kene, eggsabekeen ta ka suman-suman ta ne kene eggimu te minsan nekey ne egpakanaligkat wey egpakanalit te suled ta. ¹⁴ Tenged te pegasabeka ku te Magbebabe ne si Hisus, nakamemalehet a ne ware keenen ne kene egkakeen. Piru ingkene seini diye te etew ne egsuman-suman ne ingkene seeye. ¹⁵ Emun ke neenenduenan ka suled nu te egkeenen nu, ware kad nekeikul te geyinawa. Sikan naa, kene nu tuhuti ne egkareetan ka etew te egkeenen nu su migpatey si Kristu para kandin. ¹⁶ Kene ta egtuhutan ne ka in-isip ta ne meupiya, egmareeten te duma. ¹⁷ Su ka Peghari te Manama kene ne meyitenged te keenen wey inumen, ke kene, meyitenged te pegkamatareng, keupianan, wey kahale ne egpuun te Panisingan te Manama. ¹⁸ Su emun ke iling due ka paahi ta te pegpamakey ki Kristu, igkahale ki te Manama wey igkabennali te me etew.

¹⁹ Purisu egpakanekalan ta ka egpakabehey kanta te

keupianan wey egpekeehet te pegpalintutuu te tagse sabeka.²⁰ Kene ta egdereetan ka innimu te Manama tenged te keenen. Su diye te Manama, egkakeen iya ka langun, piru kene ne meupiya ke egpakashale ka duma ta tenged te egkeenen ta.²¹ Kene ne meupiya ka pegkeen te ngalap wey ka peg-inum te binu, wey ka peggimu te minsan nekey ne iyan egpuunan ne egpakashale ka suled ta.²² Ke nekey ka impalintutuuwan te tagse sabeka meyitenged kayi, meupiya ne daruwaran de te Manama ka neketaheey. Eghanlanginan seeye se kene egkabantalan te insuman-suman din ne eleg ne eggimuwen.²³ Piru seeye se egduwa-ruwa wey nasi migkeen, eglegparan sikandin te Manama su kene ne uyun te impalintutuuwan din ka innimu rin. Su sale ka peggimu te minsan nekey ne kene ne uyun te impalintutuuwan ta.

15

Ka peg-ugpe ne egpakashale te duma

¹ Sikanta se neneehet e ka pegpalintutuu, keilangan ne kene ki egkeubil te igkabantali te me mahuye pad se pegpalintutuu. Kene ne iyan ta egsumusanen ka egpakashale te pegkeetew ta,² ke kene, keilangan ne ka tagse sabeka kanta egpakashale te duma ta eyew

egpakabulig ki wey egkeehet ka pegpalintutuu rin.³ Su si Kristu ware migsumansuman te egpakashale te pegkeetew rin, su nasulat te Kasulatan, "Sikeddiey ka nababaan te lemet te me etew diye te keykew."⁴ Su ka langun ne nasulat dengan diye te Kasulatan, insulat eyew pegpanulu kanta wey eyew due egkapallateng ta pinaahi te peg-antus ta wey kabagget puun te Kasulatan.⁵ Ne ka Manama ne migbehey kanta te kanekal te peg-antus wey kabagget, iyan egtuhut kaniyu ne egsabeka ka suman-suman niyu te pegikul ki Kristu Hisus⁶ eyew egkasabeka kew langun ka egdeyrey te Manama ne Amey te Magbebaye ta ne si Hisu Kristu.

Ka pegpanengneng te Meupiya ne Panugtulen diye te kene ne me Hudiyu

⁷ Purisu parawdawatey kew iling te pegdawat ni Kristu kaniyu eyew egkasayeku Manama.⁸ Su egnangan ku sikaniyu te neyimu ne suluhuanen si Kristu te me Hudiyu* eyew te pegpakita ne egkasalihan ka Manama, su intuman ni Kristu ka insaad te Manama diye te me kaap-apuan dan.⁹ Ne kene ne sikan de, su eyew ka kene ne me Hudiyu egpakashayeku degma te Manama tenged te hid-u rin. Su sumale te nasulat te Kasulatan, "Egpasalamatan ku sikeykew

diye te taliware te kene
ne me Hudiyu,
wey eg-ulahingan ku ka
ngaran nu."

¹⁰ Ne duen pad man-e nasulat, "Gale-gale kew se kene
ne me Hudiyu duma te keet-
etawan te Manama!"

¹¹ Ne duen pad man-e nasulat,

"Sikaniyu se kene ne me
Hudiyu,
dayana niyu ka Magbe-
baye ne Manama.

Sikaniyu se langun ne
keet-etawan, dayana
niyu sikandin!"

¹² Ne migsulat pad degma si
prupita Isayas,

"Due kabuhalan ni Hisi ne
egginguma
eyew egmandu te kene ne me
Hudiyu,
wey sikandin ka egka-
pallatengan dan."

¹³ Ka Manama ne egkapal-
latengan ka egbehey kaniyu
te dakel ne kahale wey keupi-
anan pinaahi te pegsalig niyu
kandin, su eyew ka pegpal-
lateng niyu egkanasnasian
egdakel pinaahi te geem te
Panisingan te Manama.

*Ka pegrulat ni Pablu ne
ware pegkehe*

¹⁴ Me suled ku, ware
pegduwa-ruwa ku ne subla
kew ne meupiya wey napenu
te langun ne katuenan, wey
egkateu kew ne egmapan-
panuluey te tagse sabeka.
¹⁵ Piru minsan pad iling due,

ware e red migkehe te peg-
sulat ku eyew pegpasuman-
suman kaniyu. Innimu ku
sika tenged te katenged ne
imbehey keddi te Manama
¹⁶ eyew egpamakey ki Kristu
Hisus te pegpanulu ku te
kene ne me Hudiyu. Ka
pegwali ku te Meupiya ne
Panugtulen puun te Man-
ama, egpekeiling te himu
te talagpanubad su hen-
due te ighalad ku sikaniyu
se kene ne me Hudiyu
diye te Manama ne iyan
egdawat kaniyu su immat-
ulus kew te Panisingan te
Manama. ¹⁷ Purisu te keddi
ne pegsabekia ki Kristu Hisus,
egpakapeggasal a te keddi
ne pegpamakey te Manama.
¹⁸ Piru kena a egpaalag-alag
eglalag te minsan nekey
gawas te neyimu ni Kristu
eyew te pegtipu te kene ne
me Hudiyu ne egpakapalin-
tutuu te Manama pinaahi te
eglalahan wey eggimuwen
ku. ¹⁹ Egkeyitabu man-e
seini pinaahi te me palinneu
wey me kein-inuwan wey
te geem te Panisingan te
Manama. Sikan naa ka
puun te Hirusalim taman te
Iliriku, in-empet ku te egwali
ka Meupiya ne Panugtulen
meyitenged ki Kristu. ²⁰ Su
iyan ku igkeupii ka egwali
te Meupiya ne Panugtulen
diye te me inged ne ware
pad nariniehi si Kristu, su
eyew kena a egpakaampew
te pabunsuran ne impes-ek
te duma. ²¹ Su sumale te

nasulat te Kasulatan,
 "Seeye se ware pad nahuhuri
 meyitenged kandin,
 egpakakita kandin,
 wey seeye se ware pad
 nakarineg meyitenged
 kandin, egpakasabut
 meyitenged kandin."

*Ka pegbebentaan ni Pablu
 ne egpanumbaley diye te
 Ruma*

²² Purisu tenged te himu ku, kamasalig a natalehen ka egpanumbaley perem kaniyu. ²³ Piru kuntee te neimpusan kud ka eggimuwen ku kayi ne me prubinsya, wey pile e ne legun ne egkeinniyat a ne eggendue te kaniyu, ²⁴ egkeupian a ne egpakanlutan due te kaniyu ka eggendiye te Ispanya. Egkeupian a ne egmaal-alukuyey ki pad amana te minsan malepet de ne timpu human a egleus diye te Ispanya pinaahi te pegbulig niyu. ²⁵ Piru kuntee, eggendiye e pad te Hirusalim ka egdulung te igbulig te keet-etawan te Manama diye. ²⁶ Su ingkahale te me matig-Masidunya wey matig-Akaya ka peg-amut-amut eyew igbulig te egkengaayu-ayu ne keet-etawan te Manama diye te Hirusalim. ²⁷ Ingkahale dan ka pegbulig, wey eleg ka innimu ran su iyan epuuinan ka me Hudiyu ne nakasawit ka kene ne me Hudiyu te ispirituanen ne panalangin. Sikan naa, eleg de iya ne egbulihan dan te

keuyahan ka me Hudiyu.
²⁸ Ke igpakabehey kud diye te kandan ka nalimud ne igbulig kandan, egligkat ad e peendiye te Ispanya wey egtulan e pad due te kaniyu. ²⁹ Nakanengneng a te peggenduen ku te kaniyu, dakel ka panalangin ne egkasaamulan ta langun puun ki Kristu.

³⁰ Me suled, tenged te Mag-bebaye ta ne si Hisu Kristu wey te geyinawa ne imbehey kanta te Panisingan te Manama, egbanasal a kaniyu ne bulihi a te peg-ampu diye te Manama. ³¹ Ampu kew ne egpangabangan a te Manama puun te ware migmalintutuu kandin diye te Hudiya, wey eyew kene egsamsamilian te keet-etawan te Manama diye te Hirusalim ka igdulung ku kandan. ³² Su eyew ke igtuhut te Manama, egkahale-gale a te pegginguma ku due te kaniyu wey egpakanlene-lene ka geyinawa ku ne egpakigduma kaniyu. ³³ Ka Manama te keupianan ka egduma kaniyu langun. Malehet iya.

16

Pegpangemusta

¹ Due atebey ta ne egn-garanan ki Pibi ne igkeupii ku ne igpeila-ila kaniyu. Sikandin ka migtanggu te migmalintutuu diye te Sinkriya. ² Dawata niyu sikandin te pegginguma rin due isip suluhuanen te

Magbebeye su sika ka eleg ne eggimuwen te keet-etawan te Manama. Bulih niyu sikandin te minsan nekey ne egkeilanganen din su masulug ka nabulihan din wey nalagkes ad en iya.

³ Ipangemusta a te alunggun ne ensi Prisila wey Akilu ne me duma ku te migpamakey ki Kristu Hisus. ⁴ Impangabangan a nikandan minsan eggi-matayan dan e perem, sikan naa ka egpasalamatan ku sikandan. Ne kene ne sikeddi de ka egpasalamat su minsan degma ka langun ne punduk te kene ne me Hudiyu ne migmalintutuu. ⁵ Ipangemusta a degma te duma ne migmalintutuu ne migmanlibulung diye te baley ran.

Ipangemusta a degma ki Ipinitu ne miggeyinawaan ku ne iyan an-anayan ne migpalintutuu ki Kristu diye te prubinsya te Asya, ⁶ wey ki Mariya ne migpakan-nekal migbulig kaniyu. ⁷ Ipangemusta a degma engki Andruniku wey Hunyas ne me karumaan ku te Hudiyu ne duma ku te naprisu. Mabantug sikandan ne me apustulis wey nekewun-a pad sikandan keddi migpalintutuu ki Kristu.

⁸ Ipangemusta a man-e ki Ampliyatu ne miggeyinawaan ku tenged te Magbebeye, ⁹ wey ki Urbanu ne duma ta te migpamakey

ki Kristu, wey ki Istakis ne miggeyinawaan ku. ¹⁰ Ipangemusta a degma ki Apilis ne napamalehetan e ne matinumanen ki Kristu, wey te pamilya enni Aristubulu ¹¹ wey ni Hirudiyun ne karumaan ku te Hudiyu. Ne iling ded man-e te pamilya ni Narsisu ne migmalintutuu te Magbebeye.

¹² Ipangemusta a man-e engki Tripina wey ki Tripusa ne migpamakey te Magbebeye, wey ki Pirsida ne miggeyinawaan ku ne migpakan-nekal migpamakey te Magbebeye. ¹³ Ne iling ded ki Rupu te egkabantug se pegpamakey te Magbebeye, wey te iney rin ne in-isip kud degma ne iney ku, ¹⁴ wey engki Asinkritu, ki Pligunti, ki Hirmis, ki Patrubas, ki Hirmas wey te me duma ran ne suled ta te pegpalintutuu. ¹⁵ Ipangemusta a degma engki Pilulugu, ki Hulya, ki Niriyu wey te atebey rin, ki Ulimpas wey te langun ne me duma ran ne keet-etawan te Manama.

¹⁶ Pegpangemusteey kew ka tagse sabeka te pegpapitew ne migpaheyinaweeey kew.* Migpangemusta degma kaniyu ka langun ne punduk ne migmalintutuu ki Kristu.

Ka katammanan ne me paney-paney

¹⁷ Me suled, egpanpanayan ku sikaniyu ne bantey kew

te me etew ne iyan egpuunan ne egkabaad-baad kew wey epnakasuwewy kew te pegpanulu ne natuenan niyu dengan. Pakaddiyu kew naa kandan. ¹⁸ Su sika ne me etew ware migpamakey te Magbebeye ta ne si Kristu, ke kene, iyan dan impamakey ka lawa ran. Ne pinaahi te mekeinniyat ne peggulu wey meupiya ne epamminehen ne guhuren dan, egkalimbungan dan ka mangnguwed pad se suman-suman. ¹⁹ Ka guhuren meyitenged te pegparumarama niyu ki Kristu, nannengnengan te langun ne etew wey amana a nahale kaniyu. Piru igkeupii ku ne mangateu kew te langun ne meupiya wey pakaddiyu kew te langun ne mareet. ²⁰ Te kene egkaluhay egkatalu te Manama te keupianan si Meibulan wey egdi-diekan ta sikandin.

Ka keupiya wey keyid-u te Magbebeye ta ne si Hisus, egkaangken niyu.

²¹ Migpangemusta kaniyu si Timutiyu ne migbulig keddi, wey ensi Lusyu, si Hasun, wey si Susipatru ne me karumaan ku te Hudiyu.

²² (Sikeddiey si Tirsiyu ka impasulat te seini ne sulat, epangemusta a degma kaniyu te migpalintutuu te Magbebeye.)

16:21 Him 16:1. **16:23-24** Him 19:29; 1Kur 1:14; 2Tim 4:20. † **16:23-24**
Due me sinulat ne miglagkes te birsikulu 24 piru ware seini diye te malehet ne migpuunan. Intimul naan de seini ne eggendue, Ka keupiya wey keyid-u te Magbebeye ta ne si Hisu Kristu, egkaangken niyu langun. Malehet iya.

23-24 Migpangemusta degma kaniyu si Gayu, ka mahinged ne migpamaneyikan ku. Kayi te baley rin egliblibulung ka migmal-intutuu. Ne migpangemusta red degma ensi Irastu ne talaggen-gen te seleppi te siyudad wey si Kuwartu ne suled ta.[†]

Ka pegsaye te Manama

²⁵ Egdayanen ka Manama ne eglig-en te pegpalintutuu niyu sumale te Meupiya ne Panugtulen meyitenged ki Hisu Kristu ne inwali ku. Neeles ka seini ne kamalehetan te amana ne naluhay ne timpu, ²⁶ piru impanengneng e kuntee te Manama ne ware egtamanan diye te langun ne etew pinaahi te sinulat te me prupita. Ne migsuhu sikandin ne iga pangguhud ka Meupiya ne Panugtulen diye te langun ne me nasud eyew epalintutuu wey egtuman ka me etew.

²⁷ Pinaahi ki Hisu Kristu, egsayeen ta te ware egtamanan ka Manama ne iyan de matagseb! Malehet iya.

Ka An-anayan ne Sulat ni Pablu te Matig-Kurintu

Igpewun-a

Ka an-anayan ne sulat ni Pablu te Matig-Kurintu, insulat din te timpu ne diye sikandin te Ipisu ka egwali. Insulat din seini eyew te pegbulig te me prublima ne nabayaan te nalein-lein ne punduk te migmalintutuu ne impes-ek din diye te Kurintu. Ka Kurintu ka iney ne siyudad te prubinsya te Akaya, ne ka Akaya, sabeka te prubinsya ne sakup te Ruma. Te seeye ne timpu, sabeka ne dakel ne siyudad ka Kurintu ne nangugpaan te me Grigu, Rumanhun, wey me Hudiyu. Ne puun su ilis sika te dahat, masalig degma ka egmangendiye ne eg-untud te me barku ka egpamelegye wey egpameli. Nabantug ka sika ne siyudad tenged te karatu din, wey masalig ka nalein-lein ne rilihiyun te mahinged dutu, wey masalig degma ka egmeyibhilabetey dutu wey ka eg-ikul te tapey ne batasan ne iling due. Hapit migdaruwa ne leg-un si Pablu ka mig-ugpe diye eyew te pegwali, wey masalig ka migpalintutuu (Me Himu 18).

Peglihad te me tatelu ne leg-un, taheed te diye si Pablu te Ipisu ka egwali, nakarawat sikandin te sulat puun te migmalintutuu

diye te Kurintu (1 Kur 7:1). Nakarineg man-e sikandin meyitenged te ehetanan te migmalintutuu wey te duma pad ne me prublima ran diye te punduk te migmalintutuu. Te seini ne sulat, intambahan din sikandan meyitenged due wey egpepaaween din seeye se egmeyibhilabetey ne sakup te punduk dan te migmalintutuu. Intabak din man-e seeye se me inse meyitenged te egmaas-asaweey, me balu, me dasag te Panisingan te Manama, wey ka peg-uyag te me minatey.

Te kapitulu 13, nahuhud due ne sika se geyinawa, iyan sika ka subla ne meupiya ne dasag te Manama diye te keet-etawan din. Ne kema ke sika iya ka amana ipaneng-neng te seini ne baseen.

Ka nasulat te seini ne baseen

Igpewun-a 1:1-9

Ka pegkabaad-baad te migmalintutuu 1:10-4:21

Ka pegaspad ni Pablu te migmalintutuu tenged te pegbalahad dan te migpeyilabetey 5:1-13

Ka eleg ne peggusey te ehetanan 6:1-11

Ka eleg ne peggamit te kaligwangan isip me migmalintutuu 6:12-20

Ka inse meyitenged te asaweey 7:1-40

Ka pegtahud te Manama du te me diyus-diyus 8:1-11:1

Ka eleg ne eggimuwen te malitan diye te libulun-

ganan te migmalintutuu
11:2-16

Ka eleg ne eg-ikulen te
peggimu te Peglabung te
Magbebabe 11:17-34

Ka me katuenan ne imbe-
hey te Panisingan wey
ka peggamit due diye te
libulunganan te migmal-
intutuu 12:1-14:40

Ka peg-uyag ni Kristu wey
te migmalintutuu 15:1-
58

Ka pegpanlimud te igbulig
te me Kristuwanen diye
te Hudiya 16:1-4

Ka planu ni Pablu wey ka
katammanan 16:5-24

¹ Sikeddiey si Pablu ka
migpeuyan te seini ne sulat
duma te suled ta ne si
Sustinis. In-alam a ne egkey-
imu ne apustulis ni Kristu
Hisus sumale te pegbuut te
Manama.

² Egpangemusta key
kaniyu te migmalintutuu
te Manama due te Kurintu
ne immatulus din pinaahi
te pgsabeka rin kaniyu ki
Kristu Hisus. In-alam kew
te Manama ne egkeyimu
ne keet-etawan din duma
te seeye se langun ne diye
te nalein-lein ne inged ne
egpangananey te Magbebabe
ta ne si Hisu Kristu. Sikandin
ka Magbebabe ta langun.

³ Ka keyid-u wey keupi-
anan ne egpuun te Manama
ne Amey ta wey te Mag-
bebabe ne si Hisu Kristu,
egkaangken niyu.

*Ka pegpasalamat ni Pablu
diye te Manama*

⁴ Egpasalamat a layun
te Manama meyitenged
kaniyu tenged te keupiya
wey keyid-u ne impa-
pitew rin kaniyu puun te
pegsabeka rin kaniyu ki
Kristu Hisus. ⁵ Su tenged
te pgsabeka rin kaniyu
ki Kristu, impanalanganan
kew te langun-langun de
iaya-te peglag-lalag niyu
wey te katuenan niyu. ⁶ Ne
nakapamalehet seini ne
malehet iya ka impanulu
ney kaniyu meyitenged ki
Kristu. ⁷ Sikan naa, ware
kew nakulangi te nalein-lein
ne katuenan ne imbehey
te Panisingan te Manama
kaniyu te pegtetahad niyu
te peglibed te Magbebabe ta
ne si Hisu Kristu. ⁸ Egligen-
nen din ka pegpalintutuu
niyu taman te katammanan,
su eyew ware igkarew-ey
kaniyu te aldew te peglibed
te Magbebabe ta ne si Hisu
Kristu. ⁹ Matinumanen ka
Manama ne mig-alam kaniyu
ne egpekegduma te Anak
din ne si Hisu Kristu ne
Magbebabe ta.

*Ka pegkabaad-baad te
migmalintutuu*

¹⁰ Me suled, egbanasalan
ku sikaniyu pinaahi te
ngaran te Magbebabe ta ne
si Hisu Kristu, te keilangan
ne egpekeg-uyun kew langun
su eyew kene kew egkabaad-
baad. Keilangan ne sabekaa
niyu ka suman-suman niyu
wey ka katuyuan niyu. ¹¹ Me
suled ku, nahuhuran a te

sakup ni Klui ne egmaap-apuley kew kun.¹² Ka duma kaniyu ne egkahi kun, "Eg-ikul a ki Pablu", wey egkahi ka duma, "Eg-ikul a ki Apulus", ne ka duma, "Eg-ikul a ki Pidru*", wey egkahi ka duma, "Eg-ikul a ki Kristu."¹³ Mania, nabaad-baad si Kristu? Kahiyen niyu buwa ne sikeddi, si Pablu, ka migpalansang para kaniyu? Mania, imbewutismuwan kew te ngaran ni Pablu?

¹⁴ Amana a migpasalamat te wara a nakabewutismu kaniyu angin e ki Krispu wey ki Gayu,¹⁵ purisu ware min-san sabeka ne egpakakahihne pinaahi te ngaran ku ne nabewutismuwan kew.¹⁶ (E, uya bes, nabewutismuwan ku bes degma si Istipanas duma te pamilya rin, ne gawas kandan, warad e egkasuman-suman ku ne nabewutismuwan ku.)¹⁷ Su wara a ipeuyan ni Kristu eyew egpamewutismu, ke kene, eyew te pegwali te Meupiya ne Panugtulen. Ne wara a miggamit te me mate-les ne me lalag te pegpapitew te katuenan ku, su kema ke egkaawaan e te geem ka pegpanulu meyitenged te kamatayen ni Kristu diye te krus.

Si Kristu ka geem wey kaalam te Manama

¹⁸ Su ka guhuren meyitenged te kamatayen ni Kristu diye te krus, keungelan de para

te seeye se egmekeendiyad e te karereetan. Piru sikanta se nenaluwas, in-ila ta mule sika ne geem te Manama.¹⁹ Su nasulat e te Kasulatan, "Egdereeetan ku ka kaalam te me matagseb,

wey igsawile ku ka kat-uanan te me utekan."

²⁰ Purisu, nekey naan e ka neyitabu te matagseb, te talagpanulu te Balaud te Manama, wey te meupiya ne talag-apul te seini ne timpu? Impakita iya te Manama ne keungelan de ka kaalam te seini ne kalibutan.

²¹ Ne puun te kaalam te Manama, pegbuut din ne kene egpekeila kandin ka me etew te kalibutan pinaahi te kaalam dan mismu, tenged su planu rin ne egluwasen din seeye se egpalintutuu ki Kristu pinaahi te pegwali ta. Ne sika se inwali ta, in-isip te seeye se ware migpalintutuu ne keungelan kun de.²² Su ka me Hudiyu, iyan dan egbuyuen ka me palinneu, ne ka me Grigu, iyan dan egpammitawen ka kaalam.

²³ Piru sikanami mule, iyan ney inwali si Kristu, ka inlansang diye te krus. Ka sika ne wali, ingkeenendueni te me Hudiyu wey keungelan kun kahi te seeye se kene ne me Hudiyu.²⁴ Piru para te seeye se in-alam te Manama, me Hudiyu ma wey se kene, si Kristu ka geem wey kaalam te Manama.²⁵ Su ka in-isip dan ne keungelan kun

* **1:12** Te Grigu: Sipas **1:14** Him 18:8; Him 19:29; Rum 16:23. **1:16** 1Kur 16:15. **1:19** Isa 29:14 (LXX). **1:20** Hub 12:17; Isa 19:12; 33:18; Isa 44:25.

ne hinimuwan te Manama, labew pad ne maalamen du te kaalam te etew. Ne minsan ka in-isip dan ne kahuye te Manama, subla pad ne makeseg du te kanekal te etew.

²⁶ Me suled, sumsumana niyu ke nekey kew dengan te peg-alam te Manama kaniyu. Salimbeka re kaniyu ka in-isip te duma ne matagseb, wey salimbeka re degma ka dakel se katungdanan, wey ka egpuun te talahuren ne pamilya. ²⁷ Piru in-alam te Manama seeye se in-isip te me etew ne keungelan eyew te pegpeyilew te seeye se me matagseb. In-alam te Manama seeye se me etew ne in-isip ne ware me geem eyew te pegpeyilew te seeye se due me geem. ²⁸ In-alam te Manama seeye se ware egkeyimu, ka egkaleig-leig de, wey ka in-isip te me etew ne ware pulus eyew te pegpapitew ne ware bes karuan te seeye se in-isip dan ne due karuan. ²⁹ Ne puun due, ware egpakapeggasal diye te tangkaan te Manama. ³⁰ Ka Manama ka migsabeka kaniyu diye ki Kristu Hisus, ne sikandin ka neyimu ne kaalam ta ne egpuun diye te Manama. Innimu ki nikandin ne matareng, immatulus ki nikandin, wey inlekat ki nikandin puun te me sale ta. ³¹ Purisu, eg-ikul ki te nasulat te Kasulatan ne miggenendue, "Emun ke due egkeupian ne egpeggasal,

keilangan ne sika se neyimu te Magbebaye ne Manama ka igpeggasal rin."

2

Ka pegwali ni Pablu pinaahi te geem te Manama

¹ Na, me suled, peggenden duen ku te kaniyu, wara a miggendue ne miggamit te maddalem wey ke maalamen ne me lalag te pegpangguhud ku kaniyu meyitenged te heles ne kamalehetan puun te Manama. ² Su nakaplanu ad te diye e pad te kaniyu ne ware lein ne igwali ku gawas de ki Hisu Kristu wey ka peglansang kandin diye te krus. ³ Miggenduen a te kaniyu ne mahuye, wey migpangelkel e pad te kaaldek. ⁴ Te pegwali ku due te kaniyu, wara a miggamit te mapahetpet ne me lalag eyew te pegpapitew te kaalam ku. Piru ka Panisingan te Manama ka migpamalehet ne malehet iya ka inwali ku. ⁵ Innimu ku sika su eyew ka pegpal-intutuu niyu, kene ne diye egpuun te kaalam te etew, ke kene, diye te geem te Manama.

Ka kaalam te Manama

⁶ Piru ke diye key te matesan e se pegpalintutuu, eggamit key te maalamen ne me lalag, piru kene ne iling te kaalam te seeye se kene egpalintutuu, wey te seeye se egmanlihad de ne me talagmandu te seini ne kalibutan.

⁷ Ka kaalam ne egkahiyan ney kayi, sika se needles de ne kaalam te Manama ne ware din ipanengneng te me etew dengan. Te ware din pad himuwa ka kalibutan, tapey rin e planuwa sika eyew egpakalagkes ki degma te kabantug din keureme. ⁸ Ne ware minsan sabeka te talagmandu kayite kalibutan ka nakasabut kayi, su emun ke nasabut pa nikandan, ware dan e perem ilansang ka Magbebabe ne likes te langun ne pegdayan. ⁹ Piru, sumale te nasulat te Kasulatan ne miggendue, "Ware etew ne nakakita, nakarineg

wey nakasuman-suman ke nekey iya ka in-andam te Manama para te seeye se miggeyinawa kandin."

¹⁰ Piru impanengneng sika kanta te Manama pinaahi te Panisingan din. Su ka Panisingan te Manama, egugsi-ugsi te langun de iya, minsan pad ka maralem e ne suman-suman te Manama.

¹¹ Ware minsan hentew ne nakataha ke nekey ka egsumsumanen te sabeka ne etew angin e te panisingan te sika ne etew mismu. Ne iling naan ded degma due, ware sabeka ne nakataha te suman-suman te Manama angin e te Panisingan din.

¹² Piru meytenged kanta, kene ne ka panisingan te kalibutan ka indawat ta, ke kene, sika se Panisingan te Manama ne impeuyen

din eyew egpapasabut ki te langun ne imbehey te Manama kanta.

¹³ Purisu, te pegpanulu ta meytenged te Manama, ware ta gamita ka me lalag ne egpuun te kaalam te etew, ke kene, ka me lalag ne impanulu kanta te Panisingan te Manama. Impasabut ney ka pegpanulu ne egpuun te Panisingan diye te me etew ne nakaangken te Panisingan te Manama. ¹⁴ Ka etew ne ware nakaangken te Panisingan te Manama, kene egdawat te langun de iya ne egpuun te Panisingan te Manama, su keungelan kun de kandin ka iling due. Ne kene man-e sikandin egpapasabut, tenged su egkasabut de ka iling due pinaahi te bulig te Panisingan te Manama.

¹⁵ Piru ka etew ne mig-ugpaan te Panisingan te Manama, egpakanengneng te langun ne egpuun te Panisingan te Manama, piru kene sikandin egkanengnengan te duma ne me etew. ¹⁶ Su sumale te Kasulatan,

Hentew bes ka nakataha te suman-suman te Magbebabe ne Manama?

Hentew bes ka egpaketam-bag kandin?

Piru sikanta se migmalintuu ka egpataha ke nekey ka egsumsumanen ni Kristu.

3

Ka me suluhuanen te Manama

¹ Me suled, dengan, kena a egpakapanulu kaniyu isip me etew ne mig-ugpaan te Panisingan te Manama, ke kene, isip me etew ne kalibutanen wey bate pad se pegpalintutuu ki Kristu. ² Gatas de ka imbehey ku kaniyu, kene ne makehal ne keenen su kene kew pad nahud ne eleg ne egkeen due, wey minsan kuntee, kene kew pad man-e ne eleg ³ tenged su kalibutanen kew pad. Su puun te egmokeg-imma kew pad wey egmokeg-ehet, migpamalehet de iya sika ne kalibutanen kew. Ka hinimuwan niyu, iling te hinimuwan te me etew kayi te kalibutan. ⁴ Su emun ke egkahi ka sabeka, "Si Pablu ka eg-ikulen ku," ne kahi te sabeka, "Si Apulus ka keddiey." Nekeg-iling kew re iya te me etew kayi te kalibutan!

⁵ Hentew bes si Apulus? Hentew bes si Pablu? Me suluhanen key re te Manama. Ne pinaahi kanami, nakapal-intutuu kew, piru migtuman key re te impeyimu kanami te Magbebabe. ⁶ Sikeddiey ka migpamula, ne si Apulus ka migpamisbis, ne ka Manama ka migpatulin. ⁷ Purisu, kene ne impurtanti ke hentew ka migpamula wey ka migbisbis, su iyan impurtanti ka Manama ne migpatulin due. ⁸ Sika se migpamula wey ka migbisbis, nekeg-iling de ka katuyuan dan, wey egdasahan te Manama

ka tagse sabeka sumale te hinimuwan din. ⁹ Su talagduma key te himu te Manama, ne sikaniyu ka kamet din.

Ne sikaniyu man-e ka baley rin. ¹⁰ Sikeddiey ka egpekeiling te mangngateu ne talagbebaley ne migpes-ek te pabunsuran, tenged te katuenan ne imbehey te Manama keddiey. Due degma duma ne egpabulus ne egbebaley te impes-ek ku ne pabunsuran. Piru ka tagse sabeka, keilangan ne eg-ay-ayaran din ka himu rin. ¹¹ Su warad e etew ne egpakabalew-balew te pabunsuran ne impakapabunsud e ne iyan si Hisu Kristu. ¹² Due me etew ne eggamit te sika ne pabunsuran ne iyan eggamiten ka bulawan, pelata, wey tetelesi ne batu. Ne ka duma eggamit te kayu, lahami, wey hilamunen. ¹³ Piru ka hinimuwan te tagse sabeka, egkatahaan ded te Aldew te Peggukum tenged su eg-elehan sika pinaahi te hapuy eyew egkakita ke nekey ne klasi ne himu sika. ¹⁴ Ne emun ke kene egkatutung ka impasasindeg diye te pabunsuran, egpakarawat te dasag ka migpasasindeg due. ¹⁵ Piru ke due egkasilaban ne himu te sabeka ne etew, ware iya egkarawat din ne dasag. Piru egkaluwas ded sikandin, egpekeiling sikandin te etew ne nakapallahuy red puun te baley ne egkasilaban.

¹⁶ Ware kew bes nakataha ne sikaniyu ka ugpaan* te Manama wey due mig-ugpe te kaniyu ka Panisingan din?
¹⁷ Ke duen ma egdereet te ugpaan te Manama, egdereetan degma sikandin te Manama. Su matulus ka ugpaan te Manama, ne sikaniyu iya ka sika ne ugpaan.

¹⁸ Kene niyu limbungi ka pegkeetew niyu. Ke duen ma sabeka due te kaniyu ne egsuman-suman ne matagseb sikandin sumale te kalibutanen ne etew, me-upiya pad ke eg-inniyuhan din ka sika ne kaalam su eyew egkeyimu iya sikandin ne malehet ne matagseb.
¹⁹ Su ka kaalam te seini ne kalibutan, keungelan de diye te tangkaan te Manama. Sumale te nasulat te Kasulatan, "Egsahiluten din seeye se egsuman-suman ne matagseb pinaahi red te kaalam dan." ²⁰ Ne duen pad man-e nasulat te Kasulatan ne miggenendue, "Nakataha ka Magbebeye ne Manama ne ware karuan te suman-suman te me matagseb."
²¹ Purisu, keilangan ne kene kew egpegasal meyitenged te senge etew, su ka langun, imbehey e te Manama kaniyu. ²² Si Pablu, si Apulus, wey si Pidru, kaniyud iya. Minsan ka kalibutan, ka umul, ka kamatayen, ka kuntee, wey ka eggiguma pad, kaniyu sika se langun.
²³ Ne sikaniyu, kandin e ni Kristu, wey si Kristu, kandin

e te Manama.

4

Ka me apustulis ni Hisu Kristu

¹ Purisu isipa key ne me suluhuanen ni Kristu ne insalihan te pegpang-guhud meyitenged te heles ne kamalehetan puun te Manama. ² Ne sika se insalihan, keilangan ne egpakita ne egkasalihan iya sikandin. ³ Sikeddi, ware amana karuan ke nekey ka ig-ugsi-ugsi niyu meyitenged keddi wey te minsan hentew. Su minsan sikeddi, kena a eg-ugsi-ugsi te himu ku. ⁴ Malinis ka kunsinsya ku, piru ware seini migpasabut ne warad iya sale ku. Ka Magbebeye de ka eggukum keddi. ⁵ Purisu kene kew ugsi-ugsi te minsan hentew te kene pad eggiguma ka eleg ne timpu; tahari niyu taman ke eggigume e ka Magbebeye. Te sika ne timpu, igpanengneng din ke nekey ka needles, wey igpeeyang-heyang din ke nekey ka suman-suman te me etew. Te sika ne timpu, egpakanawat ka tagse sabeka te pegdeyrey te Manama sumale te hinimuwan din.

⁶ Me suled, te langun ne ingkahi ku, inggamit ku ne panunggilingan ka pegkeetew ku wey si Apulus eyew pinaahi kanami, egkapanulu kew ne egtuman ke nekey ka nasulat te Kasulatan. Emun ke egtumanen niyu

sika, ware sabeka kaniyu ne egpakapeggasal ne eglapig te sabeka wey egdeeg-deeg te dangeb. ⁷ Hentew-a ka miggimu kaniyu ne labew te duma? Nekey-a ka due te kaniyu ne ware ibehey te Manama? Ne puun su diye te Manama egpuun ka langun ne due te kaniyu, mania te egpeggasal kew ne hendue ubag te kene ne dasag ka langun ne due te kaniyu!

⁸ Kahiyan niyu ne duen e ka langun ne keilangan niyu! Kahiyan niyu ne me datu kew e te ispirituwanen! Kahiyan niyu ne mighari kew e, ne sikanami mule, ware pad! Meupiya iya perem ke eghari kew e su eyew egpakahari key e degma duma kaniyu! ⁹ Su sikanami se me apustulis, hendue te innimu key te Manama ne kene ne impurtanti te langun ne etew. Nekeiling key te me pinirisu ne naparusaan te kamatayen, wey neyimu key ne tengtenganan te langun ne kayi te kalibutan: te me panalihan wey te me etew. ¹⁰ Kahiyan te me etew ne ungel key tenged te pegpalintutuu ney ki Kristu, ne sikaniyu mule, isip niyu ne matagseb kew tenged te pegpalintutuu niyu ki Kristu! Kahiyan man-e te me etew ne mahuye key, ne sikaniyu, mannekal kew mule! Intahud kew te me etew, piru sikanami, ware mule tahura! ¹¹ Minsan kuntee, egmanggutasan key,

egkammaraan, ware amana kumbale ney, impanlampesan key, wey ware ugpaan ney. ¹² Migpakanekal key miggimu para te keuyahan ney. Emun ke due egdeeg-deeg kanami, egpanalanginan ney sikandan; ke due egbayad-bayad kanami, egantusen ney seeye. ¹³ Ke eg-id-iranen key nikandan, meupiya mule ka igtabak ney. Ne minsan kuntee, in-isip key red te me etew ne iling te basuraan te kalibutan, wey ke museng te kendiru ne in-unasan.

¹⁴ Kene ne insulat ku seini ne menu egpeyilawan kew, ke kene, pegpanulu seini kaniyu isip me pinalangge ku ne me anak. ¹⁵ Su minsan pad ke due libu-libu ne talagpanulu ne egpanulu kaniyu meyitenged ki Kristu, sabeka re ka amey niyu. Su tenged te pegpalintutuu niyu ki Kristu, neyimu a ne amey niyu pinaahi te pegpangguhud ku kaniyu te Meupiya ne Panugtulen. ¹⁶ Sikan naa, egbanasal a kaniyu ne eg-iling keddi. ¹⁷ Sika ka egpuunan ne igpeuyan ku due te kaniyu si Timutiyu, ka pinalangge wey matinumanen ne anak ku due te Magbebaye. Sikandin ka egpasuman-suman kaniyu ke immenu ku te peg-ugpe tenged te pegpalintutuu ku ki Kristu. Iling ded due ka impanulu ku diye te langun ne punduk te migmalintutuu ne neendiyaan ku.

¹⁸ Ka duma kaniyu, neyimu ne hambuhen, su kahiyen dan ne kena ad e egpekeendue te kaniyu. ¹⁹ Piru ke igtuhut te Magbebaye, eggenduen a te kaniyu te kene egkaluhey. Te sika ne timpu, egkatahaan kud ke duen naan iya geem te me hambuhen, su kema ke egpanlalag de due sikandan. ²⁰ Su egkakita ne mighari e ka Manama kayi te kanta pinaahi te geem din ne egkakita kayi te kanta, ne kene ne pinaahi re te peglalag ta. ²¹ Na, hendei ka igkeupii niyu? Eggenduen a ka egparusa kaniyu, wey ke eg-ay-ayaran ku sikaniyu wey eggeyinawaan?

5

Ka pegpaawe te etew ne eggilabet te kene ne asawa rin

¹ Nahuhud e ne duen kun due te kaniyu ne eggimu te lilinditi ne hinimuwan, su duen kun etew ne mig-asasawa te iney-iney rin. Ka iling due ne hinimuwan, ware de due neyimu te seeye se kene egpalintutuu te Manama. ² Sikaniyu se me hambuhen! Emun naa perem su egkalaggew kew! Meupiya pad perem ke impaawe niyud e te punduk niyu ka eggimu te iling due. ³⁻⁴ Su minsan ke wara a due te kaniyu, piru iling ded te duen a.* Ne pinaahi te ngaran te Magbebaye ta ne

si Hisus, inggukuman kud e ka maggimu te iling due ne sale, iling te peggukum ku te duen e red. Purisu, diye te kalibulungan niyu, sumsumana niyu ne dume e red nikaniyu.† ⁵ Keilangan ne igpiyal niyu ka sika ne etew diye ki Meibulan eyew egdereetan ka lawa rin, su eyew egkaluwas ded ka gimukud din te Aldew te peglibed te Magbebaye.

⁶ Kene ne meupiya ka pegpaambug niyu! Ware kew nakanengneng te nakahi, “Minsan ke deisek ka igpatulin, egpakapatulin sika te inluyang ne harina”? ⁷ Ipaawe niyu due te kaniyu ka makasesale ne etew ne egpekeiling te igpatubu, eyew egkeyimu kew ne iyam. Emun ke eggimuwen niyu ka iling due, egpekeiling kew te iyam ne linuyang ne harina ne ware sewuhi te igpatulin. Ka malehet, iling kew en iya due su impakanubad e si Kristu para kanta. Egpekeiling sikandin te karniru ne impanubad te timpu te Sahakeen te Peglihad te Panalihan. ⁸ Purisu, te pegasahakeen ta te Peglihad te Panalihan, kene ne iyan ta egkeenen ka paan ne due patulin, ne iyan sika se malindit ne himu wey mareet ne batasan. Su iyan ta egkeenen ka paan ne ware patulin, ne iyan sika se paan te kamalehetan wey ka

* 5:1 Diy 22:30. * 5:3-4 Te Grigu: dume e red nikaniyu te panisingan. † 5:3-4 Te Grigu: dume e red nikaniyu te panisingan. 5:6 Gal 5:9. 5:7 Iks 12:5.

5:8 Iks 13:7; Diy 16:3.

kalinis te suman-suman.

⁹ Diye te sulat ne impeuyan ku kaniyu, inlalahan ku sikaniyu ne kene egamung-amung te me etew ne egmeyibhilabetey se kene ne alunggun. ¹⁰ Piru kene ne iyan ku igpasabut seeye se kene egmalintutuu ne miggimu te keyilawan, me halamlamen, me limbungen, wey egmanimba te diyus-diyus. Ne emun ke egpanaliya kew te iling due ne me etew, keilangan ne engkeran niyu ka seini ne kalibutan. ¹¹ Ka impasabut ku diye te sulat ku, ne keilangan ne kene kew dumaruma te seeye se mig-angken ne migpalintutuu, piru eggimu red te keyilawan, halamlamen ded, egsimba te diyus-diyus, talabayungen, talewubug, wey takawen. Kene kew duma kandan te egmangekeen.

¹²⁻¹³ Su ware labet ku ne eggukum te seeye se kene ne duma ta te pegpalintutuu, su kandin sika te Manama. Piru, duen iya mule katenged niyu te peggukum te seeye se sakup te punduk niyu te migpalintutuu, su due nasulat diye te Kasulatan ne miggendue, "Ipaawe niyu due te kaniyu seeye se eggimu te mareet."

6

Ka peggusey te ehetanan

¹ Emun ke due sabeka kaniyu ne due igbennal te suled din te pegpalintutuu,

mania te igpeyinguma rin pad diye te talaggukum ne kene egpalintutuu? Ka keet-etawan perem te Manama ka eggusey due. ² Ware kew nakataha ne ka keet-etawan te Manama ka eggukum te me etew kayi te ampew te tane keureme? Na, emun ke sikaniyu ma ka eggukum kandan, mania te kene kew egpekewusey te dereisek de ne ehetanan? ³ Ware kew nakataha ne sikanta ka eggukum te me panalihan? Ne iyan naan pa iya ka meyitenged te pegugpe te me etew te seini ne kalibutan! ⁴ Sikan naa, emun ke due ehetanan due te kaniyu, mania te iyan niyu egpewusayen ka etew ne ware tahura te migmalintutuu? ⁵ Mekeyilew-hilew sika! Ware bes sabeka kaniyu ne matagseb ne iyan eggusey te ehetanan te migmalintutuu? ⁶ Piru, nasi kew egpasumbungey ka neelin ne migpalintutuu, ne diye niyu pe ma te tangkaan te kene egpalintutuu!

⁷ Sika se pegpasumsumbungey niyu, migpakita re iya te pegkatalu niyu. Mania te kene kew epaleig-leig en iya! Mania te kene kew man-e egpalimbung en iya! ⁸ Piru, nasi e ne sikaniyu ka migpanleig-leig wey migpanlimbung, wey innimu niyu sika minsan diye te suled niyu te pegpalintutuu!

⁹ Ware kew bes nakataha ne seeye se kene ne

matareng, kene egpekeugpe te Migharian te Manama? Kene niyu limbungi ka pegkeetew niyu, su ka eg-peyibhilabetey ne kene ne alunggun, ka egsimba te me diyus-diyus, ka egmanlibug, ka me lukes ne eg-ealig te iling dan,¹⁰ ka takawen, ka halamlamen, ka talewubug, ka talabayungen, wey ka tulisan, kene iya egpekeugpe te Migharian te Manama.¹¹ Ne pila kaniyu dengan ka miggimu te iling due. Piru pinaahi te ngaran te Magbebaye ne si Hisu Kristu, wey te Panisingan te Manama ta, nalinisan kew e te me sale niyu, namatulus kew e, wey in-isip kew e te Manama ne matareng.

Ugpaan te Magbebaye ka lawa te etew

¹² Due duma ne egkahi, "Intuhutan a ne eggimu te minsan nekey." Uya iya, piru kene ne langun ne epakameupiya kanta. Sikeddi degma, epakakahi a, "Intuhutan a ne eggimu te minsan nekey," piru kena a egkeupian ne egeuripen te minsan nekey.¹³ Egkahi ka duma, "Innimu ka keenen eyew igtahu diye te getek, ne innimu ka getek eyew egtahuan te keenen." Uya buwa, piru keureme, ware tapid due ne egdereetan te Manama. Piru ka lawa mule, kene ne para te eg-peyibhilabetey ne kene ne alunggun, ke kene, para

re te Magbebaye, ne ka Magbebaye para te lawa.¹⁴ Keureme, ka Manama ka eg-uyag kanta pinaahi te geem din, iling te peg-uyag din te Magbebaye.

¹⁵ Ware kew bes nakataha ne ka lawa niyu, baad te lawa ni Kristu? Sikan naa, kene egkaayun ne ka baad te lawa ni Kristu, eggamiten ta te peggilabet te malitan ne egbebelegye te lawa rin!¹⁶ Ware kew nakanengneng ne ka lukes ne eggilabet te iling due ne malitan, egkeyimu e ne sabeka sikandan ne lawa? Su nasulat diye te Kasulatan ne miggenendue, "Ne sikandan se daruwa, egkeyimu ne sabeka."¹⁷ Piru ka etew ne egkasabeka diye te Magbebaye, egkasabeke e ka geyinawa ran te Magbebaye.

¹⁸ Purisu, pakaddiyui niyu ka egpeyilabetey ne kene ne alunggun. Ka duma ne sale te etew, kene egpakarereet te lawa, piru ka etew ne eggilabet te kene ne asawa rin, epakasale te kandin mismu ne lawa.¹⁹ Ware kew bes nakanengneng ne ka lawa niyu, timplu ne in-ugpaan te Panisingan te Manama ne imbehey rin kaniyu? Kene ne sikaniyu ka kamuney te lawa niyu su ka Manama.²⁰ Imbayaran kew e nikandin te mahal. Sikan naa, gamita niyu ka lawa niyu eyew te pegdayan te Manama.

te asaweey

¹ Na, seini ka tambag ku meyitenged te inse niyu diye te sulat: meupiya iya perem ne kene eg-asawa* ka lukes. ² Piru puun su masalig ka egpeyibhilabetey ne kene ne alunggun, keilangan ne eg-asawa iya ka lukes, ne iling ded degma ka malitan. ³ Ka alunggun, keilangan ne eg-pewulirey. Ka lukes, keilangan ne eggulid te asawa rin, ne iling ded degma ka malitan. ⁴ Ka malitan, kenad ne iyan egkamkamuney te lawa rin, ke kene, ka asawa rin e. Ne iling ded degma ka lukes, kenad e ne sikandin ka egkamkamuney te lawa rin su ka asawa rin e degma. ⁵ Kene kew kene-kene ke eggulid ka asawa niyu kaniyu, angin e ke nekegsabut kew ne kene kew pad egpewulirey su eyew eggamiten niyu ka timpu niyu te peg-ampu. Pegkapenga te nasabutan niyu, keilangan ne eg-pewulirey kew e man-e, su kema ke egkatintal kew ni Meibulan tenged su kene niyud e egkatigkel ka alig niyu.

⁶ Kene ne inlalag ku seini ne menu insuhu ku sikaniyu, ke kene, intuhutan ku re sikaniyu ne eg-asawa. ⁷ Meupiya perem ke langun niyu ne iling pad keddiey, piru imbehayan te Manama ka tagse sabeka te katuenan ne ware peg-ilinga.

* **7:1** Te Grigu: kene egksam sam te malitan. **7:10** Mat 5:32; 19:9; Mar 10:11-12; Luk 16:18.

⁸ Egnangenan ku sikaniyu se ware pad nenakaasawa, wey sikaniyu se me balu, te meupiya pad perem ke egpekeiling kew keddiey te ware mig-asawa. ⁹ Piru ke kene kew egpaketigkel te eggeramen niyu, egkaayun ne eg-asawa kew. Su meupiya pad ka eg-asawa du te egkeyirapan tenged te igkeupii te lawa niyu.

¹⁰ Ne sikaniyu se manggiasawe e, due iglalag ku kaniyu, ne kene ne suhu ku seini, su suhu te Magbebaye. Ka asawa ne malitan, keilangan ne kene egpakigsuwey te asawa rin. ¹¹ Piru ke egpakigsuwey sikandin, keilangan ne kene sikandin eg-abey eg-asawa wey ke meupiya pad ke egpekeg-uli ka meupiya ne geyinawa ran. Ne ka lukes degma, keilangan ne kene egpakigsuwey te asawa rin.

¹² Seini ka iglalag ku te duma, kedi de seini, kene egpuun te Magbebaye: ke due suled ta ne kene egpalintutuu ka asawa rin, piru eg-uyun ka malitan ne eg-ugpe pad duma kandin, keilangan ne kene sikandin egpakigsuwey te asawa rin. ¹³ Ne ke due degma malitan ne kene egpalintutuu ka asawa rin, piru eg-uyun ka lukes ne eg-ugpe pad duma kandin, keilangan ne kene sikandin egpakigsuwey te lukes. ¹⁴ Su ka lukes ne ware migpalintutuu, in-isip

te Manama ne sakup din pinaahi te asawa rin ne migpalintutuu. Ne ka malitan ne ware migpalintutuu, in-isip degma te Manama ne sakup din pinaahi te asawa rin ne migpalintutuu. Su emun ke kene pa ne iling due, egpekeiling e perem ka me anak dan te me anak te seeye se ware migpalintutuu. Piru ka malehet, in-isip e degma sikandan te Manama ne sakup din tenged kandan te alunggun. ¹⁵ Piru ke egkeupian ne egpakigsuwey te asawa rin seeye se ware migpalintutuu, tuhuti niyu sikandin. Te iling due ne paahi, kenad e egkabakus ka asawa ne migpalintutuu, su in-alam ki te Manama ne eg-ugpe ne malinawen. ¹⁶ Su sikeykew se malitan ne migpalintutuu, ware ka nakataha ke egkeuyan nu naan ded ka asawa nu wey se kene. Ne sikeykew degma se lukes, ware ka degma nakataha ke egkeuyan nu naan ded ka asawa nu wey se kene.

Pabulus kew ugpe ke nekey kew te peg-umew te Manama kaniyu

¹⁷ Keilangan ne ka tagse sabeka, egpabulus eg-ugpe sumale te peg-ugpe ne igbehey te Magbebaye kandin, ne iyan sika se peg-ugpe din te timpu te peg-alam te Manama kandin. Iling kayi ka impanulu ku diye te langun ne punduk te migmalintutuu ne egkeendiyaan ku. ¹⁸ Ke natuli e ka etew te peg-alam

te Manama kandin, kene perem ne keilangan ne eg-aween din ka tulak te pegtuli kandin. Ne emun ke ware pad sikandin natuli te peg-alam kandin te Manama, kene ne keilangan ne egpatuli pad sikandin. ¹⁹ Su kene ne impurtanti ke natuli ka etew wey se ware. Iyan de impurtanti ka pegtuman te me suhu te Manama. ²⁰ Ka tagse sabeka, keilangan ne egpabulus te keugpe din ke nekey sikandin te peg-alam te Manama kandin. ²¹ Emun ke uripen ka te peg-alam te Manama keykew, balahara nu sika. Piru ke due kaayunan ne egpakali-hawang ka, palimmakuti nu sika. ²² Su emun ke uripen ka te timpu ne in-alam ka te Magbebaye, in-isip kad e kuntee te Magbebaye ne kene ne uripen. Ne iling ded degma, emun ke kene ka ne uripen te peg-alam te Magbebaye keykew, neyimu kad e kuntee ne uripen ni Kristu. ²³ Imbayaran kew te Manama te mahal, purisu kene kew e peuripen te me etew. ²⁴ Purisu me suled, ka tagse sabeka kaniyu, keilangan ne egpabulus ne eg-ugpe ke nekey ka peg-ugpe din te peg-alam te Manama kandin.

Ka inse meyitenged te ware pad asawa wey te me balu

²⁵ Na, meyitenged te seeye se ware pad nakaasawa: ware suhu keddiey ne eg-puun te Magbebaye, piru

seini ka tambag ku isip etew
ne egkasalihan tenged te hid-
u te Manama.

²⁶ Tenged te keyirapan
te seini kuntee ne timpu,
insuman-suman ku ne me-
upiya pad perem ke epgab-
ulus kew pad te peg-ugpe
niyu kuntee. ²⁷ Emun ke
nakaasawa kad, kene ka
pakiguwey te asawa nu. Ne
emun ke ware asawa nu,
kene kad e mule pammitew
te eg-asaween nu. ²⁸ Piru
emun ke eg-asawa ke ma iya,
kene ke red epgakasale; ne
emun ke eg-asawa ka menge-
bay, kene ded sikandin
egpakasale. Piru seeye se
egmangasawa te seini ne
timpu, epgakabaye te me
keyirapan te peg-ugpe dan,
ne iyan ku perem igkeupii ne
kene kew epgakabaye due.

²⁹ Seini ka igpasabut ku
me suled: malepet naan
de ka nasame ne timpu.
Ne puun kuntee seeye se
manggiasawe e ne me lukes,
keilangan ne epgamakey
sikandan ne hendue te ware
asawa ran. ³⁰ Ne seeye se
eglungku, keilangan ne eg-
ugpe sikandan ne hendue te
ware miglungku; ne seeye
se egkahale, keilangan ne
eg-ugpe ne hendue te ware
nahale; seeye se migpameli,
keilangan ne henduen de
te kene ne kandan ka eg-
pameliyen dan. ³¹ Emun
ke eggamit ki te minsan
nekey kayi te ampew te tane,
keilangan ne kene ki perem
egkatiglingey due, su ka peg-
ugpe ta te seini ne kalibutan,

mahaan de egkataman.

³² Iyan ku igkeupii ne kene
kew egkasasew te peg-ugpe
niyu. Ka lukes ne ware
asawa, iyan din de igkasasew
ka himu te Magbebaye, ke
egmenuwen din sikandin te
pegpahale. ³³ Piru ka lukes
ne nakaasawe e, egkasasew
te langun-langun de kayi
te ampew te tane, wey ke
egmenuwen din te pegpa-
hale te asawa rin, ³⁴ ne sika
ka egpuunan ne egkabaad
ka suman-suman din. Ne
iling ded degma ka malitan
ne ware asawa, wey ke
mengebay pad iya, iyan din
e igkasasew ka meyitenged
te himu te Magbebaye,
su egkeupian sikandin ne
igbehey rin te Manama ka
umul rin, ware tapid te
lawa rin wey te gimukud
din. Piru ka malitan ne
nakaasawe e, egkasasew
sikandin meyitenged te
langun-langun de kayi te am-
pew te tane, ke egmenuwen
din te pegpahale te asawa
rin.

³⁵ Inlalag ku seini eyew te
pegbulig kaniyu, ne kene ne
pegbalabag kaniyu, ke kene,
eyew egmeupiya ka peg-ugpe
niyu wey ware epgakabal-
abag te pegpamakey niyu te
Magbebaye.

³⁶ Na, ke due lukes ne eg-
pangasawa ne nakasuman-
suman ne nekeyimu
sikandin te kene ne eleg
diye te egpangasaween din,
wey eglised e sikandin ka
egtigkel te eggeramen din,
wey pegsuman-suman din ne

eleg en iya ne egpeg-asaweeey e sikandan, meupiya pad ke egpakashal e sikandan. Kene ne sale sika.³⁷ Piru ke nakapalene-lene e ka geyinawa rin ne kene eg-asawa, wey te suman-suman din ne kene ne keilangan su egpaketigkel sikandin, meupiya ka eggimuwen din.³⁸ Purisu, seeye se eg-asawa te tratu rin, meupiya ka eggimuwen din, piru meupiya pad seeye se kene eg-a-sawa.

³⁹ Ka manggiasawa ne malitan, kene egkaayun ne eg-abey pad sikandin eg-asawa ke neuyag pad ka asawa rin. Piru ke egpatey e ka iglukes din, egkaayun e man-e sikandin ne eg-asawa ke hentew ka igkeupii rin, piru keilangan ne ka lukes, due pegpalintutuu te Magbebaye.⁴⁰ Piru ke sikeddi ka egpalalahen, subla pad ne meupiya ke kenad e eg-asawa sikandin. Sika ka isip ku wey te keddi ne suman-suman, ka Panisingan te Manama ka migpanulu keddi due.

8

Ka keenen ne inhalad e diye te diyus-diyus

¹ Na, meyitenged te keenen ne inhalad e diye te diyus-diyus: malehet iya ka ingkahi niyu ne sikanta langun, nakataha kid e meyitenged due. Ne minsan ke nakataha kid te ware karuan te peghalad diye te diyus-diyus, hendue te

malemu re ka pegpeggasal ta, piru ke due geyinawa ta, egpakalig-en ki te duma ta te pegpalintutuu.² Ke due etew ne egsuman-suman ne due katuenan din, ware din naan pad nanengnengi ke nekey ka kulang te natuenan din.³ Piru ka minsan hentew ne eggeyinawa te Manama, neila sikandin te Manama.

⁴ Sikan naa, meyitenged man-e te pegkeen te keenen ne inhalad e diye te me diyus-diyus: nakataha kid e ne ka diyus-diyus, kene iya ne malehet ne manama, wey warad e lein ne Manama su sabeka re iya.⁵ Su minsan ke due egkahiyen te me etew ne me manama diye te langit wey kayi te tane, wey minsan masalig ka manama wey ahalen,⁶ piru sikanta mule, sabeka re ka Manama. Sikandin ka Amey ne iyan miggimu te langun wey ka migpuunan ne neuyag ki. Ne sabeka re ka Magbebaye ne si Hisu Kristu, ne pinaahi kandin, innimu ka langun-langun de iya, wey pinaahi man-e kandin, due umul ta ne ware egtamanan.

⁷ Piru kene ne langun ne migmalintutuu ne nakataha meyitenged due. Ka duma, nelayam te diyus-diyus dengan, ne taman kuntee, egsumsumanen dan ded ne ka sika ne pegkeen ne nahalad e, kandin iya te diyus-diyus. Ne puun su mahuye ka kunsinsya ran, egkaheram dan ne egmalindit sikandan ke egkeen due.

⁸ Piru ka keenen, kene ne iyan egpuunan ne egkahale ka Manama kanta. Ware egkaangey ta wey ware egkalaag kanta ke egkeen ki due wey se kene.

⁹ Piru minsan ke due kaligwangan niyu te pegkeen te minsan nekey, keilangan ne egbantey kew, su kema ke sika ka egpakabalabag te seeye se mahuye pad se pegpalintutuu. ¹⁰ Panunggiling ke egkeen ka diye te timplu te diyus-diyus, sikeykew se duen e katuenan meyitenged due, ne egkiteen ka mule te seeye se etew ne eg-isip te sale ka egkeen te inhalad e, kema ke egkabagget e sikandin ne egkeen degma. ¹¹ Purisu, egkareetan sika se suled nu ne mahuye se pegpalintutuu, tenged te sika se “katuenan” nu, ne si Kristu, migpeyimatey red degma para kandin. ¹² Te iling due ne paahi, nakasale ka ki Kristu tenged su nakasale ka te me suled nu ne mahuye se pegpalintutuu, pinaahi te innimu nu ne nakabagget kandan te peggimu te iling dutu ne supak te kunsinsya ran. ¹³ Sikan naa, emun ke iyan egpuunan ka egkeenen ku ne egpakesale ka suled ku, kena ad e egkeen te ngalap eyew kena a egkeyimu ne egpuunan ne egpakesale sikandin.

9

Ka katenged te apustulis

¹ Sikeddi seini, duen e kaligwangan ku, menu ma iya? Ne apustulis e red mane, tenged su nakakita a iya ki Hisus ne Magbebaye ta, wey sikaniyu mismu ka behas te himu ku ne imbehey te Magbebaye keddiey. ² Ke kene e ma ne apustulis diye te suman-suman te duma, asal naan ubag due te kaniyu. Su sikaniyu se migpalintutuu ka igkapamalehet ne apustulis a iya te Magbebaye.

³ Seini ka igtabak ku te seeye se eg-ugsi-ugsi keddiey: ⁴ emun ke malehet ma ne apustulis key, ware naan en iya katenged ney te pegdawat te keenen wey inumen ne igsedad kanami te seeye se napanulu ney? ⁵ Ware naan e katenged ney ne egduruma te me asawa ne migpalintutuu iling te eggimuwen te me suled te Magbebaye, wey te duma ne me apustulis, wey ni Pidru? ⁶ Wey ke, sikanami naan de iya ki Birnabi ka keilangan ne egtrabahu eyew egkeuyag key? ⁷ Duen naa sundalu ne egbayaran din mismu ka pegkasundalu rin? Duen naa migpamula ne kene ne iyan egpakeen te pinamula rin? Duen naa talagtameng te me karniru ne kene ne iyan eginum te gatas te intamengan din?

⁸ Seini se inlalag ku, kene ne inetew-etew re ne suman-suman, ke kene, seini red degma ka impanulu diye te Balaud ni Muwisis. ⁹ Su

nasulat sika diye te Balaud ne miggendue, "Kene nu pungesa ka be-be te baka ke igdiriek sikandin." Mania, me baka re ka igkasasew te Manama? ¹⁰ Klaru ne sikanta ka igapasabut din te inlalag din. Uya iya, insulat seeye para kanami, tenged su seeye se me talagdaru wey talaggaani, egpallateng sikandan ne egpakarawat te baad dan. ¹¹ Puun su migpamula key due te kaniyu te ispirituanen ne beni, mabehat naan e kaniyu ke egbuyu key te keuyahan ney? ¹² Ke duen ma katenged te duma ne egtetahad te egpuun kaniyu, labew key en iya!

Piru ware ney mule gamita ka sika ne katenged, ke kene, in-antus ney ka langun eyew kene egkabalabahan ka pegpangguhud te Meupiya ne Panugtulen meyitenged ki Kristu. ¹³ Ware kew bes nakataha ne seeye se migpamakey diye te timplu, diye egkuwa te egkeenen dan te timplu? Ne seeye se migpamakey degma diye te altar, egkuwa sikandan te baad dan puun te me halad? ¹⁴ Ne iling naan ded degma, migsuhu ka Magbebaye ne seeye se nakarawat te Meupiya ne Panugtulen, keilangan ne iyan egbehey te keuyahan te seeye se migpangguhud kandan te Meupiya ne Panugtulen.

¹⁵ Piru wara a miggamit te

sika ne me katenged iling te pegpabulig kaniyu. Ne kene man-e ne iyan ku insulat kayi ne menu egpallateng a ne egbehayan a nikaniyu. Su egmeupiyeen ku pad ka egpatey te gutas du te egkaawe ka katenged ku te pegpeggasal. ¹⁶ Ware katenged ku te pegpeggasal meyitenged te pegwali ku te Meupiya ne Panugtulen, su impehes a iya te Manama te peggimu due. Ne mekeyid-u-hid-u a ke kene ku sika eggimuwen. ¹⁷ Su emun perem ke eggimuwen ku sika te keddiey ne pegbuut, eleg perem ne eg-unahan a. Piru kene ne keddi sika ne pegbuut, su insalig de te Manama keddi ka sika ne himu. ¹⁸ Nekey naan e ka unag ku? Ware lein gawas te egpakawali a te Meupiya ne Panugtulen ne ware migpabayad, minsan duen iya perem katenged ku te pegpabayad.

¹⁹ Su minsan ke due kalig-wangan ku, wey wara a neuripen te minsan hentew, piru migpeuripen a iya te langun ne etew su eyew masalig ka me etew ne egkeuyan ku. ²⁰ Su emun ke Hudiyu ka me duma ku, migikulan ku degma ka batasan dan su eyew egkeuyan ku sikandan. Ne minsan ke wara a migpasakup te Balaud ni Muwisis, migtuman e red man-e due eyew egkeuyan ku seeye se migpasakup te Balaud. ²¹ Ne iling naan ded

degma, te timpu ne iyan ku duma seeye se kene ne me Hudiyu ne kene eg-ikul te Balaud ni Muwisis, mig-iling a degma kandan ne kene eg-ikul te Balaud, su eyew egkeuyan ku sikandan te pegpalintutuu. Piru kene sika egpasabut ne kena a egtuman te Balaud te Manama, mig-ikul a iya te balaud ni Kristu.²² Su emun ke diya a te magguye, epahuye-guya a degma, eyew egkeuyan ku sikandan. Purisu egpammitew a te paahi ne egekeiling a kandan eyew egkaluwas ku ka duma kandan.

²³ Innimu ku sika eyew egpekeempet ka Meupiya ne Panugtulen wey eyew egkatalaran a te panalangin te Manama ne egpuun due. ²⁴ Ware kew bes nakataha ne timpu te peglungkesu, egpallahuy seeye se langun ne eg-apil piru sabeka re ka egpakarawat te unag? Sikan naa, pallahuy kew su eyew egkaangey niyu ka unag ne igbehey te Manama kaniyu. ²⁵ Ka langun ne eg-apil te peglungkesu, egbebasbas ne egtigkel te lawa ran. Eggimuwen dan sika su eyew egkarawat dan ka unag ne eglihad de. Piru sikanta mule, eggimuwen ta sika eyew egkarawat ta ka unag ne ware egtamanan. ²⁶ Sikan naa, iyan ku eg-ilingan seeye se migpallahuy ne migpalaheteng diye te katamanan

te lumba. Ne eg-ilingan ku man-e seeye se migpasumba-hey ne ware migpangawang migpanumbag. ²⁷ Imbasbas ku ka lawa ku wey impegnel ku ka mareet ne igkeupii ku su eyew kena a igsawile pegkapenga ku te pegwali diye te duma.

10

*Ka pegpaney-paney
meyitenged te diyus-diyus*

¹ Me suled, egkeupian a ne egpaketum-suman kew te neyitabu dengan te kaap-apuan ta. Imbantayan sikandan langun te Manama pinaahi te gapun, wey nakalapas sikandan diye te Malalab ne Dahat ne ware namenu. ² Ne pinaahi te pegbanter kandan te gapun wey peglapas dan te dahat, nekeiling te imbewutismuwan sikandan langun isip me sakup ni Muwisis. ³ Nangeen sikandan langun te keenen ne imbehey te Manama,⁴ wey nanginum sikandan langun te weyig ne impalihawang din diye te batu. Mig-inum sikandan puun te ispirituanen ne batu ne migduma kandan; ne ka sika ne batu, iyan si Kristu. ⁵ Piru minsan pad due, ware ikahale te Manama ka kasuluhan kandan, purisu nammatey sikandan ne napayatpat ka me lawa ran diye te mammara ne inged ne kene egkeugpaan.

6 Na, seeye se neyitabu kandan, pegpaney-paney e kanta su eyew kene ki iya egkeinniyat te mareet ne iling te innimu ran. 7 Kene kew simba te me diyus-diyus iling te innimu te me duma ran dengan, su nasulat e te Kasulatan, "Naminuu ka me etew ne nangiinum wey nangekeen, ne nataman, nanasindeg e ka nanesayew te kahale." 8 Keilangan ne kene ki egpeyilabetey ka kene ne alunggun iling te innimu te duma ran dengan, purisu migpamatey ka 23,000 ne me duma ran te sabeka re ne aldew. 9 Kene ta eg-el-elehan si Kristu* iling te innimu te duma ran dengan, purisu nammatey sikandan ka impangahat te me uled. 10 Keilangan ne kene ki egsalew-salew iling te innimu te duma ran dengan, purisu indereetan e sikandan te panalihan ne talagdereet.

11 Neyitabu seeye diye te kandan isip panunggilingan te duma ne etew, wey insulat sika eyew te pegpaney-paney kanta te mig-ugpe te timpu ne mahaan e egkataman ka inged.

12 Su emun ke due egsuman-suman ne maligen e ka pegpalintutuu rin, keilangan ne egbantey sikandin su kema ke eg-pakasale degma sikandin.

13 Ka peg-eleg-eleg ne

nabayaan niyu, iling ded te nabayaan te duma ne me etew. Piru matinumanen ka Manama te saad din wey kene din igtuhut ne kene niyu egkeelehan ka peg-eleg-eleg ne egginguma kaniyu. Emun ke egginguma ka peg-eleg-eleg, egbehayan kew te Manama te paahi eyew egkaantus niyu sika.

14 Sikan naa me pinalangge ku, pakaddiyu kew te pegsimba te me diyus-diyus.

15 Sikaniyu, mahetteng ka suman-suman niyu, sikan naa, sumsumana niyu ke eleg ka eglalahen ku wey se kene.

16 Sikanta se migmalintutuu, emun ke eglibulung ki eyew te pegsuman-suman te kamatayen ni Kristu, dueeginumen ta ne egpasalamatan ta te Manama, wey due degma egtepik-tepiken ta ne egkeenen ta. Ne pinaahi rue, egpakashawit ki te langesa wey lawa ni Kristu, menu ma iya? 17 Ne minsan masalig ki, henduen de te sabeka ki re ne lawa tenged su sabeka re ne paan ka ingkeen ta.

18 Sumsumana niyu ka keet-etawan te Israel: ka langun ne migkeen te impanubad e, migpakita re iya sikandan ne migsawite te pegsimba te Manama, menu ma iya? 19 Iyan ku naa igpasabut due ne seeye se diyus-diyus wey ka inhalad e diye te diyus-diyus due karuan? 20 Kene ne sika!

10:7 Iks 32:6. **10:8** Num 25:1-18. **10:9** Num 21:5-6. * **10:9** Diye te duma ne sinulat: Magbebeye. **10:10** Num 16:41-49. **10:16** Mat 26:26-28; Mar 14:22-24; Luk 22:19-20. **10:18** Lib 7:6. **10:20** Diy 32:17 (LXX).

Iyan ku mule igpasabut, ne ka sika ne me halad te kene egpalintutuu, diye dan ihalad te me busew, kene ne diye te Manama. Ne kena a egkeupian ne epakasabeka kew te me busew.²¹ Kene egkaayun ne eg-inum kew puun te ubab te Magbebaye wey te ubab degma te me busew. Kene egkaayun ne egkeen kew diye te keenanan te Magbebaye wey keenanan degma te me busew.²² Mania te egpepangalikuren te red iya ka Magbebaye? Manekal ki bes pad kuntere kandin?

²³ Due duma ne egkahi ne intuhutan ki kun ne eggimu te minsan nekey, piru, kene ne langun ne epakabulig wey epakaligan kanta.²⁴ Keilangan ne ware sabeka ne iyan de egsumsumanen ka kandin mismu ne keupianan, ke kene, sika se keupianan te duma.

²⁵ Keena niyu ka minsan nekey ne ngalap ne igbel-egye diye te palingki, piru kene kew e inse ke impakanubad naan e seeye diye te diyus-diyus wey se ware eyew kene kew e egkunsinsya.²⁶ Su sumale te nasulat te Kasulatan, “Kandin te Magbebaye ka kalibutan wey ka langun ne tahu kayi.”

²⁷ Emun ke due kene egpalintutuu ne eggiggat kaniyu ne diye egkeen te kandan, ne egkeupian kew ne eggendiye, keena niyu ka langun ne

igsendad kaniyu. Kene kew e inse-inse ke impakanubad naa seeye diye te diyus-diyus wey se ware eyew kene kew e egkunsinsya.²⁸ Piru ke due egnangen kaniyu ne egkahi, “Impanubad man e diye te diyus-diyus ka sika ne sere,” kene kew e keen due. Kene kew e keen due tenged te seeye se etew ne mignangen kaniyu wey tenged te kunsinsya.²⁹ Kene ne iyan ku igpasabut ka kaniyu ne kunsinsya, ke kene, ka kunsinsya te etew ne mignangen kaniyu. Ke due eg-inse, “Mania te egtigkelen ku ka igkeupii ku tenged te kunsinsya te duma?³⁰ Ke epasalamatan ku ma te Manama ka egkeenen ku, mania te egsagsahukul ka me etew keddiey meyitenged te keenen ne epasalamatan ku?”

³¹ Purisu, emun ke egkeen kew, ke eg-inum kew, wey ke eggimu te minsan nekey, himuwa niyu sika te pegdayan te Manama.³² Kene kew himu te epakatamenneng te me Hudiyu, Grigu, wey te migmalintutuu te Manama.³³ Ilingi niyu ka innimu ku ne pegpammitew te paahi ne egkabulihan ka langun. Su wara a migpammitew te keddi ne keupianan, ke kene, sika se keupianan te duma, eyew egkaluwas sikandan.

11

1 Ilingi a nikaniyu, iling te peg-ilung ku degma ki Kristu.

Ka pegbubun bun te ulu te pegasimba

2 Egdeyrayen ku sikaniyu tenged su layun a nikaniyu sumsumana, wey in-ikul niyu ka impanulu ku kaniyu.

3 Piru egkeupian a ne eg-pakasabut kew ne si Kristu ka labew te lukes, ne ka lukes ka labew te asawa rin, ne ka Manama ka labew ki Kristu.

4 Emun ke eglibulung kew te pegasimba, ne due lukes ne eg-ampu wey ke egpangguhud naa te impanengneng te Manama ne egteterung, egpeyilew sikandin ki Kristu ne iyan labew kandin. **5** Piru ke due malitan ne eg-ampu wey ke egpangguhud naa te impanengneng te Manama ne kene egteterung, egpeyilew sikandin te asawa rin ne iyan labew kandin.

Nekeiling de te migpeupew sikandin. **6** Su ka malitan ne kene egteterung, keilangan ne egtempuhun ka bulbul rin. Ne puun su egpekeyilew te malitan ka egtempuhan wey ke eg-abuluhan naa, keilangan ne egteterung iya sikandin. **7** Ka egpuunan ne kene egteterung ka lukes, tenged su alung sikandin te ulaula wey te katelesan te Manama. Piru ka malitan, sikandin iya ka katelesan te lukes.

8 Su ware himuwa ka lukes puun te malitan, ke kene, ka malitan mule ka diye migpuun te lukes.

9 Ware degma himuwa te Manama ka lukes para te malitan, ke kene, ka malitan mule ka innimu para te lukes.

10 Purisu, keilangan iya ne egteterung ka malitan te pegpeila ne sakup sikandin te lukes, su minsan ka me panalihan, egbantey kandin.

11 Piru te pegasabeka ta diye te Magbebaye, egkeilangan ded degma te lukes ka malitan, ne iling ded degma ka lukes, egkeilangan ded te malitan.

12 Su minsan te an-anayan, innimu ka malitan puun te lukes, ne kuntee, ka lukes diye eglesut te malitan. Piru ka langun-langun, diye de iya egpuun te Manama.

13 Sumsumana niyu seini: eleg naa emun ke eg-ampu ka malitan diye te Manama ne kene egteterung?

14 Tapey kid e nakataha ne mekeyilew-hilew ka lukes ne malayat se bulbul, **15** piru ka malitan mule, amana ne tetelesi sikandin ke malayat ka bulbul rin. Su imbehayan sikandin te malayat ne bulbul eyew te pegbun bun te ulu rin. **16** Ke due egkeupian ne egpakig-apul meyitenged kayi, iyan ku re igkalalag kandin ne iling iya rue ne batasan ka in-ikul ney, ne iling ded degma ka innimu te duma ne migpalintutuu te Manama.

*Ka pegpanulu meyitenged te Iglabung te Magbebaye
(Mat. 26:26-29; Mar. 14:22-25; Luk. 22:14-20)*

¹⁷ Piru ka seup kuntee ne igpanulu ku kaniyu, kena a epakareyrey kaniyu, tenged su kene epakameupiya kaniyu ka peglibulung niyu te pegasimba, su nasi eg-pakarereet kaniyu. ¹⁸ Hun-a te langun, nakarineg a ne emun kun ke eglibulung kew, egkabaad-baad kew kun, ne hendue te epakapalintutuu a due. ¹⁹ Su keilangan pad iya ne egkeyitabu sika due te kaniyu su eyew egkeila ke hentew kaniyu ka malehet ne migmalintutuu. ²⁰ Te timpu ne miglibulung kew ka migkeen te pegsuman-suman te kamatayen te Magbebeye, ne egngaranan te Iglabung te Magbebeye, kene ne sikandin ka insuman-suman niyu. ²¹ Su emun ke egkekeen e, masi keen kew re due te keenen niyu, ne due duma ne eggutasan pad, ne due duma ne egkewubug e. ²² Mania, ware me baley niyu ne egkakeenan niyu wey egkeinuman niyu? Su sika se innimu niyu, inlemetan niyu ka langun ne migmalintutuu wey impeyilawan niyu ka egkengaayu-ayu. Na, nekey naa ka iglalag ku kaniyu? Egdeyrayen ku naa sikaniyu te sika ne hinimuwan niyu? Kene iya!

²³ Su seini ka impanulu te Magbebeye keddiey ne impanulu kud degma due te kaniyu: ka Magbebeye ne si Hisus, migkuwa te paan te seeye ne karusileman te eg-

akalan e sikandin, ²⁴ wey te nakapasalamat e sikandin te Manama, impanepek-tepi din e seeye te migkahi, "Seini ka lawa ku ne igpanubad para kaniyu. Himuwa niyu seini te pegsuman-suman keddiey." ²⁵ Pegkapengaran te migkeen, iling ded man-e ka innimu ni Hisus te pegkuwa rin te ubab, kahi rin, "Seini ne ubab, ka iyam ne kasabutan te Manama ne egpamalehetan pinaahi te langesa ku. Tagse eg-inum kew kayi, himuwa niyu sika te pegsuman-suman keddiey." ²⁶ Tagse egkeen kew te seini ne paan wey eg-inum puun te seini ne ubab, ipangguhud niyu naa ka kamatayen te Magbebeye taman te peglibed din man-e.

²⁷ Purisu, ka minsan hentew ne egkeen te paan wey eg-inum puun te ubab te Magbebeye te kene ne eleg ne paahi, nakasale sikandin te lawa wey te langesa te Magbebeye. ²⁸ Keilangan ne ka tagse etew, eg-ugsi-ugsi te pegkeetew rin, ne hendue egkeen te paan wey eg-inum puun te ubab. ²⁹ Su ke kene niyu eg-ileen ka kaluwasan te lawa te Magbebeye te pegkeen niyu te paan wey peg-inum niyu puun te ubab, eggukuman kew te pegkeen wey peg-inum niyu rue. ³⁰ Sikan naa ka masalig kaniyu ka mahuye-guye wey egmanderalu, wey due duma ne nammatey e. ³¹ Piru ke eg-ug-ugsiyen ta iya ka

pegkeetew ta, kene ki perem egkewukuman.³² Piru emun ke eggukuman ki te Magbebeye, egdisiplineen ki naa nikandin, eyew kene ki epakalagkes egkaparuseyi te seeye se ware migpalintuu.

³³ Purisu me suled ku, emun ke eglibulung kew ka epangekeen te Iglabung te Magbebeye, patagtaharey kew ka tagse sabeka.³⁴ Ke due sabeka ne eggutasan, keilangan ne diyad sikandin egkeen te baley rin, su eyew kene kew egkewukuman te Manama ke eglibulung kew. Na, meyitenged te duma pad ne diye te sulat niyu, duen kud e eglalaha te peggenduen ku.

12

Ka katuenan ne imbehey te Panisingan te Manama

¹ Na, me suled, egkeupian a ne epakasabut kew meyitenged te katuenan ne imbehey te Manama.

² Nakataha kew e, ne timpu te ware kew pad migpalintuu te Manama, neuyan kew te nalein-lein ne paahi eyew te pegsimba te me diyus-diyus ne kene epakalalag.

³ Sikan naa, egkeupian a ne epakataha kew ne ware etew ne in-umaan te Panisingan te Manama ne epakarilus ki Hisus. Ne ware degma etew ne epakakahne Magbebeye si Hisus ke ware sikandin umeyi te Panisingan te Manama.

⁴ Due nalein-lein ne klasi te me katuenan ne igbehey te Manama te migmalintuu, piru sikan ded ne Panisingan ka egiunnan due.⁵ Due degma nalein-lein ne paahi te pegpamakey ta, piru sikan ded ne Magbebeye ka egpamakayen ta.⁶ Ne due mane nalein-lein ne igpeyimu te Manama kanta, piru sikan ded ne Manama ka ebulig kanta langun te eggimu rue.⁷ Egbehayan te Panisingan ka tagse sabeka kanta te katuenan te pegpeila ne due ka Panisingan, su eyew epakabulig ki te duma ta.⁸ Ka senge etew, egbehayan te Panisingan te pegpasabut te kaalam te Manama, ne ka sabeka, egbehayan degma te sikan ded ne Panisingan te manedded ne katuenan te pegpanulu.⁹ Ka senge etew, egbehayan te sikan ded ne Panisingan te dakel ne pegpalintuu, ne ka sabeka, egbehayan te sikan ded ne Panisingan te pegpamawi.¹⁰ Senge etew, egbehayan te peggimu te me kein-inuwan, ka sabeka sika se pegpang-guhud te impanengneng te Manama, ne ka sabeka sika se peg-ila te me panisingan, ka sabeka sika se peglag te lein ne me linalahan, ne ka sabeka, sika se pegsabut te lein ne linalahan.¹¹ Sika se langun, himu te sabeka re wey sikan ded ne Panisingan. Egpamehayan din ka tagse sabeka te katuenan sumale te kandin ne pegbuut.

Sabeka re ka lawa ta piru masalig ne baad

¹² Ka lawa ta, masalig ne baad. Ne minsan ke masalig ne baad, piru sabeka re iya sika ne lawa. Ne iling naan ded degma si Kristu wey seeye se migpalintutuu kandin. ¹³ Su sikanta langun, Hudiyu ma wey se kene, uripen ma wey se kene, nabewutismuwan kid eyew egkeyimu ne sabeka ne lawa pinaahi te sabeka ne Panisingan te Manama, ne sika ne Panisingan ka narawat ta langun.*

¹⁴ Su ka lawa, kene ne sabeka re ne baad su masalig. ¹⁵ Panunggiling ke egkahi ka paa, "Kena a ne baad te lawa su kena a ne belad," piru baad pad iya sikandin te lawa minsan egkahi sikandin te iling due. ¹⁶ Ne panunggiling ke egkahi degma ka talinga, "Puun su kene e ma ne mata, kena a ne baad te lawa," piru baad pad iya sikandin te lawa minsan egkahi sikandin te iling due. ¹⁷ Panunggiling ke neelin naan de ne mata ka intiru ne lawa, egmenuwen naan e te pegdineg? Wey ke senge talingaan naan de ka sabeka ne lawa, egmenuwen naan e te peggarek te nekey re iya? ¹⁸ Piru kene ne iling due, su intahu te Manama ka nalein-lein ne baad te lawa ta diye te natahuan dan sumale te pegbuut din. ¹⁹ Kenad e egkangaranan ne lawa ke sabeka re ne baad. ²⁰ Su ka

malehet, masalig iya ne baad, piru sabeka re ne lawa.

²¹ Ka mata, kene egpakkahi diye te belad, "Kene ku egkeilanganen sikeykew!" Kene degma egpakkahi ka ulu diye te paa, "Kene ku egkeilanganen sikeykew!" ²² Kunaleg te sika se me baad te lawa ne egkahiyen ta ne mahuye wey kene ne impurtanti, iyan bes amana egkeilangana. ²³ Ne seeye se me baad te lawa ne in-isip ta ne ware amana karuan, nasi ne iyan ta amana egtangguwen. Ne seeye se me baad te lawa ne kene perem ne meupiya ne egtengtengan, nasi ne iyan ta eg-ay-ayaran te egpakumbale. ²⁴ Piru seeye se me meupiya ne baad te lawa ta, kene ne keilangan ne egtangguwen te iling due. Piru innimu te Manama ka lawa ta eyew egkabehayan te dakel ne bantug ka baad te lawa ne bayew kene perem ne impurtanti ²⁵ su eyew kene egkabaad-baad, ke kene, egpegtangtangguwey sikandan. ²⁶ Emun ke egmasakit ka sabeka ne baad, egmasakit iya ka langun, ne emun ke egdeyrayen ka sabeka, egkahale sikan-dan langun.

²⁷ Ne seini ka kaluwasan kayi: sikanta se migpalintutuu, iyan ta egkeilingan ka lawa ni Kristu, ne ka tagse naa sabeka kanta, me baad ki te sika ne lawa. ²⁸ Ne ka sika ne lawa ni Kristu, nalein-

* **12:12** Rum 12:4-5. **12:13** Te Grigu: sika ne Panisingan ka insabekaan ta te mig-inum. **12:28** Ipi 4:11.

lein ka impeyimu te Manama. Ka an-anayan ne inalam te Manama, sika se me apustulis, ka igkarangeb sika se me prupita, ne ka igkatelu sika se me talagpanulu, nata-man, sikan e se me talag-gimu te me kein-inuwan, ka me talagbawi, ka me talag-bulig, ka me talagpangulu te langun-langun de, wey talaglalag te lein ne me linalahan.²⁹ Langun te naa ne me apustulis? Langun naa ne me prupita? Langun naa ne me talagpanulu? Langun naa ne eggimu te me kein-inuwan?³⁰ Langun naa ne imbehayan te pegpamawi? Langun naa ne egpakalalag te lein ne me linalahan? Langun naa ne egpakapasabut ke nekey ka kaluwasan te sika se lein ne me linalahan?

³¹ Sikan naa, keilangan ne iyan niyu ikabagget ka subla pad ne impurtanti ne me katuenan.

Ne kuntee igpanulu ku kaniyu ka subla pad ne meupiya te langun.

13

Ka geyinawa

¹ Minsan ke egpakalalag a te egkalein-lein ne linalahan te me etew wey te me panalihan, piru ke ware geyinawa ku diye te duma, egpekeiling e re te ahung ne mahulub wey ke putew ne basalan ne egtetahingting.² Ne min-san ke egpakapanagne a, wey egpakasabut a te langun ne neeles de wey ke egkateu a te

langun, wey minsan ke due pegpalintutuu ku ne egpaka-paalin te me bubungan, piru ke ware geyinawa ku diye te duma, ware iya pulus ku.³ Ne emun ke igpamehey kud e ka langun ne keddiey, wey minsan pad ke igtuhut ku ne egtutungen ka lawa ku, piru ke ware geyinawa ku diye te duma, ware iya egkaangey ku te sika ne eggimuwen ku.

⁴ Ka etew ne geheyinaween te duma, mapariralemen, meupiya diye te duma, kene ne iimmeen, kene ne mapegpeggasal wey kene ne hambuhen.⁵ Ka etew ne geheyinaween te duma, kene ne egkasen, kene ne leheren, kene ne mahaan egkabelu, wey mahaan de egkalingew ke due egpakatameneng kandin,⁶ kene egkahale te mareet, ke kene, iyan de igkahale ka mahetteng.⁷ Ka etew ne geheyinaween te duma, egpakaantus te langun, layun egpalintutuu wey egpallateng, wey egpabulus-bulus te langun-langun de.

⁸ Ka geyinawa, ware iya egtamanan. Piru ka peg-panaganwey ka katuenan, eglihad de, ne ka peglag te lein ne me linalahan, egkaawe ded.⁹ Su ka katuenan ta wey ka pegpang-guhud ta te impanengneng te Manama, duen pad seyyup.¹⁰ Piru ke eggingume e sika se warad e seyyup, egkaawe e sika se duen pad seyyup.

¹¹ Te bate e pad, binate

pad iya ka peglalag-lalag ku, ka suman-suman ku, wey ka pegpangatarengan ku. Piru te mayansan ad e, kena ad e egbibinate. ¹² Ka egkakita ta kuntee, egpekeiling de te kene amana egkamelmelehan ne ulaula diye te alungan, piru eggingsuma ka aldew ne egkamelmelehan e ka langun. Baad de ka natahaan ku kuntee, piru eggingsuma ka aldew ne egkatahaan kud e ka langun iling te pegkataheyi te Manama keddiey.

¹³ Purisu kene egkaawe seini se tatelu: pegpalintuu, pegpallateng, wey ka peggeyinawa. Piru ka subla ne labew te langun, sika se peggeyinawa.

14

Ka pegpanagne wey peglalag telein ne linalahan

¹ Pakannekali niyu ka peggeyinawa te duma, wey mapahetpeta niyu man-e te pegpakkanekal ne eg-pakarawat kew te katuenan ne igbehey te Panisingan te Manama labi en iya ka pegpangguhud te impaneng-neng te Manama. ² Su ka etew ne eglalag telein ne linalahan, kene ne etew ka eglalahan din, ke kene, ka Manama su ware etew ne egpakaabut te eglalahan din. Iglalag din pinaahi te Panisingan ka needles de ne me lalag ne ware nataheyi te duma. ³ Piru sika se egpanagne, iyan din mule

eglalahan ka me etew eyew te peggehet te pegpalintuu ran, pegpeyibahet kandan, wey peg-imu-imu kandan. ⁴ Ka etew ne eglalag telein ne linalahan, kandin de ne pegkeetew ka egligenen din. Piru ka etew ne egpanagne, eglig-en te langun ne migmalintuu.

⁵ Egkeupian a perem ne egpakkalalag kew langun telein ne linalahan, piru iyan ku subla igkeupii ne egpakkapangguhud kew te impanengneng te Manama. Su seeye se egpanagne, labew pad te seeye se eglalag telein ne linalahan, gawas ke due egpakkaluwas te eglalahan din su eyew egkaliq-en ka langun ne migmalintuu.

⁶ Na, me suled, ke eggenduen a te kaniyu ne eglalag telein ne linalahan, nekey ma ka egkaangey niyu? Ware iya, gawas ke due igkalalag ku kaniyu ne impataha te Manama, wey ke katuenan naa, wey ke pegpangguhud naa te impanengneng te Manama, wey ke pegpanulu naa.

⁷ Sumsumana niyu seeye se eggamiten te peg-ulahing ne ware umul, iling te pulendag wey alpa. Ke due egparahing due piru kene egkateu ke egmenuwen, kene egkatahaan te me duma rin ke nekey ka igparahing din.

⁸ Panunggilingan degma te trumpita ne eggamiten te me sundalu, ke kene ne klaru ka dahing din, egmenuwen te sundalu te pegpangandam

te pegbubunu? ⁹ Ne iling naan ded degma kaniyu. Emun ke eglalag kew te lein ne linalahan, egmenuwen te pgsabut te seeye se epgammineg? Henduen de te migpakiglalag kew diye te kalamag. ¹⁰ Masalig iya ka nalein-lein ne linalahan kayi te ampew te tane, ne langun ne linalahan, due igpasabut. ¹¹ Piru ke kene ku egkasabut ka eglalahen te etew, eg-isipen ku sikandin ne lapu de, ne sikeddi degma lapu e re diye te kandin. ¹² Ne iling naan ded degma kaniyu. Puun su amana kew egkabagget ne egpakuwa te katuenan ne egpuun te Panisingan, pakannekali niyu ne egkarawat niyu ka me katuenan ne egpakaligen te migmalintutuu.

¹³ Purisu, seeye se eglalag te lein ne linalahan, keilangan ne eg-ampu ne egbe-hayan degma sikandin te katuenan te pegpasabut ke nekey ka eglalahen din. ¹⁴ Su emun ke eg-ampu a te lein ne linalahan, iyan de eg-ampu ka panisingan ku, piru ka suman-suman ku ware nakasabut. ¹⁵ Na, nekey naa ka eggimuwen ku? Iling kayi ka eggimuwen ku, eg-ampu a te igpaampu keddi te panisingan ku, wey eg-ampu a man-e te sika se egkasabut ku ne lalag. Eg-ulahing a te igpeulahing keddi te panisingan ku, wey eg-ulahing a man-e te egkasabut ku ne lalag. ¹⁶ Su emun ke egdeyrey

ka te Manama ne iyan nu eggamiten ka igpalalag te panisingan, egmenuwen te duma te pegluyud te pegpasalamat nu ke kene sikandan egpaketabut te eglalahen nu? ¹⁷ Su minsan pad ke meupiye e ka pegpasalamat nu te Manama, piru kene egpaketabut te duma.

¹⁸ Egpasalamat a te Manama ne malasi a egpaketabut ka eglalahen te lein ne linalahan kuntere kaniyu langun. ¹⁹ Piru ke diye a te libulunganan te migmalintutuu, egmeupiyeen ku pad ke eglalag e re te lalimma ne egkasabut ne lalag eyew te pegpanulu te duma, du te eglalag a te lein ne linalahan ne me sapulu ne libu (10,000).

²⁰ Me suled, kene niyu ilinga te bate ka pegsumansuman niyu meytenged due. Ke meytenged te mareet, henduen pad ne pabatebate kew, piru pabuyagbuyag kew ke meytenged te pegsuman-suman niyu. ²¹ Nasulat diye te Kasulatan ne miggenendue:

“Egpakiglalag a te keet-etawan ku, kahi te Magbebaye ne Manama, pinaahi te lein ne linalahan ne linalahan te me lapu, piru kene iya sikandan egpammineg ked-diey.”

²² Na, ka peglalag te lein ne linalahan sabeka sika ne palinneu, piru kene ne para

te migmalintutuu, ke kene, para te ware migpalintutuu. Ne ka pegpangguhud te impanengneng te Manama, para sika te migmalintutuu, kene ne para te ware migpalintutuu.

²³ Purisu, emun ke eglibulung kew te pgsimba wey eglalag kew langun te lein ne linalahan, ne due egseled diye te kaniyu ne ware migpalintutuu wey ke etew naa ne ware nakataha ke nekey ka eggimuwen niyu, egpakakahi sikandin te egmambusawen kew e. ²⁴ Piru ke egpangguhud kew langun te impanengneng te Manama, ne ka egseled diye te kaniyu ne ware migpalintutuu wey ke etew naa ne ware nakataha ke nekey ka eggimuwen niyu, eg-ila sikandin ne makasesale din, wey eggukuman sikandin te kunsinsya rin tenged te langun ne egkarineg din. ²⁵ Ne pinaahi rue, ke nekey ka inneelis din diye te pusung din, egkatahaan. Ne egkataman, egpanimbuel sikandin ne egbebakkak ka egsimba te Manama wey egkahi, "Kayi iya te kaniyu ka Manama."

Ka eleg ne paahi te pgsimba

²⁶ Seini ka igpasabut ku due me suled, emun ke eglibulung kew, due sabeka ne eg-ulahing, due egpanulu, due egpanengneng ke nekey ka impataha kandin te Manama, due eglalag te lein ne linalahan, wey due

degma egpasabut ke nekey sika se inlalag te sika ne etew. Keilangan ne egkeyimu niyu sika se langun eyew te peglig-en te migmalintutuu. ²⁷ Ke duen ma eglalag te lein ne linalahan, keilangan ne daruwa re wey ke tatelu re ka eglalag, piru kene egpalegseey, wey keilangan ne due lein ne etew ne egpasabut due. ²⁸ Piru ke ware egpakashabut due, keilangan ne egpeeneng-eneng naan de sikandan diye te libulunganan, wey iyan naan de eglalahan ka kandan ne pegkeetew wey ka Manama. ²⁹ Ke duen ma egpanagne, keilangan ne daruwa re wey ke tatelu ka eglalag. Ne ka duma ne etew ka egsuman-suman eg-ayad-ayad ke malehet naa ka intagne. ³⁰ Piru ke due egpanagne, wey due sabeka ne migpinnuu rutu ne nakarawat te igpataha te Manama, keilangan ne egpeeneng-eneng e ka miglalag. ³¹ Su egkaayun ne egpasubsubaley kew langun ka egpangguhud te impanengneng te Manama, su eyew egkapanulu kew wey egkabagget kew langun. ³² Ka etew ne egpanagne, egpaketigkel ke nekey ka eglalahan din. ³³ Su ka Manama, kene ne Manama sikandin te kasamuk, ke kene, te keupianan.

Ne sumale te nabatasan te langun ne punduk te keet-etawan te Manama, ³⁴ ka me malitan, keilangan ne

egpeeneng-eneng de diye te seled te libulunganan. Ware tuhuti sikandan ne eglalag, piru keilangan ne egparumarama sikandan sumale te nasulat diye te Balaud ni Muwisis. ³⁵ Ne emun ke due igkeupii ran te eg-ugsi-ugsi, keilangan ne diyad e te baley sikandan eg-inse te asawa ran. Su mekeyilew-hilew te malitan ke eglalag diye te libulunganan.

³⁶ Sikaniyu iya! Kahiyen niyu buwa ne duen de egpuun te kaniyu ka lalag te Manama? Wey ke kahiyen niyu buwa ne sikaniyu re ka nakarawat due? ³⁷ Ke due sabeka ne egsuman-suman ne prupita sikandin wey ke imbehayan naa te katuenan te panisingan, keilangan ne eg-ileen din iya ne ka insulat ku kaniyu, suhu te Magbabay. ³⁸ Ke due etew ne kene eg-angken kayi, kene degma eg-angkenen sikandin.

³⁹ Sikan naa me suled ku, pakannekali niyu iya ne egpakapangguhud kew te impanengneng te Manama, wey kene niyu balabahi ka peglalag te lein ne linalahan. ⁴⁰ Piru keilangan ne eggimuwen niyu ka langun te meupiya wey eleg ne paahi.

15

Ka peg-uyag ki Kristu

¹ Ne kuntee me suled, egkeupian a ne egpasuman-suman kaniyu meytenged te

Meupiya ne Panugtulen ne inwali ku due te kaniyu, ne narawat niyu wey nasasindehan te pegpalintutuu niyu. ² Egkaluwas kew pinaahi te sika ne Meupiya ne Panugtulen ne inwali ku kaniyu ke egpabulus kew egpalintutuu due. Piru ke kene, egkeyimu ne ware karuan te pegpalintutuu niyu.

³ Ne seini ka labew te langun ne impanulu keddiey ne igpanulu ku degma kaniyu: namatey si Kristu eyew egkapasaylu ka me sale ta sumale te nasulat te Kasulatan. ⁴ Inlebeng sikandin wey inuyag te igkatelu ne aldew sumale degma te nasulat te Kasulatan. ⁵ Ne migpakita sikandin ki Pidru, nataman diyad e man-e te sapulu wey daruwa (12) ne me hibateen din. ⁶ Pegkapenga dutu, migpakite e man-e sikandin diye te miglibulung ne migmalintutuu ne subla te lalimma ne libu (5,000). Nammatey e kuntee ka duma kandan piru neuyag pad mule ka kasuluhan. ⁷ Pegkapenga dutu, migpakite e degma sikandin diye te ki Santiyagu, nataman, diyad e degma te langun ne apustulis.

⁸ Te katammanan, migpakite e degma sikandin keddiey, minsan ke nekeiling a te bate ne miglesut te kene ne eleg ne timpu. ⁹ Inlalag ku sika tenged su sikeddiey ka

15:3 Isa 53:5-12. **15:4** Sal 16:8-10; Mat 12:40; Him 2:24-32. **15:5** Luk 24:34; Mat 28:16-17; Mar 16:14; Luk 24:36; Huw 20:19. **15:8** Him 9:3-6. **15:9** Him 8:3.

kene amana ne impurtanti te me apustulis. Kena a ne eleg ne egngaranan te apustulis tenged su migpamaybayaran ku dengan ka migmalintutuu te Manama.¹⁰ Piru pinaahi te keyid-u te Manama keddiey, neyimu a kuntee ne iling kayi, wey napulusan iya ka keyid-u rin keddiey. Ka malehet, labew ka keddiey ne peglacey-lasey du te duma ku ne me apustulis, piru kene ne puun sika te pegpakan-nekal ku, ke kene, puun te bulig te Manama keddiey.¹¹ Piru ware kaleinan ke sikreddi wey ke sikandan ka migwali, su nekeg-iling de ka inwali ney, wey sika ka impalintutuuwan niyu.

Ka peg-uyag te minatey

¹² Na, ka inwali ney kaniyu, sika se peg-uyag ki Kristu, ne mania te due duma due te kaniyu ne egkahi ne kene eg-uyahen ka me minatey?¹³ Piru ke malehet ma sika, ware degma uyaha si Kristu.¹⁴ Ne emun ke ware uyaha si Kristu, ware perem karuan te inwali ney, wey ware degma karuan te pegpalintutuu niyu.¹⁵ Ke iling ma rue, nekeuubat key e meytenged te Manama, su impamalehet ney ne in-uyag din si Kristu. Piru egkeyimu sika ne ubat ke kene eg-uyahen ka me minatey.¹⁶ Piru emun ke kene ne malehet ne eg-uyahen te Manama ka me minatey, kene degma ne malehet ne in-uyag din si

Kristu. ¹⁷ Ke ware uyaha si Kristu, ware karuan te pegpalintutuu niyu, wey ware pad napasaylu ka me sale niyu.¹⁸ Ne seeye se nenammatey e ne migpalintutuu ki Kristu, ware bes naluwas, ke kene, nareetan bes ded.¹⁹ Emun ke kayi re te ampew te tane egkataman ka egpallatengen ta diye ki Kristu, sikanta iya ka subla ne mekeyid-u-hid-u te langun ne etew.

²⁰ Piru ka malehet, si Kristu ka hun-a ne neuyag puun te kamatayen, ne puun due, egpakanengneng ki ne eg-uyahen iya te Manama ka langun ne egpatey.²¹ Su iyan migpuunan ne migpatey ka langun ne etew, tenged te innimu te sabeka ne etew ne si Adan. Ne iling ded degma ka peg-uyag te me minatey, tenged ded degma sika te sabeka ne etew ne si Kristu.²² Su ka langun ne etew, egpatey iya tenged su kabuhalan sikandan ni Adan. Ne iling ded degma, ka langun ne nasabeke e ki Kristu, eg-uyahen.²³ Piru ka peg-uyag, due eleg ne paahi: si Kristu ka nekewuna ne neuyag. Ne emun ke eglibed e sikandin kayi te kalibutan, egkeuyag e degma seeye se nenammatey e ne me sakup din.²⁴ Egkataman, eggingume e ka katamanan te timpu. Ne emun ke egkatalu e ni Kristu ka me kuntee din ne due me katenged wey ke geem naa te pegmandu, igbehey rin

ka Peghari diye te Manama ne Amey.²⁵ Su keilangan ne eghari si Kristu taman te eggimuwen din ne diekanan din ka me kuntere din.²⁶ Ka katamanan ne kuntere ne keilangan ne egdereetan, sika se kamatayen.²⁷ Su nasulat te Kasulatan, "Innimu te Manama ka langun ne egparuma-ruma kandin." Klaru ne ka "langun" ware labet te Manama mismu ne iyan miggimu te langun eyew egparuma-ruma ki Kristu.²⁸ Emun ke egparuma-rume e ki Kristu ka langun, ne sikandin degma se Anak mismu egparuma-rume e diye te Manama ne iyan miggimu te langun ne egparuma-ruma ki Kristu. Ne ka Maname e ka egmandu te langun-langun de iya.

²⁹ Na, meyitenged mane te peg-uyag, ke kene ma egkeuyag ka me minatey, nekey naan e ka karuan te seeye se egmabewutismu para kandan? Mani buwa te egbewutismuwan sikandan para te me minatey ke kene ma eg-uyahen?³⁰ Ne sikanami, mania te urasuras ne nakatahu key te karereetan?³¹ Me suled, ke nekey kamalehet ka kahale ku te pegasbeka niyu ki Kristu Hisus ne Magbebaya ta, iling degma kamalehet due ka egkatangke ku ne kamatayen tagse aldew.³² Emun ke eg-etew-etauen ku re te eglalag, nekey ma ka egkaangey ku ke epakig-

ehet a te me etew kayi te Ipisu ne egpekeiling te mabbulut ne mahintalunan? Purisu ke kene ma eg-uyahen ka me minatey, meupiya pad ke eg-ikul ki te lalahen ne miggenendue, "Egkeen ki wey eg-inum ki, su kaaselem, epamatey kid."

³³ Kene kew palimbung, su due lalahen ne miggenendue, "Egpakarereet te meupiya ne batasan ka egduma-ruma te mareet ne me etew."³⁴ Mahetenga niyud e te egsuman-suman wey kene kew e himu te sale. Due duma kaniyu ne ware nekeila te Manama—inlagku seini te pegpeyilew kaniyu.

Ka lawa te etew ne egkeuyag man-e

³⁵ Piru ke due eg-inse, "Egmenuwen ma te eg-uyag ka me minatey? Mamenu e ka lawa ran?"³⁶ Egkeungel iya! Emun ke epamula ka, kene egtubu ka sika ne beni gawas ke egkamewu pad.³⁷ Ke epamula ka, kene ne iyan nu igaipamula ka lawa, ke kene, sika iya se beni, ke paley naa, wey ke nekey ka duma ne igaipamula nu.³⁸ Ne tapey e himuwa te Manama ke mamenu ka lawa te sika ne beni wey ka minsan nekey ne beni ne igaipamula.

³⁹ Ne iling ded degma, ware nekeg-iling ka lawa te sika se due geyinawa. Lein ka lawa te me etew, lein ka me mananap, lein ka me

manuk-manuk, wey nalein-lein degma ka lawa te ngalap te weyig.

⁴⁰ Ne due degma nakatahu diye te langit wey due degma kayi te ampew te tane. Ne ka katelesan te seeye se nakatahu diye te langit, ware nekeg-iling te katelesan te me lawa kayi te ampew te tane. ⁴¹ Ka aldew, due kandin ne katelesan, lein degma ka katelesan te bulan, wey te me bituen. Ne minsan ka me bituen, lein-lein ka katelesan dan.

⁴² Ne iling naan ded ka peg-uyag te me minatey. Ka lawa ne egkamewu ke iglebeng, piru ke eg-uyahen e te Manama, kenad e sika egkamewu te minsan ken-u. ⁴³ Ke iglebeng ka lawa te minatey, maret sika ne egtengtengan wey warad kanekal. Piru ke eg-uyahen e man-e, mateles e ne egtengtengan wey manekal e. ⁴⁴ Pglebeng due, lawa sika te kayi te ampew te tane, piru ke eg-uyahen e, lawe e sika te diye te langit. Ke due lawa kayi te ampew te tane, due degma lawa diye te langit. ⁴⁵ Su nasulat e te Kasulatan ne miggenendue, "Ka an-anayan ne etew ne si Adan, imbehayan te umul." Piru due egngaranan te katammanan ne Adan, ne iyan si Kristu*, ne iyan egbehey te umul ne ware egtamanan. ⁴⁶ Piru kene ne iyan egpekewun-a ka

lawa ne diye te langit, ke kene, sika se lawa ne kayi te ampew te tane, egkataman, egpakinundul e ka lawa ne diye te langit. ⁴⁷ Ka an-anayan ne Adan, kayi migpuun te ampew te tane ne ingkuwa puun te tane. Piru ka igkarangeb ne Adan ne iyan si Kristu, diye migpuun te langit. ⁴⁸⁻⁴⁹ Sikan naa, sikanta se kayi te ampew te tane, nekeiling ka lawa ta te ki Adan ne innimu puun te tane. Piru keureme, egpekeiling degma ka lawa ta te ki Kristu ne puun te langit.

⁵⁰ Me suled, seini ka igpasabut ku due: ka seini se lawa ta kayi te ampew te tane, kene egpekeugpe diye te Migharian te Manama. Su sika se lawa ne egkamewu, kene egpakaangken te umul ne ware egtamanan.

⁵¹ Pammineg kew! Egguhuran ku sikaniyu te neeles ne planu te Manama: kene ne langun kanta ne egkammatey, piru langun ta ne egkabalbalawan se pglelawa. ⁵² Tigkew re ne egkeyitabu sika, te sabeka re ne pegpamilek, te timpu ne igparahing e ka katammanan ne trumpita. Su pgedahing te trumpita, eg-uyahen e ka me minatey wey egbehayan e te lawa ne kenad e egkamewu, ne sikanta degma se neuyag pad, egkabalbalawan e ka lawa ta. ⁵³ Su seini se lawa ne egkamewu, keilangan ne

egkabalbalawan te lawa ne kenad egkamewu. Ne seini se lawa ne egpatey, keilangan ne egkabalbalawan te lawa ne kenad e egpatey.⁵⁴ Emun ke egkabalbalawan e ka lawa te kenad e egkamewu, wey egkabalbalawan e te kenad e egpatey, egkatuman e ka nasulat te Kasulatan ne miggendue, "Natalu e ka Kamatayen!"[†]

55 "E kamatayen, hendei naan e ka kapanaluwan nu?"

E kamatayen, hendei naan e ka lalas nu?"

56 Ka lalas te kamatayen diye egpuun te sale, ne ka geem te sale diye egpuun te Balaud.⁵⁷ Piru egpasalamat key te Manama ne iyan egebehey kanta te geem te pegtalu te sale wey te kamatayen pinaahi ki Hisu Kristu!

58 Purisu me pinalangge ku ne me suled, sasindeg kew ne malig-en wey kene egkaweil. Keilangan ne layun niyu behayi te kabehat ka himu te Magbebaye, su nakanengneng kew e ne due karuan te peglasey-lasey niyu te himu te Magbebaye.

16

Ka igbulig para te keet-etawan te Manama

¹ Na, meyitenged te igbulig te keet-etawan te Manama: himuwa niyu ke nekey ka impeyimu ku te me penduk te migmalintutuu diye

te Galasya. ² Te an-anayan ne aldew te tagse simana ne iyan ka Duminggu, ka tagse sabeka kaniyu, keilangan ne egtahu iya te seleppi sumale ke pila ka egkaseleppi din. Limura niyu naa sika eyew kene kew e egpangangey te peggenduen ku. ³ Ne emun ke eggingsuma ad, igpeendiye ku te Hirusalim ka me etew ne naalam niyu ne eg-uyan te igbulig niyu duma te me sulat ku te pegpeila-ila kandan. ⁴ Ne emun ke eleg iya ne eggendiya a, egmarumeeey key e.

Ka planu ni Pablu

⁵ Eghanumbaley a due te kaniyu te pegkapenga ku diye te Masidunya, su tapey e ne planu ku ne diya a egbaye te Masidunya. ⁶ Ne kema ke duen e pad iya te kaniyu wey ke taman e buwa te tingmaagsil, su eyew egkabulihan e pad nikaniyu te hipanawan ku ke hendei e ma eggendiye. ⁷ Su kena a egkeupian ne malepet de ka pegpanumbaley ku kaniyu, ke kene, egkeupian a ne malayat-layat pad ubag, ke igtuhut sika te Magbebaye.

⁸ Piru kuntee, kayi e pad te Ipisu eg-ugpe taman te aldew te Pintikustis⁹ su minsan ke masalig ka egkuntere keddiey, masalig ded ka kaayunan ku te peggimu te himu ku ne dakel se karuan.

^{15:54} Isa 25:8. ^{† 15:54} Te Grigu: in-abeleng e te kapanaluwan ka kamatayen.

^{15:55} Hus 13:14 (LXX). ^{16:1} Rum 15:25-26. ^{16:5} Him 19:21. ^{16:8} Lib 23:15-21; Diy 16:9-11. ^{16:8} Him 19:8-10. ^{16:10} 1Kur 4:17.

¹⁰ Emun ke eggigume e si Timutiyu due te kaniyu, al-alumamaa niyu sikandin eyew kene egkabantalan, tenged su eggimu degma sikandin te himu te Magbebabe iling keddiey. ¹¹ Sikan naa, kene niyu sikandin leleiha. Ne emun ke eglibed e sikandin kayi te keddiey, bulihi niyu sikandin su eyew egmeupiya ka peggeramgeram din, su egtetaharan ku sikandin duma te me suled ta ne migmalintutuu.

¹² Na, meyitenged te suled ta ne si Apulus, amana ku banasali sikandin ne egpanumbaley kaniyu duma te duma pad man-e ne me suled ta ne migmalintutuu. Piru kene kun pad eggendue sikandin te seini ne timpu, wey kun e epakigkitia sikandin kaniyu ke epakasellat e sikandin.

Ka katamanan ne pegpanaha-taha

¹³ Bantey kew, wey heheta niyu ka pegpalintutuu niyu. Pakabbulut kew wey pakan-nekal kew. ¹⁴ Minsan nekey ka eggimuwen niyu, ipapitew niyu ka geyinawa niyu diye te duma.

¹⁵ Me suled, nakataha kew e meyitenged engki Istipanas wey te langun ne diye te baley rin. Sikandan ka an-anayan ne migpalintutuu diye te Akaya, wey migpahamit sikandan eyew te pegbulig te keet-etawan te Manama. ¹⁶ Egbanasalan ku sikaniyu ne paruma-ruma

kew te iling kandan wey diye te me duma ne maali-ali ne eggimu para te Magbebabe.

¹⁷ Nahala a ne miggungume e ensi Istipanas, si Purtunatu, wey si Akaiku. Ne minsan ke ware kew kayi, duen e sikandan ka liwan niyu ¹⁸ su ware tapid kanta ne imbagget nikandan. Eleg iya ne eg-ileen ka iling due ne me etew.

¹⁹ Egpangemusta kaniyu ka migmalintutuu kayi te prubinsya te Asya. Ne si Akiliu wey si Prisila, duma te se-eye se egmanimba diye te baley ran, mapahetpet degma ne egpangemusta kaniyu te nasabeke e due te Magbebabe. ²⁰ Egpangemusta degma ka langun ne suled ta kayi.

Pegpangemustee y kew ka tagse sabeka te pegpapitew ne migpaheyinawee y kew.*

²¹ Ne kuntee, sikeddiey e, si Pablu, ka mig-uney-uney ne migsulat te seini ne pegpangemusta.

²² Ke due ware miggeyinawa te Magbebabe, igdilus sikandin.

Libed kad, Magbebabe ney!

²³ Ka keupiya wey keyidu te Magbebabe ne si Hisus, egkaangken niyu.

²⁴ Miggeyinawaan ku sikaniyu langun se nasabeke e due ki Kristu Hisus. Malehet iya.

Ka Igkarangeb ne Sulat ni Pablu te Matig-Kurintu

Igpewun-a

Ka igkarangeb ne sulat ni Pablu te Matig-Kurintu, diye din sulata te Masidunya. Insulat din seini te timpu ne kene amana ne meupiya ka rilasyun dan te migmalintuu diye te Kurintu.

Kayi te an-anayan ne baad te seini ne baseen, migpangguhud si Pablu meyitenged te rilasyun dan te migmalintuu diye te Kurintu. Impangguhud din ka pegkasasew rin meyitenged te pegpeyilew wey pegrupak kandin te migmalintuu. Ne impangguhud din man-e ka kahale din ne ka seeye ne pegkabelu din, nakapamehas te peginniyug te migmalintuu te sale dan wey nekeg-uli ka meupiya ne geyinawa ran. Ne mighangyu sikandin te migmalintuu ne egpabulus ne egpangangey te dasag dan ne igbulig te migmalintuu ne egkaayu-ayu diye te Hirusalim.

Te katammanan ne hep-at ne kapitulu, impangabangan ni Pablu ka pegkaapustulis din te seeye se mig-angken ne sikandan de ka malehet ne apustulis. Sikandan seeye se migbayung ki Pablu ne kene kun ne malehet ne apustulis.

Ka nasulat te seini ne baseen

Igpewun-a 1:1-11

Ka rilasyun ni Pablu te migmalintuu diye te Kurintu 1:12-7:16

Ka igbulig para te migmalintuu diye te Hudiya 8:1-9:15

Ka pegpangabang ni Pablu te kandin ne katenged isip apustulis 10:1-12:21

Ka katammanan 13:1-13

¹ Sikeddiey si Pablu ka migpeuyan te seini ne sulat duma te suled ta ne si Timutiyu. Apustulis a ni Kristu Hisus pinaahi te pegbuut te Manama.

Egpangemusta key kaniyu te migmalintuu te Manama due te Kurintu duma te langun ne keet-etawan din diye te intiru ne Akaya.

² Ka keyid-u wey keupinan ne egpuun te Manama ne Amey ta wey te Magbebabe ne si Hisu Kristu, egkaangken niyu.

Ka pegpasalamat ni Pablu te Manama

³ Egdayanen ta ka Manama ne Amey te Magbebabe ta ne si Hisu Kristu. Hiiduwfen sikandin ne Amey, wey Manama ne talagliwang te langun ne egkeyirapan.

⁴ Egliwangen ki nikandin te langun ne igkeyirapi ta, su eyew egpakaliwang ki degma te seeye se due igkeyirapi ne minsan nekey. Egpakaliwang ki kandan iling te pegliwang ne narawat ta puun te Manama. ⁵ Masalig ka inantuus ta ne iling te in-antuus ni Kristu, sikan naa, masalig

degma ka narawat ta ne pegliwang pinaahi ki Kristu. ⁶ Emun ke egkeyirapan key, pegliwang naa sika kaniyu wey para te kaluwasan niyu. Ne iling naan ded degma, emun ke egkaliwang key, epakaliwang key degma kaniyu, su eyew kene kew egkapelaan ne eg-antus te keyirapan ne iling te in-antus ney. ⁷ Dakel ka pegsalig ney kaniyu. Nakataha key ne taheed te eg-antus kew iling kanami, egliwangen kew red degma te Manama iling kanami.

⁸ Me suled, egkeupian key ne egkanengnengan niyu ka nabaybayaan ney ne keyirapan diye te prubinsya te Asya. Pepeiti naan de iya seeye se nabayaan ney su hendue te kene ney e egkeelehan wey hendue te igpatey ney en iya. ⁹ Ka malehet, nangenen ney ne seinid en iya ka katammanan ney. Piru neyitabu bes seeye eyew kene key eggsalig te pegkeetew ney, ke kene, te Manama re ne iyan eg-uyag te me minatey. ¹⁰ Inluwas key iya nikandin puun te makaalat-halat ne keyirapan, wey egluwasen key red man-e nikandin te eggginguma pad ne keyirapan. Sikandin de ka egkapallateng ney ne epabulus ne egluwasen man-e kanami, ¹¹ ne bulihi key degma nikaniyu te eg-ampu. Ne emun ke eggimuwen niyu sika, egtabaken te Manama

ka me peg-ampu niyu wey egbulihan key nikandin, wey masalig ka egpasalamat kandin tenged kanami.

Nabalbalawan ka planu ni Pablu

¹² Due seini se igpakapegasal ney, wey nakataha key ne malehet iya seini: ka pegbebasan ney diye te me etew, matareng key iya wey malinis ka tuyu ney diye te tangkaan te Manama, labi en iya due te kaniyu. Neyimu ney sika pinaahi te bulig wey keyid-u te Manama, kene ne pinaahi te kanami ne katuenan. ¹³ Su kene key egsulat kaniyu te kene niyu egkabasa wey egkasabut. Egiman-iman a ne eggingsuma red ka timpu ne egkasabutsabut key red iya nikaniyu, ¹⁴ minsan kene kew bayew epakasabut kuntee, su eyew te peglibed te Magbebaye ne si Hisus, epakapeggasal kew red kanami iling te pegegasal ney kaniyu.

¹⁵ Ne tenged su nakanengneng a ne nakasabut kew kayi, sikan naa ka nakaplanu a ne eggunaan ku perem sikaniyu egpanumbalayi eyew kararuwa kew egkapanalangini. ¹⁶ Migplanu a ne egpanumbaley kaniyu te peggendiye ku te Masidunya wey egtulan ded man-e te peglibed kud e eyew igpakapaligkat a nikaniyu peendiye te Hudiya. ¹⁷ Ne puun su ware natuman sika, kahiyen niyu buwa ne egkaalin-halin

ka suman-suman ku? Wey ke iling e naa ne egplanu te me etew kayi te kalibutan ne mahaan eg-uya-uya piru egkene-kene bes perem? ¹⁸ Ne puun su matinumanen ka Manama, egkasalihan degma ka inlalag ney kaniyu, su emun ke eg-uya-uya key, uya naan iya. ¹⁹ Su si Hisu Kristu, ne Anak te Manama, ka inwali ney engki Timutiyu wey Silas diye te kaniyu, kene sikandin eg-uya-uya ke egkene-kene, su ka langun ne eglalahen din, egtumanen din iya. ²⁰ Su pinaahi ki Kristu, natuman ka langun ne saad te Manama. Ne sika ka egpuunan ne pinaahi ki Kristu, egpakakahi ki te malehet iya, eyew egkarayan ka Manama. ²¹ Sika ne Manama ka miglig-en kanta due ki Kristu wey sikandin ka mig-alam kanta. ²² Intahuan ki degma nikandin te palinneu ne kandin kid en iya, ne iyan din impeugpe kayi te pusung ta ka Panisingan din eyew egpakataha ki ne egtumanen din iya ka langun ne insaad din.

²³ Ka Manama ka talagpamalehet ku ne malehet ka eglalahen ku. Iyan egpuunan ne wara a miggendue te Kurintu su eyew kena a egpakapasakit kaniyu. ²⁴ Ne kene ne iyan ku igpasabut due ne menu egmanduan ney e ka pegpalintutuu niyu, ke kene, miggimu key duma kaniyu su eyew perem egkahale kew, su nakataha key e ne malig-

en e ka pegpalintutuu niyu.

2

¹ Sikan naa ka nakaplanu a ne kena a eglibed egpanumbaley due te kaniyu su kema ke egpakapasakit e red man-e kaniyu iling te peggenduen ku dengan. ² Su emun ke egkapasakitan ku pad sikaniyu, hentew naan e ka egpakapahale keddi? Warad elein, gawas iya kaniyu te napasakitan ku. ³ Sika ka egpuunan ne insulatan ku sikaniyu te iling ded te insulat ku dengan, su eyew te peggenduen ku, kena a egkasakitan te seeye se egpakapahale perem keddi. Su nakataha a ne emun ke egkahala a, egkahale kew degma langun. ⁴ Pegsulat ku dengan kaniyu, amana ne masakit ka geyinawa ku wey migsinehew a tenged te kalaggew ku. Kene ne iyan ku tuyu ka pegpasakit kaniyu, ke kene, igkeupii ku re perem ne egpakataha kew ne amana ku dakeli sikaniyu te geyinawa.

Ka pegpasaylu te nakasale

⁵ Na, meyitenged te seeye se nakapasakit, kene ne sikreddi ka impasakitan din, su sikaniyu, piru kene ne sikaniyu langun. Egkahiyen ku ne kene ne sikaniyu langun, su egkeepes a ne egpakalalag a te gahag. ⁶ Eleg de iya ka pegaspad kandin te kasuluhan kaniyu. ⁷ Purisu, pasayluwa niyud e

sikandin wey liwanga niyude, su kema ke egkeuyan sikandin ke egmangune-kune ka kalaggew rin.⁸ Sikan naa, eghangyu a kaniyu ne ipapitew niyu ne miggeyinawaan niyu pad iya sikandin.⁹ Sika ka epuunan ne migsulatan ku sikaniyu dengan, eyew peg-eleg-eleg kaniyu wey eyew epakataha a ne egtumanen niyu red iya ka langun ne ingkahi ku.¹⁰ Emun ke epasayluwen niyu sikandin, epasayluwen kud e degma. Piru ka malehet, ke duen ma keilangan ne epasayluwen ku, impasaylu kud e sikandin diye te tangkaan ni Kristu tenged kaniyu.¹¹ Innimu ku sika su eyew kene ki egkatalu wey egkalimbungan ni Meibulan, su nakataha kid ma te mareet ne planu rin.

Ka pegkabantali ni Pablu diye te Truwas

¹² Pegginguma ku diye te Truwas te pegwali ku te Meupiya ne Panugtulen meiyitenged ki Kristu, nakita ku ne tapey e andama te Magbebaye ka paahi eyew egpekeyimu a te igpeyimu rin keddiey.¹³ Piru nabantan a su ware ku nakita diye ka suled ta ne si Titu. Purisu migpanaha-taha a kandan diye wey miggendiya ad te Masidunya.

Ka kapanaluwan pinaahi ki Kristu

¹⁴ Piru salamat te Manama su pinaahi te pegrabeka

ta ki Kristu, sikandin ka layun egpangulu kanta te kapanaluwan. Eggamiten ki nikandin eyew te pegpeila ki Kristu te minsan hendei iling te heemuti ne insinsu.¹⁵ Su egpekeiling ki te meemut ne insinsu ne inhalad ni Kristu diye te Manama, ne egkaarek te seeye se egkengalluwas wey minsan seeye se egmekeendiyad te karereetan.¹⁶ Te seeye se egmekeendiye te karereetan, egpekeiling sika te ngareg te minatey ne epakapatey te etew; piru te seeye se egkengalluwas, egpekeiling sika te peemut ne egbehey te umul. Na, hentew ma ka eleg te iling due ne himu?¹⁷ Su kene key ne iling te kasuluhan ne egpangguhud te lalag te Manama eyew te pegpaneleppi. Piru puun su ka Manama ka migpeuyan kanami, wey sikandin ka migtengteng kanami, leleheti iya mule ka impangguhud ney kaniyu isip me suluhuan ni Kristu.

3

Ka iyam ne kasabutan

¹ Kema ke egsuman-suman kew ne migpeggasal key e man-e te pegkeetew ney? Kene key ne iling te duma ne keilangan ne eg-uyan te sulat eyew te pegpeila-ila kaniyu. Ne kene degma ne keilangan ne eg-uyan key te sulat ne egpuun kaniyu te pegpeila-ila kanami diye te egkeendiyaa ney.² Kene

ney ne keilangan sika, su hendue te sikaniyu mismu ka sulat ney te pegpeila-ila ne nasulat kayi te pusung ney*, su eyew egkanengnengan wey egkabasa te langun.³ Klaru ne henduen kew te sulat ni Kristu ne impeuyan pinaahi kanami. Piru kene ne tinta ka inggamit te pegrusat due, ke kene, ka Panisingan te manekal ne Manama. Ne kene ne diye sulata seini te malumpayag ne batu, ke kene, diye te pusung te etew.

⁴ Egpakalalag key te iling due tenged su amana key migsalig te Manama pinaahi ki Kristu. ⁵ Piru kene key egpakaangken ne egpekey-imu key te iling due puun te katuenan ney, su ka katuenan ney, diye de egpuun te Manama. ⁶ Sikandin ka migbehey kanami te katuenan ne epanulu meyitenged te iyam ne kasabutan. Ka seini ne kasabutan, kene ne sinulat ne balaud, ke kene, pinaahi mule seini te Panisingan te Manama. Su ka sinulat ne balaud, eguyan te kamatayen, piru ka Panisingan, egbehey mule te umul ne ware egtamanan.

⁷ Te pegbehey te Manama ki Muwisis te Balaud ne insulat diye te malumpayag ne batu, kene egpakanememmet met ka me kabuhalan ni Israel te ulaula ni Muwisis su amana ne masil-ew, minsan egkapahan-ganaran

e egkaawe ka kasil-ew. Ne emun ke iling ma due kasil-ew ka impakita te Manama te pegbehey rin te Balaud ne eg-uyan te kamatayen,⁸ labew en iya ka katelesan ne impakita rin te pegbehey rin te Panisingan din!⁹ Su ke impakita te Manama ka kasil-ew te katelesan din te pegbehey rin te Balaud ne eg-pekekukum, labew en iya ne igpakita rin ka katelesan din ke egmatarengen din e ka me etew.¹⁰ Ka malehet, ka kasil-ew te katelesan te Balaud dengan, ware de nekegmentu ke igpeiling ta te kuntee ne kasil-ew te katelesan te seini se iyam ne kasabutan.¹¹ Su emun ke due katelesan te sika se Balaud ne egkaawe ded, iyan naan pa kene ne labew ka katelesan te sika se kasabutan ne kenad iya egkaawe.

¹² Purisu, puun su egpal-lateng key ne ka iyam ne kasabutan kene egkaawe, kene key en iya egkaaldek ka egwali.¹³ Kene key ne iling ki Muwisis ne migbubunbun te ulaula rin eyew kene egkakita te me kabuhalan ni Israel ka kasil-ew te ulaula rin ne egkapahan-ganaran bes e egkaawe.¹⁴ Piru makehal ka me ulu ran, su minsan kuntee, emun ke egbaseen dan e ka tapey ne kasabutan, hendue te egbunbunan ka me suman-suman dan su eyew kene sikandan egpakashabut te

* **3:2** Te duma ne baseen ne Grigu: niyu. **3:3** Iks 24:12; Hir 31:33; Isi 11:19; 36:26. **3:6** Hir 31:31. **3:7** Iks 34:29. **3:13** Iks 34:33.

kamalehetan. Egkaawe de ka sika ne bunbun pinaahi te pegpalintutuu ki Kristu. ¹⁵ Uya iya, minsan kuntee, emun ke egbaseen dan ka sinulat ni Muwisis, hendum te egbunbunan ded ka me suman-suman dan. ¹⁶ Piru ke egparani e ka etew diye te Magbebabe, egkaawe e ka nakabunbun te suman-suman din. ¹⁷ Na, ka egkahiyan kayi ne Magbebabe, sika se Panisingan te Magbebabe. Ne emun ke iyan mig-ugpe due te etew ka Panisingan te Magbebabe, duen naan e kaligwangan din. ¹⁸ Ne sikanta langun se warad bunbun te ulaula, egpekeiling ki te alungan ne egkakitaan te katelesan te Magbebabe. Ne ka sika ne katelesan, diye egpuun te Magbebabe ne sika se Panisingan te Manama. Sikandin ka egpabulus ne egbalew-balew kanta taman te egpekeiling kid en iya kandin.

4

Ka karatuan ne intahu te kuren ne innimu puun te tane

¹ Purisu, puun su ka Manama ka migbehey kanami te seini ne himu pinaahi te keyid-u rin, ware key naawei te kabagget. ² Insawile ney e ka mekeyilew-hilew ne himu ne eggimuwen te heles de. Ware key migpanlimbung te minsan hentew wey ware ney balbalawi ka lalag te

Manama, ke kene, migpangguhud key te kamalehetan diye te tangkaan te Manama. Ne migpakanekalan ney ne ware igkarew-ey kanami te langun ne etew. ³ Ne minsan ke needles diye te duma ka kamalehetan meyitenged te Meupiya ne Panugtulen ne inwali ney, piru diye de needles sika te me etew ne egpekeendiye te karereetan. ⁴ Kene sikandan egpalintutuu, tenged su imbunbunan ni Meibulan* ka suman-suman dan eyew kene sikan-dan egpakakita te kalayag te Meupiya ne Panugtulen meyitenged te katelesan ni Kristu. Ne si Kristu ka iling en iya te Manama. ⁵ Ne kene ne meyitenged te pegkeetew ney ka inwali ney, ke kene, meyitenged ki Hisu Kristu ne Magbebabe. Ne sikanami, me suluhuanen key re nikaniyu tenged ki Hisus. ⁶ Su ka Manama ne migkahi, "Eglayag diye te karusileman ka kalayag," sikan ded ne Manama ka migbehey te kalayag kayi te me suman-suman ta eyew egkabehayan te kalayag ka duma pinaahi te peg-ila te katelesan din ne impakita rin pinaahi ki Kristu.

⁷ Piru sikanami, egpekeiling key re te kuren ne innimu puun te tane ne intahuan te mahal ne karatuan ne sika se pegpangguhud te Meupiya ne Panugtulen, eyew egkakita te me etew ne ka amana ne dakel ne geem

^{3:16} Iks 34:34. * ^{4:4} Te Grigu: manama te seini ne kalibutan. ^{4:6} Hin 1:3.

ne nakatahu kayi te mahuye ne lawa ney, kene ne kanami ne geem, ke kene, kandin te Manama. ⁸ Egkeyirapan key te minsan nekey ne paahi, piru kene key red egkatalu. Egkabenga-benga key, piru kene key red engked. ⁹ Imbaybayaran key, piru ware key red engkeri te Manama; amana key pasakiti, piru ware key red himatayi. ¹⁰ Layun key igsalerep te kamatayen ne iling te kamatayen ni Hisus, eyew egkakita kayi te lawa ney ka umul ne imbehey ni Hisus. ¹¹ Ne taheed te neuyag key pad, layun key iya egpakaasalerep te kamatayen tenged te pegpalintutuu ney ki Hisus, su eyew egkakita ka umul rin kayi te lawa ney ne egpatey pad. ¹² Purisu malehet iya ne egsalerep key layun te kamatayen, su eyew egpakaangken kew te umul ne ware egtamanan.

¹³ Due nasulat te Kasulatan ne miggenendue, "Egpangguhud a su migpalintutuu e ma." Ne iling ded degma due ka innimu ney, migpangguhud key su migpalintutuu key ma. ¹⁴ Su nakanengneng key ne ka Manama ne mig-uyag te Magbebaye ne si Hisus, iyan ded degma eg-uyag kanami duma ki Hisus, wey eguyanen key nikandin duma kaniyu diye te tangkaan din. ¹⁵ In-antus ney sika se langun tenged kaniyu, su eyew egmasalig ka me etew

ne egpakarawat te keyid-u te Manama wey egmasalig ka egpasalamat kandin, sikan naa ka egkasaye iya sikandin.

Ka peg-ugpe pinaahi te pegpalintutuu

¹⁶ Sika ka egpuunan ne ware key naawei te kabagget. Ne minsan ke egkapahan-ganaran e egmahuye seini se me lawa ney, piru inlig-en ded ka me gimukud ney tagse aldew. ¹⁷ Ka keyirapan ne in-antus ney, kene amana ne mabehat wey eglihad de sika, du te sika se dakel ne katesan ne ware katamanan ne egkaangken ney keureme diye te langit. ¹⁸ Su kene ne iyan ney intengtengan sika se egkakita kayi te ampew te tane, ke kene, sika se kene egkakita ne diye te langit. Sika se egkakita, eglihad de, piru ka kene egkakita, ware mule katamanan.

5

Ka iyam ne lawa

¹ Su nakanengneng ki ne emun ke egkahuhus e ka balungbalung ne in-ugpaan ta kayi te ampew te tane, ne iyan sika se lawa ta, duen ded egpeugpaan te Manama kanta diye te langit, sika se ware egtamanan ne lawa ne innimu te Manama para kanta, ne kene ne hin imuwan te etew. ² Kuntee, egkawangalan ki tenged su amana ki egkeupian ne egkabalbalawan e ka lawa ta, ³ su eyew ke igsaluub tad ka sika ne lawa ne diye te

langit, kenad e egkakita ne migpalawas bes ka gimukud ta. ⁴ Su taheed te kayi ki pad kuntee mig-ugpe te seini ne lawa, egpakareg-uy ki pad iya te peg-antus ta. Piru kene ne iyan igpasabut due ne menu egkeupian kid e ne egawe te lawa ta kayi te ampew te tane, ke kene, egkeupian kid e ne egkasaluuban te lawa ne egpuun te langit, su eyew seini se lawa ne egpatey pad, egkaliwanan e te lawa ne kenad iya egpatey. ⁵ Ka Manama ka mig-andam kanta eyew egkarawat ta ka seini se iyam ne lawa, wey imbehayan ki nikandin te Panisingan isip palinneu ne egtumanen din iya sika.

⁶ Purisu ware ki migmahuye Nakataha ki ne taheed te kayi ki pad te seini ne lawa, ware ki naan pad diye te Manama. ⁷ Su ka peg-ugpe ta kuntee pinaahi pad te pegpalintutuu, kene ne pinaahi ke nekey ka egkiteen ta. ⁸ Ware ki migmahuye minsan ke egkeupian kid e perem ne eg-engked te seini ne lawa wey eg-ugpe e duma te Magbebaye. ⁹ Su minsan ke kayi ki pad te ampew te tane wey ke diyad e te langit, egkeupian ki ne egpakahale kandin. ¹⁰ Su keilangan ne eg-atubang ki langun diye ki Kristu eyew eggukuman nikandin. Ne ka tagse sabeka, egpakarawat te eleg kandin sumale te hinimuwan din kayi te ampew te tane, meupiya ma

wey se mareet.

Ka pegpeuliey te meupiya ne geyinawa

¹¹ Purisu, tenged su due kaaldek ney te Magbebaye, impehes ney ka me etew ne egpalintutuu. Nakataha ka Manama ne malehet iya ka tuyu ney, wey eg-iman-iman key ne nakanengneng kew red degma due. ¹² Ne kene ne inlalag ku seini ne menu egpeggasal key, ke kene, egbehayan ney re sikaniyu te puunan ne ig-pakapeggasal key nikaniyu, su eyew egpaketabak kew te seeye se iyan de igpeggasal ke nekey ka egkakita diye te etew, kene ne sika se diye te pusung din. ¹³ Emun ke due egkahi ne henduen key te egmambusawen, balahad de due, tenged su ka langun ne eggimuwen ney, para sika te Manama. Ne emun ke due man-e egkahi ne maheteng ka suman-suman ney, sikaniyu mismu, nakatahe e ne para kaniyu ka himu ney. ¹⁴ Su tenged te geyinawa ni Kristu kanami, warad e lein ne egkeyimu ney gawas te pegtuman kandin. Su nakataha key ne namatey si Kristu para te langun, sikan naa, nekeiling de te namatey e degma ka langun ne etew. ¹⁵ Iyan igpasabut due ne namatey sikandin para te langun ne etew eyew ka me etew ne neuyag pad, kenad e ne iyan pad eg-ikulen ka igkeupii ran, ke kene, sikan e

se igkeupii te sika se namatey
wey neuyag para kandan.

¹⁶ Purisu, puun kuntee,
kene key e eg-ugsi-ugsi te
duma ne etew iling te innimu
te kene egpalintutuu te Man-
ama. Dengan, iling due ka
peg-ugsi-ugsi ney ki Kristu,
piru kenad e ne iling due
kuntee. ¹⁷ Purisu, ka minsan
hentew ne nasabeke e diye
ki Kristu, imbalbalawan e
sikandin te Manama. Naawe
e ka tapey ne pegkeetew
rin, wey miggingsume e ka
iyam. ¹⁸ Ka Manama ka
miggimu te seini se langun,
wey sikandin ka impeg-uli te
meupiya ne geyinawa ta diye
te kandin pinaahi ki Kristu.
Imbehayan key te Manama
te himu ne egpeg-uli ka
meupiya ne geyinawa te me
etew diye te kandin. ¹⁹ Iyan
ney igpasabut, ne egpeg-
ulien te Manama ka meupiya
ne geyinawa te langun ne
etew diye te kandin pinaahi
ki Kristu, wey kene din e
egsumsumanen ka sale dan.
Sika ka insalig te Manama
kanami ne guhuren ne
igpepangguhud.

²⁰ Purisu, sikanami ka
impeuyan ni Kristu, wey
nekeiling de te egpakiglalag
mismu ka Manama pinaahi
kanami. Ne egbanasal key
kaniyu isip ki Kristu ne
pegbanasal ne peg-ulia niyu
ka meupiya ne geyinawa
niyu te Manama. ²¹ Ware sale
ni Kristu, piru sikandin ka
impeparusaan te Manama
tenged te me sale ta, su

eyew pinaahi te pegasbeka
ta ki Kristu, eg-isipen ki te
Manama ne matareng.

6

¹ Ne puun su talagbulig
key te Manama, egbanasalan
ney sikaniyu ne kene niyu
batasana ne hendue te
ware karuan ka keupiya
wey keyid-u te Manama ne
narawat niyu. ² Su migkahi
ka Manama,

“Indineg ku iya sikeykew te
eleg ne timpu,
wey imbulihan ku
sikeykew te aldew te
kaluwasan.”

Pammineg kew! Kunteen
iya ka eleg ne timpu wey ka
aldew te kaluwasan.

³ Ware key miggimu te
egpakashaligkat te duma, su
eyew ware igkarew-ey te
himu ne imbehey kanami.

⁴ Ke kene, pinaahi te langun
ne eggimuwen ney, impakita
ney ne suluhuanen key
iya te Manama tenged te
amana ne peg-antus ney te
kasakit, keyirapan, wey me
kalised. ⁵ Inlelampesan
key, imprisu key, insesamuk
key te mangune-kune, subla-

subla ka peggimu ney, ku-
lang ka peglipereng ney,
wey egmanggutasan key.

⁶ Impakita ney man-e ne
suluhuanen key iya te Man-
ama pinaahi te malinis ne
peg-ugpe ney, te katuenan
ney, te pegpariralem ney, te
keupiya ney diye te duma,
te keyid-u ne imbehey te
Panisingan te Manama, te

malehet ne geyinawa,⁷ te pegwali ney te kamalehetan, wey te geem te Manama ne impapitew rin pinaahi kanami. Imbehayan key man-e te Manama te pegkamatareng isip panganiban ne egpekeiling te sundang wey kalasag ney.⁸ Isip suluhuanen te Manama, sengekakuwa ne egdayanen key te me etew wey sengekakuwa ne eglemetan key. Sengekakuwa ne eglalahan key te mareet, wey sengekakuwa ne meupiya ka iglalag kanami. Due egkahi ne me ubaten key minsan malehet ka eglalahen ney.⁹ Kahiyan ne ware key kun neileyi, piru neilaan key red te duma. Egkengammatey key kun e, piru mannekal key pad. Minsan ke egpanlampesan key, piru ware key red himatayi.¹⁰ Minsan ke due me kalaggew ney, piru egkahale key red. Minsan ke egkaayu-ayu key, piru masalig ka imparatu ney. Minsan ke hendue te ware karatuan ney, piru due langun kayi te kanami.

¹¹ Pinalangge ne matig-Kurintu, ware heles te peglag ney kaniyu, wey amana ney geyinawei sikaniyu.¹² Kene ne kulang ka peggeyinawa ney kaniyu, ke kene, sikaniyu ka kulang ka peggeyinawa kanami.¹³ Purisu, egpakiglag a kuntee kaniyu iling te malehet ne me anak ku. Ne keilangan ne

eggeyinawaan key nikaniyu iling te peggeyinawa ney kaniyu.

*Kene kew sabeka te seeye
se kene egpalintutuu*

¹⁴ Kene kew sabeka te seeye se kene egpalintutuu. Su kene iya egkaayun ne egkasabeka ka matareng wey ka mareet se pegbebatastan, wey kene egkaayun ne egpekegduma ka malayag te marusilem.¹⁵ Si Kristu wey si Meibulan, kene iya egkaayun ne egpekeg-uyun ka diyus-diyus te sika se ugpaan te Manama. Ne sikanta ka ugpaan te manekal ne Manama. Sumale te ingkahi te Manama,
Eg-ugpa a diye te kandan wey egduma a kandan.

Egkeyimu a ne Manama ran, wey egkeyimu sikandan ne keet-etawan ku.”

¹⁷ Purisu migkahi ka Magbebaye ne Manama, “Pariyu kew kandan wey kene kew duma te me etew ne kene egpalintutuu keddiey. Kene kew samsam te sika se in-isip ne malindit, wey egdawaten ku sikaniyu.

¹⁸ Kahi te Magbebaye ne Manama ne Amana ne Maresen, Egkeyimu a ne Amey niyu,

6:16 1Kur 3:16; 6:19; Lib 26:12; Isa 37:27.
1Kru 17:13; Isa 43:6; Hir 31:9.

6:17 Isa 52:11. **6:18** 2Sam 7:14;

wey egkeyimu kew ne
me anak ku."

7

¹ Me pinalangge, puun su insaaran ki te Manama te iling due, keilangan ne engkeran ta ka minsan nekey ne in-isip ne epakamalindit te lawa ta wey te suman-suman ta. Ne keilangan ne due pegkaaldek ta te Manama, wey epakannekal ki ne egmatulus ka peg-ugpe ta.

Ka kalahale ni Pablu

² Geyinawei key nikaniyu. Ware key nekeyimu te mareet diye te minsan hentew, wey ke migdereet naa wey ke migpanlupig naa te minsan hentew. ³ Kene ne iyan ku inlalag te iling kayi ne menu egbayungan ku sikaniyu, su nakahi kud e dengan ne eggeyinawaan ney iya sikaniyu minsan pad ke epatey key e duma kaniyu wey se kene pad. ⁴ Amana ne dakel ka pegsalig ku kaniyu, wey amana ku ipeggasal sikaniyu. Amana a naliwang wey nahale-gale taliware te me keyirapan.

⁵ Su minsan te pegginguma ney diye te Masidunya, ware key red nekeyimmeley tenged te keyirapan ne nabayaan ney. Due egmeeg-ehetey te minsan hendei, wey miggingumaan key e te liyas. ⁶ Piru ka Manama ne iyan migliwang te seeye se nalaggew, ka migliwang kanami pinaahi te peggedini ni Titu. ⁷ Ne kene de ne

ka pegginguma rin ka naka-paliwang kanami, ke kene, sika degma se pegliwang ne naangey rin puun kaniyu. Amana a nahale-gale te ingguhuran key nikandin ne amana kew kun egkeupian ne epakigkita keddi, wey nekegsendit kew kun e te mareet ne hinimuwan niyu, wey egkabagget kew kun ne epangabang keddiey.

⁸ Su minsan ke naka-palaggew kaniyu ka sulat ku, wara a nekegsendit te pepsulat ku due. Piru ka malehet, nekegsendit e red te an-anayan su nakita ku ne nakapalungku ka sulat ku kaniyu minsan mahaan de. ⁹ Piru kuntee, nahala ad e, ne kene ne tenged su miglungku kew, ke kene, tenged su neyimu sika ne egpuunan ne mig-inniyug kew e te sale niyu. Su ka peglungku niyu, pegbuut sika te Manama, purisu ware nakarereet kaniyu seeye se sulat ku. ¹⁰ Su ka peglungku ne pegbuut te Manama, epakapeinniyug te sale wey epakapanulud diye te kaluwasan, ne kene ne eleg sika ne egsenditan. Piru ka peglungku te etew ne ware nekeila te Manama, eg-uyan te kamatayen ne ware egtamanan. ¹¹ Tengtengi niyu ka meupiya ne migpangkusant te peglungku niyu ne pegbuut te Manama. Su kuntee, egkabagget kew e wey egmaahet e ne egpapitew ne eleg iya ka innimu niyu.

Nabelu kew tenged su neyi-lawan kew wey naaldek kew ne kema ke eglegparan kew. Amana kew iya egkeupian ne egpekeg-uli ka meupiya ne geyinawa ta, egkabagget kew ne egpakigkita keddiey, wey andam kew ne egparusaan seeye se nakasale. Te langun ne innimu niyu, impakita niyu ne ware iya igkabayung kaniyu iling te nakahi e due te kewun-aan.

¹² Purisu, insulat ku ka seeye ne sulat ne kene ne tenged te etew ne nakasale, wey ke sikan naa se ney-imuwan din te sale, ke kene, eyew igpakapapitew niyu diye te tangkaan te Manama ke kamenu iya karakel ka peggeyinawa niyu kanami.
¹³ Purisu naliwang key.

Ne timul pad te igkaliwang ney, amana key nahale te nakita ney ne amana degma nahale si Titu, tenged su migmaawang ka geyinawa rin pinaahi kaniyu langun.

¹⁴ Impeggasal ku sikaniyu diye te kandin wey wara a nikaniyu peyilawi. Ka langun ne inlalag ku kaniyu, malehet iya. Te iling due ne paahi, napamalehetan en iya ne malehet ka impeggasal ney diye ki Titu. ¹⁵ Purisu natimulan ka geyinawa rin kaniyu, su nakasuman-suman sikandin ne migtuman kew langun te pegpanulu din wey te peg-alumama niyu degma kandin duma te pectahud wey pegkaaldek

niyu. ¹⁶ Amana a nahale kuntee tenged su egkasalihan kud amana sikaniyu.

8

Ka peggibahet te pegbehey ne kene egpalelehed

¹ Me suled, egkeupian key ne egpakataha kew meyitenged te keupiya wey keyid-u te Manama diye te me punduk te migmalintutuu diye te Masidunya. ² Minsan ke in-el-elehan sikandan pinaahi te masumpit ne keyirapan, piru subla ka kahale dan. Ne puun due, subla-subla ka pegbehey ran minsan amana sikandan egkaayayu. ³ Egpakamemalehet a ne kene de ne iyan dan imbehey ka egkeelehan dan, ke kene, ka subla pad te egkeelehan dan te pegbehey, wey innimu ran sika sumale te pegbuut dan. ⁴ Amana mighangyu sikandan kanami ne egbahayan ney sikandan te kaayunan ne egpakabulig te keet-etawan te Manama. ⁵ Ne ka neyimu ran, labew pad te in-iman-iman ney. An-anayan, imbehey ran ka pegkeetew ran diye te Magbebaye, ne nataman, kayi degma te kanami sumale te pegbuut te Manama. ⁶ Purisu imbanasalan ney si Titu ne eglibed due te kaniyu wey eg-impusan din ka nabunsuran din e ne himu ne peglimud te igbulig niyu te duma. ⁷ Na, datu kew e

te langun-langun de iya—
te pegpalintutuu niyu, te
pegpanulu niyu, te katuenan
niyu, te kaahet-ahet niyu,
wey te peggeyinawa niyu
te duma—purisu neupian
key degma ne igpakita niyu
ka subla-subla ne pegbehey
niyu.

⁸ Kene ne iyan ku inlalag
kayi ne menu egsuhu a
kaniyu, ke kene, ingguhud
ku re kaniyu ka kaahet te
duma ne etew te pegbulig
te duma, su eyew egka-
pamalehetan niyu degma
ne malehet e ka geyinawa
niyu. ⁹ Su nakanengneng
kew e te keupiya wey keyid-
u te Magbebaye ta ne si
Hisu Kristu. Minsan datu
sikandin, piru migpeyimu
sikandin ne egkaayu-ayu su
eyew pinaahi due, egkaratu
kew.

¹⁰ Ne seini ka tambag ku
meyitenged due: meupiya
pad ke eg-impusan niyu ka
nabunsuran niyu ne pegbe-
hey te miglihad ne leg-un.
Sikaniyu ka an-anayan ne
miggimu te iling due wey ka
nekewun-a ne egkeupian ne
eggimu te iling due. ¹¹ Sikan
naa, ipabulus niyu iya sika.
Meupiya perem ke egmaahet
kew ne eg-impus due iling
te kaahet niyu te pegbunsud
niyu. Behey kew te minsan
nekey sumale ke nekey ka
egkeyimu niyu. ¹² Su emun
ke maahet kew iya ne egbe-
hey, egdawaten te Manama
ke nekey ka igkabehey niyu.
Kene sikandin eg-iman-iman

ne egbehey kew te ware due
te kaniyu.

¹³ Kene ne iyan ku ig-
pasabut due ne eyew eg-
pekeyimmeley te kalised
ka duma pinaahi te pegbe-
hey niyu taheed mule ne
egkeyirapan kew e, ke kene,
eyew egpekeg-iling kew re
langun ne kene egkeyirapan.

¹⁴ Kuntee, dakel ka due
te kaniyu, ne eleg de iya
ne egbulig kew te seeye
se egkeilangan, su eyew
egkabulihan kew degma
keureme ke due keilangan
niyu, eyew egpekeg-iling
kew re langun ne kene
egkeyirapan. ¹⁵ Sumale
te nasulat te Kasulatan ne
miggenendue,

“Seeye se dakel se nalimud,
ware nasubleyi,
ne seeye se deisek de se
nalimud, ware naku-
langi.”

Si Titu wey ka me duma rin

¹⁶ Migpasalamat a te Man-
ama su imbehayan din si
Titu te kaahet ne iling te
keddiey eyew te pegbulig
kaniyu. ¹⁷ Mig-uyun sikandin
te hangyu ney ne eggendue
te kaniyu. Piru ka malehet,
tapey e sikandin eaheti ne eg-
bulig kaniyu, wey egkeupian
ne eggendue. ¹⁸ Due suled
ta ne igparuma ney ki Titu.
Mabantug sikandin diye te
langun ne migmalintutuu
tenged te pegwali rin te
Meupiya ne Panugtulen.
¹⁹ Timul pad due, in-alam
sikandin te migmalintutuu

ne egparumeen kanami te hipanawan eyew eg-uyan te seini se igbulig te seeye se egkeilangan. Innimu ney sika eyew egkasaye ka Magbebabe wey igaipakapakita ney ne egkeupian key iya ne ebulig.

²⁰ Amana key mig-ayad-ayad ka egpangangey te seini se dakel amana ne igpamehey niyu eyew ware igkabayung kanami. ²¹ Su egkeupian key ne eleg iya ka eggimuwen ney diye te tangkaan te Magbebabe wey diye degma te tangkaan te me etew.

²² Ne due lein ne suled ta ne igparuma ney kandan. Malasi ney e sikandin neelehi te masalig ne paahi, wey nakita ney ne amana iya sikandin maahet ne ebulig, ne labi en iya kuntee tenged su dakel amana ka pegasalig din kaniyu. ²³ Ne meytenged ki Titu, duma ku sikandin te himu te pegbulig kaniyu. Ne meytenged te seeye se me duma rin ne me suled ta te pegpalintutuu, sikandin ka impeuyan te migmalintutuu. Egmabantug si Kristu tenged te eggimuwen dan. ²⁴ Purisu ipakita niyu kandan ka geyinawa niyu, wey pamaleheti niyu diye te migmalintutuu ne malehet ka impeggasal ney meytenged kaniyu.

9

Ka igbulig diye te migmalintutuu

8:21 Lal 3:4 (LXX).

¹ Na, kenad e ne keilangan ne egsulatan ku pad sikaniyu meytenged te sika se igbulig te keet-etawan te Manama diye te Hirusalim. ² Nakataha a ne amana kew iya ne maahet ne ebulig, wey impeggasal kud e sika diye te matig-Masidunya. Ingguhuran ku sikandin te puun pad te miglihad ne legun, andam kew e ka matig-Akaya ne ebulig. Ne puun due, egkeupian e degma ne ebulig ka kasuluhan kandan. ³ Piru igpeuyan ku seini se me suled ta te pegpalintutuu eyew kene egkeyimu ne ware karuan te impeggasal ney meytenged kaniyu, wey eyew egpakaandam kew te igbulig niyu sumale te ingkahi ku kandan. ⁴ Ne emun ke due egduma keddiey ne matig-Masidunya, ne egpakkita ne kene kew ne andam, egkeyilawan key en iya tenged su mig-iman-iman key ne nakaandam kew e, ne labew kew en iya degma ne egkeyilawan! ⁵ Purisu nasumansuman ku ne keilangan ne egbanasalan ku ka me suled ta ne egpewun-een kud due te kaniyu eyew ebulig egpanlimud te insaad niyu ne panalangin, eyew tapey e egkaandam te peggenduen ku. Piru egkeupian a ne egbehey kew due ne kaniyu iya ne pegbuut, kene ne puun de su napehes kew.

⁶ Sumsumana niyu seini: ka egpamula te deisek,

deisek de degma ka egka-haani. Ka egpamula te dakel, dakel degma ka egkahaani. ⁷ Purisu ka tagse sabeka, keilangan ne egbehey sumale ke nekey ka nasuman-suman din, ne kene sikandin egkalaggew wey egsuman-suman ne napehes de, su eggeyi-nawaan te Manama seeye se egbehey ne due kahale. ⁸ Ka Manama ka epanalangin kaniyu te subla-subla eyew kene kew egkaawaan te minsan ken-u te langun ne keilangan niyu, wey eyew egpakabulig kew pad te duma. ⁹ Sumale te nasulat te Kasulatan,

“Amana ne dakel ka imbehey rin diye te egkaayu-ayu,
wey kene egkalingawan ka katareng din te min-san ken-u.”

¹⁰ Ka Manama ka egbehey diye te me talagpamula te beni wey te egkakeen, wey sikandin ded degma ka egbehey wey egpamasalig ke nekey ka due te kaniyu eyew egkatimulan pad ka keupiya niyu te pegbehey. ¹¹ Igparatu kew layun te Manama eyew mabehey-behey kew te langun ne timpu. Ne masalig ka egpasalamat te Manama tenged te egkarawat dan ne igpeuyan niyu kanami. ¹² Ne tenged te seini se pegbehey niyu, egkabulihan te keilangan dan seeye se keet-etawan te Manama, wey egmasalig pad degma seeye

se egpasalamat te Manama. ¹³ Ne seini se eggimuwen niyu, egkapamalehetan ne malehet ka pegpalintutuu niyu wey egkabantug ka Manama, tenged su egkakita ran ne mig-ikul kew te inangken niyu ne Meupiya ne Panugtulen meyitenged ki Kristu. Egsayeen dan man-e ka Manama tenged su mabulig-bulig kew kandan wey diye degma te minsan hentew. ¹⁴ Egampu sikandan kaniyu wey amana degma egkeupian ne egpakigkiti kaniyu tenged te kein-inuwan ne keupiya wey keyid-u te Manama ne imbehey rin kaniyu. ¹⁵ Egpasalamat ta ka Manama tenged te dasag din ne kene egkabayaran.

10

*Ka pegpangatarengan ni
Pablu meyitenged te katenged
din*

¹ Sikeddiey si Pablu, ka egkekahiyan ne liyasen ke due te tangkaan niyu, piru wey kun de mabulut ke diye te mariyu. Ne kuntee, pinaahi te pegpariralem wey keyid-u ni Kristu, ² egbanasalan ku sikaniyu ne emun ke duen a te kaniyu, kene perem ne keilangan ne egmabulut a te seeye se migbayung ne kalibutanen kun ka pegbebatasan ney wey ka katuyuan ney. ³ Su minsan ke etew key re, piru kene key egpakig-ehet

te etew-etew re ne paahi.
 4 Su ka me panganiban ne eggamiten ney te egpakig-ehet, kene ne panganiban kayi te ampew te tane, ke kene, sika se maresen ne panganiban te Manama ne epakarereet te seeye se egsupak kandin. Egdereetan ney ka kene ne malehet ne pegpangataengan te me etew,⁵ wey ka igpeggasal ran ne epakabalabag te peg-ila ran te Manama eyew egkabalbalawan ka suman-suman dan sumale te igke-upii ni Kristu.⁶ Ne emun ke egkapamalehetan ney e ne eleg en iya ka pegtuman niyu ki Kristu, egparusaan ney e seeye se ware migtuman.

7 Ka seyyup niyu su iyan niyu re egtengtengan ke nekey ka egkakita niyu. Ke duen ma amana eg-angken ne sakup e sikandin ni Kristu, keilangan ne eg-isipen din ne sakup key e degma ni Kristu iling kandin.
 8 Su minsan ke subla ka pegpeggasal ku meytenged te katenged ney, piru kena a egkeyilew, su ka Magbebaye ka migbehey kanami due eyew te peglig-en kaniyu, ne kene ne pegdereet kaniyu.
 9 Kene niyu sumsumana ne egginaldeken ku sikaniyu te me sulat ku.¹⁰ Su due egkahie ne wey e kun de mabulut wey egpehes ke diye te me sulat ku, piru mahuye e kun ke duen a, wey ware kun karuan te egmanlalahen ku.
 11 Keilangan ne egkaneng-nengan te sika ne me etew, ne

seeye se insulat ney te timpu ne ware key due, eggimuwen ney iya ke duen key.

12 Kene key egpaalag-alag eggukum wey egpegi-ling te pegkeetew ney te seeye se me etew ne migpeggasal te pegkeetew ran wey kene key degma eggukum kandan. Su hendue te kulang ka katuenan dan! Miggimu sikandan te kandan mismu ne sekeranan eyew te pegseked wey peggukum te pegkeetew ran.¹³ Piru sikanami mule, kene key eg-pasubla egpeggasal, su iyan ney re mule igpeggasal ka himu ne impeyimu te Manama kanami, ne nalagkes en iya kayi ka himu ney due te kaniyu.¹⁴ Kene key degma egpasubla egpeggasal kaniyu meytenged te himu ney due te kaniyu, tenged su sikanami ka an-anayan ne nekeendue te kaniyu ne migwali te Meupiya ne Panugtulen meytenged ki Kristu.¹⁵ Kene key degma egpasubla egpeggasal te himu ne neyimu te duma ne etew. Piru egpallateng key ne egtulin pad ka pegpalintutuu niyu wey egkatimulan pad degma ka himu ney due te kaniyu ne imbehey te Manama.¹⁶ Pegkapenga due te kaniyu, egpakawali key e te Meupiya ne Panugtulen diye te duma ne me inged ne mariyu kaniyu. Kene key egkeupian ne iyan ney igpeggasal ka himu te duma ne etew diye te me inged ne imbehey te Manama kandan.

¹⁷ Piru sumale te nasulat te Kasulatan, "Ke due egpeg-gasal, keilangan ne ka Mag-bebaye ne Manama ka igpeg-gasal rin." ¹⁸ Su kene igkahale te Magbebeye ka etew ne egdayan te kandin mismu ne pegkeetew, ke kene, sika se etew ne egdayanen din.

11

Si Pablu wey ka kene ne malehet ne me apustulis

¹ Kene kew pa ubag kapeleyi keddiey minsan ke henden a te ungel. Antusa niyu pa! ² Egpangalikud a kaniyu iling te pegpangalikud te Manama kaniyu. Nekeiling kew te sabeka ne mengebay ne ware pad neyilabeti ne intahahe kud ne igpaasawa te sabeka ne lukes ne iyan si Kristu. ³ Piru egkaaldek a su kema ke egkalimbungan kew, iling ki Iba te inlimbungan te uled, wey egkaawe e ka mapahetpet wey malehet ne geyinawa niyu ki Kristu. ⁴ Su egdawat kew te minsan hentew ne egmangendue te kaniyu ne egwali te lein ne Hisus, kene ne iling te inwali ney. Egdawat kew man-e te panisingan ne lein te narawat niyud e. Ne egdawat kew man-e te Meupiya kun ne Panugtulen ne kene ne iling te narawat niyud e. Mahaan kew re egkeuyan!

⁵ Migpalintutuu a ne kena a egkeengkeran te seeye se egkahi ne labew kun sikandan ne me apustulis.

⁶ Minsan pad ke kena a egkateu ne eglalag-lalag, piru kene ne kulang ka katuenan ku. Impapitew ney seini due te kaniyu te minsan nekey ne paahi.

⁷ Nakasale e naa te pegpariralem ku te pegkeetew ku tenged te pegwali ku te Meupiya ne Panugtulen ne ware migpabayad su eyew re egkatahud kew? ⁸ Taheed te miggimu a due te kaniyu, imbulihan a te lein ne punduk te migmalintutuu. Ne hendue te intakawan ku sikandan su migdawat e ma te keuyahan ku ne egpuun kandan eyew egpakabulig a kaniyu. ⁹ Su minsan ware egkeyimu ku te duen e pad te kaniyu, wara a migbuyu te minsan hentew kaniyu. Su ka migmalintutuu e ne egpuun te Masidunya ka migbehey keddiey te langun ne keilangan ku. Wara ad iya migpabulig kaniyu, wey minsan keureme, kene ku eggimuwen sika. ¹⁰ Ware egpakapeengked keddiey te pegpeggasal ku meytenged due, tenged su kena a iya egpabulig kaniyu wey te minsan hentew diye te Akaya. Malehet seini se eglalahen ku iling kalehet te eglalahen ni Kristu. ¹¹ Mani buwa te wara a migpabulig kaniyu? Puun buwa su ware ku geyinawei sikaniyu? Nakataha ka Manama ne inggeyinawaan ku iya sikaniyu!

¹² Egpabulus a ne kene egbuyu te tabang kaniyu su

eyew egkasanggel e seeye se egpapitew-pitew re ne me apustulis ne egpeggasal ne nekeg-iling kun de ka himurantekanami.¹³ Su ka seeye ne me etew, kene ne malehet ne me apustulis, ke kene, talaglimbung de sikandan wey egpapitew-pitew re ne me apustulis kun ni Kristu.¹⁴ Ne kene ne kein-inuwan sika, su minsan si Meibulan, egpakteiling sikandin te masil-ew ne panalihan te Manama.¹⁵ Sikan naa, kene degma ne kein-inuwan ke egpakteiling ka me suluhuanen din te me suluhuanen te matareng ne Manama. Piru te katammanan, egparusaan sikandan sumale te hinimuwan dan.

*Ka pegpeggasal ni Pablo
meyitenged te peg-antus din*

¹⁶ Egliberen ku te egkahi, keilangan ne ware sabeka ne egsuman-suman ne ungel a. Piru ke iling ma due ka suman-suman niyu keddi, antuse e pa nikaniyu te egpammedeg su egpeggasal e pad ubag te minsan deisek de.¹⁷ Seini se pegpeggasal ku, kene ne diye egpuun te Magbebeye, ke kene, innimu ku re seini isip egkeungel.¹⁸ Ne puun su masalig due te kaniyu ka egpeggasal iling te eggimuwente me etew kayite kalibutan, egpeggasal ad e degma.¹⁹ Ew matagseb kew bes iya su egkahale kew re iya ne eg-antus te me ungel!²⁰ Eg-antus kew re iya

ne eg-uripenen nikandan, egkuen ka langun ne kaniyu, eglimbungan, egpabekalan te pakpak dan, wey egtapien nikandan.²¹ Egkeyilew a ne eg-angken ne egliyasen key ne eggimu te iling due! Piru ke duen ma egpaalag-alag egpeggasal te minsan nekey—egpeggasal a degma minsan ke egpekeiling te ungel ka peglag-lalag ku.²² Egpeggasal sikandan ne Hibruwanen? Ti, iling e red degma. Egpeggasal sikandan ne kabuhalan ni Israil? Iling e red iya degma. Egpeggasal sikandan ne kabuhalan ni Abraham? Ti, iling e red iya man-e.²³ Me suluhuanen naa sikandan ni Kristu? Henduen a te egbusawen ka eglalag te iling kayi, piru meupiye e pad ne suluhuanen kuntere kandan! Subla pad ka keddiey ne peggimu, malasi e pad egkaprisu, kamasalig a lelampesi, wey kamasalig a perem namatey.²⁴ Kalalimma a lelampesi te karumaan ku ne me Hudiyu te tigtatelu ne pulu wey siyam (39) ne lampes.²⁵ Katatelu a lelampesi te matig-Ruma te tuked; kasabeka a bebatuwa, katatelu perem nalened ka barku ne inunturan ku, wey due timpu ne nalened-lened a diye te dahat te senge karusileman wey senge kaaldew.²⁶ Te me hipanawan ku, masalig ka me karereetan ne egkabayaan ku: me

baggiyu, me takawen, me karumaan ku ne me Hudiyu wey te kene ne me Hudiyu, diye te me siyudad, diye te mammara ne inged ne kene egkeugpaan, diye te dahat, wey diye te me suled ta te pegpalintutuu ne kene bes ne malehet. ²⁷ Mangune-kune ka peggimu ku taman te nabeley a, malasi ne kena a egpakalipereng, eggutasan a wey egkammaraan. Malasi ne ware egkakeen ku, wey egkaagsilan a tenged su kulang ka kumbale ku. ²⁸ Ne timul pad due, tagse aldew, amana a egkabehati te keugpe te me punduk te migmalintutuu. ²⁹ Ke due egmahuye, egkaheram ku degma ka kahuye din. Ne emun ke due neuyan te sale, egmangebel-ebel ka langet ku.

³⁰ Kena a egkeupian ne egpeggasal, piru emun ke keilangan ne eggimuwen ku sika, iyan ku re igpeggasal ka kahuye ku. ³¹ Nakataha ka Manama wey Amey te Magbebaye ne si Hisus ne kena a eg-uubat. Egdayanen sikandin te ware egtamanan. ³² Te diye e pad te Damasku, impatamengan te gubir-nadur ne sakup ni Hari Aritas ka gumawan te siyudad eyew te pegdakep keddiey. ³³ Piru intetahu a mule te liyang wey intutuntun a diye te bintana te alad te siyudad ne

matikang wey makepal, wey nakapallahuy e red kandin.

12

Ka impakita te Manama ki Pablu

¹ Keilangan ne egpabulus a iya ka egpeggasal minsan ware egkaangey ku rue. Igpanngguhud ku ke nekey ka impakita wey impataha te Manama keddiey. ² Due etew ne neila ku* ne migpal-intutuu ki Kristu ne imbatun diye te igkatelu ne langit, me sapulu e wey hep-at (14) ne leg-un ka miglihad puun kuntee. Wara a nakataha ke imbatun naan iya ka lawa rin wey ke panisingan din de, ka Manama re ka nakanengneng. ³ Eg-abayan ku te egkahi, nekeila a ke hentew-a etawa sika, piru wara a nakataha ke nekey-a ka imbatun, lawa rin naa wey ke panisingan din de, ka Manama re ka nakanengneng. ⁴ Iyan ku re natahaan ne imbatun iya sikandin diye te ugpaan te Manama, ne taheed te diyad e sikandin, due narineg din ne kene egkaayunan te eglalag, wey ware degma ituhut ne igpepangguhud. ⁵ Purisu egpeggasal a meyitenged te sika ne etew, piru kena a egpeggasal meyitenged te pegkeetew ku, ke kene, sikan de se kahuye ku. ⁶ Piru, emun ke egkeupian a perem

^{*} **11:32** Him 9:23-25. ^{*} **12:2** Ka etew ne egkahiyan ni Pablu kayi, sika se kandin mismu ne pegkeetew. Piru egkeepes sikandin ne egpeggasal te pegkeetew rin, purisu in-iling din de due te eglalag. Emun ke egbaseen ta ka v1, v6 wey v7, klaru ne sikandin mismu ka igpasabut din due.

ne egpeggasal, di, kena a egkeyimu ne ungel su malehet ma ka igpangguhud ku. Piru ware ku himuwa sika, tenged su kena a egkeupian ne matikang ka pegtengteng niyu keddi du te sika se egkakita niyu wey egkarineg niyu ne eglalahen ku.

⁷ Piru eyew kena a egpabekal te pakpak ku tenged te kein-inuwan ne nakita ku, imbehayan a te duhi ne inggamit ni Meibulan te pegbayad-bayad keddiey eyew kena a egpakaeggasal. ⁸ Katatelu a mighangyu te Manama ne eg-aween din e sika, ⁹ piru migkahiyan a nikandin, "Eleg e ka pegbulig ku keykew su egkakita ka geem ku due te kahuye nu." Sikan naa ka amana a egkahale ne egpeggasal meyitenged te kahuye ku, su eyew ka geem ni Kristu, egweil kayi te keddiey. ¹⁰ Purisu, egkabennalan ad e te me kahuye ku, te pglemet keddii, te keyirapan ku, te pegbayad-bayad keddii, wey te kalised ku tenged ki Kristu. Su emun ke mahuya a, nasi e naan manekal.

Ka pegkasasew ni Pablu te matig-Kurintu

¹¹ Impehes a nikaniyu ne egpeggasal iling te egkeungel-ungel. Eleg perem ne egdayanen a nikaniyu, su minsan ware iya karuan ku, kene e red degma ne ubus te seeye se egkahi ne labew kun sikandan ne apustulis. ¹² Te timpu ne duen e pad te kaniyu, nakita

niyud e ne malehet a iya ne apustulis, impeuyan a mismu te Manama. Su innimu ku te mapariralemen ka me kein-inuwan wey me palinneu due te kaniyu. ¹³ Ka innimu ku due te kaniyu, iling ded te innimu ku diye te duma ne punduk te migmalintutuu, gawas de te wara a mule migpabulig kaniyu. Pasayluwe e re te seyyup ku!

¹⁴ Na, seinid e ka igkateku ne timpu ne andam a ne eggendue te kaniyu. Ne kena a egkeupian ne egpabulig kaniyu, su kena a egkeinniyat te me karatuan niyu, ke kene, sikaniyu mismu ka igkeinniyat ku. Su kene ne iyan eg-uyag te iney wey amey ka me anak, ke kene, ka iney wey amey ka eg-uyag te me anak dan. ¹⁵ Egkahala a ke igpakabehey ku ka karatuan ku wey ka kanekal ku eyew te pegbulig kaniyu. Piru minsan pad ke indakelan ku sikaniyu te geyinawa, mani buwa mule te deisek de ka geyinawa niyu keddii?

¹⁶ Due duma ne eg-uyun ne wara a neyimu ne mabehat due te kaniyu. Piru due migkahi ne maalistu e kun wey miglimbungan ku kun sikaniyu. ¹⁷ Piru te nekey ne paahi? Inlupihan kew te seeye se impeuyan ney due te kaniyu? ¹⁸ Imbanasalan ku si Titu ne eggendiye te kaniyu, wey imparumaan ku sikandin te suled ta te pegpalintutuu. Ne kene kew

egpakakahi ne inleig-leig kew nikandin, wey ke ware nekeg-iling ka himu ney wey ka katuyuan ney.

¹⁹ Kahiyan niyu buwa ne iyan ney iglalag te iling due ne menu eg pangatarengan key? Kene ne iling due! Me pinalangge, sikanami se nasabeka due ki Kristu, eglalahen ney sikaniyu kayi te tangkaan te Manama ne ware lein ne tuyu ney, ke kene, ka peglig-en de iya kaniyu. ²⁰ Egkaaldek a ne kema ke peggenduen ku, kene ku igkeupii ka eggimuwen niyu, wey kene niyu degma igkeupii ka keddiey ne eggimuwen. Egkaaldek a ne kema ke due egpeehetey, egpekeg-imma, egkabelu, egpalelehed, egiran-iran, egsesalupet, eg-peggasal, wey due samuk. ²¹ Egkaaldek a man-e, su kema ke peglived ku due te kaniyu, egpeyilawan a te Manama tenged kaniyu. Ne kema ke egpakesinehew a tenged su masalig ka nakasale dengan ne ware mig-inniyug te lilinditi ne hinimuwan dan, te pegpey-ibhilabetey ran ne kene ne alunggun, wey te mekeyilew-hilew ne hinimuwan dan.

13

Ka katammanan ne pegpanulu wey pegpangemusta

¹ Seini ka igkatelu ne peggenduen ku te kaniyu. Ne sumale te nasulat te Kasulatan, "Ka minsan nekey

ne sumbung, keilangan ne egkapamalehetan te daruwa wey ke tatelu naa ne talagpamalehet." ² Tapey kud e panpanayi sikaniyu te seeye se igkarangeb ne peggenduen ku. Ne kuntee, eg-abayan ku man-e te eglalag taheed te wara a due: kayi te peglived ku man-e due, egparusaan ku iya seeye se nenakasale dengan, wey seeye degma se duma. ³ Eggimuwen ku seini su egkeupian kew ne egkapamalehetan ne diye iya egpuun te ki Kristu ka inlalag ku. Maresen sikandin wey kene ne mahuye ne egweil due te kaniyu. ⁴ Su minsan ke inlansang sikandin te krus tenged te kahuye din, piru neuyag sikandin tenged te geem te Manama. Ne sikanami degma, nakaheram key te kahuye tenged te pegasabeka ney kandin, piru tenged te geem te Manama, egkeuyag key duma kandin eyew egpaketbulig kaniyu.

⁵ Ug-ugsiya niyu ka pegkeetew niyu eyew te pegtengteng ke malehet naan en iya ka pegpalintutuu niyu. Keilangan ne eg-elehan niyu ka pegkeetew niyu! Nakanengneng kew e ne duen e si Kristu te kaniyu, gawas de ke kene ne malehet ka pegpalintutuu niyu. ⁶ Eg-iman-iman a ne egkanengnengan niyu ne malehet a iya ne apustulis. ⁷ Eg-ampu key te Manama ne kene kew eggimu te mareet. Ne kene ne iyan ney ig-

ampu te iling due ne menu egpapitew key ne migmalampusen ka himu ney due te kaniyu, ke kene, eyew egpekeyimu kew ke nekey ka eleg minsan ke henduen kun te kene key ne malehet ne apustulis. ⁸ Su kene key egpekeyimu te minsan nekey ne supak te kamalehetan, ke kene, sikan de iya se pegsawed te kamalehetan. ⁹ Su igkahale ney ke mahuye key ne manekal kew mule. Ne eg-ampu key ne egkabalbalawan ka pegbebasan niyu eyew ware igkarew-ey. ¹⁰ Insulat ku seini te kene e pad egpekeendue, su eyew pegginguma ku due, kena ad ne mapahenget ne eggamit te katenged ku ne imbehey te Magbebaye keddiey—katenged te peglig-en kaniyu, ne kene ne pegdereet kaniyu.

¹¹ Te katamanan me suled, kahale kew. Ay-ayari niyu ka pegbebasan niyu wey sahipaa niyu ka hangyu ku. Sabeka kew wey ugpe kew ne malinawen. Ne emun ke eggimuwen niyu sika, ka Manama ne egpuunan te geyinawa wey keupianan ka egduma kaniyu.

¹² Pegpangemusteey kew ka tagse sabeka te pegpapitew ne migpaheyinaweeey kew.*

Ne ka langun ne keet-etawan te Manama, egpange-musta degma kaniyu.

¹³ Ka keupiya wey keyidu te Magbebaye ne si Hisu Kristu, ka geyinawa te Manama, wey ka pegasbeka niyu te Panisingan te Manama, egkaangken niyu langun.†

* **13:12** Te Grigu: matulus ne peggarek. † **13:13** Diye te duma ne sinulat, imbaad-baad ka birsikulu 12, neyimu e ne birsikulu 12 wey 13. Ne ka birsikulu 13, diyad e te birsikulu 14.

Ka Sulat ni Pablu te Matig-Galasya

Igpewun-a

Te timpu ne imbunsuran e te pegwali ka Meupiya ne Panugtulen meyitenged ki Hisus, wey te indawat e te kene ne me Hudiyu, duen e miggingga ne inse. Iyan inse ne keilangan kun naa ne eg-ikul iya te Balaud ni Muwisis ka etew eyew egkeyimu sikandin ne malehet ne migpalintutuu. Mig-apul si Pablu te kene ne keilangan sika su ka pegpalintutuu re ka malehet ne egpuunan te umul due ki Kristu, ne pinaahi rue egkeyimu ne eleg diye te tangkaan te Manama ka etew. Piru diye te me punduk te migmalintutuu te Galasya, ka sabeka ne prubinsya te Ruma diye te Asya Minur, due me etew ne migsupak ki Pablu wey migpalintutuu ne ka etew keilangan ne egtuman iya te Balaud ni Muwisis eyew egkeyimu ne eleg diye te tangkaan te Manama.

Ka seini ne *Sulat ni Pablu te Matig-Galasya*, insulat din eyew egpikalibed diye te malehet ne pegpalintutuu se-eye se me etew ne neuyan te kene ne malehet ne pegpanulu. Imbunsuran din seini pinaahi te pegpangguhud din ke nekey ka egpuunan ne neyimu sikandin ne apustulis. Migpamalehet sikandin ne kene ne diye egpuun te geem te me etew

ka pegkaapustulis din su diye iya te Manama wey labew te langun, diye sikandin ipeuyan te Manama te kene ne me Hudiyu. Ne dutu, migpakanekal sikandin ka egpakig-apul ne warelein ne paahi ne egkeyimu ne eleg diye te tangkaan te Manama ka me etew, gawas te pegpalintutuu re iya.

Diye te katammanan ne me kapitulu, intabak din seeye se migkahi te maretet kun ke kene egtuman te Balaud ka sabeka ne etew. Migkahi si Pablu te makaaldek-haldek ke engked sikandan te keupiya wey keyid-u te Manama ne egpeuripen te Balaud ni Muwisis. Migtambahan din man-e sikandan te keilangan ne egpasakup sikandan te Panisingan te Manama eyew egkabalbalawan sikandan wey kenad egpekeikul te igkeupii te lawa ran ne makasesale.

Ka nasulat te seini ne baseen

Igpewun-a 1:1-10

Ka katenged ni Pablu isip apustulis 1:11-2:21

Ka Meupiya ne Panugtulen te keupiya wey keyid-u te Manama 3:1-4:31

Ka Kristuwanen ne kaligwangan wey katenged 5:1-6:10

Ka katammanan 6:11-18

¹ Sikeddiey si Pablu ka migpeuyan te seini ne sulat-sabeka a ne apustulis. Ka pegkaapustulis ku, kene ne diye egpuun te etew wey

ke pinaahi naa te etew, ke kene, pinaahi ki Hisu Kristu wey te Manama ne Amey ne mig-uyag kandin.² Egpangemusta a kaniyu te migmalintutuu due te nalein-lein ne me punduk te migmalintutuu diye te Galasya, wey egpangemusta degma kaniyu ka langun ne me suled ta kayi.

³ Ka keyid-u wey keupianan ne egpuun te Manama ne Amey ta wey te Magbebaye ne si Hisu Kristu, egkaangken niyu.

⁴ Meyitenged ki Kristu, migpeyimatey sikandin para te me sale ta eyew egkaluwas ki te seini se mareet ne timpu, sumale te pegbuut te Manama ne Amey ta.

⁵ Ka langun ne kabantug, kandin de iya te Manama te ware egtamanan. Uya, malehet iya.

Sabeka re ka Meupiya ne Panugtulen

⁶ Neinu-inu a ke mania te mahaan niyu re inniyuhi ka Manama ne iyan migalam kaniyu pinaahi te keupiya wey keyid-u ni Kristu, ne migpalintutuu kew e te lein ne paahi te kaluwasan ne meupiya kun ne panugtulen. ⁷ Piru ka malehet, sabeka re iya ka Meupiya ne Panugtulen. Ne due me etew ne egkeupian ne egbehey kaniyu te kalibeg wey egkeupian perem ne egdereet te Meupiya ne Panugtulen meyitenged ki

Kristu. ⁸ Piru minsan pad ke sikanami wey ke panalihan naa ne diye egpuun te langit ka egwali meyitenged te lein ne paahi te kaluwasan ne nakasuwney te inwali ney kaniyu, igdilus sikandin te Manama.⁹ Sumale te ingkahi ney dengan, wey egliberen ku pad man-e kuntee te egkahi, ka minsan hentew ne egwali kaniyu te iling due ne ware nekeiling te narawat niyud, igdilus sikandin te Manama.

¹⁰ Kene kew suman-suman ne egkeupian a ne egdayanen te me etew. Kene iya! Su iyan ku igkeupii ne egkahale ka Manama keddi. Emun ke iyan ku pa igkeupii ne egkahale te me etew, kena a ne malehet ne uripen ni Kristu.

Ka Manama ka migbehey te katenged ki Pablu

¹¹ Me suled, egkeupian a ne egpakanengneng kew, ne ka Meupiya ne Panugtulen ne inwali ku kaniyu, kene ne panugtulen de te etew. ¹² Ware ku seini narawat puun te etew wey ke impanulu naa keddiey, ke kene, si Hisu Kristu ka migpataha kayi te keddiey.

¹³ Nakataha kew e ke nekey ka batasan ku dengan te timpu ne mig-ikule pad te tuluuwen te me Hudiyu. Migtamtamanan ku te migbayad-bayad ka migpalintutuu ki Kristu wey mig-el-elehan ku sikandan te migdereet. ¹⁴ Te kasuluhan te me Hudiyu ne iling ku re

te idad, sikeddiey ka amana migtuman te Balaud ney, wey migpakanekal a ne egikul te langun ne tuluuwen te me kaap-apuan ney.

¹⁵ Piru te ware e pad miglesut, tapey ad e alama te Manama wey in-umew a nikandin pinaahi te keupiya wey keyid-u rin. ¹⁶ Te timpu ne egkeupian e ka Manama ne igpeila rin keddiey ka Anak din eyew egpakawali a meyitenged te Anak din diye te kene ne me Hudiyu, wara a migbuyu te tambag te minsan hentew. ¹⁷ Ne wara a degma miggendiye te Hirusalim ka egpakigkita te seeye se me apustulis ne nekewun-a kedi, su nasi a miggendiye te Arabya wey nataman, miglibed ad man-e diye te Damasku. ¹⁸ Ne wey ad miggendiye te Hirusalim eyew te pegpanumbaley ki Pidru ke miglihad e ka tatelu ne leg-un, wey diye e pad mig-ugpe duma kandin seled te sapulu wey lalimma (15) ne aldew. ¹⁹ Ne ware lein ne nakita ku dutu ne apustulis gawas ki Santiyagu ne suled te Magbebaye.

²⁰ Ne kuntee, ka langun ne eglalahen ku kaniyu, malehet iya wey nakataha ka Manama te wara a mig-uubat.

²¹ Nataman, miggendiye ad e te prubinsya te Sirya wey diye te prubinsya te Silisya. ²² Te seeye ne timpu, ware pad nakakita keddiey

ka migmalintutuu te Hudiya ne migmalintutuu ki Kristu. ²³ Ne iyan de narindeg nikandan ka guhuren, “Ka etew ne migbayad-bayad dengan kanta, egwali e kuntee meyitenged te kamalehetan ne mig-el-elehan din perem te egdereet dengan.” ²⁴ Ne dutu, indayan dan e ka Manama tenged keddiey.

2

Ka pegdawat te me apustulis ki Pablo

¹ Nataman, te peglihad e te sapulu wey hep-at (14) ne leg-un, miglibed ad e man-e diye te Hirusalim duma ki Birnabi, wey induma ku degma si Titu. ² Iyan ku im-pekeendiye su due impakita te Manana ne keilangan ne egkeendyaan ku. Pegginguma ku diye, migtugtuhesan ku te egpakigkita seeye se in-ila ne me pangulu diye, wey impasabut ku sikandan meyitenged te Meupiya ne Panugtulen ne igwali ku red diye te kene ne me Hudiyu. Innimu ku seini su eyew kene egkeyimu ne ware karuan te impeyimu te Manama keddiey. ³ Ne nabennalan sikandan, su minsan si Titu se induma ku ne sabeka ne Grigu, ware dan pehesa ne egpatuli sumale te Balaud te Hudiyu. ⁴ Piru due duma ne egkeupian ne egkatulian sikandin. Ka sika ne me etew, miggeles-heles de ne migapil-apil te migmalintutuu

su eg-iipat te kaligwangan ne naangken ta puun ki Kristu Hisus, su egkeupian sikandan ne egkeuripen ki te Balaud.⁵ Piru ware key migparuma-ruma kandan te minsan deisek, su eyew kene egkaawe due te kaniyu ka kamalehetan meyitenged te Meupiya ne Panugtulen.

⁶ Ne ware ingkatimul te pegpanulu ku te seeye se me etew ne in-ila ne me derakel ne me pangulu. Te keddi ne isip, ware kaleinan ke nekey sikandan su nekegiling key re diye te tangkaan te Manama.⁷ Ne nakita ran ne sikeddiey ka insalihan te Manama te pegpangguhud te Meupiya ne Panugtulen diye te kene ne me Hudiyu, iling ki Pidru te insalihan degma te pegpangguhud te Meupiya ne Panugtulen diye te me Hudiyu.⁸ Su ka Manama ne iyan migweil diye te ki Pidru ne egpaapustulis diye te me Hudiyu, ka migweil degma kayi te keddiey ne egpaapustulis diye te kene ne me Hudiyu.⁹ Ne si Santiyagu, si Pidru, wey si Huwan, ka in-ila ne me pangulu diye. Pegkanengnengi ran te inalam a te Manama para te seini ne himu, indawat key nikandan ki Birnabi isip duma ran te himu. Mig-uyun sikandan ne eggimu key diye te kene ne me Hudiyu, taheed te egpabulus degma sikandan te himu ran diye te me Hudiyu.¹⁰ Sabeka re

ka inhangyu dan kanami ne egbulihan ka egkengaayayu, wey sika iya degma ka igkeupii ku ne eggimuwen.

Ka pegraspad ni Pablu ki Pidru

¹¹ Piru te pegginguma ni Pidru diye te siyudad te Antiyukiya, in-atubang ku sikandin te egsapad su amana ne seyyup ka innimu rin.¹² Su te ware pad nanginguma ka me etew ne diye egpuun ki Santiyagu, nalayam sikandin ne egkeen duma te kene ne me Hudiyu. Piru te peggingume e te me etew, migsuwey-suwey e sikandin te kene ne me Hudiyu wey warad migkeen duma kandan su naaldek ke nekey ka igkalalag te seeye se egpehes ne eg-ikul te Balaud* ka migmalintutuu.¹³ Ne ka duma degma ne me Hudiyu ne migmalintutuu, mig-iling e ki Pidru te egpapitew-pitew re, ne puun due, nakaalak e degma si Birnabi kandan te egpapitew-pitew re.¹⁴ Te pegkakita ku ne ware sikandan mig-ikul te kamalehetan meyitenged te Meupiya ne Panugtulen, migkahiyan ku si Pidru diye te tangkaan te langun, "Sabeka ke ma perem ne Hudiyu, piru ware nekeiling te Hudiyu ka pegbebasan nu su diye nekeiling te kene ne Hudiyu. Ne mania te egpehesen nu sikandan ne eg-ikul te batasan te Hudiyu?"

2:6 Diy 10:17. * **2:12** Te Grigu: egpatuli

*Egkaluwas ka etew
pinaahi te pegpalintutuu*

15 "Sikanami, neetew key ne Hudiyu, ne kene key ne iling te me etew ne kene ne me Hudiyu ne ware nakanengneng te Balaud te Manama. 16 Piru nakataha key ne kene eg-isipen te Manama ne matareng ka etew pinaahi te pegtuman te Balaud, ke kene, pinaahi te pegpalintutuu ki Hisu Kristu. Ne sikanami naa degma, migpalintutuu key ki Kristu Hisus eyew eg-isipen key te Manama ne matareng pinaahi te pegpalintutuu ney kandin, kene ne pinaahi te pegtuman te Balaud, su ware sabeka ne etew ne eg-isipen te Manama ne matareng pinaahi te pegtuman te Balaud. 17 Ne emun ke eg-eleg-eleg ki ne eg-isipen te Manama ne matareng pinaahi ki Kristu, egkatahaan ney ne makasesale key red. Ke iling ma rue, egpakakahi ki naan pad te si Kristu ka egpaketulud te peggimu te sale? Kene iya egkaayun! 18 Emun ke igpesek ku red seeye se ingguhus kud, migpamalehetan ku re iya ne makasesale a. 19 Su ka Balaud te Manama ka nakapanulu keddi ne kena a egkaluwas pinaahi te pegtuman ku kayi. Ne hendue te migpatey ad e pinaahi te Balaud su eyew egkeuyag a para te Manama. 20 Inlansang ad e duma ki Kristu. Neuyag a kuntee piru

kenad e ne sikeddi pad ka neuyag, ke kene, si Kristu e ka neuyag kayi te keddiey. Ne taheed te neuyag a kayi te ampew te tane, egpalintutuu a te Anak te Manama, ne iyan miggeyinawa keddi wey migpeyimatey para keddi. 21 Sikan naa, kene ku eg-engkeran ka keyidu te Manama, su emun ke egkaayun perem ne eg-isipen te Manama ne matareng ka etew pinaahi te Balaud, ware bes perem karuan te pegpeyimatey ni Kristu!"

3

Kene ne Balaud ka eg-pakaluwas su ka pegpalintutuu

¹ Etuwey kaniyu me matig-Galasya, egkeungel kew iya! Mania te migpalintutuu kew te me etew ne miglimbung kaniyu? Naay-ayaran kud ma perem sikaniyu nahuhuri meyitenged te kamatayen ni Hisu Kristu diye te krus. ² Seini re ka igkeupii ku ne egkanengnengan puun kaniyu: "Narawat niyu naa ka Panisingan te Manama pinaahi te pegtuman niyu te Balaud, wey ke pinaahi te pegpalintutuu niyu te narineg niyu ne guhuren? ³ Egkeungel kew bes iya! Migbunsud kew e ne egtuman te Panisingan te Manama, ne kuntee, egkeupian kew e man-e ne egkamatareng pinaahi te kanekal niyu? ⁴ Menua, ware

karuan te nabayaan niyu? Kene egkaayun ne ware karuan due. ⁵ Ka malehet, imbehayan kew te Manama te Panisingan din wey due me kein-inuwan ne innimu rin due te kaniyu. Ware din himuwa sika tenged su mig-ikul kew te Balaud, ke kene, innimu rin tenged su migpalintutuu kew te narineg niyu.

⁶ Na, tengtengi niyu si Abraham, su sumale te Kasulatan, "Migpalintutuu sikandin te Manama, ne puun due, in-isip sikandin te Manama ne matareng." ⁷ Purisu, seeye se langun ne migpalintutuu wey migsalig te Manama, kabuhalan iya ni Abraham. ⁸ Sumale te Kasulatan, tapey e ne migplanu ka Manama ne eg-isipen din ne matareng ka kene ne me Hudiyu pinaahi te pegpalintutuu ran. Sikan naa, impanengneng e te Manama ki Abraham ka Meupiya ne Panugtulen te migkahi, "Egkapanalanginan ka langun ne me tribu pinaahi keykew." ⁹ Purisu ka langun ne egpalintutuu te Manama iling te pegpalintutuu ni Abraham te Manama, epanalanginan degma iling kandin.

¹⁰ Piru ka langun ne egsalig te pegtuman dan te Balaud, igdilus te Manama. Su nasulat e diye te Kasulatan, "Igdilus te Manama ka tagse sabeka ne kene

egtuman te minsan nekey ne nasulat diye te baseen te Balaud." ¹¹ Purisu, amana ne klaru ne ware sabeka ne eg-isipen te Manama ne matareng diye te tangkaan din pinaahi te pegtuman te Balaud. Su nasulat diye te Kasulatan, "Egkeuyag ka etew ne eg-isipen te Manama ne matareng pinaahi te pegpalintutuu rin." ¹² Ka pegtuman te Balaud, ware labet te pegpalintutuu, su nakahi e ne, "Egkeuyag ka etew ke egtumanen din ka intiru ne Balaud."

¹³ Inlekat ki ni Kristu puun te dilus tenged su ware ki migtuman te Balaud. Ne sikandin e ka indilus ne liwan kanta, su nasulat e ne, "Igdilus te Manama ka minsan hentew ne egbittenin diye te kayu." ¹⁴ Inlekat ki ni Kristu Hisus su eyew ka panalangin ne imbehey ki Abraham nekeendiye degma te langun ne kene ne me Hudiyu, su eyew pinaahi te pegpalintutuu ki Hisus eg-pakarawat ki te Panisingan te Manama ne insaad din.

Ware naawe te Balaud ka saad te Manama

¹⁵ Me suled, egbehayan ku sikaniyu te panunggilangan ne egpuun te aldew-aldew ne egkeula-ula: ke due kasabutan ne innimu te me etew, ware minsan hentew ne egpakahuhus kayi wey egpakatimul. ¹⁶ Na, iling naan ded degma te

3:6 Hin 15:6; Rum 4:3. **3:7** Rum 4:6. **3:8** Hin 12:3. **3:10** Diy 27:26 (LXX).
3:11 Hab 2:4. **3:12** Lib 18:5. **3:13** Diy 21:23. **3:13** Huswi 10:26-27.

pegsaad te Manama diye te ki Abraham. Migsaad ka Manama kandin wey diye te kabuhalan din. Ne ware migkahi ka Kasulatan, “ka me kabuhalan nu” ne igpasabut due masalig naa, ke kene, ka ingkahi rin, “ka kabuhalan nu.” Sabeka re ne etew ka igpasabut din ne iyan sika si Kristu.¹⁷ Seini ka igpasabut ku rue: miggimu ka Manama te kasabutan wey migsaad ne egtumanen din iya sika. Innimu rin sika te ware pad ka Balaud, su me 430 pad ne leg-un ka miglihad ne henduen din ibehey ka Balaud. Piru kene sika egpakahuhus te kasabutan wey egpakaawe te saad te Manama.¹⁸ Su emun ke pinaahi re te pegtuman te Balaud ne henduen pad egkarawat ka dasag, kene naa ne saad ka egpuunan due. Piru tenged te keupiya wey keyid-u te Manama, imbehey rin sika diye ki Abraham pinaahi mule te saad din.¹⁹ Na, ke iling ma rue, nekey bes iya ka katuyuan te Balaud? Intimul sika su eyew igpapitew te me etew ne makasesale sikan-dan. Piru ka seini ne Balaud, egkataman de te timpu ne eggigume e ka kabuhalan ni Abraham ne insaaran te Manama. Imbehey sika se Balaud pinaahi te me panalihan din, wey sikandan e degma ka migbehey diye te me etew pinaahi te seeye se tigpataliware.

²⁰ Piru ke sabeka re ka eggimu te kasabutan, kene ne keilangan ne due tigpatali-ware, ne ka Manama sabeka re iya.

Ka katuyuan te Balaud

²¹ Ne kuntee, kema ke egsuman-suman kew ne ka Balaud supak te me saad te Manama. Kene iya! Su ke duen pa imbehey ne Balaud ne egpakabehey te umul, egkeyimu perem ne matareng ka me etew diye te tangkaan te Manama pinaahi due.²² Piru nasulat e diye te Kasulatan ne neuripen te sale ka langun ne etew, purisu ka pegpalintutuu re ki Hisu Kristu ka paahi ne egkarawat ta ka insaad te Manama.

²³ Te ware pad miggigunga seini se egngararan te pegpalintutuu, hendue te intamengan ki te Balaud wey naprisu, taman te miggigunge e si Kristu wey migpalintutuu kid e kandin.²⁴ Purisu ka Balaud ka migtameng kanta taman te miggigunge e si Kristu, eyew eg-isipen ki te Manama ne matareng pinaahi te pegpalintutuu ta kandin.²⁵ Ne kuntee te miggigunge e ka pegpalintutuu, ware kid e natamengi te Balaud.

²⁶ Su pinaahi te pegpalintutuu, sikaniyu langun neyimu kew ne me anak te Manama te pgsabeka niyu ki Kristu Hisus.²⁷ Su sikaniyu langun nasabeke e diye ki Kristu

pinaahi te bewutismu; hendeue te insaluub niyud e si Kristu.²⁸ Ne warad e Hudiyu wey kene ne Hudiyu, uripen wey kene ne uripen, lukes wey malitan, su nasabeka kew e diye ki Kristu Hisus.²⁹ Emun ke nasakup kew e ni Kristu, me kabuhalan kew naa ni Abraham, wey egpakarawat kew te saad te Manama kandin.

4

¹ Seini ka igpasabut ku: taheed te bate pad ka egpakarawat te karatuan te amey, nekeiling de sikandin te uripen minsan sikandin ka kamuney te langun ne karatuan.² Due me etew ne egtanggu kandin wey eg-uyan te karatuan din taman te eggingga ka timpu ne ingkerew te amey rin.³ Ne iling naan ded degma, denga te bate pad ka pegpalintutuu ta, * neuripen ki te me panisingan ne migmandu te kalibutan.⁴ Piru te peggingume e te malehet ne timpu, impeuyan e te Manama ka Anak din. Naanak sikandin te sabeka ne malitan wey mig-ugpe sikandin ne nasakup te Balaud ni Muwisis.⁵ Impeuyan sikandin te Manama eyew te pglekat te seeye se neuripen te Balaud, su eyew egkeyimu ki ne anak mismu te Manama.

⁶ Ne puun su me anak kew e te Manama, migpeuyan sikandin te Panisingan te

Anak din kayi te me pusung ta, ne egpaketangumew kid e ne eggendue, "Ame!"⁷ Purisu ka tagse sabeka kaniyu, kenad e ne uripen, ke kene, anak e te Manama. Na, puun su anak kad e nikandin, egkaangken nud e ka karatuan ne intahahe te Amey.

Ka pegkalaggew ni Pablu te matig-Galasya

⁸ Dengan, te ware kew pad nekeila te Manama, neuripen kew pad te me diyus-diyus.⁹ Piru kuntee te nekeila kew e te Manama (wey ke egkahiyan ku buwa, te nekeile e ka Manama kaniyu), mania te eglid kew e man-e te mahuye wey ware karuan ne panisingan? Egpaabey kew man-e eg-peuripen kandan?¹⁰ Amana kew egbantey te me mahal ne aldew, me bulan, me timpu, wey me leg-un.¹¹ Naaldek a ne kema ke egkeyimu ne ware karuan te ingkalasey ku due te kaniyu.

¹² Me suled, eghangyu a kaniyu ne eg-iling keddiey te warad neyiketi te Balaud, su mig-ilingan ku ma degma sikaniyu se kene ne me Hudiyu. Ware neyimu niyu ne mareet kayi te keddiey.

¹³ Nakanengneng kew e ne tenged te pegderalu ku, nakawali a te Meupiya ne Panugtulen te an-anayan ne timpu due te kaniyu.¹⁴ Ne minsan nakamabehat kaniyu ka pegderalu ku, piru

3:29 Rum 4:13. *** 4:3** Wey ke: te ware ki pad migpalintutuu. **4:5** Rum 8:15-17.

wara a nikaniyu lemeti wey le-leiha, su nasi a nikaniyu dawata iling te sabeka ne panalihan te Manama. Indawat a nikaniyu ne iling te si Kristu Hisus ka indawat niyu.¹⁵ Amana kew nahale dengan. Ne kuntee, namenu kew naan e? Sikeddiey mismu ka egpakapamalehet te dengan, ke egkaayun pad ne eglekaten niyu ka mata niyu, igbehey niyu buwad e keddiey.¹⁶ Na, kuntee in-isip ad e nikaniyu ne kuntere niyu puun su egpangguhuran ku sikaniyu te kamalehetan?

¹⁷ Meyitenged te seeye se migpanulu kaniyu te kene ne malehet, amana iya egkasasew kaniyu eyew iling kew red degma diye te kandan, piru kene bes ne meupiya ka tuyu dan. Igkeupii ran ne egpariyu kew e keddi su eyew sikandan naan de ka egdapihan niyu.
¹⁸ Kene ne mareet ke due egkasasew, ke meupiya re ka tuyu wey ke egparahas ka iling due minsan ke duen a wey se ware.¹⁹ Me pinlangge ku ne me anak! Nakaheram a te masakit ne iling kasakit te eglesutan tenged su nasakitan ad e man-e meyitenged kaniyu. Egpabulus ka masakit ne eggeramen ku taman te egkeyimu kew e ne matesan diye ki Kristu.²⁰ Egkeupian a perem ne egpekeenduen a kuntee te kaniyu, su eyew egkaay-ayaran ku te eglalag-

lalag kaniyu, tenged su nabenga-benga ad e kaniyu!

Innimu ne panunggilingan si Hagar wey si Sara

²¹ Nangeni a, sikaniyu se egkeupian ne egpasakup te Balaud, nakataha kew iya ke nekey ka ingkahi diye te Balaud?²² Nasulat diye te Kasulatan ne due daruwa ne anak ni Abraham, naanak din ka sabeka diye te uripen din ne si Hagar, ne ka dangeb, naanak din diye te kene ne uripen ne si Sara.²³ Ka anak din te uripen neetew sumale te pegbuut te etew. Piru ka anak din te kene ne uripen, neetew sumale te insaad te Manama ki Abraham.²⁴ Seeye se daruwa ne malitan, impeiling te daruwa ne kasabutan te Manama. Ka uripen ne si Hagar, impeiling te kasabutan ne imbehey te Manama te me etew diye te Bubungan te Sinay ne diye te Arabya. Seeye ne Balaud ka nakapeuripen kandan.²⁵ Ne si Hagar, impeiling man-e te siyudad te Hirusalim kuntee, tenged su ka me Hudiyu dutu ne migsalig te Balaud ni Muwisis, neuripen te sika ne Balaud.²⁶ Piru si Sara, ka kene ne uripen, nekeiling te Hirusalim ne diye te langit. Ne sikandin ka iney ta.²⁷ Su nasulat diye te Kasulatan ne miggendue:

“Gale-gale ka, ka malitan ne
kene egpakaanak.
Panguleyi ka te kahale,
sikeykew se kene eglesutan.

Uya su ka malitan ne eg-
engkeran,
egpakaanak te subla pad
ne masalig

du te malitan ne due asawa.”

²⁸ Ne sikaniyu me suled, egpekeiling kew ki Isaak, tenged su naanak kew sumale te insaad te Manama. ²⁹ Te seeye ne timpu, ka anak ne neetew sumale te pegbuut te etew, migbayad-bayad te seeye se neetew pinaahi te Panisingan te Manama. Ne iling ded seini kuntee, imbaybayaran ki te seeye se mapahetpet ne egtuman te Balaud. ³⁰ Piru nekey-a ka ingkahi te Kasulatan? Migkahi, “Igpaawe ka uripen duma te anak din, su ka anak te uripen kene egkabaaran te karatuan ne egkaangken te anak te seeye se kene ne uripen.” ³¹ Purisu me suled, kene ki ne anak te uripen, ke kene, me anak ki te kene ne uripen.

5

Ka kaligwangan te migma- lintutuu

¹ Na, imbehayan ki ni Kristu te kaligwangan, purisu pakannekal kew eyew kene kew egkeuripen man-e te Balaud.

² Tantanuri niyu seini se iglalag ku! Sikeddiey si Pablu ka eglalag kaniyu te emun ke egpatuli kew pad eyew egmatareng kew diye te tangkaan te Manama, ware naa karuan ni Kristu diye te

kaniyu. ³ Eg-abayan ku mane eglalaha diye te tagse lukes ne egkeupian ne egpatuli, ne keilangan degma ne egaminen din iya te egtuman ka Balaud. ⁴ Sikaniyu se mig-eleg-eleg ne eg-isipente Manama ne matareng pinaahi te pegtuman te Balaud, mig-engkeran niyud e si Kristu wey nakapariyu kew e te keupiya wey keyidu te Manama. ⁵ Piru sikanta, egpallateng ki ne egmataren-gen ki te Manama pinaahi te Panisingan te Manama wey te pegpalintutuu ta. ⁶ Su puun te nasabeka kid e diye ki Kristu Hisus, kene ne keilangan ke natuli ki wey se ware. Iyan de keilangan ne ka pegpalintutuu ta, egkakita pinaahi te geyinawa ta.

⁷ Dengan, mig-ikul kew e te kamalehetan, * ne kuntee, hentew-a ka nakapasuwey kaniyu te pegtuman due?

⁸ Kene ne ka Manama ka nakapasuwey kaniyu, su sikandin ka mig-alam kaniyu

eyew egpakapalintutuu kew.

⁹ Malehet ka nakahi ne, “Minsan deisek de ka igpatulin, egpakkapatulin sika te inluyang ne harina.” ¹⁰ Piru migsalig a te Magbebaye ne iyan niyu iya eg-ikulen ka impanulu ku kaniyu. Ka etew ne migbehey te kalibeg kaniyu, eglegparan te Manama, minsan hentew pad sikandin.

¹¹ Meyitenged keddiey me suled, ke malehet pa ne

4:29 Hin 21:9. **4:30** Hin 21:10. * niyu te lumba.

5:9 1Kur 5:6.

5:7 Te Grigu: meupiye e ka pegpallahuy

migpabulus a ka egwali te keilangan ne egpatuli ka etew, mania te egbaybayaran e red? Ke malehet pa sika, kene perem egpaketabelu kandan ka pegwali ku meyitenged te krus ni Kristu. ¹² Emun naa su seeye se me etew ne nakapalibeg kaniyu, kene de ne egpatuli su egpakepun e perem!

¹³ Me suled, in-alam kew te Manama eyew egpakaangken te kaligwangan. Piru kene niyu himuwa sika ne aliddanan eyew egkatuman niyu ka igkeupii te lawa niyu ne makasesale, ke kene, pabulihey kew puun te migpaheyinaweeey kew ka tagse sabeka. ¹⁴ Su ka intiru ne Balaud, natuman e pinaahi te sabeka re ne lalag, "Geyinawei niyu ka sumballey niyu iling te peggeyinawa niyu te lawa niyu." ¹⁵ Piru ke egmakagkahatey wey egmatektekebey kew ka tagse sabeka, bantey kew su kema ke egkareetan ka tagse sabeka kaniyu.

Ka mig-ikul wey ware mig-ikul te Panisingan te Manama

¹⁶ Seini ka iglalag ku kaniyu: paruma-ruma kew te Panisingan te Manama eyew kene kew egpekeyimu te igkeupii te lawa niyu ne makasesale. ¹⁷ Su ka igkeupii te lawa ne makasesale ne supak te igkeupii te Panisingan te Manama, wey ka igkeupii te Panisingan te Manama supak te igkeupii te

lawa ne makasesale. Kene egpekegtuleddu seini se daruwa, purisu kene kew egpekeyimu te igkeupii niyu perem ne eggimuwen. ¹⁸ Piru ke iyan eg-uyan kaniyu ka Panisingan te Manama, kene kew e egkasakup te Balaud.

¹⁹ Malemu re ne eg-ileen ka hinimuwan te lawa ne makasesale: egpeyilabetey se kene ne alunggun, eggimu te malindit, wey kene egpaketigkel te mareet ne me suman-suman dan. ²⁰ Egsimba sikandan te me diyus-diyus, talabarangan, egdumut te duma, usig, talikuren, mahaan egkabelu, egleig-leig te duma, iyan egpuunan te egmeksuwesuwey, wey egliblibulung ne sikandan de, ²¹ iimmeen, talewubug, egmaab-abirey, wey duma pad ne iling due ne eggimuwen. Egpapanayan ku sikaniyu, iling te pegpaney-paney ku dengan ne ka seeye se me etew ne eggimu te iling due, kene egpekeugpe te Migharian te Manama.

²² Piru ka behas te Panisingan te Manama iyan sika se peggeyinawa te duma, pegkahale, ware kasamuk, peg-antus, meupiya te duma, mabehey-behey, egkasalihan, ²³ mapariralemen, wey egpaketigkel te pegkeetew rin. Kene ne supak te Balaud ka iling due. ²⁴ Seeye se nasakup e ni Kristu Hisus, inlansang dan e diye te krus ka lawa ran ne makasesale

wey ka mareet ne igkeupi ran. ²⁵ Ne puun su imbehayan kid e te Panisingan te Manama te iyam ne umul, keilangan ne eg-ikul kid e kandin. ²⁶ Keilangan ne kene ki egpaambug wey egpangehet, wey egkeimma.

6

Egpabulihey ka tagse sabeka

¹ Me suled, ke due sabeka kaniyu ne neuyan te sale, sikaniyu se namanduan e te Panisingan te Manama ka eg-palibed kandin piru ay-ayari niyu. Ne bantey kew naa su kema ke egkatintal kew degma. ² Pabulihey kew ka tagse sabeka te me keyirapan niyu, su emun ke egkeyimu niyu ka iling due, egkatuman niyu ka balaud ni Kristu. ³ Ke due egsuman-suman ne impurtanti sikandin, piru ka malehet ware bes karuan din, miglimbungan din de ka pegkeetew rin. ⁴ Keilangan ne ka tagse sabeka, eg-ugsi-ugsi te hinimuwan din. Ne emun ke meupiya ka hinimuwan din, egpakapeggasal e sikandin wey kene din egpe-ilingen ka pegkeetew rin diye te duma. ⁵ Su ka tagse sabeka egpanabak te hinimuwan din.*

⁶ Ka minsan hentew ne napanulu te lalag te Manama, keilangan ne egbehayan din seeye se migpanulu kandin ke nekey ka diye te kandin.

⁷ Kene niyu limbungi ka pegkeetew niyu. Ware etew ne egpakanlimbung te Manama. Ke nekey ka iga pamula te etew, sikan ded degma ka egganiyen din. ⁸ Seeye se egpamula te igkeupii te lawa ran ne makasesale, egpakanliani degma te legpad ne egpuun due. Ne seeye se egpamula eyew te pegpahale te Panisingan te Manama, egpakanliani te umul ne ware egtamanan ne egpuun te Panisingan. ⁹ Purisu keilangan ne kene ki egkapelaan ka eggimu te meupiya, uya su emun ke egpabulus ki ka eggimu te meupiya, egginguma ka timpu ne egkahaani ta ka unag ta. ¹⁰ Purisu, ke due egginguma ne kaayunan kayi te kanta, keilangan ne eggimu ki te meupiya diye te langun ne etew, labi en iya te seeye se duma ta te pegpalintutuu.

Ka katammanan ne tambag ni Pablu

¹¹ Tengtengi niyu kamenu kaddakel seini se me litra ne igsulat ku kaniyu. ¹² Seeye se egkeupian ne egpapitew re ne meupiya, iyan migpehes kaniyu ne egpatuli. Innimu ran sika su kene egkeupian sikandan ne egbaybayaran tenged te pegpeyimatey ni Kristu diye te krus. ¹³ Piru minsan seeye se migpatuli, kene degma egtuman te Balaud, piru egkeupian sikandan ne egpatuli kew

* **6:5** Te Grigu: egtiang te kandin ne egtiangen.

su eyew egpakapeggasal sikandan ne migtuman kew te impanulu dan.¹⁴ Piru meyitenged keddiey, ware lein ne igpakapeggasal ku, ke kene, sikan de iya se kamatayen te Magbebaye ta ne si Hisu Kristu diye te krus. Su tenged te kamatayen din diye te krus, warad e karuan kayi te keddiey ka langun ne kayi te kalibutan, ne iling e naan ded degma, warad e karuan ku kayi te kalibutan.¹⁵ Kene ne keilangan ne egkatulian ka etew wey se kene, ka keilangan ne imbal-balawan e sikandin himuwa te Manama.¹⁶ Ka Manama ka egbehey te keupianan wey keyid-u te seeye se keet-etawan ne in-alam din ne iyan seeye se egtuman te seini ne pegpanulu.

¹⁷ Te katammanan, me-upiya perem ne warad e egsamuk keddiey, su ka me bateg ne kayi te lawa ku ka migpamalehet ne mig-ikul a iya ki Kristu.

¹⁸ Me suled, ka keupiya wey keyid-u te Magbebaye ta ne si Hisu Kristu, egkaangken niyu. Uya, malehet iya.

Ka Sulat ni Pablu te Matig-Ipisu

Igpewun-a

Ka seini ne *Sulat ni Pablu te Matig-Ipisu*, insulat din te timpu ne diye sikandin te prisuwani. Ne kene ne ka punduk te migmalintutuu re diye te Ibisu ka egpeuyanan te seini ne sulat, ke kene, minsan degma ka duma ne me punduk te migmalintutuu.

Iyan dakel ne tuyu ni Pablu kayi ka meyitenged te planu te Manama ne “egsabeeken din ka langun ne innimu rin diye te langit wey kayi te tane wey igpasakup din ki Kristu” (1:10).

Diye te an-anayan ne baad te sulat, nasulat e ka meyitenged te pgsabeka. In-ay-ayaran ni Pablu te pegpasabut ka meyitenged te pamaahi te Manama ne Amey te peg-alam te keet-etawan din, te pegpasaylu wey te pegluwas kandan puun te me sale dan pinaahi ki Hisu Kristu ne anak din.

Diye te igkarangeb ne baad te sulat, mighangyu si Pablu te seeye se talagbasa te seini ne sulat, ne keilangan ne egkakita ka pgsabeka ran diye ki Kristu pinaahi te pgsabeka ran degma diye te duma.

Masalig ka inggamit ni Pablu ne panunggilingan meyitenged te pgsabeka te keet-etawan te Manama ki Kristu: ka migmalintutuu,

iyan sika ka lawa ni Kristu, ne sikandin ka ulu; egpekeiling te sabeka ne baley, ne ka batu ne pabunsuran, iyan iya si Kristu; ne egpekeiling degma sikandan te asawa ne malitan, ne si Kristu ka asawa ran.

Egkanengnengan ta degma kayi ka meyitenged te eleg ne pegbebatasan te alunggun, te me taltalaanak, wey te me uripen wey me ahalen. Ne diye te katamanan te seini ne sulat, egkanengnengan ta man-e ka meyitenged te imbehey te Manama diye te migmalintutuu ne egkahamit dan eyew te pegsukul te limbung ni Meibulan kandan.

Ka nasulat te seini ne baseen

Igpewun-a 1:1-2

Egbehey si Kristu te Ispirituwanen ne panalangin 1:3-3:21

Ka iyam ne pegbebatasan ne eleg ne eg-ikulen 4:1-6:20

Ka katammanan 6:21-24

¹ Sikeddiey si Pablu ka migpeuyan te seini ne sulat. Apustulis a ni Kristu Hisus pinaahi te pegbuut te Manama.

Egpangemusta a te keet-etawan te Manama due te Ibisu ne migpalintutuu ki Kristu Hisus.

² Ka keyid-u wey keupianan ne egpuun te Manama ne Amey ta wey te Magbebaise ne si Hisu Kristu, egkaangken niyu.

Ka ispirituwanen ne panalangin

³ Egdayanen ta ka Manama wey Amey te Magbebaye ta ne si Hisu Kristu. Tenged te pegasabeka ta diye ki Kristu, impanalanganan ki nikandin te langun ne ispirituwanen ne panalangin ne diye te langit. ⁴ Te ware pad neyimu ka kalibutan, in-alam kid e te Manama ne egkasabeka diye ki Kristu eyew egkeyimu ne matulus wey ware igkarewey kanta diye te tangkaan din. ⁵ Tenged te geyinawa te Manama kanta, tapey rin e planuwa sumale te igkeupii rin wey te pegbuut din ne egkeyimu ki ne anak din pinaahi ki Hisu Kristu. ⁶ Sikan naa, egdayanen ta ka Manama tenged te katelesan te keupiya wey keyid-u rin ne imbehey rin te ware duwaruwa kayi te kanta pinaahi te Anak din ne miggeyinawaan din.

⁷ Ne pinaahi te langesa ni Kristu, nalekat kid e puun te pegkeuripen ta te sale, wey napasaylu e ka me sale ta. Amana iya ne dakel ka keyid-u te Manama ⁸ ne imbehey kanta te ware pegkannuhun. Imbehayan ki te dakel ne kaalam wey katuenan ⁹ eyew egkasabut ta ka nekeeles ne planu rin ne igkeupii rin te eggimu pinaahi ki Kristu. ¹⁰ Seini ka planu rin te pegginguma te eleg ne timpu: egsabeeken din ka langun ne innimu rin diye te langit wey

kayi te tane wey igapasakup din ki Kristu.

¹¹ Eggimuwen te Manama ka langun sumale te implanu rin wey pegbuut din. Ne puun dengan, in-alam kid e nikandin ne egkeyimu ne keet-etawan din pinaahi te pegasabeka ta diye ki Kristu. ¹² Iyan katuyuan te Manama, ne sikanta se an-anayan ne migpallateng ki Kristu, egdayan te katelesan din.

¹³ Ne sikaniyu degma, te pegkarineg niyu te kamaletan, ne iyan sika se Meupiya ne Panugtulen meyitenged te kaluwasan niyu, migpalintutuu kew e ki Kristu. Sikan naa, imbehayen kew e te Manama te Panisingan ne insaad din isip palinneu ne keet-etawan kew e nikandin. ¹⁴ Ka Panisingan ka imbehey rin kanta isip palinneu ne egkarawat ta iya ka insaad te Manama kanta. Egkarawat ta sika te timpu ne egkalekat kid e nikandin se me keet-etawan din. Sikan naa, egsayeen ta iya ka katelesan te Manama ta.

Ka peg-ampu ni Pablu

¹⁵ Purisu, puun te pegkarineg ku meyitenged te pegpalintutuu niyu te Magbebaye ne si Hisus wey te peggeyinawa niyu te langun ne keet-etawan te Manama, ¹⁶ wara a mig-engked ka egsalamat meyitenged kaniyu, wey layun ku mane ig-ampu sikaniyu. ¹⁷ Egampu a diye te Manama te

Magbebaye ta ne si Hisu Kristu, ka maresen ne Amey, ne ka Panisingan ka egbehey kaniyu te katuenan wey te pegasbut, su eyew egkeila niyu pad iya sikandin.¹⁸ Egampu a man-e ne egkalaya-han ka me suman-suman niyu eyew egpakataha kew iya ke nekey ka egpallatten-gen te seeye se in-alam din, wey eyew egpakataha kew man-e ke kamenu karakel ka insaad din te keet-etawan din.¹⁹ Egampu a man-e ne egkatahaan niyu ka karesen te geem din kayi te kanta te migmalintutuu. Ne sikan ded ne karesen te geem²⁰ ka inggamit din te peg-uyag ki Kristu wey ka pegpapinnuu kandin diye te igkakawanan* din diye te langit.²¹ Purisu labew si Kristu te me talagmandu, te langun ne due katenged wey geem diye te aw-awangan wey kayi te ampew te tane. Labew degma ka genal ne imbehey kandin du te langun ne me genal te seini ne timpu wey minsan te eggingsuma pad ne timpu.²² Ne impariralem te Manama te katenged ni Kristu ka langun, wey innimu rin sikandin ne pangulu te migmalintutuu te minsan nekey.²³ Ka migmalintutuu, iyan sika ka lawa ni Kristu ne ingkumplitu rin, ne sikandin ka migkumplitu te minsan nekey te minsan hendei.

2

Ka pegkeuyag pinaahi te keupiya wey keyid-u te Manama

¹ Ne sikaniyu, namatey kew e dengan tenged te mareet ne hinimuwan niyu wey te me sale niyu. ² Inikul niyu dengan ka pegbebatasan te me etew kayi te kalibutan. Intuman niyu ka ahalen ne iyan migmandu te me panisingan diye te awawangan. Taman kuntee, migpabulus sikandin ne migweil diye te me pusung te me etew ne migsupak te Manama. ³ Sikanta degma, langun ta dengan ne nekeiling kandan ka pegbebatasan wey innimu ta ka minsan nekey ne mareet ne igkeupii ta ne eggimuwen. Inikul ta ka mareet ne igkeupii te me lawata wey ka mareet ne me suman-suman ta. Ne puun te pegkeetew ta, eleg de iya ne eglegparan ki te Manama, iling degma te duma ne me etew.

⁴ Piru tenged te amana ne dakel ka hid-u te Manama wey amana ki geyinawei nikandin,⁵ in-uyag ki red nikandin duma ki Kristu minsan namatey kid e puun te mareet ne hinimuwan ta. Purisu pinaahi re iya te keupiya wey keyid-u te Manama ne naluwas ki.⁶ Ne tenged te pegasbeka ta diye ki Kristu Hisus, in-uyag ki te Manama wey impapinnuu ki nikandin duma ki Kristu

1:20 Sal 110:1. * **1:20** Sumale te tuluuwen te me Hudiyu, ka talahuren de ne etew ka egpapinnuu diye te igkakawanan te mabantug ne etew. **1:22** Sal 8:6.

1:22 Kul 1:18. **2:1** Kul 2:13.

diye te langit. ⁷ Innimu te Manama seini eyew iga-paka-papitew rin te egginguma ne me timpu ka amana ne dakel ne keyid-u rin kanta wey ka keupiya rin kanta pinaahi ki Kristu Hisus. ⁸ Su puun te keupiya wey keyid-u te Manama naluwas kew pinaahi te pegpalintutuu niyu ki Kristu, ne kene ne puun sika te hinimuwan niyu su dasag de kaniyu te Manama. ⁹ Kene ne puun te me hinimuwan ta ne in-luwas ki te Manama, purisu ware etew ne egpeggasal meyitenged due. ¹⁰ Su ka Manama ka migbalew-balew kanta pinaahi te pgsabeka ta ki Kristu Hisus, eyew egkeyimu ta ka meupiya. Ne puun pad dengan in-andam e sika te Manama ne eggimuwen ta.

*Ka pgsabeka te Manama
te me Hudiyu wey te kene ne
me Hudiyu*

¹¹ Na, sikaniyu se neetew ne kene ne me Hudiyu, sumsumana niyu ke nekey kew-a dengan, ingngaranan kew te “luep” te seeye se me Hudiyu ne migpeila ne “natuli” tenged su due innimu ran diye te lawa ran. ¹² Sumsumana niyu seeye ne timpu ne ware kew pad nekeila ki Kristu, ware kew nasakup te keet-etawan te Manama wey ware kew nalagkes te me kasabutan te Manama ne insaad din diye te kandan. Mig-ugpe

kew kayi te ampew te tane ne ware Manama wey ware impallateng. ¹³ Piru kuntee, puun te nasabeka kew e ki Kristu, sikaniyu se mariyu dengan te Manama, kuntee nakaparani e diye te kandin pinaahi te langesa ni Kristu. ¹⁴ Su si Kristu ka egpeg-uli te meupiya ne geyinawa ta wey iyan migsabeka kanta te me Hudiyu te seeye se kene ne me Hudiyu, wey sikandin ka migguhus te seeye se nekeiling te eletanan ne iyan nakapegsuwey kandan. ¹⁵ Ne puun te pegpeyimatey rin, in-awe din e kayi te kanta ka katenged te Balaud te me Hudiyu ne due kalabetan te me suhu wey te seeye se igpangkene. Innimu rin ka iling due su eyew egsabeeken din ka daruwa ne punduk wey eyew egkewusey e sikandan. ¹⁶ Ne kuntee, pinaahi te kamatayen ni Kristu diye te krus, nekeiling te sabeka naan de ne lawa seeye se daruwa ne punduk wey impeg-uli ki nikandin diye te Manama. Ne puun dutu, naawe e ka kasamuk ta. ¹⁷ Miggendini sikandin wey migpangguhud te Meupiya ne Panugtulen meyitenged te peg-uliey te meupiya ne geyinawa due te kaniyu te kene ne me Hudiyu ne mariyu te Manama wey diye degma te seeye se me Hudiyu ne marani kandin. ¹⁸ Ne pinaahi ki Kristu, warad e tapid kanta te me Hudiyu wey te kene ne

Hudiyu ka egpakaparani te Amey pinaahi te sabeka ne Panisingan.

¹⁹ Sikan naa, sikaniyu se kene ne me Hudiyu, kene kew e ne me lapu wey mahaliyug, ke kene, mahinged kew e duma te keet-etawan te Manama wey sakup kew e degma te pamilya rin. ²⁰ Sikaniyu ka egpekeiling te baley, ne iyan pes-ek ka me apustulis wey ka me prupita, ne ka batu ne pabunsuran te baley, iyan sika si Kristu Hisus. ²¹ Ne pinaahi kandin egmekegsumpul ka tagse baad te baley, wey egkeyimu ne matulus ne timplu te Magbebkiye. ²² Ne puun su nasabeka kew e ki Kristu, duma kew e degma te seini se eggimuwen ne baley te Manama ne in-ugpaan te Panisingan din.

3

Ka himu ni Pablu diye te kene ne me Hudiyu

¹ Na, sikeddiey si Pablu, ka pinirisu tenged te pegpamakey ku ki Kristu Hisus puun te pegwali ku kaniyu te kene ne me Hudiyu. ² Te ware duwa-ruwa, nakarineg kew e ne pinaahi te keupiya wey keyid-u te Manama imbehayan a nikandin te seini ne himu para kaniyu. ³ Impatahe e te Manama kayi te keddiey ka nekeeles ne planu rin. Nakasulat ad e kaniyu te malepet de meyitenged kayi. ⁴

Emun ke egbaseen niyu sika, henduen niyu pad egkasabut ke nekey ka nanengnengan ku meyitenged te nekeeles ne planu te Manama ne igpatuman ni Kristu. ⁵ Ware ipataha dengan sika te Manama diye te me etew, piru kuntee, pinaahi te Panisingan din, impataha rin e kayi te matulus ne me apustulis din wey diye te me prupita. ⁶ Ne iyan seini ka nekeeles ne planu te Manama: pinaahi te Meupiya ne Panugtulen, ka kene ne me Hudiyu egpakarawat te me panalangin te Manama duma degma te me Hudiyu, wey egkeyimu sikandan ne sakup te sabeka ne lawa, wey egkatalaran sikandan te insaad te Manama puun su nasabeke e sikandan diye ki Kristu Hisus.

⁷ Pinaahi te keupiya wey keyid-u te Manama wey te geem din ne kayi te keddiey, imbehayan a nikandin te seini ne himu te pegpangguhud te Meupiya ne Panugtulen. ⁸ Sikeddi, minsan sikeddiey ka kene ne impurtanti te langun ne keet-etawan te Manama, piru imbehayan a nikandin te katuenan te pegwali diye te kene ne me Hudiyu meyitenged te ware kataamanan ne karatuan ni Kristu. ⁹ Migbehayan a nikandin te himu te pegpasabut te langun ne etew meyitenged te nekeeles ne planu te Manama ne iyan miggimu

te langun—ka nekeees ne planu ne ware din ipaneng-neng puun pad dengan.¹⁰ Innimu rin sika su eyew pinaahi te migmalintutuu, iga pakapapitew rin kuntee diye te langun ne diye te dibabew ne me talagmandu wey due me katenged, ke kamenu karakel ka katuenan din ne impakita rin te nalein-lein ne paahi.¹¹ Sika ka planu rin puun pad te bunsuranan, wey natuman din e kuntee pinaahi ki Kristu Hisus ne Magbebkiye ta.¹² Ne tenged te duen kid e te kandin wey pinaahi te pegpalintutuu ta kandin, egpaketparani kid e te Manama te ware pegkehe wey pegkaaldek.¹³ Purisu eghangyuen ku sikaniyu ne kene kew kaawei te pegpallateng puun te pegantus ku para kaniyu, su seini para te keupianan niyu.

Ka peg-ampu ni Pablu te matig-Ipusu

¹⁴ Emun ke egsumsumanen ku ka planu te Manama, egpanimbuel a ka egsimba kandin¹⁵ ne iyan Amey te tagse pamilya diye te langit wey kayi te tane.¹⁶ Egampu a te Manama ne puun te dakel ne keupiya rin, ne egbehayan kew nikandin te geem eyew egkalig-en ka pusung niyu pinaahi te Panisingan din¹⁷ su eyew egpalunggehaat si Kristu due te me pusung niyu pinaahi te pegpalintutuu niyu kandin. Ne eg-ampu a man-e ne

egpaketralid ka geyinawa niyu diye te Manama wey diye te me duma niyu¹⁸ eyew sikaniyu, duma te langun ne keet-etawan te Manama, egpaketparani iya ke kamenu kaluag wey kalayat, wey kamenu katikang wey karalem ka geyinawa ni Kristu kanta.¹⁹ Ne minsan kene niyu amana egkasabut ke kamenu karakel ka geyinawa ni Kristu kaniyu, piru egampu a ne egkasabut-sabut niyu pad sika eyew ka pegbebatasan niyu egpekeiling te pegbebatasan te Manama.

²⁰ Egdayanen ta ka Manama tenged su pinaahi te geem din ne migweil kayi te kanta, egpekeyimu sikandin te subla pad iya te langun ne imbuyu ta wey te insuman-suman ta.²¹ Egdayanen ka Manama te ware iya egkamanan tenged te meupiya ne eggimuwen din pinaahi te migmalintutuu wey pinaahi ki Kristu Hisus. Malehet iya!

4

Ka pegsabeka te migmalintutuu diye ki Kristu

¹ Sikan naa, sikeddiey se pinirisu tenged te pegpakey ku te Magbebkiye, egbanasalan ku sikaniyu ne eg-ugpe sumale te peg-ugpe ne eleg te seeye se in-alam te Manama.² Pariralem kew wey ay-ayari niyu ka duma. Ne kene kew kapeleyi wey antusa niyu ka seyyup te duma tenged te geyinawa niyu.³ Pakannekali niyu ne

egpabulus ka pegrabuka niyu ne egpuun te Panisingan te Manama pinaahi te keupianan ne insabekaan niyu.
⁴ Sikanta langun, sabeka re ne lawa wey sabeka re ka Panisingan ne mig-ugpe kayi te kanta, wey sabeka re degma ka egkapallatengan ta tenged te peg-alam te Manama kanta.
⁵ Due sabeka re ne Magbebeye, sabeka ne kamalehetan, sabeka ne bewutismu,
⁶ wey due sabeka re ne Manama ne Amey te langun ne migmalintutuu, ne iyan egmandu te langun, eggimu sikandin pinaahi kanta langun, wey eg-ugpe kayi te kanta langun.

⁷ Piru ka tagse sabeka kanta, indasahan ni Kristu te nalein-lein ne katuenan sumale te pegbuut din.

⁸ Purisu nasulat diye te Kasulatan,

“Te peggendiye din e te dibabew,

nanguyan din seeye se susuluhi ne natalu rin ne impandakep din

wey nandasahan din ka keet-etawan din.”

⁹ (Na, nekey-a ka kaluwasan te nasulat ne, “Miggendiye sikandin te dibabew?” Iyan igpasabut due ne migguna pad migpamanueg si Kristu kayi te kalibutan.

¹⁰ Ka migpamanueg kayi te kalibutan, sikan ded ka miggendiye te langit eyew egkasakup din ka langun.)

¹¹ Ne seini ka dasag ni Kristu: ka duma ne me etew egkeyimu ne me apustulis,

ka duma me prupita, ka duma me talagpangguhud te Meupiya ne Panugtulen, me talagtanggu te migmalintutuu, wey ka duma me talagpanulu.
¹² Innimu rin sika su eyew egkaandam ka keet-etawan te Manama te himu ne para kandin eyew egkalog-en ka lawa ni Kristu
¹³ taman te egkasabeka ki langun te pegpalintutuu ta wey te peg-ila ta ki Kristu, ne Anak te Manama. Ne egmatesan kid e taman te egpekeiling kid e ki Kristu.
¹⁴ Ne emun ke egkeyitabu sika, kene kid e egpekeiling te me bate ne layun egkaalin-halin ka me suman-suman. Kene kid e egkeuyan te egkalein-lein ne pegpanulu te me etew ne eglimbung wey esuwey e te kamalehetan.
¹⁵ Kene iya ne iling due, ke kene, pinaahi te peglalag ta te kamalehetan ne egdumaan te geyinawa, keilangan ne egtulin ki te langun-langun de iya eyew egpekeiling ki ki Kristu ne pangulu ta. Egpekeiling sikandin te ulu ta,
¹⁶ ne puun te peguyan din, egkasabeka wey egmekegsumpul-sumpul ka intiru ne lawa pinaahi te pegrabulihey te tagse baad te lawa. Ne emun ke eleg ka eggimuwen dan, egtulin ka lawa wey egmanekal puun su migpaheyinawee y sikandan.

Ka iyam ne pegbebasan ne eleg ne eg-ikulen

¹⁷ Purisu, pinaahi te katenged te Magbebabye, egnangenan ku sikaniyu wey egbanasalan te engkeri niyud ka pegbebatasan niyu ne egpekeiling te pegbebatasan te me etew ne ware nekeila te Manama, su ware karuan te egsumsumanen dan. ¹⁸ Migmarusilem ka pegsuman-suman dan wey mariyu sikandan te umul ne imbehey te Manama puun su ware katuenan dan meyitenged kandin wey makehal ka me ulu ran. ¹⁹ Kenad e sikandan egkengeyilew, kenad e sikandan egsanggel ka eggimu te mareet ne igkeupii te me lawa ran wey te minsan nekey ne malindit ne himu.

²⁰ Piru sikaniyu, kene ne iling due ka natuenan niyu meyitenged ki Kristu! ²¹ Te ware duwa-ruwa, nakarineg kew e meyitenged kandin, wey puun su nasabeka kew e diye te kandin, impanulu kew e te kamalehetan ne due te ki Hisus. ²² Purisu luunga niyu ka tapey e ne pegkeetew niyu ne ingkalayami niyud e. Ka sika se tapey ne pegkeetew niyu ka egdereet te umul niyu puun te mareet ne igkeupii ne iyan miglimbung kaniyu. ²³ Keilangan ne egkabalbalawan ka me pusung niyu wey me suman-suman niyu. ²⁴ Isaluub niyu ka iyam e ne pegkeetew niyu ne innimu te Manama ne egpekeiling kandin—egkeyimu

kew ne malehet ne matareng wey matulus.

²⁵ Purisu kene kew e ubat. Ka tagse sabeka keilangan ne malehet ka eglalahen diye te sumbaley rin tenged su sikanta langun, sakup ki te sabeka re ne lawa. ²⁶ Emun ke egkabelu kew, bantey kew ne kene kew egpakasale. Kene niyu peyingumei te sengekaaldew ka pegkabelu niyu ²⁷ wey kene niyu behayi te dalan ka ahalen te me busew. ²⁸ Ka takawen, keilangan ne kenad e egpanakew. Keilangan ne egbunsud e sikandin egtrabahu te malinis ne himu eyew egpakabehey sikandin te seeye se egkengaayayu. ²⁹ Kene kew lalag te mareet, ke kene, sikan de se meupiya ne egpakaligen te duma. Iyan niyu re lalaha ka egpakameupiya te egpammineg kaniyu eyew egpakabagget kew te seeye se eglalahen niyu. ³⁰ Kene niyu pasunduha ka Panisingan te Manama su sikandin ka palinneu ne kandin kew en iya te Manama wey ka kasihuruwan ne egginguma ka Aldew ne egbehayan kew te kaligwangan. ³¹ Engkeri niyud ka sesakiti diye te geyinawa niyu, pegkalangeti, pegkabelu, ka pegpeeg-ehetey, ka peg-iran-iran wey ka minsan nekey ne mareet ne batasan. ³² Ne keilangan ne meupiya kew te duma, hiid-uwen kew wey

pegpasayluwey kew ka tagse sabeka iling te pegpasaylu te Manama kaniyu pinaahi ki Kristu.

5

Ka peg-ugpe due te malayag

¹ Purisu, puun su me pinangge kew ne me anak te Manama, ilingi niyu sikandin. ² Batasana niyu ka peggeyinawa te duma iling te peggeyinawa ni Kristu kanta wey te pegbehey rin kanta te umul rin ne egpekeiling te meemut ne igpanubad diye te Manama.

³ Ne puun su keet-etawan kew e te Manama, kene ne eleg ne egpeyilabetey kew se kene ne alunggun wey ke eggimu naa te minsan nekey ne malindit wey ke egpalehed naa. Keilangan ne ware egkahuhud due te kaniyu ne iling due ka pegbebatasan.

⁴ Kene ne eleg ne eglalag kew te mekeyilew-hilew wey ke ware karuan ne me lalag wey malindit ne me kawalian, ke kene, sikan de se me lalag ne pegpasalamat te Manama.

⁵ Su nakanengneng kew en iya ne ware egpekeugpe te Migharian ni Kristu wey te Manama ne egpeyilabetey se kene ne alunggun, eggimu te malindit, wey leheren (su diyus-diyusen ka iling due ne etew).

⁶ Su puun due, nalangetan ka Manama te seeye se masinupaken wey egleparan din sikandan. Purisu, kene

kew palimbung te minsan hentew ne egkahi te kene kun ne sale ka iling dutu ne eggimuwen. ⁷ Kene kew duma-ruma kandan. ⁸ Sudengan, duen kew pad te marusilem, piru kuntee duen kew e te malayag su neyimu kew man e ne me keet-etawan te Magbebabe. Sikan naa, ipakita niyu ka peg-ugpe niyu ne duen kew e te malayag. ⁹ (Su ka etew ne due te malayag, eg-uyan te langun ne klasi te keupiya, katareng, wey kamalehetan.) ¹⁰ Pamitawa niyu ke nekey ka egpakapahale te Magbebabe. ¹¹ Kene kew ambag-ambag te ware karuan ne eggimuwen te me etew ne diye pad te marusilem, ke kene, ipanengneng niyu sika. ¹² Su mekeyilew-hilew iya minsan ka pegpanggihud de meyitenged te inneles de ne eggimuwen dan. ¹³ Piru ka langun ne mareet ne eggimuwen ne egkalayahan, egkanengneng, su puun te layag, ¹⁴ egkanengneng iya ka langun. Purisu due seini se nakahi ne miggenendue, “Himata ka, sikeykew se nakalipereng, enew ka puun te kamatayen nu wey eglayahan ka ni Kristu!”

¹⁵ Sikan naa, ay-ayari niyu ka peg-ugpe niyu, ne kene ne iling te peg-ugpe te me etew ne ungel, ke kene, iling te me matagseb. ¹⁶ Pakan-nekal kew ka eggimu layun

te meupiya tenged su mareet ka eggimuwen te me etew te seini ne timpu.¹⁷ Purisu kene kew ungel-ungel, ke kene, sabuta niyu ke nekey ka igkeupii te Magbebaye.

¹⁸ Kene kew pewubug-hubug su egpakarereet sika te peg-ugpe niyu, ke kene, peyipenu kew te Panisingan te Manama. ¹⁹ Emun ke egpalalahey kew, iyan niyu gamita ka me lalag ne egpuun te me salmu, ka duma ne me ulahingen wey ka me ispirituanen ne me kanteen. Ulahingi niyu wey liglihengi niyu ne egpuun te pusung niyu ka Magbebaye. ²⁰ Te ngaran te Magbebaye ta ne si Hisu Kristu, layun niyu pasalamati ka Manama ne Amey te langun-langun de iya.

Ka peg-ugpe te alunggun

²¹ Paruma-ruma kew ka tagse sabeka diye te duma niyu tenged su intahud niyu si Kristu. ²² Sikaniyu se me asawa ne me malitan, paruma-ruma kew te me asawa niyu iling te pegparuma-ruma niyu te Magbebaye. ²³ Su ka lukes ka pangulu te asawa rin iling te si Kristu ka pangulu te migmalintutuu ne iyan sika ka lawa rin, wey sikandin degma ka egluwas due. ²⁴ Na, puun su migparuma-ruma ki Kristu ka migmalintutuu, keilangan degma ne egparuma-ruma te me asawa

ran ka me malitan te minsan nekey.

²⁵ Sikaniyu se manggiasawe e ne me lukes, keilangan ne eggeyinawaan niyu ka me asawa niyu iling te peggeyinawa ni Kristu te migmalintutuu wey te pegbehey rin te kandin ne umul para kandan. ²⁶ Innimu rin sika su eyew egmatulusen din ka migmalintutuu. Inlinisan din sikandan pinaahi te weyig wey te lalag din ²⁷ su eyew egkarawat din sikandan isip tetelesi ne egpangasaween din, ne ware bilu, mansa, wey minsan nekey ne mareet, ke kene, matulus de iya wey ware igkarew-ey. ²⁸ Te iling kayi ne paahi, keilangan ne eggeyinawaan te me lukes ka me asawa ran, iling te peggeyinawa ran te kandan mismu ne lawa. Ka etew ne eggeyinawa te asawa rin, eggeyinawa te pegkeetew rin. ²⁹ Su ware etew ne egdumut te kandin mismu ne lawa, ke kene, egpakeenen din seini wey egtangguwen din, iling te eggimuwen ni Kristu diye te migmalintutuu ³⁰ tenged su egpekeiling ki te me baad te lawa rin. ³¹ Sumale te nasulat te Kasulatan ne miggendue, "Sika ka egpuunan ne engked e ka lukes te amey wey iney rin wey egsabek e te asawa rin, ne sikandan se daruwa, egkeyimu e ne sabeka." ³² Due dakel ne kamalehetan ne nekeeles

kayi, pиру ka egkahiyan ku, panunggilingan sika te pegrabeka ni Kristu te migmalintutuu.³³ Sikan naa, keilangan ne ka tagse sabeka kaniyu eggeyinawa iya te asawa rin ne malitan iling te peggeyinawa rin te kandin mismu ne pegkeetew. Ne ka tagse malitan keilangan ne egtahud degma te asawa rin.

6

Ka me taltalaanak

¹ Me anak, tumana niyu ka amey wey iney niyu su sika ka eleg ne eggimuwen te seeye se nasabeke e diye te Magbebaye. ² Seini ka ananayan ne suhu ne migdu-maan te saad, "Tahura nu ka amey wey iney nu." ³ Ne seini ka saad, "Su eyew egme-upiya ka peg-ugpe nu wey egmalayat ka umul nu kayi te ampew te tane."

⁴ Me amey, kene niyu peyibelua ka me anak niyu, ke kene, inahaka niyu sikandan pinaahi te pegdisiplina wey pegpanulu ne diye egpuun te Magbebaye.

Ka me uripen wey me ahalen

⁵ Me uripen, tumana niyu ka me ahalen niyu kayi te ampew te tane duma te pegkaaldek niyu wey te pegtahud niyu kandan. Tumana niyu sikandan ne egpuun te me pusung niyu iling te pegtuman niyu ki Kristu. ⁶ Tumana niyu

sikandan ne kene ne puun de su egparayan-dayan kew kandan ke egtengteng sikandan kaniyu, ke kene, himuwa niyu ne egpuun te pusung niyu ka igkeupii te Manama isip me uripen ni Kristu. ⁷ Himuwa niyu ka me himu niyu duma te pegkahale, iling te ka Magbebaye ka egpamakayen niyu, ne kene de ne me etew kayi te ampew te tane. ⁸ Uya su nakanengneng kew e ne egdasahan te Magbebaye ka tagse sabeka sumale te neyimu rin ne meupiya, minsan ke uripen sikandin wey se kene.

⁹ Me ahalen, iling ded degma himuwa niyu diye te me uripen niyu. Kene niyu sikandan hinaldeka su nakataha kew e ne sabeka re ka Ahalen niyu ne diye te langit wey ware mule egdapihan din.

Ka eggamiten te egpakig-ehet ki Meibulan

¹⁰ Te katammanan, keilangan ne egkalig-en ka pegrabeka niyu te Magbebaye pinaahi te dakel ne geem din. ¹¹ Isaluub niyu ka langun ne imbehey te Manama kaniyu su eyew egpaketuk kew te pegrabekan te ahalen te me busew. ¹² Su ka kuntere ta, kene ne etew, ke kene, sika se maddeet ne me panisingan ne diye te aw-awangan, ka me pangulu ran ne due me geem, wey ka me talagmandu kayi

6:1 Kul 3:20. **6:2** Iks 20:12; Diy 5:16.

6:4 Kul 3:21.

6:5 Kul 3:22-25.

6:9 Kul 4:1; Diy 10:17; Kul 3:25.

te kalibutan ne diye pad te marusilem.¹³ Purisu, gamita niyu ka langun ne imbehey te Manama kaniyu su eyew egpakashukul kew ke eggingsuma ka mareet ne aldew, ne eyew pegkapenga te samuk, egpakashasindek kew red ne malig-en.

¹⁴ Sikan naa, pangandam kew ne ingkasaluub e ka kamalehetan isip tabed niyu, wey ka katareng isip putew ne igdingding te kumeng niyu,¹⁵ wey ka kaali-ali te pegpangguhud te Meupiya ne Panugtulen isip sepatus niyu ne egpakabehey te keupianan.¹⁶ Timul pad due, uyana niyu ka pegpalintutuu niyu isip kalasag niyu eyew egkeebukan niyu ka langun ne egkalegleg ne igpane ni Meibulan kaniyu.¹⁷ Isaluub niyu man-e ka kaluwasan isip putew ne kalu niyu, wey gen-geni niyu ka lalag te Manama ne imbehey te Panisingan din isip kampilan niyu.¹⁸ Ampu kew te langun ne timpu sumale te igpanulu kaniyu te Panisingan te Manama. Pabulig kew te Manama te langun wey te minsan nekey. Ne emun ke eg-ampu kew, keilangan ne egbanterey kew wey kene kew engked ka eg-ampu te langun ne keet-etawan te Manama.¹⁹ Iampu a degma nikaniyu ne egbehayan a te Manama te eleg ne lalag ke egbunsud ad e ka eglalag, su eyew egpapangguhud a te ware

pegkaaldek meyitenged te heles ne planu te Manama ne ka Meupiya ne Panugtulen para red degma te kene ne me Hudiyu.²⁰ Ne puun su sikeddiey ka impeuyan te Manama ne egpangguhud meyitenged ki Hisu Kristu, naprisu ad e kuntee. Iampu niyu ne egmabulut a ka egpangguhud te Meupiya ne Panugtulen, su sika ka eleg ne eggimuwen ku.

Ka pegpanaha-taha

²¹ Ne kuntee, eyew egkannengnengan niyu ke namenu ad e wey ke nekey e ka eggimuwen ku, si Tikiku e ka egpepangguhuren ku kaniyu te langun. Pinalangge sikandin ne suled ta wey matinumanen ne suluhuanen diye te Magbebaye.²² Sika ka egpuunan ne impeuyan ku sikandin due te kaniyu su eyew egpakanengneng kew ke namenu key e, wey eyew degma egpaketbagget pad sikandin kaniyu.

²³ Me suled ku, ka Manama ne Amey wey ka Magbebaye ne si Hisu Kristu ka egbehey kaniyu te keupianan wey geyinawa ne egdumaan te pegpalintutuu.²⁴ Ka keupiya wey keyid-u te Manama, egkaangken te seeye se langun ne miggeyinawa te Magbebaye ta ne si Hisu Kristu te ware egtamanan ne geyinawa.

Ka Sulat ni Pablu te Matig-Pilipus

Igpewun-a

Ka seini se sulat ni Pablu, impeuyan din diye te migmalintutuu diye te Pilipus ne sakup te prubinsya te Masidunya (Me Himu 16:6-40). Sika ne punduk te migmalintutuu ka an-anayan ne impes-ek ni Pablu diye te nasud te Ruma ne sakup te Iyurupa. Insulat din seini taheed te naprisu sikandin puun te pegwali rin te Meupiya ne Panugtulen meyitenged ki Hisu Kristu.

Ka an-anayan ne tuyu ni Pablu te migsulat te seini ne baseen, su egkeupian sikandin ne egpasalamat te migmalintutuu diye te Pilipus tenged te dasag ne impeuyan dan kandin eyew te pegbulig kandin te seeye ne timpu. Ka igkarangeb ne tuyu din te migsulat kayi, su eyew egkabagget sikandan wey egkalig-en ka pegpalintutuu ran minsan te kalised ne miggunguma kandan wey minsan degma diye te kandin. Migtambahan sikandan ni Pablu ne keilangan ne egpariralem sikandan iling te pegpariralem ni Hisus te kayi pad sikandin te kalibutan. Impasuman-suman din man-e sikandan ne tenged de te keupiya wey keyid-u te Manama wey te pegpalintutuu ran ki Kristu

ne naluwas sikandan. Ne kennad ne keilangan ne egsalig pad sikandan te Balaud ni Muwisis wey te tuluuwen te me etew. Migsulat man-e sikandin meyitenged te kahale wey keupianan ne igbehey te Manama te seeye se nasabeka diye ki Kristu.

Ka nasulat te seini ne baseen

Igpewun-a 1:1-11

Ka kahale ni Pablu te ingkawali e si Kristu 1:12-30

Ka peg-ugpe due ki Kristu 2:1-2:18

Si Timutiyu wey si Ipapruditu 2:19-30

Ka pegpaney-paney meyitenged te me kunte te wey te me kalised 3:1-4:9

Si Pablu wey ka me alukuy rin ne matig-Pilipus 4:10-20

Ka katammanan 4:21-23

¹ Sikeddiey si Pablu ka migpeuyan te seini ne sulat, duma ki Timutiyu; me uripen key ni Kristu Hisus. Egpangemusta key te langun ne keet-etawan te Manama ne nasabek e due ki Kristu Hisus ne matig-Pilipus duma te me pangulu te migmalintutuu wey te me talagbulig kandan.

² Ka keyid-u wey keupianan ne egpuun te Manama ne Amey ta wey te Magbebaye ne si Hisu Kristu, egkaangken niyu.

Ka pegpasalamat wey pegampu ni Pablu

³ Egpasalamat a te Manama ne impamakey ku tagse egkasuman-suman ku sikaniyu. ⁴ Tagse eg-ampu a kaniyu langun, eg-ampu a duma te kahale ⁵ tenged te pegbulig niyu keddiey te pegpangguhud te Meupiya ne Panugtulen puun te pegbunsud niyu te pegpalintutuu, taman kuntee. ⁶ Nakanengneng a iya ne ka Manama ne iyan migbunsud te meupiya ne himu due te kaniyu ka egpabulus te himu rin taman te egkeimpusan e te aldew te peglibed ni Hisu Kristu. ⁷ Eleg iya ne iling kayi ka eggeramen ku meyitenged kaniyu langun, uya su dakel ka geyinawa ku kaniyu. Su nakasawit kew duma keddiey te pegbulig te Manama te pegkaprisu ku, wey minsan te pegpangatarengan ku wey pegpemalehet ku meyitenged te Meupiya ne Panugtulen. ⁸ Nakanengneng ka Manama ne amana a naalimengawi kaniyu langun tenged su miggeyinawaan ku sikaniyu iling degma te peggeyinawa ni Kristu Hisus kaniyu.

⁹ Eg-ampu a ne egkaligen pad ka peggeyinaweey niyu wey egkatimulan pad degma ka katuenan niyu wey ka peg-ila niyu ke nekey ka malehet, ¹⁰ su eyew egpekeila kew ke nekey ka amana ne meupiya, eyew egkeyimu kew ne malinis wey ware igkarew-ey kaniyu taman

te peglibed ni Kristu. ¹¹ Ne egkataman, egkamatareng iya ka batasan niyu wey ka langun ne eggimuwen niyu* pinaahite geem ni Hisu Kristu, eyew egkasaye wey egmabantug ka Manama.

Ka kahale ni Pablu te ingkawali e si Kristu

¹² Me suled, egkeupian a ne egpakataha kew, ne ka neyitabu keddiey amana egpakabulig te pegpeempet te Meupiya ne Panugtulen. ¹³ Ne tenged due, egpakataha seeye se langun ne sundalu ne talagbantey diye te palasyu wey ka langun ne etew te naprisu a tenged te pegpamakey ku ki Kristu. ¹⁴ Tenged te pegkaprisu ku, nalig-en ka pegaslig te me suled ta te Magbebkiye, wey ware pegkehe dan wey pegkaaldek dan te pegpangguhud te lalag te Manama.

¹⁵ Malehet iya ne due duma ne migwali meyitenged ki Kristu ne puun de te pegkeimma ran keddiey, wey egkeupian de ne egpakigapul. Piru due mule duma ne meupiya ka tuyu dan.

¹⁶ Migwali sikandan tenged te geyinawa ran keddiey su nakataha sikandan ne impeuyan a te Manama kayi eyew te pegpangatarengan meyitenged te Meupiya ne Panugtulen. ¹⁷ Ka tuyu te seeye se duma ne migwali meyitenged ki Kristu, kene ne meupiya, su egkeupian de sikandan ne egkatimulan

* **1:11** Te Grigu: egkapenu te behas te pegkamatareng. **1:13** Him 28:30.

perem ka kalised ne in-antus ku kayi te prisuwan.

¹⁸ Piru balahad e! Egkahale e pad ke igkawali si Kristu minsan nekey ka tuyu, mareet ma wey se kene. Uya, epabulus a ka egkahale ¹⁹ su nakanengneng a ne pinaahi te peg-ampu niyu keddiey wey te pegbulig te Panisingan ni Hisu Kristu, seeye se neyitabu keddiey, epakaluwas bes keddi. ²⁰ Amana a egkabagget ne egiman-iman wey egpallateng ne ware egkeyimu ku ne igkeyilew ku. Igkeupii ku ne egmabulut a ka eglalag su eyew egkareyrey si Kristu pinaahi te pegkeetew ku, neuyag e ma wey se warad. ²¹ Su meyitenged keddiey, ke egkeuyag e pad, egkareyrey si Kristu, ne emun ke egpatey e ma, ne meupiya pad iya su diye ad e ki Kristu. ²² Emun ke egkeuyag e pad, egpekeyimu e pad te egkapulusan ne himu ku. Piru wara a nakataha ke hendei ka egalamen ku. ²³ Napinpiniat a ke hendei te daruwa ka egalamen ku. Iyan ku perem igkeupii ne eg-engkeran kud ka seini ne umul wey egduma ad e ki Kristu, su sika iya ka meupiya, ²⁴ piru tenged kaniyu, keilangan iya ne egkeuyag e pad. ²⁵ Ne puun su nakasihuru ad e rue, nakataha a ne egkeuyag e pad iya eyew egkeehet pad ka pegpalintutuu niyu wey egkatimulan pad ka kahale niyu due te kamalehetan.

²⁶ Ne eyew te peglibed ku due te kaniyu, egkanasnasion niyu egkasaye si Kristu Hisus tenged keddiey.

²⁷ Ne minsan nekey ka egkeyitabu, keilangan ne ka peg-ugpe niyu, egpekegsukub te pegpanulu diye te Meupiya ne Panugtulen meyitenged ki Kristu. Ne eyew minsan ke egpekeenduen e ma wey se kene, wey ke epakarineg e re meyitenged kaniyu, epakataha a ne nalig-en e ka pegasbeka niyu, wey nasabeke e ka me sumansuman niyu ne epakannekal para te pegpalintutuu ne impanulu diye te Meupiya ne Panugtulen. ²⁸ Ne kene kew en iya kaaldek te seeye se egkuntere kaniyu, tenged su ka kabulut niyu, sabeka ne palinneu kandan ne egdereetan sikandan te Manama, ne sikaniyu egluwasen kew mule. Ne sika se langun, himu te Manama. ²⁹ Su kene ne iyan de intuhut te Manama kaniyu ka pegpalintutuu wey pegaslig ki Kristu, ke kene, ka peg-antus degma tenged kandin. ³⁰ Ka me keyirapan ne egkabayaan niyu, iling ded te nakita niyu ne me keyirapan ne nabayaan ku. Ne iling ded due kuntee te narineg niyu ka egkeula-ula ku.

2

Ka pegpariralem ni Kristu

¹ Me suled, nakapabagget ded kaniyu ka pgsabeka niyu ki Kristu? Nakapahale ded ka geyinawa rin kaniyu? Nasabeka kew red due te Panisingan te Manama? Duen naan ded geyinawa wey keyid-u niyu te tagse sabeka? ² Ke iling ma rue, eghangyu a kaniyu ne pasabsabutey kew ka tagse sabeka, paheyinaweeey kew, wey sabekaa niyu ka suman-suman niyu wey ka katuyuan niyu eyew egkakumplitu e ka kahale ku. ³ Kene kew himu te minsan nekey ne para re te keupianan niyu wey puun de te hambug niyu, ke kene, pariralem kew wey sumsumana niyu ne meupiya pad ka duma kuntere kaniyu. ⁴ Keilangan ne ka tagse sabeka kaniyu, kene ne iyan de egsumsumanen ka kandin ne keupianan, ke kene, ke nekey degma ka keupianan te duma. ⁵ Keilangan ne ka suman-suman niyu egpekeiling te ki Kristu Hisus: ⁶ Su minsan Manama sikandin, piru imbalahad din ka pegka-Manama rin. ⁷ Ke kene, in-engkeran din sika wey insaluub din ka batasan te uripen wey migpekeetew sikandin ne iling te me etew. ⁸ Te neyimu e sikandin ne etew, impariralem din ka pegkeetew rin wey migparuma-ruma sikandin te suhu te Manama minsan kamatayen—ka kamatayen din diye te krus. ⁹ Purisu amana iparibabew sikandin

te Manama wey migngaranan te ngaran ne labew te langun ne me ngaran. ¹⁰ Purisu egpanimbuel ka langun ne diye te langit wey ka kayi te tane wey ka diye te diralem te tane te pegtahud te ngaran ni Hisus. ¹¹ Ne ka tagse sabeka* eg-angken ne si Hisu Kristu ka Magbebabe, ne puun due egmabantug ka Manama ne Amey.

Layag kew kayi te kalibutan iling te bituen

¹² Me pinalange ku ne me suled, te duen e pad te kaniyu amana kew migpalintutuu te Manama. Ne labi en iya kuntee te wara ad due te kaniyu, pakannekal kew duma te kaaldek wey pegtahud eyew te peggipenga te kaluwasan niyu. ¹³ Su ka Manama ka egweil due te kaniyu eyew egkeupian kew ne eggimu te igkeupii rin wey eyew egpekeyimu kew te igpeyimu rin kaniyu.

¹⁴ Himuwa niyu ka langun te ware pgsagsahukul wey pegpaapuley ¹⁵ eyew ware igkabayung kaniyu wey egmeupiya ka batasan niyu te me anak te Manama. Ne ware igkarew-ey rin te peg-ugpe niyu te seini ne kalibutan ne in-ugpaan te me etew ne mareet wey makasesale. Keilangan ne eglayag kew diye te taliware dan iling te me bituen ne miglayag diye te awawangan¹⁶ taheed te egpangguhud kew kandan te lalag

ne egbehey te umul ne ware egtamanan. Ke eggimuwen niyu sika, epakapeggasal a te aldew te peglibed ni Kristu ne due karuan te innimu ku due te kaniyu.¹⁷ Ka pegpalintutuu niyu wey ka pegsimba niyu, hendue te igpanubad niyu diye te Manama. Ne ka langesa ku, kema ke keilangan ne igpatihis duma te seeye se igpanubad niyu. Emun ke egkeyitabu sika, egkahala a duma kaniyu langun. ¹⁸ Ne sikaniyu degma, keilangan ne egkahale kew degma duma keddiey.

Si Timutiyu wey si Ipapruditu

¹⁹ Ke igtuhut te Magbebeye ne si Hisus, epallateng a ne igpakapeenduen ku si Timutiyu te kaniyu te mahaan, su eyew egkabagget e pad te guhuren din meyitenged kaniyu. ²⁰ Warad e egpekeiling kandin kayi ne malehet ne egkasasew meyitenged kaniyu. ²¹ Su ka duma, iyan de egsumsumanen ka kandan ne igkeupii, ne kene ne sika se igkeupii ni Hisu Kristu. ²² Piru nakataha kew e ne meupiya mule ka batasan ni Timutiyu. Impeiling ku sikandin te anak ku tenged te pegbulig din keddiey te pegpangguhud te Meupiya ne Panugtulen. ²³ Purisu epallateng a ne igpaapas ku igpeendue sikandin te kaniyu ke egkatahaan kud e ke nekey ka egpangkusan ku kayi. ²⁴ Piru due pegsalig ku

te Magbebeye ne egpekeenduen e red degma te kaniyu te kene egkaluhay.

²⁵ Nakasuman-suman a ne keilangan ne igpalibed ku due te kaniyu si Iparuditu, ka suled ku, duma ku te himu, wey duma ku degma ne sundalu ni Kristu. Sikandin ka impiyalan niyu wey impeuyan kayi eyew te pegbulig keddiey. ²⁶ Amana sikandin naalimengawi kaniyu langun wey nabantalan te nakarineg kew ne migderalu sikandin. ²⁷ Malehet iya ne migderalu sikandin wey egpatey e perem. Piru ingkeyid-u sikandin te Manama, ne kene ne sikandin de ka ingkeyid-u, su minsan sikeddiey degma su kene egkeupian sikandin ne egmokeg-untud-untud e ka kalaggew ku. ²⁸ Purisu amana a egkabagget ne egpalibed kandin due, eyew egkahale kew ke egkakita niyu man-e sikandin wey eyew egkaaw-awaan en ubag ka kalaggew ku. ²⁹ Ne dawata niyu sikandin isip suled niyu diye te Magbebeye duma te dakel ne kahale. Tahura niyu ka etew ne iling kandin ³⁰ su hapit e perem sikandin namatey tenged te himurin ne impeyimu kandin ni Kristu. Nakatahu ka umul rin te karereetan tenged te pegbulig din keddiey ne ware niyu mule neyimu.

3

Ka pegkamatareng puun te pegpalintutuu ki Kristu

¹ Na, me suled, kahale kew tenged su duen kew e te Magbebaye. Kena a egkapelaan ne egsulat iling te nasulat kud e kaniyu tenged su para seini te keupianan niyu. ² Bantey kew te maddeet ne me etew ne egpekeiling te me asu ne egpehes kaniyu epgatuli eyew egkaluwas kew kun. ³ Piru sikanta mule ka malehet ne me tinuli su migsimba ki te Manama pinaahi te Panisingan din. Ware ki migsalig te hinimuwan te etew iling te pegpatuli, ke kene, migpeggasal ki mule meyitenged ki Kristu Hisus. ⁴ Piru duen iya perem katarengan ku ne egsalig te iling due. Ke duen ma egsuman-suman ne due katarengan din ne egsalig te iling due, labew ad en iya mule. ⁵ Su kema, te nawaluwan e pad ka miglesut, intuli ad e. Igkarangeb, miglesut a ne Hudiyu iya ne nabuhal puun te tribu ni Binhamin. Igkatelu, telek a ne Hudiyu wey sabeka a ne Parisiyu ne amana migtuman te Balaud te Manama. ⁶ Igkeep-at, imbaybayaran ku ka migmalintutuu puun te pegtuman ku te tuluuwenta. Ne timul pad due, ke meyitenged te pegtuman te Balaud te Manama, ware epgakarew-ey keddiey due. ⁷ Piru seeye se in-isip ku dengan ne due karuan, kuntee warad karuan due tenged ki Kristu. ⁸ Malehet iya ne eg-isipen ku ne ware

karuan te langun ke igpegingiling ku te peg-ila ku ki Kristu Hisus ne Magbebaye ku. Sikandin ka egiupunan ne mig-engkeran ku ka langun, wey eg-isipen ku naan de sika ne basura eyew egpekeile e pad iya ki Kristu ⁹ wey eyew egkasabeka key e kandin. Wara a isipa te Manama ne matareng tenged te pegtuman te Balaud, ke kene, inisip a nikandin ne matareng tenged te pegpalintutuu ku ki Kristu. Igbehey te Manama ka sika ne pegkamatareng ke epgalintutuu ki ki Kristu. ¹⁰ Egkeupian a ne egpekeile e pad ki Kristu wey egkatheraman ku pad ka geem te pegkeuyag din. Egkeupian a degma ne egpekegtalad key te me peg-antus din wey egpekeiling a kandin te kamatayen din ¹¹ eyew ke nekey ma, eg-uyahen e red te Manama keureme.

Ka epgakannekal taman te egkaangken ka dasag

¹² Kene ne iyan ku igpasabut due ne menu natuman kud e sika se langun, wey kena ad e ekgaseyyup. Piru epgakannekal a eyew egkaangken ku sika, su sika iya ka katuyuan ni Kristu ne in-alam a nikandin. ¹³ Me suled, nakanengneng a ne ware ku pad natuman sika. Piru ka innimu ku kuntee, inlingawan kud e ka nanlihad e ne himu ku, su seeye naan de ka epgakannekalan ku ka ware pad

migginguma. ¹⁴ Egpabulus a ka egpakannekal iling te etew ne eglungkesu eyew egkaangken ku ka dasag ne iyan sika se peg-alam te Manama keddi ne egpeendiyeen te langit pinaahi ki Kristu Hisus.

¹⁵ Purisu, sikanta langun se matesan e se pegpalintutu, keilangan ne iling due ka egsumsumanen ta. Ne emun ke due me duma niyu rue ne kene ne iling due ka egsumsumanen, ka Maname e ka egpasabut kandan. ¹⁶ Piru keilangan ne iyan te re egpabulusan te eg-ikul ka nasabut tad e.

¹⁷ Me suled, sabeka kew langun ka eg-iling keddiey, wey tengtengi niyu seeye se mig-iling te pegbebasan ney. ¹⁸ Su sumale te layun ku eglalahala kaniyu dengan, wey minsan kuntee eglalahen ku red seini duma te pegsinehew ku, masalig ka egkahi ne Kristuwanen e sikandan, piru egkakita diye te pegbebasan dan ne ware de diye te kandan ka kamatayen ni Kristu diye te krus. ¹⁹ Te katammanan, karereetan ka egkeyingu-maan dan tenged su iyan dan manama ka igkeupii te me lawa ran, * wey igpaambug dan ka egpekeyilew perem kandan, wey iyan dan de egsumsumanen ka kayi te kalibutan. ²⁰ Piru sikanta mule, ka langit ka malehet ne ugpaan ta. Ne diye egpuun

ka igkabagget ta te egtetahad ne Manluluwas ta ne si Hisu Kristu. ²¹ Egliwanan din ka seini se mahuye ne lawa ta te egpekeiling te lawa rin ne tetelesi. Eggimuwen din sika pinaahi te geem din te pegmandu te langun.

4

Ka katammanan ne pegpanulu ni Pablu

¹ Purisu me suled ku ne inggeyinawaan ku wey ingkaalimengawi ku, sikaniyu ka nakapahale keddi wey ka unag isip kuruna te keddiey ne himu. Sikan naa, lig-en kew diye te Magbebeye, me pinangge ku. ² Egbanasalan ku si Iyudiya wey si Sintiki ne egpeup-upianey e sikan-dan tenged su nasabeke e sikandan diye te Magbebeye. ³ Uya, eghangyuuen ku degma sikeykew se egkasalihan ku ne duma ku, ne egbulig te sika ne me malitan. Migpakankekai sikandan ka migpangguhud te Meupiya ne Panugtulen duma keddiey, ki Kliminti wey te seeye se me talagbulig te himu ku. Sikandan sika, nasulat e se me ngaran diye te Libru te Umul.

⁴ Kahale kew tenged te Magbebeye. Eg-abayan ku te egkahi: kahale kew. ⁵ Keilangan ne egkatahaan te langun ne etew ne maayadayad kew te duma. Mahaan e ka peglibed te Magbebeye.

^{3:17} 1Kur 4:16; 11:1. * ^{3:19} Te Grigu: ka getek dan ka manama ran.

6 Kene kew kalaggew te minsan nekey, ke kene, pinaahi te peg-ampu niyu, buyua niyu te Manama ka keilangan niyu duma te pegpasalamat niyu. 7 Ne emun ke eggimuwen niyu sika, egbehayan kew te Manama te kene egkatirew ne keupianan te pusung niyu. Ne sika ka egtameng te pusung niyu wey te sumansuman niyu puun su duen kew e ki Kristu Hisus.

8 Te katammanan me suled, iyan niyu sumsumana ke nekey ka meupiya wey ka egkasaye: ka malehet, ka egkatahud, ka matareng, ka malinis ne himu, ka tetelesi, wey ka egkareyrey. 9 Himuwa niyu ke nekey ka natuenan niyu, narawat niyu, narineg niyu, wey ke nekey ka nakita niyu kayi te keddiey. Ne ka Manama te keupianan ka egduma kaniyu.

Ka pegkahale ni Pablu te migbulihan sikandin

10 Amana ne dakel ka kahale ku diye te Magbebkiye tenged su nasasew kew red man-e keddiey. Nakataha a ne nasasew kew red dengan kedi, piru ware timpu ne impakapapitew niyu sika. 11 Ne kene ne iyan ku inlalag te iling kayi ne menu nakulangan a, su nateu ad e ne egkabennalan ke nekey ka kayi te keddiey. 12 Nakabaya ad e te warad iya egkeyimu, wey nakabaya ad

e te migmatubung a. Minsan nekey ka egkeula-ula ku, ke egkabulung e ma wey se eggutasan, ke duen ma egkeyimu ku wey se ware, nateu ad e ne egkabennalan. 13 Egkeyimu ku ka langun pinaahi ki Kristu ne iyan egbehey keddiey te kanekal.

14 Piru meupiya kew su migbulihan a nikaniyu te me keyirapan ku.

15 Nakanengneng kew e matig-Pilipus, te peg-awe ku due te kaniyu te prubinsya te Masidunya, te timpu ne egbunsud ad e due te kaniyu ka egwali te Meupiya ne Panugtulen, sikaniyu re iya ka migmalintutuu due ka migbulig te keilangan ku, wey warad e duma. 16

Su minsan ka diya a te Tisalunika, kapapila kew migpeuyan te igbulig niyu keddiey. 17 Kene ne inlalag ku sika ne menu egkeupian a ne egpabehey kaniyu te dasag, ke kene, egkeupian a ne egpakarawat kew te bales* puun te keupiya niyu.

18 Ne kuntee, duen e ka langun ne keilangan ku, dakel pad iya nasi wey warad e kulang, tenged su narawat kud ka impeuyan niyu ki Ipaprudit. Ne egpekeiling seeye te meemut ne halad, ka ighalad diye te Manama ne egdawaten din wey igkahale din. 19 Ne ka Manama ku ka egbehey te langun ne keilangan niyu sumale te karakel te karatuuan din tenged su

nasabeka kew e diye ki Kristu Hisus. ²⁰ Egdayanen ta te ware egtamanan ka Manama ne Amey ta. Malehet iya.

Ka katammanan ne peg-pangemusta

²¹ Ipangemusta a te langun ne keet-etawan te Manama ne nasabeka diye ki Kristu Hisus. Egpangemusta degma kaniyu ka mesuled ta ne duma ku kayi.

²² Egpangemusta degma kaniyu ka langun ne keet-etawan te Manama kayi, labi en iya ka diye te sakup te palasyu ni Sisar.

²³ Ka keupiya wey keyidu ne egpuun te Magbebaye ne si Hisu Kristu, egkaangken niyu.

Ka Sulat ni Pablu te Matig-Kulusas

Igpewun-a

Ka seini ne sulat ni Pablu igpeendiye din te migmalintutuu diye te Kulusas. Ka Kulusas, sabeka ne lungsud diye te Asya Minur ne diye dapit te igsile te Ipisu. Ware pad nakapanumbaley diye te kandan si Pablu piru amana rin e igkasasew wey impeuyanan din te me talagbulig ne egpuun te Ipisu.

Nakarineg si Pablu ne due me talagpanulu te kene ne malehet ne egpanulu te migmalintutuu diye te Kulusas. Migpanulu sikandan te emun ke due etew ne egkeupian ne egkaluwas wey egkeupian ne egmaralem pad ka peg-ila rin te Manama, kene kun ne eleg ka pegpalintutuu rin ki Kristu. Su kahiyan pa nikandan ne keilangan ne egtuman pad sikandin te duma ne ingkene ne eggimuwen wey me tulumanan. Ne keilangan man-e ne egsimba sikandin te me panalihan.

Purisu insulatan ni Pablu ka migmalintutuu diye te Kulusas wey impanengneng din sikandan te kamalehetan meyitenged ki Hisu Kristu. Migkahiyan din sikandan te si Hisus iya ka miggimu te langun ne egkakita ta, purisu labew pad iya sikandin te me panalihan, wey te duma pad ne kene egkakita. Egkakita degma diye te

kandin ka pegka-Manama te Amey rin, wey warad e lein ne egpuunan te umul te migmalintutuu gawas kandin. Sikan naa, keilangan ne ka migmalintutuu, kene eg-ikul te me tulumanan wey pegbebasan te me etew, ke kene, keilangan ne si Kristu re iya ka eg-ikulen.

Ka nasulat te seini ne baseen

Igpewun-a 1:1-14

Ka batasan wey ka himu ni Kristu 1:15-2:19

Ka iyam ne umul due ki Kristu 2:20-4:6

Ka katammanan 4:7-18

¹ Sikeddiey si Pablu ne apustulis ni Kristu Hisus pinaahi te pegbuut te Manama, ka migpeuyan te seini ne sulat duma te suled ta ne si Timutiyu.

² Egpangemusta a te matinumanen ne keet-etawan te Manama due te Kulusas, se-eye se nasabeke e diye ki Kristu.

Ka keyid-u wey keupianan ne egpuun te Manama ne Amey ta, egkaangken niyu.

Ka pegpasalamat wey pegampu ni Pablu

³ Emun ke eg-ampu key kaniyu, layun key egpasalamat te Manama ne Amey te Magbebeye ta ne si Hisu Kristu, ⁴tenged su nakarineg key meyitenged te pegpalintutuu niyu ki Kristu Hisus wey te geyinawa niyu diye te langun ne keet-etawan te Manama. ⁵ Innimu niyu ka iling due tenged su migpalateng kew te intahahe te

Manama kaniyu diye te langit. Ne natuenan niyu sika te timpu ne narindeg niyud e ka kamalehetan ne iyan sika se Meupiya ne Panugtulen⁶ ne miggunguma due te kaniyu. Ka seini ne Meupiya ne Panugtulen, egpekeempet e te intiru ne kalibutan wey masalig e ka me etew ne egpalintutuu due wey egkabalbalawan e se pegbebasan, * iling degma te neyitabu kaniyu puun te pegkarineg niyu rue wey pegkanengnengi niyu te kamalehetan meyitenged te keupiya wey keyid-u te Manama.⁷ Ne si Ipapras, ka pinalangge ne duma ney te uripen ni Kristu, ka migpanulu kaniyu meyitenged due. Matinumanen sikandin ne suluhuanen ni Kristu wey sikandin ka impeenduen ney te kaniyu isip liwan kanami.⁸ Ne sikandin degma ka migpangguhud kanami meyitenged te geyinawa ne imbehey kaniyu te Panisangan te Manama.

⁹ Sikan naa, puun iya te pegkarineg ney rue, ware key e mig-engked ka migampu kaniyu. Mig-ampu key ne egkapenu kew te ispirituwanen ne katuenan wey pegasabut eyew amana niyu egkanengnengi ke nekey ka kandin ne pegbuut.¹⁰ Mig-ampu key te iling due su eyew egpekeyimu

kew ne eg-ugpe sumale te igkeupii te Magbebaye wey egpekeyimu kew layun te egpakkahale kandin. Sikan naa ka egpekeyimu kew te langun ne meupiya ne me himu wey egtulin ka pegila niyu te Manama.¹¹ Egampu key, ne pinaahi te keininuwan ne geem te Manama, egkalig-en kew, su eyew minsan nekey ka egginguma kaniyu, egpakkabulus kew wey egpakaantus kew duma te kahale.¹² Pasalamati niyu ka Amey tenged su innimu kew nikandin ne eleg ne egpakkawat te intahahe din te keet-etawan din ne diyad e te malayag.¹³ Inluwas ki te Manama puun te geem ni Meibulan[†] wey impasakup kid e nikandin te peghari te Anak din ne miggeyinawaan din.¹⁴ Ne pinaahi te seini ne Anak din, nalekat kid e, igapasabut ne napasaylu e ka me sale ta.

Labew si Hisu Kristu te minsan nekey

¹⁵ Si Kristu ka egkakitaan ta ke mamenua ka Manama ne kene egkakita. Ne duen e sikandin te ware pad neyimu ka langun wey labew sikandin te langun ne innimu te Manama.[‡] ¹⁶ Su pinaahi ki Kristu, neyimu ka langun ne diye te langit wey ka langun ne kayi te tane, ka egkakita wey ka kene egkakita, iling te me panisingan ne due geem

* **1:6** Te Grigu: kalibutan wey egpakkamehas e wey egtulin e. **1:7** Kul 4:12; Pilim 23. † **1:13** Te Grigu: geem te karusileman. **1:14** Ipi 1:7. ‡ **1:15** Te Grigu: wey sikandin ka panganey te langun ne innimu.

wey ke katenged, me panisungan ne iyan migmandu wey ke mighari. Neyimu ka langun pinaahi kandin wey para kandin.¹⁷ Ne duen e sikandin te ware pad neyimu ka langun, wey sikandin ka eggen-gen te langun eyew egkasabeka egpakarapenet.¹⁸ Sikandin ka migmandu te migmalintutuu, iling te ka ulu ka egmandu te lawa. Sikandin ka bunsuranan, ka an-anayan ne neuyag puun te me minatey[§] eyew sikandin ka egkeyimu ne labew te langun.¹⁹ Su egkeupian ka Manama ne due te Anak din ka pegka-Manama rin.²⁰ Ne pinaahi te Anak din, impeg-uli te Manama ka meupiya ne geyinawa ran te langun ne diye te langit wey kayi te tane. Innimu rin sika pinaahi te langesa te Anak din ne impatihis diye te krus.

²¹ Ne sikaniyu, mariyu kew dengan te Manama wey me kuntere kew nikandin tenged te mareet ne hinimuwan niyu wey me suman-suman niyu.²² Piru kuntee, impeg-uli e te Manama ka meupiya ne geyinawa niyu kandin pinaahi te kamatayen te lawa te Anak din su eyew te timpu ne igpaatubang kew e nikandin, egmatulus kew e, warad igkarew-ey, wey warad igpakabayung kaniyu.²³ Piru keilangan

ne egpabulus kew ka egpal-intutuu, kene kew duwaruwa, wey desdeseni niyu ka impallateng niyu te timpu ne narineg niyu ka Meupiya ne Panugtulen. Ka sika ne Meupiya ne Panugtulen, ingkapangguhud e te minsan hentew kayi te ampew te tane. Ne sikeddi, si Pablu, neyimu ne suluhuanen te pegwali due.

Ka himu ni Pablu para te migmalintutuu

²⁴ Ne kuntee, nahala a te me peg-antus ku para kaniyu. Su pinaahi rue, egpakabulig a te peggipenga te keyirapan ni Kristu ne in-antus din para te langun ne migmalintutuu ne iyan sika se lawa rin.²⁵ Innimu a te Manama ne suluhuanen diye te migmalintutuu, wey insuhu a nikandin te pegpangguhud te langun ne Ialag din diye te kaniyu.²⁶ Puun pad dengan te ananayan, inneles e te Manama ka planu rin, piru kuntee, igaipataha rin e seini diye te keet-etawan din.²⁷ Igkeupii te Manama ne igaipakan-nengneng e due te kaniyu te kene ne me Hudiyu ke mamenu iya kateles seeye se inneles din. Seini ka inneles dengan ne planu te Manama: ne si Kristu, due te kaniyu, ne puun due, egpakapallateng kew e ne egpakalagkes kew te katelesan din.²⁸ Sikan naa, igwali ney e si Kristu diye te me etew. Egpanpanayan wey

egpanuluen ney ka langun ne etew, ne eggamiten ney ka langun ne katuenan su eyew egmatesan e ka pegpalintutuu ran ki Kristu te timpu ne igpatangke e sikandan diye te Manama.
 29 Purisu eglaslasayan ku iya sika eyew egkeyimu ku, ne ka geem ni Kristu ka miglig-en keddiey.

2

¹ Egkeupian a ne eg-pakataha kew ne amana a egkalasayi para kaniyu, wey te matig-Lawdisya, wey te langun ne ware pad nekeila keddiey. ² Iyan ku tuyu te miggimu te iling due ne eyew egkabagget kew langun wey egkasabeka kew pinaahi te peggeyinaweeey niyu, wey epakaangken te langun ne keupianan te pgsabut wey peg-ila te inneles ne planu te Manama ne iyan sika se meyitenged ki Kristu. ³ Due te kandin egkakita ka langun ne karatuan te kaalam wey katuenan.

⁴ Innangenan ku sikaniyu kayi su eyew kene kew egkalimbungan te mapahetpet ne igpanulu dan. ⁵ Su minsan ke wara a due te kaniyu, piru layun ku egsumsumana sikaniyu.* Ne nahala a te nasabeka kew e wey nalig-en e ka pegpalintutuu niyu ki Kristu.

Ka malehet ne umul due ki Kristu

* ^{2:5} Te Grigu: piru duma a nikaniyu te panisingan. † ^{2:8} Te Grigu: egdakep.
 2:12 Rum 6:4. 2:13 Ipi 2:1-5.

⁶ Purisu, puun su indawat niyud ma si Kristu Hisus isip Magbebaye niyu, pabulus kew ugpe ne egkasabeka diye te kandin. ⁷ Deralid kew wey tulin kew diye te kandin. Ne lig-ena niyu ka pegpalintutuu niyu sumale te impanulu kaniyu, wey keilangan ne egpasalamatan niyu amana ka Manama.

⁸ Bantey kew ne ware egpakalimbung[†] kaniyu pinaahi te ware karuan wey te kene ne malehet ne pegpanulu. Ka sika ne pegpanulu dan, puun pad te tuluuwen te kabuybuyahan dengan, wey egpuun te me panisingan ne mig-ugpe kayi te kalibutan piru kene bes ne diye egpuun te ki Kristu. ⁹ Ka malehet, neyimu ne etew si Kristu, piru minsan pad due, duen ded te kandin ka pegka-Manama rin. ¹⁰ Ne puun su nasabeka kew e ki Kristu, egkakumplitu kew e. Si Kristu ka labew te langun ne kene egkakita ne due me geem wey me katenged.

¹¹ Ne puun te nasabeka kew e diye ki Kristu, hendue te natuli kew e, piru kene ne iling te pegtuli te etew ne eg-aween ka laplap, ke kene, ka in-awe ni Kristu, sika se mareet ne diye te pusung te etew. ¹² Te pegbewutismu kaniyu, nekeiling te inlebeng kew e duma ki Kristu. Ne puun su nasabeka kew e ki Kristu, hendue te neuyag kew e man-e duma kandin

tenged te pegpalintutuu niyu te geem te Manama.¹³ Dengan, hendue te namatey kew diye te tangkaan te Manama tenged te me sale niyu wey tenged su ware kew nasakup te Balaud te Hudiyu. Piru kuntee, in-uyag kew te Manama duma ki Kristu. Ne impasaylu e te Manama ka langun ne me sale ta.¹⁴ Impunas din e ka listaan te langun ne me sale ta ne iyan egpuunan ne egkewukuman ki, wey ingkuwa rin e sika se langun pinaahi te pegpalansang ni Kristu diye te krus.[‡]¹⁵ Ne pinaahi rue, natalu te Manama ka due me geem wey katenged ne kene egkakita. Impeeyangheyang din diye te tangkaan te langun ne nakapanalu sikandin.

¹⁶ Purisu kene niyu ituhut ne due eggukum kaniyu ke nekey ka egkeenen niyu, eg-inumen niyu, wey ke nekey ka eggimuwen niyu te timpu te mahal ne aldew, te peglayag te bulan, wey ke Aldew naa te Peggimeley.¹⁷ Sika se langun ne tuluuwen, alung de ke nekey ka egginguma. Piru miggingume en iya ka malehet, ne iyan si Kristu!¹⁸ Kene niyu ituhut ne due eggukum kaniyu ne egpehes kaniyu ne egpariralem te pegkeetew niyu wey egpasimba te me panalihan. Ka sika ne me etew, egkahi ne labew kun sikandan puun

su nakakita kun te igpakita te Manama ne hendue te taheinep. Migpaambug sikandan te kaalam dan, piru ware bes karuan te pegpaambug dan tenged su puun de sika te sumansuman te etew.¹⁹ Migleke e sikandan ki Kristu te isip ulu te langun ne migmalintutuu ne iyan ka lawa. Iling te ulu ne iyan egmandu te lawa, sikan naa, si Kristu degma ka egmandu te langun ne migmalintutuu eyew egkarawat dan ka keilangan dan wey egkasabeka sikandan, iling te lawa ne nekegsumpul-sumpul pinaahi te me lelenguan wey me uhat. Ne egtulin ka lawa sumale te igkeupii te Manama.

Ka pegpatey wey ka pegugpe duma ki Kristu

²⁰ Na, sikaniyu se migmalintutuu, hendue te namatey kew e duma ki Kristu wey kennad e ne ka me panisingan ne mig-ugpe kayi te kalibutan ka egmandu kaniyu. Ne mania te egpabulus kew pad ne egikul te pegbebatasan te me etew kayi te kalibutan? Mania te eg-ikulen niyu pad ka me balaud ne eggenendue,²¹ “kene ka gen-gen kayi,” “kene ka keen due,” “kene ka samsam te sika.”²² Ka sika ne me tuluuwen, meyitenged de te seeye se egmanlihad de pegkapenga eggamita iling te egkakeen. Ne puun de sika

2:14 Ipi 2:15. **‡ 2:14** Te Grigu: te peglansang te listaan diye te krus. **2:16**
Rum 14:1-6. **2:19** Ipi 4:16.

te me tuluuwen wey pegpanulu te me etew.²³ Emun ke egsuumsuwanen ta ka me tuluuwen, hendue te egkapal-intutuuwan iya, su seeye se egtuman due, mapahetpet ne egsimba wey egspariralem te pegkeetew ran, wey egbabayaran pad nikandan ka me lawa ran ne makasesale. Piru ka malehet, kene sika egsakabulig te pegtigkel te igkeupii te lawa te etew.

3

¹ Na, tenged su neuyag kew ma duma ki Kristu, iyan niyu re pakannekali ka diye te dibabew, ka migpinnuuwan ni Kristu ne diye te igkakawan'an* te Manama. ² Iyan niyu re layun sumsumana ke nekey ka diye te dibabew, kene ne sika se kayi te ampew te tane. ³ Su hendue te namatey kew e, wey needles e diye te Manama ka umul niyu duma ki Kristu. ⁴ Emun ke igsakite e si Kristu, ka migbehey kaniyu te umul, egsakalagkes kew e degma egkakita diye te katelesan din.

Ka tapey wey ka iyam ne umul

⁵ Purisu, inniyuhi[†] niyud e ka igkeupii niyu kayi te kalibutan: ka pegpeyilabetey se kene ne alunggu, ka peggi mu te minsan nekey ne malindit, ka pegkabal-inggeren, ka mareet ne

igkeupii. Inniyuhi niyud man-e ka peggakam-hakam te kasangkapan su hendue te sika ka diyus-diyus niyu. ⁶ Ne puun due, eglegparan te Manama seeye se eggimu te iling due. ⁷ Sikaniyu dengan, iling degma due ka pegbebataan niyu.

⁸ Piru kuntee, keilangan ne eg-engkeran niyud e ka pegkalangeti, pegkabelu, pegdumut, pegbaley-baley te duma, wey ka maligsem ne me lalag. ⁹ Kene kew e peub-ubatey puun su naluung niyud e ka tapey ne pegkeetew niyu ne sika se ingkalayami niyud e ne batasan ne mareet,¹⁰ wey isaluub niyu ka iyam ne pegkeetew niyu. Sika ka iyam ne pegkeetew ne layun egsakalawati te Manama ne iyan innimu rue, eyew egpekeiling kew kandin wey eyew egkeilaan niyu pad iya sikandin. ¹¹ Ne tenged kayi, nenekeg-ililing de ka langun, Hudiyu ma wey se kene, nenatuli ma wey se ware, me lapu ma, ware nenekeiskuyla, me uripen ma wey se kene. Su si Kristu ka subla ne impurtanti wey due sikandin te minsan hendei.

¹² Na, sikaniyu se inalam te Manama, ne inggey-inawaan din wey inlein din para kandin mismu, keilangan ne antus kew, hiid-uwen

3:1 Sal 110:1. * **3:1** Sumale te tuluuwen te me Hudiyu, ka talahuren de ne etew ka egsakapinnuu diye te igkakawan'an te mabantug ne etew. † **3:5** Te Grigu: eggimatayan. **3:9** Ipi 4:22. **3:10** Ipi 4:24; Hin 1:26. **3:12** Ipi 4:2.

kew, meupiya kew te duma niyu, wey mapariralemen kew.¹³ Pegpariralemey kew wey pegpasayluwey kew ke due igsagsahukul niyu diye te minsan hentew ne duma niyu. Pegpasayluwey kew su impasaylu kew man e te Manama.¹⁴ Labew te langun, keilangan ne egpahayinaweeey kew su ka geyinawa ka egpakabagkes eyew ware kulang te pegkasabeka niyu.¹⁵ Peugpaa niyu due te pusung niyu ka keupianan ne imbehey ni Kristu, su in-alam kew te Manama eyew egkasabeka kew due te sabeka ne lawa. Ne pasalamati niyu layun ka Manama.¹⁶ Keilangan ne ka lalag ni Kristu, amana egpakapamula diye te pusung niyu. Papanpanuluey kew wey papanpanayey kew duma te langun ne katuenan. Ulahing kew te me salmu wey te me ulahingen te pegdayan te Manama, wey te me ulahingen ne igpanulu kaniyu te Panisingan te Manama duma te pegpasalamat ne egpuun te pusung niyu.¹⁷ Purisu, minsan nekey ka eggimuwen niyu wey ke iglaglag naa, himuwa niyu ka langun pinaahi te ngaran te Magbebabe ne si Hisus, wey pasalamati niyu ka Manama ne Amey pinaahi kandin.

Ka tambag te me pamilya

¹⁸ Sikaniyu se me asawa ne me malitan, paruma-ruma

3:13 Ipi 4:32. **3:16** Ipi 5:19-20. **3:18** Ipi 5:22; 1Pid 3:1. **3:19** Ipi 5:25; 1Pid 3:7. **3:20** Ipi 6:1. **3:21** Ipi 6:4. **3:22** Ipi 6:5-8. **3:25** Diy 10:17; Ipi 6:9.

kew te me asawa niyu su sika ka eleg ne eggimuwen te me malitan ne migpalintutuu te Magbebabe.

¹⁹ Sikaniyu se manggiasawe e ne me lukes, keilangan ne eggeyinawaan niyu ka me asawa niyu wey kene niyu baybayari sikandan.

²⁰ Me anak, tumana niyu layun ka amey wey iney niyu su egpakahale sika te Magbebabe.

²¹ Me amey, kene niyu peyibelua ka me anak niyu, su kema ke egkaawe ka kabagget dan.

²² Me uripen, te langun ne eggimuwen niyu, tumana niyu ka me ahalen niyu kayi te ampew te tane. Tumana niyu sikandan ne kene ne puun de su egparayan-dayan kew kandan ke egtengteng sikandan kaniyu, ke kene, tumana niyu sikandan ne egpuun te pusung niyu tenged su due pegtahud niyu te Magbebabe.²³ Minsan

nekey ka eggimuwen niyu, himuwa niyu sika ne egpuun te pusung niyu iling te ka Magbebabe ka egpamakayen niyu, ne kene de ne me etew kayi te ampew te tane.

²⁴ Uya su nakanengneng kew e ne egpakarawat kew te intahahe te Magbebabe kaniyu isip unag niyu, tenged su ka Magbebabe ne si Kristu ka impamakey niyu.²⁵ Piru ka minsan hentew ne eggimu te mareet, egsulian sumale te

mareet ne hinimuwan din, su
ware egdapihan te Manama.

4

¹ Me ahalen, keilangan
ne meupiya wey eleg ka
eggimuwen niyu diye te
me uripen niyu, tenged su
nakataha kew e ne due
degma Ahalen niyu diye te
langit.

*Ka duma pad ne pegpanulu
te migmalintutuu*

² Pabulus kew layun ka
eg-ampu. Ne emun ke
eg-ampu kew, keilangan
ne egbantayan niyu ka
me suman-suman niyu ne
kene egpakaSuwey, wey
pasalamati niyu ka Manama.

³Iampu key degma nikaniyu,
ne ka Manama ka egbehey
kanami te kaayunan te

peg pangguhud te lalag din*
su eyew igpakapanengneng
ney ka needles ne meyitenged
ki Kristu, ne iyan egpuunan
te naprisu a kuntee. ⁴Ampu
kew ne egkaay-ayaran ku
sika te pegpanengneng, su
keilangan ne eggimuwen ku
sika.

⁵ Upiani niyu ka pegbe-
batasan niyu diye te taliware
te kene egmalintutuu, wey
palimmakuti niyu ka langun
ne kaayunan. ⁶Keilangan ne
ka peglalag-lalag niyu, layun
meupiya wey manedted,
eyew egpakataha kew ke
egmenuwen niyu te egtabak
ka langun ne eg-inse kaniyu.

*Ka katammanan ne peg-
pangemusta*

⁷ Na, meyitenged keddiey
kai, iyan e egpangguhud
kaniyu ka pinalangge ku
ne suled te pegpalintutuu
ne si Tikiku. Matinumanen
sikandin ne miggimu wey
duma ku te migpamakey
te Magbebaye. ⁸Sika ka
egpuunan ne igpeenduen
ku sikandin te kaniyu eyew
egpakataha kew ke namenu
key e kayi wey eyew egpak-
abagget pad sikandin kaniyu.
⁹ Egdumaan sikandin ni
Unisimu, ka matinumanen
wey pinalangge ne suled
ta wey matig-duen ded
sikandin te kaniyu. Eg-
pangguhuran kew nikandan
meyitenged te langun ne
neyitabu kayi.

¹⁰ Eg pangemusta kaniyu
si Aristarku, ka duma
ku te pinirisu, wey si
Markus ne suled ni Birnabi.
(Tapey kew e nahuhuri
meyitenged kandin, ne emun
ke eggendue, alumamaa niyu
sikandin.) ¹¹Egpangemusta
degma kaniyu si Hisus ne
migngaranan ded degma ki
Hustu. Sikandan de iya mule
ka tat-tatelu ne me Hudiyu†
ka nakaapil ne miggimu
duma keddiey eyew te peg-
pangguhud meyitenged te
Peghari te Manama, wey
nabagget a nikandan.

¹² Eg pangemusta degma
kaniyu si Ipapras ne matig-

* 4:1 Ipi 6:9. 4:3 Te Grigu: ka eglukat kanami te gumawan para te lalag. 4:5
Ipi 5:16. 4:7 Him 20:4; 2Tim 4:12. 4:7 Ipi 6:21-22. 4:9 Pilim 10-12. 4:10
Him 19:29; 27:2; Pilim 24; Him 12:12,25; 13:13; 15:37-39. † 4:11 Te Grigu: me
etew ne tinuli. 4:12 Kul 1:7; Pilim 23.

duen ded te kaniyu, sabeka sikandin ne uripen ni Kristu. Layun egpakannekal sikandin ka eg-ampu ne eyew egmalig-en wey eg-matesan ka pegpalintutuu niyu, wey egtuman kew te langun ne pegbuut te Manama. ¹³ Su sikeddi mismu ka egpamalehet ne nalasey sikandin para kaniyu wey te seeye se matig-Lawdisya wey Hirapulis. ¹⁴ Egpangemusta degma kaniyu si Dimas wey si Lukas ne pinalangge ta ne talagbawi.

¹⁵ Ipangemusta a te mesuled ta diye te Lawdisya, ki Nimpa, wey te migmal-intutuu ne eglibulung diye te baley rin. ¹⁶ Emun ke egkapenga te egbasa due te kaniyu ka seini ne sulat, ipabasa niyu degma te migmalintutuu diye te Lawdisya wey basaa niyu degma ka sulat ne igpeendiye te kandan. ¹⁷ Kahii niyu si Arkipu ne keilangan ne egpeimpusan kandin ka himu ne igpeyimu kandin te Magbebaye.

¹⁸ Sikeddiey si Pablo ka mig-uney-uney ne migsulat te seini ne pegpangemusta. Kene niyu kalingawi ne naprisu a.

Ka keupiya wey keyid-u ne egpuun te Manama, egkaangken niyu.

Ka An-anayan ne Sulat ni Pablu te Matig-Tisalunika

Igpewun-a

Ka Tisalunika ka iney ne siyudad te prubinsya te Masidunya ne sakup te nasud te Ruma. Migpanulu si Pablu te lalag te Manama diye te Tisalunika te pegawe din e diye te Pilipus (Me Himu 17:1-4). Te ware naluhey, due me pegsupak ne egpuun te me Hudiyu ne neenenduenan te pegwali ni Pablu diye te kene ne me Hudiyu (Me Himu 17:5-9). Ne dutu, napehes si Pablu ne egawe diye te Tisalunika wey miggendiye sikandin te Birya (Me Himu 17:10-13). Te ware naluhey, miggendiyad e man-e sikandin te Atinas (Me Himu 17:14-15). Nataman, migpabulus e sikandin diye te Kurintu (Me Himu 18:1-17). Te pegginguma rin diye, nakarawat sikandin te guhuren ni Timutiyu ne duma rin te himu. Impangguhuran sikandin ni Timutiyu meyitenged te egkeula-ula te punduk te migmalintutuu diye te Tisalunika.

Ka seini se *An-anayan ne sulat ni Pablu te Matig-Tisalunika*, insulat din eyew te pegbagget wey te pegglien te migmalintutuu diye. Migpasalamat sikandin te guhuren meyitenged te pegpalintutuu ran wey te

geyinawa ran. Impasuman-suman din degma sikandan meyitenged te peg-ugpe din ne impapitew rin kandan te diye pad sikandin kandan. Intabak din man-e ka me inse ne egpuun diye te migmalintutuu meyitenged te peglibed ni Kristu, wey ke egpakaangken naan ded te umul ne ware egtamanan ka nammatey e ne migmalintutuu te kene pad eglibed si Kristu. Inggamit ni Pablu ka seini ne sulat eyew te pegpangguhud kandan te keilangan ne egpabulus sikandin eggimu te aldewaldew ne himu ran taheed te egtetahad sikandan te peglibed ni Kristu.

Ka nasulat te seini ne baseen

Igpewun-a 1:1

Ka pegpasalamat wey pegdayan 1:2-2:16

Ka meupiya ne guhuren ni Timutiyu 2:17-3:13

Ka peg-ugpe ne egpakaphale te Manama 4:1-12

Ka pegpanulu meyitenged te peglibed ni Kristu 4:13-5:11

Ka katammanan ne pegpaney-paney 5:12-22

Ka katammanan 5:23-28

¹ Sikeddiey si Pablu ka migpeuyan te seini ne sulat, duma ki Silas wey ki Timutiyu.

Egpangemusta key kaniyu due te Tisalunika ne migpalintutuu te Manama ne Amey wey te Magbebaye ne si Hisu Kristu.

Ka keyid-u wey keupianan ne egpuun te Manama, egkaangken niyu.

Ka pegdayan ni Pablu te migmalintutuu

² Egpasalamat key layun te Manama tenged kaniyu langun, wey kene key engked ka eg-ampu kaniyu. ³ Tagse peg-ampu ney diye te Manama ne Amey ta, egkasuman-suman ney layun ka meupiya ne himu niyu puun te pegpalintutuu niyu, wey ka kaali-ali niyu te pegbulig te duma puun te geyinawa niyu, wey ka peg-pabulus niyu te pegpallateng te peglibed te Magbebeye ta ne si Hisu Kristu. ⁴ Mesuled ney ne inggeyinawaan te Manama, nakataha key ne in-alam kew nikandin eyew egkeyimu ne keet-etawan din. ⁵ Nanengnengan ney seini tenged su indawat niyu ka Meupiya ne Panugtulen ne impanulu ney kaniyu. Ne kene ne iyan niyu re indawat kayi tenged te inlalag ney kaniyu, ke kene, tenged te geem wey te Panisingan te Manama ne kayi te kanami, wey tenged su migpalintutuu key ne malehet iya ka impanulu ney kaniyu. Nakaneng-neng kew e ne in/ay/ayaran ney ka peg-ugpe ney te duen key pad te kaniyu, su seini, para te keupianan niyu. ⁶ Igkarangeb, indawat niyu man-e ka lalag te Manama duma te kahale ne egpuun te Panisingan din minsan

amana kew baybayari. Te iling kayi ne paahi, neilin-gan key nikaniyu wey ka Magbebeye ta, ⁷ ne sikan naa ka neyimu kew ne meupiya ne panunggilingan te langun ne migmalintutuu diye te Masidunya wey kayi te Akaya. ⁸ Su puun due te kaniyu, nekeempet ka lalag te Magbebeye te seini ne me inged. Nekeempet degma te langun ne inged ka guhuren meyitenged te pegpalintutuu niyu te Manama, purisu kene ne keilangan ne sikanami pad ka egpangguhud te min-san hentew meyitenged due. ⁹ Su sikandan e mismu ka migpangguhud ke immenu key nikaniyu te eg-alumama te timpu ne migpanumbaley key due te kaniyu. Ne migpangguhuran key man-e nikandan ke immenu niyu te peg-engked te me diyus-diyus niyu eyew egpakapamakey kew te malehet wey manekal ne Manama. ¹⁰ Migpangguhuran key man-e nikandan meyitenged te pegtetahad niyu te Anak te Manama ne si Hisus ne eglibed kayi te ampew te tane ne egpuun te langit. Inuyag sikandin te Manama puun te kamatayen wey sikandin ka egluwas kanta puun te legpad te Manama ne egginguma.

2

Ka meupiya ne pegbe-batasan enni Pablu diye te Tisalunika

¹ Meyitenged te peggenden duen ney te kaniyu, me suled, nakanengneng kew mismu ne nakabulig iya seeye kaniyu. ² Nakanengneng kew man-e ne imbaybayaran key wey impeyilawan te diye key pad te Pilipus. Piru migbehayan key te Manama ta te kabulut te pegpangguhud te Meupiya ne Panugtulen due te kaniyu minsan masulug ka migsupak te inlalag ney. ³ Su ka impangguhud ney kaniyu, kene ne seyyup wey kene degma ne mareet ka tuyu ney, wey ware tuyu ney ne eg-akal te minsan hentew. ⁴ Nakita te Manama ne egkasalihan key, wey imbehayan key nikandin te katenged ne egpanulu te Meupiya ne Panugtulen. Purisu ke eglalag key, kene ne iyan ney tuyu ne egpahale te me etew, ke kene, te Manama ne iyan egpakakita te suman-suman ta. ⁵ Nakataha kew man-e ne ware key miggendue te kaniyu eyew eghulu kaniyu, wey nakanengneng ka Manama ne ware tuyu ney ne egpaneleppi kaniyu. ⁶ Ne ware key man-e migpammitew te pegdayan te me etew, minsan diye te kaniyu wey te minsan hentew. ⁷ Minsan me apustulis key ni Kristu ne due katenged ne egbuut kaniyu, piru amana ney ayayari sikaniyu te duen key pad iling te sabeka ne iney ne egtanggu te me anak din. ⁸ Ne tenged su dakel ka geyinawa

ney kaniyu, kene ne ka Meupiya ne Panugtulen de ne egpuun te Manama ka imbehey ney kaniyu, ke kene, minsan ka kanami mismu ne umul, uya su amana ney geyinawei sikaniyu. ⁹ Su egkasuman-suman niyu bu pad me suled, ne nabeley key wey nalasey te duen key pad te kaniyu. Aldew wey marusilem miggimu key eyew kene key egkeyimu ne mabehat te minsan hentew due te kaniyu taheed te migpangguhud key te Meupiya ne Panugtulen ne egpuun te Manama.

¹⁰ Sikaniyu naa wey ka Manama ka talagpamalehet ney ne ka peg-ugpe ney due te kaniyu te migmalintuu, matareng iya, ware igkarewey, wey egpakahale te Manama. ¹¹ Su nakanengneng kew e ne ka innimu ney diye te kaniyu langun, iling te eggimuwen te sabeka ne amey diye te me anak din. ¹² Imbanasalan ney sikaniyu, imbagget ney, wey inhangyu ne eg-ugpe iling te peg-ugpe ne igkeupii te Manama eyew egpakahale kew kandin ne iyan eg-alam kaniyu ne egkasakup kew te peghari din wey te katelesan din.

¹³ Migpasalamat key mane layun te Manama tenged su indawat niyu ka lalag din ne impangguhud ney kaniyu. Indawat niyu sika su nakasabut kew ne kene ne lalag de sika te etew, ke

kene, lalag iya te Manama, wey iyan egbalew-balew te suman-suman niyu wey te pegbebatasan niyu te migmalintutuu.¹⁴ Su ka neyitabu kaniyu me suled, iling degma te neyitabu te me punduk te migmalintutuu te Manama diye te Hudiya ne migpalintutuu ki Kristu Hisus. Mig-antus kew te pegbayad-bayad te me etew due te kaniyu, iling degma te peg-antus dan te pegbayad-bayad te me duma ran ne me Hudiyu.¹⁵ Sika ne me Hudiyu ka miggimatey te Magbebaye ne si Hisus wey te me prupita dengan te Manama, wey ka migpaawe degma kanami. Kene egpakapahale sikan-dan te Manama wey kuntere sikandan te langun ne etew.¹⁶ Migbalabahan key perem nikandan ka egpangguhud diye te kene ne me Hudiyu te lalag ne egpakuwas kandan. Purisu, nanasnasian natimuli ka me sale dan. Ne miggingle en iya diye te kandan ka dusa te Manama.

Egkeupian perem ne eglibed ensi Pablu diye te Tisalunika

¹⁷ Ke sikanami me suled, ligkat te nakapariyu key kaniyu te ware de naluhay, nakaheram key e te alimengew kaniyu su duen de iya te kaniyu ka suman-suman ney. Ne sikan naa ka amana key migpakannekal ne eglibed due te kaniyu

¹⁸ su egkeupian key ne egpakigkita kaniyu, labi en iya sikeddi. Kamasalig ad e migbebentaan ne egpanumbaley due te kaniyu piru ware key nakabulus su imbalabahan key ni Meibulan.¹⁹ Su hentew ma ka igkahale ney wey ka egpuunan te eg-im-imanen ney? Sikaniyu iya! Na, hentew ma ka igaapeggasal ney te tangkaan te Magbebaya ta ne si Hisus te peglibed din? Sikaniyu re iya!²⁰ Uya, sikaniyu iya ka igkahale ney wey ka egpuunan ne egtahuren key.

3

¹⁻² Purisu, te kene ney e egkaantus ka pegkeipeng ney kaniyu, nakasuman-suman key ne igpeenduen ney si Timutiyu, ne sikanami, egpalunggehaat key pad mule diye te Atinas. Sikandin ka suled ta te pegpalintutuu wey suluhuanen degma te Manama te pegpangguhud te Meupiya ne Panugtulen meyitenged ki Kristu. Impeenduen ney sikandin te kaniyu eyew eglig-en kaniyu wey ebagget te pegpalintutuu niyu,³ su eyew ware sabeka kaniyu ne eg-engked te pegpalintutuu rin tenged te me pegbayad-bayad. Nakanengneng kew mismu ne iling kayi ne me pegbayad-bayad ka egkeula-ula ta.⁴ Su minsan te duen key pad te kaniyu, napanpanayan ney

e sikaniyu ne egbaybayaran ki iya, ne kuntee, nakaneng-neng kew e ne neyitabu en iya sika. ⁵ Purisu te kene ad e egpakaantus te keipeng ku, impeenduen kud e si Timutiyu eyew egkatahaan ku ke manekal naan pad ka pegpalintutuu niyu. Su neipeng a ke natintal kew e ni Meibulan wey egkeyimu e ne ware karuan te neyimu ney due te kaniyu.

⁶ Piru nakalibed e kuntee si Timutiyu puun due wey meupiya ka guhuren din kanami meyitenged te pegpalintutuu niyu wey te geyinawa niyu. Migpangguhud sikandin ne layun kew kun egkahale ka egsuman-suman kanami wey egkeupian kew kun ne egpakigkita kanami iling degma te igkeupii ney. ⁷ Ne sikan naa me suled, minsan masalig ka prublima ney wey ka eg-antusen ney, nabagget key red tenged te kaniyu ne pegpalintutuu. ⁸ Ne kuntee, nakapalene-lene e ka geyinawa ney te pegnengnengi ney ne manekal pad ka pegpalintutuu niyu te Magbebeye. ⁹ Amana ne dakel ka pegpasalamat ney te Manama te kahale ney diye te tangkaan din tenged kaniyu. ¹⁰ Aldew wey marusilem, amana key mig-ampu te Manama ne egpakigkita key pad perem kaniyu eyew egkatimulan pad ke nekey ka kulang te pegpalintutuu niyu.

¹¹ Eg-ampu key ne

egtuhutan key te Manama ne Amey ta wey te Magbebeye ta ne si Hisus ne egpekeenduen key te kaniyu. ¹² Eggeheten te Manama ka geyinawa niyu te tagse sabeka wey te langun ne etew, iling keehet te geyinawa ney kaniyu. ¹³ Ne puun kayi, eglig-enen kew nikandin wey eggimuwen kew ne matulus wey ware igkarew-ey diye te tangkaan te Amey ta ne Manama te aldew te pglibed te Magbebeye ta ne si Hisus ne egdumaan te langun ne keet-etawan te Manama.

4

Ka peg-ugpe ne egpakapahale te Manama

¹ Na, me suled, impanulu ney e sikaniyu ke egmenuwen te eg-ugpe ne egpakapahale te Manama, ne innimu niyud en iya seini. Piru eghangyuen ney pad sikaniyu wey egbanasalan, pinaahi te katenged ne imbehey kanami te Magbebeye ta ne si Hisus, ne timuli niyu pa ka himu niyu ne egpakapahale te Manama.

² Su nakanengneng kew e ke nekey ka insuhu ney kaniyu pinaahi te katenged ne imbehey kanami te Magbebeye ne si Hisus. ³ Iyan igkeupii te Manama ne egkeyimu kew ne matulus, purisu pakaddiyui niyu ka egpeggilabetey ne kene ne alunggun. ⁴ Ne bantayi niyu ka me lawa niyu eyew kene kew egkamansaan wey

meupiya ka pegkeetew niyu.
⁵ Kene niyu parumdumeyi ka mareet ne igkeupii te lawa niyu iling te innimu te me etew ne ware nekeila te Manama,⁶ su kema ke puun due egkariekan niyu ka katenged te duma niyu ne migmalintutuu. Inlalahian ney e dengan sikaniyu meyitenged kayi wey impanpanayan ney e sikaniyu ne eglegparan te Manama ka etew ne eggimu te iling due.⁷ Su nakanengneng kid man-e ne ware ki alama te Manama te peggimu te malindit, ke kene, eyew egkeyimu ki ne matulus.⁸ Purisu, ka minsan hentew ne egbalahad te seini ne pegpanulu, kene ne iyan din ingkenkenaan ka pegpanulu te etew, ke kene, ka pegpanulu te Manama ne iyan egbehey kaniyu te matulus ne Panisingan din.

⁹ Ne kuntee, kenad e ne keilangan ne egsulat e pad kaniyu meyitenged te peggeyinawa te duma ne migmalintutuu, su ka Manama mismu ka migpanulu kaniyu ke egmenuwen te eggeyinawa te tagse sabeka. ¹⁰ Ne miggeyinawaan niyud iya ka langun ne migmalintutuu diye te intiru ne Masidunya. Piru me suled, egbanasalan ney pad sikaniyu ne heheta niyu pa ka geyinawa niyu te tagse sabeka. ¹¹ Sumale te insuhu ku dengan kaniyu, pakannekali niyu ne due keupianan te peg-ugpe niyu.

Keilangan ne ka tagse sabeka kene eggilabet te eggimuwen te duma, wey egpakannekal eggimu para te keuyahan din.¹² Emun ke egtumanen niyu sika, egtahuren kew te me etew ne kene egpalintutuu te Manama, wey kene kew salig te duma ne etew ke nekey ka keilangan niyu.

Ka peglibed te Magbebeye

¹³ Ne kuntee me suled, egkeupian key ne egkatahaan niyu ke nekey iya ka egkeyitabu te seeye se nemamatey e, eyew kene kew eglungku iling te me etew ne ware egkapallateng.¹⁴ Su puun te migpalintutuu ki ne namatey si Hisus wey neuyag ded man-e, egpalintutuu ki man-e ne timpu te peglibed din, igparuma red te Manama kandin seeye se migmalintutuu ne nemamatey e.¹⁵ Seini ka igpangguhud ney kaniyu sumale te lalag te Magbebeye: sikanta se neuyag pad te peglibed din, kene ki iyan egguna te seeye se nemamatey e.¹⁶ Te seeye ne timpu, egpamanueg ka Magbebeye puun te langit ne egbalbalukan ka egmandu, duma te laheng te pangulu te panalihan wey duma te dahing te trumpita te Manama. Ne ka nemamatey ne migpalintutuu ki Kristu, egkewun-aan e egkeuyag.¹⁷ Pegkapenga rue, sikanta se neuyag pad, egbatunen e duma kandan diye te gapun eyew egtemu te Magbebeye

diye te aw-awangan. Puun due, egmektegdua kid e kandin te ware egtamanan.¹⁸ Purisu pegbaggetey kew ka tagse sabeka pinaahi te seini ne pegpanulu.

5

¹ Me suled, kenad e ne keilangan ne egsulat e pad kaniyu ke ken-u egkeyitabu ka peglibed te Magbebeye.² Su nakanengneng kew e ne ka peglibed din egpekeiling te takawen ne eggingsuma te marusilem.³ Egkeyitabu sika te timpu ne egkahi ka me etew, "Malinawen ka langun wey ware samuk." Piru due-rue ne eggingsuma diye te kandan ka karereetan ne egpekeiling te pegginguma te masakit ne eggeramen te eglestan. Ne ware sabeka kandan ne egpakapanalliya.

⁴ Piru sikaniyu mule me suled, kene kew e ne sakup te marusilem, purisu kene kew e egkeinu-inu ne egpekeiling te takawen ka peglibed te Magbebeye.⁵ Su sikaniyu langun, sakup e te Manama wey duen kew e te malayag. Kene kid e ne me sakup ni Meibulan wey kenad ne due te marusilem.⁶ Purisu, kene ki eglichereng iling te duma ne me etew ne imbalahad dan ka Manama, ke kene, keilangan ne egbantey ki wey egtigkel ne eggimu te mareet.⁷ Su ka me etew, wey re iya eglichereng wey eg-iinum ke marusilem.⁸ Piru sikanta se nalyahan e,

keilangan ne egtigkel kid e eggimu te mareet. Igsaluub ta ka putew ne igdingding te kumeng ta ne iyan sika ka pegpalintutuu ta te Manama wey ka peggeyinawa ta te duma. Ne igsaluub ta man-e ka putew ne kalu ne igdingding te ulu ta ne iyan sika ka pegpallateng ta ne egluwasen ki te Manama.⁹ Su ware ki himuwa te Manama eyew eglegparan, ke kene, eyew egkluwas ki pinaahi te Magbebeye ta ne si Hisu Kristu.¹⁰ Migpeyimatey sikandin para kanta eyew eg-ugpe ki duma kandin te ware egtamanan, minsan ke namatey kid e wey ke neuyag pad te timpu te peglibed din.¹¹ Purisu pabulus kew ka tagse sabeka ne egpabanasa-ley wey egpabulihey iling te innimu niyu kuntee.

Ka katammanan ne pegpanulu wey pegpangemusta

¹² Ne kuntee, me suled, eghangyu key kaniyu ne ilaa niyu seeye se me pangulu ne migpakannekal ne miggimu te himu te Magbebeye due te kaniyu. Sikandan ka epgangulu kaniyu wey ka epgangulu kaniyu.¹³ Amaneyi niyu tahura sikandan wey geyinawei tenged te neyimu ran due te kaniyu. Keilangan ne peup-upianey kew.

¹⁴ Egbanasalan ney sikaniyu me suled, ne panpanayi niyu seeye se me pehulen, baggeta niyu seeye se me liyasen, bulihi niyu

seeye se magguye ka pegpal-intutuu, wey kene kew keubil te minsan hentew.¹⁵ Kene niyu tuhuti ne due sabeka kaniyu ne egsuli te minsan hentew ne eggimu te mareet kandin, ke kene, pakannekali niyu ne meupiya layun ka eggimuwen niyu diye te tagse sabeka kaniyu wey diye te langun ne etew.

¹⁶ Kahale kew te langun ne timpu,¹⁷ ampu kew layun,¹⁸ wey pasalamati niyu ka minsan nekey ne egginguma due te kaniyu, su seini ka pegbuut te Manama ne eggimuwen niyu te nasabeka due ki Kristu Hisus.

¹⁹ Kene niyu balabahi ka Panisingan te Manama,²⁰ wey kene niyu lemeti ka guhuren te etew ne impanengneng te Manama.²¹ Keilangan ne eg-el-elehan niyu ka langun ke malehet naa ne diye egpuun te Manama. Dawata niyu ka meupiya,²² wey pakaddiyui niyu ka minsan nekey ne mareet.

²³ Ka Manama te keupianan ka egbulig kaniyu eyew egkeyimu kew ne matulus. Egtamengan din ka pegkeetew niyu, iling te panisingan niyu, suman-suman niyu, wey lawa niyu eyew ware igkarew-ey te timpu te peglibed te Magbebabe ta ne si Hisu Kristu.²⁴ Matinumanen ka Manama ne mig-alam kaniyu, wey eggimuwen din iya ke nekey ka ingkahi rin.

²⁵ Me suled, pabulus kew ampu kanami.

²⁶ Pegpangemusteeey kew ka tagse sabeka te pegpapitew ne migpaheyinaweeey kew.*

²⁷ Te ngaran te Magbebabe, egsuhu a kaniyu ne basaa niyu seini se sulat diye te langun ne migmalintutuu.

²⁸ Ka keupiya wey keyid-u ne egpuun te Magbebabe ta ne si Hisu Kristu, egkaangken niyu.

* **5:26** Te Grigu: matulus ne peggarek.

Ka Igkarangeb ne Sulat ni Pablu te Matig-Tisalunika

Igpewun-a

Ka seini ne sulat, insulat ni Pablu ne igpeendiye te punduk te migmalintutuu diye te Tisalunika (Me Himu 17:1-10). Napehes si Pablu ne eg-awe diye te Tisalunika tenged su due me Hudiyu ne neenenduenan te pegwali rin diye te kene ne me Hudiyu. Ne miggalin sikandin te Kurintu wey diye din sulata ka an-anayan wey ka igkarangeb ne sulat din te matig-Tisalunika.

Te seeye ne timpu, nalibeg ka migmalintutuu diye te Tisalunika su due pegpanulu ne nakasamuk kandan, su miglibed kun e ka Magbebabe ne si Hisu Kristu. Tenged su nalibeg e sikan dan, imbalabahan ni Pablu ka sika ne pegpanulu pinaahi te pegpasabut din kandan te duen pad kasamuk wey karereetan ne eggingga te kene pad egliped si Kristu. Ka eg-uyan due, sika se egkuntere ki Kristu ne kein-inuwan ne pangulu ne egngaranan te “Etew ne Talag-apul te me balaud.”

Impanulu ni apustul Pablu ne ka egbasa te seini ne sulat, keilangan ne egtanudtanud te langun ne impanulu din kandan minsan pad

te me keyirapan wey me pegantus. Keilangan ne egpabulus sikandan ka eggimu para te keuyahan dan wey eggimu te meupiya, iling degma te innimu enni Pablu.

Ka nasulat te seini ne baseen

Igpewun-a 1:1-2

Ka pegpasalamat enni Pablu te matig-Tisalunika wey ka peg-ampu dan 1:3-12

Ka pegpanulu meyitenged te peglibed ni Kristu 2:1-17

Ka pegbanasal meyitenged te peg-ampu wey te kene egpapehul 3:1-15

Ka katammanan 3:16-18

¹ Sikeddiey si Pablu duma ki Silas wey ki Timutiyu ka migpeuyan te seini ne sulat.

Egpangemusta key kaniyu due te Tisalunika ne migmalintutuu te Manama ne Amey ta wey te Magbebabe ne si Hisu Kristu.

² Ka keyid-u wey keupinan ne egpuun te Manama ne Amey wey te Magbebabe ne si Hisu Kristu, egkaangken niyu.

Ka pegpasalamat wey pegampu ni Pablu

³ Keilangan ne layun key egpasalamat te Manama meyitenged kaniyu me suled. Eleg iya ne egpasalamat key kandin, uya su amana migtulin ka pegpalintutuu niyu ki Kristu wey neehet ka peggeyinaweey niyu te tagse sabeka. ⁴ Purisu igpeggasal ney sikaniyu diye

te me punduk te migmalintutuu ne egkeendiyaan ney. Igmangguhud ney kandan ka meyitenged te pegpalintutuu niyu wey te pegantus niyu te langun ne me pegbayad-bayad kaniyu wey me keyirapan ne eg-antusen niyu.⁵ Seini ka palinneu ne matareng ka peggukum te Manama, su pinaahi te me keyirapan ne in-antus niyu tenged kandin, eg-isipen kew ne likes ne egkasakup te peghari din.⁶ Matareng iya ka Manama, uya su seeye se migpaantus kaniyu, epaantusen din degma.⁷ Ne sikaniyu se imbaybayaran, epeyimelayen din duma kanami. Eggimuwen din seini te timpu ne egpakite e ka Magbebeye ne si Hisus ne diye egpuun te langit ne egdumaan te maresen ne me panalihan din.⁸ Eggendini sikandin ne egkalingutan te hapuy ne egkanlabkanlab, wey eglegparan din seeye se ware nekeila te Manama wey ware migpalintutuu te Meupiya ne Panugtulen meyitenged te Magbebeye ta ne si Hisus.⁹ Eglegparan sikandan te kamatayen ne ware egtamanan wey igpepariyu e sikandan te Magbebeye wey kene dan e egpakkita te katelesan te karesen din.¹⁰ Egkeyitabu kangkuwa sika te aldew te pegginguma te Magbebeye. Eglibed sikandin ne egdayanen wey egtahuren tenged te keet-etawan din ne

iyen seeye se migpalintutuu wey miggalig kandin. Ne egpakkagkes kew e degma te seeye se egdayan kandin, uya su migpalintutuu kew ma te impanugtul ney kaniyu.

¹¹ Sika ka egpuunan ne layun key eg-ampu kaniyu. Egbuyuen ney te Manama ta ne eg-isipen kew nikandin ne likes ne eg-alamen din. Ne eg-ampu key man-e ne pinaahi te geem din, egkatuman ka langun ne meupiya ne igkeupii niyu wey egkapenga ka langun ne eggimuwen niyu puun te pegpalintutuu niyu.¹² Ne pinaahi due, egkarayan ka ngaran te Magbebeye ta ne si Hisu Kristu tenged kaniyu, wey egkarayan kew degma tenged kandin. Egkatuman seini se langun puun te keupiya wey keyidu te Manama ta wey te Magbebeye ne si Hisu Kristu.

2

Ka Etew ne Talag-apul te me balaud

¹ Kuntee, me suled, meyitenged te peglibed te Magbebeye ta ne si Hisu Kristu wey ka peglibulung ta te pegtemu kandin, ehangyu key kaniyu² ne kene kew mahaan kabantali wey kalaggew ke due egkarineg niyu ne miggingga kun e ka peglibed te Magbebeye. Min-san ke egkahi pad sikandan ne impalalag kun seeye se Panisingan, wey ke narineg dan naa, wey ke sulat naa

ne kayi kun egpuun te kanami. ³ Kene kew paakal te minsan hentew te minsan nekey ne paahi. Su kene eginguma ka sika ne Aldew ke kene pad egkeyitabu ne egkanasnasion ne pegsupak te me etew diye te Manama, wey te kene pad egpakita ka Etew ne Talag-apul te me balaud ne tapey e ne natagne ne egpekeendiye te karereetan. ⁴ Egkuntereen din ka in-ila te me etew ne me manama ran wey ka langun ne egsimbeen dan wey egpeila ne sikandin ka labew te seeye se egsimbeen dan. Ne egpinnuu sikandin diye te timplu te Manama wey eg-angken ne sikandin ka Manama.

⁵ Ware niyud nasumansuman ne impangguhuran kud sikaniyu kayi te duen e pad te kaniyu? ⁶ Nakataha kew e kuntee ke nekey ka nakabalabag kandin eyew wey en iya sikandin egpakita ke kandin e ne timpu. ⁷ Te seini ne timpu, migweil e te heles de kayi te kalibutan ka geem te peggimu te mareet, piru duen pad iya sika se nakabalabag kuntee. Sikan naa, ke egpaaween e sika, ⁸ henduen pad ne egpakita ka Etew ne Talag-apul te me balaud piru egdereetan sikandin te Magbebaye ne si Hisus pinaahi te geyinawa rin ne egpuun te bebe din wey eggimatayan din pinaahi te katelesan

te peglibed din. ⁹ Piru te kene pad eggimatayan ka Etew ne Talag-apul te me balaud, egbehayan sikandin ni Meibulan te geem te peggimu te langun ne klasi te me palinneu wey me kein-inuwan. ¹⁰ Eggamiten din ka minsan nekey ne klasi te mareet eyew egkaakalan ka me etew ne egpekeendiyad e te karereetan. Egkareetan sikandan tenged su ware dan geyinawei ka kamalehetan ne iyan egpakuwas kandan. ¹¹ Ne tenged kayi, amana palimbungi sikandan te Manama eyew egpalintutuu sikandan te me ubat, ¹² wey eyew egkewukuman ka langun ne ware migpalintutuu te kamalehetan su nahale ne eggimu te sale.

Ka in-alam te Manama ne egkuluwas

¹³ Piru me suled ne inggeyinawaan te Magbebaye, keilangan ne layun key egpasalamat te Magbebaye meyitenged kaniyu, uya su tapey kew e alama te Manama ne egkuluwas pinaahi te pegmatulus kaniyu te Panisingan te Manama wey pinaahi degma te egpalintutuu niyu te kamalehetan. ¹⁴ Seini ka egpuunan ne inalam kew nikandin pinaahi te Meupiya ne Panugtulen ne impangguhud ney kaniyu, su eyew egkatalaran kew te katelesan te Magbebaye ta ne si Hisu Kristu. ¹⁵ Purisu me suled, lig-en kew wey

tantanuri niyu ka langun ne impanuluNEY wey ke insulat neyna kaniyu.

16-17 Ne kuntee, ka Magbebaye ta ne si Hisu Kristu wey ka Manama ne Amey ta ka egbagget kaniyu wey ka egbehey kaniyu te kanekal eyew layun ne meupiya ka eggimuwen niyu wey ka eglalahen niyu. Su ka Manama ne miggeyinawa kanta, ka migbagget kanta te ware egkatamanan wey ka migbehey kanta te meupiya ne egkapallateng pinaahi te keupiya wey keyid-u rin.

3

Ampui key nikaniyu

¹ Te katammanan me suled, ampui key nikaniyu ne mahaan de egpekeempet ka lalag te Magbebaye wey egtahuren sika te me etew iling te neyitabu due te kaniyu. ² Iampu niyu degma ne egpangabangan key te Manama puun te makasesale wey maddeet ne me etew su kene nahud ne langun ne etew ne migpalintutuu te lalag din.

³ Piru matinumanen ka Magbebaye. Eglig-enen kew nikandin wey egtamengan kew puun te ahalen te me busew. ⁴ Meyitenged kaniyu, migsalig key te Magbebaye ne eggimuwen niyud e ka insuhu ney kaniyu wey egpabulus kew ka eggimu due.

⁵ Ne ka Magbebaye ka egtimul te pgsabut niyu te

geyinawa te Manama wey te peg-antus ni Kristu.

Ka pegpaney-paney meyitenged te me pehulen

⁶ Ne kuntee me suled, egsuhu key kaniyu pinaahi te ngaran te Magbebaye ta ne si Hisu Kristu, ne pariyu kew te minsan hentew ne me suled ta ne me pehulen ne ware mig-ikul te pegbebatasan ne impanuluNEY kaniyu. ⁷ Su sikaniyu mismu, nakanengneng e te keilangan ne eg-ikul kew kanami, su ware key migpapepehul te duen key pad te kaniyu. ⁸ Ware key migdawat te egkakeen ne egpuun te minsan hentew ke kene ney egbaryan, piru migpakannekal key miggimu te maaldew wey marusilem eyew kene egkabehatan ka minsan hentew kaniyu. ⁹ Innimu ney sika su eyew egkeyimu key ne panunggilingan niyu, minsan due perem katenged ney ne egbuyu kaniyu te keilanganen ney. ¹⁰ Te timpu ne duen key pad te kaniyu, insuhu ney e sikaniyu ne kene egpakeenen ka minsan hentew ne kene egkeupian ne eggimu.

¹¹ Nalalag ney seini tenged su nakarineg key te duen kun me duma niyu ne me pehulen wey ware kunlein ne innimu ran ke kene ka pegpangilabet te himu te duma. ¹² Purisu, te ngaran te Magbebaye ne si Hisu Kristu, egsuhuen ney wey egbaggeten ney sikandan

ne egpakannekal ne eggimu te kandan ne himu wey egpammitew te kandan ne keuyahan.¹³ Ne sikaniyu me suled, kene kew kapeleyi ne eggimu te meupiya.

¹⁴ Ke due minsan hentew ne kene egtuman te inlalag ney te seini ne sulat, tantanuri niyu sikandin wey kene kew duma-ruma kandin eyew egkeyilew sikandin. ¹⁵ Piru kene niyu sumsumana ne kuntere niyu sikandin, ke kene, panpanayi niyu sikandin isip suled niyu te pegpalintutuu.

Ka pegpanaha-taha

¹⁶ Ne ka Magbebaye te keupianan ka egbehey kaniyu te keupianan te langun ne timpu wey te minsan nekey ne paahi. Ka Magbebaye ka egduma kaniyu langun.

¹⁷ Ne kuntee, sikeddiey e, si Pablu, ka mig-uneypney ne migsulat te seini ne pegpangemusta. Iling kayi ka pegpirma ku wey ka paahi ku te pegsulat te langun ne me sulat ku.

¹⁸ Ka keupiya wey keyid-u te Magbebaye ta ne si Hisu Kristu, egkaangken niyu.

Ka An-anayan ne Sulat ni Pablu ki Timutiyu

Igpewun-a

Si Timutiyu, sabeka ne Kristuwanen ne diye egpuun te Asya. Hudiyu ka iney rin ne Grigu mule ka amey rin. Tenged su nakita ni Pablu ne malehet ka pegpalintutuu ni Timutiyu, innimu rin sikandin ne duma rin wey bate-bate din te pegwali wey te pegpangguhud te Meupiya ne Panugtulen (Me Himu 16:1-3). Ne ka Ipisu iya ka sabeka ne lungsud ne miggendiyaan dan. Ne diye ihaat ni Pablu si Timutiyu eyew iyan eg-uyan te migmalintutuu. Te bayew e naluhey si Timutiyu diye te Ipisu, migsulatan e sikandin ni Pablu. Me tatelu ne pulu (30) buwa ka idad ni Timutiyu te seeye ne timpu.

Due tatelu ne tuyu te seini ne sulat ni Pablu ki Timutiyu:

1) Ka an-anayan ne tuyu ni Pablu, migpaney-paney sikandin meyitenged te kene ne malehet ne pegpanulu diye te punduk te migmalintutuu. Ka seini ne pegpanulu, nenekegsewug e te me suman-suman te me Hudiyu wey te kene ne me Hudiyu. Su sumale kandan mareet ka seini se kalibutan ne mig-ugpaan ta. Ne wey kun de egkaluwas ka etew ke due katuenan din wey

kene egpangeen te duma ne klasi te egkeenen wey kene degma eg-asawa. Migpanulu si Pablu ne kene ne malehet sika.

2) Migpanulu man-e ka seini ne sulat meyitenged te peg-uyan te punduk te migmalintutuu wey te pegasimba. Insulat kayi ka eleg ne egbatasanen te sabeka ne pangulu te migmalintutuu, te talagbulig te migmalintutuu wey te duma ne migmalintutuu ne me balu wey me uripen.

3) Te katammanan, migtambahani din si Timutiyu ke egmenuwen ne egkeyimu ne meupiya ne suluhanen ni Hisu Kristu, wey meyitenged te katungdanan din diye te me Kristuwanen.

Ka nasulat te seini ne baseen

Igpewun-a 1:1-2

Ka pegpanulu meyitenged te punduk te migmalintutuu wey te me pangulu 1:3-3:16

Ka pegpanulu ki Timutiyu meyitenged te himu rin 4:1-6:21

1 Sikeddiey si Pablu ka migpeuyan te seini ne sulat. Apustulis a ni Kristu Hisus tenged te suhu te Manama ne Manluluwas ta wey ni Kristu Hisus ne egtengtengan ta. 2 Egpangemusta a keykew Timutiyu te in-isip ku ne malehet ne anak ku te pegpalintutuu. Ka keupiya, keyid-u wey keupianan ne egpuun te Manama ne Amey

ta wey ni Kristu Hisus ne Magbebeye ta, egkaangken niyu.

Ka pegpeengked te pegpanulu te kene ne malehet

³ Pabulus ka ugpe diye te Ipisu, iling te hangyu ku dengan keykew te peggendiye ku te Masidunya, eyew egkasaparan nu ka me etew ne egpanulu te kene ne malehet. ⁴ Nangeni nu degma sikandan ne kene egsahipe te me gungutanen wey me itulan te me kabuybuyahan. Egpakasamuk de seini, wey kene egpakabulig ne egkatuman ka planu te Manama ne egkanengnengan de pinaahi te pegpalintutuu ta. ⁵ Iyan tuyu te seini se suhu ku ne egpaheyinaweey sikandan ne egligkat te malinis ne pusung dan, te malinis ne kunsinsya ran, wey te malehet ne pegpalintutuu ran. ⁶ Due me etew ne nakasuwey e due, wey nasi e ne egpakig-apul te ware karuan ne apulanan. ⁷ Egkeupian perem sikandan ne egkeyimu ne talagpanulu te Balaud te Manama, piru ware sikandan nakasabut ke nekey ka impanlalag dan, wey ke nekey ka impanulu dan te mapahetpet.

⁸ Nakanengneng ki ne meupiya ka Balaud ni Muwisis ke eleg ka peggamit kayi. ⁹ Nakanengneng ki degma ne ware himuwa te Manama ka Balaud para te me etew ne matareng, ke kene, para te

seeye se egsupak, seeye se apulen, seeye se me etew ne kene eg-ikul te Manama, seeye se me makasesale, seeye se ware me tuluuwen, seeye se me hubabeeen te Manama, wey seeye se egmangimatey minsan te amey wey iney ran. ¹⁰ Ne lagkes en iya seeye se egpeyilabetey ne kene ne alunggun, seeye se me lukes ne eg-ealig te iling dan ded, seeye se egpandakep te me etew, seeye se me ubaten, seeye se egpamalehet te ubat, wey seeye se langun ne kene egtuman te malehet ne pegpanulu. ¹¹ Ne ka sika se malehet ne pegpanulu, diye egpuun te Meupiya ne Panugtulen ne tetelesi ne impiyal keddi te Manama* ne eleg ne egsayeen.

Ka pegpasalamat ni Pablu te keyid-u te Manama

¹² Egpasalamat a ki Kristu Hisus ne Magbebeye ta ne iyan migbehey keddi te keseg para te seini se himuku. Su in-ila a nikandin ne egkasalihan, wey in-alam a nikandin ne egkeyimu ne suluhuanen din. ¹³ Ne minsan ke imbaley-baley ku, imbaybayaran ku, wey inlemetan ku dengan ka migmalintutuu kandin, piru ingkeyid-u e red nikandin tenged su ware e pad migpalintutuu dengan kandin wey wara a nakataha te mareet ka hinimuwani ku. ¹⁴ Amana ne dakel ka keyid-u keddiey te Magbebeye ta, su imbehayan

* **1:11** Wey ke: puun te Meupiya ne Panugtulen meytenged te katelesan te Manama ne impiyal keddi **1:13** Him 8:3; 9:1-30.

a nikandin te pegpalintutuu wey te geyinawa ne kayi te kanta pinaahi te pegsabeka ta ki Kristu Hisus.¹⁵ Leleheti iya ka lalahan wey likes ne egdawaten wey epgalintutuuwan: miggendini si Kristu Hisus te ampew te tane eyew te pegluwas te makasesale—ne sikeddiey iya ka subla ne makasesale.¹⁶ Piru seini ka egpuunan ne ingkeyid-u a te Manama su eyew igpakapakita ni Kristu Hisus ne kene iya ne uubilen sikandin keddiey te subla ne makasesale. Innimu rin sika eyew egkeyimu a ne panunggilingan te seeye se epgalintutuu wey egsalig kandin wey egdawat te umul ne ware egtamanan.¹⁷ Na, kandin de iya te Hari ne ware egtamanan, ware kamatayen, kene egkakita, wey sabsabeka ne Manama ka langun ne pegtahud wey katelesan te ware egtamanan. Malehet iya.

¹⁸ Anak ku ne Timutiyu, seini ka igpanulu ku keykew sumale te intagne dengan te prupita meyitenged keykew, su emun ke eg-ikulen nu seini, egpakauskul ka taman te egkeyimu nu[†] te seeye se egpakiq-apul te kamalehetan.¹⁹ Sikan naa, heheta nu ka pegpalintutuu nu, wey ay-ayari nu ne malinis ka kunsinsya nu. Due me etew ne imbalahad dan ka kunsinsya ran, sikan naa ka nareetan dan ka pegpalintutuu ran,²⁰ iling ki Himiniyu

wey ki Alihandru. Impiyal kud e sikandan te geem ni Meibulan eyew egkapanulu sikandan ne kenad egbaleybaley te Manama.

2

Ka meyitenged te pegsimba

¹ Purisu, hun-a te langun, eghangyuen ku sikaniyu ne ampu kew, buyua niyu te Manama ka keilangan te langun ne etew, wey pasalamati niyu sikandin.² Iampu niyu degma ka me Hari wey ka langun ne due katenged eyew egmalinawen wey ware samuk te pegugpe ta wey eyew egpekeikul ki te Manama te eleg ne pegbebatasan. ³ Meupiya sika se peg-ampu wey egpakapahale te Manama ne Manluluwas ta,⁴ su igkeupii rin ne egkaluwas ka langun ne etew wey egpakataha te kamalehetan. ⁵ Su sabeka re ka Manama, wey sabeka re degma ka tigpataliware te Manama wey te me etew, ne ka sika ne etew, si Kristu Hisus. ⁶ Imbehey rin ka umul rin eyew te pglekat te langun ne etew puun te sale dan. Sika ka migpamalehet te eleg ne timpu ne egkeupian ka Manama ne egkaluwas ka langun ne etew. ⁷ Sikan naa ka in-alam a ne apustulis wey talagpanulu te kene ne Huduuy eyew te pegwali meyitenged te pegpalintutuu

[†] **1:18** Te Grigu: egbubunu ka te meupiya ne pegbubunu. **2:7** 2Tim 1:11.

wey te kamalehetan. Leleheti iya seini se inlalag ku, kene ne ubat.

⁸ Purisu, emun ke eg simba kew, igkeupii ku ne eg ampu ka me lukes, piru keilangan ne ware sale dan te pegkayew ran te me belad dan, wey ware pegkabelu diye te pusung dan wey ware samuk.

⁹ Ne ka me malitan degma, igkeupii ku ne eleg ka peggimmimasad dan ne kene egkasublaan wey kene eg papitew-pitew te mahal ne kumbale dan, balieg dan, wey te pegpanahu-tahu te bulbul dan. ¹⁰ Su ka me malitan ne mig-angken ne migpamakey te Manama, egkeyimu ne mateles pinaahi te meupiya ne himu ran. ¹¹ Keilangan degma ne egkateu sikandan ne egpeeneng-eneng diye te kalibulungan wey eparuma-ruma te seeye se egpanulu kandan. ¹² Kene ku igtuhut ne egpanulu wey ke egbuutan naa te malitan ka lukes. Keilangan ne egpeeneng-eneng de sikandin. ¹³ Su si Adan ka an-anayan ne innimu te Manama, ne henduen pad si Iba, ¹⁴ wey kene ne si Adan ka naakalan, ke kene, ka malitan wey nakasupak sikandin te suhu te Manama. ¹⁵ Piru ka me malitan, egkaluwas ded pinaahi te pegpalelesut ke egpabulus sikandan te egpalintuu ran, peggeyinawa ran, pegkamatulus dan, wey

kene sikandan egpalihe-lihe.

3

Ka pegbebatasan te pangulu te migmalintuu

¹ Malehet iya ka lalahan ne eggendue: ke due lukes ne egkeupian ne egkeyimu ne pangulu te migmalintuu, meupiya naa ne himu ka igkeupii rin. ² Sikan naa, ka pangulu te migmalintuu, keilangan ne ware igkarewey kandin. Keilangan ne sabeka re ka asawa rin, egpaketigkel sikandin, maheteng ka suman-suman din, meupiya se pegkeetew rin, maal-alumama sikandin, wey egkateu ne egpanulu. ³ Keilangan ne kene ne talewubug sikandin, kene egpanlampes, wey kene ne apulen, ke kene, mapariralem men sikandin. Keilangan ne kene sikandin ne eeyamen te seleppi. ⁴ Keilangan ne meupiya ka peg-uyan din te pamilya rin eyew egpalintuuwen wey layun egtahura sikandin te me anak din. ⁵ Su ke due etew ne kene egkateu ne eg-uyan te pamilya rin, egmenuwen din naa te egtanggu ka migmalintuu te Manama? ⁶ Keilangan ne kene ne iyam pad sikandin migpalintuu, su kema ke iga pakaambug din ka dakel ne katungdanan din, ne egkataman, egleg-paran e sikandin iling te peglegpad te ahalen te me busew. ⁷ Keilangan man-e

ne meupiya ka pegkeetew
rin diye te isip te me etew ne
kene egpalintutuu su eyew
ware egpakarew-ey kandin
wey kene egkasahilut te
ahalen te me busew.

Ka pegbebasan te talagbulig te migmalintutuu

⁸ Ne iling ded degma ka me
talagbulig te migmalintutuu,
keilangan ne talahuren
sikandan, egkasalihan, kene
ne talewubug, wey kene
ne eeyamen te seleppi.
⁹ Keilangan ne egpakan-
nekalan dan te eggen-gen ka
kamalehetan ne impataha te
Manama, wey keilangan ne
eg-ugpe sikandan ne malinis
se kunsinsya. ¹⁰ Te kene
pad egkeyimu sikandan ne
talagbulig te migmalintutuu,
keilangan ne eg-ug-ugsyen
pad ka pegbebasan dan. Ne
emun ke ware iya igkarew-
ey diye te kandan, egkaayun
e ne egkeyimu sikandan ne
talagbulig te migmalintutuu.
¹¹ Ne iling naan ded degma
te me asawa ran. Keilan-
gan ne talahuren degma
sikandan, kene ne id-iranen,
egpaktigkel te pegkeetew
ran, wey egkasalihan te
langun-langun de iya. ¹² Ne
timul pad due, ka talagbulig
te migmalintutuu, keilangan
ne sabeka re ka asawa, wey
meupiya ka peg-uyan din
diye te langun ne sakup te
pamilya rin. ¹³ Ne seeye se
talagbulig te migmalintutuu
ne meupiya se eggimuwen,
egkatahud iya wey ware

degma kaaldek dan te peg-
pangguhud meyitenged te
pegpalintutuu ran ki Kristu
Hisus.

*Ka pegpataha te Manama
te kamalehetan*

¹⁴⁻¹⁵ Eggenduen a perem
te keykew te mahaan, piru
tenged su egkaangge e buwa,
egsulaten ku naan de seini
se igpanulu ku keykew eyew
egpakataha ka ke nekey ka
eleg ne egbatasanen ta te me
anak te Manama. Sikanta
se migmalintutuu ka sakup
te manekal ne Manama,
ne emun ke igpeiling ta
ka kamalehetan te baley,
sikanta iya ka pes-ek wey
pabunsuran te kamalehetan.
¹⁶ Ware egpekewubabe
ne subla ne kein-inuwan
ka seini se kamalehetan
ne impataha te Manama
meyitenged ki Kristu:

Neyimu si Kristu ne etew,
wey impamalehetan te
Panisingan ne egpaka-
pahale sikandin te
Manama.

Nakita sikandin te me panal-
ihan,
ne inwali e diye te me
nasud,
ne impalintutuuwan e te me
etew kayi te ampew te
tane,
wey imbatun e te Man-
ama diye te langit.

4

*Ka me talagpanulu te kene
ne malehet*

¹ Piru, klaru ka ingkahi
te Panisingan te Manama
ne due me etew ne eg-
engked te kamalehetan te

mewuri ne timpu, su iyan dan e egpalintutuuwan ka ubaten ne me busew wey ka igpanulu dan. ² Igpanulu sika te me etew ne ubaten wey egmapitew-pitew re, wey ware* me kunsinsya. ³ Ingkenaan dan ka me etew ne eg-asawa wey egkeen te keenen ne igkene dan. Piru sikanta se migmalintutuu, nakataha kid e te malehet. Innimu te Manama ka keenen eyew egpakakeen ki due duma te pegpasalamat. ⁴ Su ka langun ne innimu te Manama, meupiya wey ware igkarew-ey, ke kene, keilangan ne egdawaten ta ka langun duma te pegpasalamat, ⁵ tenged su in-isip e sika te Manama ne malinis pinaahi te lalag din wey te peg-ampu.

Ka meupiya ne suluhuanen ni Kristu Hisus

⁶ Meupiya ka ne suluhuanen ni Kristu Hisus ke igpanulu nu seini se insulat ku te me suled ta. Ne taheed te egpanulu ka kandan, egmanekal ka degma pinaahi te kamalehetan wey te meupiya ne pegpanulu ne in-ikul nu. ⁷ Piru pariyu ka te gungutanen ne egpakesupak te Manama wey ware karuan. Ne basbasa nu ka pegkeetew nu te peg-ikul te Manama. ⁸ Due deisek ne karuan ke egpamanekalen ta ka lawa ta. Piru emun ke egpamanekalen ta ka pegikul ta te Manama, amana ki iya egkabulih te minsan nekey ne paahi, tenged su

due egkarawat ta ne igunag kuntee wey minsan keureme. ⁹ Malehet iya ka lalahen ku, wey likes iya ne egdawaten wey egpalintutuuwan. ¹⁰ Sika ka egpuunan ne eglasey-lasey ki wey egpakannekal, tenged su egpallateng ki te manekal ne Manama. Sikandin ka Manluluwas te langun ne etew, labi en iya seeye se egpalintutuu wey egsalig kandin. ¹¹ Ipanulu nu naa seini ne pegpanulu wey ipatuman nu.

¹² Kene nu ituhut ne due egdali-di keykew puun su bate ke pad, ke kene, himuwa nu ka pegkeetew nu ne panunggilingan diye te migmalintutuu pinaahi te peglaglag-lag nu, te pegbebasan nu, te peggeyinawa nu, te pegpalintutuu nu, wey te malinis ne pusung nu. ¹³ Taheed te kene e pad egpekeendue te keykew, pabulus ka te pegbasa te Kasulatan diye te libulunganan, te pegwali, wey te pegpanulu. ¹⁴ Kene nu balahara ka katuenan ne imbehey keykew te Panisingan te Manama ne narawat nu pinaahi te pegpangguhud te impanengneng te Manama te timpu ne intel-eban ka te belad te me ighbuyag te migmalintutuu. ¹⁵ Keilangan ne eggimuwen nu iya seini wey pakannekali nu su eyew egkakita te langun ka pegtulin te katuenan nu. ¹⁶ Tantanuri nu ka batasan nu wey ka pegpanulu nu.

* 4:2 Te Grigu: naluwasan.

Pabulus ka tuman te seini ne pegpanulu ku su eyew pinaahi rue, egkaluwas ka wey seeye se egpammineg keykew.

5

Ka tambag meyitenged te balu, te pangulu te migmalintuu, wey te me uripen

¹ Kene nu dew-aya ka lukes ne buyag-buyag e keykew, ke kene, tambahi nu re sikandin ne iling te amey nu. Ne ka bate-bate pad ne me lukes, tambahi nu re sikandan iling te suled nu. ² Ne meyitenged te buyag e ne me malitan, tambahi nu re sikandan iling te iney nu. Ne seeye se me bate-bate pad ne malitan, tambahi nu re sikandan iling te atebey nu te ware peg-ealig.

³ Tahura nu wey ipatanggu nu ka me balu ne malitan ne warad egkasalihan. ⁴ Piru ke duen pad anak wey ke apu naa te balu, keilangan ne egpakashabut sikandan ne ka an-anayan ne katungdanan dan isip migpamakey te Manama, sika se pegtanggu te iney wey amey ran wey me apu dan eyew mahabayad kandan, tenged su sika ka egpakahale te Manama. ⁵ Ka balu ne malitan ne migsabsabeka naan de, iyan din de egpallatengan ka Manama, ne aldew wey marusilem, eg-ampu sikandin wey egpabulig te Manama. ⁶ Piru ka balu ne iyan din de eggimuwen

ka igkeupii rin, hendue te migpatey e sikandin minsan ke manekal pad ka lawa rin. ⁷ Ipatuman nu seini te migmalintuu eyew ware igkarew-ey kandan. ⁸ Piru seeye se kene egtanggu te karumaan din, labi en iya ka kandin mismu ne pamilya, mig-inniyug e te kamalehetan wey subla pad ne mareet sikandin du te seeye se kene egpalintuu te Manama.

⁹ Ipanlista niyu ka me balu ne malitan puun te henem e ne pulu (60) se idad ne keilangan te bulig niyu, seeye se ware migpanlibug wey ware mig-engked te asawa rin.* ¹⁰ Keilangan ne meupiya ka pegkeetew ran tenged te meupiya ne himu ran: meupiya ka peg-tanggu ran te me anak dan, maal-alumama sikandan, migtanggu† te keet-etawan te Manama, migbulig te neyirapan, wey maahet ne miggimu te minsan nekey ne meupiya.

¹¹ Piru kene niyu ilista ka me balu ne bate-bate pad tenged su suble e ka igkeupii te lawa ran du te pegpamakey ran ki Hisus. Su emun ke amana pad egkeupian sikandan ne egbalew-balew eg-asawa, egkabalalahad dan e si Kristu. ¹² Ne emun ke eggimuwen dan sika, eggukuman e sikandan tenged su ware sikandan migtuman te saad

* **5:9** Te Grigu: asawa te sabeka ne lukes. † **5:10** Te Grigu: miglu-luan ka me paa.

dan ne kenad egbalew-balew eg-asawa.[‡] ¹³ Ne kene de ne sika, egpapepehul man-e sikandan wey iyan dan naan de egpulungan ka egpanumbaley. Ne kene de ne sika su egmanesalupet e degma sikandan wey eggilabet te himu te duma, wey egmanlalag te kene ne meupiya. ¹⁴ Purisu, egtambahan ku ka me balu ne bate-bate pad ne eg-asawa red iya egbalew-balew, eg-eanak, wey egtanggu te pamilya ran, su eyew kene egpakalalag te mareet ka egkuntere kanta. ¹⁵ Su duen en iya me balu ne malitan ne nakasuwey e te pegpalintutuu ran wey migikul e ki Meibulan.

¹⁶ Ke due malitan ne migpalintutuu, ne due me karumaan din ne balu, keilangan ne sikandin ka egtanggu kandan eyew kene egkabehatan ka duma rin ne migmalintutuu te pegtanggu kandan. Te iling due ne paahi, egpaketanggu pad ka duma ne migmalintutuu te seeye se me balu ne warad iya egkasalihan.

¹⁷ Ke due me igbuyag diye te punduk te migmalintutuu ne meupiya se peg-uyan, likes sikandan ne egtahuren wey egbayaran te malehet, labi en iya seeye se eglasey-lasey ne egwali wey egpanulu. ¹⁸ Su nasulat diye te Kasulatan ne miggenendue, "Kene nu pungesa ka be-be te baka ke igdiriek sikandin,"

wey "Seeye se egtrabahu, eleg iya ne egbayaran." ¹⁹ Kene nu pammineha ke due sumbung meyitenged te igbuyag te punduk te migmalintutuu, angin e ke due daruwa wey ke tatelu naa ne talagpamalehet. ²⁰ Seeye se egpabulus eggimu te sale, sapari nu diye te tangkaan te langun ne migmalintutuu eyew egkaaldek e ka me duma ran ne eg-ikul kandan.

²¹ Egsuhuen ku sikeykew kayi te tangkaan te Manama wey ni Kristu Hisus wey te matulus ne me panalihan, ne tumana nu seini se pegpanulu ku te ware pegpalapig. Kene ka palapig te minsan hentew. ²² Kene ka gaan-gaan behey te katenged diye te etew isip pangulu te migmalintutuu pinaahi te pegtel-eb te belad nu, su kema ke egkaalak ka te sale te duma nu. Ke kene, keilangan ne diyu-diyu ka te mareet.

²³ Ne puun su malasi ka egderalu, kene de ne weyig elina nu te eg-inum, ke kene, inum ka te deisek de ne binu para te getek nu.

²⁴ Due me sale te duma ne me etew ne kene igpekeelles, wey egkanengnengan sika te duma minsan ware pad egugsi-ugsi kandan. Piru due me sale te duma ne wey e egkanengnengi ke mewuri e. ²⁵ Ne iling degma due ka meupiya ne himu te etew su mahaan egkanengnengi. Ne minsan ke kene ne mahaan

[‡] **5:12** Te Grigu: ka an-anayan ne saad dan. **5:18** Dify 25:4; 1Kur 9:9; Mat 10:10; Luk 10:7. **5:19** Dify 19:15.

egkanengnengi, piru kene ig-pekeeles te egkaluhay.

6

¹ Na, meyitenged te me uripen ne migmalintutuu, keilangan ne eg-isipen dan ne likes ka me ahalen dan ne egtahuren eyew kene egkabaley-baley ka ngaran te Manama, wey ka pegpanulu ta. ² Ne seeye se me uripen ne due me ahalen ne migpalintutuu, keilangan ne kene dan egde-deehen ka me ahalen dan tenged su talaari sikandan due ki Kristu. Ke kene, keilangan ne seeye se me uripen, nasi eggimu te subla pad ne meupiya, su seeye se egkabulihan pinaahi te himu ran, duma ran ne migmalintutuu ne inggeyinawaan dan.

Ka kene ne malehet ne pegpanulu wey ka malehet ne karatuan

Ipanulu nu wey ipatumau nu seini kandan. ³ Ke due etew ne egpanulu te egpakuasuwewy kayi, wey ke kene egdawat te malehet ne lalag te Magbebaye ta ne si Hisu Kristu wey te pegpanulu meyitenged te peg-ikul te Manama, ⁴ egpaambug de sikandin wey ware katuenan din. Amana sikandin egkeupian ne egpakig-apul wey egesesamuk te ware karuan meyitenged te kaluwasan te me lalag. Ne sika ka egpuunan te pegkeimma, ehetanan, peg-iran-iran, pegbayung te mareet, ⁵ wey ka ware tamanaan ne kasamuk

dan. Sika ka batasan te me etew ne kene ne eleg se pegsusuman-suman, wey migleke e te kamalehetan. Kahiyan dan ne egkaratu kun sikandan ke eg-ikul te Manama.

⁶ Piru ka karatuan ta mule, iyan sika se peg-ikul ta te Manama duma te pegkabennali ta te minsan nekey ne egkeula-ula ta. ⁷ Su ware inuyanan ta kayi te ampew te tane te peglesut ta, wey ware degma egkeuyan ta te pegpatey ta. ⁸ Purisu, keilangan ne egkabennalan ki ke egpakakeen ki wey ke egpakkukumbale ki. ⁹ Piru seeye se egkengeupian ne egkaratu, mahaan egkatintal wey egkasahilut te masulug ne igkeupii ran ne mareet wey ware karuan. Ne sika ka egpekeuyan kandan diye te karereetan wey ka egpakaparusa kandan te ware egtamanan. ¹⁰ Su ka peggeyinawa te seleppi ka egpuunan te langun ne klasi te mareet. Ne tenged due, ka duma ne me etew ne amana egkeeyami te seleppi, egpakuasuwewy e te kamalehetan wey sesakiti ka pusung dan te masalig ne igkalaggew ran.

Ka pegpanulu ni Pablu ki Timutiyu

¹¹ Piru sikeykew mule Timutiyu, suluhuanen ka te Manama. Sikan naa pariyui nu sika se langun wey pakannekali nu ne egkeyimu ka ne matareng,

eg-ikul te Manama, egligen te pegpalintutuu, eggeyinawa te duma, eg-antus, wey maayad-ayad te duma. ¹² Himuwa nu ka taman te egkeyimu nu meyitenged te pegpalintutuu nu, iling te etew ne eglungkesu, su eyew egkakuwa nu ka unag ne umul ne ware egtamanan. Su in-alam ka te Manama eyew egpakakuwa te sika ne umul te timpu ne migangken ka diye te tangkaan te sesalihi ne talagpamahet, ne migpalintutuu wey migsalig kad te Magbebabe ne si Hisus. ¹³ Kayi te tangkaan te Manama ne iyan egbehey te umul te langunlangun de iya, wey kayi te tangkaan ni Kristu Hisus ne migpangguhud te kamalehetan diye te ki Punsiyu Pilatu, egsuhu a keykew ne ¹⁴ tumana nu ay-ayari ka insuhu keykew su eyew ware egpakarew-ey keykew taman te pegginguma te Magbebabe ta ne si Hisu Kristu ¹⁵ ne igpakita te eleg iya ne timpu te egsayeen wey sabsabeka ne talagmandu. Sikandin ka Hari te langun ne me Hari, wey ka Ahalen te langun ne ahalen. ¹⁶ Sikandin de ka ware kamatayen, wey ka mig-ugpe te malayag ne egpasilang ne kene egkaparaniyan, wey ware de due etew ne nakakita wey egpakkita kandin. Kandin de iya ka langun ne pegtahud wey ka pegmandu te ware egtamanan. Malehet iya.

¹⁷ Meyitenged te me etew ne meyaman kayi te ampew te tane, panpanayi nu sikan dan ne kene egpaambug wey kene egsalig te karatuan dan ne mahaan de egkaawe. Ke kene, keilangan ne ka Manama re ka egsalihan dan ne iyan egbehey kanta te ware pegkannuhun te langun ne igkahale ta. ¹⁸ Panulua nu sikandan ne eggimu te meupiya, su iyan malehet ne karatuan. Keilangan mane ne matumpis sikandan wey mabehey-behey diye te duma. ¹⁹ Te iling due ne paahi, egpakkalilimud sikandan te karatuan dan diye te langit ne egpekeiling te malig-en ne pabunsuran te egpallatengen dan keureme, su eyew egpakaangken sikandan te malehet ne umul.

²⁰ Na, Timutiyu, tantanuri nu ka impiyal te Manama keykew. Pariyu ka te me guhud ne ware karuan ne egpaketap te Manama, wey ka egpakkig-apul man-e te sika se egkahiyen te duma ne katuenan kun piru kene bes ne malehet. ²¹ Due duma ne mig-ikul te sika ne katuenan, piru egpakuwey sikandan te kamalehetan.

Ka keupiya wey keyidu ne egpuun te Manama, egkaangken niyu.

Ka Igkarangeb ne Sulat ni Pablu ki Timutiyu

Igpewun-a

Ka igkarangeb ne sulat ni Pablu ki Timutiyu, diye din sulata te Ruma te timpu ne naprisu sikandin tenged te pegwali rin meyitenged ki Hisu Kristu. Inhangyu ni Pablu si Timutiyu ne egependiyeen te kandin te kene pad sikandin eggimatayan. Ne si Timutiyu, diye pad sikandin te Ipisu ka egpanulu te migmalintutuu.

Kayi te seini ne sulat, intambahan ni Pablu si Timutiyu ne eglig-en eyew epakaaantus sikandin ne egwali wey eggimu te impeyimu te Manama kandin minsan taliware te me pegantus wey me pegsupak te duma ne etew. Impanganayan din man-e si Timutiyu meyitenged te mareet ne egkeyingumaan te "keungelan wey te ware karuan ne apulanan" su epakareet seini te me etew ne egpammineg.

Labew te langun, impasuman suman ni Pablu si Timutiyu meyitenged te kandin ne umul su eyew egkeyimu ne panunggilingan ni Timutiyu ka pegpalintutuu ni Pablu, ka pegpariralem din, ka peggeyinawa rin, ka pegpabulus din, wey ka peg-antus din

taliware te me pegbayad-bayad kandin.

Ka nasulat te seini ne baseen

Igpewun-a 1:1-2

Ka pegdayan wey ka pegbanasal 1:3-2:13

Ka tambag wey ka pegpaney-paney 2:14-4:5

Ka peg-ugpe ni Pablu 4:6-¹⁸

Ka katammanan 4:19-22

¹ Sikeddiey si Pablu ka migpeuyan te seini ne sulat. Apustulis a ni Kristu Hisus tenged te pegbuut te Manama. Impeuyan a nikandin eyew te pegpataha meyitenged te umul ne ware egtamanan ne insaad din te langun ne egkasabeka ki Kristu Hisus.

² Egpangemusta a keykew Timutiyu te in-isip ku ne pinalangge ku ne anak. Ka keupiya, keyid-u, wey keupianan ne egpuun te Manama ne Amey wey ni Kristu Hisus ne Magbebaye ta, egkaangken nu.

Ka pegpasalamat wey ka pegbanasal

³ Egpasalamat a te Manama ne egpamakayen ku duma te malinis ne kunsinsya ku iling te me kaap-apuan ku dengan. Aldew wey marusilem layun a egpakanuman-suman ne eg-ampu keykew. ⁴ Ne emun ke egkasuman-suman ku ka pegsinehew nu te

pegligkat ku, amana a egkeupian ne egpakigkita man-e keykew eyew amana a egkahale.⁵ Egkasuman-suman ku ka malig-en ne pegpalintutuu nu ne iling te pegpalintutuu te apu nu ne si Luwida wey te iney nu ne si Iyunis ne nekewun-a keykew te pegpalintutuu. Nakamemalehet a ne iling ded ka pegpalintutuu nu te kandan.⁶ Sikan naa, kene ka kalingew ne egehet-pehet ne eggamit te katuenan ne imbehey te Manama keykew te pegtel-eb ku keykew te belad ku.⁷ Su ware ki behayi te Manama te Panisingan ne eyew egkaaldek ki, ke kene, eyew due geem ta, due peggeyinawa ta te duma, wey egpakanigkel ki te pegkeetew ta.

⁸ Purisu, kene ka keyilew ne egpamalehet diye te duma meyitenged te Magbebaya ta. Kena a degma nikeykew ikeyilew se naprisu tenged te pegpalintutuu ku kandin. Ke kene, pinaahi te keseg ne imbehey te Manama keykew, antusa nu duma keddi ka me keyirapan tenged te pegpangguhud te Meupiya ne Panugtulen.⁹ Inluwas ki te Manama wey in-alam ki nikandin ne egkeyimu ne matulus ne keet-etawan din. Ware din himuwa sika tenged te meupiya ne himu ta, ke kene, tenged te kandin mismu ne katuyuan wey keyid-u. Ne ka sika ne

keyid-u, tapey e ne planu te Manama te ware pad himuwa ka kalibutan ne igbehey kanta pinaahi te pegasabeka ta ki Kristu.¹⁰ Ne kuntee, impanengneng e sika ne keyid-u pinaahi te pegginguma te Manluluwas ta ne si Hisu Kristu. In-awe din ka geem te kamatayen wey pinaahi te Meupiya ne Panugtulen, impataha rin ka umul ne ware egtamanan.

¹¹ In-alam a te Manama isip apustulis eyew te pegwali wey pegpanulu te seini se Meupiya ne Panugtulen.¹² Sika ka egyptunan ne egantus a kuntee. Piru kena a egkeyilew, tenged su nekeila a ke hentew ka impalintutuwani ku wey nakamemalehet a ne due geem din te egtameng te impiyal din keddi* taman te aldew te peglibed din.¹³ Ka malehet ne lalag ne naangey nu keddiey, ipanulu nu naa iling te pegpanulu ku. Himuwa nu naa sika duma te pegpalintutuu wey peggeyinawa ne narawat ta tenged te pegasabeka ta ki Kristu Hisus.¹⁴ Pinaahi te bulig te Panisingan te Manama ne eg-ugpe kayi te kanta, tamengi nu ka malehet ne pegpanulu ne impiyal keykew.

¹⁵ Nakanengneng ka ne mig-engkeran a te langun ne migmalintutuu ne diye te prubinsya te Asya, minsan si Pigilu wey si Hirmuginis.¹⁶ Ne meyitenged ki Unisimu, ka Magbebaya ka egkeyid-

^{1:11} 1Tim 2:7. * ^{1:12} Diye te Grigu ne linalahan, kene ne klaru ke “impiyal ku kandin” wey ke “impiyal din keddi” ka malehet ne peggalin.

u kandin duma te pamilya rin tenged su kamasalig a nikandin baggeta, wey wara a degma nikandin ikeyilew ka naprisu. ¹⁷ Ke kene, due-rue ne impammitew a nikandin te pegginguma rin kayi te Ruma taman te nakita a nikandin. ¹⁸ Ka Magbebabe ka egkeyid-u ki Unisipuru te aldew te peglived din. Nakanengneng ka ne amana iya ne dakel ka nakabulig din keddi te diye e pad te Ipusu.

2

Ka meupiya ne sundalu ni Kristu Hisus

¹ Ne meyitenged keykew Angget, pakannekal ka pinaahi te geem ne igbehey te Manama te seeye se nasabeka diye ki Kristu Hisus. ² Sika se narineng nu ne impanulu ku diye te tangkaan te masalig ne talagpamalehet, ipanulu nu degma diye te me etew ne egkasalihan eyew igaapanulu dan e degma diye te duma.

³ Antusa nu ka me keyirapan duma kanami isip meupiya ne sundalu ni Kristu Hisus. ⁴ Ka sundalu ne eggimu te kandin ne katungdanan, kenad egkatiglingey te tapey ne himu rin su egkeupian sikandin ne egpakahahale te ahalen din. ⁵ Ne seeye se eg-apil te peglungkesu, kene egpakakuwa te unag din ke kene sikandin egtuman te balaud te peglungkesu.

⁶ Ne ka etew ne mabasuk, keilangan ne sikandin ka egpekekewun-a egsawit te pinamula rin. ⁷ Sumsumana nu ka inlalag ku, tenged su ebulihan ka te Magbebabe eyew egkasabut nu sika se langun.

⁸ Kene ka kalingew ne si Hisu Kristu ne kabuhalan ni Hari Dabid, neuyag puun te kamatayen. Sika ka Meupiya ne Panugtulen ne inwali ku. ⁹ Ne tenged te pegwali ku te sika ne Meupiya ne Panugtulen, imbaybayaran a wey imbaku a iling te egpangimu te maddeet. Piru ka lalag te Manama, kene egkabaku. ¹⁰ Purisu egantusen ku ka langun ne keyirapan eyew egkaluwas ka me etew ne in-alam te Manama pinaahi ki Kristu Hisus wey egpakkalagkes te bantug din te ware egtamanan. ¹¹ Leleheti iya ka lalahen ne eggenendue:

“Emun ke migpatey ki duma
ki Kristu,
egkeuyag ki degma
duma kandin.

¹² Emun ke egpabulus ki eg-
antus,
egpakahari ki duma
kandin.

Piru ke kene ta eg-angkenen
si Kristu,
kene ki degma nikandin
eg-angkenen.

¹³ Minsan ke kene ki ne mat-
inumanen,
egpabulus mule sikandin
ne matinumanen,

su ka batasan din wey ka eglalahen din, kene egkabalbalawan."

Ka meupiya ne suluhuan te Manama

¹⁴ Ipasuman-suman nu naa sika te migmalintuu, wey panpanayi nu sikan dan diye te tangkaan te Manama ne egpeeneng-eneng e ka egpaap-apuley meyitenged te kaluwasan te me lalag, su ware karuan due wey egpakarereet de sika te egpammineg kandan.

¹⁵ Pakannekal ka taman te egkeyimu nu te pegtuman te Manama, eyew egkahale sikandin keykew. Ipanulu nu naa iayad-ayad ka kamalehetan eyew ware igpekeyilew te himu nu.

¹⁶ Pakaddiyu ka te guhud ne ware karuan ne egpaka-supak te Manama su seeye se eggimu te iling due, egpaka-pariyu te Manama. ¹⁷ Ka sika ne guhuren, hendue te kehang ne eg-et-et. Iyan egkeilingan te sika ne pegpanulu ensi Himiniyu ki Pil-itu.

¹⁸ Migsuwey e sikandan te kamalehetan. Migpanulu sikandan ne miglihad kun e ka pegkeuyag te me minatey, wey egdereetan dan man-e ka pegpalintuu te duma ne etew. ¹⁹ Piru ka kamalehetan ne puun te Manama, egpekeiling te pabunsuran, kene egkabalbalawan, wey insulatan te iling kayi: "Nekeila ka Magbebabe ne Manama te keet-etawan din," wey "Seeye

se eg-angken ne sakup e sikandan te Magbebabe ne Manama, keilangan ne eg-inniyug e te minsan nekey ne mareet."

²⁰ Diye te tetelesi ne baley, due me kasangkapan ne innimu puun te bulawan wey te pelata. Ne due degma innimu puun te kayu wey te tane. Ne wey re eggamita ka mahal ke due impurtanti ne eggamitan, piru ke ware, iyan de eggamiten ka me baratu. ²¹ Ka etew ne egdiyudiyu te mareet, egpekeiling te mahal ne kasangkapan ne egkahamit te Manama tenged su matulus sikandin, wey egkahamit te Ahalen din ne Manama su andam e sikandin ne eggimu te meupiya. ²² Pakaddiyu ka te mareet ne igkeupii te me kanakan. Ne pakannekali nu ka pegkamatareng, pegpalintuu, peggeyinawa, wey ka keupianan, duma te seeye se langun ne egpangananey te Magbebabe duma te malinis ne pusung.

²³ Pakaddiyu ka man-e te ware karuan ne apulanan, su nakanengneng kad ne diye egpangkus sika te samuk. ²⁴ Ne ka suluhuan te Magbebabe, keilangan ne kene egpangehet, ke kene, meupiya sikandin diye te langun ne etew. Keilangan degma ne egkateu sikandin ne egpanulu, mapariralem, ²⁵ wey kene ne malangit ka pegpanulu din te me etew ne eg-apul kandin. Ne kema ke egtuhutan sikandan te

Manama ne eg-inniyug te sale dan wey egpakaneng-neng te kamalehetan. ²⁶ Ne puun due, egkaalimukawan e sikandan wey egpakaawe e ka nasahilut te ahalen te me busew, ne iyan migdakep kandan eyew eggimu te igkeupii rin.

3

Ka katammanan ne timpu

¹ Keilangan ne egpakanengneng ka ne due kalised ne eggingga te mewuri ne aldew. ² Su sika ne timpu, iyan de eggeyinawaan te me etew ka pegkeetew ran. Amana sikandan ne eeyamen te seleppi, me liheen, me hambuhen, me lemeten, me apulen te amey wey iney ran, kene egkateu ne egpasalamat, wey ware me tuluuwen dan. ³ Ware geyinawa ran te duma, kene sikandan egpasaylu, me idiranen, kene egmatakigkel te pegkeetew ran, amana ne mabbulut, wey egsupak te meupiya. ⁴ Me akalen sikan-dan, mahaan-gaan eggimu piru kene egsuman-suman ke nekey ka egkeyitabu, egpabekal te me pakpak dan, wey eggeyinawaan dan ka kahalaan kayi te kalibutan du te Manama. ⁵ Egpapitew-pitew sikandan ne eg-ikul kun te Manama, piru igsawile dan ka geem din. Pariyu kew te iling due ne me etew. ⁶ Due duma

kandan ne egseled diye te me baley eyew eglimbung te me malitan ne magguye se me suman-suman wey mahaan egpalintutuu te eglalahen dan. Sikandan ka me malitan ne egkabehatan te me sale dan wey egkeuyan te mareet ne igkeupii ran. ⁷ Ka sika ne me malitan, layun egpammineg te pegpanulu te minsan hentew, piru kene sikandan egpekeila te kamalehetan. ⁸ Eg-apul ka sika ne me etew te kamalehetan iling engki Hanis wey ki Hambris* ne mig-apul dengan ki Muwisis. Nare-deetan e ka susuman-suman dan wey kene ne malehet ka egpalintutuu ran. ⁹ Piru kene egpakapabul-sikandan te egkaluhay, su egkanengnengan te langun ka keumbahan dan, iling degma te neyitabu ki Hanis wey ki Hambris.

Ka katammanan ne pegpanulu ni Pablu ki Timutiyu

¹⁰ Piru sikeykew mule Timutiyu, nanengnengan nu ka langun ne impanulu ku, ka batasan ku, ka tuyu ku kayi te ampew te tane, ka egpalintutuu ku, ka pegpariralem ku, ka peggeyinawa ku, wey ka peg-antus ku. ¹¹ Nakanengneng ka degma ne imbaybayaran a wey impeyirapan a te me etew, wey ka neyitabu keddi diye te Antiyukiya, Ikuniyu,

^{3:8} Iks 7:11. * ^{3:8} Sumale te gungutanen, si Hanis wey si Hambris ka daruwa ne etew ne egpahehane ne mig-apul ki Muwisis dengan. Pitawa nu ka Iksudu 7:11-12, 8:7, wey 8:18-19. ^{3:11} Him 13:14-52; Him 14:1-7; Him 14:8-20.

wey diye te Listra, piru impangabangan a te Magbebaye te langun ne pegbayabayad ne in-antus ku.¹² Ka malehet, egbaybayaran iya ka langun ne egkeupian ne egpekeikul te Manama ka pegbebasan dan tenged te pegrabekan ran ki Kristu Hisus.¹³ Piru ka mareet ne me etew wey ka me limbungen, egkasublaan pad ka pegkamareet dan. Egpabulus sikandan egpanlimbung wey egkalimbungan degma sikandan.¹⁴ Piru sikeykew mule, pabulus ka palintutuu te mapahenget te impanulu keykew, su nekeila ke ma te seeye se migpanulu keykew kayi.¹⁵ Puun te bate ke pad, napanulu kad e te matulus ne Kasulatan ne egpakabehey te katuenan ne diye egpangkus te kaluwasan pinaahi te pegpalintutuu ki Kristu Hisus.¹⁶ Ka langun ne Kasulatan, egpuun iya te Manama, wey amana egkahamit seini te pegpanulu te kamalehetan, te pegrabekan, te pegtul-id, wey te pegpanulu ke egmenuwen te peg-ugpe ne matareng,¹⁷ su eyew egkaandam e ne eggimu te minsan nekey ne meupiya ka keet-etawan te Manama.

4

¹⁻² Kayi te tangkaan te Manama wey ni Kristu Hisus, egsuhuen ku sikeykew ne egwali te lalag te Manama. Pakaali-ali ka ne egwali te minsan nekey ne timpu, duen ma egpammineg wey se

ware. Su egginguma man-e si Hisus keureme eyew eghari wey eggukum te langun ne etew, manekal pad wey ke napatey e. Sapari nu ka me etew te pegpakkasale, dew-aya nu sikandan se egpabulus eggimu te sale, wey baggeta nu sikandan. Ne keilangan ne layun mapariralemen ka pegpanulu nu kandan.³ Su egginguma ka timpu ne kenad e egdawat ka me etew te malehet ne pegpanulu. Piru tenged te mareet ne igkeupii ran, egpammitew sikandan te me talagpanulu ne egpanulu te kandan mismu ne igkeupii te egpammineg.⁴ Ne dutu, eginniyuhan dan e ka kamalehetan wey iyan e eg-ikulen ka me gungutanen.⁵ Piru sikeykew mule Timutiyu, tigkel ka layun te pegkeetew nu wey antusa nu ka me keyirapan. Pabulus ka ka pegpangguhud te Meupiya ne Panugtulen, wey himuwa nu ka langun ne igpeyimu te Manama keykew.

⁶ Su meyitenged keddiey, miggingsume e ka timpu ne igaipathis ka langesa ku ne egpekeiling te igpanubad, wey timpu e ne egkawara a kayi te ampew te tane.⁷ Egpekeiling a te miglungkesu ne innimu ku iya ka taman te egkeyimu ku, wey neimpusan ku ka peglungkesu ku. Migdesdesenan ku degma ka kamalehetan.⁸ Ne kuntee, duen e intines te Magbebaye keddiey ne ig-unag te seeye se me matareng. Sikandin

ka matareng ne Talaggukum, wey eg-unahan a nikandin te mewuri ne aldew. Piru kene ne sikeddi de ka egdasa-han, ke kene, ka langun ne mabagget ne migtetahad te pegginguma rin.

Ka katammanan ne lalag ni Pablu

⁹Lehet-lehet ke ma hendini te keddi te mahaan, ¹⁰ su si Dimas, miggendiyad e te Tisalunika. Mig-engkeran ad e nikandin su egkatiglingey te langun ne kayi te ampew te tane. Ne si Krisinti, warad e degma kuntee kayi su miggendiyad e te Galasya, ne si Titu degma, miggendiyad e te Dalmasya. ¹¹ Si Lukas naan de ka migpalunggehaat kayi te keddi. Ke eggendini ka, tuluya nu si Markus wey dumaa nu sikandin kayi su amana egpakabulig sikandin te himu ku. ¹² Ne si Tikiku, impeendiye ku te Ipisu. ¹³ Ke eggendini kad, uyana nu ka malayat ne kumbale ku ne inggaat ku ki Karpu diye te Truwash. Uyana nu degma kayi ka me libru ku wey labew te langun, ka impanulat ne linulun.

¹⁴ Na, si Alihandru ne man-nayab, amana migdereet keddi. Ne ka Magbebabe naan de ka egsuli te innimu rin. ¹⁵ Ngilam ka kandin, su subla pe ma sikandin eg-apul te wali ta.

4:10 Kul 4:14; Pilim 24; 2Kur 8:23; Gal 2:3; Tit 1:4. **4:11** Kul 4:14; Pilim 24; Him 12:12,25; 13:13; 15:37-39; Kul 4:10; Pilim 24. **4:12** Him 20:4; Ipi 6:21-22; Kul 4:7-8. **4:13** Him 20:6. **4:14** 1Tim 1:20; Sal 62:12; Rum 2:6. *** 4:17** Te Grigu: puun te be-be te liyun. **4:19** Him 18:2; 2Tim 1:16-17. **4:20** Him 19:22; Rum 16:23; Him 20:4; 21:29.

¹⁶ Te an-anayan ne peg-pangatarengan ku diye te hukumanan, ware migbulig keddi su in-engkeran a te lan-gun. Kene perem sikandan ka egpanabak te Manama due. ¹⁷ Piru wara a balahara te Manama, wey imbehayan a nikandin te keseg ne impakawali ku ka langun ne Meupiya ne Panugtulen diye te kene ne me Hudiyu. Ne inluwas a nikandin puun te kamatayen.* ¹⁸ Ne ka Magbebabe ka egluwas keddi te langun ne mareet wey egtantanuran a nikandin taman te eg-uyanan ad diye te langit ne Migharian din. Egsayeen sikandin te ware egtamanan. Uya, malehet iya!

Ka pegpangemusta ni Pablu

¹⁹ Ipangemuste e re ki Prisila wey ki Akilu, wey te pamilya ni Unisipuru. ²⁰ Ne si Irastu migpalunggaat diye te Kurintu, ne si Trupimu inggaat ku diye te Militu su migderalu sikandin. ²¹ Lehet-lehet ka hendini te kene pad amana egmaagsil ka timpu. Migpangemusta keykew si Iyubulu, si Pudinti, si Linu, si Klawudiya, wey ka langun ne me suled ta kayi.

²² Ka Magbebabe ka egduma keykew. Ne ka keupiya wey keyid-u rin, egkaangken niyu.

Ka Sulat ni Pablo ki Titu

Igpewun-a

Si Titu, kene sikandin ne Hudiyu wey kene egpalintutuu dengan te Manama. Piru hengkayi te mewuri e ne timpu na-Kristuwanen e sikandin. Ne puun dutu, neyimu sikandin ne talagbulig ni Pablo te me himu rin. Ka seini ne sulat, impeuyan ni Pablo diye te kandin te inggaat din diye te Krita eyew eg-uyan te punduk te migmalintutuu. (Ka Krita, pulu te dahat ne sakup te Grisy.)

Ne due tatelu ne impnengneng te seini ne sulat: Ka an-anayan, impasuman-suman si Titu ke nekey ka eleg ne egbatasanen te me pangulu te migmalintutuu. Keilangan ne egpakataha sikandin kayi tenged su masulug ka mareet ne batasan te matig-Krita wey due masulug ne talagpanulu ne kene ne malehet ne egpasuwney te migmalintutuu.

Ka igkarangeb, intambahan si Titu ke egmenuwen din te pegpanulu ka nalein-lein ne me etew diye te punduk te migmalintutuu, lagkes seeye se me lukes-lukes wey me uripen, wey seeye se bayew e me buyag ne me lukes wey me malitan. (Ne iyan egpanulu te me mengebay ka buyag e ne me malitan.)

Te katamanan, migtambahan ni Pablo si Titu meyitenged te Kristuwanen ne peg-ugpe, wey pegpanaliya te peg-ehet te duma, pegpaapuley, wey pegbaad-baad diye te punduk te migmalintutuu. Impasuman-suman man-e ni Pablo si Titu ne egpakatuman ki te seeye se insuhu kanta tenged te kaluwasan ne imbehey kanta ni Hisu Kristu.

Egkeupian si Pablo ne egkanengnengan kayi te seini ne sulat ne amana ne impurtanti diye te migmalintutuu ka peggimu te meupiya (1:6; 2:7, 14; 3:1, 8-9, 14) piru kene sika egpakuwas (3:5).

Ka nasulat te seini ne baseen

Igpewun-a 1:1-4

Ka eleg ne pegbebatasan te me upisyal diye te punduk te migmalintutuu 1:5-16

Ka eleg ne pegbebatasan te nalein-lein ne me etew diye te punduk te migmalintutuu 2:1-15

Ka meupiya ne pegbebatasan wey ka pegpaney-paney 3:1-11

Ka katammanan 3:12-15

¹ Sikeddiey si Pablo ka migpeuyan te seini ne sulat. Uripen a te Manama wey apustulis a ni Hisu Kristu.

Insuhu a te Manama eyew te peglig-en te pegpalintutuu te keet-etawan ne in-alam din wey eyew egpakanengneng sikandan te kamalehetan ne egpapanulu te peg-ugpe ne egpekeikul te Manama. ² Ne

puun te pegpalintutuu ran
wey pegkanengnengi ran te
kamalehetan, egpallateng
sikandan ne egkeuyag te
ware egtamanan tenged su
sika ka insaad te Manama
te ware pad himuwa ka
kalibutan, ne kene iya eg-
uubat sikandin.³ Ne kuntee
te eleg e ka timpu, impataha
rin e seini se Meupiya ne
Panugtulen. Ne seini se
Meupiya ne Panugtulen ka
insalig keddiey, ne seini naan
iya ka igwali ku sumale te
suhu keddiey te Manama ne
Manluluwas ta.

⁴ Impeuyan ku seini diye te
keykew Titu, isip malehet ne
anak ku te pegpalintutuu ta.

Ka keyid-u wey keupianan
ne egpuun te Manama
ne Amey wey te Manlu-
luwas ta ne si Kristu Hisus,
egkaangken niyu.

*Ka eleg ne pegbebasan te
me upisyal diye te punduk te
migmaintutuu*

⁵ Seini ka egpuunan ne
inggaat ku sikeykew diye te
Krita eyew egkeupianan nu
ka ware te pad napenga, wey
eyew egpakaalam ka te me
igbuyag te migmalintutuu
diye te tagse lungsud sumale
te ingkahи ku keykew.⁶ Keilangan
ne ka igbuyag, ware igkarew-ey
kandin, wey sabeka re ka asawa. Ne
keilangan degma ne egpal-
intutuu te Manama ka me
anak din, kene ne iyan dan de
egpammitawen ka kahalaan
kayi te ampew te tane, wey

kene sikandan eg-atu te
buyag kandan.⁷ Ne puun su
ka pangulu ka insalihan te
himu te Manama, keilangan
ne ware igkarew-ey kandin:
keilangan ne kene sikandin
ne hambuhen, kene ne
mahaan egkabelu, kene ne
talewubug, kene ne taleusig,
wey kene egpaneleppi te
mareet ne paahi.⁸ Ke kene,
keilangan ne maal-alumama
sikandin, eggeyinawaan din
ka meupiya, maheteng ka
suman-suman din, matareng
sikandin, matulus, wey
egpaketigkel te pegkeetew
rin.⁹ Keilangan ne kene
egsuwey sikandin te malehet
ne pegpanulu su eyew egpak-
abagget sikandin te duma
pinaahi te sika ne pegpanulu
wey egpaketigkel te pegkeetew
rin. ¹⁰ Keilangan ne kene
egsuwey sikandin te malehet
ne pegpanulu su eyew egpak-
abagget sikandin te duma
pinaahi te sika ne pegpanulu
wey egpaketigkel te pegkeetew
rin.

¹⁰ Keilangan ne eggimuwen
sika su due masulug ne
etew ne masinupaken, ne
eglalag te ware karuan
wey egpanulu te kene ne
malehet, labi e seeye se
me Hudiyu* ne eglalag te
keilangan ne egpatuli ka
langun ne egpalintutuu.¹¹ Keilangan ne egbalabahan
sikandan, su egkasamuk dan
de ka me pamilya pinaahi
te pegpanulu dan te kene
perem ne eleg ne igpanulu.
Innimu ran de sika eyew
egpaketigkel te pegkeetew.¹² Due sabeka
ne talagpanagne dan diye te
Krita ne migkahi, “Me ubaten
ka matig-Krita, me mabbulut

iling te mahintalunan ne me mananap, wey me pehulen sikandan wey me balbalen.”¹³ Malehet iya ka ingkahi rin. Purisu kene nu sikandan ul-ulungi te egsapad eyew egmaheteng ka peg-ikul ran te kamalehetan,¹⁴ wey eyew kenad e sikandan egpam-mineg te me gungutanen te me Hudiyu wey te me suhu te me etew ne kenad e egdawat te kamalehetan.¹⁵ Su ka etew ne nalinisan e, eg-isipen din ne malinis ka langun. Piru ka etew ne mareet wey kene egpalintutuu te Manama, ware eg-isipen din ne malinis, tenged su nareetan e ka suman-suman din wey ka kunsinsya rin.¹⁶ Mig-angken sikandan ne nekeila te Manama, piru kene egkakita sika diye te me himu ran. Igkengeepes sikandan, masinupaken, wey kene egpekeyimu te minsan nekey ne meupiya.

2

Ka eleg ne pegbebasan te migmalintutuu

¹ Piru sikeykew Titu, keilangan ne iyan nu ipanulu ka eleg ne igpanulu. ² Panulua nu ka buyag-buyag e ne me lukes te keilangan ne egpaketigkel sikandan te pegkeetew ran, talahuren sikandan, maheteng ka suman-suman dan, manekal ka pegpalintutuu ran, dakel ka geyinawa ran diye te duma, wey andam sikandan ne eg-antus. ³ Te iling ded ne paahi, panulua nu degma

ka buyag-buyag e ne me malitan te keilangan ne eleg ka pegbebasan dan diye te tangkaan te Mamana, kene eg-iran-iran te me duma ran, wey kene ne talewubug. Keilangan ne egpanulu sikandan ke nekey ka meupiya ⁴ diye te me bate-bate pad ne me malitan eyew egkabasbas sikandan ke egmenuwen dan te eggey-inawa ka me asawa ran wey me anak dan. ⁵ Keilangan degma ne egpanuluun dan ka me bate-bate pad ne me malitan ne egmahetengen se suman-suman dan wey kene egkasewuhan te mareet, eg-atiman sikandan te ugpaan dan, egmeupiya ka batasan dan, wey egparuma-ruma sikandan te me asawa ran, eyew kene egkalametan ka lalag te Manama.

⁶ Te iling ded due ne paahi, baggeta nu degma ka me lukes-lukes ne egtigkel te pegkeetew ran. ⁷ Keilangan ne sikeykew ka egkeyimu ne panunggilingan pinaahi te peggimu nu te meupiya. Ipakita nu pinaahi te pegpanulu nu ne matareng ka wey kene ne keungelan de. ⁸ Keilangan ne malehet ka iglalag nu wey ware igkarewey, eyew egkeyilawan seeye se egkuntere kanta tenged su ware igkalalag dan ne mareet meyitenged kanta.

⁹ Panulua nu degma ka me uripen te keilangan ne egparuma-ruma sikandan te me ahalen dan te langun-langun de iya eyew

te pegpahale kandan, wey kene egtabak-tabak kandan.

¹⁰ Keilangan ne kene dan epanakawan ka me ahalen dan, ke kene, igpapitew ran ne meupiya sikandan wey egkasalihan, eyew pinaahi te langun ne eggimuwen dan, epakakah ka me etew te meupiya iya ka impanulu ta kandan meyitenged te Manama ne Manluluwas ta.

¹¹ Eggimuwen ta seeye su impakite e te Manama ka keupiya wey keyid-u rin eyew te pegluwas te langun ne etew. ¹² Ne pinaahi te sika se keupiya wey keyid-u rin, egkapanulu ki ne engked te batasan ta ne kene egpekeikul te Manama wey te mareet ne igkeupii ta kayi te ampew te tane. Te seini ne timpu, keilangan ne maheteng ka suman-sumanta, matareng ki, wey eg-ikul ki te Manama, ¹³ taheed te egtetahad ki te impallateng ta ne iyan sika se pglepew te katelesan te maresen ne Manama ne Manluluwas ta ne si Hisu Kristu. ¹⁴ Imbehey rin ka umul rin eyew te pglekat kanta puun te langun ne sale ta, wey eyew egkeyimu ki ne kandin mismu ne keet-etawan ne malinis wey maali-ali ne eggimu te meupiya.

¹⁵ Ipanulu nu naa seini langun, baggeta nu ka migmalintuu, wey sapari nu sikan dan su due katenged nu te peggimu te iling due. Ne kene nu ituhut ne egbala-

haren dan ka pegpanulu nu.

3

Ka meupiya ne pegbebatasan

¹ Ipasuman-suman nu man-e te migmalintuu te keilangan ne egparumarama sikandan wey egtuman te balaud te gubirnu wey te me upisyal. Keilangan ne layun sikandan andam ne eggimu te meupiya, ² kene eg-iran-iran, kene ne apulen, ke kene, eg-ayayaran dan ka langun ne etew wey igpapitew ran ne kene ne mabulut sikandan. ³ Su sikanta degma dengan, egkengeungel ki, masinupaken ki, neuyan ki te duma wey neuripen ki te langun ne klasi te kahalaan ne kene ne meupiya ne igkeupii mule te lawa ta. Iyan te re impulungan ka mig-usig te duma wey neimma kandan. Indumutan ki te me etew wey indumutan ta degma sikandan. ⁴ Piru hengkayi te impapitew e te Manama ne Manluluwas ta ka keupiya rin wey ka geyinawa rin, ⁵ inluwas kid e nikandin, ne kene ne tenged te himu ta ne matareng, ke kene, tenged te keyid-u rin kanta. Inlluan ki nikandin te me sale ta wey imbehayan ki te iyam ne umul pinaahi te Panisingan te Manama. ⁶ Imbehey te Manama kayi te kanta ka Panisingan din te ware pegkannuhun pinaahi ki Hisu Kristu ne Manluluwas

ta,⁷ eyew eg-isipen ki te Manama ne matareng pinaahi te keupiya wey keyid-u rin wey egkaangken ta ka umul ne ware egtamanan ne impallateng ta.⁸ Malehet iya ka impangguhud ku kaniyu. Igkeupii ku naa ne ipehet-pehet nu ipanulu sika diye te kandan, eyew egpakannekal ne eggimu te meupiya ka langun ne migpalintutuu te Manama. Meupiya seeye wey egpakabulig te langun ne etew.

⁹ Piru pakaddiyu ka te ware karuan ne apulanan, ka peg-iitul te me kabuybuyahan niyu, ka egpakig-ehet wey egpakig-apul meytenged te Balaud su ware karuan due wey ware egkaangey nu rue. ¹⁰ Ke due duma nu ne iyan nakapasuwewy-suwey te penduk te migmalintutuu, sapari nu sikandin te me kararuwa, ne emun ke kene egpamineg, pakaddiyui nud e sikandin. ¹¹ Nakanengneng ka te ka etew ne iling due, nakapariyu e te kamalehetan wey makasesale e. Ne ka himu rin mismu ka nakareet kandin.

Ka pegpanaha-taha

¹² Ke igpeenduen kud e te keykew si Artimas wey ke si Tikiku naa, apas ke naa temu keddi diye te Nikupulis su nakaplanu ad ne diye e pad eg-ugpe te timpu te maagsil. ¹³ Pakannekali nu degma te egbulig si Sinas ne

ebugadu wey si Apulus eyew egpakaligkat e sikandan ne ware kulang. ¹⁴ Keilangan ne eggimu te meupiya ka keet-etawan ta eyew egpakabulig sikandan te mabehat ne prublima te duma, wey eyew egbebehas sikandan.

¹⁵ Egpangemusta keykew ka langun ne me duma ku kayi. Ipangemusta key re degma te langun ne miggey-inawa kanami ne duma ta te mig-ikul te kamalehetan.

Ka keupiya wey keyid-u ne egpuun te Manama, egkaangken niyu langun.

Ka Sulat ni Pablu ki Pilimun

Igpewun-a

Si Pilimun, in-ila ne Kristuwanen wey sakup sikandin te punduk te migmalintutuu diye te siyudad te Kulusas. Sikandin ka kamuney te uripen ne egngararan ki Unisimu. Migpallahuyan ni Unisimu ka ahalen din wey miggingga ka timpu ne nekegkita sikandan ki Apustul Pablu diye te prisuwan. Ne dutu, na-Kristuwanen e si Unisimu su puun ki Pablu. Ne seini se *Sulat ni Pablu ki Pilimun*, sabeka seini ne hangyu ne egpekeg-uli ka meupiya ne geyinawa enni Pilimun ki Unisimu ne uripen din. Su igpalibed ded ni Pablu si Unisimu diye ki Pilimun, ne iyan din perem igkeupii ne egdawaten ni Pilimun ka uripen din ne kene ne puun de su impasaylu rin e sikandin isip uripen, ke kene, puun su sabeke e degma sikandin ne suled din te pegpalintutuu.

Ka nasulat te seini ne baseen

Igpewun-a 1-3

Indayan si Pilimun 4-7

Ka peghangyu ni Pablu
diye te ki Pilimun
meyitenged ki Unisimu
8-22

Ka katammanan 23-25

¹ Sikeddiey si Pablu ka naprisu tenged te pegpamakey ku ki Kristu Hisus.

Sikeddi wey si Timutiyu ne suled ta te pegpalintutuu ka migpeuyan te seini ne sulat diye te keykew Pilimun te miggeyinawaan ney ne duma ney te himu,² wey diye degma te atebey ta te pegpalintutuu ne si Apiya, wey diye te ki Arkipu ne duma ta ne sundalu ni Kristu, wey te langun ne migmalintutuu ne egsimba diye te baley nu.

³ Ka keyid-u wey keupianan ne egpuun te Manama ne Amey ta wey te Magbebeye ne si Hisu Kristu, egkaangken niyu.

Ka pegpasalamat wey pegampu ni Pablu

⁴ Egpasalamat a layun te Manama ta ke eg-ampu a keykew, suled Pilimun,⁵ uya su nakarineg a ne manekal ka pegpalintutuu nu te Magbebeye ne si Hisus, wey dakel ka geyinawa nu te langun ne keet-etawan te Manama.⁶ Ne eg-ampu a ne egmanedted ka pegpangguhud nu meyitenged te pegpalintutuu nu eyew amana nu egkasabut ka langun ne meupiya ne imbehey ni Kristu kayi te kanta.⁷ Suled, amana a nahale wey nabagget tenged te geyinawa nu, su pinaahi keykew, migmeupiya ka peggeram-geram te keet-etawan te Manama.

*Ka peghangyu ni Pablu
ki Pilimun meyitenged ki
Unisimu*

⁸ Purisu, minsan imbehayan a ni Kristu te katenged te pegsuhu keykew ke nekey ka eleg ne eggimuwen nu, ⁹ piru tenged te geyinawa ta, eghangyu e naan de keykew. Ka seini ne hangyu puun keddiey, ki Pablu te buyag e ne etew, ne kuntee naprisu e tenged te pegpamakey ku ki Kristu Hisus. ¹⁰ Iyan ku ighangyu keykew ka meyitenged ki Unisimu. Inisip ku sikandin ne anak ku tenged su neyimu sikandin ne Kristuwanen pinaahi keddiey kayi te prisuwan. ¹¹ Dengan, ware pulus ni Unisimu* diye te keykew, piru kuntee, dakel e ka igkabulig din keykew wey minsan kayi te keddiey degma.

¹² Ne kuntee, igpeuli kud e diye te keykew ka miggeyinawaan ku ne si Unisimu. ¹³ Igkeupii ku perem dengan ne kayi re sikandin duma keddi eyew pinaahi kandin egpakabulig ka keddiey taheed te naprisu a tenged te pegpangguhud ku te Meupiya ne Panugtulen. ¹⁴ Piru kena a egkeupian ne eggimu te minsan nekey ne kene nu eg-uyunan. Iyan ku igkeupii ne egbulig ka keddi puun su egkeupian ka, ne kene ne puun su egkapehes ke re.

¹⁵ Kema ke iyan egpuunan ne nakapariyu si Unisimu keykew te ware de naluhey su eyew te peglived din,

kene kew e egpekegsuwney te ware egtamanan. ¹⁶ Ne kuntee, kenad e ne uripen de sikandin, ke kene, mahal pad te uripen, uya su pinalangge e sikandin ne suled ta te pegpalintutuu. Miggeyinawaan ku sikandin piru subla pad perem ka peggeyinawa nu kandin tenged su kenad e ne uripen nu re sikandin, ke kene, suled nu degma diye te Magbebaye.

¹⁷ Purisu ke malehet ne inila a nikeykew ne duma nu te pegpalintutuu, dawata nu sikandin iling te sikeddi ded ka egdawaten nu. ¹⁸ Emun ke nakasale sikandin keykew wey ke nekeutang naa, iyan ad e egbayad. ¹⁹ Sikeddiey si Pablu ka mig-uneypney migsulat kayi. Sikeddiey e ka egbayad te utang din keykew. Kenad e ne keilangan ne igpasuman-suman ku pad keykew ne due degma dakel ne utang nu keddi, su pinaahi keddiey, nakarawat ka te umul ne ware egtamanan. ²⁰ Uya, suled, eghangyu a ne egpabulig keykew, ma naa su neelin ki ne migpalintutuu te Magbebaye. Himuwa nu sika eyew egmeupiya ka peggeram-geram ku isip suled nu diye te ki Kristu.

²¹ Migsulat a keykew su nakataha a ne egtumanen nu ka eghangyuken ku keykew, ne subla pad iya ka eggimuwen nu. ²² Duen pad man-e ighangyu ku keykew. Andami ad e te sinabeng su

1:10 Kul 4:9. * **1:11** Ka kaluwasan te ngaran ne Unisimu: egpakabulig

egpallateng a ne pinaahi te peg-ampu niyu, egtuhutan a te Manama ne egpekeenduen ded te kaniyu.

Ka katammanan ne pange-musta

²³ Egpangemusta keykew si Ipapras ne duma ku te naprisu tenged te pegpamakey ney ki Kristu Hisus.

²⁴ Ne egpangemusta degma ensi Markus, si Aristarku, si Dimas, wey si Lukas ne me duma ku te himu.

²⁵ Ka keupiya wey keyidu ne egpuun te Magbebaye ne si Hisu Kristu, egkaangken niyu langun.

Ka Sulat ne Igpeendiye te Hibruwanen

Igpewun-a

Ka seini ne sulat, ware nanengnengi ke hentew ka migsulat kayi, piru igpeendiye seini te sabeka ne punduk te me Huduuy ne migmalintutuu ne egnaranan degma te Hibruwanen. Insulat seini su eyew egkalig-en ka pegpalintutuu ran tenged su nana-nasian e ka keyirapan ne eg-antusen dan wey in-el-elehan ka pegpalintutuu ran ki Kristu. Sikan naa, imbagget sikan dan te talagsulat meyitenged te pegpalintutuu ran wey impanulu din sikandan te si Hisu Kristu ka malehet wey ka katammanan ne impakita te Manama te me etew kayi te ampew te tane.

Ne due seini se tatelu ne kamalehetan ne mig-ayayaran din te eghanulu: (1) Si Hisus ka ware bunsuranan wey ware katammanan ne Anak te Manama. Ne labew pad sikandin te me prupita, me panalihan, wey minsan ki Muwisis. (2) Si Hisus ka impeila te Manama ne ware katammanan ne talagpanubad. Labew sikandin te me talagpanubad diye te Tapey ne Kasabutan. (3) Ne pinaahi ki Hisus, ka migpalintutuu kandin egkluwas te sale wey te kamatayen.

Nahuhud diye te kapitulo 11 ka meyitenged te

pegpalintutuu te mabantug ne me Hibruwanen puun pad dengan. Sikan naa, imbagget te talagsulat ka migmalintutuu ne eglig-en te pegpalintutuu ran. Ne diye te kapitulo 12, imbagget din man-e sikandan ne egpabulus ka egmatinumanen taman te katamanan, ne iyan de egtengtengan si Hisus. Igpaantus man-e kandan ka me keyirapan wey ka pegbayad-bayad ne egginguma kandan. Piru keilangan ne egkatahaan dan ne seeye se langun, pegdisiplina re kandan te Manama isip me anak din. Mig-impusan din ka seini ne sulat pinaahi te pegtambag din wey pegpaney-paney rin.

Ka nasulat te seini ne baseen

Igpewun-a: Ka Anak iling ded te Manama 1:1-3
Labew si Kristu te me panalihan 1:4-2:18

Labew si Kristu engki Muwisis wey ki Huswi 3:1-4:13

Si Kristu ka labew te langun ne talagpanubad 4:14-7:28

Labew ka kasabutan ni Kristu du te langun ne me kasabutan 8:1-9:28

Labew te langun ka pegpanubad ki Kristu 10:1-39

Ka panunggilingan te pegpalintutuu ne eg-ikulen ta 11:1-12:29

Ka katammanan ne pegpaney-paney wey ka pegpanulu 13:1-25

Ka katelesan te Amey due

te Anak

¹ Dengan ne timpu, malasi migpakiglalag ka Manama te nalein-lein ne paahi diye te me kaap-apuan ta pinaahi te me prupita. ² Piru te seini se katammanan ne timpu, migpakiglalag sikandin kanta pinaahi te Anak din ne in-alam din ne iyan egkey-imu ne kamuney te langun. Ne pinaahi kandin, innimu te Manama ka kalibutan. ³ Due te Anak egkakita ka katelesan te Manama, wey ke nekey ka Manama, iling naan ded ka Anak. Sikandin ka egbuut wey egtanggu te langun pinaahi te maresen ne lalag din. Te napenga rin e ka innimu rin ne peglinis te sale te me etew, migpinnuu e sikandin diye te igkakawanana* te Amana ne Maresen ne Manama ne diye te langit.

Labew ka Anak du te me panalihan

⁴ Purisu, labew pad sikandin te me panalihan te Manama wey labew pad degma ka genal ne imbehey te Manama kandin du te me panalihan. ⁵ Su ware de due panalihan ne migkahiyan te Manama, “Anak ku sikeykew.

Kuntee, igpanengneng ku ne Amey ad e nikeykew.” Ware ingkahi te Manama meyitenged te panalihan, “Amey ad e nikandin,

wey Anak kud e sikandin.”

⁶ Timul pad man-e, te peg-peuyan te Manama te mabantug[†] ne anak din kayi te kalibutan, migkahi sikandin, “Keilangan ne ka langun ne me panalihan te Manama egsimba kandin.”

⁷ Meyitenged te me panalihan, migkahi ka Manama, “Innimu te Manama ka me panalihan ne egpekeiling te kalamag,

wey ka suluhuanen din ne egpekeiling te hapuy ne egkanlabkann-lab.”

⁸ Piru migkahiyan din mule ka Anak din, “Ka Peghari nu, Manama, ware iya egtamanan, wey matareng ka peg-uyan nu te migharian nu.

⁹ Inggeyinawaan nu ka himu ne matareng, piru ka himu ne mareet, ingkeepes nu.

Purisu, sikeddi ne Manama nu ka mig-alam keykew ne egpaka-paribabew te me duma nu wey ka migbehey keykew te dakel ne kahale kuntek kandan.”

¹⁰ Ne mig-abey sikandin migkahi diye te Anak din, “Te an-anayan, Magbebkiye, innimu nu ka kalibutan, wey intekul te belad nu ka langit.

* **1:3** Sumale te tuluuwen te me Hudiyu, ka talahuren de ne etew ka egpakin-nuu diye te igkakawanana te mabantug ne etew. **1:5** Sal 2:7; 2Sam 7:14; 1Kru 17:13. **1:6** Diy 32:43 (LXX). † **1:6** Te Grigu: ka panganey ne anak din. **1:7** Sal 104:4 (LXX). **1:8** Sal 45:6-7. **1:10** Sal 102:25-27 (LXX).

11 Egkengaawe sikandan, piru kene ka mule egkaawe.

Egkaleddak ka langun iling te me manggad.

12 Eglupien nu sikandan iling te kumbale, wey egbullasan nu sikandan.

Piru sikeykew, kene ka egkabalbalawan wey ware egtamanan te umul nu.”

13 Ne ware de due panalihan ne ingkahiyan te Manama, “Pinnuu ka kayi te igkakawanan

ku, taman te eggimuwen ku ne diekanan nu ka me kuntere nu.”

14 Na, nekey naa ka me panalihan? Sikandan ka me suluhuanen te Manama ne kene egkakita ne igpeuyan din eyew egtanggu te seeye se epakarawat te kaluwasan.

2

Ka pegpamalehet meyitenged te kaluwasan

¹ Purisu, keilangan ne amanaan ta eg-ay-ayari te epammineg ka kamalehetan ne narinig tad e eyew kene ki epakasuwey due.

² Ka Balaud ni Muwisis ne imbehey te Manama pinaahi te me panalihan, napamalehetan ne malehet iya, wey ka langun ne etew ne migsupak wey ware migtuman kayi, miglegparan e sumale te sale dan. ³ Purisu, egmenuwen te naa te epakapanalliya te legpad ke egbalaharen ta seini se kaluwasan ne ware

egkeilingan? Ka Magbaye mismu ka an-anayan ne migpataha meyitenged te seini ne kaluwasan, wey impamalehet e degma seini kayi te kanta te seeye se nakarineg kandin.

⁴ Migpamalehet degma ka Manama meyitenged kayi pinaahi te me palinneu, me nalein-lein ne kein-inuwan, wey me katuenan ne imbehey te Panisingan te Manama sumale te pegbuut din.

Migginguma ka kaluwasan pinaahi ki Hisus

5 Na, meyitenged te egkahiyan ney ne eggigunga ne kalibutan, kene ne me panalihan te Manama ka egpeuyanen din due. ⁶ Piru due nasulat diye te Kasulatan ne miggendue:

“Manama, nekey bes ka etew, mania te egsumsumanen nu pad?

Mania te egtangguwen nu pad ka anak te etew?

⁷ Impariralem nu sikandin te me panalihan te ware de naluhey.

Ne imbehayan nu sikandin te katelesan wey bantug ne iling te Hari,

⁸ wey impabuut nu sikandin te langun.”

Ne ka egkahiyan te Kasulatan ne “impabuut sikandin te langun,” iyan igpasabut due ne ware minsan nekey ne kene egbuutan te etew. Kuntee, ware te pad nakita ne neyimu seini se langun.

⁹Piru ke meyitenged ki Hisus, nakanengneng ki ne impariralem sikandin te Manama te me panalihan te ware de naluhey, su eyew pinaahi te keupiya wey keyid-u te Manama, egpatey sikandin para te langun ne etew. Ne imbehayan sikandin te katelesan wey bantug ne iling te Hari tenged te kamatayen ne in-antus din. ¹⁰Innimu te Manama ka langun wey ka langun ne innimu rin para re iya kandin. Purisu, eleg de iya ne impaantus din ka migpuunan te kaluwasan ta ne si Hisus. Su pinaahi te peg-antus ni Hisus, nabayaan din ka langun ne keilangan ne egkabayaan din su eyew masalig ka anak te Manama ne egpakasawit te kabantug din.

¹¹ Ne si Hisus wey ka me etew ne immatulus din, sabeka re ka Amey ran. Ne tenged due, kene egkeyilew si Hisus ne egngaran kandan ne me suled din. ¹² Su migkahi sikandin diye te Amey rin,

“Ame, igpeila ku sikeykew te me suled ku;
wey egdayanen ku sikeykew
diye te taliware te
langun ne egsimba
keykew.”

¹³ Migkahi degma sikandin, “Egsalig a iya te Manama.” Ne migkahi pad man-e sikandin, “Seini a duma te me anak ne imbehey te Manama keddi.”

2:12 Sal 22:22. **2:13** Isa 8:17 (LXX); Isa 8:18. **12:7.**

¹⁴ Na, tenged su ka me anak te Manama etew re ne due sapu wey langesa, migpekeetew degma si Hisus ne iling ded kandan. Innimu rin seini eyew pinaahi te kamatayen din, egdereetan din sika se due geem te kamatayen, ne iyan sika se ahalen te me busew. ¹⁵ Sikan naa, inluwas din ka langun ne neuripen seled te intiru ne umul ran tenged te pegkaaldek dan te kamatayen. ¹⁶ Su kene iya ne me panalihan ka egbulihan din, ke kene, ka me kabuhalan iya ni Abraham. ¹⁷ Purisu, keilangan ne neyimu iya sikandin ne iling te me suled din te minsan nekey ne paahi eyew egkeyimu sikandin ne hiid-uwen wey matinumanen ne Labew ne Talagpanubad te Manama, su eyew egpakabehey sikandin te igpanubad para te sale te me etew. ¹⁸ Sikan naa, puun su mig-antus wey intintal mismu si Hisus, egpakabulig sikandin te me etew ne egtintalen.

3

Labew pad si Hisus ki Muwisis

¹ Purisu me suled ku ne migmalintutuu ne in-alam te Manama ne keet-etawan din wey iling keddiey te in-umew te Manama ne egkeyimu ne duma rin diye te langit, sumsumana niyu si Hisus. Sikandin ka impeuyan te Manama wey

2:16 Isa 41:8-9. **3:2** Num

ka Labew ne Talagpanubad te pegpalintutuu ta. ²
 Matinumanen sikandin te Manama ne iyan mig-alam kandin, iling ki Muwisis te matinumanen ne mig-uyan te keet-etawan te Manama. ³ Piru si Hisus, in-isip ne subla pad ne mabantug du te si Muwisis, su iling te sabeka ne etew ne egbebaley ne iyan mule egmabantug du te baley ne impasasindeg din. ⁴ Su ke due baley, due degma etew ne migpasasindeg due, piru ka Manama ka miggi mu te langun. ⁵ Ne si Muwisis, matinumanen ne suluhuanen diye te keet-etawan te Manama. Ne ka innimu rin, sabeka sika ne panunggilingan ke nekey ka igpataha keureme te Manama. ⁶ Piru si Kristu, ka Anak te Manama, ka matinumanen ne eg-uyan te keet-etawan te Manama. Ne sikanta ka keet-etawan din ke egpabulus ki iya ne egsalig wey egpeggasal ke nekey ka impallateng ta.

Ka pegpaney-paney te se-eye se kene egpalintutuu te Manama

⁷ Purisu, sumale te ingkahi te Panisingan te Manama,
 “Emun ke egkarineg niyu kuntee ka laheng te Manama,
⁸ kene niyu pakehala ka me ulu niyu, iling te innimu te me kaap-apuan niyu dengan te pegsupak dan te Manama

pinaahi te peg-eleg-eleg dan kandin
 diye te mammara ne inged ne kene egkeugpaan.”
⁹ Su migkahi ka Manama, “Minsan nakakite e ka me kaap-apuan niyu te innimu ku seled te hep-at ne pulu (40) ne leg-un, in-el-elehan e pad nikandan.
¹⁰ Purisu, nabelu a kandan ne migkahi a,
 ‘Layun de egpakasuwey ka suman-suman dan keddi, wey ware dan nataheyi ka batasan ku.’
¹¹ Migpahunlibet a te pegkalangeti ku ne,
 ‘Kene iya sikandan eg-pakaseled diye te himelayanan ne inta-hahe ku kandan!’”

¹² Me suled ku, ayad-ayad kew ne kene ne mareet ka me pusung niyu ne hubabeeen te manekal ne Manama, ne iyan buwa egpuunan ne egpekeinniyug kew kandin. ¹³ Piru pabaناسaley kew tagse aldew taheed te duen pad timpu, eyew ware sabeka kaniyu ne egkalimbungan te sale wey egmakehal se pusung.

¹⁴ Su wey ki re egpakaruma ki Kristu ke egpabulus ki egsalig te Manama taman te katamanan, iling te pegasalig ta te an-anayan. ¹⁵ Su sumale te Kasulatan,

“Emun ke egkarineg niyu kuntee ka laheng te Manama,

kene niyu pakehala ka me ulu niyu iling te innimu te me kaap-apuan niyu dengan te pegsupak dan te Manama.”

¹⁶ Hentew bes sikandan se nakarineg te laheng te Manama piru migsupak kandin? Seeye iya se langun ne in-uyan ni Muwisis puun te Ihiptu. ¹⁷ Ne hentew bes pad ka ingkabelu te Manama seled te hep-at ne pulu (40) ne leg-un? Seeye iya se nenakasale wey nemammatey diye te mammara ne inged ne kene egkeug-paan. ¹⁸ Hentew bes ka impahunlibetan te Manama ne kene iya egpakaseled diye te himelayanan ne intahahe din kandan? Seeye iya se migsupak kandin. ¹⁹ Ne dutu, egkanengnengan ta ne ware nakaseled sikandan diye te himelayanan tenged su ware migpalintutuu sikandan te saad te Manama.

4

Ka himelayanan te keet-etawan te Manama

¹ Purisu, puun te duen pad ka saad te Manama ne eg-pakaseled ka me etew diye te himelayanan ne intahahe din, keilangan ne eg/ayad/ayad ki ne ware egkahaat kanta. ² Su nakarineg kid e degma te Meupiya ne Panugtulen meyitenged te himelayanan, ware nakaseled tenged su ware sikandan migpalintutuu te Manama. ⁷ Ne mig-alam e man-e ka Manama te lein ne timpu te pegseled diye te himelayanan ne intahahe din, ne ka sika ne timpu egngaranan din, “Kuntee.”

te me kaap-apuan ta deng-an. Piru ware karuan se-eye diye te kandan tenged su ware nikandan palintutuu-wa ka inlalag te Manama.³ Su sikanta re se migpalintutuu ka egpakaseled te himelayanan. Meyitenged te se-eye se ware migpalintutuu, migkahi ka Manama,

“Migpahunlibet a te pegkalangeti ku ne, ‘Kene iya sikandan egpakaseled diye te himelayanan ne intahahe ku kandan!’”

Ingkahi rin seini minsan natahahe e ka seeye se himelayanan ligkat te innimu rin ka kalibutan. ⁴ Su due nasulat diye te Kasulatan meyitenged te igkapitu ne aldew ne miggendue, “Te igkapitu ne aldew, miggimley ka Manama su napenge e ka langun ne innimu rin.”

⁵ Piru sumale te nasulat dutu te kewun-aan ne miggendue, “Kene iya sikandan egpakaseled te himelayanan ne intahahe ku kandan!”

⁶ Sikan naa, due himelayanan ne egeleran perem te me etew. Piru sikandan se nakarineg dengan te Meupiya ne Panugtulen meyitenged te himelayanan, ware nakaseled tenged su ware sikandan migpalintutuu te Manama. ⁷ Ne mig-alam e man-e ka Manama te lein ne timpu te pegseled diye te himelayanan ne intahahe din, ne ka sika ne timpu egngaranan din, “Kuntee.”

Su peglihad te me leg-un,
migkahi ka Manama pinaahi
ki Hari Dabid,
“Emun ke egkarineg niyu
kuntee ka laheng te
Manama,
kene niyu pakehala ka me
ulu niyu.”

⁸ Ne meyitenged te me etew dengan, ke diye pa uyana sikandan ni Huswi te himelayanan ne intahae te Manama, warad e perem lalaha te Manama ka meyitenged te seeye se lein ne aldew ne epakaseled ka me etew diye te himelayanan. ⁹ Purisu, duen pad peggimeley para te keet-etawan te Manama ne iling te peggimeley rin te igkapitu ne aldew. ¹⁰ Su minsan hentew ne epakaseled te seeye ne himelayanan, egpekeyimeley degma te kandin ne himu iling te peggimeley te Manama dengan te peggimu rin te langun. ¹¹ Purisu, epakannekal ki ka egseled te seeye ne himelayanan su eyew ware sabeka kanta ne egpekeiling te me etew dengan ne migsupak te Manama ne ware nakaseled diye te himelayanan.

¹² Su ka lalag te Manama, due geem wey manedted, ne subla pad ne mahalang du te sundang. Eg-uteng sika taman diye te kinariraleman te suman-suman wey te geyinawa, wey taman diye te utek te tul-an wey te buku-buku. Sika ka egpanengneng ke nekey ka suman-suman

wey tuyu te etew. ¹³ Diye te tangkaan te Manama, warad iya igkeeles su ka langun egkakita rin wey egkamelmelehan din. Ne sikandin ka egpanabakan ta te langun ne eggimuwen ta.

Si Hisus ka Labew te Talagpanubad

¹⁴ Purisu, puun su due Labew ne Talagpanubad ta ne diyad e te langit, ne iyan si Hisus ne Anak te Manama, keilangan ne egdesdesenan ta ka pegpalintutuu ta. ¹⁵ Ne ka Labew ne Talagpanubad ta, epakasabut te makasesale ki tenged te etew ki re, su intintal ma degma sikandin te langun ne igtintal kanta, piru ware mule sikandin nakasale. ¹⁶ Purisu keilangan ne kene ki egkeyilew ne egparani diye te tangkaan te hiid-uwen ne Manama su eyew igkeyid-u ki wey egbulihan ki nikandin te timpu te keyirapan ta.

5

¹ Na, ka Labew ne Talagpanubad te me Hudiyu, diye eg-alama te keet-etawan wey egsalihan sikandin ne eggendiye te tangkaan te Manama para te me duma ne me etew. Ne igbehey rin naa ka dasag dan wey ka igpanubad dan eyew egkapasaylu ka me sale dan.
² Ne tenged su etew re degma

sikandin ne makasesale, egay-ayaran din seeye se egpakuwey te kamalehetan wey ware nakanengneng ne mareet bes ka eggimuwen dan.³ Ne tenged su egpakuwey degma sikandin, keilangan ne egpanubad degma sikandin para te kandin mismu ne sale, ne kene de ne sale te duma ne me etew.

⁴ Ware etew ne egkeyimu ne Labew ne Talagpanubad tenged te kandin mismu ne igkeupii ne egkeyimu sikandin ne mabantug, ke kene, keilangan ne ka Manama ka eg-alam kandin iling te peg-alam din ki Aarun dengan.⁵ Ne iling degma ki Kristu, su kene ne sikandin ka migpabantug te kandin ne pegkeetew ne eyew egkeyimu sikandin ne Labew ne Talagpanubad, ke kene, ka Manama ka migalam kandin. Su migkahiyan sikandin te Manama, "Anak ku sikeykew, ne kuntee, igpanengneng ku ne Amey ad e nikeykew."

⁶ Ne due degma nasulat ne migkahi ka Manama, "Talagpanubad ka te ware egtamanan, iling ki Milkisidik ne talagpanubad dengan."

⁷ Te kayi pad si Hisus te ampew te tane, migpanaman-taman sikandin mig-ampu, migsinehew wey migpanguleyi te meemen ka egpeyid-u-

hid-u diye te Manama ne iyan egpaketangabang kandin te kamatayen. Ne tenged te mapariralemen sikandin te Manama, narindeg sikandin te Manama.⁸ Ne minsan Anak sikandin te Manama, nateu sikandin ne egtuman te Manama pinaahi te pegantus din.⁹ Ne tenged su nabayaan din e ka keilangan ne egkabayaan din, neyimu e sikandin ne egpuunan te ware egtamanan ne kaluwasan te langun ne egtuman kandin.¹⁰ Su inimiu sikandin te Manama ne Labew ne Talagpanubad iling ki Milkisidik.

Ka pegraspad meyitenged te peg-engked te pegpalintutuu

¹¹ Na, masalig pad perem ka iglalag ney kaniyu meyitenged kayi, piru malehen ne igpasabut kaniyu tenged su kene kew eglingalinga.¹² Su minsan eleg kew e perem ne egpanulu, piru keilangan ne eg-abayan kew pad man-e egpanulu te lalag te Manama ne impanulu e kaniyu te ananayan. Egpekeiling kew te egsusu pad ne me bate ne kene pad eleg ne egpakeenen te makehal ne keenen.¹³ Su minsan hentew se gatas pad se eg-inumen, egpekeiling te bate ne ware katahaan ke nekey ka meupiya ne eggimuwen.¹⁴ Piru ka makehal ne egkeenen, eleg te matesan e se pegpalintutuu.

5:3 Lib 9:7. **5:4** Iks 28:1. **5:5** Sal 2:7. **5:6** Sal 110:4. **5:7** Mat 26:36-46; Mar 14:32-42; Luk 22:39-46. **5:12** 1Kur 3:2.

Sikandan ka migbebasbas ne egpekeila ke nekey ka meupiya wey mareet.

6

¹ Purisu keilangan ne kene tad e eglibberen ka an-anayan ne pegpanulu meyitenged ki Kristu su epabulus kid e te maralem ne pegpanulu ne eleg te matesan e se pegpalintutuu. Kenad e ne keilangan ne egliberan te pad man-e igpanulu ka meyitenged te peg-inniyug te himu ne ware karuan wey ka meyitenged te pegpalintutuu te Manama. ² Kene kid e man-e egpepanulu meyitenged te pegbewutismu, pegtel-eb te belad, pegkeuyag te me minatey, wey ka meyitenged te hukum te Manama kanta keureme ne kene egkabal-balawan te ware egtamanan. ³ Piru ke igtuhut te Manama, epabulus kid e te maralem ne pegpanulu ne eleg te matesan e se pegpalintutuu.

⁴ Su ke due etew ne engked te pegpalintutuu rin ki Hisus, kene egkaayun ne eg-inniyug man-e sikandin te sale din. Su nakanengneng e sikandin te kamalehetan wey naheraman din e ka dasag te Manama, wey nakarawat e sikandin te Panisingan te Manama. ⁵ Naheraman din e ka keupiya te lalag te Manama wey ka geem te Manama ne amana ta egkaherami te eggingga ne timpu, ⁶ piru eg-engked ded sikandin te

pegpalintutuu rin. Sikan naa, kenad e egkaayun ne egpaliberen pad sikandin egpeinniuha te me sale din su egkeiling e te eg-abayan din pad man-e iglansang te krus ka Anak te Manama wey egpeylawan diye te kasuluhan.

⁷ Na, sikanta se me etew, iyan ta egkeilingan ka tane. Emun ke malasi eg-urani ka tane ne epakapatubu te meupiya ne pinamula wey egkapulusan te seeye se migpamula, impanalanginan naa te Manama ka sika ne tane. ⁸ Piru ke duhiyen de ne hilamunen ka igpatubu kayi, ware karuan te sika ne tane wey igdilus e te Manama, ne egkataman, egsilaban e.

⁹ Minsan iling due ka inlag ney, me pinalangge ku ne me suled, piru nakamemalehet key ne meupiya pad dutu ka egkeula-ula niyu tenged te me panalangin ne epakaruma te kaluwasan niyu. ¹⁰ Su matareng ne talaggukum ka Manama. Kene din egkalingawan ka me himu niyu wey ka geyinawa ne impakita niyu kandin pinaahi te pegbulig niyu te keet-etawan din. Ne minsan kuntee, epabulus kew pad ne egbulig kandan. ¹¹ Ne iyan ney igkeupii ne epabulus ka kaali-ali te tagse sabeka kaniyu ne eggimu te iling due taman te katammanan, eyew egkamalehet ka egpalatengen niyu. ¹² Keilangan ne kene kew paperehul, ke

kene, ilingi niyu seeye se nakarawat e te insaad te Manama tenged su migpabulus sikandan ne migpalintutuu wey ware sikandan napeleyi ne egtetahad.

Egkatuman iya ka saad te Manama

¹³ Sumsumana niyu ka timpu ne migsaad ka Manama ki Abraham. Ne puun su ware egpakalabew te Manama, ware sikandin migpahunlibet te duma ne ngaran eyew igpamalehet din ka insaad din, ke kene, ka kandin mismu ne ngaran ka impahunlibetan din. ¹⁴ Migkahi sikandin, "Egpanalanginan ku iya sikeykew wey egpabugbuhalen ka." ¹⁵ Ne tenged su ware napeleyi si Abraham ne migtetahad, narawat din ka insaad te Manama. ¹⁶ Na, emun ke egpahunlibet ka sabeka ne etew, iyan din igpahunlibet ka labew pad kandin. Ne puun te seini ne pegpamalehet, egkewusey e ka me apulanan te me etew. ¹⁷ Iling ded degma ka innimu te Manama te pegasad din. Migpahunlibet sikandin te pegasad din eyew igpakita rin te seeye se egpakarawat te insaad din, ne kene iya egkabalbalawan ka katuyuan din. ¹⁸ Ne ka daruwa ne innimu te Manama, ka pegasad din wey ka pegpahunlibet din, kene iya egkabalbalawan

su kene egkaayun ne egubat ka Manama. Purisu sikanta se nakaaput e te Manama, egkabagget ki ne kene egleke te impallateng ta ne me panalangin ne insaad din kanta. ¹⁹ Ka seini ne pegpallateng, ka egpekeehet te pegpalintutuu ta, * tenged su klaru iya ne egkarawat ta ka insaad te Manama kanta. Tenged te pegpallateng ta, hendue te nakaseled kid e diye te ugpaan te Manama iling te pegseled te Labew ne Talagpanubad diye te matulus ne sinabeng ne in-eletan te makepal ne kurtina. ²⁰ Ne miggune e si Hisus diye te langit eyew egpangatubang para kanta su neyimu sikandin ne Labew ne Talagpanubad te ware egtamanan, iling ki Milkisidik ne talagpanubad dengan.

7

Ka talagpanubad ne si Milkisidik

¹ Ne si Milkisidik ka Hari dengan diye te Salim wey ka talagpanubad degma te Amana ne Mabantug ne Manama. Sikandin ka migsinug-ung te peg-uli ni Abraham te migbubunu ne nakapanalu te me Hari, wey ka migpanalangin kandin. ² Ne imbehey ni Abraham ki Milkisidik ka igkasapulu ne baad te langun ne naawi din te pegbubunu. Ka kaluwasan te ngaran ne

6:14 Hin 22:16-17. **6:19** Lib 16:2.

6:20 Sal 110:4. **7:1** Hin 14:17-20.

* **6:19** Te Grigu: palibehat te gimukud.

Milkisidik, "matareng ne Hari." Ne tenged su iyan kaluwasan te inged ne Salim ne migharian din ka "keupianan," egnggaranan ded man-e sikandin te "Hari te keupianan."³ Ware nasulat ka meyitenged te amey rin, iney rin, wey me kaap-apuan din. Ware degma nasulat ka meyitenged te peglesut din wey ka pegpatey rin. Iling sikandin te Anak te Manama ne ware bunsuranan wey ware katammanan tenged su epabulus sikandin ne talagpanubad te ware egtamanan.

⁴ Ne sumsumana niyu kamenu kabantug si Milkisidik. Su minsan mabantug ka kaap-apuan ta ne si Abraham, migbehey ma kandin te igkasapulu ne baad te langun ne naawi din te pegbubunu.

⁵ Ne sumale te Balaud ni Muwisis, insuhu ka me talagpanubad ne kabuhalan ni Libi ne iyan egpanguwa te igkasapulu ne baad puun te me duma ran ne me Hudiyu, minsan kabuhalan sikan dan langun ni Abraham.

⁶ Piru si Milkisidik, minsan kene ne kabuhalan ni Libi, nakarawat sikandin te igkasapulu puun ki Abraham, wey sikandin ka migpanalangin ki Abraham, minsan si Abraham mule ka migsaarane te Manama. ⁷ Ne nakataha ka langun ne iyan subla ne labew ka migpanalangin du te seeye se impanalanginan.

⁸ Ne meyitenged te me talagpanubad ne kabuhalan ni Libi ne iyan egdawat te igkas-

apulu ne baad, me etew re sikandan ne egpamatey. Piru sumale te Kasulatan, hendue te ware mule migpatey si Milkisidik ka migdawat te igkasapulu ne baad. ⁹ Egpakakahki ki te minsan si Libi, ne iyan egdawat te igkasapulu, migbehey red degma te igkasapulu diye te ki Milkisidik pinaahi ki Abraham. ¹⁰ Su minsan ware pad neetew si Libi te peginug-ung ni Milkisidik ki Abraham, piru duen e sikandin te lawa te kaapuan din ne si Abraham.

Labew si Hisus te duma ne talagpanubad

¹¹ Na, emun ke namatareng e perem ka me Hudiyu pinaahi te himu te me talagpanubad ne kabuhalan ni Libi ne iyan mig-uyan te Balaud diye te kandan, kenad e perem keilangan ne duen pad lein ne talagpanubad. Piru duen en iya lein ne talagpanubad ne egpekeiling ki Milkisidik, ne kene mule ne iling ki Aarun ne kabuhalan ni Libi. ¹² Ne emun ke egkabullasan ka me talagpanubad te kenad e ne kabuhalan ni Libi, keilangan degma ne egkabullasan ka Balaud. ¹³⁻¹⁴ Ka malehet due, ka Magbebeye ta ne egkahiyen ku kayi, kene ne kabuhalan ni Libi, su ki Huda. Ne ka tribu ni Huda, warad iya nahuhud ni Muwisis dengan ne diye egpuun te sika ne tribu ka egkeyimu ne talagpanubad.

¹⁵ Ne amana naklaru seini se ingkahi ney su due lein ne talagpanubad ne miggunguma ne nekeiling ki Milkisidik. ¹⁶ Ware sikandin neyimu ne talagpanubad sumale te Balaud ne iyan de egkeyimu ne talagpanubad ka kabuhalan ni Libi, ke kene, pinaahi te geem te umul rin ne kene egkaman. ¹⁷ Su nasulat diye te Kasulatan ka meytenged kandin, "Talagpanubad ka te ware egtamanan iling ki Milkisidik ne talagpanubad dengan." ¹⁸ Purisu indapig e te Manama ka sika se tapey ne balaud tenged su ware karuan due. ¹⁹ Su kene ki egkeyimu ne matareng pinaahi te pegtuman te Balaud. Piru imbehayan ki te Manama te iyam ne paahi, ne pinaahi rue egpakaparani kid e kandin.

²⁰ Ne kene ne sikan de su due degma saad te Manama eyew egkapamalehetan ka seeye se iyam ne paahi. Piru ware mule saari te Manama te iling due ka me kabuhalan ni Libi te neyimu sikandin ne me talagpanubad. ²¹ Piru te neyimu e si Hisus ne talagpanubad, migsaad mule ka Manama, su due nasulat ne miggendue,

"Migsaad ka Magbebaye ne
Manama ne,
'Talagpanubad ka te ware
egtamanan,'
wey kene egkabalbalawan ka
suman-suman din."

²² Purisu, tenged te sika ne saad, neyimu si Hisus ne kasi-huruwan te iyam ne kasabutan ne subla pad ne meupiya.

²³ Ne timul pad due, masulug ka me talagpanubad dengan su emun ke egpatey ka sabeka, keilangan ne egliwanan sikandin su eyew ka himu te me talagpanubad, egpakapabulus. ²⁴ Piru puun su egkeuyag mule si Hisus te ware egtamanan, kene egliwanan sikandin isip talagpanubad. ²⁵ Purisu, egpakuwas sikandin te ware egtamanan te seeye se egparani te Manama pinaahi kandin. Su egkeuyag sikandin te ware egtamanan eyew iyan egpataliware te Manama wey te me etew.

²⁶ Ne sikandin ka Labew ne Talagpanubad ne ingkeilangan ta. Su matulus sikandin, ne ware sale wey malinis. Kene ne iling sikandin te makasesale, wey imbatun e sikandin diye te langit.

²⁷ Kene ne keilangan ne egpanubad si Hisus tagse aldew iling te duma ne labew ne me talagpanubad. Miggunaan dan himuwa seini para te kandan mismu ne sale, ne igkarangeb, para te sale te duma ne me etew. Piru si Hisus, kasabeka rin de mule ipanubad ka pegkeetew rin para te sale te me etew.

²⁸ Ka in-alam ne labew ne me talagpanubad sumale te Balaud ni Muwisis, me etew re degma sikandan ne mahuye. Piru sumale te saad

te Manama ne innimu rin te pegkapenga rin ibehey ka Balaud, in-alam din ka Anak din ne ware seyyup ne egkeyimu ne talagpanubad te ware egtamanan.

8

Si Hisus ka Labew ne Talagpanubad ta

¹ Na, seini ka igpasabut te ingkahi ney kaniyu: duen e Labew ne Talagpanubad ta ne diyad e te langit, ne diye migpinnuu sikandin te igkakawanan* te trunu te Amana ne Maresen ne Manama. ² Egpamakey sikandin isip Labew ne Talagpanubad diye te matulus ne ugpaan te Manama ne diye te langit ne malehet ne simbaan su kene ne impasasindeg te me etew, ke kene, innimu mule te Manama. ³ Ne tenged su keilangan ne egbehey te dasag wey te igpanubad diye te Manama ka tagse labew ne talagpanubad, keilangan ne due degma igpanubad te kanta ne Labew ne Talagpanubad. ⁴ Emun ke kayi sikandin te ampew te tane, kene ne talagpanubad sikandin, su duen e me talagpanubad ne egpanubad sumale te Balaud ni Muwisis. ⁵ Ka impamakayan dan ne matulus ne balungbalung, in-ilingan de sika wey alung de te ugpaan te Manama ne diye te langit. Su, te timpu ne igpes-ek e ni Muwisis sika, impanpanayan e sikandin te

Manama te migkahi, "Keilangan ne eggimuwen nu ka langun iling te impakita ku keykew diye te bubungan." ⁶ Piru ka himu ni Hisus, subla pad ne meupiya du te himu te seeye se duma ne talagpanubad puun su ka iyam ne kasabutan ne impataliwareaan din, subla pad ne meupiya du te tapey ne kasabutan. Iyan nakameupiya te iyam ne kasabutan, su diye sika egligkat te subla pad ne meupiya ne me saad.

⁷ Su ke ware pad perem kulang te seeye se an-anayan ne kasabutan, kenad perem keilangan ne egliwanan te igkarangeb ne kasabutan.

⁸ Piru nakita te Manama ne nakulangan ka me etew ne mig-ikul perem te ananayan ne kasabutan. Purisu migkahi sikandin,

"Egginguma ka timpu, kahi te Magbebaye ne Manama, ne eggimuwen ku ka iyam ne kasabutan diye te me kabuhalan ni Israil wey diye te tribu ni Huda.

⁹ Ne seini, kene ne iling te kasabutan ne innimu ku diye te me kaapapuan dan te ingkitkit ku sikandan te pegawe dan diye te inged ne Ihiptu.

Ware dan tumana ka sika ne kasabutan, purisu imbalahad ku sikandan, kahi te Magbe-

8:1 Sal 110:1. * **8:1** Sumale te tuluuwen te me Hudiyu, ka talahuren de ne etew ka egpapinnuu diye te igkakawanan te mabantug ne etew. **8:5** Iks 25:40. **8:8** Hir 31:31-34 (LXX).

baye ne Manama.

10 Piru ke egginguma ka sika ne timpu, seini ka iyam ne kasabutan ne eggimuwen ku diye te kabuhalan ni Israil, kahi te Magbebaye ne Manama: igtahu ku ka me balaud ku diye te suman-suman dan, wey igsulat ku seini diye te pusung dan.

Manama ad nikandan, wey keet-etawan kud e degma sikandan.

11 Te sika ne timpu, kenad e ne keilangan ne egpanulu ka sabeka ne etew te me duma rin wey ke me suled din te keilangan ne egpekeila sikandan te Manama.

Su sikandan langun, egpekeila keddiey ligkat te kene ne impurtanti ne etew peendiye te subla ne mabantug.

12 Su egpasayluwen ku sikan dan te mareet ne me himu ran, wey kene kud e egsumsumanen ka me sale dan.”

13 Ne tenged te ingngaranan te Manama te “iyam” ka seini ne kasabutan, klaru e ne tapey e ka an-anayan ne kasabutan. Ne sika, kenad e egkahamit wey kene egkaluhey, egkaawe e.

9

Ka pegasimba te timpu te an-anayan ne kasabutan

1 Na, minsan ka an-anayan ne kasabutan, due me balaud meyitenged te pegsimba te Manama. Ne due degma matulus ne balungbalung ne innimu ran kayi te ampew te tane eyew egsimbaan. **2** Seeye se balungbalung, due daruwa ne sinabeng. Ka an-anayan ne sinabeng, egnigaranan te “Matulus ne Sinabeng.” Ne dutu nakatahu ka sulu, ka lamisa, wey ka me paan ne igpanubad diye te Manama. **3** Ka igkarangeb ne sinabeng ne diye te limang te makepal ne kurtina, egnigaranan te “Subla ne Matulus ne Sinabeng.” **4** Te sika ne sinabeng, diye ipanahu ka bulawan ne altar ne tutunganan te insinsu wey ka kaban te kasabutan ne imbulitan te bulawan. Ne diye naa degma itahu te kaban ka banga ne bulawan ne intahuan te egkeenen ne egnigaranan te “mana”, ka migpangabukad ne tuked ni Aarun, wey ka daruwa ne malumpayag ne batu ne insulatan te Sapulu ne Suhu. **5** Ne diye te supe te kaban, due innimu re te etew ne daruwa ne panalihan ne egnigaranan te “kirubin” ne palinneu te due ka Manama. Migpatangkeey sikandan ne impamekal ka me pakpak dan diye te dibabew te supe te kaban. Ne diye naa te natel-eban te me pakpak egpasayluwa te Manama ka

me sale te me etew. Piru kene ney pad igpakapasabut kuntee kaniyu seini se langun.

⁶ Te nateil e seeye se langun, henduen pad ne nakaseled ka me talagpanubad te tagse aldew diye te an-anayan ne sinabeng eyew te peggimu te katung-danan dan. ⁷ Piru iyan de egpakaseled ka labew ne talagpanubad diye te igkarangeb ne sinabeng, wey kasabeka re egpakaseled sikandin te tagse leg-un. Te sika ne timpu, keilangan ne eg-uyanen din ka langesa te ayam ne igpanubad din diye te Manama para te sale din wey te sale te me etew ne ware dan nataheyi. ⁸ Pinaahi te seini se langun, migpanulu ka Panisingan te Manama ne kene egpakkaparani ka me etew diye te tangkaan te Manama taheed te egikul pad sikandan te me suhu diye te an-anayan ne kasabutan.* ⁹ Ka sika langun, panunggilingan de te seeye ne timpu. Su ka igpanubad wey ka igbehey diye te Manama, kene egpakaninis te kunsinsya te egmanimba. ¹⁰ Su meytenged de seeye te egkakeen, inumen, wey te nalein-lein ne peglinis te lawa. Meytenged de te lawa ka sika ne me balaud wey egkataman de te timpu te iyam ne kasabutan.

Ka langesa ni Kristu ka

9:6 Num 18:2-6. **9:7** Lib 16:2-34.
bayaanan peendiye te Amana ne Matulus ka balungbalung te tapey ne tuluuwen.

nakapamalehet te iyam ne kasabutan

¹¹ Piru miggungume e si Kristu ka Labew ne Talagpanubad te iyam ne kasabutan ne subla pad ne meupiya du te tapey. Nakaseled

sikandin te subla pad ne meupiya wey subla pad ne matulus ne ugpaan ne ware himuwa te etew su kene ma ne kayi te ampew te tane. ¹² Pegseled ni Kristu diye te matulus ne ugpaan ne diye te langit, kene ne langesa te me kambing wey ke nati te baka ka in-uyan din su ka kandin mismu ne langesa pinaahi te kamatayen din, ne puun due, nakuwa rin ka kaluwasan ta ne ware egtamanan. Ne kasabeka re sikandin migseled diye wey warad e mig-abey. ¹³ Sumale te tapey ne kasabutan, emun ke due etew ne in-isip ne malindit su nakasamsam te minatey, keilangan ne egpabesikan te langesa te kambing wey ke turu ne baka wey te igmuk te intutung ne beyan ne baka eyew egkeyimu ne malinis ka lawa rin diye te tangkaan te Manama. ¹⁴ Ke egpakaninis ma te iling due ka langesa te me mananap, subla pad ka langesa ni Kristu! Su pinaahi te geem te ware egtamanan ne Panisingan te Manama, impanubad ni Kristu diye te Manama ka pegkeetew rin ne ware sale. Ka langesa rin ka egpakaninis te kunsinsya ta

*** 9:8** Te Grigu: ware pad ipataha ka Sinabeng taheed te migsasindeg pad **9:13** Lib 16:15-16; Num 19:9,17-19.

ne egligkat te himu ne iyan egpuunan ne egpaketariyu ki te Manama. Eglinisan din sika su eyew egpaketariyu ki te manekal ne Manama.

¹⁵ Purisu, si Kristu ka tig-pataliware te me etew wey te Manama te iyam ne kasabutan. Su pinaahi te kamatayen din, nalekat din e ka me etew puun te me sale dan ne neyimu ran te an-anayan ne kasabutan. Innimu rin sika su eyew seeye se in-alam te Manama, egpaketarawat te insaad din ne keupianan ne ware egtamanan.

¹⁶ Na, ke due migpeyimu te kasabutan, keilangan ne igpapitew ka eggimatayan ne igpanubad eyew egpaketariyu ki te manekal. ¹⁷ Su ka kasabutan, wey re egkaketariyu ki te manekal, ne ware karuan due ke ware pad neyimatayi ka igpanubad. ¹⁸ Purisu minsan seeye se an-anayan ne kasabutan, ware perem napetariyu ki te ware langesa ne impiyahis. ¹⁹ Su pegkapenga inangen ni Muwisis ka intiru ne Balaud diye te langun ne etew, ingkuwa rin e ka langesa te nati te baka wey te kambing duma te weyig. Impabesikan din ka insulatan te me balaud duma te langun ne etew ne iyan inggamit ka sugpang te kayu ne isupu wey ka intinaan te malalab-lalab ne bulbul te karniru. ²⁰ Ne migkahi sikandin, "Seini ka

langesa ne igpamalehet te kasabutan ne igpatuman te Manama kaniyu." ²¹ Ne impabesbesikan din degma ka matulus ne balungbalung wey ka langun ne tahu ne egkahamit te pegpanubad te Manama. ²² Sumale te Balaud ni Muwisis, ka langun, bayew iya egkalinisi te langesa. Ne wey re egkakasaylu ka me sale ke igpathis ka langesa te igpanubad.

²³ Purisu, keilangan ne egkalinisan seeye se impeiling de te ugpaan diye te langit pinaahi te pegpabesik-besik te langesa te ayam. Piru ka malehet ne ugpaan te Manama diye te langit, keilangan ne subla pad ne meupiya ka igpanubad du te langesa te ayam. ²⁴ Su ware migseled si Kristu diye te matulus ne balungbalung ne impeiling de te malehet ne ugpaan te Manama wey innimu re te etew, ke kene, ka langit mismu ka inseleran din. Ne diyad e kuntee sikandin te tangkaan te Manama eyew egpangatubang para kanta. ²⁵ Ka labew ne talagpanubad te me Hudiyu, migseled diye te Subla ne Matulus ne Sinabeng te tagse leg-un ne mig-uyan te langesa te ayam. Piru si Kristu mule, kene ne iyan din inseled diye te langit ne eyew layun din igpanubad ka kandin ne lawa. ²⁶ Su ke iling ma rue, keilangan ne layun perem sikandin egpatey puun te peggimu

te kalibutan. Piru te timpu ne napenge e ka an-anayan ne kasabutan, kasabeka re sikandin miggendini eyew te peg-awe te sale ta pinaahi te pegpanubad din te kandin ne lawa wey kene din e eg-abayan eggimuwa seini.²⁷ Ka me etew, kasabeka re iya egpatey wey egkataman eggukuman e sikandan te Manama.²⁸ Ne iling naan ded degma, migpatey si Kristu te kasabeka re eyew te peg-awe te me sale te me etew. Ne eggendini man-e sikandin ne kenad en iyan din tuyu ka peg-awe te me sale, ke kene, ka pegluwas te seeye se mabagget ne egtetahad te peglibed din.

10

Ka kamatayen ni Kristu ka egpakaawe te sale

¹ Ka Balaud ni Muwisis, alung de te me panalangin ne egginguma pinaahi ki Kristu wey kene ne iling sika te seeye se malehet ne panalangin. Purisu, kene egpakamatareng ka Balaud pinaahi te pegpanubad layun te tagse leg-un te seeye se migparani te Manama.

² Su emun ke nalinisan e perem te me sale dan ka seeye se migpamakey te Manama, kene perem sikandan egkunsinsya te me sale dan, wey kene perem ne keilangan ne eg-abey pad sikandan egpanubad.
³ Piru seini se pegpanubad

dan, egpasuman-suman de kandan te me sale dan te tagse leg-un.⁴ Su kene egkaayun ne egpakaawe te me sale ka igpanubad dan ne langesa te turu ne baka wey te kambing.

⁵ Purisu, te timpu ne miggendini si Kristu kayi te ampew te tane, migkahi sikandin diye te Manama,

“Ka impanubad dan wey ka inhalad dan keykew, ware nu iya ikeupii, piru imbehayan a nikeykew te lawa ne igpanubad ku.

⁶ Su ka me ayam ne intutung dan wey ka impanubad dan para te me sale dan, ware nakapahale keykew.

⁷ Nataman, migkahi e mante si Kristu, “Seini a, Manama, eyew te pegtuman te pegbuut nu sumale te nasulat te Kasulatan meyitenged keddi.”

⁸ Dutu te an-anayan, migkahi si Kristu, “Ka impanubad dan wey ka inhalad dan, ka intutung dan ne ayam, wey ka impanubad dan para te me sale dan, ware nu iya ikeupii wey ware nakapahale keykew.”⁹ Ne mig-abey mante sikandin ka migkahi, “Seini a eyew te pegtuman te igkeupii nu.” Sikan naa, indapig te Manama ka an-anayan ne paahi te peg-awe te sale wey inliwanan din te igkarangeb.

¹⁰ Ne tenged su natuman ni Hisu Kristu ka pegbuut te

Manama, namatulus kid e pinaahi te kasabeka re ne pegpanubad te lawa rin.

11 Ka tagse talagpanubad, diye egsasindeg te altar te tagse aldew wey eglibed-libed egbehey te iling ded ne igpanubad. Piru seeye se igpanubad dan, kene iya eg-pakaawe te sale te me etew. **12** Piru si Kristu, kasabeka re mule migbehey te kandin ne lawa ne igpanubad para te me sale ta. Nataman, migpinnuu e sikandin diye te igkakawanan* te Manama. **13** Ne diyad e sikandin egte-tahad taman te eggimuwen e ne diekanan din ka me kuntere din. **14** Su pinaahi te seeye se kasabeka re ne pegpanubad, immatareng din te ware egtamanan ka me etew ne immatulus e.

15 Impamalehetan degma seini te Panisingan te Manama, su migkahi ma sikandin,

16 “Ke egginguma ka seeye ne timpu, seini ka iyam ne kasabutan ne eggimuwen ku diye te kandan, kahi te Mag-bebaye ne Manama:

Igtahu ku ka me balaud ku diye te me pusung dan, wey igsulat ku seini diye te suman-suman dan.”

17 Ne migkahi pad man-e sikandin, “Kene kud e egsum-sumanen ka me sale dan wey

ka mareet ne me himu ran.”
18 Ne tenged su napasaylu e ka me sale, kenad e ne keilangan ne eghanubad pad.

Kene kew leke te pegpalintutuu niyu

19 Purisu me suled, pinaahi te langesa ni Hisus, kene kid egkehe ne egparani diye te tangkaan te Manama.[†]

20 Su pinaahi te impanubad ne lawa rin ne egpekeiling te makepal ne kurtina diye te timplu ne nabindas, inlukatan din para kanta ka iyam ne egbayaan eyew egpakaangken ki te umul ne ware egtamanan. **21** Ne kuntee, duen e Labew ne Talagpanubad ta ne miguyan te keet-etawan te Manama.

22 Purisu, keilangan ne egparani ki te Manama te ware minsan deisek ne pegduwa-ruwa‡ duma te malehet ne pegpalintutuu ne egpuun te pusung ta. Su hendue te impatihsian e

te langesa ni Kristu ka me pusung ta eyew kene kid e egkunsinsya, wey nalu-luan e te malinis ne weyig ka me lawa ta. **23** Egdesdesenan ta ka impallateng ta wey kene ki egduwa-ruwa, su egkasalihan ka Manama ne migsaad kanta.

24 Egsuman-suman ki ke egmenuwen ta te egbanasal ne egpaheyinaweeey ka tagse sabeka wey eggimu te meupi. **25** Kene

10:11 Iks 29:38. **10:12** Sal 110:1.

ka talahuren de ne etew ka egpakinuu diye te igkakawanan te mabantug ne etew.

10:16 Hir 31:33. **10:17** Hir 31:34.

Subla ne Matulus ne Sinabeng.

10:22 Lib 8:30; Isi 36:25.

* **10:12** Sumale te tuluuwen te me Hudiyu,

ka talahuren de ne etew ka egpakinuu diye te igkakawanan te mabantug ne etew.

10:19 Te Grigu: egseled diye te

malehet ne pusung.

10:22 Te Grigu:

ta eg-engkeran ka nabatasan ta ne peglibulung, ne kene ne iling te innimu te duma, ke kene, egpabanasaley ki labi e te nakanengneng kid e ne mahaan eggginguma ka aldew te peglibed te Magbebaye.

²⁶ Su emun ke nakataha kid e te kamalehetan ne nasi ki re iya egpabulus ne egpakasale, warad e lein ne igpanubad ne egpakaawe te me sale ta.

²⁷ Piru iyan te naan de igkeipeng ka makaaldek-haldek ne peggukum te Manama kanta, wey ka iiniti ne hapuy ne igsilab te me kuntere din.

²⁸ Na, dengan ne timpu, ke due sabeka ne etew ne egpaketupak te Balaud ni Muwisis, eggimatayan sikandin te ware pegkeyidu ke due daruwa wey ke tatelu naa ne egpamalehet te nakasale iya sikandin.

²⁹ Ne sumsumana niyu kamenu karakel ka legpad ne eleg te seeye se etew ne egdeeg-deeg te Anak te Manama wey mig-isip ne ware karuan te langesa ne nakapamaresen te kasabutan ne iyan degma nakalinis kandin, wey inleteman din ka Panisingan te Manama ne iyan migbehey kandin te hiid-uwen.

³⁰ Su nakanengneng kid te migkahi ka Manama, "Sikeddiey ka eggsuli wey ka egbales." Duen pad nasulat ne miggenendue,

"Eggukuman te Manama ka kandin ne keet-etawan."

³¹ Makaaldek-haldek iya ke

ian eglegpad ka manekal ne Manama.

³² Sumsumana niyu ka seeye ne timpu te iyam kew pad nalayahi meyitenged ki Kristu. Minsan nakabaye kew te masalig ne me keyirapan, piru nakasasindeg kew red.

³³ Sengekakuwa, inleteman kew wey imbay-bayaran diye te tangkaan te me etew. Ne sengekakuwa ne migduma kew te seeye se nabaybayaran.

³⁴ Su neyidu kew te me duma niyu ne naprisu. Ne minsan inahawan kew te langun ne me kasangkapan niyu, indawat niyu seini duma te kahale tenged su nakanengneng kew ne duen pad egkarawat niyu ne subla pad ne me-upiya wey egpabulus te ware egtamanan.

³⁵ Purisu, kene niyu engkeri ka pegasalig niyu te Manama su due dakel ne igdasag kaniyu.

³⁶ Keilangan ne eg-antus kew pad eyew egkatuman niyu ka pegbuut te Manama, ne egkataman egkarawat niyu ka insaad din.

³⁷ Su migkahi ka Manama diye te Kasulatan,

"Te kene egkaluhay, eggigume e ka egte-taharan niyu,

kene eglamu-lamu sikandin.

³⁸ Ka keet-etawan ne inisip ku ne matareng, egkeuyag te ware egtamanan pinaahi te pegpalintutuu ran keddi.

Piru ke eg-inniyuhan a nikandan, kena ad egkahale kandan.”

³⁹ Piru meyitenged kanta, kene ki mule ne iling te me etew ne mig-inniyug e te Manama wey eglegparan e te ware egtamanan, ke kene, egpekeiling ki te me etew ne migpalintutuu wey egkaluwas.

11

Ka pegpalintutuu te dengan ne me etew

¹ Na, nekey-a ka pegpalintutuu? Ka pegpalintutuu, iyan sika ka kasihuruwan ne egkatuman iya ka impallateng te etew, wey minsan ware din pad nakita, egpakatahe e sikandin ne eggingga iya sika. ² Su tenged te pegpalintutuu, indayan te Manama ka me etew dengan. ³ Tenged te pegpalintutuu, natahaant ta ne innimu ka kalibutan pinaahi te lalag te Manama. Purisu seini se egkakita ta, innimu puun te kene ta egkakita.

⁴ Tenged te pegpalintutuu, migbehey si Abil diye te Manama te meupiya pad ne impanubad du te ki Kain ne suled din. Impapitew te Manama ne in-isip din si Abil ne matareng su indawat din ka impanubad ni Abil. Ne minsan migpatey e si Abil, egkahuhud pad ka

meyitenged te pegpalintutuu rin te Manama.

⁵ Tenged te pegpalintutuu, ware migpatey si Inuk su imbatun mule sikandin. Warade kitaa sikandin kayi te tane su imbatun ma te Manama. Ne sumale te Kasulatan, te ware pad batuna si Inuk, ingkahale sikandin te Manama.

⁶ Ne kene iya egkaayun ne egkahale ka Manama te etew ne ware pegpalintutuu. Su minsan hentew ne egparani te Manama, keilangan ne egpalintutuu ne due iya Manama, wey egdasahan din ka langun ne egpammitek kandin.

⁷ Tenged te pegpalintutuu, intuman ni Nuwi ka impaney-paney te Manama kandin meyitenged te egkeyitabu keureme, minsan ware din pad nakita seini. Purisu miiggimu sikandin te arka eyew egkaluwas sikandin wey ka pamilya rin. Ne puun due, inggukuman te Manama ka me etew kayi te ampew te tane tenged su ware sikandan migpalintutuu. Piru si Nuwi, in-isip mule ne matareng tenged te pegpalintutuu rin.

⁸ Tenged te pegpalintutuu, intuman ni Abraham ka inlalag te Manama ne egpeendiyeen te inged ne igbehey kandin te Manama. In-engkeran din ka kandin ne inged minsan ware din nakataha ke hendei lenged ka egpeendiyaan kandin.

11:3 Hin 1:1; Sal 33:6,9; Huw 1:3. **11:4** Hin 4:3-10. **11:5** Hin 5:21-24 (LXX).

11:7 Hin 6:13-22. **11:8** Hin 12:1-5.

11:9 Hin 35:27.

9 Tenged te pegpalintutuu, nekeugpe sikandin ne eg-pekeiling te lapu diye te inged ne insaad te Manama kandin. Ne diye de mig-ugpe sikandin te me balung-balung, iling degma te anak din ne si Isaak wey te apu din ne si Hakub, ne namehayan ded degma te Manama te sika ne saad. **10** Su mig-iman-iman si Abraham ne egekeugpe te siyudad diye te langit, ne kene egkaawe ne implanu wey impasasindeg te Manama.

11 Tenged man-e te pegpalintutuu, nakaanak pad ensi Abraham minsan amane e ne buyag sikandan wey kenad e perem egpakaanak si Sara ne asawa rin. Migpalintutuu sikandin ne egtumanen te Manama ka insaad din ne egpakaanak iya si Sara. **12** Purisu, minsan sabeka re ne etew si Abraham ne suble e ne buyag wey kenad e perem egpakaanak, piru sikandin ka egpuunan te me kabuhalan ne iling kasulug te me bituen te langit, wey iling degma te me lelanek diye te ilis te dahat ne kene egkaseel.

13 Nammatey re due ka seeye se langun ne etew ne migpalintutuu te Manama, ne ware nakarawat te insaad kandan. Piru iling te nakita ran e ka insaad te Manama kandan wey nahale sikandan. Mig-angken sikandan ne me lapu

de wey mahaliyug de kayi te ampew te tane. **14** Ne seini se me etew ne miglalag te iling due, migpeila re iya ne egpammitew sikandan te malehet ne inged dan. **15** Ware dan e sumsumana ka impuunan dan ne inged, su emun ke migsuman-suman pad sikandan due, nanguli e perem sikandan. **16** Piru iyan dan igkeupii mule ka subla pad ne meupiya ne inged, ka inged diye te langit. Purisu kene egkeyilew ka Manama ne eg-angkenen nikandan ne sikandin ka Manama ran, tenged su intahahaan din e sikandan te siyudad diye te langit.

17-18 Tenged te pegpalintutuu, igpanubad e perem ni Abraham si Isaak te in-el-elehan sikandin te Manama. Ne minsan sikandin ka insaarant te Manama ne ka anak din ka egkeyimu ne egpuunan te me kabuhalan din, piru andam sikandin ne igpanubad ka sabsabeka ne anak din ne si Isaak. **19** Su migpalintutuu sikandin ne minsan egpatey si Isaak piru eg-uyahen ded iya te Manama, purisu hende te in-uyag ded iya te Manama si Isaak puun te kamatayen* wey miglibed diye te ki Abraham.

20 Tenged te pegpalintutuu, impanalanginan ni Isaak ka daruwa ne anak din ne si Hakub wey si Isaw wey

11:11 Hin 18:11-14; 21:2. **11:12** Hin 15:5; 22:17; 32:12. **11:13** Hin 23:4; 1Kru 29:15; Sal 39:12. **11:17-18** Hin 22:1-14. **11:17-18** Hin 21:12. * **11:19** tenged su ke ware balabahi te Manama si Abraham, neyimatayen din en iya perem ka anak din. **11:20** Hin 27:27-29,39-40.

intagne din ka egkeula-ula ran keureme.

21 Tenged te pegpalintutuu, impanalanginan ni Hakub ka daruwa ne apu din ne anak ni Husi te ware pad sikandin nabigtawi. Ne migsimba sikandin te Manama ne mig-usengul te tuked din.

22 Tenged te pegpalintutuu, intagne ni Husi te ware pad sikandin nabigtawi ka meyitenged te peg-awe te me kabuhalan ni Israil diye te Ihiptu, wey migpanaha-taha degma sikandin kandan ne igpeuyan ded ka tul-an din te peg-awe dan.

23 Tenged te pegpalintutuu, te pglestut ni Muwisis, inggeles sikandin te amey wey iney rin seled te tatelu ne bulan. Su nakita ran ne mateles sikandin ne bate wey ware sikandan naaldek ne egsupak te suhu te Hari.

24 Tenged te pegpalintutuu, te pgtulin e ni Muwisis, kenad e egkeupian sikandin ne eg-an-anaken te malitan ne anak te Hari te Ihiptu.

25 In-alam din ka peg-antus duma te kabuhalan ni Israil ne keet-etawan te Manama du te peggale-gale te sale ne egpakapahale de te kene egkaluhay. **26** Migsumansuman sikandin ne meupiya pad ne eg-antus sikandin ka eglemetan tenged te pegpalintutuu rin te eggingsuma ne Kristu, du te egpakaangken

te karatuan te Ihiptu. Su migiman-iman sikandin ne due igdasag te Manama kandin keureme.

27 Tenged te pegpalintutuu, mig-awe si Muwisis diye te Ihiptu ne ware naaldek te pegkabelu te Hari. Migpabulus sikandin ka migsalig te Manama minsan te me keyirapan su hendue te nakita rin e ka Manama ne kene egkakita. **28** Tenged te pegpalintutuu, migbunsud migsahakeen si Muwisis te Peglihad te Panalihan. Ne migsuhu sikandin ne egpabesikan te langesa te karniru ka gumawan te me kabuhalan ni Israil, eyew kene egkalagkes te pegpangimatey te panalihan te Manama ka me panganey ne anak dan ne lukes.

29 Tenged te pegpalintutuu, nekeyipanew sikandan te mammara ne tane te peglapas dan diye te Malalab ne Dahat. Piru nallenend mule ka me Ihiptuhanen ne miglupug kandan.

30 Tenged te pegpalintutuu te kabuhalan ni Israil, nahuhus ka alad te siyudad te Hiriku te pegkapenga ran te peglingut-lingut dutu seled te senge simana.

31 Tenged te pegpalintutuu, ka malitan ne migbebelegye te lawa rin ne si Rahab, ware sikandin nakalagkes namatey te seeye se matig-Hiriku ne ware migpalintutuu te Manama,

11:21 Hin 48:1-20; Hin 47:31 (LXX).

Hin 2:2; Iks 1:22. **11:24** Iks 2:10-12.

11:30 Huswi 6:12-21.

11:22 Hin 50:24-25; Iks 13:19. **11:23**

Iks 12:21-30. **11:29** Iks 14:21-31.

11:31 Huswi 6:22-25; Huswi 2:1-21.

su insagsahipe din ka me talag-iipat.

32 Na, kayi re taman ka igguhud ku kaniyu meyitenged te me etew ne migpalintutuu te Manama, tenged su warade timpu te pegpangguhud meyitenged engki Gidyun, ki Barak, ki Samsun, ki Hipta, ki Dabid, ki Samwil wey te me prupita dengan. **33** Tenged te pegpalintutuu ran, due duma ne nakapanalu te me nasud, ne due duma ne matareng ka pegmandu dan, ne due duma ne nakarawat te insaad te Manama kandan, wey due duma ne nakapatiem te bebe te me liyun. **34** Due duma ne ware natutung te migkanlabkanlab ne hapuy, wey due duma ne nakapallahuy te me etew ne egtibas perem kandan. Minsan mahuye ka duma piru imbehayan sikandan te kanekal. Due duma ne mabbulut wey natalu ran ka me sundalu te duma ne me nasud. **35** Due degma me malitan ne neuyahan te me anak dan ne nammatey. Ne due duma ne migsuman-suman ne meupiya pad ka egbaybayaran taman te kamatayen tenged te pegpalintutuu ran du te egdawat te kaligwangan. Su mig-iman-iman sikandan ne eggingsuma ka aldew ne eg-uyahen ded sikandan te Manama wey egkarawat dan ka subla pad ne me-

upiya ne umul. **36** Due duma ne inlemetan wey impanlampesan, ne ka duma impamaku wey imprisu. **37** Ne due degma duma ne innimatayan, iling te imbebatu, impaliwliwaraan te eggabas, wey intitibas te kampilan. Ne due duma ne nangukumbale naan de te laplap te karniru wey kamping. Amane e egkaayu-ayu sikandan, imbabayaran, wey impaantus pad mane. **38** Migleug-leug sikandan diye te mammara ne inged ne kene egkeugpaan, diye te me bubungan, wey diye nangugpe te me sulung wey te me lungag te tane. Ka malehet due, kene ne likes ka kalibutan para kandan.

39 Seini se langun, ingkahale te Manama tenged te pegpalintutuu ran. Piru minsan pad due, ware dan narawat ka langun ne insaad te Manama kandan. **40** Su due meupiya pad ne planute Manama ne nalagkes ki degma. Taman kuntee, ware natuman ka saad din diye te kandan su eyew egmekeglegse ki ka egdawat te insaad din, wey egkeyimu ki ne keet-etawan din ne ware seyyup.

12

Ka pegpakannekal te pegpalintutuu taman te katamanan

11:32 Tal 6:11-8:32; Tal 4:6-5:31; Tal 13:2-16:31; Tal 11:1-12:7; 1Sam 16:1-1Har 2:11; 1Sam 1:1-25:1. **11:33** Dan 6:1-27. **11:34** Dan 3:1-30. **11:35** 1Har 17:17-24; 2Har 4:25-37. **11:36** 1Har 22:26-27; 2Kru 18:25-26; Hir 20:2; 37:15; 38:6. **11:37** 2Kru 24:21.

¹ Sikan naa, tenged su nalingutan ki kuntee te seeye se susuluhi ne me etew dengan ne egpamalehet kanta ne egkasalihan ka Manama, keilangan ne engkeran ta ka langun ne epakabalabag kanta wey ka sale ne iyan epakabakus kanta. Ne egpabulus ki ka egpallahuy te lumba ne intahahe kanta. ² Keilangan ne iyan te re egtengtengan si Hisus, ka egpuunan wey ka talagmalehet te pegpal-intutuu ta. Imbalahad din de ka keyilew rin perem te pegpalansang te krus, tenged te kahale ne egkarawat din pegkapenga te peg-antus din. Ne kuntee, diyad e sikandin migpinnuu te igkakawanana* te trunu te Manama.

³ Sumsumana niyu si Hisus se mig-antus te pegsupak te me etew ne makasesale, eyew kene kew egkapelaan wey eg-engked. ⁴ Ne ware de due migpatey kaniyu puun te pegpakkanekal rin te pectalu te sale. ⁵ Ne ware niyu red nalingawi ka pegbagget te Manama kaniyu isip me anak din? Migkahi sikandin diye te Kasulatan,

“Anak ku, kene nu bala-hara ka pegdisiplina te Manama keykew, wey kene ka engked ke egdew-ayen ka nikandin.

⁶ Su ka eggeyinawaan te Manama, egdisiplineen

din, wey eglegparan din seeye se in-ila rin ne anak din.”

⁷ Antusa niyu ka keyirapan isip disiplina te Manama kaniyu, tenged su in-isip kew nikandin ne me anak din. Duen naan iya anak ne kene egdisiplineen te amey? ⁸ Piru ke kene kew egdisiplineen iling te eggimuwen din te langun ne me anak din, kene kew naa ne malehet ne me anak din; anak kew re te dalan. ⁹ Minsan ka me amey ta kayi te ampew te tane, migdisiplina ma kanta, wey intahud ta sikandan tenged due. Na, subla pad ne egparuma-ruma ki te Amey ta ne diye te langit eyew epakaangken ki te umul. ¹⁰ Su ka me amey ta kayi te ampew te tane, migdisiplina kanta te ware de naluhey sumale te insuman-suman dan ne meupiya. Piru ka pegdisiplina te Manama kanta para iya te keupianan ta, eyew egkeyimu ki ne matuluss iling kandin. ¹¹ Ware pegdisiplina ne epakapahale taheed te eggimuwen sika, su masakit iya. Piru te katammanan, seeye se nakabaye te pegdisiplina, egmalinawen e ka suman-suman wey egmatareng e ka batasan.

¹² Purisu kayawa niyu ka napu-pu ne me belad niyu wey lig-ena niyu ka mahuye ne me buel niyu. ¹³ Tul-ira

* **12:2** Sumale te tuluuwen te me Hudiyu, ka talahuren de ne etew ka epakapinnuu diye te igkakawanana te mabantug ne etew. **12:5** Hub 5:17; Lal 3:11-12 (LXX). **12:12** Isa 35:3 (LXX). **12:13** Lal 4:26 (LXX).

niyu ka dalan ne egbayaan niyu, su eyew seeye se pungku kene egkabalingu, ke kene, nasi egkeulii.

*Ka pegpaney-paney
meyitenged te peg-inniyug te
Manama*

¹⁴ Pakannekali niyu ne malinawen ka peg-ugpe niyu duma te me etew wey egmatulus kew, su ke ware sika, ware sabeka ne epakakita te Manama. ¹⁵ Bantey kew degma ne ware sabeka kaniyu ne eg-inniyug te keupiya te Manama. Pakannekali niyu ne ware sabeka ne egpekeiling te mapeit ne hilamunen ne iyan epuuunan te kasamuk due te kaniyu wey epakamalindit te kasuluhan. ¹⁶ Bantey kew ne ware sabeka kaniyu ne epangabid, wey ware due te kaniyu ne kene egkaaldek te Manama iling ki Isaw te migbubullas te katenged din te pegkapanganey rin te senge keenan de. ¹⁷ Te katammanan, nakataha kew e ne timpu ne egkeupian ded perem sikandin ne epakarawat te panalangin din, ware sikandin behayi tenged su kene din egkalbalawan ka innimu rin minsan ke egsinehew pad sikandin.

¹⁸ Ka pegparani niyu kuntee diye te Manama, kene ne iling te pegparani dengan te kabuhalan ni Israil diye te Manama. Migparani

sikandan te bubungan ne egkahlen-genan ne due hapy ne migkanlabkanlab, durusilemi, wey kekesehi ka kalamag. ¹⁹ Ne nakarineg sikandan te dahing te trumpita wey te laheng te Manama. Te pegkarineg dan e te laheng, migpey-immimenew e sikandan ne kenad e egpalalahen. ²⁰ Su kene epakaantus sikandan te insuhu te laheng ne miggenendue, "Minsan ke due mananap ne egdiek te seini ne bubungan, keilangan ne egbatuwen taman te egpatey." ²¹ Makaalat-halat ka nakita ran ne minsan si Muwisis nakakah, "Egkellen ad te pegkaaldek ku."

²² Piru sikaniyu mule, ka bubungan te Siyun ka imparaniyan niyu, ka siyudad te manekal ne Manama, ne iyan ka Hirusalim ne diye te langit ne miglibulungan te egkengahale-gale ne me panalihan ne kene egkaseel. ²³ Migparani kew te nanlibulung ne me etew ne in-isip te Manama ne mabantug ne me anak din, [†] ne nasulat e se me ngaran diye te langit. Migparani kew degma diye te Manama ne talaggukum te langun ne etew, wey migsabeka kew te seeye se nenammatey e ne immatareng e te Manama ne warad e me kulang. ²⁴ Migparani kew ki Hisus ne iyan tigpataliware kanta

12:15 Diy 29:18 (LXX). **12:16** Hin 25:29-34. **12:17** Hin 27:30-40. **12:18** Iks 19:16-22; 20:18-21; Diy 4:11-12; 5:22-27. **12:20** Iks 19:12-13. **12:21** Diy 9:19. [†] **12:23** Te Grigu: panganey ne me anak. **12:24** Hin 4:10.

wey te Manama te iyam ne kasabutan. Ka impatihiis ne langesa rin migpamalehet ne impasaylu kid e, wey meupiya pad seini du te langesa ni Abil ne migbuyu te pegruli.

²⁵ Na, bantey kew ne kene kew egpalingege-lingege te iglalag te Manama kaniyu. Su ka me etew dengan ne ware miglinga-linga te inlalag te Manama kandan kayi te ampew te tane, ware nakapanalliya te legpad. Ne iyan ki naan pa iya kene legpari, ke kene ta eginglingeeng ka iglalag kanta ne diye egpuun te langit! ²⁶ Te seeye ne timpu, nawelwel ka tane tenged te laheng te Manama, piru kuntee migsaad sikandin ne miggendue, “Egwelwelen ku pad eg-abayi ka tane, ne kene ne tane de, ke kene, ka langit degma.” ²⁷ Ka seini se lalag din ne, “Eg-abayan pad,” iyan igpasabut kayi ne eg-aween din ka langun ne innimu rin ne egkawelwel, eyew iyan naan de egkahaat ka kene egkawelwel.

²⁸ Purisu keilangan ne egpasalamat ki te Manama tenged su egpekeugpe kid e te migharian din ne kene egkawelwel. Keilangan ne eggimbeen ta ka Manama te paahi ne egpakapahale kandin duma te pegtahud wey te pegpariralem ta. ²⁹ Su ka Manama ta, egpekeiling te

hapuy ne egpekewugmas.

13

Egmenuwen ta te pegpahale te Manama

¹ Na, pabulus kew pahey-inaweey isip tahasuled. ² Kene kew kalingew ne eg-al-alumama te mahaliyug ne ware niyu neileyi. Su due duma dengan ne mig-al-alumama te mahaliyug ne ware nakanengneng te me panalihan bes e seeye. ³ Ikeyid-u niyu seeye se nenaprisu wey seeye se migrantus, wey gedgerama niyu degma ka keugpe dan.

⁴ Keilangan ne ka asaweey egtahuren te langun, wey kene egpaliblibuhey ka alunggun. Su ka egpanlibug wey ka egpangabid, egleparan te Manama.

⁵ Pakaddiyu kew te peggey-inawa te seleppi, wey keilangan ne egkabennalan kew ke nekey ka due te kaniyu. Su seini ka ingkahi te Manama, “Kene kud iya eg-engkeran sikaniyu wey eg-inniyuhan.” ⁶ Sikan naa ka kene ki egkehe ne egkahi,

“Ka Manama ka talagbulig ku,
purisu kena a egkaaldek.
Nekey ma ka egkeyimu te
etew kayi te keddiey?”

⁷ Sumsumana niyu ka me pangulu niyu, seeye se migpanulu dengan kaniyu

te lalag te Manama. Sumsumana niyu ka neyingumaan te peg-ugpe dan, ne ilingi niyu naa ka pegpalintutuu ran. ⁸ Si Hisu Kristu, kene egkabalbalawan puun pad dengan, kuntee, wey te ware egtamanan. ⁹ Purisu kene kew peuyan te minsan nekey ne lein ne klasi te pegpanulu. Ne meupiya ke egkalig-en ka me pusung ta pinaahi te keyid-u te Manama, ne kene ne pinaahi te balaud meyitenged te egkakeen. Kene egpakabulig sika te seeye se eg-ikul. ¹⁰ Kayi te kanta, ka peglansang ki Hisus diye te krus ka hendue te kanta ne altar. Piru ka me Hudiyu ne migpabulus-bulus pad ne migpanubad, kene egpakakuwa te kapasayluwan te me sale pinaahi kayi.* ¹¹ Ne ka langesa te me ayam, eg-uyanen te labew ne talagpanubad diye te Subla ne Matulus ne Sinabeng isip igpanubad te peglinis te me sale, piru ka me lawa, eg-uyanen dan diye te lihawangan te kampu wey diye dan egtutunga. ¹² Ne iling naan ded, migantus degma si Hisus diye te lihawangan te siyudad eyew te pegmatulus te me etew pinaahi te kandin mismu ne langesa. ¹³ Sikan naa, engkeran tad ka tapey ne tuluuwen† wey eg-ambag kid eg-antus te pegkeyilew

rin. ¹⁴ Su kayi te ampew te tane, ware siyudad ta ne kene egkaawe piru eg-im-imanen ta ka siyudad ne eg-ugpaan ta keureme.

¹⁵ Purisu, keilangan ne egpabulus ki egsaye te Manama pinaahi ki Hisus, isip halad ne egpuun te be-be‡ te seeye se eg-angken kandin. ¹⁶ Kene kew kalingew ne eggimu te meupiya wey pabulihey kew ka tagse sabeka, su iyan sika ka peghalad ne egpakaphale te Manama.

¹⁷ Tumana niyu ka me pangulu niyu wey paruma-ruma kew kandan, su sikandan ka egtanggu te pegpalintutuu niyu wey ka egpanabak diye te Manama te pegtanggu ran. Emun ke egtumanen niyu sikandan, eggimu sikandan ne due kahale, piru ke kene, egkabehatan sikandan te himu ran wey kene degma egpakabulig sika kaniyu.

¹⁸ Pabulus kew ampu kanami. Nakanengneng key ne malinis iya ka kunsinsya ney wey egkeupian key ne eleg ka langun ne eggimuwen ney.

¹⁹ Eghangyuen ku iya sikaniyu ne eg-ampu keddi eyew egpaliberen e pad te Manama due te kaniyu te kene egkaluhay.

Ka katammanan ne pegampu wey pegpanaha-taha

²⁰ In-uyag te Manama ne egpuunan te keupianan ka

* **13:10** Te Grigu: ka migpamekey diye te balungbalung, ware katenged ne egkeen te igpanubad diye te kanta ne altar. **13:11** Lib 16:27. † **13:13** Te Grigu: eggendiyaan ta si Hisus diye te lihawangan te siyudad. ‡ **13:15** Te Grigu: behas te bibig.

Magbebaye ta ne si Hisus. Egpekeiling sikandin te maresen ne talagtameng te me karniru, ne pinaahi te langesa rin, napamalehetan din ka ware katammanan ne kasabutan.²¹ Ka Manama ka egbehey kaniyu te langun ne meupiya ne ingkeilangan niyu te pegtuman te pegbuut din. Ne pinaahi ki Hisu Kristu, eggimuwen din kayi te kanta ka egpakapahale kandin. Egsayeen ta si Hisu Kristu te ware egtamanan. Malehet iya!

²² Me suled ku, eghangyuen ku sikaniyu ne eg-ayad-ayad egpammineg te intambag ku kaniyu, su malepet de seini se sulat ku kaniyu. ²³ Igkeupii ku ne egpakataha kew ne nakalihawang e diye te prisawan ka suled ta ne si Timutiyu. Ke mahaan de egpekeuma sikandin kayi, egdumeen ku sikandin te eggendue te kaniyu.

²⁴ Ipangemuste e re te langun ne me pangulu niyu wey te langun ne keet-etawan te Manama. Migpangemusta degma kaniyu ka me suled ta ne matig-Italya.

²⁵ Ka keupiya wey keyid-u ne egpuun te Manama, egkaangken niyu langun.

Ka Sulat ni Santiyagu

Igpewun-a

Ka seini ne *Sulat ni Santiyagu*, iyan seini ka nalimud ne me tambag ni Santiyagu te me etew ne migpalintutuu te Manama. Insulat din seini diye te langun ne keet-etawan ne nekegsuwey-suwey kayi te ampew te tane. Miggamit si Santiyagu te me panunggilingan eyew te pegpasabut te me etew wey te pegtambag, eyew egmeupiya ka batasan dan wey ka himu ran te tagse aldew. Migpanulu man-e sikandin te nakalkalasi ne pegpanulu iling te: pegpal-intutuu, peg-eleg-eleg, peg-antus, pegtahud, meupiya ne pegbebasan, meupiya ne peglalag-lalag, malehet ne katuenan ne egpuun te Manama, wey peg-ampu.

Migkahi sikandin te kulang ka kanta ne pegpalintutuu ke kene egdumaan te himu.

Ka malehet ne ngaran te etew ne migsulat kayi si Hakub, piru si Santiyagu ka igaenggangan te me Kastila.

Ka nasulat te seini ne baseen

Igpewun-a 1:1

Ka pegpalintutuu wey ka katuenan 1:2-8

Ka egkaayu-ayu wey ka meyaman 1:9-11

Ka peg-eleg-eleg wey ka pegtintal 1:12-18

Ka pegpammineg wey ka peggimu 1:19-27

Peg-ilingen te egtahud ka etew 2:1-13

Ka pegpalintutuu wey ka meupiya ne himu 2:14-26

Ka dile 3:1-12

Ka katuenan ne egligkat te langit 3:13-18

Ka Kristuwanen wey ka me kasangkapan 4:1-5:6

Ka nakalkalasi ne pegpanulu 5:7-20

¹ Sikeddiey si Santiyagu ka migpeuyan te seini ne sulat. Uripen a te Manama wey te Magbebaye ne si Hisu Kristu. Egpangemusta a kaniyu langun te me Kristuwanen ne egpuun te sapulu wey daruwa (12) ne tribu ne nekegsuwey-suwey kayi te ampew te tane.

Ka pegpalintutuu wey ka katuenan

² Me suled ku, kahale kew ke due peg-eleg-eleg ne eggingga kaniyu, ³ su nakataha kew ne ka peg-eleg-eleg, egpakalig-en te pegpalintutuu niyu eyew egkaantus niyu ka me keyirapan. ⁴ Purisu antusa niyu ka langun ne me peg-eleg-eleg su eyew egmatareng kew wey egkakumplitu kew, ne ware egkakulang diye te kaniyu. ⁵ Ke due diye te kaniyu ne kulang se kaalam, pabuyua niyu diye te Manama wey egbehayan iya sikandin. Egbehayan sikandin te Manama ne kene ne nunuhunen, wey hiid-uwen sikandin te langun ne etew. ⁶ Piru pabuyua nu

sikandin duma te pegpal-intutuu, ne ware pegduwa-ruwa. Su ka egduwa-ruwa egpekeiling te bunlud ne egkeuyan-uyan te kalamag minsan hendei eggiyupa.
 7-8 Ka etew ne egduwa-ruwa, kene egpakkapallateng ne due egkarawat puun te Manama, su ware kamalehetan te langun ne eggimuwen din.

Ka egkaayu-ayu wey ka meyaman

⁹ Keilangan ne egkahale ka suled ta ne egkaayu-ayu, ke igparibabew e sikandin te Manama.
¹⁰ Ne ka meyaman degma, keilangan ne egkahale ke igpariralem e sikandin te Manama, su egpekeiling de sikandin te kabukaran te me hilamunen ne egkapadpad.
¹¹ Te pegrile te iiniti ne aldew, egkahangu e ka hilamunen wey egkapadpad e ka kabukaran din, wey egkaawe e ka katelesan din. Ne iling naan ded due ka meyaman, minsan ke masalig pad ka eggimuwen din, egginguma iya ka aldew ne egpatey sikandin.

Ka peg-eleg-eleg wey ka peggintal

¹² Keupianan te etew ne egpakaantus te me peg-eleg-eleg, su emun ke egpakaantus sikandin, egpakkarawat sikandin te kuruna te umul ne insaad te Manama te seeye se eggeyinawa kandin.
¹³ Emun ke egtintalen ka sabeka ne etew, kene egkaayun ne egkahi sikandin ne ka Manama ka migtintal kandin, su ka Manama, kene

ma egkatintal ne eggimu te mareet wey kene degma sikandin egtintal te minsan hentew.
¹⁴ Piru wey re egkatintal ka etew ke egkeupian sikandin te kene ne kandin, wey egkeuyan sikandin te mareet ne igkeupii rin.
¹⁵ Ne ke egtumanen din ka mareet ne igkeupii rin, egpakkasale e sikandin, ne emun ke egpabulus sikandin ka eggimu te mareet, egpatey iya sikandin.

¹⁶ Pinalangge ne me suled ku, kene kew paakal.
¹⁷ Ka langun ne meupiya wey malehet ne dasag, diye egpuun te dibabew, diye te Amey ne migpuunan te kalayag. Kene egkabalbalawan sikandin tenged su kene ma ne iling sikandin te alung ne egkaalin-halin.
¹⁸ Sumale te pegbuut din, innimu ki nikandin ne me anak din pinaahi te kamalehetan te kandin ne lalag, su eyew egkeyimu ki ne labew te langun ne innimu rin.

Ka pegpammineg wey ka peggimu

¹⁹ Tantanuri niyu seini me pinalangge ku ne me suled. Ka tagse sabeka, keilangan ne mahaan egpammineg ke due eglalag piru kene ne mahaan eglalag wey egkabelu.
²⁰ Su ka kabelu te etew, kene egpekeuyan te pegkamatareng ne igkeupii te Manama.
²¹ Purisu engkeri niyu ka langun ne maddeet ne himu wey batasan, wey dawata niyu te

mapariralemen ka lalag te Manama ne impamula diye te pusung niyu, su seini ka egpakaluwas kaniyu.

²² Kene kew paakal te isip niyu pinaahi te pegpammineg de te lalag te Manama, ke kene, tumana niyu. ²³ Su ka minsan hentew ne egpammineg de te lalag din ne kene egtuman, egpekeiling te etew ne migpangalungan. ²⁴ Pegawe din te migpangalungan, due-rue ne nalingawan din ke mamenu e man-e sikandin. ²⁵ Piru ka etew ne amana egbantey te malehet ne Balaud ne egpakaluwas, wey egpabulus sikandin ne egtuman, wey kene din eglingawan ka narineg din su nasi din eggimuwa, egpanalanganin sikandin te langun ne eggimuwen din.

²⁶ Ke due sabeka ne egpalintutuu ne eleg e ka kandin ne pegpamakey, piru ke kene egbantey ke nekey ka iglalag din, kene ne malehet ka pegpamakey rin. Mig-akalan din de ka isip din. ²⁷ Su iyan seini ka malehet wey meupiya ne pegpamakey te Amey ne Manama, ka pegtanggu te me ilu wey te me balu te timpu ne egkeyirapan sikandan, wey ka pegbantey ne kene sikandin egkabiluwan te kareet kayi te kalibutan.

2

Peg-ilingen te egtahud ka etew

¹ Me suled ku, sikaniyu se migpalintutuu te tetelesi

ne Magbebabe ta ne si Hisu Kristu, keilangan ne epegilingen niyu te egsahipe ka me etew. ² Panunggiling ke due etew ne egtambung te pegasimba niyu ne migsising te bulawan wey tetelesi ka ingkukumbale din, ne due degma egkaayu-ayu ne egtambung ne migsaluub te dereeti ne kumbale. ³ Ne emun ke iyan niyu re egsahipeen ka migkukumbale te meupiya wey egpapinnuuwen niyu diye te mateles ne pinnuuwan, ne ka egkaayu-ayu egpasasindehen niyu re mule wey ke egpapinnuuwen naa diye te seeg, ⁴ egpakashale kew e te peg-alam niyu te etew wey te peggukum niyu puun te mareet ne suman-suman niyu. ⁵ Pammineg kew me pinlangge ku ne me suled. In-alam te Manama ka egkengaayu-ayu kayi te ampew te tane eyew egkeyimu ne meyaman te pegpalintutuu, wey eyew egpekeugpe te Migharian te Manama ne insaad din te langun ne eggeyinawa kandin. ⁶ Piru impeyilawan niyu ka egkaayu-ayu. Hentew bes ka eg-ayu-ayu kaniyu wey egsusumbung kaniyu diye te me huwis? Sika iya se me meyaman. ⁷ Sikandan ka egbaley-baley te meupiya ne ngaran ni Hisu Kristu ne insabekaan ta.

⁸ Eleg ka eggimuwen niyu ke egtumanen niyu ka sika se impurtanti ne Balaud ne egkakita diye te Kasulatan ne miggenendue, “Geyinawei

nu ka me duma nu iling te peggeyinawa nu te keykew mismu ne pegkeetew.”⁹ Piru ke eg-alamen niyu re ka eggsahipeen niyu, egpakashale kew e, wey ka Balaud ka eggukum kaniyu isip nakasale.¹⁰ Su ka minsan hentew ne egtuman te intiru ne Balaud piru egpakashuwey te sabeka re, nakasuwey e sikandin te langun.¹¹ Su ka Manama ne migkahih, “Kene ka panlibug,” sikan ded man-e ka migkahih, “Kene ka himatey te etew.” Ke ware ka nakapanlibug, piru ke nekeyimatey ka, nakasuwey kad e te Balaud.¹² Lalag kew wey himu kew iling te me etew ne eggukuman te Balaud ne egpakuwas te etew.¹³ Te timpu te peggukum, kene egkeyid-u ka Manama te seeye se ware pegkeyid-u diye te duma, piru ka pegkeyid-u, egpakaparibabew pad iya te peggukum.

Ka pegpalintutuu wey ka meupiya ne himu

¹⁴ Me suled ku, nekey-a ka karuan ke egkahi ka sabeka ne etew te due pegpalintutuu rin piru kene egkakita diye te himu rin? Egpaaluwas naa kandin ka pegpalintutuu rin ne iling due? Kene iya!¹⁵ Panunggiling ke due suled niyu te pegpalintutuu ne egkeilangan te kumbale wey kulang te pegkeen,¹⁶ ne due sabeka kaniyu ne egkahi diye te kandan, “Egpanalanginan kew te Manama, ne

kukumbale kew naa wey pangeen kew,” piru ke ware niyu behayi sikandan te keilangan dan, nekey naa ka karuan due?¹⁷ Iling ded due ka pegpalintutuu, egpatey sika ke kene egdumaan te meupiya ne himu.

¹⁸ Piru ke due egkahi, “Due pegpalintutuu nu, ne sikeddi, eggimu a te meupiya.” Seini ka igtabak ku rue, “Papitawa a te pegpalintutuu nu ne kene egdumaan te himu. Su egpapitawen ku mule sikeykew te keddi ne pegpalintutuu pinaahi te keddi ne himu.”¹⁹ Egpalintutuu ka ne sabeka re ka Manama? Meupiya! Piru minsan ka me busew egpalintutuu degma—egpangelkelen pad iya sikandan te kaaldek.²⁰ Egbusawen ka! Keilangan naan pad ne egpakaneng-neng ka te ka pegpalintutuu ne kene egdumaan te himu, ware karuan?²¹ Ka kaapapuan ta ne si Abraham, in-isip sikandin te Manama ne matareng tenged te meupiya ne himu rin ne sika se pegbehey rin te anak din ne si Isaak eyew igpanubad.²² Purisu amana ne klaru ne ka pegpalintutuu rin, indumaan te himu, wey namalehet ka pegpalintutuu rin pinaahi te himu rin.²³ Ne natuman ka nasulat te Kasulatan ne miggenendue, “Migpalintutuu si Abraham te Manama, ne tenged due, in-isip sikandin te Manama ne matareng.” Sika ka egpuunan ne ingngaranan

sikandin ne alukuy te Manama. ²⁴ Purisu egkakita niyu ne eg-isipen te Manama ne matareng ka sabeka ne etew pinaahi te himu rin, kene de ne pinaahi te pegpalintutuu. ²⁵ Iling ded degma diye te ki Rahab ne migbebelegye te lawa rin. Inisip sikandin te Manama ne matareng pinaahi te himu rin ne pegtanggu te me talagiipat wey te pegpepallahuy rin kandan diye te lein ne bayaanan. ²⁶ Su ka etew ne warad geyinawa, migpatey e. Ne ka pegpalintutuu ne kene egdumaan te himu, egpatey degma.

3

Ka dile

¹ Me suled ku. Kene ne keilangan ne masalig ka egkeyimu ne talagpanulu su nakataha kew ne sikanta se talagpanulu, amana ne malehen ka peggukum kanta du te duma. ² Su sikanta langun, malasi ki egkaseyyup. Ka etew ne kene egkaseyyup te peglag-lalag din, ware naa seyyup diye te kandin, wey egkabuutan din degma ka intiru ne lawa rin. ³ Emun ke egkakangan ta ka kudde su eyew egpalintutuu kanta, egpakaruma-ruma sikandin minsan hendei ta igpabaye. ⁴ Tengtengi niyu ma degma ka me barku, minsan derakel sikandan ne eggiyupen te makeseg ne kalamag, egpakaruma iya ke hendei igpabaye te kepitan, tenged te sika se deisek ne

egngaranan te timun. ⁵ Iling degma due ka dile, minsan ke deisek sika ne baad te lawa, piru amana egpakapeggasal.

Sumsumana niyu kamenu kaluag ka puwalas ne egkasilaban te deisek ne hapuy. ⁶ Ne ka dile, egpekeiling te hapuy ne mig-ingeran te egpakaneret. Egpakaneret sika te intiru ne pegkeetew ta wey egpasilab te kanta ne peg-ugpe. Ka sika ne hapuy, diye egpuun te linew ne hapuy. ⁷ Ka langun ne klasi te me mahintalunan ne me mananap, me manukmanuk, me uled, wey me ngalap, egkaayun ne eglayamen te etew, ⁸ piru ware etew ne egpakashayam te dile. Dereeti seini ne kene egkabalabahan, wey napenu te eggilu ne egpaketay. ⁹ Egkahamit ka dile ta te pegpasalamat te Magbebeye wey Amey ta, wey egkahamit ded man-e te pegdilus te duma ne me etew ne innimu iling te ulaula te Manama. ¹⁰ Te sikan ded ne be-be eglihawang ka pegdayan wey pegdilus. Me suled ku, kene perem ne iling due. ¹¹ Kene egkaayun ne sabeka re ne sebseb ka egpuunan te meupiya ne weyig wey te mareet degma ne weyig. ¹² Me suled ku, ka kayu ne iggira, kene egpakabebehas te ulibu, ne ka paras, kene egpakabebehas te iggira. Ne ka mapeit ne sebseb, kene egpakabehey te meupiya ne weyig.

Ka kaalam ne egpuun te

Manama

¹³ Ke due diye te kaniyu ne due katuenan wey mahaan epakasabut, keilangan ne igpakita rin seini due te peg-ugpe din pinaahi te me meupiya ne himu ne egdumaan te pegpariralem puun te kandin ne kaalam.
¹⁴ Piru ke due diye te pusung nu ne amana egkeimma wey lehed, kene egkaayun ne egpegpeggasal ka te dakel ka katuenan nu wey kene ka uubat.
¹⁵ Su ka sika ne kaalam, kene ne diye egpuun te dibabew, ke kene, kayi re te ampew te tane. Kene egpuun diye te Manama, ke kene, diye te ahalen te me busew.
¹⁶ Ke hendei ka pegkasekel wey ka peggakam-hakam, due degma ka kasamuk wey ka langun ne mareet ne me himu.
¹⁷ Piru ka kaalam ne diye egpuun te dibabew, hun-a te langun ware seini nasewuhi te mareet, igkarangeb eggeyinawa te kalinaw, maayad-ayad te duma, maparumruma, hiid-uwen, meupiya se eggimuwen, kene egalam te egtahuren, wey kene egpapitew-pitew re.
¹⁸ Egpakahaani te pegkamatareng ka etew ne eggeyinawa te kalinaw ne egpamula te keupianan.

4

Ka peg-alukuy te kalibutan

¹ Nekey-a ka egpuunan te igmekeg-ehet niyu wey

igkasamuk niyu? Iyan iya egpuunan due sika se igkengeupii niyu ne egmekeg-ehet diye te diralem niyu.
² Due perem igkeupii niyu, piru kene niyu egkakuwa, ne due egpuun ne epgangimatey kew. Due igkeimma niyu piru kene niyu egkaangken, purisu nasamuk kew wey nenekeg-ehet. Kene kew egpakakuwa te igkeupii niyu su kene kew ma egbuyu diye te Manama.
³ Te timpu ne egbuyu kew, kene sika igbehey kaniyu tenged su mareet ma ka tuyu niyu te egbuyu. Iyan niyu igbuyu su eyew egkatuman ka igkeupii niyu.
⁴ Sikaniyu se egpekeiling te mangngalibug! Ware kew bes nakataha ne ka egpakig-alukuy te kalibutan, egpakakuntere te Manama? Purisu seeye se egkeupian ne egpakig-alukuy te kalibutan, egkeyimu ne kuntere te Manama.
⁵ Kene niyu sumsumana ne ware karuan te nasulat te Kasulatan ne miggenendue, "Talikuren ka panisingan ne impeugpe te Manama kayi te kanta."
⁶ Piru dakel ka bulig te Manama kanta sumale te nasulat te Kasulatan ne miggenendue, "Kuntere te Manama ka me hambuhen, piru ebulihan din seeye se me mapariralemen."
⁷ Purisu paruma-ruma kew te Manama, wey sukuli niyu ka ahalen te me busew su eyew egpakkallahuy.
⁸ Parani kew te Manama, ne ka Manama ka egparani kaniyu. Sikaniyu se me

makasesale, inniyuhi niyu ka me sale niyu.* Sikaniyu se egmanduwa-ruwa, linisi niyu ka me pusung niyu.⁹ Kalange kew, sinehew kew, wey pandalawit kew. Bullasi niyu ka pegngisi niyu te pegrinehew. Bullasi niyu ka pegkahale niyu te pegkalange.¹⁰ Pariralem kew diye te tangkaan te Magbebkiye ne sikandin ka eparibabew kaniyu.

*Ka pegpaney-paney
meyitenged te peggukum te
duma*

¹¹ Me suled, kene kew lalag te mareet diye te duma niyu. Su ka minsan hentew ne eglalag te mareet diye te suled din, wey ke eggukum naa, eglalag degma wey eggukum te Balaud. Su ke eggukum kew te Balaud, ware kew naa nakatuman kayi, ke kene, miggukum kew re.¹² Ka Manama re ka epakabehey te Balaud wey ka egpekeywukum. Sikandin de ka epakaluwas wey egpekeyimatey. Piru hentew kew ma ka eggukum te duma niyu?

*Ka pegpaney-paney
meyitenged te pegpeggasal*

¹³ Due igkalalag ku kaniyu, sikaniyu se migkahi, "Eggendiye key kuntee wey ke kaaselem naa te sabeka ne lungsud wey eg-ugpe pad diye seled te sabeka ne leg-un eyew egtetamuk wey te peg-paneleppi."¹⁴ Piru ware kew

nakataha ke nekey ka egkey-itabu kaniyu kaaselemen. Nekey-a ka egkeilingan niyu? Egpekeiling kew te gapun, egkakita egkaragdahawi, ne egkataman egkaawe e.¹⁵ Seini perem ka eleg ne eglalahen niyu, "Ke igtuhut te Manama, egsumpulan pad perem nikandin ka umul ta wey seini ka eggimuwen ta."¹⁶ Piru kuntee, nasi kew re iya migpeggasal wey migparayan-dayan. Mareet ka iling due ne pegpeggasal.¹⁷ Sikan naa, ka etew ne nakanengneng ke nekey ka eleg ne eggimuwen din piru ware din himuwa, epakasale e.

5

Katambag te me meyaman

¹ Pammeg kew ka me meyaman, paninehew kew wey pandalawit kew tenged te pegkalaggew ne eggingga kaniyu.² Namewu e ka me karatuan niyu wey ka me kumbale niyu migpangetket e te ipes.³ Intaang e ka me bulawan niyu wey ka me seleppi niyu, ne sika se taang dan ka epakapamalehet ne nakasale kew wey sika ka epakarereet te lawa niyu iling te hapuy. Miglilimud kew te me karatuan niyu te katammanan ne timpu.⁴ Pammeg kew! Ka me etew ne miggimu diye te me kamet niyu, migsalew-salew e ne ware niyu bayari, wey

* 4:8 Te Grigu: panlu-lu kew te me belad niyu.

narineg te Maresen ne Magbebabe ka pegsalew-salew te manggaani.⁵ Meupiya amana ka peg-ugpe niyu kayi te ampew te tane wey nakuwa niyu ka langun ne ingkeupii niyu. Iling te impalambeg niyu ka melawa niyu tahahe te aldew te peggimatey kaniyu.⁶ Inlegparan niyu wey inggimatayan niyu ka matareng ne etew, ne ware migsukul sikandin.

Kene kew egkapeleyi ne egtetahad

⁷ Purisu me suled, kene kew kapeleyi ne egtetahad taman te peglibed te Magbebabe. Pitawa niyu ke immenu te egtetahad te talabasukan ke ken-u egkahaani ka tetelesi ne impamula ran. Kene sikandan egkapelaan ne egtetahad ke ken-u eg-uran.⁸ Purisu kene kew degma kapeleyi ne egtetahad. Tetahad kew su mahaan e ka peglibed te Magbebabe.

⁹ Me suled, kene kew megsalsalawey eyew kene kew eggukuman te Manama, su diyad e te gumawan ka talaggukum. ¹⁰ Me suled, sumsumana niyu ka me prupita ne migwali te ngaran te Magbebabe. Ilingi niyu sikandan su ware napeleyi ne mig-antus te me keyirapan. ¹¹ Pammineg kew, eg-isipen ta ne meupiya sikandan su nakaantus ma. Nakarineg kew e meyitenged te peg-antus ni Hub, wey nakataha kew e ke immenu sikandin te Magbebabe te

pegbulig, su hiid-uwen ka Magbebabe wey lulunuen.

¹² Labew te langun, me suled, kene kew egsesaad ne egkahi, "Mengeyibet te langit," wey ke "Mengeyibet te tane," wey te minsan nekey. Ke kene, kahi kew re te "uya" ke eg-uyun kew, piru ke kene, kahi kew re te "kene" eyew kene kew eggukuman te Manama.

Ka geem te peg-ampu

¹³ Ke due egkeyirapan due te kaniyu, keilangan ne paampua niyu sikandin. Ke due egkahale, peulahinga niyu sikandin te me ulahingen te pgsaye. ¹⁴ Ke due egderalu due te kaniyu, keilangan ne egumew sikandin te ighbuyag te migmalintutuu eyew egampu kandin wey te pegitis kandin te lana pinaahi te ngaran te Magbebabe. ¹⁵ Ka peg-ampu ne egdumaan te pegpalintutuu, egpakabawi te egderalu. Ne ka Magbebabe ka egpekeuli kandin wey egpakapasaylu ke duen ma sale din. ¹⁶ Purisu megnangnangenev kew te me sale niyu wey megampuey kew ka tagse sabeka eyew egkengeulian kew. Su dakel ka egkeyimu te pegampu te etew ne matareng.

¹⁷ Si Iliyas, etew red degma iling kanta. Piru mig-ampu sikandin ligkat te pusung din ne kene perem eg-uran, ne ware iya nekeuran seled te tatelu ne leg-un wey liware. ¹⁸ Nataman, migampu e man-e sikandin ne

eg-uran, ne mig-uran iya
wey nakapamehas e ka me
pinamula.

¹⁹ Me suled ku, ke due diye
te kaniyu ne egpaka-suwey
te kamalehetan, wey ke
due egpaka-palibed kandin,
²⁰ keilangan ne egpakataha
kew ne ka minsan hentew
ne egpaka-palibed te makas-
esale puun te mareet ne
hinimuwan din, sikandin
ka egpaka-pangabang te
gimukud te etew puun te
kamatayen, wey masalig
ka me sale ne egkapasaylu
tenged kandin.

Ka An-anayan ne Sulat ni Pidru

Igpewun-a

Ka an-anayan ne sulat ni Pidru insulat din para te migmalintutuu ne nekegsuwey-suwey nanggape diye dapit te Asya Minur. Ka tuyu ni Pidru te migsulat kayi, ka pegbagget te migmalintutuu ne keilangan ne eglig-en sikandan taliware te masumpit ne pegbayad-bayad kandan tenged te pegpalintutuu ran. Impasuman-suman sikandan ni Pidru meyitenged te kaluwasan dan, te kamatayen ni Hisu Kristu, te pegkeuyag din wey te peglibed din. Su nanengneng ni Pidru ne emun ke iyan dan layun egsumsumanen ka egpallatengen dan ne diye te langit, egkaantus dan iya ka langun ne keyirapan kayi te ampew te tane. Impanengneng din man-e sikandan ne emun ke egkeehet ka pegpalintutuu ran pinaahi te peg-antus dan te me keyirapan wey me kalasayan, egpakarawat sikandan te dasag te "Timpu ne igpakite e si Hisu Kristu." (1:7, 13)

Migbanasalan din man-e sikandan ne keilangan ne egay-ayaran dan ka batasan dan isip me keet-etawan ni Kristu, wey keilangan degma ne egparuma-ruma sikandan

te seeye se due katenged ne egmandu kandan.

Ka nasulat te seini ne baseen

Igpewun-a 1:1-2

Ka pegpasuman-suman meyitenged te kaluwasan ne ware katamanan 1:3-12

Ka pegbanasal meyitenged te peg-ugpe ne matulus 1:13-2:10

Ka pegparuma-ruma ta te seeye se due me katenged diye te kanta 2:11-3:7

Ka tambag meyitenged te eggingsuma ne me keyirapan 3:8-4:19

Ka tambag para te pangulu wey te migmalintutuu 5:1-11

Ka me pangemusta 5:12-14

¹ Sikeddiey si Pidru ka migpeuyan te seini ne sulat, apustulis a ni Hisu Kristu.

Egpangemusta a kaniyu te in-alam te Manama, ne nakalapu de due te Puntu, Galasya, Kapadusya, Asya, wey Bitinya. ² In-alam kew te Manama ne Amey sumale te tapey e ne planu rin, wey immatulus kew te Panisingan din eyew egpakkalintutuu kew e ki Hisu Kristu, wey egkalinisan kew e te langesa rin.

Ka keyid-u wey keupianan ne egpuun te Manama, egkaangken niyu te subla-subla.

Ka pegpallateng te umul ne ware egtamanan

³ Egdayanen ka Manama wey Amey te Magbebaye ta ne si Hisu Kristu! Su

tenged te dakel ne keyid-u rin, imbehayan ki nikandin te iyam ne umul pinaahi te peg-uyag ki Hisu Kristu. Purisu mapahetpet ki ne egpallateng ne eg-uyahen ki red degma keureme.⁴ Ne ka intahahe te Manama kaniyu diye te langit, kene sika egkamewu, kene egkabiluwan, wey kene egkaawe.⁵ Tenged te pagsalig niyu te Manama, egtamengan kew nikandin pinaahi te geem din, taman te egkarawat niyu ka kaluwasan ne igpakita te katammanan ne timpu.

⁶ Ne puun due, gale-gale kew iya minsan keilangan ne eg-antus kew te malepet de ne timpu tenged te egkalein-lein ne peg-eleg-eleg.⁷ Ka tuyu te sika ne me keyirapan, ka pegnengneng ke malehet naan en iya ka pegpalintutuu niyu. Su minsan ka bulawan ne eglihad de, eg-el-elehan ma pinaahi te pegtunew rue, eyew egkanengnengan ke malehet naan iya. Ne iyan naan pa ka pegpalintutuu niyu ne labew pad te bulawan. Ne emun ke egkapamalehetan e ne malehet iya ka pegpalintutuu niyu, egkarayan kew, egmabantug, wey egtahuren kew te timpu ne igpakite e si Hisu Kristu.⁸ Miggeyinawaan niyu sikandin minsan ware niyu nakita. Ne minsan ke kene niyu sikandin egkakita kuntee, piru egpalintutuu kew wey egsalig kandin. Ne

kene egkatirew wey ware egkeilingan te kahale niyu⁹ tenged su narawat niyud e ka dasag te pegpalintutuu niyu ne iyan sika se kaluwasan.

¹⁰ Ka me prupita ne migpanagne meyitenged te keupiya wey keyid-u te Manama ne igbehey kaniyu, ka mignengneng wey mig-ayad-ayad mig-ugsi-ugsi meyitenged te sika ne kaluwasan.¹¹ Ne pinaahi te Panisingan te Manama ne due te kandan, migpanagne sikandan meyitenged te peg-antus te Kristu* wey te dakel ne kabantug din pegkapenga rue. Amana sikandan mig-ugsi-ugsi ke ken-u wey ke nekey ne paahi sika egkeyitabu.¹² Impataha te Manama kandan ne ka impanlalag dan, kene egkeyitabu diye te kandan su kayi mule te kaniyu kuntee. Ne narindeg niyud e kuntee seini puun te me etew ne migwali te Meupiya ne Panugtulen pinaahi te bulig te Panisingan te Manama ne impeuyan din puun te langit. Ne minsan ka me panalihan, amana egkeupian ne egpakashabut kayi.

Ka matulus ne pegbebatasan te migmalintutuu

¹³ Purisu andama niyu ka me suman-suman niyu[†] eyew te peggimu te igkeupii te Manama, wey keilangan ne egtigkel kew te pegkeetew

* **1:11** Ka igpasabut te Kristu, Insaad ne Manluluwas. † **1:13** Te Grigu: kumbalei niyu ka suman-suman niyu.

niyu. Ipalene-lene niyu ka pegpallateng niyu due te keyid-u ne igbehey kaniyu te timpu ne igpakite e si Hisu Kristu.¹⁴ Puun su matinumanen kew ne anak te Manama, keilangan ne kene kew paruma-ruma te mareet ne igkeupii te lawa niyu, iling te innimu niyu dengan te ware kew pad nakataha te kamalehetan.¹⁵ Ne puun su matulus ka mig-alam kaniyu, keilangan ne matulus degma ka langun ne eggimuwen niyu¹⁶ tenged su nasulat e te Kasulatan, "Keilangan ne egmatulus kew tenged su matulus a."

¹⁷ Ka Manama ne eg-amayen niyu ke eg-ampu kew, ka eggukum te ware pegdapig te langun ne etew sumale te hinimuwan dan. Purisu, tahura niyu sikandin taheed te migtagtaheed kew pad nangugpe kayi te ampew te tane. ¹⁸ Nakanengneng kew e ke nekey ka inggamit te Manama te pglekat kaniyu puun te ware karuan ne pegbebasan niyu ne naangey niyu puun te me kaapapuan niyu. Ware sikandin miggamit te sika se eglihad de ne me karatuan iling te bulawan wey ke pelata naa,¹⁹ ke kene, sika se mahal ne langesa ni Kristu ka inggamit din. Nekeiling sikandin te nati te karniru ne ware nabalbalangi wey mansa.²⁰ Te ware pad neyimu ka kalibutan, tapey e sikandin alama ne Manluluwas. Piru

kunteen e te katammanan ne me timpu igpakita sikandin para kaniyu.²¹ Ne pinaahi kandin, migpalintutuu kew e te Manama ne iyan mig-uyag kandin puun te kamatayen wey ka migbehey kandin te dakel ne kabantug. Purisu ka Manama ka napalenlenaan te pegpalintutuu niyu wey te pegpallateng niyu.

²² Kuntee, puun su migmalinis e ka suman-suman niyu pinaahi te pegtuman niyu te kamalehetan, migmalehet e ka peggeyinawa niyu te me suled niyu ne migmalintutuu. Ne kuntee, keilangan ne peggeyinaweeey kew iya ka tagse sabeka ne egpuun te pusung niyu.²³ Puun su nabalbalawan kew e neetew, sika se iyam ne umul niyu, kene ne diye egpuun te etew ne mahaan de egpatey, ke kene, diye sika egpuun te ware egtamanan wey manedted ne lalag te Manama.²⁴ Su nasulat e te Kasulatan,

"Ka langun ne etew, egpekeiling te me hilamunen, wey ka langun ne katesan dan, egpekeiling te bulak te me hilamunen.

Ne egkahangu ka hilamunen wey egkengatahak e ka me bulak din,²⁵ piru ka lalag te Magbebeye, egpabulus te ware egtamanan."

Ka sika ne lalag, iyan sika se Meupiya ne Panugtulen ne inwali due te kaniyu.

2

¹ Purisu, inniyuhi niyu ka langun ne mareet ne hinimuwan iling te pegpanlimbung, pegpapitewpitew, pegkeimma, wey ka peg-iran-iran te duma niyu. ² Keilangan ne layun kew inum te telek ne gatas ne iyan sika se Lalag te Manama, iling te malalab pad ne me bate ne layun egkeupian te gatas. Su ke eggimuwen niyu sika, egtulin ka pegpalintutuu niyu taman te egkaluwas kew, ³ tenged su naheraman niyud e ka keupiya te Magbebaye.

Ka sumalem ne batu wey ka migmalintutuu

⁴ Parani kew te Magbebaye, ka sumalem ne batu ne insamsamilian te me etew, piru in-alam bes te Manama wey in-isip din ne mahal. ⁵ Ne sikaniyu degma, iling kew te sumalem ne batu ne inggamit te pegbebaley te ispirituanen ne timplu. Neyimu kew ne matulus ne talagpanubad te Manama, ne pinaahi ki Hisu Kristu, egpakabehey kew te Manama te ispirituanen ne halad ne egkarawat din. ⁶ Su nasulat te Kasulatan,

“Tew kew! In-alam ku ka mahal ne batu,
ne igtahu ku diye te
Siyun eyew egkeyimu
ne pabunsuran;

ne seeye se egpalintutuu
kandin, kene egkeyilawan.”

⁷ Purisu, due te kaniyu te egpalintutuu, amana ne mahal sikandin. Piru meyitenged te seeye se kene egpalintutuu, nasulat e diye te Kasulatan, “Ka batu ne insamsamilian te me talagbebaley nasi neyimu ne impur-tanti ne pabunsuran.”

⁸ Ne duen pad man-e diye te Kasulatan ne migkahi, “Seini ka batu ne egpaka-pasaligkat te me etew, wey ka egpakaparugsu kandan.”

Egkasaligkat sikandan tenged su ware sikandan migpalintutuu te lalag te Manama. Ne sika iya ka implanu te Manama kandan.

⁹ Piru sikaniyu ka inalam ne me etew, ka me talagpanubad te Hari, ka matulus ne nasud, wey ka keet-etawan ne kandin te Manama. In-alam kew nikandin eyew egpangguhud te tetelesi ne hinimuwan din. Sikandin ka mig-umew kaniyu puun te karusileman peendiye te kein-inuwan ne kalayag din. ¹⁰ Dengan, kene kew ne keet-etawan te Manama, piru kuntee, keet-etawan kew e nikandin. Ne ware kew ikeyid-u te Manama dengan, piru kuntee, ingkeyid-u kew e nikandin.

Ka pegbebasan te migmalintutuu

2:3 Sal 34:8. **2:6** Isa 28:16 (LXX). **2:7** Sal 118:22. **2:8** Isa 8:14-15. **2:9** Iks 19:5-6; Isa 43:20 (LXX); Iks 19:5; Diy 4:20; 7:6; 14:2; Tit 2:14; Isa 43:21; Isa 9:2. **2:10** Hus 2:23.

¹¹ Me suled, puun su migtagtaheed kew re nangugpe wey mahaliyug kew re kayi te ampew te tane, egbanasalan ku sikaniyu ne pakaddiyu kew te mareet ne igkeupii te lawa niyu ne makasesale ne layun epakig-ehet te gimukud niyu. ¹² Meupiyaan niyu ka pegbebasan niyu taliware te me etew ne ware migpal-intutuu te Manama, su minsan ke egbayungan kew nikandan ne eggimu kun te mareet, egkakita ran ka meupiya ne himu niyu wey essayeen dan ka Manama te aldew te peggendini rin.

¹³ Tenged te Magbebaye, keilangan ne egparumarauma kew te langun ne etew ne due me katenged kaniyu, iling te Impiradur su sikandin ka labew ne pangulu, ¹⁴ wey diye te me gubirnadur. Ka me gubirnadur ka egsuhuen te Impiradur te pegparusa te seeye se egpekeyimu te mareet, wey ka egpareyrayen te seeye se eggimu te meupiya. ¹⁵ Su iyan igkeupii te Manama ne pinaahi te peggimu niyu te meupiya, ware igkalalag kaniyu te seeye se egkengeungel ne me etew. ¹⁶ Ugpe kew isip me etew ne due kaligwangan, piru kene niyu gamita sika te pegbunbun te mareet ne himu, ke kene, ugpe kew isip me uripen te Manama. ¹⁷ Tahura niyu ka langun

ne etew wey geyinawei niyu ka me suled niyu te pegpalintutuu. Kaaldeki niyu ka Manama wey tahura niyu ka Impiradur.

Ka tambag diye te uripen

¹⁸ Sikaniyu se me uripen, keilangan ne paruma-ruma kew te me ahalen niyu duma te pegtahud kandan. Ne kene de ne iyan niyu eggimewan te iling due ka meupiya wey hiid-uwen ne me ahalen, ke kene, minsan degma ka mabbulut. ¹⁹ Egkahale ka Manama ke tenged te pegsuman-suman niyu kandin, eg-antusen niyu ka me pegbayad-bayad ne ware egpuunan. ²⁰ Kene kew egkasaye ke egpanlampesan kew tenged te mareet ne hinimuwan niyu. Piru ke meupiya ka hinimuwan niyu wey eg-antus kew tenged due, egkahale ka Manama kaniyu. ²¹ In-alam kew te Manama eyew eg-antus, su migbaybayaran degma si Kristu para kaniyu wey migbehey sikandin kaniyu te panunggilingan eyew eg-ilingan niyu. ²² Ware sikandin nakasale wey ware ubat ne egkarineg nu diye te kandin. ²³ Te timpu ne indeeg-deeg sikandin, ware sikandin migsuli migdeeg-deeg. Te timpu ne imbaybayaran sikandin, ware sikandin migleialis, ke kene, migsalig sikandin te Manama, ka matareng ne talaggukum.

24 Si Kristu mismu ka miguyan te me sale ta pinaahi te peglansang te lawa rin diye te krus eyew kene kid e egpakesale, ke kene, egkamatareng e ka peg-ugpe ta. Ne pinaahi te me pali din, neulian kew e.²⁵ Su sikaniyu dengan, nekeiling kew te me karniru ne nenallaag, piru kuntee, nakalibed kew e diye te Talagtameng wey Talagtanggu te me gimukud niyu.

3

Ka tambag diye te alung-gun

¹ Te iling due ne paahi, sikaniyu se manggiasawe e ne me malitan, keilangan ne egparuma-ruma kew te me asawa niyu, su eyew ke duen ma diye te kandan ne kene egpalintutuu te lalag te Manama, kema ke egpaka-palintutuu red sikandan ke egkita ne meupiya ka batasan niyu. Ne kene ne keilangan ne eglalahuan niyu pad sikandan ² tenged su egkakita ran ka meupiya ne pegbebasan niyu wey ka pegtahud niyu te Manama.

³ Kene niyu iyan ikasasew ka peggimmimasad te lawa niyu, iling te peg-ayad-ayad te bulbul, pegsaluub te mahal ne me dayan-dayan te lawa, wey pegsaluub te meupiya ne kumbale, ⁴ ke kene, iyan niyu himasari ka diye te pusung niyu. Su ka kateles te etew ne kene

egkabalbalawan ne amana mahal diye te Manama, sika se mapariralemen wey maleman. ⁵ Iling due ka peggimmimasad dengan te matulus ne me malitan ne migpallateng te Manama. Maparuma-ruma sikandan te me asawa ran, ⁶ iling ki Sara te migpalintutuu te asawa rin ne si Abraham wey iyan din igngaran ka "ahalen". Ne sikaniyu naan e kuntee ka me anak din ke eggimu kew te meupiya wey ke kene kew egkaaldek te minsan nekey.

⁷ Ne iling ded sikaniyu se manggiasawe e ne me lukes, keilangan ne egtahuren niyu ka me asawa niyu. Upiani niyu sikandan taheed te eg-palemungey kew, su mahuye sikandan kunteke kaniyu, wey nekeg-iling kew re diye te tangkaan te Manama tenged su egpakaangken degma sikandan te keyid-u te Manama ne sika se umul ne ware egtamanan. Ne himuwa niyu sika eyew ware egpabalabag te peg-ampu niyu.

Ka peg-antus tenged te peggimu te meupiya

⁸ Te katammanan, sikaniyu langun, keilangan ne egsabekeen niyu ka suman-suman niyu wey ikeyimenawi niyu ka duma. Ne paheyinaweeey kew isip tahasuled, peup-upianey kew, wey pariralem kew.

⁹ Kene niyu sulii te mareet

ka eggimu te mareet diye te kaniyu, wey kene niyu sulii te egdilus seeye se egdilus kaniyu, ke kene, sulii niyu pinaahi te pegpanalangin kandan tenged su in-alam kew te Manama eyew eg-pakaangken te panalangin.

10 Su nasulat te Kasulatan, "Emun ke due etew ne egkeupian ne egkahale

wey egkeupian ne meupiya ka peg-ugpe din, keilangan ne kene sikandin eglalag te mareet wey eg-uubat.

11 Keilangan ne eg-inniyuhan din ka mareet wey eggimu e sikandin te meupiya;

keilangan ne egpakan-nekal sikandin ne due keupianan dan te me duma rin.

12 Su egbantayan te Manama ka me matareng

wey egpaminehen din ka peg-ampu dan, piru egsupak sikandin te seeye se eggimu te mareet."

13 Na, hentew naa ka egdereet kaniyu ke mabagget kew ne eggimu te meupiya?

14 Piru minsan pad ke eg-antus kew tenged te peggimu niyu te meupiya, eghanalanginan kew. Purisu kene kew kaaldek wey kasasew, **15** ke kene, tahura niyu iya si Kristu isip Mag-bebaya niyu. Ne pangandam

kew layun ka egpangataren-gan te seeye se eg-inse kaniyu meyitenged te egpallatengen te migmalintutuu. **16** Piru tabaka niyu te kene ne malangit wey due pegtahud.

Keilangan ne layun malinis ka kunsinsya niyu, su eyew ke due eglalag te mareet kaniyu, egkeyilew sikandan te mareet ne inlalag dan ke egkakita ran ne meupiya ka pegbebasan niyu isip migpalintutuu ki Kristu. **17** Ke pegbuut ma te Manama, meupiya pad ka eg-antus tenged te peggimu te meupiya, du te peggimu te mareet.

18 Su mig-antus* degma si Kristu te kasabeka re para te sale te me etew. Ware mule sikandin nakasale, piru migpatey sikandin para te makasesale eyew te peguyan kanta diye te Manama. Mig-antus sikandin te kamatayen te lawa rin, piru neuyag ka panisingan† din.

19 Miggendiye ka panisingan din ne migwali te me panisingan ne nenaprisu. **20** Ka sika ne me panisingan ka ware migpalintutuu dengan taheed te migpangimu pad si Nuwi te arka, ne ware napeleyi ka Manama ne egtetahad kandan. Ne deisek de ka diye te arka ne naluwas te weyig su walu re iya ne etew. **21** Ne ka sika ne weyig, iyan impeilingan ka bewutismu ne iyan nakaluwas kaniyu kuntee pinaahi te geem te

3:10 Sal 34:12-16 (LXX). **3:14** Mat 5:10. **3:14** Isa 8:12-13. * **3:18** Diye te duma ne sinulat: migpatey. † **3:18** Wey ke: in-uyag sikandin te Panisingan te Manama. **3:20** Hin 6:1-7:24.

peg-uyag ni Hisu Kristu. Ka bewutismu, kene ne pegawe te bilu te lawa, ke kene, ka peghangyu diye te Manama ne eglinisan din ka kunsinsya ta.²² Ne kuntee, diyad e si Hisu Kristu te langit, diye te igkakawanant te Manama. Ne sikandin ka migmandu te langun ne me panalihan, te due me katenged wey me geem ne kene egkakita.

4

Ka iyam ne peg-ugpe due te Manama

¹ Purisu, puun su mig-antus si Kristu te pegbayad-bayad kandin, keilangan ne sikaniyu degma, andam ne eg-antus. Su ka minsan hentew ne mig-antus te pegbayad-bayad, kenad e egpabulus egpakashale. ² Ne puun kuntee taman te egpatey sikandin, kenad e sikandin eg-ikul te mareet ne igkeupii rin, ke kene, eg-ikul e te pegbuut te Manama. ³ Su suble e ka innimu niyu te miglihad ne me timpu, ne iling te igkeupii ne eggimuwen te seeye se kene egpalintutuu te Manama. Su dengan, miggimu kew te keyilawan, mareet ne igkeupii te lawa niyu, mighubug-hubug, egkasublaan ne pegdees wey peg-iinum diye te sahakeen, wey ware keyilew niyu te pegasimba te me diyus-diyus. ⁴ Ne kuntee, neinu-inu

sikandan ke mania te ware kew e migluyud kandan te peggimu te subla ne keyilawan, wey egtampeleen kew e nikandan.⁵ Piru egpanabak ded keureme sikandan te hinimuwan dan diye te Manama ne andam ne eggukum te nammatey e wey te mannekal pad. ⁶ Sika ka egpuunan ne inwali ka Meupiya ne Panugtulen minsan diye te nenammatey e kuntee, su eyew minsan ke miggukuman e ka lawa ran pinaahi te kamatayen iling te langun ne etew, egkeuyag ded ka panisingan dan iling te Manama.

⁷ Marani e ka katamanan te kalibutan, purisu tigkel kew te pegkeetew niyu wey bantayi niyu ka suman-suman niyu eyew egpakaampu kew. ⁸ Labew te langun, paheyinaweey kew ka tagse sabeka te mapahetpet iya, su emun ke eggimuwen niyu sika, mahaan kew re egpapasaylu te duma.* ⁹ Paal-alumameey kew ka tagse sabeka te ware pgsalew-salew. ¹⁰ Puun su nakarawat te katuenan ka tagse sabeka, keilangan ne eggamiten din sika para te keupianan te duma isip meupiya ne piniyalan te nalein-lein ne katuenan te Manama. ¹¹ Ka minsan hentew ne egwali, keilangan ne egwali sikandin ne hendue te ka Manama ka migpakiglalag pinaahi

* 3:22 Sumale te tuluuwen te me Hudiyu, ka talahuren de ne etew ka egpakinuu diye te igkakawanant te mabantug ne etew. 4:8 Lal 10:12. * 4:8 Te Grigu: ka geyinawa, egpakabunbun te sesalih ne sale.

kandin. Ka minsan hentew ne mabulig-bulig, keilangan ne eggimuwen din sika pinaahi te keseg ne igbehey te Manama kandin, su eyew egkareyrey ka Manama te langun ne eggimuwen niyu pinaahi ki Hisu Kristu. Ka langun ne kabantug wey geem, kandin de iya te ware egtamanan. Malehet iya.

Ka peg-antus te migmalintutuu

¹² Me pinalangge, kene kew keinu-inu tenged te masumpit ne pegbayad-bayad isip peg-eleg-eleg kaniyu. Kene niyu seini isipa ne sabeka ne kein-inuwan ne neyitabu kaniyu, ¹³ ke kene, gale-gale kew su egpakabaye kew te peg-antus iling te peg-antus ni Kristu, eyew amana kew iya egkahale te timpu ne igpakite e ka katelesan din. ¹⁴ Egpanalanginan kew ke eglemetan kew tenged te peg-palintutuu niyu ki Kristu, su sika ka palinneu ne mig-ugpe e due te kaniyu ka maresen ne Panisingan, ka Panisingan te Manama. ¹⁵ Piru kene niyu ituhut ne due sabeka kaniyu ne eg-antus tenged su mangngimatey sikandin, takawen, maret ka eggimuwen, wey ke egpangilabet te eggimuwen te duma. ¹⁶ Piru ke eg-antus ka sabeka ne etew tenged su Kristuwanen sikandin, keilangan ne kene sikandin egkeyilew, ke kene, egsayeen din ka Manama tenged su

in-isip sikandin ne sakup ni Kristu.

¹⁷ Su miggungume e ka timpu ne eggukum e ka Manama, ne egbunsud seini diye te keet-etawan din. Ne emun ke sikanta ka eggunaan eggukumi, nekey buwad e ka egkeyingumaan te seeye se ware migpalintutuu te Meupiya ne Panugtulen te Manama? ¹⁸ Ne nasulat te Kasulatan,

“Emun ke malised ne egkaluwas ka matareng ne etew, iyan naan pa iya seeye se ware mig-ikul te Manama wey ka makasseale!”

¹⁹ Purisu, seeye se mig-antus sumale te pegbuut te Manama, keilangan ne egpabulus eggimu te meupiya wey igsalig dan e ka umul ran diye te matinumanen ne Tlaggimu kandan ne iyan ka Manama.

5

Ka tambag diye te migmalintutuu

¹ Sikan naa, egbanasalan ku sikaniyu se me igbuyag te migmalintutuu due, ne iling ku degma te sabeka ne igbuyag. Sikeddiey mismu, nakakita a te peg-antus ni Kristu wey egkatalaran a te kabantug din te igpakite e sikandin keureme. ² Iyan ku igbanasal kaniyu, ne tangguwa niyu ka keet-etawan ne insalig te Manama kaniyu su nekeiling sikandin

te karniru rin. Piru tangguwa niyu sikandan ne kene ne puun su napehes kew re, ke kene, puun su sika ka igkeupii niyu sumale te pegbuut te Manama kaniyu. Himuwa niyu sika ne kene ne puun su egkaam-amanaan kew te ighbayad, ke kene, puun su amana kew egkeupian ne egbulig kandan.³ Kene kew bulut-bulut ne egmandu kandan te impiyal re kaniyu, ke kene, himuwa niyu ka pegkeetew niyu ne panunggilingan diye te kandan.⁴ Ne emun ke eglepew e ka Pangulu te Talagtameng te karniru ne iyan si Hisu Kristu, epakarawat kew te amana tetelesi ne unag ne kene egkaawe.

⁵ Sikaniyu degma se me lukes-lukes, keilangan ne epparuma-ruma kew te me ighbuyag niyu. Ne sikaniyu langun, keilangan ne pariralem kew te tagse sabeka, su nasulat e diye te Kasulatan, "Kuntere te Manama ka me hambuhen, piru egbulihan din ka mapariralemen."⁶ Purisu pariralem kew diye te Manama ne amana ne maresen eyew igparibabew kew nikandin te aldew ne in-alam din.⁷ Ibehey niyu diye te kandin ka langun ne igkalaggew niyu tenged su egkasasew sikandin meyitenged kaniyu.

⁸ Bantey kew wey kene kew lengkay! Su ka kuntere

niyu ne ahalen te me busew, eglilibeng-libeng iling te liyun ne egginihel ka egpammitew te egtekeben din.⁹ Sukuli niyu sikandin wey heheta niyu ka pegpalintutuu niyu, tenged su nakanengneng kew e ne ka me suled niyu te pegpalintutuu kayi te ampew te tane, egbaye ded degma te iling due ne me peg-antu. ¹⁰ Ka Manama ne egpuunan te langun ne panalangin ka mig-alam kaniyu eyew epakarawat kew te ware egtamanan ne katelesan din tenged te pgsabeka ta ki Kristu. Pegkapenga te malepet de ne peg-antu niyu, egkumplituwen kew te Manama, eggeheten din ka pegpalintutuu niyu, wey eglig-enen kew nikandin eyew kene egkaweil ka pegpalintutuu niyu.¹¹ Kandin de iya ka geem te ware egtamanan. Malehet iya.

Ka katammanan ne pegpangemusta

¹² Si Silbanu, ka in-isip ku ne matinumanen ne suled te pegpalintutuu, ka migbulig keddiey te pgsulat ku kaniyu te seini se malepet de ne sulat. Iyan ku tuyu te seini ne sulat ka egbagget wey ka egpamalehet kaniyu ne seini iya ka malehet ne keyid-u te Manama. Desdeseni niyu naa sika.

¹³ Egpangemusta kaniyu ka migmalintutuu diye te Ba-

5:5 Lal 3:34 (LXX). **5:6** Mat 23:12; Luk 14:11; 18:14. **5:12** Him 15:22,40.

5:13 Him 12:12,25; 13:13; 15:37-39; Kul 4:10; Pilim 24. * **5:13** Sumale diye te Libru ne "Impakita", kema ke iyan igpasabut kayi ka Ruma.

bilunya* ne in-alam te Manama, wey si Markus degma ne in-isip ku ne anak ku.
¹⁴ Pegpangemusteeey kew ka tagse sabeka te pegpapitew ne migpaheyinaweeey kew.[†]

Ka Manama ka egbehey te keupianan kaniyu langun te nasabeke e due ki Kristu.

[†] 5:14 Te Grigu: peggarek ne due peggeyinawa.

Ka Igkarangeb ne Sulat ni Pidru

Igpewun-a

Ka ikarangeb ne sulat ni Pidru, igpeendiye din te migmalintuu diye te nalein-lein ne lungsud te Asya Minur (1 Pidru 1:1, 2 Pidru 3:1). Ka tuyu din te migsulat kayi, iyan sika se pagsupak te himu te seeye se migpanulu te kene ne malehet, wey pagsupak te malindit ne eggimuwen te me etew ne naangey ran puun te sika ne pegpanulu. Purisu imbanasalan din sikandan ne kene egpalintutuu te sika ne pegpanulu su iyan de egpalintutuuwen ka pegpanulu meiyitenged ki Kristu. Keilangan degma ne due igtimul ran te egpalintutuu ran: meupiya ne pegbebasan, katuenan, egtigkel te pegkeetew, kene egkapelaan ne egtetahad, egtuman te Manama, wey eggeyinawa te duma.

Migpanulu ka seeye ne me etew te kene kun e eglibed si Kristu tenged su nalugluhayan e, ware kun de due miglibed sikandin. Piru intabak sika ni Pidru te eglibed ded iya si Kristu, piru kene egkeupian ka Manama ne egkaparusaan ka minsan hentew, su ka igkeupii rin ne eg-inniyug ka me etew te sale dan.

Ka nasulat te seini ne baseen

Igpewun-a 1:1-2
Ka peg-umew te me Kris-tuwanen 1:3-21
Ka me talagpanulu te kene ne malehet 2:1-22
Ka peglibed ni Hisu Kristu 3:1-18

¹ Sikeddiey si Simun Pidru ka migpeuyan te seini ne sulat. Uripen a wey apustulis a ni Hisu Kristu.

Egpangemusta key kaniyu te nabehayan te tetelesi ne pegpalintutuu ne nekeiling te kanami ne pegpalintutuu pinaahi te pegkamatareng ni Hisu Kristu ne Manama ta wey Manluluwas.

² Ka keyid-u wey keupinan tenged te peg-ila niyu te Manama wey ki Hisus ne Magbebaye ta, egkaangken niyu te subla-subla.

Ka peg-umew wey peg-alam te Manama kanta

³ Pinaahi te geem ne due te kandin tenged te pegka-Manama rin, imbehayan ki nikandin te langun ne keilangan ta eyew ka pegugpe ta, egpakapahale te Manama. Egkarawat ta ka sika langun pinaahi te peg-ila ta kandin, ne iyan mig-alam kanta pinaahi te kabantug din wey keupiya rin. ⁴ Ne pinaahi rue, imbehayan ki nikandin te amana ne impurtanti wey tetelesi ne me saad, eyew pinaahi te sika ne me saad, egpakapariyu kew te karereetan kayi te kalibutan puun te mareet ne igkeupii te etew, eyew egpakalagkes kew egpaka-heram te pegka-Manama

rin.⁵ Ne tenged due, pakannekali niyu ne egpakatimul te pegpalintutuu niyu ka meupiya ne pegbebasan ne egdumaan te kaalam.⁶ Ne kene de ne due kaalam, ke kene, egdumaan degma te pegtigkel te pegkeetew rin. Ne ka pegtigkel te pegkeetew rin, egdumaan degma te pegpaheed-geed ne pegtetahad. Ka pegtetahad, egdumaan degma te pegparuma-ruma te Manama.⁷ Ne kene de man-e ne egparuma-ruma te Manama, ke kene, egdumaan degma te peggeyinawa te suled ta te pegpalintutuu. Ne ka peggeyinawa te suled ta, egdumaan degma te peggeyinawa te langun ne etew.⁸ Su emun ke egkana-nasian pad ne egtulin ka seeye se meupiya ne pegbebasan due te kaniyu, egbebehas kew wey egkapulusan kew tenged te peg-ila niyu te Magbebaye ta ne si Hisu Kristu.⁹ Piru ka minsan hentew ne ware diye te kandin ka sika ne pegbebasan, hendue sikandin te butud wey kene egpakameleg-meleg wey nalingawan din e ne nalinisan e sikandin te tapey ne me sale din.

¹⁰ Purisu me suled ku, pakannekali niyu iya ne egkapamalehetan niyu ne in-umew kew wey in-alam kew te Manama. Su emun ke eggimuwen niyu sika, kene kew egkasaligkat.¹¹ Ne

amana egkahale ka Manama ne egpaseled kaniyu diye te ware katamanan ne Migharian te Magbebaye ta wey Manluluwas ne si Hisu Kristu.

¹² Su minsan nakataha kew e te iling due wey egdesdese-nan niyud e te eggen-gen ka kamalehetan ne impanulu kaniyu, egpabulus a ka layun egpasuman-suman kaniyu meyitenged due.¹³ Te keddi ne suman-suman, eleg iya ne egpukawen ku sikaniyu te pegpasuman-suman meyitenged due taheed te neuyag* e pad.¹⁴ Su nakataha a ne mahaan ad e egpatey† sumale te impanengneng keddiey te Magbebaye ta ne si Hisu Kristu.¹⁵ Ne egpakanekal a ne eyew minsan ke egpatey‡ ad e, egkasuman-suman niyu pad ka impanulu ku kaniyu.

¹⁶ Ka me guhuren ne impanengneng ney kaniyu meyitenged te geem wey te pegginguma te Magbebaye ta ne si Hisu Kristu, kene ne diye egpuun te hinimu-himu re ne guhuren te me etew ne matagseb. Nakita ney iya ka kabantug din¹⁷ te timpu ne impabantug sikandin wey impakita te Manama ne Amey ka katelesan din. Migkahi ka laheng ne diye egpuun te Manama ne Maresen, “Seini ka pinalangge ku ne Anak; amana a nahale kandin.”¹⁸ Nakarineg key te

* **1:13** Te Grigu: te seini e pad te balungbalung. † **1:14** Te Grigu: eg-engked te seini ne balungbalung ku. ‡ **1:15** Te Grigu: egliahwang. **1:17** Mat 17:1-5; Mar 9:2-7; Luk 9:28-35.

sika ne laheng puun te langit su sikanami ka duma mismu ni Hisus diye te matulus ne bubungan.

¹⁹ Seeye ka egpuunan ne neehet ka pegpalintutuu ney te impanagne te me prupita. Purisu keilangan ne egtantanuran niyu iya sika, su ka inlalag dan egpekeiling te sulu ne miglayag diye te durusilemi. Tantanuri niyu sika taman te aldew ne eggunguma si Kristus ne egpeila te Amey rin diye te kaniyu. ²⁰ Labew te langun, keilangan ne egkanengnengan niyu seini, ne ware natagne diye te Kasulatan ne egkaluwas pinaahi re te suman-suman te etew. ²¹ Su ware natagne ne puun de te pegbuut te etew, ke kene, ka Panisingan te Manama ka epanulu ke nekey ka igpalalag ne egpuun te Manama.

2

Ka me talagpanulu te kene ne malehet

¹ Piru dengan, due degma me prupita te kene ne malehet ne diye te keetetawan te Manama. Ne iling naan ded degma, due me talagpanulu te kene ne malehet ne eggunguma due te kaniyu. Egheles-heles de sikandan epanulu te me ubat ne egpakarereet

§ 1:19 Te Grigu: taman te egkaliwaswas e wey egsile e diye te pusung niyu ka Buntetale ne iyan sika se bituen te kaseleman. ^{*} **2:2** Te Grigu: dalam te kamalehetan. [†] **2:4** Te Grigu: Tartarus. **2:5** Hin 6:1-7:24. **2:6** Hin 19:24.

2:7 Hin 19:1-16.

te pegpalintutuu, wey miginniyuhan dan e ka Magbebaye ta ne iyan miglekat kandan. Purisu, sauhune ne egparusaan sikandan te Manama. ² Ne masalig ka eg-ikul te mekeyilew-hilew ne hinimuwan dan. Ne tenged kandan, eglemetan e te me etew ka malehet ne pegpanulu.* ³ Ne puun te halamlamen dan, eglupihan kew nikandan pinaahi te hinimu-himu re ne me lalag. Piru naluhey re hukumi sikandan te Manama, wey mahaan e sikandan eglegpari.

⁴ Su minsan ka me panalihan dengan ne nakasale, imparusaan te Manama. Indegpak sikandan diye te diralem wey imprisu rin sikandan diye te durusilemi ne inged† ne parusaanan te makasesale taman te aldew te peggukum. ⁵ Ware degma ikeyid-u te Manama ka me etew ne ware migikul kandin te impasipukan din te weyig ka tapey ne kalibutan. Piru si Nuwi, ka talagpangguhud te pegkamatareng, inluwas mule te Manama duma te pamilya rin ne pitu ne buuk. ⁶ Ingukuman degma te Manama ka siyudad ne Suduma wey Gumura pinaahi te pegasilab, ne iyan naan de nahaat ka igmuk dan. Innimu rin seeye ne panunggilingan ke nekey

ka egkeyitabu te seeye se kene eg-ikul te Manama.⁷ Piru inluwas din si Lut, ka matareng ne etew ne amana nalaggew te mekeyilew-hilew ne hinimuwan te talagsupak te balaud.⁸ Te timpu ne miglemung pad kandan ka matareng ne etew ne si Lut, amana sikandin nalaggew tenged te aldew-aldew ne egkarineg din wey egkakita rin ne maddeet ne hinimuwan dan.⁹ Purisu egkateu ka Manama ke egmenuwen din te pegluwas puun te me peg-eleg-eleg ka seeye se mig-ikul kandin, wey ke egmenuwen te pegparusa taman te Aldew te Peggukum ka seeye se eggimu te mareet.¹⁰ Ne labi en iya ne egparusaan din seeye se mig-ikul te malindit ne igkeupii te lawa ran ne makasesale wey migsamsamili te katenged te Manama.

Ka sika ne me etew, me mabbulut wey me ham-buhuen, kene egkaaldek ne egbaley-baley te seeye se maddesen diye te langit.¹¹ Piru minsan ka me panalihan ne subla pad ne manekal wey maresen du te seeye se me talagpanulu te kene ne malehet, ware ma nekewukum kandan diye te tangkaan te Magbebaya pinaahi te pegbaley-baley ran kandan.¹² Ka sika ne me etew, imbaley-baley ran ka langun ne ware dan nasabut. Egpekeiling sikandan te mabbulut ne me mahin-

talunan ne egpangawang de due eggimu ne kene egsumsumanen pa. Neetew sikandan ne egdakepen de wey egdereetan de. Ne iling naan ded degma due ka karereetan ne egkeyingu-maan dan.¹³ Egpasakitan degma sikandan tenged te pegpasakit dan te duma. Amana egkahale-gale sikandan ne egpahawa-hawa te ealdawi ne eggimu te mareet ne igkeupii te lawa ran. Eg-pakamansa sikandan kaniyu wey egpakapeyilew. Amana sikandan egkahale ne egpan-limbung kaniyu taheed te egpakiglagpu egkeen duma kaniyu.¹⁴ Amana sikandan egkabagbagingi te minsan hentew ne malitan, ne kene egkapelaan sikandan ne eggimu te sale. Neuyan dan seeye se ware pad nakareralid ka pegpalintuu ne eyew egpakashale, wey amana sikandan ne halamlamen. Igdirus e sikandan te Manama!¹⁵ Migengkeran dan e ka matul-id ne dalan wey nakasuwey e sikandan tenged su mig-ikul e sikandan te mareet ne hinimuwan ni Balaam ne anak ni Biur. Si Balaam, amana miggeyinawa te seleppi, purisu mig-uyun sikandin ne egbayaran te peggimu te mareet.¹⁶ Piru tenged te mareet ne hinimuwan din, insaparan sikandin te Manama pinaahi te asnu ne impalalag te Manama ne iling te etew, wey migbalaba-

han te keungelan perem ne eggimuwen din isip prupita.

¹⁷ Ka sika se me talagpanulu te kene ne malehet, egpekeiling te me sebseb ne neetiyan wey te me gapun ne miglayap te makeseg ne kalamag. Purisu intahahaan e sikandan te Manama te inged ne durusilemi ne egpeugpaan kandan. ¹⁸ Ka me lalag dan, henduen ubag te maddalem piru ware bes meupiya te inlalag dan. Migpanulu sikandan ne kene kun ne mareet ka peg-ikul ke nekey ka igkeupii te lawa ne makasesale, wey sika iya ka iggulu dan te seeye se iyam pad migsuwney te me duma rin ne mareet se me batasan.

¹⁹ Migsaarān sikandan te me talagpanulu te kene ne malehet, ne egbehayan te kaligwangan taheed te sikandan mismu neuripen pad te mareet ne batasan ne egpakarereet kandan—su ka etew, uripen te minsan nekey ne egpakatalu kandin. ²⁰ Emun ke due me etew ne nakapariyu e te kalindit kayi te kalibutan pinaahi te peg-ila ran te Magbebaye ta wey Manluluwas ta ne si Hisu Kristu, piru egpabakus ded man-e due wey egpeuyan, subla pad ne mareet ka egkeula-ula ran te mewuri ne timpu du te timpu ne ware pad sikandan nekeila ki Kristu.

²¹ Meupiya pad perem ke ware sikandan nakataha te dalan te pegkamatareng,

du te nakataha piru miginniyug te matulus ne suhu ne impanulu kandan. ²² Natuman e diye te kandan ka lalahen ne miggendue, “Ka asu egkeen te ileb din,” wey “Ka babuy ne narihus e, eglumbuk ded man-e te basak.”

3

Ka peglibed ni Hisu Kristu

¹ Miggeyinawaan ku ne me suled, seini ka ikarangeb ne sulat ku kaniyu. Te daruwa ne sulat ku, due iga suman-suman ku kaniyu isip pegpukew te meupiya wey malinis ne suman-suman niyu.

² Igkeupii ku ne egkasuman-suman niyu pad ka innangen te matulus ne me prupita dengan wey ka insuhu te Magbebaye wey Manluluwas pinaahi te me apustulis niyu. ³ Hun-a te langun, keilangan ne egkasabut niyu seini: te katammanan ne timpu, egmanlepew ka me lemeten ne me etew wey egtumanen dan ka mareet ne igkeupii ran. Egngisiyan kew nikandan ⁴ te egkahi,

“Meddag naa se migsaad si Hisus ne eglibed, hendeid naa sikandin? Nenammatey e ka me kaap-apuan ta, piru ware kaleinan te keugpe te kalibutan puun pad te peggimu kayi!” ⁵ Migtuyuan dan te egingew ne ka Manama ka miggimu dengan te langit pinaahi te lalag din, wey innimu rin ka kalibutan

pinaahi te weyig wey puun te weyig.⁶ Ne sikan ded ne weyig ka impasipuk din wey ka imparereet din te tapey ne kalibutan.⁷ Ne pinaahi red te sika ne lalag te Manama, ka langit wey ka tane ne egkakita ta kuntee, igtahahe din eyew egsilaban te aldew te peggukum wey peggukum te me etew ne kene eg-ikul te Manama.

⁸ Piru me pinalangge ku ne me suled, kene niyu kalingawi seini: diye te Magbebeye, ka sengekaaldew, hendue te senge libu ne legun, ne ka senge libu ne legun, hendue te sabeka re degma ne aldew.⁹ Kene eglamu-lamu ka Magbebeye ne egtuman te saad din, iling te insuman-suman te duma. Ka malehet due, ware sikandin napeleyi ne egtetahad kaniyu, su iyan din igkeupii ne eg-inniyug ka langun te sale dan wey ware minsan sabeka ne egkareetan.

¹⁰ Piru ka aldew te peglibed te Magbebeye, epekeiling te tigkew ne pegginguma te takawen. Te sika ne aldew, egkaawe ka langit ne egdumaan te marahing ne lehes. Ne ka aldew, bulan, wey me bituen, egkalleney te hapuy, wey ka langun ne tahu te kalibutan, egkasilaban.*¹¹ Na, puun su egkareetan ka langun te iling due ne paahi, keilangan

ne egmatulusen niyu ka pegugpe niyu wey mapahetpeta niyu ka peg-ikul niyu te Manama¹² taheed te egtetahad kew wey egpakannekal kew ne egmahaan ka aldew te peglibed te Manama. Te sika ne aldew, egkanlabkanlab ka langit wey egkaawe, wey egkengalleney te keinit ka langun.¹³ Piru sikanta mule, egtetahad ki te iyam ne langit wey iyam ne tane ne insaad te Manama. Sika ka ugpaan te matareng ne me etew.

¹⁴ Purisu me pinalangge ku ne me suled, puun su egiman-iman kew due, keilangan ne egpakannekal kew ne due keupianan niyu diye te kandin, ware igkarewey kaniyu, wey egmalinis kew.¹⁵ Sumsumana niyu ne malayat ka pegtetahad te Magbebeye eyew egkaluwas ka me etew. Insulatan kew e degma meytenged kayi te pinalangge ta ne suled ne si Pablu, ne inggamit din ka kaalam ne imbehey te Manama kandin.¹⁶ Ne iling ded kayi ka ingguhud din diye te langun ne sulat din. Ka malehet, duen iya diye te sinulat din ne malised ne egsabuten. Ne seeye se me etew ne ware me katuenan, wey seeye se ware pad nakareralid se pegpalintutuu, egleinen dan te egsabut, iling te innimu ran ded diye te duma ne Kasulatan. Ne puun due, egdereetan sikandan.

3:8 Sal 90:4. **3:10** Mat 24:43; Luk 12:39; 1Tis 5:2; Imp 16:15. * **3:10** Diye te duma ne sinulat, egkakita; diye man-e te duma, egkaawe. **3:13** Isa 65:17; 66:22; Imp 21:1.

17 Purisu pinalangge ku ne
me suled, puun su tapey kew
e nakanengneng due, keilan-
gan ne egbananey kew eyew
kene kew egkeuyan te seyyup
te me etew ne eg-apul te bal-
aud, wey eyew kene kew eg-
paka-suwey te mapahetpet ne
impalintutuuwan niyu. 18 Su
keilangan iya ne egkapab-
ulusan niyu egkaheram ka
keyid-u te Magbebaye ta wey
egtulin pad ka peg-ila niyu
te Manluluwas ta ne si Hisu
Kristu. Ka kabantug, kandin
de iya, puun kuntee wey te
ware egtamanan. Malehet
iya!

Ka An-anayan ne Sulat ni Huwan

Igpewun-a

Due daruwa ne katuyuan te seini se *An-anayan ne sulat ni Huwan*: 1) ka pegbagget te me talagbasa te pegnengneng Meyitenged te Manama wey te Anak din ne si Hisu Kristu; wey 2) ka pegpaney-paney kandan te keilangan ne kene eg-ikul te kene ne malehet ne pegpanulu ne epakadereet de te pegasabeka ran diye te Magbebaye. Migkahi seeye se kene ne malehet ne talagpanulu, te si Hisus kun ne Anak te Manama kene egkey-itabu ne etew sikandin ne iling kanta. Migpanulu man-e sikandan ne ka kaluwasan, ware kun kalabetan te pegugpe ne matareng wey te peggeyinawa te duma.

Na, te pagsupak te sika ne pegpanulu, mig-ayad-ayad migpangguhud si Huwan, ne si Hisu Kristu malehet iya ne etew, wey amana rin man-e ipasabut ne ka langun ne migpalintutuu ki Hisus wey ka miggeyinawa te Manama, keilangan ne epaheyinaweeey degma ka tagse sabeka.

Ka nasulat te seini ne baseen

Igpewun-a 1:1-4

Ka marusilem wey ka malayag 1:5-2:29

Ka me anak te Manama
wey ka me anak ni
Meibulan 3:1-24
Ka kamalehetan wey ka
seyyup 4:1-6
Ka geyinawa 4:7-21
Ka pegpalintutuu ki Hisu
Kristu 5:1-21

Ka lalag ne migbehey te umul

¹ Duen e sikandin dengan te an-anayan, ne narineg ney e kuntee wey nakita ney e mismu wey nahen-genan ney pad iya, sikandin ka egnaranan te Lalag ne egbehey te umul. ² Ne hengkayi te nekeuma kayi te kanta ka sika ne umul, nakita ney en iya sika, wey migpamalehet key kayi wey migpangguhud key kaniyu Meyitenged te umul ne ware egtamanan. Ne duma sika te Amey, ne kuntee migpakite e kanami. ³ Igpangguhud ney degma kaniyu ke nekey ka nakita ney wey ke nekey ka narineg ney, eyew egpekegduma kew duma kanami diye te Amey wey te Anak din ne si Hisu Kristu. ⁴ Ne insulat ney seini eyew egkahale-gale ki.

Ka Manama ka kalayag

⁵ Seini ka guhuren ne narineg ney puun ki Hisu Kristu ne igpangguhud ney kaniyu, ne ka Manama ka kalayag wey ware marusilem diye te kandin. ⁶ Emun ke egkahi ki te nekegduma kid e diye te Manama, piru marusilem ded ka peg-ugpe ta, nekeuubat kid e tenged su ware ki

mig-ugpe sumale te kamalehetan. ⁷ Piru ke malayag ka peg-ugpe ta iling te Manama ne diye te malayag, nasabeka kid naa, ne ka langesa ni Hisus ne Anak din ka eglinis kanta te langun ne me sale ta.

⁸ Ke egkahi ki te ware sale ta, mig-akalan tad ka isip ta wey ware kayi te kanta ka kamalehetan. ⁹ Piru ke igpangguhud ta ka me sale ta diye te Manama, epasayluwen ki nikandin wey eglinsan ki nikandin te langun ne neyimu ta ne mareet su matinumanen sikandin wey matareng. ¹⁰ Ke egkahi ki te ware ki nakasale, innimu ta ne ubaten ka Manama, wey ware kayi te kanta ka lalag din.

2

Si Kristu ka tigpataliware ta

¹ Me pinalangge ku ne me anak, insulatan ku sikaniyu kayi eyew kene kew epakasale. Piru ke duen ma epakasale, due matareng ne tigpataliware kanta diye te Amey, ne sikandin si Hisus Kristu. ² Sikandin mismu ka impanubad para te me sale ta eyew egkapasaylu ki, wey kene ne ka kanta re ne me sale, ke kene, ka me sale degma te langun ne etew kayi te kalibutan.

³ Egpakamemalehet ki ne nekeila ki kandin, ke egtumanen ta ka me suhu din. ⁴ Ke due egkahi te nekeila sikandin te Manama piru kene egtuman te me

suhu din, ubaten sikandin wey ware diye te kandin ka kamalehetan. ⁵ Piru seeye se migtuman te lalag te Manama, malehet ne miggeyinawa kandin. Ne puun due epakataha kid ne duen kid e te Manama. ⁶ Ka minsan hentew ne egkahi te duen e sikandin te Manama, keilangan ne egugpe sikandin iling te pegugpe ni Hisu Kristu.

Ka iyam ne suhu

⁷ Miggeyinawaan ku ne me suled, kene ne iyam ne suhu seini se insulat ku kaniyu tenged su puun te pegpalintutuu niyu ki Hisus, narineg niyud e ka suhu ne migkahi te keilangan ne epaheyinaweeey ka tagse sabeka. ⁸ Piru mig-abey a man-e migsusulat kaniyu te iyam ne suhu. Ne ka seini ne suhu, intuman e ni Hisus wey sikaniyu degma tenged su egkaawe e ka marusilem wey eglayag e ka malehet ne layag.

⁹ Ka minsan hentew ne egangken te duen e sikandin te malayag piru egdumut te suled din, diye pad sikandin te marusilem. ¹⁰ Ka minsan hentew ne miggeyinawa te suled din, duen e sikandin te malayag ne ware minsan nekey diye te kandin ne egpuunan ne epakasale ka duma. ¹¹ Piru ka egdumut te suled din, duen pad te marusilem wey marusilem pad ka peg-ugpe din. Ne ware nakanengneng sikandin ke

hendei rin egpabulus tenged su migbuturan sikandin te marusilem.

¹² Me pinangge ku ne me anak, migsusulat a kaniyu su impasaylu e ka me sale niyu tenged ki Hisus. ¹³ Ne sikaniyu se me amey, migsusulat a kaniyu su nekeila kew kandin, ka tapey e ne due puun pad te bunsuranan. Migsusulat a degma kaniyu te me lukes-lukes, su natalu niyud e si Meibulan. ¹⁴ Migsusulat a kaniyu te me anak, tenged su nekeila kew ma te Amey. Migsusulat a kaniyu te me amey, tenged su nekeila kew kandin, ka tapey e ne due puun pad te bunsuranan. Migsusulat a kaniyu te me lukes-lukes, tenged su manekal e, wey duen e te kaniyu ka lalag te Manama, wey natalu niyud e si Meibulan.

¹⁵ Kene niyu geyinawei ka mareet kayi te kalibutan wey ka minsan nekey ne kayi te ampew te tane. Emun ke eggeyinawaan niyu sika, ware geyinawa niyu diye te Amey. ¹⁶ Su ka langun ne mareet kayi te kalibutan, iling te pegkeibeg te kene ne me-upiya, pegkeimma ke nekey ka egkakita ta, wey ka peg-paambug te me kasangkapan ta, kene ne diye egpuun te Amey su kayi te kalibutan. ¹⁷ Egkaawe ka kalibutan wey ka langun ne mareet ne igkeupii te me etew, piru

ka egtuman te igkeupii te Manama egkeuyag te ware egtamanan.

Ka me kunttere ni Kristu

¹⁸ Me anak, seinid e ka katammanan ne timpu. Ne sumale te narineg niyu, eggungume e ka egkuntere ki Kristu, ne minsan kuntee masulug e ka nangingga ne egkuntere kandin. Ne puun due, egpakataha kid e ne seinid e ka katammanan ne timpu. ¹⁹ Ka sika ne me etew nangawe kayi te kanta, piru kene ne malehet ne duma ta sikandan te pegpalintutuu. Su emun ke malehet pa perem ne me duma ta sikandan, ware ki engkeri nikandan, piru ka peg-awe dan ka migpakita ne ware sabeka kandan ne duma ta iya te pegpalintutuu.

²⁰ Piru sikaniyu mule, duen e te kaniyu ka Panisingan ne imbehey ni Kristu wey nakanengneng kew e langun te kamalehetan. ²¹ Insulatan ku sikaniyu ne kene ne puun su ware kew nakanengneng te kamalehetan, ke kene, puun su nakanengneng kew e kayi, wey nakanengneng kew e degma te ware ubat ne diye egpuun te kamalehetan.

²² Na, hentew ma ka ubaten? Seeye iya se eg-apul ne si Hisus ka Kristu.* Ne ka sika ne etew ka egkuntere ki Kristu—mig-apul meiyitenged te Amey wey te Anak. ²³ Ka langun ne kene eg-angken te Anak, ware degma diye

* 2:22 Ka igpasabut te Kristu, Insaad ne Manluluwas.

te kandin ka Amey. Ka egangken te Anak, diye degma te kandin ka Amey.

²⁴ Gen-geni niyu ka narindeg niyu ne puun pad te bunsuranan. Emun ke eggengenan niyu seini, duen kew naan e te Anak wey te Amey. ²⁵ Ne seini ka insaad ni Hisus kanta: ka umul ne ware egta-manan.

²⁶ Insulatan ku sikaniyu meyitenged te seeye se egakal perem kaniyu. ²⁷ Ne sikaniyu mule, mig-ugpe e due te kaniyu ka Panisingan ne narawat niyu puun ki Hisus wey kenad e ne keilangan ne egpanulu kew pad te minsan hentew. Su ka Panisingan din e ka egpanulu kaniyu te langun, ne malehet ka igpanulu din, kene ne ubat. Purisu pabulus kew ugpe diye te kandin sumale te impanulu din kaniyu.

²⁸ Sikan naa me anak, pabulus kew ugpe diye te kandin su eyew te timpu te pegpakita rin, ware kaaldek ta wey ware keyilew ta kandin te aldew te peglibed din. ²⁹ Ke nakanengneng kew ne matareng sikandin, egkannengnengan niyu degma ne ka tagse sabeka ne miggimu te matareng, anak din iya.

3

Me anak te Manama

¹ Sumsumana niyu kamenu karakel ka geyinawa te Amey kayi te kanta su in-isip ki nikandin ne me anak din wey malehet iya

seini! Purisu ware nekeila kanta ka me etew kayi te ampew te tane su ware ma nekeila sikandan ki Hisus. ² Miggeyinawaan ku ne mesuled, me anak kid e kuntee te Manama, piru kene te pad egkanengnengan ke nekeye e ka egkeyingumaan ta te neyimu ne anak te Manama. Iyan te re nanengnengan ne emun ke eggingume e sikandin, egpekeiling kid e kandin, su egkakita tad ke mamenu sikandin. ³ Ka langun ne egpallateng te iling kayi diye te ki Kristu, egbanter ne malinis ka pegkeetew ran iling ki Hisus te malinis.

⁴ Ka minsan hentew ne nakasale, nakasupak e te Balaud te Manama, su ka langun ne sale supak iya te Balaud din. ⁵ Nakanengneng kew e ne iyan innendini ni Kristu ka peg-awe te me sale ta, ne ware sale diye te kandin. ⁶ Ware etew ne duen e te kandin ne egpabulus eggimu te sale. Ka egpabulus ne eggimu te sale, ware pad nakanengneng wey ke nekeila kandin.

⁷ Pinalangge ne me anak, kene kew paakal te minsan hentew. Ka eggimu te matareng, matareng iya sikandin, iling ki Kristu te matareng. ⁸ Ka egpabulus eggimu te sale, sakup te ahalen te me busew, tenged su puun pad te bunsuranan, nekeyimu e te sale ka ahalen te me busew. Ne iyan innendini te Anak te Manama ka

pegdereet te himu rin.

⁹ Ware anak te Manama ne egpabulus eggimu te sale, uya su nakapanines e due te kandin ka pegbebasan te Manama. Kene egpekeyimu sikandin te sale, tenged su neyimu e sikandin ne anak te Manama. ¹⁰ Seini ka paahi ne egkeila ta ke hentew ka me anak te Manama wey ka me anak ni Meibulan: ka etew ne ware miggimu te matareng wey ke ware miggeyinawa te suled din, kene ne anak te Manama.

Paheyinaweeey kew

¹¹ Su nakarineg kew e te sika ne pegpanulu puun pad te bunsuranan ne egpahayinaweeey ka tagse sabeka.

¹² Keilangan ne kene ki egpekeiling ki Kain te sakup ni Meibulan ne miggimatey te hari rin. Ne mania te innimatayan din? Uya, su si Kain mareet ka eggimuwen din, ne matareng mule ka eggimuwen te hari rin.

¹³ Ne kene kew egkeinuin me suled, ke egdumutan kew te me etew kayi te kalibutan. ¹⁴ Nakataha kid ne nakabaye kid e puun te kamatayen peendiye te umul ne ware egtamanan, uya su miggeyinawaan ta ka suled ta te pegpalintutuu. Ka etew ne kene eggeyinawa te duma, duen naan pad te kamatayen. ¹⁵ Ka minsan hentew ne egdumut te suled din, mangngimatey, wey nakanengneng kew e ne

ware mangngimatey ne nakarawat te umul ne ware egtamanan. ¹⁶ Migpeyimatey si Kristu para kanta, ne pinaahi kayi, egkanengneng gan ta ka geyinawa ne malehet. Purisu eleg degma ne igbehey ta ka umul ta para te me suled ta te pegpalintutuu! ¹⁷ Na, ke due minsan hentew ne meupiya se peg-ugpe, wey nakakita te suled din ne neyirapan piru ware din bulihi, egmenuwen din te egkahi ne due geyinawa rin te Manama? ¹⁸ Pinalangge ne me anak, keilangan ne ka geyinawa ta te duma, kene ne lalag de ne egpuun te bebe ta, ke kene, igapitew ta ka malehet ne geyinawa pinaahi te himu ta.

¹⁹ Su emun ke eggimuwen ta ka iling due, egpakanengneng ki ne duen kid e te kamaleshetan, wey egkaayun e ne eg-atubang ki te Manama te ware pegkaaldek. ²⁰ Su minsan ke eggukuman kid e te me suman-suman ta, piru labew pad ka Manama te suman-suman ta wey nakanengneng sikandin te langun. ²¹ Miggeyinawaan ku ne me suled, ke ware ki hukumi te suman-suman ta, ware kaaldek ta te pegparani te Manama. ²² Ne minsan nekey ka egbuyuen ta diye te kandin, egkarawat ta, uya su egtumanen ta ka me suhu din wey iyan ta eggimuwen ka epakapahale kandin.

²³ Iyan seini ka suhu din: keilangan ne egpalintutuu

ki wey egsalig te Anak din ne si Hisu Kristu wey egpaheyinaweeey ka tagse sabeka, sumale te insuhu ni Kristu kanta. ²⁴ Ka langun ne migtuman te me suhu din, duen e te kandin, ne sikandin mig-ugpe e due te kandan. Egkatahaan ta ne mig-ugpe e sikandin kayi te kanta pinaahi te Panisingan ne imbehey rin kanta.

4

Ka malehet wey ka kene ne malehet ne panisingan

¹ Miggeyinawaan ku ne me suled, kene niyu palintutuwi ka minsan hentew ne egangken ne miglalag sikandin sumale te Panisingan te Manama, ke kene, el-elehi niyu ka me panisingan ke diye naa sikandan egpuun te Manama su masulug ka kene ne malehet ne me prupita ne nanginguma te kalibutan. ² Ne iyan seini ka paahi ne egkeilaan niyu ka Panisingan te Manama: ka minsan hentew ne eangken ne migpekeetew si Hisu Kristu, due Panisingan te Manama diye te kandin. ³ Ne ka minsan hentew ne kene eg-angken ki Hisus, kene naa ne diye egpuun te Manama ka panisingan ne diye te kandin. Panisingan sika te egkuntere ki Kristu ne narineg niyud ne eggingsuma, wey minsan kuntee, kayid e sikandin te kalibutan.

⁴ Pinalangge ne me anak, sakup kew e te Manama, wey natalu niyud e ka me prupita

ne kene ne malehet su ka Panisingan ne due te kaniyu, subla pad ne maresen du te si Meibulan ne iyan migmandu te me etew kayi te kalibutan. ⁵ Ne sikandan mule, kayi re nasakup te kalibutan, purisu iyan de degma igpangguhud nikandan ka natuenan dan kayi te kalibutan, wey egpammineg degma kandan ka me etew kayi te ampew te tane. ⁶ Piru sikanta mule, me anak kid e te Manama. Ne seeye se nekeila te Manama, egpammineg te igpanulu ta, ne seeye se kene ne sakup te Manama kene egpammineg kanta. Ne puun due, egpekeila ki ke nasakup naa te Panisingan te Manama ka duma wey ke diye naa te kene ne malehet ne panisingan.

Geyinawa ka Manama

⁷ Miggeyinawaan ku ne me suled, keilangan ne egpaheyinaweeey ki ka tagse sabeka, su ka geyinawa, diye egpuun te Manama. Ka minsan hentew ne eggeyinawa te duma rin, anak te Manama wey nekeila te Manama. ⁸ Ka minsan hentew ne kene eggeyinawa te duma rin, ware nekeila te Manama, uya su ka Manama, geyinawa ma. ⁹ Impakita te Manama ka geyinawa rin kanta pinaahi te pegpeuyan din te sabsabeka ne Anak din kayi te ampew te tane, su eyew pinaahi kandin egpakaangken ki te umul ne ware egtamanan. ¹⁰ Ka malehet ne geyinawa, kene ne sika se peggeyinawa ta

te Manama, ke kene, sika se peggeyinawa rin kanta wey ka pegpeuyan din te Anak din eyew pinaahi te impanubad din, egkapasaylu ka me sale ta.

¹¹ Miggeyinawaan ku ne me suled, puun su amana ki geyinawei te Manama, keilangan degma ne egpaheyinaweeey ki ka tagse sabeka. ¹² Ware de due etew ne nakakita te Manama. Piru ke egpaheyinaweeey ki ka tagse sabeka, eg-ugpe e ka Manama kayi te kanta wey egkeehet e ka geyinawa rin kayi te kanta.

¹³ Tenged su imbehayan ki nikandin te Panisingan din, egkatahaan ta ne duen kid e te kandin wey kayid e degma mig-ugpe sikandin te kanta. ¹⁴ Nakita ney wey impamahet ney diye te duma ne impeuyan te Amey ka Anak din eyew te pegluwas te me etew kayi te ampew te tane. ¹⁵ Ka minsan hentew ne egangken ne Anak te Manama si Hisus, mig-ugpe e due te kandin ka Manama wey duen e sikandin te Manama. ¹⁶ Purisu nakanengneng ki wey migpalintutuu ki ne miggeyinawaan ki te Manama.

Geyinawa ka Manama, ne ka minsan hentew ne eggengen te sika ne geyinawa, duen e sikandin te Manama, ne ka Manama mig-ugpe e due te kandin. ¹⁷ Ne pinaahi kayi, neehet ka geyinawa te Manama kayi te kanta su

eyew kene kid e egkaaldek te aldew te peggukum din, su ka peg-ugpe ta kayi te kalibutan egpekeiling te peg-ugpe ni Kristu. ¹⁸ Ka iling due ne geyinawa ware likes ne igkaaldek, uya su ka malehet ne geyinawa egpakapaawe te kaaldek. Su seeye se egkaaldek egpalintutuu ne eglegparan sikandin te Manama wey ware pad neehet ka geyinawa diye te kandin.

¹⁹ Miggeyinawaan ta ka Manama, uya su sikandin ka an-anayan ne miggeyinawa kanta. ²⁰ Ke due egkahi, "Miggeyinawaan ku ka Manama," piru egdumut pad te suled din, ubaten sikandin. Su ka minsan hentew ne kene eggeyinawa te suled din ne egkiteen din, kene egkaayun ne eggeyinawa te Manama ne ware din nakita. ²¹ Ne seini ka suhu ne imbehey rin kanta: ka etew ne miggeyinawa te Manama keilangan ne eggeyinawa degma te suled din.

5

Egkatalu ta ka kalibutan

¹ Ka minsan hentew ne migpalintutuu ne si Hisus ka Kristu, anak sikandin te Manama. Ne ka minsan hentew ne miggeyinawa te amey, miggeyinawa degma te anak din. ² Seini ka egkanengneng ta ne miggeyinawaan ta ka me anak te Manama: ke eggeyinawaan ta ka Manama wey egtumanen ta ka me suhu din. ³ Su ka pegtuman

ta te me suhu te Manama ka palinneu ne miggeyinawaan ta sikandin, ne ka me suhu din kene amana ne mabehat.⁴ Su ka minsan hentew ne anak te Manama, egkatalu rin e ka kalibutan. Egkatalu ka kalibutan pinaahi te pegpalintutuu ta.⁵ Na, hentew ma ka egpakatalu te kalibutan? Seeye de iya se me etew ne migpalintutuu ne Anak te Manama si Hisus.

*Ka pegpamalehet meyitenged
ki Hisu Kristu*

⁶ Si Hisu Kristu ka miggendini te ampew te tane ne migpabewutismu te weyig wey migpatihis te langesa rin. Su kene de ne iyan keilangan ka weyig, ke kene, ka langesa degma. Ne iyan egpakkapamalehet ka Panisingan, su ka Panisingan ka kamalehetan.⁷ Ne due tatelu ne egpamalehet meyitenged ki Hisu Kristu:⁸ ka Panisingan te Manama, ka weyig, wey ka langesa. Ne seini se tatelu nenekeg-uyun.⁹ Tenged te migpalintutuu ki te impamalehet te me etew, subla pad ne egpalintutuwani ta ka impamalehet te Manama, su sikandin iya ka migpamalehet ne Anak din si Hisus.¹⁰ Ka minsan hentew ne migpalintutuu te Anak te Manama, egpakamemalehet e sikandin diye te geyinawa rin ne malehet iya seini. Piru ka ware migpalintutuu te pegpamalehet te Manama, innimu rin ka Manama ne ubaten, uya su ware

sikandin migpalintutuu te pegpamalahet te Manama meyitenged te Anak din.¹¹ Ne iyan seini ka pegpamalehet, migbehayan ki te Manama te umul ne ware egtamanan, ne seini se umul diye migpuun te Anak din.¹² Ka minsan hentew ne migdawat te Anak, duen e umul ne ware egtamanan. Piru ka ware migdawat te Anak te Manama, ware iya umul.

Ka umul ne ware egtamanan

¹³ Insulat ku seini kaniyu te migpalintutuu wey migsalig te Anak te Manama, su eyew egpakataha kew te due umul niyu ne ware egtamanan.¹⁴ Ne egpaka-sahe-sahe ki ne egparani te Manama su nakanengneng ki ne egpaminehen din ka minsan nekey ne egbuyuen ta ne kene ne supak te pegbuut din.¹⁵ Ne tenged su nakataha ki ne egpammineg sikandin ke nekey ka egbuyuen ta kandin, egpakataha ki degma ne egkarawat ta ka imbuyu ta kandin.

¹⁶ Emun ke due egkakita niyu ne suled niyu ne nekey-imu te sale ne egkapasaylu te Manama, keilangan ne igampu niyu sikandin wey egbehayan sikandin te Manama te umul. Ne iyan de egbehayan seeye se nekeyimu te sale ne egkapasaylu. Piru due iya sale ne kene egkapasaylu, wey kene ne keilangan ne igampu niyu pad ka

miggimu te iling due ne sale.
¹⁷ Ka langun ne himu ne ma-reet, sale. Piru due sale ne egkapasaylu.

¹⁸ Nakanengneng ki ne ware anak te Manama ne epabulus eggimu te sale, su migtantanuran sikandan te Anak te Manama, ne si Meibulan kene egpekeyil-abet kandan.

¹⁹ Ka seini se intiru ne kalibutan, in-uyan ni Meibulan, piru nakanengneng ki mule ne anak kid e te Manama.

²⁰ Ne nakataha kid e degma ne miggendini te ampew te tane ka Anak te Manama wey imbehayan ki nikandin te pegrabut eyew egkeila ta ka malehet ne Manama. Ne kuntee, duen kid e te malehet ne Manama tenged su duen kid ma te Anak din ne si Hisu Kristu. Sikandin ka malehet ne Manama wey ka umul ne ware egtamanan.

²¹ Pinalangge ne me anak, pariyu kew te langun ne kene ne malehet ne manama!

Ka Igkarangeb ne Sulat ni Huwan

Igpewun-a

Seini ka igkarangeb ne sulat ni Apustul Huwan ne sabeka te me hibateen ni Hisus. Impeendiye din ka seini ne sulat te malitan ne in-alam te Manama wey diye degma te me anak din. Ne kema ke punduk buwa te migmalintutuu ka igpasabut din kayi. Seini se malepet ne sulat, mighangyu te keilangan ne eg-ikul te kamalehetan wey egpahey-inaweeey ka tagse sabeka, wey migpaney-paney degma seini meyitenged te me etew ne migpanulu ne ware kun migpekeetew si Hisu Kristu.

Ka nasulat te seini ne baseen

Pegpangemusta 1-3

Ka kamalehetan wey ka geyinawa 4-6

Pegpaney-paney meyitenged te kene ne malehet ne pegpanulu 7-11

Ka katammanan 12-13

¹ Sikeddiey si Huwan ka ighbuyag te migmalintutuu ka migpeuyan te seini ne sulat. Egpangemusta a te malitan* ne in-alam te Manama wey diye degma te me anak din. Miggeyinawaan ku sikaniyu langun due te kamalehetan, ne kene ne sikeddiey re, ke kene, ka langun degma ne

nakataha te kamalehetan, ² tenged su kayid e te pusung ta ka kamalehetan wey kenad e egkaawe te minsan ken-u.

³ Ka keupiya, keyid-u, wey keupianan ne egpuun te Manama ne Amey wey te Anak din ne si Hisu Kristu, egkaangken niyu. Igbehey sika te Manama te seeye se egdawat te kamalehetan wey te geyinawa.

Ka kamalehetan wey ka geyinawa

⁴ Amana a nahale te pegkanengnengi ku ne due me anak nu ne mig-ikul te kamalehetan, sumale te insuhu kanta te Amey. ⁵ Ne kuntee, ehangyuen ku sikeykew atebey, ne paheyinaweeey ki ka tagse sabeka. Kene ne iyam sika ne suhu, ke kene, tapey e sika puun pad te bunsuranan. ⁶ Egkakita ka geyinawa ne egkahiyen ku pinaahi te pegtuman ta te me suhu din. Tapey niyud e ne narineg ka sika ne suhu puun pad te bunsuranan, ne keilangan ne egbatasanen niyu ka peggeyinawa.

⁷ Masulug ka nanginguma kayi te kalibutan ne egakal te me etew. Kene egpalintutuu sikandan ne migpekeetew si Hisu Kristu. Ka me etew ne iling due, talag-akal wey kuntere ni Kristu! ⁸ Bantey kew ne kene egkalaag ka ingkalasey ta su eyew kene egkasalinan ka dasag ne egkarawat niyu.

* **1:1** Iyan buwa igpasabut te “malitan” ka sabeka ne punduk te migmalintutuu.

1:5 Huw 13:34; 15:12,17.

⁹ Ka minsan hentew ne ware mig-ikul te impanulu ni Kristu piru nasi migtimul kayi, ware diye te kandin ka Manama. Piru ka minsan hentew ne mig-ikul te impanulu ni Kristu, due te kandin ka Amey wey ka Anak degma. ¹⁰ Ke due eggendue te kaniyu ne kene epanulu te impanulu ni Kristu, kene niyu sikandin palasura diye te baley niyu, wey kene niyu banasali. ¹¹ Su seeye se egbanasal kandin, epakaruma te mareet ne himu rin.

Pegpanaha-taha

¹² Masulug pad perem ka iglaglag ku kaniyu, piru kena a egkeupian ne igsulat ku pad seini. Igkeupii ku ne egpakanumbaley e pad kaniyu wey egpakiglag iya kaniyu su eyew amana ki egkahale.

¹³ Egpangemusta degma keykew ka me anak te suled nu[†] ne in-alam degma te Manama.

[†] **1:13** Iyan buwa igpasabut te “anak te suled nu ne malitan” ka me sakup te lein ne punduk te migmalintutuu.

Ka Igkatelu ne Sulat ni Huwan

Igpewun-a

Seini ka igkatelu ne sulat ni Apustul Huwan ne sabeka te me hibateen ni Hisus. Ig-peendiye din seini te sabeka ne alukuy rin ne migpalintuu ne migngaranan ki Gayu. Indayan ni Huwan si Gayu tenged te pegtanggu rin te duma ne migmalintuu ne miggiphinanew ka egpangguhud te lalag te Manama. Migpanpanayan din degma si Gayu meyitenged te sabeka ne etew ne egngaranan ki Diyutripis ne mareet se batasan.

Ka nasulat te seini ne baseen

Pegpangemusta 1-4

Indayan si Gayu 5-8

Indew-ey si Diyutripis 9-10

Impeggasal ran si Dimitriyu 11-12

Ka katammanan 13-15

¹ Sikeddiey si Huwan ka ighbuyag te migmalintuu ka migpeuyan te seini ne sulat. Egpangemusta a keykew Gayu ne miggeyinawaan ku ne suled due te kamalehetan.

² Miggeyinawaan ku ne suled, mig-ampu a ne meupiya ka peg-ugpe nu wey ka pglelawa nu iling keupiya te gimukud nu. ³ Due nanginguma kayi ne me suled ta, ne amana a nahale

te napangguhuran a nikandan meyitenged te pegtuman nu te kamalehetan, wey ke immenu nu te peg-ugpe due te kamalehetan. ⁴ Iyan de amana egpakapahale keddiey ke egpakanineg a ne migtuman te kamalehetan ka me anak ku te pegpalintutuu.

Ka pegdayan ki Gayu

⁵ Miggeyinawaan ku ne suled, egkasalihan ka su intanggu nu ka me suled ta minsan ware ka nekeila kandan. ⁶ Migpangguhud sikandan kayi te tangkaan te migmalintuu meyitenged te peggeyinawa nu kandan. Ne emun ke eglived sikandan due, meupiya perem ke egpakapahale te Manama ka pegbulig nu kandan pinaahi te pegbehey nu te keilangan dan te pegligkat dan. ⁷ Sunangipanew sikandan eyew te pegpanulu meyitenged ki Kristu wey ware sikandan migdawat te minsan nekey ne diye egpuun te me etew ne ware migpalintuu te Manama. ⁸ Purisu, keilangan ne egbulihan ta ka iling due ne me etew, su eyew egkeyimu ki ne talagduma te himu meyitenged te kamalehetan.

Si Diyutripis wey si Dimitriyu

⁹ Migpeuyanan kud te sulat ka migmalintuu due, piru tenged su kene egkeupian si Diyutripis ne egkalepengan, imbalahad key nikandin. ¹⁰ Purisu ke eggenduen a,

igpangguhud ku ke nekey ka innimu rin ne pegsesalupet wey peg-iran-iran kanami. Ne kene ne sikan de, kene din man-e egsagsahipeen ka me suled ta, egbalabahan din pad man-e wey egdeldelen diye te punduk te migmalintuu seeye se egkeupian ne egsagsahipe kandan.

¹¹ Miggeyinawaan ku ne suled, kene nu ilingi ka maret, ke kene, sikan de se meupiya. Ka minsan hentew ne eggimu te meupiya, kandin te Manama. Ka minsan hentew ne eggimu te maret, ware nekeila te Manama.

¹² Narayan si Dimitriyu te langun wey egkakita diye te himu rin ne mig-ikul sikandin te kamalehetan. Minsan degma sikanami, nakarayan kandin wey nakataha ka degma ne malehet iya ka impangguhud ney.

Ka pegpanaha-taha

¹³ Masulug pad perem ka iglalag ku keykew, piru kena a egkeupian ne igsulat ku pad seini. ¹⁴ Egkeupian a perem ne egpekegkita ki pad te mahaan, wey egpekeglalag pad.

¹⁵ Ka Manama ka egbehey keykew te keupianan. Migpangemusta keykew ka me alukuy nu kayi, wey ipangemuste e re degma te langun ne me alukuy ta due.

Ka Sulat ni Hudas

Igpewun-a

Ka seini ne sulat, insulat ni Hudas ne hari ni Santiyagu. (Piru kene ne sikandin ka Hudas ne mig-akal ki Hisus.) Ne igpeendiye din naa seini se sulat te me Kristuwanen ne ware ta nanengnengi ke hendei nangugpe. Kayi te sulat, impanpanayan din ka me Kristuwanen meyitenged te seeye se me talagpanulu te kene ne malehet ne egmapitew-pitew re. Migpanulu sikandan ne egkaayun kun ded ne epgabulus eggimu te sale ka migmalintutuu su egpasayluwen kun ded sikandan te hiimenawen ne Manama. Sika ka egpuunan ne insulat seini ni Hudas su eyew egpakabantey ka me Kristuwanen te sika ne me etew, wey eyew egpakaayadayad e sikandan eg-ikul te malehet ne pegpanulu ne egpuun te Manama. Imbahet din degma ka me talagbasa te keilangan ne egpakanekal epgabulus te pegpalintutuu ran te Manama duma te peginniyug te mareet ne me himu.

Ka nasulat te seini ne baseen

Igpewun-a 1-2

Ka himu wey legpad te me talagpanulu te kene ne malehet 3-16

Ka me pegpaney-paney wey pegpanulu 17-23

Ka peg-ampu te pgsaye te Manama 24-25

¹ Sikeddiey si Hudas ka migpeuyan te seini ne sulat. Uripen a ni Hisu Kristu wey hari a ni Santiyagu.

Egpangemusta a te seeye se in-alam te Manama ne Amey, ne miggeyinawaan wey intanggu rin taman te peglibed ni Hisu Kristu.

² Ka Manama ka egbehey kaniyu te timul pad ne keyid-u, keupianan wey geyinawa.

Ka himu wey legpad te me talagpanulu te kene ne malehet

³ Pinalangge ku ne me suled, minsan amana ad iya egkabagget ne egsulat kaniyu meyitenged te kaluwasan ne insaamulan ta, piru neisip ku ne keilangan ne iyan ku igsulat ka pegbanasal kaniyu te keilangan ne pakannekali niyu te eggen-gen ka kamalehetan ne kasabeka re iya ibehey te Manama diye te keet-etawan din.

⁴ Iyan egpuunan ne inlalag ku sika, tenged su due me etew ne miggeles-heles de migpasewug-sewug kaniyu. Ka sika ne me etew, tapey e nasulat ka meyitenged te peglegpad kandan. Kene sikandan eg-ikul te Manama wey impasuwey ran ka pegpanulu meyitenged te keupiya wey keyid-u te Manama ta su egkaayun kun ded ne eggimu ki te mareet wey malindit ne igkeupii te lawa ta. Te iling due ne

paahi, mig-inniyuhan dan ka sabsabeka ne Ahalen ta wey Magbebaye ne si Hisu Kristu.

5 Minsan ke nakaneng-neng kew e te langun ne iglagal ku, egkeupian e pad iya man-e ne igpasuman-suman kaniyu ka pegluwas te Magbebaye te keet-etawan te Israil puun te Ihiptu. Ne nataman, inggule din e seeye se ware migpalintutuu. **6** Kema, sumsumana niyu ka me panalihan ne nanleke te katungdanan dan wey nasi nangawe diye te ugpaan dan. Imbaku sikandan te Manama te keddina ne kene egkabigtus* wey imprisu diye te durusilemi ne bitu eyew igtahahe te dakel ne aldew te peggukum. **7** Kene niyu degma kalingawi ka siyudad te Suduma wey Gumura wey ka nakalingut ne me lungsud dutu. Me agkayen ka me etew diye wey me bantut, sikan naa ka insilaban sikandan te hapuy ne kene egkeebukan, isip paney-paney te langun ne etew ne eglegparan iya ka makasesale.

8 Iling naan ded ka me etew ne migsewug kaniyu, due me taheinep dan ne iyan egpuunan ne miglinditan nikandan ka me lawa ran tenged te pegparuma-ruma ran dutu, wey mig-anganggaan dan ka katenged te Manama wey imbaley-baley ran ka maddesen diye

te langit. **9** Piru minsan si Mikail, ka pangulu te me panalihan te Manama, ware ma miggimu te iling due te pegpakig-ehet din te ahalen te me busew. Ware sikandin nakabayung te ahalen te me busew pinaahi te peglalag din te mareet te nekegapul sikandan meyitenged te minatey, ka lawa ni Muwisis. Su migkahi re si Mikail, "Egsaparan ka te Manama!" **10** Piru imbaley-baley mule te seini ne me etew ka langun ne ware dan nasabut. Egpekeiling sikandan te me mahintalunan ne egpangawang de due eggimu ne kene egsuman-suman pa, sikan naa ka egsahap iya sikandan. **11** Mekeyid-u-hid-u sikandan! Su migiling sikandan te mareet ne innimu ni Kain, wey mig-ilingan dan si Balaam ne naalamlam te seleppi, sikan naa ka nekeyimu e te mareet. Ne egkahule sikandan tenged te pegrakul ran te Manama iling ki Kura. **12** Ka sika ne me etew, egpakkamalindit kaniyu ke egpakiaglagpu ne egeen kaniyu te pegrakul ran te Iglabung te Magbebaye. Egpakkamalindit sikandan tenged su iyan dan de egsum-sumanen ka pegkeetew ran wey ware keyilew ran. Egpekeiling sikandan te me gapun ne ware mig-uyan te uran, ne inniyup te kalamag.

* **1:5** Iks 12:51; Num 14:29-30. * **1:6** Te Grigu: ware egtamanan. **1:7** Hin 19:1-24. **1:9** Dan 10:13,21; 12:1; Imp 12:7; Diy 34:6; Sak 3:2. **1:11** Hin 4:3-8; 1Huw 3:12. **1:11** Num 22:24; 31:16; 2Pid 2:15-16. **1:11** Num 16:1-35.

Ne iling man-e sikandan te kayu ne ware migbebehas minsan te tigpamehas e, ne impamarut sikandan wey nahangu-hangu en iya.¹³ Iling sikandan te makeseg ne bunlud te dahat ne egkakita ka mekeyilew-hilew ne himu ran iling te buke. Iling man-e sikandan te nakatulimpas ne me bituen peendiye te inged ne durusilemi ne intahahe te Manama ne egpeugpaan kandan te ware egtamanan.

¹⁴ Ne si Inuk, ka igkeen-em ne kabuhalan ni Adan, ka migtagne meiyitenged kandan. Migkahi si Inuk, "Pammineg kew! Eggendini ka Magbebeye duma te pila ne luyuran[†] te matulus ne panalihan din¹⁵ eyew te peggukum te langun. Egpataheen din ka langun ne kene eg-ikul kandin ne makasesale sikandan tenged te langun ne dereeti ne hinimuwan dan, wey tenged te mangune-kune ne pglemet dan kandin.¹⁶ Ka sika ne me etew, me sagsahukulen, wey ware igkabennali. Intuman dan ka mareet ne igkeupii ran, wey migpabekal te me pakpak dan.[‡] Egguluan dan ka duma eyew eggimuwen ne teytay te mareet ne igkeupii ran.

*Ka me pegpaney-paney
wey pegpanulu*

¹⁷ Piru me pinalangge ku ne me suled, keilangan

ne egsumsumanen niyu ka intagne te me apustulis te Magbebeye ta ne si Hisu Kristu.¹⁸ Migkahiyan kew nikandan, "Te katammanan ne timpu, due me etew ne me lemeten, wey egtumanan dan ka mareet ne igkeupii ran ne igkeepes te Manama."¹⁹ Sikandan ka nakapabaad-baad kaniyu. Iyan dan imparapit ka igkeupii te lawa ran wey ware diye te kandan ka Panisingan te Manama.²⁰ Piru sikaniyu pinalangge ku ne me suled, keilangan ne ipatulin§ niyu ka pegpalintutuu niyu te Manama, wey ampu kew sumale te igpanulu te Panisingan te Manama.²¹ Palunggehaat kew due te geyinawa te Manama taheed te egtetahad kew te keyid-u te Magbebeye ta ne si Hisu Kristu ne egbehey te umul ne ware egtamanan.

²² Ne ikeyid-u niyu seeye se migduwa-ruwa te pegpalintutuu ran,²³ wey luwasa niyu ka duma pinaahi te pegsaluk-agmit kandan puun te hapuy. Ikeyid-u niyu degma ka duma ne makasesale, piru bantey kew wey pakaddiyu kew minsan te me kumbale dan ne nabiluwan te mad-deet ne igkeupii ran.

*Ka peg-ampu te pegsaye te
Manama*

²⁴ Na, egdayanen ka Manama ne egpekeyimu ne egbantey kaniyu eyew

^{1:14} Hin 5:18,21-24. [†] 1:14 Te Grigu: linibu. [‡] 1:16 Te Grigu: napenu te hambug ka me be-be dan. 1:18 2Pid 3:3. § 1:20 Te Grigu: ipes-ek niyu ka pegkeetew niyu.

kene kew egkasaligkat te sale. Sikandin keureme ka eg-uyan kaniyu ne ware igkarew-ey wey egkahale-gale diye te tetelesi ne tangkaan din.²⁵ Egsayeen ka migsabsabeka ne Manama ne Manluluwas ta pinaahi ki Hisu Kristu ne Magbebaye ta. Ka katelesan, ka dakel ne kabantug, ka karesen, wey ka katenged, kandin de iya puun pad dengan wey te ware egtamanan. Malehet iya.

Ka Impakita ni Hisu Kristu ki Huwan

Igpewun-a

Ka Impakita ni Hisu Kristu ki Huwan meyitenged te egkeyitabu keureme. Nasulat seini dengan te timpu ne imbabaybaran ka migmalintutuu tenged te pegpalintutuu ran te Magbebaye ne si Hisu Kristu. Iyan dakel ne tuyu ni Huwan te pegrusulat kayi ka pegbehey te egkapalateng diye te migmalintutuu wey pegbagget kandan eyew egpakapabulus ne egpalintutuu minsan egbabaybaran sikandan.

Iyan kinarakelan ne baad te nasulat kayi ne baseen ka impakita ni Hisu Kristu ki Huwan ne me palinneu ne amana ne kein-inuwan. Ne seeye se langun ne palinneu, due iya kaluwasan wey igpasabut. Te seeye ne timpu, nasabut buwa te me Kristuwanen piru kuntee, due duma ne me palinneu ne amana ne malised ne egkasabut, wey nalein-lein ka me suman-suman te me etew te pegluwas kayi. Piru minsan pad iling due, due degma me palinneu ne malemu re ne egkasabut iling te sungey ne iyan igpasabut se geem wey katenged, wey ka kampilan ne iyan igpasabut se samuk. Inlibed-libed te kamasulug wey te nalein-lein ne paahi ka me

uluwan te seini ne baseen pinaahi te me palinneu. Piru malemu re ne egkasabut ka amana ne impurtanti ne nasulat kayi: egdereetan iya te Manama ka langun ne kuntere din pinaahi ki Kristu Hisus, wey egdasahan din degma ka keet-etawan din ne migpabulus migpamakey, wey egpakalemung sikandan kandin te ware egtamanan. Ne due egpakapahale kanta diye te katammanan ne kapitulu, seini meyitenged te iyam ne langit wey tane ne eggimuwen te Manama wey meyitenged te iyam ne Hirusalim ne egtuntunen puun te langit.

Ka nasulat te seini ne baseen

Igpewun-a 1:1-8

Ka an-anayan ne impakita ki Huwan ne hendue te taheinep 1:9-20

Ka me sulat ne igpeendiye te pitu ne punduk te migmalintutuu 2:1-3:22

Ka linulun ne baseen ne due pitu ne piket 4:1-8:1

Ka pitu ne trumpita 8:2-11:19

Ka salimbaweng wey ka daruwa ne makaliyas-liyas ne mananap 12:1-13:18

Ka nalein-lein ne impakita ki Huwan ne hendue te taheinep 14:1-15:8

Ka pitu ne yahung ne langet te Manama 16:1-21

Ka pegkahuhus te Babilunya, wey ka pegkatalu te langun ne kuntere te Manama

17:1-20:10
 Ka katammanan ne pegukum 20:11-15
 Ka iyam ne langit wey tane, wey ka iyam ne Hirusalim 21:1-22:5
 Ka katammanan 22:6-21

¹ Seini ne baseen, meyitenged te impakita ni Hisu Kristu ne mahaan e egkeyitabu. Impanengneng te Manama seini diye te kandin eyew igpakapaneng-neng diye te me etew ne migpamakey kandin. Ne impanengneng din e degma seini diye te suluhuanen din ne si Huwan pinaahi te pgsuhu te panalihan din. ² Ne impanggahud ni Huwan ka langun ne nakita rin. Impamalehetan din ka lalag te Manama wey ka impanengneng ni Hisu Kristu diye te kandin. ³ Keupianan te seeye se egbasa diye te kasuluhan meyitenged te impanagne kayi, wey ka egpammineg wey egtuman te nasulat kayi su mahaan e egkatuman ka langun.

Ka pegpangemusta diye te pitu ne punduk te migmalintutuu

⁴ Sikeddiey si Huwan ka migsulat kayi wey ig-peendiye ku te pitu ne

punduk te migmalintutuu diye te prubinsya te Asya.*

Ka keyid-u wey keupianan ne egpuun te Manama, wey te pitu ne panisingan[†] ne diye te tangkaan te trunu rin, egkaangken niyu. Sikandin ka Manama kuntee, ka Manama dengan, wey ka Manama keureme. ⁵ Egkaangken niyu man-e ka keyid-u wey keupianan ne egpuun ki Hisu Kristu, ka matinumanen ne talagpamalehet, ka ananayan ne neuyag, wey ka egmandu te me pangulu te kalibutan.

Miggeyinawaan ki nikandin wey inlekat ki puun te me sale ta pinaahi te langesa rin te migpatey, ⁶ wey innimu ki nikandin ne migharian din, wey talagpanubad te Manama ne Amey rin. Sikan naa, egdayanen sikandin wey eghari te ware egtamanan. Malehet iya.

⁷ Pammineg kew! Eggedini si Kristu duma te me gapun wey egkiteen sikandin te langun ne etew minsan seeye se miglansang kandin. Egmandalawit ka langun ne tribu kayi te ampew te tane tenged kandin. Malehet iya.

⁸ Ka Amana ne Maresen ne Magbebabe ne Manama, ne iyan ka Manama kuntee, ka Manama dengan, wey ka

^{1:4} Iks 3:14; Imp 4:5. * ^{1:4} Te seeye ne timpu, ka seini ne prubinsya te Asya nasakup te Ruma wey diye egkakita te inged ne egngaranan e kuntee te Turki. [†] **1:4** Innalin seini te duma isip pitu ne panisingan wey ke Panisingan ne pitu se klasi ka geem. **1:5** Isa 55:4; Sal 89:27. **1:6** Iks 19:6; Imp 5:10. **1:7** Dan 7:13; Mat 24:30; Mar 13:26; Luk 21:27; 1Tis 4:17; Sak 12:10; Huw 19:34,37; Sak 12:10; Mat 24:30. **1:8** Imp 22:13; Iks 3:14. [‡] **1:8** Ka Alpa iyan ka an-anayan ne litra te Grigu ne alpabitu, ka Umiga iyan degma ka katammanan ne litra.

Manama keureme, migkahi, "Sikeddiey ka Alpa wey ka Umiga.‡"

Migpakita si Hisus ki Huwan

⁹ Sikeddiey si Huwan ne suled niyu te pegpalintutuu. Tenged te nasabeka kid e due ki Hisus, duma ad nikaniyu te peg-antus te keyirapan wey te pegpabulus due ki Hisus, wey duma ad degma nikaniyu te peghari te Manama. Indeldel a peendiye te pulu te Patmus tenged te pegwali ku te lalag te Manama wey te pegpamalehet ku meyitenged ki Hisus. ¹⁰ Te Duminggu ne Aldew te Magbebaye, in-umaan ad te Panisingan te Manama, ne dutu due narineg ku ne laheng diye te egkeinniyuhan ku ne egpekeiling keemen te trumpita. ¹¹ Miggendue seini, "Isulat nu diye te linulun ne baseen ke nekey ka egkakita nu wey ipeuyan nu diye te pitu ne punduk te migmalintutuu: diye te Ipusu, Ismirna, Pиргаму, Тиатира, Сардис, Пиладилпиya wey diye te Lawdisya."

¹² Te sikan de, migbalikid ad ka egpitew ke hentew ka miglalag keddiey, wey pitu ne bulawan ne tahuuanan te sulu ka nakita ku. ¹³ Ne due migsasindeg diye te taliware kayi ne hendue te etew ne migkukumbale te malayat wey imbeleberan te libed ne bulawan ka kumeng

din. ¹⁴ Ne ka bulbul rin egpekeiling kaangkag te gapas, wey ka mata rin egpekeiling te legleg te hapuy.

¹⁵ Ne ka paa rin egpekeiling te inlalab ne burunsi ne migsilak, wey ka laheng din egpekeiling te lehes te dakel ne sampew. ¹⁶ Ne miggen-gen ka kawanan ne belad din te pitu ne bituen, wey due miglihawang ne mahalang ne sundang diye te be-be din. Ne ka ulaula rin egpekeiling te aldew ne miglayag te mangune-kune. ¹⁷ Te pegkakita ku kandin, napeled a diye te tangkaan din ne hendue te migpatey e. Ne intel-eban a nikandin te kawanan ne belad din ne migkahi, "Kene ka egkaaldek! Sikeddiey ka bunsuranan wey ka katamanan, ¹⁸ wey ka due umul; namatey a piru tengtengi nu, neuyag ad wey kena ad egpatey te ware egtamanan. Sikeddiey ka impiyalan te kamatayen wey due yabi ku te Hadis ne iyan ka inged te me gimukud. ¹⁹ Purisu isulat nu ke nekey ka nakita nu ne egkeyitabu kuntee wey ka egkeyitabu keureme. ²⁰ Seini ka heles ne kaluwasan te pitu ne bituen ne nakita nu kayi te kawanan ne belad ku wey te pitu ne bulawan ne tahuuanan te sulu: ka igpasabut te pitu ne bituen iyan ka me panalihan ne migbantey te pitu ne punduk te migmalintutuu, ne iyan ka

pitu ne sulu."

2

Ka sulat peendiye te migmalintutuu diye te Ipisu

¹ Ne migkahi sikandin, "Isulat nu seini peendiye te panalihan ne diye te punduk te migmalintutuu te Ipisu:

"Seini ka lalag te seeye se miggen-gen ka kawanan ne belad din te pitu ne bituen wey miggiphipanew dutu te taliware te pitu ne bulawan ne tahuuan te sulu. ² Nakanengneng a te hinimuwan niyu, te pegpannekal niyu te peggimu wey te peg-antus niyu. Kene kew egparuyun-duyun te maddeet ne me etew su egel-elehan niyu ka egkahi ne me apustulis kun sikandan, wey iyan egtamanan ka egkannengnengniyu ne egmanguubat de sikandan. ³ Miganthus kew wey migpannekal tenged keddiey wey ware miglunggengu te pegpamakey. ⁴ Piru iyan ku igkarew-ey kaniyu ne warade ka dakel ne geyinawa niyu dengan keddiey. ⁵ Sikan naa, sumsumana niyu kamenu karakel ka geyinawa niyu dengan, wey pekegsendit kew wey himuwa niyu ka innimu niyu dengan. Su emun ke kene kew egpekegsendit, egbayaan ku sikaniyu wey eg-aween ku ka sulu niyu

puun te natahuau kayi. ⁶ Piru due meupiya ne innimu niyu su igkeepes niyu ka egmangimuwen te me sakup ni Nikulas* ne ingkeepes ku degma.

⁷ "Purisu, ka egpakarineg, eg-ayad-ayad egsumansuman meyitenged te seini ne lalag te Panisingan te Manama[†] diye te me punduk te migmalintutuu!

"Ka egpanalu ki Meibulan, egbehayan ku te katenged te pegkeen te behas te kayu ne egpakabehey te umul ne diye te ugpaan te Manama.[‡]"

Ka sulat peendiye te migmalintutuu diye te Is-mirna

⁸ Migkahi e man-e sikandin, "Isulat nu seini peendiye te panalihan ne diye te punduk te migmalintutuu te Ismirna:

"Seini ka lalag te seeye se bunsuranan wey katamanan, ka namatey ne neuyaged. ⁹ Nakanengneng a ne egbabayaran kew wey egkaayu-ayu kew, piru ka malehet, meyaman kew. Nakanengneng a degma te imbebabayungan kew te me etew ne migkahi ne me Hudiyu kun sikandan, kunaleg te me sakup bes ni Meibulan. ¹⁰ Kene kew kaaldek te me kalasayan ne mahaan e eggingga. Eg-el-elehan kew te ahalen te me

* **2:6** Te Grigu: me Nikulayta. Sikandan ka punduk ne migpanulu ne egkaayun ka migmalintutuu ne eggimu te mallindit, wey eg-iling te batasanen te ware migmalintutuu. **2:7** Hin 2:9; Imp 22:2; Isi 28:13; 31:8 (LXX). † **2:7** Te Grigu: Ka due talinga, egpammineg te iglagag te Panisingan. ‡ **2:7** Te Grigu: pinamulaan te Manama. **2:8** Isa 44:6; 48:12; Imp 1:17; 22:13.

busew pinaahi te pegprisu te me duma niyu, wey eg-antus kew taman te sapulu ne aldew. Keilangan ne egmatinumanen kew ne eg-ikul keddi minsan egpatey kew, wey eg-unahan ku sikaniyu te umul ne ware egtamanan. §

11 “Purisu, ka egpakanineg, eg-ayad-ayad egsuman-suman meyitenged te seini ne lalag te Panisingan te Manama* diye te me punduk te migmalintuu!

“Ka egpanalu ki Meibulan, kenad egkalegparan te ikarangeb ne kamatayen.”

Ka sulat peendiye te migmalintuu diye te Pircamu

12 Ne migkahi e man-e sikandin, “Isulat nu seini peendiye te panalihan ne diye te punduk te migmalintuu te Pircamu:

“Seini ka lalag te seeye se mig-uyan te mahalang ne sundang. 13 Nakanengneng a ne duen kew mig-ugpe te inharian ni Meibulan, piru migmatinumanen kew red wey migpabulus migpalintuu keddi minsan te timpu ne miggimatayan e si Antipas due te kaniyu. Sikandin ka matinumanen ne talagpamalehet ku ne miggimatayan due te in-ugpaan ni Meibulan. 14 Piru due pila-pila

§ 2:10 Te Grigu: egbehayan ku sikaniyu te kuruna te umul. 2:11 Imp 20:14; 21:8.

* 2:11 Te Grigu: Ka due talinga, egpammineg te iglalag te Panisingan.

2:14 Num 22:5,7; 31:16; Diy 23:4; Num 25:1-3. 2:17 Iks 16:14-15; 16:33-34; Huw 6:48-50; Isa 62:2; 65:15. † 2:17 Te Grigu: Ka due talinga, egpammineg te iglalag te Panisingan.

ne igkarew-ey ku kaniyu: due duma niyu ne mig-ikul te pegpanulu ni Balaam ne iyan migpanulu ki Balak ke egmenuwen te pegasihlut ka me kabuhalan ni Israil eyew egpakashale sikandan pinaahi te pegkeen te impanubade diye te me diyus-diyus wey pegpeyilabetey ne kene ne alunggun. 15 Ne iling ded, due man-e duma niyu ne mig-ikul te pegpanulu te me sakup ni Nikulas. 16 Purisu inniyuhi niyu ka me sale niyu! Emun ke kene, egbayaan ku sikaniyu te mahaan wey egpakin-ehet a te me etew ne miggimu te mareet, pinaahi te sundang ne egliahwang te be-be ku.

17 “Purisu, ka egpakanineg, eg-ayad-ayad egsuman-suman meyitenged te seini ne lalag te Panisingan te Manama† diye te me punduk te migmalintuu!

“Ka egpanalu ki Meibulan, egbehayan ku te egkakeen ne mana ne inneles wey te maangkag ne batu ne nasa-sulatan te iyam ne ngaran ne ware minsan hentew ne nakanengneng kayi angin e te egpakarawat kayi.”

Ka sulat peendiye te migmalintuu diye te Tiyatira

18 Ne migpabulus sikandin migkahi, “Isulat nu seini peendiye te panalihan ne

diye te punduk te migmalintutuu te Tiyatira:

“Seini ka lalag te Anak te Manama, ne egpekeiling se mata te legleg te hapuy wey egpekeiling se paa te inlalab ne burunsi ne migsilak.¹⁹ Nakanengneng a te hinimuwan niyu wey te pegpapitew niyu te geyinawa wey te pegpalintutuu niyu. Nakanengneng a degma te pegpamakey niyu wey te peg-antus niyu, wey subla pad te an-anayan ka innimu niyu kuntee.²⁰ Piru iyan ku igkarew-ey kaniyu ka pegparuyun-duyun niyu te malitan ne si Hisabil ne migkahi ne prupita kun sikandin. Impanulu din wey inlimbungan ka keet-etawan ku eyew egpeyibhilabetey ne kene ne alunggun wey egkeen te impanubad e diye te me diyus-diyus.²¹ Imbehayan ku sikandin te timpu ne egpekeinniyug te me sale din, piru nasi din de iya paruyun-duyunni ka agkey rin.²² Sikan naa, egpareraluwen ku sikandin te masumpit wey eglegparan ku te mangune-kune seeye se nakalibug degma kandin angin e ke eg-inniyuhan dan ka maddeet ne hinimuwan dan duma kandin.²³ Egguleen ku te eggimatey ka me hibateen din eyew epakataha ka langun ne punduk te migmalintutuu ne sikeddiey ka egpakaneng-

neng te suman-suman wey ke nekey ka diye te pusung te etew. Ne eg-unahan ku ka tagse sabeka sumale te hinimuwan din.

²⁴ “Piru ka duma kaniyu due te Tiyatira, ware migpalintutuu te sika ne pegpanulu wey ware migparumarama te egnangenen ne maddalem kun ne katuenan ni Meibulan. Sikan naa, egnanganen ku sikaniyu te kene kud egtimulan ka igpeyimu ku kaniyu.²⁵ Ne heheta niyu man de iya ka pegpalintutuu niyu keddi taman te eglibed ad.²⁶ Ka egpanalu ki Meibulan wey egpabulus eggimu te igkeupii ku taman te katamanan, egbehayan ku te katenged te pegmandu te me nasud,²⁷ iling te katenged ne narawat ku puun te Amey ku. Ne egmandu sikandan te ware keyid-u[‡] wey egluften dan ka me nasud iling te kuren ne tane ne egkalupet.²⁸ Ne egbehayan ku degma sikandan te bituen ne Bunte-tale.

²⁹ “Purisu, ka egpakarineg, eg-ayad-ayad egsumansuman meyitenged te seini ne lalag te Panisingan te Manama[§] diye te me punduk te migmalintutuu!”

3

Ka sulat peendiye te migmalintutuu diye te Sardis

¹ Migkahi e man-e sikandin, “Isulat nu seini

2:20 1Har 16:31; 2Har 9:22,30. **2:23** Sal 7:9; Hir 17:10; Sal 62:12. **2:26** Sal 2:8-9 (LXX). [‡] **2:27** Te Grigu: egmandu pinaahi te baras ne putew. **§** **2:29** Te Grigu: Ka due talinga, egpammineg te iglagal te Panisingan.

peendiye te panalihan ne diye te punduk te migmalintutuu te Sardis:

“Seini ka lalag te seeye se due pitu ne panisingan te Manama, * wey miggen-gen man-e te pitu ne bituen. Nakanengneng a te himiuwan niyu, wey kahiyen te me etew ne neehet pad ka pegpalintutuu niyu, kunaleg te migpatey bes e. ² Sikan naa, himata kew wey heheta niyu ka pegpalintutuu niyu ne deisek naan de iya perem ne egkapatey e, su nakita ku ne kene pad ne eleg ka neyimu niyu diye te tangkaan te Manama. ³ Purisu, sumsumana niyu ka pegpanulu ne narawat niyu wey narineg. Tumana niyu sika wey inniyuhi niyu ka me sale niyu. Su emun ke kene kew eglinda-linga, eggenduen a te kaniyu iling te takawen, wey kene niyu egkatahaan ke nekey ne uras ne eggingga a due. ⁴ Piru duen pad pila-pila ne etew due te kaniyu te Sardis ne ware nabiluwi ka me kumbale dan. Egduma sikandan keddi ne migsaluub te maangkag ne kumbale tenged su likes sikandan kayi. ⁵ Ka egpanalu ki Meibulan, egpakumbalaan ku te maangkag wey kene ku eg-aween ka ngaran dan diye te Libru te Umul. Eg-

angkenen ku sikandan ne me keet-etawan ku diye te tangkaan te Amey ku wey diye te me panalihan din.

⁶ “Purisu, ka egpakindeg, eg-ayad-ayad egsumansuman meyitenged te seini ne lalag te Panisingan te Manama[†] diye te me punduk te migmalintutuu!”

Ka sulat peendiye te migmalintutuu diye te Piladilpiya

⁷ Migkahi e man-e sikandin, “Isulat nu seini peendiye te panalihan ne diye te punduk te migmalintutuu te Piladilpiya:

“Seini ka lalag te seeye se matulus wey malehet, ne miggen-gen te yabi ni Hari Dabid ne egpakabehey te katenged te pegmandu. Ne ware egpakalekeb te eglukatan din, wey ware egpakalukat te eglekeban din. ⁸ Nakanengneng a te himiuwan niyu wey inlukatan ku ka gumawan para kaniyu wey ware egpakalekeb kayi. Su deisek de ka geem niyu piru intuman niyu red ka lalag ku wey wara a nikaniyu ipahunware. ⁹ Pammineg kew! Ka me sakup ni Meibulan ne migkahi ne me Hudiyu kun sikandan, kunaleg te nanguubat bes, egpepanimbuelen ku diye te tangkaan niyu wey egkanengnengan dan ne miggeyinawaan ku

* **3:1** Innalin seini te duma isip pitu ne panisingan wey ke panisingan ne pitu se klasi ka geem. **3:3** Mat 24:43-44; Luk 12:39-40; Imp 16:15. **3:5** Iks 32:32-33; Sal 69:28; Imp 20:12; Mat 10:32; Luk 12:8. † **3:6** Te Grigu: Ka due talinga, egpamineg te iglalag te Panisingan. **3:7** Isa 22:22; Hub 12:14. **3:9** Isa 49:23; 60:14; Isa 43:4.

sikaniyu. ¹⁰ Ne puun su intuman niyu ka suhu ku ne eg-antus tenged keddi, epangabangan ku degma sikaniyu te me kalasayan ne eggingsuma te intiru ne kalibutan eyew te peg-eleg-eleg te langun ne mig-ugpe kayi te ampew te tane. ¹¹ Mahaan ad eggingsuma, purisu desdeseni niyu ka malehet ne peganulu ne miggen-genan niyud eyew ware epakaaahew te unag[‡] niyu. ¹² Ka epaganlu ki Meibulan, igsungkaleg ku te timplu te Manama ku, wey epakapalunggehaat din dutu te ware egtamanan. Egsulatan ku sikandin te ngaran te Manama wey te ngaran te siyudad din ne iyan ka iyam ne Hirusalim ne egkatuntun puun kandin ne diye te langit. Egsulatan ku degma sikandin te iyam ne ngaran ku.

¹³ “Purisu, ka epakarineg, eg-ayad-ayad egsumansuman meyitenged te seini ne lalag te Panisingan te Manama[§] diye te me punduk te migmalintutuu!”

Ka sulat peendiye te migmalintutuu diye te Lawdisya

¹⁴ Ne migkahi pad mane sikandin, “Isulat nu seini peendiye te panalihan ne diye te punduk te migmalintutuu diye te Lawdisya:

“Seini ka lalag te seeye se miggenalan ki Malehet, ka matinumanen wey malehet ne talagpamalehet. Sikandin ka migpuunan te langun ne innimu te Manama. ¹⁵ Nakanengneng a te hin imuwan niyu; kene kew ne maagsil wey kene kew degma ne meinit. Egkeupian a perem ne egkarahayun kew naan de ne maagsil wey ke meinit naa. ¹⁶ Sikan naa, igkulepa ku sikaniyu tenged su maheinaldew kew re; kene kew ne maagsil wey kene kew ne meinit. ¹⁷ Su migkahi kew, ‘Meyaman key wey matubung, wey warad epamitawen pad,’ piru ware kew nakataha ne mekeyid-u-hid-u wey mekeyimmimenew kew bes. Egkaayu-ayu wey butud kew, wey ware kukumbaleen. ¹⁸ Purisu, egtambahan ku sikaniyu ne egbebeli kayi te keddi te bulawan ne inel-elehan te hapuy eyew egkaratu kew. Bebeli kew degma te maangkag ne hinabel ne igsaluub niyu eyew kene kew egkeyilawan ka migpalawas. Ne bebeli kew man-e te delemetan eyew igaipulit niyu te mata niyu eyew epakakita kew e. ¹⁹ Ka langun ne miggeyinawaan ku, insaparan wey indisiplina ku. Purisu, pakannekal kew wey inniyug kew e te me sale niyu. ²⁰ Pammineg kew, migsasindeg a diye te

[‡] 3:11 Te Grigu: kuruna. 3:12 Imp 21:2; Isa 62:2; 65:15. § 3:13 Te Grigu: Ka due talinga, epammineg te iglalag te Panisingan. 3:14 Lal 8:22. 3:19 Lal 3:12; Hib 12:6.

gumawan wey migpanektek. Ke due egpakanineg keddi wey eglukatan a, egseled a wey eglagpu kandin te egkeen. ²¹ Ka egpanalu ki Meibulan, egpapinnuuwen ku duma keddi diye te trunu ku eyew te pegmandu, iling keddi te migpanalu degma wey migpinnuu duma te Amey ku diye te trunu rin.

²² “Purisu, ka egpakanineg, eg-ayad-ayad egsumansuman meiyitenged te seini ne lalag te Panisingan te Manama* diye te me punduk te migmalintutuu!”

4

Ka pegasimba diye te langit

¹ Pegkapenga dutu, duen e man-elein ne nakita ku. Due ingkita ku ne gumawan ne nalukatan diye te langit. Ne narineg kud man-e ka laheng ne narineg ku te an-anayan ne egpekeiling te trumpita ne migkahi, “Pamaneyik ka kayi su igpapitew ku keykew ka egkeyitabu keureme.”

² Due-rue in-umaan ad te Panisingan te Manama, wey te sikan de nakakita a te sabeka ne trunu diye te langit ne due migpinnuu.

³ Ne miglayag ka migpinnuu dutu iling te mahal ne batu ne haspi wey kurnalina, wey nalingutan ka trunu te baluntu ne egpekeiling ka batek te batu ne ismiralda.

⁴ Ne nalingutan ka trunu te daruwa ne pulu wey hep-at (24) ne trunu ne naminnuuwan te daruwa ne pulu wey hep-at (24) ne igbuyag ne nangukumbale te maangkag wey nangukuruna te bulawan. ⁵ Ne ligkat te trunu, miggeteb ka kilat wey due migderaheneg wey migdagsang ka luhung. Ne due pitu ne ganse ne egkalegleg diye te tangkaan te trunu ne iyan seeye se pitu ne panisingan te Manama.* ⁶ Ne diye te egkatangkaan te trunu, due egpekeiling te dahat ne bildu ne titing-awi iling te kristal.

Ne due nakalingut te trunu ne hep-at ne hinimuwan ne eggeheyinawa ne neempet te mata ka tangkaan wey peka. ⁷ Egpekeiling te liyun ka an-anayan ne hinimuwan, ne egpekeiling te nati te baka ka igkarangeb, ne egpekeiling te ulaula te etew ka ulaula te igkatatelu, ne egpekeiling te miglayang ne banug ka igkeep-at ne hinimuwan. ⁸ Tighen-em-hen-em te pakpak ka tagse sabeka wey neempet te me mata ka intiru ne lawa ran minsan ka diye te diralem te pakpak dan. Ne ware himeley ran te eg-ulahing te aldew wey marusilem ne eggendue:

“Matulus sikandin. Matulus iya.

* **3:22** Te Grigu: Ka due talinga, egpammineg te iglagag te Panisingan. **4:2** Isi 1:26-28; 10:1. **4:5** Iks 19:16; Imp 8:5; 11:19; 16:18; Isi 1:13; Imp 1:4; Sak 4:2.

* **4:5** Innalin seini te duma isip pitu ne panisingan wey ke panisingan ne pitu se klasi ka geem. **4:6** Isi 1:22. **4:6** Isi 1:5-10; 10:14. **4:8** Isi 1:18; 10:12; Isa 6:2-3.

Matulus ka Maresen ne Magbebabe ne Manama.

Sikandin ka Manama dengan, ka Manama kuntee, wey ka Manama keureme.”

⁹ Tagse egsaye, egtahud wey egpasalamat ka me hinimuwan ne eggeheyinawa te seeye se ware kapatayan ne migpinnuu te trunu, ¹⁰ eg-usengul degma ka daruwa ne pulu wey hep-at (24) ne me igbuyag diye te tangkaan te ware kapatayan ne migpinnuu te trunu wey egsimbeen dan sikandin. Ne igpanahu dan diye te tangkaan te trunu ka me kuruna ran wey egkahi,

¹¹ “Magbebabe wey Manama ney,

likes ka ne egdayanen tenged te kabantug nu wey geem.

Su sikeykew ka miggimu te langun,
wey tenged te keykew ne pegbuut, neyimu ran
wey neuyag.”

5

Ka linulun ne baseen wey ka Nati te Karniru

¹ Ne nakita ku seeye se migpinnuu te trunu ne due linulun ne baseen ne miggengenan din te kawanan ne belad din. Nekeglimang ka nasulatan dutu wey impiket te pitu ne piket. ² Ne due nakita ku ne maresen ne

panalihan ne migpanaman-taman migpanguleyi ne migkahi, “Hentew-a ka likes ne eglekat te me piket te egbaseen eyew egkabukalasan seini?” ³ Ne ware minsan hentew diye te langit wey diye te ampew te tane wey ke diye naa te diralem te tane ne epakabukalas wey ke epakabasa naa dutu. ⁴ Ne migpanaman-taman a migsinehew su ware sabeka ne nakita ne likes ne egbukelas te baseen wey ke egbasa naa dutu. ⁵ Piru due sabeka te me igbuyag ne migkahi keddiey, “Kene ka sinehew! Pammeg ka, migpanalu ki Meibulan ka egngaranan te Liyun ne egpuun te tribu ni Huda wey kabuhalan ni Dabid, sikan naa ka likes sikandin ne eglekat te me piket eyew egkabukalasan ka baseen.”

⁶ Nataman, nakakita a te sabeka ne Nati te Karniru ne migsasindeg diye te elat-elat te hep-at ne hinimuwan ne eggeheyinawa wey te me igbuyag ne miglingut te trunu. Hendue te neyimatayan e seeye dengan. Due pitu ne sungey wey pitu ne mata dutu ne iyan ka pitu ne panisingan te Manama* ne impeendiye te langun ne inged kayi te kalibutan. ⁷ Ne migparani sikandin wey ingkuwa rin ka egbaseen diye te kawanan ne belad te seeye se migpinnuu te trunu.

^{5:1} Isi 2:9-10; Isa 29:11. ^{5:5} Hin 49:9; Isa 11:1,10. ^{5:6} Isa 53:7; Sak 4:10.

* ^{5:6} Innalin seini te duma isip pitu ne panisingan wey ke panisingan ne pitu se klasi ka geem. ^{5:8} Sal 141:2.

8 Te naangey e seeye te Nati ne Karniru, mig-usengul e diye te tangkaan din ka hep-at ne hinimuwan ne eggeheyinawa wey ka daruwa ne pulu wey hep-at (24) ne me igbuyag. Ka tagse sabeka kandan migpangelit te alpa wey due miggen-genan dan ne yahung ne bulawan ne napenu te insinsu ne iyan ka me peg-ampu te me keet-etawan te Manama.⁹ Ne nangulahing e sikandan te iyam ne ulahingen ne eggenendue:

“Likes ka ne eg-anney te baseen
wey te pglekat te me piket kayi.

Tenged su neyimatayan kad
wey pinaahi te langesa nu,
due me etew ne nalekat nu eyew egkeyimu
ne keet-etawan te Manama,

ne namuun te nalein-lein ne
me tribu,
me linalahan wey me kabuhalan, wey me
nasud.¹⁰ Innimu nu sikandan ne migharian

wey me talagpanubad te
kanta ne Manama,
wey eghari sikandan te
kalibutan.”

¹¹ Nataman, migtengteng ad e man-e wey narineg ku ka laheng te kene egkaseel ne me panalihan te Manama ne nakalingut te trunu, wey te hep-at ne hinimuwan ne

eggeheyinawa wey te me igbuyag.¹² Nangulahing sikan-dan te heemeni ne miggenendue:

“Ka innimatayan ne Nati ne Karniru, likes ne egdayanen
tenged te kandin ne geem, karatuan, katuenan, kanekal
wey likes sikandin ne egtahuren, egban-tuhuhen, wey egsayeen!”

¹³ Ne narineg ku ka lan-gun ne miggeheyinawa diye te langit wey diye te am-pew te tane, wey ka diye te diralem te tane wey diye te dahat ne nangulahing ne miggenendue:

“Egdayanen ta ka migpinnuu te trunu wey ka Nati ne Karniru.

Egbantuhen ta sikandan
wey eg-ileen ka katelesan
wey ka karesen
te ware egkatamanan!”

¹⁴ Ne migtabak ka hep-at ne hinimuwan ne eggeheyinawa, “Malehet iya!” Ne mig-usengul ka me igbuyag wey migsimba dutu.

6

Ka pglekat te me piket

¹ Nataman, nakita ku ka Nati ne Karniru ne miglekat te sabeka te pitu ne piket, wey te sikan de, nakarineg a te sabeka te hep-at ne me hinimuwan ne eggeheyinawa ne miglalag. Egpekeiling te luhung ka laheng din ne miggenendue, “Hendini

ka!"² Ne due nakita ku ne maangkag ne kudde ne migpanguddaan te etew ne due piet. Imbehayan sikandin te kuruna wey miggipanew ne migpanpanalu te me kuntere din.³ Ne inlekat e man-e te Nati ne Karniru ka igkarangeb ne piket, wey narineg ku ka igkarangeb ne mananap ne migkahи, "Hendini ka!"⁴ Ne due miglihawang ne dangeb ne kudde ne malalab wey migpanguddaan te etew ne imbehayan te katenged te peg-awe te keupianan te kalibutan eyew egmey-immimatayey ka me etew. Ne imbehayan sikandin te bubuyahen ne kampilan.⁵ Ne inlekat e man-e te Nati ne Karniru ka igkatelu ne piket, wey narineg ku man-e ka igkatatelу ne hinimuwan ne eggeheyinawa ne migkahи, "Hendini ka!" Ne due nakita ku ne meitem ne kudde ne migpanguddaan te etew ne mig-uyen te timbangan.⁶ Ne due laheng ne narineg ku ne hendue te diye migpuun te taliware te hep-at ne hinimuwan ne eggeheyinawa ne migkahи, "Tatelu ne salmun ne trigu wey ke siyam ne salmun ne sibada ka egkeutel te suul te etew te sabeka ne aldew. Piru kene nu hilabeti ka mentika wey ka binu!"

⁷ Ne inlekat e man-e te Nati ne Karniru ka igkeep-at ne piket, wey narineg ku ka igkeep-at ne hinimuwan ne

eggeheyinawa ne migkahи, "Hendini ka!"⁸ Ne iyan ku nakita ka kudde ne egmakalawag ne migpan-guddaan te egngaranan te Kamatayen, wey migsinundul kandin ka egngaranan te Hadis. Imbehayan sikandan te geem te pegpangimatey te igkeep-at ne baad te me etew te kalibutan pinaahi te gubut, te gutas, te dalu wey pinaahi te mahintalunan ne me mananap kayi te kalibutan.

⁹ Ne inlekat e man-e te Nati ne Karniru ka igkalimma ne piket, wey due nakita ku diye te diralem te altar ne me gimukud te me etew ne immangimatayan tenged te pegtuman dan te lalag te Manama wey te pegmatinumanen dan te pegpanengneng kayi.

¹⁰ Ne migpanaman-taman sikandan migmanguleyi, "Manama ne amana ne maresen, ka matulus wey malehet; ken-u nu pad eggukumi wey egsulii ka me etew ne miggimatey kanami diye te kalibutan?"¹¹ Ne impamehayan e ka tagse sabeka kandan te maangkag ne kumbale ne malayat wey migkahиyan te egpeyimme-layen pad te dagdahew re taman te egkasampung e ka kasuluhan te me suled dan ne duma ran te migpamakey te Manama ne egpangimatayan iling te natamanan dan.

¹² Ne nakita ku ne inlekat

e man-e te Nati ne Karniru ka igkeen-em ne piket. Ne dutu, miglilinug e te amana ne nenekali wey migmarusilem e ka aldew iling te meitem ne manggad, wey migmalalab e ka bulan iling te langesa. ¹³ Neneulug diye te tane ka me bituen diye te langit iling te meyilew pad ne behas te kayu ne imbayaan te make-seg ne kalamag. ¹⁴ Naawe ka langit iling te baseen ne inlulun, wey nenaalin ka langun ne me bubungan wey ka me pulu puun te natahuan dan. ¹⁵ Nangeles diye te me sulung wey te me pahang diye te me bubungan ka me Hari te kalibutan wey ka me pangulu, ka me labew te me sundalu, ka me meyaman, ka dakel se katenged ne me etew, ka me uripen wey ka kene ne me uripen. ¹⁶ Migpangananey sikandan te me bubungan wey te me pahang ne migkahi, “Tebali key eyew egkabunbunan key wey kenad egkiteen te migpinnuu te trunu, wey eg-pakapanalliya key te langet te Nati ne Karniru.” ¹⁷ Su miggungume e ka makaalat-halat ne aldew te pegparusa te langun ne etew, wey ware iya egpaktiis kayi.”

7

Ka 144,000 ne etew ne nakulitan

¹ Te pegkapenga kayi, due nakita ku ne hep-at ne

6:13 Isa 34:4. **6:14** Imp 16:20. **23:30.** **6:17** Huwil 2:11; Mal 3:2. **9:4,6.**

panalihan ne migsasindeg diye te hep-at ne pikungan te kalibutan. Impahenan dan ka hep-at ne kalamag te kalibutan eyew kene egkakalamahan ka tane, dahat, wey ka minsan nekey ne kayu. ² Nataman, duen e man-e nakita ku ne lein ne panalihan ne migparib-abew diye te langit puun te igsile ne mig-uyan te kulit te manekal ne Manama. Ne migpanaman-taman sikandin migpan-guleyi ka migpangumew te hep-at ne panalihan ne imbehayan te Manama te geem te pegdereet te tane wey te dahat. ³ Migkahi sikandin, “Kene niyu pa dereeti ka tane, ka dahat, wey ka kakayuhan taman te egkakulitan ney e ka buked te me suluhuanen te kanta ne Manama.” ⁴ Ne nakarineg a ne due sabeka ne gatus wey hep-at ne pulu wey hep-at ne libu (144,000) ne etew ka nakulitan puun te langun ne tribu ni Israil. ⁵ Due sapulu wey daruwa ne libu (12,000) puun te kabuhalan ni Huda, sapulu wey daruwa ne libu (12,000) puun te kabuhalan ni Rubin, wey sapulu wey daruwa ne libu (12,000) puun te kabuhalan ni Gad. ⁶ Due sapulu wey daruwa ne libu (12,000) puun te kabuhalan ni Asir, sapulu wey daruwa ne libu (12,000) puun te kabuhalan ni Naptali, wey sapulu wey daruwa ne libu

6:15 Isa 2:19,21. **6:16** Hus 10:8; Luk 7:1 Hir 49:36; Dan 7:2; Sak 6:5. **7:3** Isi

(12,000) puun te kabuhalan ni Manasis.⁷ Due sapulu wey daruwa ne libu (12,000) puun te kabuhalan ni Simyun, sapulu wey daruwa ne libu (12,000) puun te kabuhalan ni Libi, wey sapulu wey daruwa ne libu (12,000) puun te kabuhalan ni Isakar.⁸ Due sapulu wey daruwa ne libu (12,000) puun te kabuhalan ni Sabulun, sapulu wey daruwa ne libu (12,000) puun te kabuhalan ni Husi, wey sapulu wey daruwa ne libu (12,000) puun te kabuhalan ni Binhamin.

Ka susuluhi ne etew ne nangukumbale te maangkag

⁹ Pegkapenga dutu, due nakita ku ne susuluhi ne me etew ne kene egkaseel ne namuun te nalein-lein ne me nasud, me tribu wey me kabuhalan, wey me linalahan. Diye sikandan nanasindeg te tangkaan te trunu wey te Nati te Karniru ne nangukumbale te maangkag wey nangekemkem te dewun te palmira ne egpekeiling te niyug.¹⁰ Ne migpanaman-taman sikandan migmanguleyi ne miggenendue: "Iyan migluwas kanta ka Manama ne migpinnuu te trunu wey ka Nati ne Karniru!"¹¹ Ne miglingut nanasindeg ka langun ne me panalihan diye te trunu, wey diye te me igbuyag wey diye te hep-at ne hinimuwan ne

eggeheyinawa. Ne migusengul sikandan diye te tangkaan te trunu wey migsimba te Manama.¹² Ne migkahsi sikandan, "Malehet iya! Ka Manama likes ne egdayanen, egtahuren, wey egpasalamatan su mabantug sikandin, matagseb, maresen wey manekal te ware egta-manan. Malehet iya."

¹³ Nataman, mig-insaan a te sabeka te me igbuyag, "Hentew-a ka sika ne me etew ne nangukumbale te maangkag, wey hendei sikandan namuun?"

¹⁴ Ne migtabak a, "Ahalen, sikeykew ka nakataha ke hentew sikandan."

Ne migkahiyen a nikandin, "Sika ka me etew ne nakaantus te masumpit ne pegbayad-bayad. Impipian dan ka me kumbale dan te langesa te Nati ne Karniru eyew egmaangkag.*¹⁵ Sikan naa ka kayi sikandan te tangkaan te trunu te Manama, wey migpamakey kandin te maaldew wey marusilem diye te timplurin. Ne layun sikandan egdumeyi wey egbanteyi te seeye se migpinnuu te trunu.¹⁶ Kenad e sikandan egmanggutasan wey egkengammaraan, wey kenad e sikandan egkatutung te aldew wey te minsan nekey pad ne egpaketutung.¹⁷ Su ka Nati ne Karniru ne diye te elat-elat te trunu, iyan

7:14 Dan 12:1; Mat 24:21; Mar 13:19. igpasabut te eyew egmaangkag. **7:16** Isa 49:10. **7:17** Sal 23:1; Isi 34:23; Sal 23:2; Isa 49:10; Isa 25:8.

* **7:14** Eyew egkalinisan te me sale ka Isa 49:10. **7:17** Sal 23:1; Isi 34:23; Sal 23:2; Isa 49:10; Isa 25:8.

egtanggu wey egpanulud kandan diye te me sebseb ne epakabehey te umul. Ne epunasen te Manama ka tagse luwe dan ne egtihis."

8

Ka pglekat te igkapitu ne piket

¹ Te inlekat e te Nati ne Karniru ka igkapitu ne piket, warad iya dahing ne egkarineg diye te langit te me liware te uras. ² Nataman, nakita ku ka pitu ne panalihan ne egsasasindeg diye te tangkaan te Manama, wey impamehayan sikandan te tigsalimbeka ne trumpita.

³ Ne due lein ne panalihan ne miggunguma ne miggen-gen te tahuunan te insinsu ne bulawan ne diye migsasindeg te tangkaan te altar. Imbehayan pad man-e sikandin te dakel ne insinsu eyew igtimul te pegampu te me keet-etawan te Manama ne igpanubad diye te altar ne bulawan ne diye te egkatangkaan te trunu.

⁴ Ne migparibabew diye te tangkaan te Manama ka ebel te insinsu ne miggen-genan te panalihan wey insewuhan seeye te me peg-ampu te keet-etawan te Manama.

⁵ Nataman, ingkuwe e te panalihan ka tahuunan te insinsu wey innipenu din e te hapuy puun te altar wey indegpak din diye te tane. Ne sauhune ne migdagsang ka meemen ne luhung,

wey due migderaheneg, wey miggeteb ka kilat wey miglilinug pad.

Ka pitu ne trumpita

⁶ Nataman, migpangan-dam e ka pitu ne panalihan ne nangen-gen te tigsalimbeka ne trumpita eyew igparahing.

⁷ Ne imparahing e te an-anayan ne panalihan ka trumpita rin, wey due apiyew wey hapuy ne nasewuhan te langesa ne nakaregpak diye te tane. Ne natutung ka igkatelu ne baad te tane wey me kayu, wey ka langun ne hilamunen.

⁸ Ne imparahing e te igkarangeb ne panalihan ka trumpita rin, wey due egpekeiling te bubuyahen ne bubungan ne egkalegleg ne nakaregpak diye te dahat. Ne puun due, neyimu e ne langesa ka igkatatelu ne baad te dahat ⁹ wey nenammatey ka igkatatelu ne baad te langun ne eggeheyinawa diye te dahat, wey nenaggihuus ka igkatatelu ne baad te me unturanan diye dahat.

¹⁰ Ne imparahing e te igkatatelu ne panalihan ka trumpita rin, wey due dakel ne bituen ne egkalegleg iling te ganse ne neulug puun te langit wey diye migdeeg te igkatatelu ne baad te me weyig wey te me sebseb.

¹¹ Mapeit ka ngaran te bituen. Ne dutu, migmapeit ka igkatatelu ne baad te me

8:3 Amu 9:1; Iks 30:1,3.

8:5 Lib 16:12; Isi 10:2; Iks 19:16; Imp 11:19; 16:18.

8:7 Iks 9:23-25; Isi 38:22.

8:10 Isa 14:12. **8:11** Hir 9:15.

weyig, wey masalig ka me etew ne nenammatey su migmapeit man-e ka weyig.

¹² Ne imparahing e te igkeep-at ne panalihan ka trumpita rin, wey nasuhat ka igkatatelu ne baad te aldew wey te bulan, wey te me bituen. Sikan naa ka naawe ka igkatatelu ne baad te kalayag dan, wey migmarusilem e ka igkatatelu ne baad te maaldew wey ka igkatatelu ne baad te marusilem.

¹³ Nataman, due nakita ku ne banug ne miglayang diye te aw-awangan wey narineg ku sikandin ka migpanaman-taman migpanguleyi ne migkahi, “Mekeyid-u-hid-u naan de iya! Mekeyid-u-hid-u iya! Mekeyid-u-hid-u naan de iya ka nangugpe te kalibutan ke igparahing e te naahaat ne tatelu ne panalihan ka me trumpita ran ne mahaan e igparahing.”

9

¹ Ne imparahing e te igkalalimma ne panalihan ka trumpita rin, wey due nakita ku ne sabeka ne bituen ne neulug diye te tane puun te langit. Imbehayan ka bituen te yabi te bitu ne ware tamanan. ² Inlukatan din ka bitu ne ware tamanan wey due miglikuwang ne ebel puun dutu ne egpekeiling te ebel te bubuyahen ne hapuy. Ne migmarusilem e

ka kalibutan tenged su naringdingan e te ebel ka layag te aldew.³ Ne due migmanli-hawang ne talangas puun te ebel wey migmanlene diye te tane. Imbehayan sikandan te katenged te pegpanehed iling te me salipitsipit. ⁴ Impanpanayan sikandan ne kene egpabalbalangan ka me hilamunen, wey ke pinamula, wey me kayu naa. Ke kene, iyan de egpabalbalangan seeye se me etew ne ware nakuliti ka me buked dan te kulit te Manama. ⁵ Intuhutan ka me talangas te pegbayad-bayad te me etew seled te lalimma ne bulan piru kene de egpeyimatayan. Ka kandan ne pegbayad-bayad iling kasakit te eggeramen te etew ne insehed te salipitsipit. ⁶ Te seeye ne timpu, egkeupian e perem ka me etew ne egkengamatey wey eg-iman-iman e sikandan ne egkengabigtawan piru kene sikandan egkengamatey.

⁷ Egpekeiling ka me talangas te me kudde ne in-andam e eyew egbubunu wey migkukuruna sikandan te egpekeiling te bulawan, wey egpekeiling te ulaula te me etew ka ulaula ran. ⁸ Ne mallayat ka me bulbul ran iling te bulbul te me malitan wey ka me ngipen dan egpekeiling te ngipen te liyun. ⁹ Ne due dingding te me kumeng dan ne eg-

8:12 Isa 13:10; Isi 32:7; Huwil 2:10,31; 3:15. **9:2** Hin 19:8. **9:3** Iks 10:12-15.

9:4 Isi 9:4. **9:6** Hub 3:21; Hir 8:3. **9:7** Huwil 2:4. **9:8** Huwil 1:6. **9:9**

pekeiling te putew, wey ka kahulub te me pakpak dan egpekeiling kahulub te sesalihi ne karwahi ne ingganuy te me kudde ne nanlingkesu peendiye te bunuanan.¹⁰ Ne due geem te ikug dan ne egpekeiling te ikug te salipitsipit ne due se-hed, wey seini ka eggamiten dan te pegpabayad-bayad te me etew seled te lalimma ne bulan.¹¹ Ne due Hari ne migmandu kandan ne iyan ka panalihan ne due katenged te bitu ne ware tamanan. Ka ngaran din te Hibruwanen ne linalahan si Abaddun, wey ka ngaran din te Grigu ne linalahan si Apulyun, ne ka igpasabut kayi, "Ka Talagdereet."

¹² Neimpusan e ka ananayan ne makaaldek-haldek ne pegbayad-bayad piru duen pad daruwa ne eggingga ne makaaldek-haldek ne me pegbayad-bayad.

¹³ Ne imparahing e te igkeem-em ne panalihan ka trumpita rin, wey due narineg ku ne laheng ne migpuun te hep-at ne pikungan te altar ne bulawan ne diye te tangkaan te Manama.

¹⁴ Ne migkahiyan te laheng ka igkeen-em ne panalihan ne due trumpita, "Lekeinu ka hep-at ne panalihan ne im-baku diye te pagpahamayan ne weyig ne Iyupratis!"¹⁵ Purisu mglekaan e ka hep-at ne panalihan ne natahahe e te uras, te aldew,

te bulan wey te leg-un eyew te pegpangimatey te igkatelu ne baad te keet-etawan.¹⁶ Ne innangenan a ne daruwa ne gatus ne milyun (200,000,000) ka kasuluhan te me sundalu ran ne nangukudde.¹⁷ Ne iling kayi ka ulaula te impakita keddi ne me kudde wey te migmangudde kayi: ka migmangudde due putew ne dingding te me kumeng dan ne malalab ka batek iling te hapuy, wey meilem iling te mahal ne batu ne sapiru, wey makalawag iling te asupri. Ne ka ulu te me kudde egpekeiling te ulu te liyun wey miglihawang puun te me be-be dan ka hapuy, ebel wey asupri.¹⁸ Ne nenammatey ka igkatelu ne baad te me etew puun te seini se mangune-kune ne salerep ne iyan ka hapuy, ka ebel wey ka asupri ne eglihawang puun te be-be te me kudde.¹⁹ Su diye te be-be wey te ikug te me kudde ka geem dan; ne ka me ikug dan due me ulu iling te uled wey seini ka eggamiten dan te pegpangahat te me etew.

²⁰ Ka duma ne me etew ne ware nenammatey te seeye ne me salerep, ware mig-inniyug te me maddeet ne me himu ran. Ware sikandan mig-engked te pegpamakey te me busew wey te me diyus-diyus ne kene egpakkita, kene egpakarinez, wey kene egpekeyipanew ne innimu re puun te bulawan, te pelata, te

burunsi, te batu wey te kayu. ²¹ Ware man-e sikandan miginniyug te maddeet ne me himu ran ne pegpangimatey, pegpanlambus, pegpeyilabetey ne kene ne alunggun wey te pegpanakew.

10

Ka panalihan wey ka deisek ne linulun ne baseen

¹ Nataman, nakakita ad man-e te lein ne panalihan ne maresen ne miglene puun te langit, ne nabukusan te gapun wey neunturan te baluntu ka ulu rin. Ne miglayag ka ulaula rin iling te aldew, wey ka paa rin iling te sungkaleg ne legleg. ² Ne due inggen-genan din ne deisek ne linulun ne baseen ne nabelat e. Ne diye din iriek te dahat ka kawanan ne paa rin wey diye te tane ka gibang. ³ Ne migpanaman-taman sikandin migpanguleyi iling te liyun ne migteteul. Te napenge e sikandin ka migpanguleyi, migtabak e degma migdagsang ka pitu ne luhung. ⁴ Te migdagsang e ka pitu ne luhung, igsulat kud e perem ka inlalag dan, piru due narineg ku ne laheng ne migpuun te langit ne miggenendue, “Kene nu iwangal-wangal ka inlalag te pitu ne luhung wey kene nu isulat!”

⁵ Nataman, ka panalihan ne nakita ku ne migsasindeg ne diye migdiek te dahat wey tane, ingkayew rin ka kawanan ne belad din. ⁶ Ne

migsaad sikandin pinaahi te ngaran te ware kapatayan ne Manama ne iyan miggimu te langit, te tane, te dahat wey te langun ne nakatahu kayi. Migkahi ka panalihan, “Kenad egkabanggew ka egkeyitabu keureme.” ⁷ Su te aldew ne igparahing e te igkapitu ne panalihan ka trumpita rin, egkatuman e ka heles ne planu te Manama ne impanengneng din diye te me prupita ne me suluhuanen din.”

⁸ Nataman, narineg kud e man-e ka laheng puun te langit ne miggendue, “Hendiyei nu ka panalihan ne migsasindeg ne diye migdiek te dahat wey te tane wey kua nu ka baseen ne nabelat e ne miggen-genan din.” ⁹ Ne miggendiyaan kud e ka panalihan, wey imbuyu kud ka deisek ne baseen; ne dutu, ingkahiyan a nikandin, “Kua nu seini wey keena nu; meemis seini iling te teneb ke duen pad te be-be nu, piru egmasakit ka getek nu ke egkaabeleng nud su egmapeit e.” ¹⁰ Ne ingkuwa kud e ka deisek ne baseen ne miggen-genan din wey ingkeen kud e. Meemis seini iling te teneb te diye pad te be-be ku piru migmasakit e ka getek ku te naabeleng kud su migmapeit e. ¹¹ Ne due migkahi keddi, “Keilangan ne ig-abey nu igpanagne ka planu te Manama meyitenged te me etew

puun te nalein-lein ne me punduk, me nasud wey me linalahan, wey diye te me Hari!"

11

Ka daruwa ne talagpamalehet

¹ Nataman, due imbehey keddi ne igseked ne iling te tuked wey migkahiyan a, "Sasindeg ka wey sekera nu ka timplu te Manama wey ka altar, wey seela nu ka migmanimba diye. ² Piru kene nu sekera ka lihawangan te timplu su imbehey e sika diye te ware migmalintutuu.* Ne eg-ahawen[†] dan ka Matulus ne Siyudad seled te hep-at ne pulu wey daruwa (42) ne bulan. ³ Ne egsuhuen ku ka daruwa ne talagpamalehet ku eyew egpamalehet meyitenged keddiey. Egsaluub sikandan te saku wey iga pangguhud dan ka iga pahuhud ku kandan seled te 1,260 ne aldew."

⁴ Sikandan seeye se daruwa ne kayu ne ulibu wey ka daruwa ne tahuinan te sulu ne diye migsasindeg te tangkaan te Magbebaye te kalibutan. ⁵ Ke due egkeupian ne egdereet kandan, due eglihawang ne hapuy diye te me be-be dan ne egpaketutung te me kuntere dan; wey sika ka egpakapatey te egkeupian ne egdereet kandan. ⁶ Due geem dan te peg-elet te langit

eyew kene eg-uran te timpu ne egpangguhud sikandan te iga pahuhud ku kandan. Ne due man-e geem dan te peggimu te me weyig ne langesa wey te pegbayad-bayad te me etew diye te kalibutan pinaahi te me salerep te minsan ken-u ran igkeupii.

⁷ Te egpekeimpus e sikandan ka egpangguhud te iga pahuhud ku kandan, due eglepew ne makaliyas-liyas ne mananap puun te bitu ne ware tamanan ne egpakigehet kandan. Egkatalu rin wey egkapatey ka daruwa ne talagpamalehet. ⁸ Ne diye de sikandan egpaketahed te dalan te dakel ne siyudad ne inlansangan te Magbebaye dan. Ka seeye ne siyudad impahunsilingan te Suduma wey Ihiptu. ⁹ Ne dutun de iya egpaketahu ka me lawa ran seled te tatelu ne aldew wey liware, wey egpipitawen te me etew ne namuun te nalein-lein ne me punduk, me tribu wey me linalahan, wey me nasud. Ne kene sikandan eg-uyun ne igelebeng ka lawa ran. ¹⁰ Eggale-gale ka me etew te kalibutan wey egsahakeen wey egpabegbehayey te dasag tenged te pegpatey te daruwa ne talagpamalehet ne migbayad-bayad te me etew ne nangugpe te kalibutan. ¹¹ Piru te peglihad te

11:1 Iks 40:3; Sak 2:1-2. **11:2** Luk 21:24. * **11:2** Te Grigu: me nasud. † **11:2** Te Grigu: egdi-diekan. **11:4** Sak 4:3,11-14. **11:6** 1Har 17:1; Iks 7:17-19; 1Sam 4:8. **11:7** Dan 7:7; Imp 13:5-7, 17:8; Dan 7:21. **11:8** Isa 1:9-10. **11:11** Isi 37:10.

tatelu ne aldew wey liware, in-uyag ded sikandan te Manama. Nanasindeg sikan-dan wey amana nenaaldek seeye se nakakita kandan.

¹² Nataman, nakarineg ka daruwa ne talagpamalehet te heemeni ne laheng ne egpuun te langit ne migkahi, "Pamaneyik kew kayi!" Ne imbatun e sikandan te gapun taheed te migmanetengteng ka me kuntere dan. ¹³ Te sikan de iya, miglilinug te amana ne nenekali wey nalundus ka igkasapulu ne baad te siudad wey due pitu ne libu (7,000) ne etew ne migpatey. Puun due, amana ne nenaaldek ka me etew ne nasame wey indayan dan ka Manama ne diye te langit.

¹⁴ Neimpusan e ka igkarangeb ne makaaldek-haldeka ne pegbayad-bayad piru mahaan e eggingsuma ka igkatelu.

Ka igkapitu ne trumpita

¹⁵ Nataman, imparahing e te igkapitu ne panalihan ka trumpita rin, wey due migpanaman-taman migmanguleyi diye te langit ne migkahi, "Egharian e kuntee te Manama ka kalibutan duma ki Kristu ne in-alam din, wey eghari sikandin te ware egtamanan!" ¹⁶ Ne nangusengul wey migsimba te Manama ka daruwa ne pulu wey hep-at (24) ne me igbuyag ne naminuu te me trunu ran ne diye te

egkatangkaan te Manama.

¹⁷ Migkahi sikandan, "Migpasalamat key keykew Magbebaye ne Maresen ne Manama, ne iyan ka Manama dengan wey ka Manama kuntee; su inggamit nu ka dakel ne geem nu wey imbunsuran nud e ka peghari nu!

¹⁸ Nenabelu ka me etew ne ware migmalintuu keykew, piru miggingsume e ka timpu te langet nu wey ka timpu te peggukum nu te nenamatey.

Miggingsume e degma ka timpu ne egdasahan nud ka me suluhuanen nu, ka me prupita, wey ka keet-etawan nu, wey ka langun ne migtahud keykew, mabantug ma wey se kene.

Seinid e ka timpu ne egdereetan nud ka me talagdereet te nanguppe te kalibutan!"

¹⁹ Nataman, nalukatan e ka timplu te Manama ne diye te langit wey nakite e ka Tahuunan te Kasabutan te Manama ne diye te seled te timplu rin. Ne dutu, miggeteb e ka kilat wey due migderaheneg, wey migdagsang e ka luhung wey miglilinug e, wey mig-uran e te derakel ne apiyew.

12*Ka malitan wey ka salimbaweng*

¹ Nataman, due amana ne kein-inuwan ne egkiteen diye te langit. Su due malitan ne migsaluub te aldew wey diye migsasindeg te bulan, wey migkukuruna sikandin te sapulu wey daruwa (12) ne bituen. ² Naberes sikandin wey mahaan e eglesuti, sikan naa ka migpanguleyi sikandin su egbaletikan e.

³ Ne duen e man-elein ne kein-inuwan ne egkiteen diye te langit: due bubuya-hen ne salimbaweng ne malalab ne pitu ka ulu wey sapulu ka sungey, wey ka tagse ulu due kuruna. ⁴ Ne ingkeyis din te ikug din ka igkatedlu ne baad te me bituen wey indegpak din diye te tane. Ne diyad migsasindeg ka salimbaweng te tangkaan te malitan ne mahaan e eglesuti eyew egsagmaken din ka bate ke eglesut e.

⁵ Nataman, te miglesutan e ka malitan te lukes ne bate ne iyan egmandu te me nasud ne ware keyidu te me kuntere din, * due migsalukagmit te bate wey in-uyan e peendiye te Manama diye te trunu rin. ⁶ Ne migpallahuy e ka malitan diye te mammara ne inged ne kene egkeugpaan, ne iyan ka intahahe te Manama ne egaaputan kandin eyew

diye egtangguwa seled te 1,260 ne aldew.

⁷ Nataman, due gubut diye te langit su migpabunbunuey si Mikail duma te me panali-han din wey te salimbaweng duma te me panalihan din degma. ⁸ Piru natalu ka salimbaweng duma te me panalihan din, wey warad tuhuti te Manama ne eg-ugpe dan diye te langit. ⁹ Ne indegpak e diye te tane ka bubuyahen ne salimbaweng. Sikandin ka tapey ne uled ne egngaranan ki Meibulan, ka ahalen te me busew ne iyan miglimbung te me etew kayi te ampew te tane. Indegpak sikandin diye te tane duma te me panalihan din.

¹⁰ Ne due narineg ku ne migpanaman-taman migpanguleyi diye te langit ne miggenendue, "Timpu e ne egluwasen e te Manama ka me etew. Igpapitew rin e ka geem din te peghari wey ka katenged te Kristu ne in-alam din. Su ka diye te tangkaan te Manama ne talagsumbung te me suled ta te aldew wey marusilem, indegpak e diye te tane.

¹¹ Natalu ran sikandin pinaahi te langesa te im-panubad ne Nati ne Karniru wey te pinaahi degma te kamalehetan ne inwali ran. Ne ware dan ikannuhun ka umul ran minsan pad egpatey sikandan tenged te pegpalintutuu ran. ¹² Ne

12:3 Dan 7:7. **12:4** Dan 8:10. **12:5** Isa 66:7; Sal 2:9. *** 12:5** Te Grigu: egmandu pinaahi te baras ne putew. **12:7** Dan 10:13,21; 12:1; Hud 9. **12:9** Hin 3:1; Luk 10:18. **12:10** Hub 1:9-11; Sak 3:1.

13

Ka daruwa ne mananap ne makaliyas-liyas

tenged due, gale-gale kew ka nangugpe te langit.[†] Piru mekeyid-u-hid-u kew ka due te tane wey dahat[‡] su miglene e due te kaniyu ka ahalen te me busew ne amana ne nalanglangetar, su nakataha rin ne kene naan de sikandin egkaluhey!"

¹³ Te nasahimanu e te salimbaweng ne indegpak e sikandin diye te tane, inlupug din e ka malitan ne mig-anak te lukes. ¹⁴ Piru imbehayan ka malitan te daruwa ne pakpak te dakel ne banug eyew epakalayang sikandin peendiye te mammara ne inged ne kene egkeugpaan ne egtangguwan kandin te 1,260 ne aldew, wey eyew epakapariyu sikandin te salimbaweng. ¹⁵ Ne migkulepe e ka salimbaweng te dakel ne weyig ne impasinundul rin te malitan eyew egkaanlas sikandin. ¹⁶ Piru imbulihan te tane ka malitan. Migbeka-beka ka tane wey migleneb e ka weyig ne ingkulepa te salimbaweng. ¹⁷ Nabelu-belu ka salimbaweng te malitan wey miggipanew e sikandin ka epakig-ehet te duma pad ne me kabuhalan te malitan. Sikandan seeye se migtuman te me suhu te Manama wey te kamalehetan ne impanulu ni Hisus. ¹⁸ Ne diye migsasindig ka salimbaweng te ilis te dahat.

¹ Nataman, due nakita ku ne makaliyas-liyas ne mananap ne mglepew puun te dahat. Due sapulu ne sungey kayi wey pitu ne ulu, ne ka tagse sungey due kuruna. Ne ka tagse ulu impanulatan te me ngaran ne egpakabaley-baley te Manama. ² Ne ka nakita ku ne makaliyas-liyas ne mananap egpekeiling te liyupardu, ka me paa rin egpekeiling te paa te usu, wey ka be-be din egpekeiling te be-be te liyun. Ne imbehey e te salimbaweng diye te mananap ka geem din, ka trunu rin, wey ka dakel ne katenged din te pegmandu. ³ Ka sabeka ne ulu te mananap due bateg te bubuahan ne pali ne egpakapatey, piru neulian ded. Neinuinu te mananap ka me etew te intiru ne kalibutan wey mig-ikul sikandan kandin. ⁴ Insimba te me etew ka salimbaweng su imbehey rin ka katenged din diye te makaliyas-liyas ne mananap. Ne insimba ran degma ka mananap te migkahi, "Hentew naan de iya ka egpekeiling te makaliyas-liyas ne mananap? Hentew naan de iya ka egpakaatu kandin?"

⁵ Intuhutan ka mananap te pegpaambug wey

[†] 12:12 Te Grigu: Purisu gale-gale kew me langit wey ka langun ne nangugpe due.

[‡] 12:12 Te Grigu: Mekeyid-u-hid-u ka kalibutan wey dahat. ^{12:14} Dan 7:25; 12:7. ^{13:1} Dan 7:3; Imp 17:3,7-12. ^{13:2} Dan 7:4-6. ^{13:5} Dan 7:8,25; 11:36.

te pegbaley-baley te Manama, wey intuhutan degma sikandin te pegmandu seled te hep-at ne pulu wey daruwa (42) ne bulan. ⁶ Sikan naa, migpanlalag e ka mananap te pegbaley-baley te Manama, te pegbaley-baley te ngaran din wey te ugpaan din, wey te langun ne nangugpe diye te langit.* ⁷ Intuhutan sikandin ne egpakig-ehet te keet-etawan te Manama wey te pectalu kandan. Imbehayan man-e sikandin te katenged te pegmandu te me etew ne namuun te nalein-lein ne me tribu, me punduk wey me linalahan, wey me nasud. ⁸ Ne egsimba kandin ka langun ne nangugpe te kalibutan, angin e te seeye se nakasulat se me ngaran diye te Libru te Umul. Te ware pad neyimu ka kalibutan, nakasulat e ka me ngaran dan diye te libru te Nati ne Karniru ne innimatayan.

⁹ “Purisu, ke egkeupian ka ne egpakannekal, sumsumana nu ay-ayari ke nekey ka narineg nu!† ¹⁰ Ka minsan hentew ne iyan egkeyingumaan ka egkarakep, egdakepen iya wey ka minsan hentew ne iyan egkeyingumaan ka eggimatayan pinaahi te kampilan, eggimatayan iya pinaahi te kampilan. Purisu, keilangan ne egpakannekal wey egantus te me keyirapan ka

keet-etawan te Manama.”

¹¹ Nataman, duen e mane nakita ku nelein ne makaliyas-liyas ne mananap ne mglepew puun te tane. Due daruwa ne sungey rin ne egpekeiling te sungey te nati ne karniru, wey hendue te salimbaweng ke eglalag. ¹² Inggamit din ka langun ne katenged te an-anayan ne makaliyas-liyas ne mananap diye te tangkaan kayi wey impehes din ka langun ne nangugpe te kalibutan ne egsimba te an-anayan ne mananap ne due bateg te dakel ne pali ne egpaketay, piru neulian ded. ¹³ Ne seeye se ikarangeb ne makaliyas-liyas ne mananap, amana ne kein-inuwan ka immangimu rin su nakapeuran sikandin te hapuy diye te tangkaan te me etew. ¹⁴ Nalimbungan te ikarangeb ne makaliyas-liyas ne mananap ka nangugpe te kalibutan pinaahi te me kein-inuwan ne intuhut kandin ne eggimuwen diye tangkaan te an-anayan ne makaliyas-liyas ne mananap. Ne insuhu din ka me etew ne eggimu te larawan te an-anayan ne mananap ne napalian te kampilan piru neuyag ded. ¹⁵ Intuhutan sikandin ne egpeahayinaween din ka larawan te an-anayan ne makaliyas-liyas ne mananap su eyew egpakkalalag wey egpeyimatey te kene egsimba

* **13:6** Ka duma ne igpasabut kayi diye te Grigu iyan ka migpanlalag e ka mananap te pegbaley-baley te Manama, te pegbaley-baley te ngaran din wey te ugpaan din ne iyan seeye se nangugpe diye te langit. **13:7** Dan 7:21. **13:8** Sal 69:28. † **13:9** Te Grigu: Ka due talinga egpammineg. **13:10** Hir 15:2; 43:11.

kandin.¹⁶ Impehes din man-e ka langun ne etew, mabantuug wey se kene, meyaman wey se egkaayu-ayu, uripen wey se kene, ne egkulitan diye te kawanan ne belad dan wey ke diye naa te buked dan.¹⁷ Ne ware minsan hentew ne egpakabebeli wey ke egpakabebeleye angin e te seeye se due kulit te ngaran te makaliyas-liyas ne mananap wey ke numiru te ngaran din.

¹⁸ Keilangan te katuenan ka pegasbut kayi. Ne ka due katuenan te pegasbut keilangan ne egnengnengan din ke nekey ka kaluwasan te numiru te makaliyas-liyas ne mananap su palinneu seini te ngaran te etew. Ne ka numiru iyan ka 666.

14

Ka Nati ne Karniru wey ka 144,000 ne keet-etawan

¹ Nataman, nakita ku ka Nati ne Karniru ne migsasindeg diye te Bubungan te Siyun duma te sabeka ne gatus wey hep-at ne pulu wey hep-at ne libu (144,000) ne keet-etawan ne nasulatan ka me buked te ngaran te Nati ne Karniru wey te Ameyrin.² Ne nakarineg a te laheng puun te langit ne eg-pekeiling te lehes te dakel ne sampew, wey iling karahing te dagsang te luhung, wey egpekeiling man-e te dahing te impangelit ne me alpa.³ Ne nangulahing sikandan te iyam ne ulahingen diye

te tangkaan te trunu wey diye te hep-at ne hinimuwan ne eggeheyinawa wey te me igbuyag. Ware lein ne nateu te seeye ne ulahingen angin e te seeye se sabeka ne gatus wey hep-at ne pulu wey hep-at ne libu (144,000) ne me etew ne inlekat puun te kalibutan.⁴ Sikandan ka me etew ne ware nekewulid te me malitan wey sikan-dan ka migsinundul te Nati ne Karniru minsan hendei sikandin eggendiye. Sikandan ka linekat ne me keet-etawan puun diye te kalibutan wey sikandan ka in-uhab diye te Manama wey te Nati ne Karniru.⁵ Warad iya sikandan nanguubat wey warad iya igkarew-ey kandan.

Ka tatelu ne panalihan

⁶ Nataman, due nakita ku ne lein ne panalihan ne miglayang diye te awawangan ne mig-uyan te Me-upiya ne Panugtulen ne kene egkabalbalawan te ware egtamanan. Igwali seeye diye te kalibutan, diye te me etew ne namuun te nalein-lein ne me nasud, me tribu wey me linalahan, wey me punduk.⁷ Ne migpanaman-taman sikandin migpangu-leyi ne migkahi, “Kaaldeki niyu ka Manama wey dayana niyu sikandin, tenged su miggingsume e ka timpu te peggukum din. Ne simbaa niyu ka miggimu te langit wey te tane, te dahat wey te me sebseb te me weyig.”

⁸ Ne due nakasinundul ne igkarangeb ne panalihan ne migkahi, "Nahuhus e! Nahuhus e ka Mabantug ne Babilunya! Su impeinum din ka langun ne nasud te binu ne iyan ka agkey din!"

⁹ Ne due nakasinundul kandan ne igkatelu ne panalihan wey migpanaman-taman migpanguleyi ne migkahi, "Ka minsan hentew ne egsimba te makaliyas-liyas ne mananap wey te larawan din wey egpakulit diye te buked din wey ke diye naa te belad din, ¹⁰ egpekeinum degma sikandin te telek ne binu te Manama ne in-itis diye te ubab te langet din. Ne egbaybayaran sikandin pinaahi te hapuy wey asupri diye te tangkaan te matulus ne me panalihan wey te tangkaan te Nati ne Karniru. ¹¹ Ne egparibabew te ware egtamanan ka ebel puun te igbayad-bayad kandan. Kene egpekeyimmeley ne egkabaybayaran te aldew wey marusilem seeye se migsimba te makaliyas-liyas ne mananap wey te larawan, wey migpakulit te ngaran te mananap. ¹² Purisu ka keet-etawan te Manama ne migtuman te me suhu din wey migsalig ki Hisus, keilangan ne egpabulus ka egpalintutuu."

¹³ Nataman, due narineg ku ne laheng puun te langit ne migkahi, "Isulat nu seini:

14:8 Isa 21:9; Hir 51:8; Imp 18:2. **14:10** Isa 51:17; Hin 19:24; Isi 38:22. **14:11**

* **14:13** Te Grigu: egsinundul kandan ka hinimuwan dan. **14:14**
Isa 34:10. Dan 7:13. **14:15** Huwil 3:13.

Puun kuntee, keupianan te seeye se nammatey ne due te Magbebaye!"

Ne migtabak ka Panisingan te Manama, "Malehet iya. Egpanalanginan sikandan eyew egpekeyimmeley e te me keyirapan, su egliped diye te kandan ka meupiya ne hinimuwan dan.*"

Ka peggaani te kalibutan

¹⁴ Nataman, due nakita ku ne maangkag ne gapun ne due migpinnuu ne hendue te anak te etew ne migkukuruna te bulawan wey miggen-gen te mahalang ne galab. ¹⁵ Ne due nakita ku ne lein ne panalihan ne miglihawang te timplu wey migpanaman-tamanan din kuleyii ka migpinpinnuu te gapun te migkahi, "Ay-ayuna nud ka galab nu wey gaani kad su neyinuhan e ka egganiyen diye te kalibutan!" ¹⁶ Purisu inggalab e te seeye se migpinnuu te gapun ka egganiyen, wey naahaaniyan e ka kalibutan.

¹⁷ Nataman, due nakita ku ne lein ne panalihan ne miglihawang te timplu diye te langit wey due degma galab din ne mahalang.

¹⁸ Ne duen e man-e nakita ku ne lein ne panalihan ne migpuun te altar ne iyan impiyalan te hapuy. Migpanaman-tamanan din kuleyii ka due mahalang ne galab ne migkahi, "Ay-ayuna

nud ka galab nu wey panleg-tasa nud ka me pungpung te me behas te paras diye te kalibutan su neneiyinuhan e!"¹⁹ Purisu impanlegtas e te panalihan ka me behas te paras diye te kalibutan wey impangantug din e diye te maluag ne kelesanan te langet te Manama.²⁰ Ne ingkeles e ka me behas diye te kelesanan ne diye te lihawangan te siyudad. Ne puun te kelesanan due langesa ne migtulayas ne taman te bakke te kudde ka karalem wey tatelu ne gatus (300) ne kilumitru ka klayatan.

15

Ka me panalihan ne mig-uyan te katammanan ne me salerep

¹ Ne duen e man-e nakita ku ne amana ne kein-inuwan diye te langit. Due pitu ne panalihan ne mig-uyan te pitu ne salerep. Katammanan seini ne me salerep su dutun de egkataman kandan ka langet te Manama.

² Ne due nakita ku ne hendue te dahat ne bildu ne amana ne mating-ew ne nasewuhan te hapuy. Ne nakita ku ne diye nanasindeg te ilis dutu ka nenakareeg te makaliyas-liyas ne mananap wey te larawan din wey ware nakulit te numiru te ngaran din. Nanguyan sikandan te me alpa ne imbehey te Manama³ wey nangulahing

te ulahingen ni Muwisis ne suluhuanen te Manama, wey te ulahingen te Nati ne Karniru ne eggendue:

"Dakel wey kein-inuwan ka me himu nu maresen ne Magbebaye ne Manama!

Matareng wey eleg ka me paahi nu

Hari te langun ne me na-sud!

⁴ Hentew buwa ka kene egkaaldek keykew Magbebaye, wey kene egsaye te ngaran nu?

Su sikeykew re ka matulus. Eggendue te keykew ka me etew te langun ne me nasud wey egsimba keykew, tenged su nanengnen-gan e ka matareng ne me himu nu."

⁵ Pegkapenga dutu, nakita ku ne nalukatan ka timplu diye te langit ne iyan ka balungbalung te Manama.

⁶ Ne miglihawang puun te timplu ka pitu ne panalihan ne mig-uyan te pitu ne salerep. Nangukumbale sikandan te maangkag ne hinabel ne masil-ew wey nanlelamben te tabed ne bulawan.

⁷ Ka sabeka te hep-at ne hinimuwan ne eggeheyinawa, migbehayan din ka me panalihan te pitu ne yahung ne bulawan ne napenu te langet te ware kapatayan ne Manama.⁸ Ne napenu e ka timplu te ebel

14:20 Isa 63:3; Peg 1:15; Imp 19:15. **15:3** Iks 15:1. **15:4** Hir 10:7; Sal 86:9.

15:5 Iks 38:21. **15:8** Iks 40:34; 1Har 8:10-11; 2Kru 5:13-14; Isa 6:4.

ne egpuun te katelesen te Manama wey te geem din. Ne ware egpakaseled dutu taman te egkeimpusan e ka pitu ne salerep ne in-uyan te pitu ne panalihan.

16

Ka me yahung ne intahuan te langet te Manama

¹ Nataman, due narineg ku ne heemeni ne laheng ne diye egpuun te timplu. Migpakiglag seini diye te pitu ne panalihan ne migkahi: “Hipanew kew e wey ibusbus niyud diye te kalibutan ka pitu ne yahung ne langet te Manama!”

² Ne mig-ayun e ka ananayan ne panalihan wey imbusbus din e ka tahu te yahung din diye te kalibutan. Ne dutu, nangehang e te susumpiti ka me etew ne migpakulit te kulit te makaliyas-liyas ne mananap wey migsimba te larawan din.

³ Ne imbusbus e te ikarangeb ne panalihan ka tahu te yahung din diye te dahat. Ne migbaluy e ka dahat ne langesa iling te langesa te minatey, wey nammatey ka langun ne miggeheyinawa diye te dahat.

⁴ Ne imbusbus e degma te igkatelu ne panalihan ka tahu te yahung din diye te me weyig wey diye te me sebseb, wey migbaluy e ka me weyig ne langesa. ⁵ Ne narineg ku ka panalihan

ne migbanterey te weyig ne migkahi, “Sikeykew se Sab-sabeka ne Matulus ne kayid dengan wey minsan kuntee, matareng ka peglegpad nu. ⁶ Su impalangesa ran ka me keet-etawan nu minsan ka me prupita, sikan naa ka impeinum nu degma sikandan te langesa. Ne sika iya ka eleg kandan!” ⁷ Ne nakarineg a te laheng ne migpuun diye te altar ne migkahi, “Malehet iya Magbebaye ne Maresen ne Manama, malehet wey matareng ka me legpad nu!”

⁸ Ne imbusbus e te igkeepat ne panalihan ka tahu te yahung din diye te aldew, wey intuhutan ka aldew ne egmeinit te mangune-kune eyew egkatutung ka me etew te keinit din. ⁹ Ne natutung ka me etew te mangune-kune ne keinit, wey imbaley-baley ran e ka ngaran te Manama ne iyan impuunan te seeye ne me salerep. Ne ware sikandan mig-inniyug te me sale dan wey ware migsaye kandin.

¹⁰ Ne imbusbus e degma te igkalalimma ne panalihan ka tahu te yahung din diye te trunu te makaliyas-liyas ne mananap. Ne seeye naa, migmarusilem e ka migharian din, wey impan-gahat e te me etew ka me dile dan tenged te kasakit, ¹¹ wey imbaley-baley ran ka Manama ne diye te langit tenged te kasakit wey te me kehang ne in-antus dan, wey

ware sikandan mig-inniyug te maddeet ne hinimuwan dan.

¹² Ne imbusbus e degma te igkeen-em ne panalihan ka tahu te yahung din diye te dakel ne weyig ne Iyupratis, wey neetiyan e seeye su intahahe ne egpabayaan te me Hari ne egpuun te igsile.

¹³ Ne due nakita ku ne tatelu ne busew ne egpekeiling te me bakbak. Ka sabeka ne busew miglihawang puun te be-be te salimbaweng, ka sabeka diye miglihawang te be-be te kene ne malehet ne prupita. ¹⁴ Sikandan ka me busew ne miggimu te me kein-inuwan. Ne nangendiyaan te me busew ka me Hari te intiru ne kalibutan eyew eglibulungen te pegbubunu te Maresen ne Manama te dakel ne aldew rin.

¹⁵ Ne migkahi ka Magbabay, "Pammineg kew! Ka pegginguma ku egpekeiling te takawen ne egtikew egginguma. Ne keupianan te seeye se kene eglichereng wey migsaluub layun te kumbale din eyew kene sikandin egpekeyipanew ne ware kukumbaleen wey kene egkeyilawan diye te tangkaan te me etew!"

¹⁶ Ne inlibulung te me busew ka me Hari diye te inged ne egngararan te Armagidun te Hibruwanen ne

linalahan.

¹⁷ Ne imbusbus e te igkapitu ne panalihan ka tahu te yahung din diye te awawangan, wey due meemen ne laheng ne migpuun te trunu ne diye te timplu ne miggendue, "Napenge e!"

¹⁸ Ne miggeteb ka kilat wey due migderaheneg, wey migdagsang ka luhung wey miglilinug e te nenekali ne ware pad egkeilingan puun te duen e etew kayi te ampew te tane tenged su amana iya ne manekal ka seeye ne linug. ¹⁹ Ne puun due, nabaad te tatelu ka egkahuhud ne siyudad ne mabantug, wey nagguhus ka me siyudad te langun ne inged. Ne ware nalingawi te Manama ka mareet ne hinimuwan te me etew diye te Mabantug ne Babilunya, wey egpeinumen din sikandan te binu ne iyan ka mangunkune ne langet din. ²⁰ Ne naawe ka langun ne me pulu wey warad bubungan ne egkakita. ²¹ Ne miguran te derakel ne apiyew ne me lalimma ne pulu (50) ne kilu ka kabehat te tagse sabeka. Neuluhan ka me etew wey imbaley-baley ran ka Manama tenged te apiyew su amana iya ne makaalat-halat ka seeye ne salerep.

17

*Ka egkahuhud ne malitan
ne egpamelegye te lawa*

16:12 Isa 11:15. **16:15** Mat 24:43-44; Luk 12:39-40; Imp 3:3. **16:16** 2Har 23:29; Sak 12:11. **16:18** Imp 8:5; 11:13,19. **16:19** Isa 51:17. **16:20** Imp 6:14. **16:21** Iks 9:23; Imp 11:19. **17:1** Hir 51:13.

¹ Nataman, migparani keddiey ka sabeka te pitu ne panalihan ne nanguyan te yahung wey migkahi, "Hendini ka su igpapitew ku keykew ka peglegpad te egkahuhud ne malitan ne epamelegye te lawa rin ne migpinnuu diye lenged te masulug ne me weyig. ² Nekeyilabet kandin ka me Hari wey nenewubug ka langun ne etew te kalibutan tenged te peg-inum dan te binu ne iyan ka agkey rin."

³ Nataman, in-umaan ad te Panisingan te Manama wey in-uyan ad te panalihan diye te mammara ne inged ne kene egkeugpaan. Ne due nakita ku diye ne malitan ne mig-untud te malalab-lalab ne mananap ne makaliyas-liyas ne pitu se ulu wey sapulu se sungey, wey neempet nasulati te me ngaran ne epakabaley-baley te Manama. ⁴ Ne migsaluub ka malitan te kumbale ne ubi se batek wey te malalab-lalab, wey indayan-dayanan ka lawa rin te bulawan, mahal ne me batu wey me pirlas. Ne miggen-gen sikandin te bulawan ne ubab ne napenu te malindit ne himu rin wey malindit ne agkey rin. ⁵ Nakasulat diye te buked din ka ngaran ne maralem se kaluwasan: "Mabantug ne Babilunya, iney te langun ne malitan ne epamelegye te lawa, wey puunan te langun ne malindit ne me

himu te kalibutan." ⁶ Ne nakita ku ne newubug ka malitan te langesa te keet-etawan te Manama ne impangimatayan tenged te pegpalintutuu ran ki Hisus.

Amana a ne neinu-inu te pegkakita ku kandin. ⁷ Piru migkahiyan a te panalihan, "Mania te neinu-inu ka? Egnangenan ku sikeykew ke nekey-a ka maralem ne kaluwasan meyitenged te malitan wey te in-unturan din ne makaliyas-liyas ne mananap ne pitu se ulu wey sapulu se sungey. ⁸ Ka makaliyas-liyas ne mananap ne nakita nu, manekal pad dengan piru migpatey e kuntee. Ne mahaan e sikandin eglihawang puun te bitu ne ware tamanan eyew egdereetan en iya. Ka langun ne etew ne ware nakasulat se me ngaran diye te Libru te Umul bunsud pad te peggimu te kalibutan, egkeinu-inu ke egkakita ran e ka makaliyas-liyas ne mananap ne manekal pad dengan wey migpatey e kuntee, piru eglibed ded man-e.

⁹ "Keilangan te katuenan ka pegasbut kayi. Ka pitu ne ulu iyan sika ka pitu ne bubungan ne migpinnuuwan te malitan, wey migpasabut degma seeye te pitu ne Hari. ¹⁰ Ne nammatey e ka lalimma ne Hari wey iyan mighari kuntee ka igkeen-em, wey ware pad miggingga ka igkapitu.

Ne emun ke eggingume e sikandin, keilangan ne kene de sikandin egkaluhay. ¹¹ Ka makaliyas-liyas ne mananap ne manekal dengan piru migpatey e kuntee, iyan ka igkawalu ne Hari ne sabeka red te seeye se pitu ne Hari. Ne egdereetan ded iya degma sikandin.*

¹² “Ka nakita nu ne sapulu ne sungey, iyan seeye ka sapulu ne Hari ne ware pad migbunsud mighari. Piru egbehayan sikandan te katenged te peghari te senge uras de duma te makaliyas-liyas ne mananap. ¹³ Nasabeka ka suman-suman te sapulu ne Hari ne igbehey ran ka geem wey katenged dan diye te makaliyas-liyas ne mananap. ¹⁴ Egkataman, egpakigbunu sikandan te Nati ne Karniru, piru egpanalu ka Nati ne Karniru tenged su Ahalen sikandin te langun ne me ahalen wey Hari te langun ne me Hari. Ne iyan din duma ka me matinumanen ne migikul kandin ne in-alam wey in-umew te Manama.”

¹⁵ Ne migkahiyan ad mane te panalihan, “Ka masulug ne weyig ne nakita nu ne lenged te impinnuuwan te malitan ne egpamelegye te lawa rin, iyan ka me etew puun te nalein-lein ne nasud wey linalahan. ¹⁶ Ka sapulu ne sungey wey ka makaliyas-liyas ne mananap

ne nakita nu, egdumutan dan ka malitan ne egpamelegye te lawa rin. Eg-ahawen dan ka langun ne diye te kandin, wey egluongan dan sikandin. Egkeenen dan ka sapu din wey egtutungen dan ka same. ¹⁷ Igpeula-ula ran seini diye te kandin su insabeka te Manama ka suman-suman dan te peggimu te igkeupii rin. Ne puun due, igbehey ran ka katenged dan te peghari diye te makaliyas-liyas ne mananap taman te egkatuman e ka inlalag te Manama.

¹⁸ “Ne ka malitan ne nakita nu, iyan sika ka egkahuhud ne siyudad ne egmandu te me Hari te intiru ne kalibutan.”

18

Ka pegkahuhus te Babilunya

¹ Te pegkapenga dutu, duen e man-e panalihan ne nakita ku ne miglene puun te langit. Dakel ka katenged din, wey nalayahan ka intiru ne kalibutan te katelesan din. ² Ne migpanaman-taman sikandin migpanguleyi ne migkahi: “Nahuhus e! Nahuhus en iya ka Mabantug ne Babilunya! Ne nangugpaan e kuntee seini te busew wey mallindit ne panisingan, wey langun ne klasi te manuk-manuk ne inisip ne malindit wey kene egkakeen. ³ Neyitabu seini su nekeinum ka langun ne

* **17:11** Ka sabeka te pitu ne Hari kararuwa eghari. **17:12** Dan 7:24. **18:2** Isa 21:9; Hir 51:8; Imp 14:8; Isa 13:21; Hir 50:39. **18:3** Isa 23:17; Hir 51:7.

nasud te binu ne iyan ka agkey rin, wey nekeyilabet kandin ka langun ne me Hari wey naddatu ka me nigosyanti te kalibutan pinaahi te pegkaalamlamen din te karatuan."

4 Nataman, duen e man-e narineg ku ne laheng puun te langit ne migkahi,

"Sikaniyu se me keet-etawan ku, awe kew rue eyew kene kew eg-pekeikul te me sale din, wey eyew kene kew egsalerep duma kandin!

5 Su nekeume e diye te langit ka nenekeg-untud-untud ne sale din, wey ware nalingawi te Manama ka maddeet ne hinimuwan din.

6 Eggimuwen diye te kandin ka innimu rin diye te duma, wey egsulian iya sikandin te mareet ne hinimuwan din.

Eggipenuen te binu ka ubab din wey iling ded kapeit te binu ne insendad din te duma.*

7 Ke amana rin dayana ka pegkeetew rin wey subla ne halamlamen te karatuan,

iling naan ded degma due karakel ka legpad kandin wey ka peglungku din.

Su migpaambug sikandin ne migkahi:

'Iling a te rayna ne migpin-nuu te trunu!

Kena a ne balu, wey kena ad iya eglungku!'

8 Sikan naa ka egkabaybaryaran sikandin te me salerep ne eggingga.

Te sabeka ne aldew, eglagpu eggingga diye te kandin ka kamatayen, peglungku wey gutas wey egtutungen sikandin.

Su maresen ka Magbebaye ne Manama ne iyan eglegapd kandin."

9 Ne egmaninehew wey egmandalawit ka me Hari te kalibutan ke egkakita ran ka ebel te pegtutung kandin. Sikandan ka nenekeyilabet te malitan wey naalamlam te karatuan din. **10** Ne egkaalatan sikandan te eg-antusen din, sikan naa ka diye de sikandan egmanasindeg te madmariyu ne egkahi, "Mekeyid-u-hid-u naan de iya! Mekeyid-u-hid-u naan de iya ka egkahuhud ne siyudad ne Babilunya! Inleg-paran sikandin te senge uras del!"

11 Ne egmaninehew wey egmanlungku ka me nigosyanti te kalibutan tenged kandin, su warad e egbebeli te me beleye dan **12** ne bulawan, pelata, mahal ne

18:4 Isa 48:20; Hir 50:8; 51:6,45. **18:5** Hin 18:20-21; Hir 51:9. **18:6** Sal 137:8; Hir 50:29. * **18:6** Te Grigu: eglupien ka kapeit te binu ne insendad din. **18:7** Isa 47:7-9. **18:9** Isi 26:16-17. **18:11** Isi 27:31,36. **18:12** Isi 27:12-13,22.

me batu, me pirlas, me hinabel ne mahal, ubi se batek, mewumel-humel, malalab-lalab, wey langun ne klasi te meemut ne me kayu, wey langun ne kapandayan ligkat te panayew te ilipanti, wey mahal ne me kayu wey me burunsi, putew wey mateles ne pahang.¹³ Warad egbebeli te me sinamun wey me leggu, insinsu wey mira, mahal ne insinsu[†] wey binu, mentika wey harina wey trigu, me baka wey me karniru, me kudde wey me karwahi, wey minsan me etew ne me uripen.¹⁴ Migkahiyani te me nigosyanti ka siyudad, "Naawe e ka langun ne igkeup-upii nu ne egkaangken, wey nallaag e ka langun ne karatuan wey mateles ne kasangkapan nu, ne kene nud en iya egkakita pad sika langun!"¹⁵ Ka me nigosyanti ne nenaddatu tenged te pegtitinda wey pegpammitew ran te egkase-leppian te seeye ne siyudad, egkaalatan te eg-antusen din. Sikan naa ka diye de sikandin egmanasindeg te madmariyu ka egmanine-hew wey egmandalawit¹⁶ ne egkahi, "Mekeyid-u-hid-u naan de iya! Mekeyid-u-hid-u naan de iya ka egkahuhud ne siyudad! Sikandin ka migpuunan ne nenaratu ka langun ne due me unturanan diye te dahat tenged te karatuan din. Piru nareetan sikandin te senge uras de!"

dayani te me bulawan wey me mateles ne batu wey me pirlas ka lawa rin!¹⁷ Piru nareetan ka dakel ne karatuan din te senge uras de!"

Ne egmanasindeg diye te mariyu ka langun ne me kepitani te me barku wey ka me trabahanti ran, wey ka langun ne nanguntud dutu, wey ka langun ne diye te dahat se keuyahan.¹⁸ Egmanguleyi sikandan te pegkakita ran te ebel te nasilaban ne siyudad ne eggendue: "Warad iya egpekeiling te sika ne siyudad ne egkahuhud."¹⁹ Egbukbukan dan te me alinepung ka me ulu ran te sasangan ne egmandalawit wey egmanguleyi ne egkahi, "Mekeyid-u-hid-u naan de iya! Mekeyid-u-hid-u naan de iya ka egkahuhud ne siyudad! Sikandin ka migpuunan ne nenaratu ka langun ne due me unturanan diye te dahat tenged te karatuan din. Piru nareetan sikandin te senge uras de!"

²⁰ "Gale-gale kew ka nangugpe te langit tenged te insahapan din. Gale-gale kew degma me apustulis, me prupita wey me keet-etawan te Manama su inlegparan e sikandin te Manama tenged te immangimu rin kaniyu!"

²¹ Nataman, impurut te maresen ne panalihan ka bubuyahen ne batu ne eg-

[†] **18:13** Te Grigu: prankinsinsu.

18:15 Isi 27:31,36.

18:17 Isa 23:14; Isi

27:26-30.

18:18 Isi 27:32.

18:19 Isi 27:30-34.

18:20 Diy 32:43; Hir 51:48.

18:21 Hir 51:63-64; Isi 26:21.

pekeiling te galingan ne batu wey indegpak din diye te dahan wey migkahi, "Iling kayi kasumpit ka pegkahuhus te Babilunya, wey kenade sikandin egkakita pad.²² Kenad egkarineg pad due te sika ne siyudad ka laheng te me alpa wey te mangngulahing wey te mangateu ne egmamulendag wey egmanutrumpita. Ne warad e man-e egkakita ne me talaggimu te minsan nekey ne kapandayan, wey warad e egkarineg ne dahing te galingan.²³ Ne warad e sulu ne eglayag pad due te kandin, wey warad laheng te egpangasawa wey te egpangasawen ne egkarineg. Sika ka legpad kandin su iyan mabantug te kalibutan ka me nigusyanti rin wey inlimbungan din ka me nasud pinaahi te salamangka!"

²⁴ Ne inlegparan te Manama ka egkahuhud ne siyudad tenged su diye egkakita ka me langesa te me prupita wey te keet-etawan te Manama, wey ka langun ne impangimatayan kayi te kalibutan.

19

¹ Te pegkapenga kayi, due narineg ku ne henedue te susuluhi ne etew ne migpanaman-taman migmanguleyi diye te langit ne migkahi, "Egdayanen ta ka Manama ne mabantug wey maresen ne iyan

migluwas kanta,² tenged su malehet wey matareng ka peggukum din. Inlegparan din ka egkahuhud ne malitan ne egpamelekye te lawarin ne iyan nakarereet te kalibutan pinaahi te agkey rin. Insulian sikandin te Manama te pegpangimatey rin te me suluhuanen din."³ Ne migpanguleyi sikandan mig-abey ne miggenendue, "Egdayanen ta ka Manama! Egparibabew te ware egtamanan ka ebel te insilaban ne siyudad!"⁴ Ne migusengul wey migsimba diye te Manama ne migpinnuu te trunu ka daruwa ne pulu wey hep-at (24) ne igbuyag wey ka hep-at ne hinimuwan ne eggeheyinawa ne migkahi, "Malehet iya! Egdayanen ta ka Manama!"

Ka sahakeen te kasal te Nati ne Karniru

⁵ Ne due laheng ne migpuun te trunu ne migkahi, "Sikaniyu langun se me suluhuanen din ne migtahud kandin, mabantug ma wey se kene, dayana niyu ka kanta ne Manama!"⁶ Nataman, nakarineg ad e man-e te laheng ne egpekeiling te guhulubi ne me etew wey egpekeiling man-e te lehes te dakel ne sampew, wey egpekeiling te dahing te kekesehi ne dagsang te luhung. Ne migkahi, "Egdayanen ta ka Manama, su mighari e sikandin se Maresen ne Magbebaye ta!

⁷ Eggale-gale ki amana wey egdayanen ta ka katelesan din su miggungume e ka timpu te kasal te Nati ne Karniru. Ne nakangan-gandam e ka eg-asaween din, ⁸ wey impasaluuban e sikandin te meupiya ne hinabel ne masil-ew wey malinis.” Ne iyan igpasabut kayi ka meupiya ne hinimuwan te keet-etawan te Manama.

⁹ Ne migkahiyan a te panalihan, “Isulat nu seini: Keupianan te seeye se in-ninggat te sahakeen te kasal te Nati ne Karniru!” Ne migkahiyan e pad man-e nikandin, “Malehet iya seini ne lalag te Manama.”

¹⁰ Ne mig-usengul ad diye te tangkaan din eyew te pegsimba kandin piru migkahiyan a nikandin, “Kene nu himuwa sika! Iyan nu simbaa ka Manama, su suluhuanen e re degma iling keykew wey te me suled nu ne migtuman te pegpanulu ne impanengneng ni Hisus.”

Su ka pegpanulu ne impa-nengneng ni Hisus, sikan ded iya degma ka impataha te me prupita.

Ka migpangudde te maangkag ne kudde

¹¹ Nataman, nakita ku ne nalukatan ka langit, wey due maangkag ne kudde ne impanguddaan te egnaranan ki Matinumanen wey Malehet. Matareng ka

peggukum wey ka pegpakig-ehet din te me kuntere din.

¹² Egpekeiling te hapuy ne egkaleleg ka mata rin wey masulug ka kuruna rin. Ne due ngaran ne nakasulat diye te kandin ne ware minsan sabeka ne nakanengneng dutu angin e kandin. ¹³ Migsaluub sikandin te kumbale ne in-eled te langesa, wey mignaranan sikandin, “Ka Lalag te Manama.” ¹⁴ Migsinundul kandin ka me sundalu diye te langit ne nangudde te me maangkag wey nangukumbale sikandan te hinabel ne maangkag wey malinis.

¹⁵ Ne due miglihawang ne mahalang ne kampilan diye te be-be din eyew igdereet te me nasud. Egmanduan din sikandan te ware keyid-u, * wey igpakita rin ka langet te Maresen ne Manama iling te egkelesen ne behas te paras diye te kelesanan. ¹⁶ Ne due ngaran ne nakasulat diye te kumbale din wey diye te bubun din ne eggenendue: “Hari te langun ne me Hari wey Ahalen te langun ne me ahalen.”

¹⁷ Nataman, due nakita ku ne panalihan ne migsasindeg diye te aldew. Impanaman-tamanan din kuleyii ka langun ne me manuk-manuk ne nanlayang diye te awawangan ne migkahi: “Hendini kew eyew egkalibulung kew te dakel ne sahakeen

19:9 Mat 22:2-3. **19:11** Isi 1:1; Sal 96:3; Isa 11:4. **19:12** Dan 10:6. **19:15** Sal 2:9; Isa 63:3; Huwil 3:13; Imp 14:20. * **19:15** Te Grigu: egbantayan din sikandan pinaahi te baras ne putew. **19:17** Isi 39:17-20.

te Manama, ¹⁸ su eyew egpakakeen kew te sapu te me Hari wey te pangulu te me sundalu wey te me sakup dan[†], wey te sapu te me kudde wey te migmangudde kayi, wey te sapu te langun ne etew, uripen ma wey se kene, mabantug ma wey se kene!"

¹⁹ Nataman, nakita ku ka makaliyas-liyas ne mananap wey ka me Hari te kalibutan ne miglibulung duma te me sundalu ran eyew egpakig-ehet te migpangudde wey te me sundalu rin. ²⁰ Ne narakep ka makaliyas-liyas ne mananap wey ka kene ne malehet ne prupita ne miggimu te me kein-inuwan para te makaliyas-liyas ne mananap. Ne pinaahi te sika ne me kein-inuwan, nalimbungan din ka me etew ne nakulitan te kulit te makaliyas-liyas ne mananap wey migsimba te larawan din. Indegpak sikandan se daruwa ne manekal pad diye te linew ne hapuy ne egkanlabkanlab te asupri. ²¹ Ne impangimatayan ka langun ne me sundalu ran pinaahi te kampilan ne eglihawang puun te bebe te migpangudde; ne nenabbulung-bulung ka me manuk-manuk ne nangeen te me sapu dan.

20

Ka 1,000 ne leg-un

[†] **19:18** Te Grigu: manekal ne me etew.
20:4 Dan 7:9,22.

¹ Ne due nakita ku ne sabeka ne panalihan ne miglene puun te langit ne miguyan te yabi te bitu ne ware tamanan wey te bubuyahen ne keddina. ² Ne indakep e te panalihan ka salimbaweng ne iyan ka tapey ne uled ne ahalen te me busew wey ke si Meibulan naa, wey imbaku din e seled te sabeka ne libu (1,000) ne leg-un. ³ Ne in-ulug e te panalihan ka salimbaweng diye te bitu ne ware tamanan, ne inlekeban wey intuusan din e ka bitu eyew kenad e egpakanlimbung te me nasud taman te eglihad e ka sabeka ne libu (1,000) ne leg-un. Pegkapenga due, keilangan ne eglekaan sikandin te kene de egkaluhay.

⁴ Nataman, due nakita ku ne me trunu wey ka naminnuu dutu imbehayan te katenged te peggukum. Ne nakita ku degma ka me gimukud te seeye se impanempuhan te ulu tenged te pegpamalehet dan te impanengneng ni Hisus wey tenged te lalag te Manama. Ware sikandan migsimba te makaliyas-liyas ne mananap wey te larawan din, wey ware dan pakuliti ka me buked wey me belad dan te kulit din. Neneuyag sikandan wey mighari duma ki Kristu te sabeka ne libu (1,000) ne leg-un. ⁵ Sika ka an-anayan ne pegkeuyag. Ware neuyag ka duma ne me

19:20 Imp 13:1-18. **20:2** Hin 3:1.

minatey te ware pad miglihad ka sabeka ne libu (1,000) ne leg-un.⁶ Ka pegkalagkes te minsan hentew te ananayan ne pegkeuyag, egpanalanginan sikandin wey matulus. Kenad e sikan dan epakaneem-neem te ikarangeb ne kamatayen, ke kene, egkeyimu sikandan ne me talagpanubad te Manama wey ni Kristu, wey eghari sikandan duma ki Kristu te sabeka ne libu (1,000) ne leg-un.

Ka pegkatalu ni Meibulan

⁷ Ke eglihad e ka sabeka ne libu (1,000) ne leg-un, eglekaan e si Meibulan puun te imprisuwan kandin. ⁸ Ne egliahwang sikandin eyew eglimbungan ka me nasud* te intiru ne kalibutan ne migimmuan te Gug wey Magug. Eglibulungen din ka me etew eyew te pegbubunu, wey epekeiling sikandan kasulug te pantad diye te ilis te dahat. ⁹ Ne miggulanap sikandan te intiru ne kalibutan wey inlingkusan dan ka kampu te me keet-etawan te Manama wey ka inggeyinawaan din ne siyudad. Piru due hapuy ne miglene puun te langit ne miggule kandan. ¹⁰ Ne indegpak ka ahalen te me busew ne miglimbung kandan diye te linew ne hapuy wey te egkanlabkanlab ne asupri ne migdegpakan ded degma te mananap wey te kene ne malehet ne prupita. Ne egbaybayaran sikandan

diye, aldew wey marusilem te ware egtamanan.

Ka katammanan ne peggukum

¹¹ Nataman, due nakita ku ne bubuyahen ne trunu ne maangkag wey due migpinnuu dutu. Naawe ka tane wey ka langit puun te tangkaan din wey kenad e egkakita pad. ¹² Ne nakita ku ka me minatey ne mabantug wey se kene, ne nanasindeg diye te tangkaan te trunu. Ne imbelat ka me libru wey duen pad man-e libru ne imbelat ne iyan ka Libru te Umul. Miggukuman ka me minatey sumale te hinimewan dan ne nakasulat diye te me libru. ¹³ Ne due me gimukud ne nanlepew puun te dahat, puun te Kamatayen wey te inged te me gimukud ne egngaranan te Hadis, wey inggukuman sikandan langun te Manama sumale te hinimewan dan. ¹⁴ Nataman, indegpak e ka Kamatayen wey ka Hadis diye te linew ne hapuy ne iyan ka igkarangeb ne kamatayen. ¹⁵ Ne ka minsan hentew ne ware nakasulat se ngaran diye te Libru te Umul, indegpak diye te linew ne hapuy.

21

Ka iyam ne langit wey ka iyam ne tane

¹ Nataman, nakita ku ka iyam ne langit wey ka iyam ne tane, su ka an-anayan ne

20:8 Isi 7:2; Isi 38:2,9,15. * **20:8** Te Grigu: hep-at ne pikungan. **20:11** Dan 7:9-10. **21:1** Isa 65:17; 66:22; 2Pid 3:13.

langit wey tane naawe e, wey warad e degma ka dahat.
² Ne nakita ku ka Matulus ne Siyudad ne iyan ka iyam ne Hirusalim ne natuntun puun te Manama ne diye te langit. Naandam e seeye iling te egpangasaween ne neyimmimasaran e eyew te pegtemu te eg-asawa kandin.
³ Ne due heemeni ne laheng ne narineg ku puun te trunu ne miggenendue: "Pammineg kew! Diyad te me etew ka ugpaan te Manama, wey egleitung e sikandin kandan. Ne keetetawan din e sikandan wey egdumaan din sikandan, wey Manama ran e sikandin.
⁴ Eg-punasen din ka me luwe dan. Ne warad egpatey, warad eglungku, warad egsinehew, wey warad egkasakitan tenged su ka tapey ne pegugpe naawe e."

⁵ Ne migkahi ka seeye se migpinnuu diye te trunu, "Na, eggimuwen ku ne iyam ka langun." Ne migkahi pad man-e sikandin, "Isulat nu seini se inlalag ku su egkasalihan wey malehet."
⁶ Ne migkahiyan a nikandin, "Natuman e ka langun! Sikeddiey ka Alpa wey ka Umiga,* ka bunsuranan wey ka katammanan. Seeye se nammaraan egbehayan ku te migsesebseb ne weyig ne ware bayad ne egpakabehey te umul.
⁷ Ka egpanalu

ki Meibulan, egpakaangken kayi wey Manama ad nikandin wey egkaanak kud sikandin.
⁸ Piru ka me liyasen, ka ware migmalintuu, ka miggimu te mallindit, ka me mangngimatey, ka egpeyilabetey ne kene ne alunggun, ka egmamulingan, ka migsimba te me diyusdiyus, wey ka langun ne ubaten, egpekeendiye te linew te egkanlabkanlab ne hapuy wey asupri. Seeye ka igkarangeb ne kamatayen."

Ka iyam ne Hirusalim

⁹ Nataman, migparani keddi ka sabeka te seeye se pitu ne panalihan ne nang guyan te pitu ne yahung ne napenu te katammanan ne me salerep. Ne migkahiyan a nikandin, "Hendini ka, igpapitew ku keykew ka malitan ne eg-asaween te Nati ne Karniru."
¹⁰ Ne inumaan ad te Panisingan te Manama wey in-uyan ad te panalihan diye te ampw te titikangi ne bubungan wey impapitew rin keddi ka Matulus ne Siyudad ne iyan ka Hirusalim ne natuntun puun te Manama ne diye te langit.
¹¹ Miglayag seeye te katelesan te Manama, wey ka ilak dutu egpekeiling te mahal ne batu ne haspi, wey titingawi iling te kristal.
¹² Ne makepal† wey matikang ka alad kayi ne batu ne due

21:2 Isa 52:1; Imp 3:12; Isa 61:10.

25:8; Isa 35:10; 65:19.

21:6 Isa 55:1.

litra te Grigu ne alpabitu, ka Umiga iyan degma ka katammanan ne litra.

2Sam 7:14; Sal 89:26-27.

21:10 Isi 40:2.

21:3 Isi 37:27; Lib 26:11-12.

21:4 Isa

* **21:6** Ka Alpa iyan ka an-anayan ne

Grigu: bubuyaheen.

21:7 2Sam 7:14; Sal 89:26-27.

21:12 Isi 48:30-35.

† **21:12** Te

sapulu wey daruwa (12) ne gumawan ne imbantayan te sapulu wey daruwa (12) ne panalihan. Nakasulat diye te me gumawan ka ngaran te sapulu wey daruwa (12) ne tribu te Israil.¹³ Due tatelu ne gumawan te tagse kakiliran te alad: tatelu diye te igsile, tatelu diye te igkahibang ne balabahan dapit te igsile, tatelu diye te igkakawanan ne balabahan dapit te igsile, wey tatelu diye te iglineb.¹⁴ Ne due sapulu wey daruwa (12) ne pabunsuran te alad te siyudad ne insulatan te ngaran te sapulu wey daruwa (12) ne apustulis te Nati ne Karniru.

¹⁵ Ka panalihan ne migpakiglalag keddiey, due igseked ne bulawan ne in-uyan din eyew igseked te siyudad wey te me gumawan, wey te alad kayi.

¹⁶ Hep-at ka pikungan te siyudad wey nekeg-iling ka kalayat din wey ka kaluag. Ne inseked te panalihan ka siyudad wey daruwa ne libu wey hep-at ne gatus (2,400) ne kilumitru ka kalayat, wey iling ded degma ka kaluag wey ka katikang kayi.

¹⁷ Inseked din degma ka alad dutu wey hen-em ne pulu (60) ne mitrus ka katikang[‡]. Ka igseked ne in-uyan din, iling ded te seked ne layun eggamita te etew te pegseked.

¹⁸ Innimu ligkat te batu ne haspi ka alad te siyudad,

wey neelin ne bulawan ka siyudad wey amana ne titingawi iling te bildu.¹⁹ Ne indayan-dayanan te langun ne klasi te tetelesi ne batu ka pabunsuran te alad te siyudad. Haspi ka an-anayan ne pabunsuran, sapiru ka igkarangeb, agata ka igkatelu, wey ismiralda ka igkeep-at.²⁰ Ne sardunika ka igkalimma, kurnalina ka igkeen-em, krisulitu ka igkapitu, birilu ka igkawalu, tupasyu ka igkasiyam, krisuprasu ka igkasapulu, hasintu ka igkasapulu wey sabeka, wey amatista ka igkasapulu wey daruwa.²¹ Neelin ne pirlas ka sapulu wey daruwa (12) ne gumawan. Innimu puun te sabeka ne pirlas ka tagse gumawan, wey neelin ne bulawan ka dalan te siyudad wey mating-ew iling te bildu.

²² Ne ware nakita ku ne timplu diye te siyudad su iyan e timplu ka Magbebaye ne Maresen ne Manama wey ka Nati ne Karniru.²³ Kenad e ne keilangan pad te layag te aldew wey bulan ka siyudad, tenged su iyan e eglayag dutu ka katelesan te Manama, wey te Nati ne Karniru.²⁴ Ne egkalaya-han ka langun ne etew te kalibutan te layag din, wey egpanguyanen te me Hari te kalibutan ka langun ne karatuan dan diye.²⁵ Kenad eglekeban ka me gumawan

^{21:15} Isi 40:3. ^{‡ 21:17} katikang: wey ke kakepal. ^{21:18} Isa 54:11-12.
^{21:23} Isa 60:19-20. ^{21:24} Isa 60:3. ^{21:25} Isa 60:11.

su layun maaldew diye wey warad marusilem. ²⁶ Ne eg-panguyanen diye te siyudad ka langun ne karatuan wey ka imbantug te me nasud. ²⁷

Piru ware epakaseled dutu ne minsan nekey ne malindit wey ke minsan hentew ne malindit se himu wey ka me ubaten. Su iyan de epakaseled dutu ka nakasulat se ngaran diye te libru te Nati ne Karniru ne iyan ka Libru te Umul.

22

¹ Nataman, impakita te panalihan kuddi ka weyig ne epakabehey te umul. Migpangilak-ilak seini iling te kristal, wey diye migpuun te trunu te Manama wey te Nati ne Karniru ² wey migpahun-elat te dalan te siyudad. Ne ka tagse ilis te weyig due kayu ne epakabehey te umul, ne egebebehas te nakalkalasi ne behas te tagse bulan, wey ka dewun kayi delemetan te langun ne etew te kalibutan. ³ Warad e minsan nekey ne indilus te Manama ne diye te siyudad.

Ne diye te siyudad ka trunu te Manama wey te Nati ne Karniru, ne epamakayen sikandin te me suluhuanen din. ⁴ Egkakita ran ka ualaule te Manama wey igsulat diye te me buked dan ka ngaran din. ⁵ Ne warad marusilem diye, wey kenad sikandan egkeilangan te

layag te sulu wey te aldew tenged su iyan dan e kalayag ka Magbebeye ne Manama, wey eghari sikandan te ware egtamanan.

Ka peglibed ni Hisus

⁶ Ne migkahiyan a te panalihan, “Egkasalihan wey malehet ka inlalag ku. Su ka Magbebeye ne Manama ne migbehey te Panisingan din te me prupita, migpeuyan degma te panalihan din eyew te pegpanugtul te me suluhuanen din ke nekey ka mahaan e egkeyitabu.”

⁷ Migkahi si Hisus, “Pammineg kew! Mahaan ad e eggginguma! Keupianan te seeye se migtuman te langun ne intagne te seini ne baseen!”

⁸ Sikeddiey si Huwan, ka nakarineg wey ka nakakita te langun ne nasulat te seini ne baseen. Te nakita kud wey te narineg kud seini, mig-usengul a diye te tangkaan te panalihan ne iyan migpapitew kuddi te langun eyew te peggimba kandin. ⁹ Piru migkahiyan a nikandin, “Kene nu himuwa sika! Iyan nu simbaa ka Manama, su suluhuanen e re degma te Manama iling keykew wey te me suled nu ne me prupita, wey seeye se egtuman te nasulat te seini ne baseen.” ¹⁰ Ne migkahiyan e pad man-e nikandin, “Kene nu iheles te me etew ka intagne te seini ne baseen su mahaan

e seini egkatuman. ¹¹ Seeye se mareet, egpepabulusen de due ne eggimu te mareet, wey seeye se mallindit, egpepabulusen de due ne eggimu te mallindit. Ne seeye se matareng, egpepabulusen de due ne eggimu te matareng, wey seeye se matulus, egpepabulusen de due ne eg-ugpe ne matulus.”

¹² Migkahi si Hisus, “Pammineg kew! Mahaan ad e eggingsuma, wey eguyan a te unag eyew igbehey te tagse sabeka sumale te hinimuwan din. ¹³ Sikeddi ka Alpa wey ka Umiga,* ka an-anayan wey ka mewuri, ka bunsuranan wey ka katammanan.”

¹⁴ Keupianan te seeye se migpami-pi te me kumbale dan su egbehayan sikandan te katenged te pegbaye te gumawan peendiye te siyudad wey te pegkeen te behas te kayu ne epakabehey te umul. ¹⁵ Piru kene epakaseled dutu ka me asu ne iyan ka mallindit ne me etew, ka egmamulingan, ka egmeyilabetey ne kene ne alunggun, ka me mangngimatey, ka migsimba te me diyus-diyus wey ka langun ne eggelebek eglilimbung.

¹⁶ “Sikeddiey si Hisus ka migpeuyaan te panalihan ku eyew te pegpataha kayi kaniyu langun ne due te me punduk te migmalintutuu. Sikeddiey ka kabuhalan ni

Dabid wey ka malayag ne bituen ne Buntetale.”

¹⁷ Ka Panisingan te Manama wey ka eg-asaween egkahi, “Hendini ka!”

Ne ka langun ne egdineg, epakahiyyen degma, “Hendini ka!”

Ka langun ne nammaraan egparani, wey ka egkeupian ne eg-inum, egdawat te ware bayad ne weyig ne epakabehey te umul.

Ka pegpanaha-taha

¹⁸ Seini ka igpaneypaney ku kaniyu langun ne nakarineg te me tagne te seini ne baseen: ka minsan hentew ne egtimul te nasulat kayi, egtimulan degma te Manama ka legpad din ne iyan ka me salerep ne nasulat te seini ne baseen. ¹⁹ Ne ka minsan hentew ne egawe te minsan nekey ne intagne te seini ne baseen, eg-aween degma te Manama ka katenged din te pegkeen te behas te kayu ne epakabehey te umul wey te pegugpe diye te Matulus ne Siyudad sumale te nasulat te seini ne baseen.

²⁰ Ne migkahi ka migpemalehet te langun ne naksulat te seini ne baseen, “Mahaan ad en iya eggingsuma!”

Malehet iya! Hendini kad e Hisus ne Magbebaye!

²¹ Ka keupiya wey keyidu ne egpuun te Magbebaye ne si Hisus, egkaangken niyu langun.

22:12 Isa 40:10; 62:11; Sal 28:4; Isa 40:10; Hir 17:10. **22:13** Imp 1:8; Isa 44:6;

48:12; Imp 1:17; 2:8. * **22:13** Ka Alpa iyan ka an-anayan ne litra te Grigu ne alpabitu, ka Umiga iyan degma ka katammanan ne litra. **22:14** Hin 2:9; 3:22.

22:16 Isa 11:1,10. **22:17** Isa 55:1.

22:18 Diy 4:2; 12:32.

